



Tuhun tsaa tsa nacoo
jutu mañi yo
Jesucristotsi yo

San Juan Colorado Mixtec New Testament

Contents

San Mateo	1
Marcos	51
Lucas	83
Juan	136
Los Hechos	174
Romanos	224
I Corintios	244
II Corintios	263
Gálatas	277
Efesios	284
Filipenses	291
Colosenses	296
I Tesalonicenses	301
II Tesalonicenses	306
I Timoteo	309
II Timoteo	315
Tito	319
Filemón	322
Hebreos	324
Santiago	339
I San Pedro	344
II San Pedro	350
I San Juan	354
II San Juan	359
III San Juan	360
San Judas	361
El Apocalipsis	363

Tuhun tsaa tsa nacoo jutu mañi yo Jesucristo tsi yo
New Testament in Mixtec, San Juan Colorado (MX:mjc:Mixtec, San Juan
Colorado)

copyright © 1994 Wycliffe Bible Translators, Inc.

© 1994, Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0424-9

PDF generated on 21 Sep 2016 from source files dated 21 Sep 2016

c270ec54-172a-541f-83e6-7760f619c744

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

Tuhun Nyoo Tsa Tyaa Ra Mateo

Nyivi ra Jesucristo tsa tsicoo tsa ndi cumañi ca cacu ra

(Lc. 2.33-38)

¹ Ihyá nyecú tandíhi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuví tsi ra.

² Sehe ra Abraham cuví tsi ra Isaac, tan sehe ra Isaac cuví tsi ra Jacob. Tan sehe ra Jacob cuví tsi ra Judá tsihin tandíhi ra yañi ra. ³ Tan ra Fares tsihin ra Zara sehe ra Judá tsihin ña Tamar cuví tsi ra naha. Tan sehe ra Fares cuví tsi ra Esrom, ra cuví jutu ra Aram. ⁴ Tan sehe ra Aram cuví tsi ra Aminadab, jutu ra Naasón. Tan sehe ra Naasón cuví tsi ra Salmón. ⁵ Tan ra Booz, sehe ra Salmón tsihin ña Rahab cuví tsi ra. Tan sehe ra Booz tsihin ña Rut cuví tsi ra Obed, jutu ra Isaí. ⁶ Tan ra David, ra cuví rey, sehe ra Isaí cuví tsi ra. Tan sehe ra rey David tsihin ñaha tsa cuví ñasihihí ra Urías cuví tsi ra Salomón.

⁷ Tan sehe ra Salomón cuví tsi ra Roboam, ra cuví jutu ra Abías. Tan sehe ra Abías cuví tsi ra Aza. ⁸ Tan sehe ra Aza cuví tsi ra Josafat, ra cuví jutu ra Joram. Tan sehe ra Joram cuví tsi ra Uzías. ⁹ Tan sehe ra Uzías cuví tsi ra Jotam, ra cuví jutu ra Acaz. Tan sehe ra Acaz cuví tsi ra Ezequías. ¹⁰ Tan sehe ra Ezequías cuví tsi ra Manasés, ra cuví jutu ra Amón. Tan sehe ra Amón cuví tsi ra Josías. ¹¹ Tan sehe ra Josías cuví tsi ra Jeconías tsihin tandíhi ra yañi ra. Tsicoo ra naha quivi tñi ra ñuu Babilonia naha ra tsi nyivi Israel, tsa cua cuhun ñi cuví ñi musu ra ñuu Babilonia can naha ra.

¹² Tsa yahá can, tan tsicoo sehe ra Jeconías, tan ra ican cuví ra Salatiel, jutu ra Zorobabel. ¹³ Tan sehe ra Zorobabel cuví tsi ra Abiud, ra cuví jutu ra Eliaquim. Tan sehe ra Eliaquim cuví tsi ra Azor. ¹⁴ Tan sehe ra Azor cuví tsi ra Sadoc, ra cuví jutu ra Aquim. Tan sehe ra Aquim cuví tsi ra Eliud. ¹⁵ Tan sehe ra Eliud cuví tsi ra Eleazar, ra cuví jutu ra Matán. Tan sehe ra Matán cuví tsi ra Jacob. ¹⁶ Tan ra Jacob cuví jutu ra José, yii ña María. Juvín ña cuví síhi ra Jesús ra cuví Cristo, o cuní tsi catyí, ra tsa jaquitsi Nyoo tyin quihi ndaha tsi yo.

¹⁷ Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tñi ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata fi nda cuanda quivi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehen cuví tan cacu ra Jesucristo: tsa yahá cundaay tñiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihí sehe ña tsa cuenda Tatyi li Nyoo. ¹⁹ Tan ra José, ra cua cuvi yii ña, vaha xaan iñi ra. Ña cuví ra cuhva ra ticanuu tsi ña. Yacan cuenda tsica iñi ra tsa nacoo xeehe ra tsi ña tan ña cua tindaha ca ra tsihin ña. ²⁰ Tan tsitsi tsa tsicá iñi ra yacan, quituví iñi ángel Jutu Mañi yo nuu ra nu quixí ra. Tan nyehé ra ñumaahna, tan catyí ángel can tsihin ra:

—José, tata ra David, ña caca iñi un quihiun tsi ña María cuvi ña ñasihihí un, tñin sehe ña tsa cua cacu, sehe Tatyi li Nyoo cuví tsi. ²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu nyayivi —catyí ángel can tsihin ra José.

²² Tacan cuví tyin tacan tan cundaa tsa cahán ra cuví ndusu yuhu Jutu Mañi yo tahán tsanaha.

²³ Tan catyí ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iñi sehe ña. Tan cua cunañi ra: Emanuel.

Tan sivi can cuñi tsi catyí: “Nyoo iyó ra tsihin yo.”

²⁴ Tan tsa ndoto ra José, javahá ra tumaa catyí ángel can tsihin ra. Quihiñ ra tsi ña María tyin cuvi ña ñasihihí ra. ²⁵ Maa tyin ña quixí ra tsihin ña nda cuanda tsa yahá cacu sehe ña. Tan jacunañi ra tsi lee can: Jesús.

Nu cuahán ra tsitó xaan, ra cuví rey, cua nyehé ra naha nu cacu ra Jesús

¹ Cacu ra Jesús ñuu Belén tsa canyíi nu cuví Judea. Tan quivi can ra cuví rey Judea nañi ra Herodes. Tacan tan tsaa juhva ra naha nda ñuu Jerusalén. Quee ra naha ityí nu caná ñicanyíi. Tan ra tsitó xaan cuví ra

naha. ²Tsicá tuhun ra naha tsi nyívi tan catyí ra naha:

—¿Nu maa nyíi ra cuví rey cuenda nyívi Israel? Tyin ityi nu caná ñicanyii nyehé ndi tiñuu tsa tsahá cuenda tyin cacú ra ityi ihyá. Tan vatsí ndi vatsí jacobhnu ndi tsi ra —catyí ra naha.

³Quíví tsa tsító ra rey Herodes tsa cahan ra can naha ra, tuñu xaan cuñí ra cuví. Tacan tucu tandihí nyívi ñuu Jerusalén can.

⁴Tacan tan cana ra Herodes tsi tandihí ra jutu tsa cuví ityi nuu tsihin ra cuví jutu tan tsihin tandihí ra cuví maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo.

⁵Tan nacahán ra can naha ra tan catyí ra naha:

—Ñuu Belén tsa canyí Judea, ndacan taahán tsi cacu ra tyin tyehen tyaa ra cuví ndusu yahu Nyoo nu tutu tahan tsanaha:

⁶Tan yooho Belén ñavin iin ñuu luhlu ñi cuví un tsa nuu tandihí maa ñuu tsa cayucú Judá

tyin nuu yooho cua quita ra cua quihi ndaha tsi nyívi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

⁷Tacan tan cana xeehe ra Herodes tsi ra tsító xaan can naha ra, tan tsicá tuhun ra tsi ra naha náa quíví tan náa hora quituvi tiñuu can. ⁸Tacan tan jacuhún ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatum nañíhi ndo tsi ra, quisi catyí tuhun ndo tsihin yu, tyin cuhun ndihí yu cujacahnu yu tsi ra —catyí ra Herodes tsihin ra naha.

⁹Tsa tsíñi ra tsa tsító xaan can naha ra tsa cahan ra Herodes, tan quihiñ ra naha ityi cuahán ra naha. Tan tiñuu tsa nyehé ra naha ityi nu caná ñicanyii can, cuahán tsi ityi nuu ra naha. Tan tsicuiñi tsi maa maa siquí nu canyí ra lee can. ¹⁰Tan tsa nyehé ra tsító xaan can naha ra tyin tsicuiñi tiñuu can, sií xaan cuñí ra naha. ¹¹Tan quihiñ ra naha tsitsi vehe nu canyí lee can. Tan nyehé ra naha tsi ra tsihin ña María, sihi ra. Tan tsicuiñi tsító ra naha tyin jacobhnu ra naha tsi lee can. Tacan tan nuñá ra naha yahu caja tsa ndahá ra naha. Tan tava ra naha regalo tsa cuví xuhun cuaan, tan cutu vixi, tan ndutya tami tsa nañí mirra. Tan tsahá ra naha tsi lee can. ¹²Tsa yahá tsa

nyehé ra naha tsi ra Jesús tan cuanuhu ra naha. Tan tsa cuanuhu ra naha nyehé ra naha ñumaahna tan catyí tsi tyin ña taahán tsi cuhun ra naha cucatyí tuhun ra naha tsihin ra Herodes. Yacan cuenda siín ityi cuanuhu ra naha.

Nu tsiny xeehe ra José tan ña María tsihin lee sehe ñi nda Egipto

¹³Tsa yahá cuahán ra tsa tsító xaan can naha ra, tacan tan iin ángel Jutu Mañi yo quituvi ñuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihyá, tsihin sihi ra, tan cuhun ndo nda ñuhu Egipto. Ndoo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihyá tyin cuñí ra cahñi ra tsi ra —catyí ángel can tsihin ra José.

¹⁴Tacan tan nduvitá ra José tsacuaa can. Tan quihiñ ra tsi lee can tsihin sihi tsi. Tan cuahán ñi nda Egipto. ¹⁵Ndacan tsicoó ñi nda cuanda tsa tsíñi ra Herodes. Tacan cuví tyin cundaä tsa cahan ra cuví ndusu yahu Jutu Mañi yo tahan tsanaha jahá Nyoo. Tyehen catyí ra: “Nda Egipto cana yu tsi Sehe yu”, catyí ra.

Nu tava tyiñu ra Herodes na cahñi ra naha tsi ra nyíhi

¹⁶[Tsa ndi cumañi ca cúu ra Herodes tan ndi ndatú ra tsa quitsi nyico ra tsító xaan can naha ra] tan tsa tuví iñi ra Herodes tyin ra tsító xaan can naha ra jandaví ñaha ra naha tsi ra, tan nduxaañ xaan ra. Tan tava tyiñu ra na cahñi andarú tsi tandihí ra nyihi tsa iyó ñuu Belén can tan inga ñuu tsa cayucú yatiñ ñi, ra nyihi tsa ndi cacu nda cuanda ra nyihi tsa uvi cuiya. Tacan javaha ra tyin tsicá iñi ra tyin tacan cuiya ra Jesús tumaa catyí ra tsító xaan can naha ra tsihin ra. ¹⁷Tacan cuví tyin cundaä tsa cahan Nyoo tan tyaa ra Jeremías, ra cuví ndusu yahu ra tahan tsanaha. Tyaa ra tyehen:

¹⁸Tsiñi yo iin ndusu ñuu Ramá, tsacú tsaa nyívi, tan iyo taahán ñi.

Juvín ñi nyívi cuví tata ña Raquel, nyívi Israel, tsacú tsaa ñi tsa cuenda sehe ñi.

Maa tyin ña cuñí ñi tsa naquihin ndaahvi nyívi tsi ñi tyin tsa yahá tsihí sehe ñi, catyí tsi nu tutu Nyoo.

¹⁹Maa tyin tsa yahá tsa tsihí ra Herodes, tacan tan quituvi nyico iin ángel Jutu Mañi

yo nuu ra José nu quixí ra nda Egipto. Tan catyí ra tsihin ra:

²⁰—Ndøyvita, quihin tsi lee ihya tsihin sihi ra. Tan cunuuhu nyico ndo nda Israel, tyin tsa tsihí nyiví nducu cahñi tsi ra lee ihya.

²¹Tacan tan nduvitá ra José, tan quihin ra tsi lee can tan tsihin sihi ra. Tan cuanuhú ñi nda Israel. ²²Maa tyin quiví tsito ra José tyin ra Arquelao, sehe ra Herodes, cuví ra rey nda Judea, nayuhví ra tan ñia cuví ra cuhun ra ndacan. Tan cuanuhú ñi nda Galilea tyin tacan jacto Nyoo tsi ra tsitsi ñumaahna. ²³Tsa tsaa ñi ican, tan cuahán ñi nda ñuu Nazaret, cua coo ñi. Tan ican tsicog ñi. Tacan cuví tyin cundaq tsa cahán ra cuvi ndusu yuhu Nyoo tahán tsanaha. Tyin catyí ra naha tyin ra Jesús ra ñuu Nazaret cua cuvi ra.

3

*Nu cahán ra Juan tuhun Nyoo tsihin nyivi
(Mt. 1.1-8; Lc. 3.1-9, 15-17; Jn. 1.19-28)*

¹ Quiví tsa ndi iyó ñi ñuu Nazaret, ra Juan, ra jacoondutyá tsi nyiví, cuahán ra nu tsiquí tsa iyó Judea. Tan quitsáha caahán ra tuhun Nyoo tsihin nyivi tsa tsaa nu nyír ra.

²Tan catyí ra:

—Ndü uvi iñi ndo cuatyí ndo tyin tsa cuñí tsaa quíví cundaca ñaha Nyoo tsi yo.

³Juvín ra Juan cuví ra tsa cahán ra Isaías ra cuví ndusu yuhu Nyoo tahán tsanaha. Tan tyaa ra tsa tsahá Nyoo tsi ra tyehen: Cua tyaa soho yo ndusu ra nu caná tsaa ra nu tsiquí tan catyí ra:

“Nuña ndo iin ityi cuití.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

⁴Tan ra Juan nditsí ra jahma tsingu tsi-hin ixi camellu. Tan cinturón ra, ñii cuví tsi. Tan tica xama tsatsí ra tan tsihí ra ndutya ñuuñu. ⁵Quitsí nyiví ñuu Jerusalén tan tandíhi ñuu tsa cayucú Judea, tan nyiví tsa iyó yatyin ñi ityi yutya cahnu Jordán can; quitsí tyaa soho ñi tuhun caahán ra.

⁶Tan tsa yahá nahma ñi cuatyí ñi, ra Juan jacoondutyá ra tsi ñi yutya cahnu Jordán ican.

⁷Maa tyin nyehé ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsí ra naha tyin coondutya ra naha. Tan catyí ra tsihin ra naha:

—jNyoho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸Nasama ndo cuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo. ⁹Maa tyin ña nduyaa ndo tan catyí ndo tyin nyiví tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyiví ra Abraham. ¹⁰Tsa ndatú yatsa Nyoo tsi tandíhi ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua jahava Nyoo tsihin ndo —catyí ra Juan—. ¹¹Tsa nditsa tyin yuhu jacoondutyá yu tsi nyiví tsihin ndutya, tan cuví tsi iin seña tyin tsa ndu uví iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí li Nyoo tan tsihin ñuhu ihñi. lyó ca tunyee iñi Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. ¹²Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihu vaha ra itsi. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan.

*Nu tsicoondutyá ra Jesús
(Mr. 1.9-11; Lc. 3.21-22)*

¹³Tacan tan quita ra Jesús Galilea tan tsaa ra yutya cahnu Jordán nu nyír ra Juan, tyin cuní ra tsa jacoondutya ra Juan tsi ra. ¹⁴Tsa jihna ñi ña cuñí ra Juan jacoondutya ra tsi ra, tan quitsáha catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

¹⁵Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa jahava yo tandíhi tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶Tsa yahá tsicoondutyá ra Jesús tan quita ra tsitsi ndutya. Tan nuña andívi, tan ra Jesús nyehé ra vatsí nuú Tatyí li Nyoo, tumaa iin paloma. Tan tsaa tsi siquí ra.

¹⁷Tacan tan cahán iin ndusu ityi andívi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihin ra —catyí ndusu can.

4

*Nu nducy cuhva nu ña vaha tsi ra Jesús
(Mr. 1.12-13; Lc. 4.1-13)*

¹ Tacan tan tsindacá Tatyí li Nyoo tsi ra Jesús iin nu tsiqui, tyin cua nducu cuhva nu ña vaha tsi ra.

² Tsicoo nyitya ra uvi xico nduvi tan uvi xico tsacuaa. Tsa yahá can tan quitsi socó tsi ra. ³ Tacan tan natuhvá nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihyá, na nanduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahán ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catti nyivi tan coonyito ñi, tyin coonyito ñi tsihin tandíhi tuhun caahán Nyoo” —catyí ra Jesús tsihin nu ña vaha.

⁵ Tacan tan quihin nu ña vaha tsi ra. Tan cuahán ra tsihin nu nda ñuu ii Jerusalén. Tan jandaq nu tsi ra jiñi vehe ñuhu cahnu.

⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihyá nda cuanda nu ñuhu. Tyin catyí tsi nuu tutu Nyoo tyehen: Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un,

tan ña cua nañi tsaha un nuu yuu.

⁷ Tan nacahán ra Jesús tan catyí ra:

—Tan juvin ñi catyí tuhun Nyoo: “Ña nducu cuhva un tsi Nyoo un” —catyí ra Jesús tsihin nu ña vaha.

⁸ Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janahq nu tandíhi tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi. ⁹ Tan catyí nu tsihin ra:

—Yuhu cuhva yu tandíhi maa tsa janahá yu tsi un, tatun yooho tan cuiñi tsiti un nuu yu tan jacobhnu un tsi yu.

¹⁰ Tacan tan nacahán ra Jesús tan catyí ra tsihin nu:

—Cuaahán, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jahá tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaq ángel tan jatyinyee ra naha tsi ra.

*Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea
(Mr. 1.14-15; Lc. 4.14-15)*

¹² Quivi tsa tsito ra Jesús tyin ra Juan nyiyára vehe caa, cuahán ra nda Galilea. ¹³ Maa tyin ña ndoo ra ñuu Nazaret, nu tsahnú ra. Cuahán ra cua coo ra nda ñuu Capernaum, iin ñuu tsa canyí yatyin ñi yuhu miñi, nu ñuhu ra Neftalí yatyin ñuhu ra Zabulón.

¹⁴ Tacan tan cundaq tsa cahan ra Isaías, ra cuví ndusu yuhu Nyoo, tahán tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsiihi, nyehé ñi iin ñuhu nditsin tsa jandunditsín nu yucú ñi, catyí ra Isaías.

¹⁷ Nda cuanda quivi can, tan quitsaha caahán ra Jesús tuhun Nyoo tsihin nyivi, tan catyí ra tsihin ñi:

—Ndú uvi iñi ndo cuatyí ndo tyin tsa cuñí tsaa quivi cundaca ñaha Nyoo tsi ndo —catyí ra Jesús tsihin nyivi.

*Nu cana ra Jesús tsi cumi taahan ra tsa tiín tyaca
(Mr. 1.16-20; Lc. 5.1-11)*

¹⁸ Ra Jesús tsicá ra yuhu miñi tsa nañi Ndutya Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tiín tyaca cuví ra naha. Tan cañí ra naha traya ra naha nu ndutya. ¹⁹ Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tiín ndo tyaca, tacan cua ñihi ndo nyivi cua cuvi nyivi Nyoo —catyí ra Jesús tsihin ra naha.

²⁰ Juvin ñi cuhva can nacog ra naha traya can, tan cuahán ra naha tsihin ra Jesús.

²¹ Luxu ñi tsica ra naha ityi nuu, tan nyehé ra Jesús tsi inga uvi ca ra tsihin yañi ra: ra

Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan caná ra Jesús tsi ra naha. ²²Juvín ñí cuhva can tan nacoó ra naha tsi jutu ra naha tan yutun ndoo can, tan cuahán ra naha tsihin ra.

*Nu cuaha xaan nyivi jacuaha ra Jesús
(Lc. 6.17-19)*

²³Cuahán ra Jesús tsicá ra tandíhi ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandíhi ñí nuu cuehe tsa yihi tsi ñí. ²⁴Tacan tan tsitq' tandíhi nyivi ñuu cuenda Siria tuhun ra Jesús. Tan tsindaca ñí tandíhi nyivi cuuhví tsi ra; juhva ñí yihi tatyí ñá vaha. Tan yihi ñí tsiihí naaha ñí. Tan yihi ñí ndohó ñí cuehe xii. Tan janduvahá ra Jesús tsi tandíhi ñí. ²⁵Cuaha xaan nyivi nyicún tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañí Decápolis, nyivi iyó ñuu Jerusalén tan tandíhi ca ñuu tsa cayucú Judea, tan nyivi iyó inga tsiyo yutya cahnu Jordán.

5

*Nu cahán ra Jesús tsihin nyivi nu tsiquí
(Lc. 6.20-23)*

¹Nyehé ra Jesús tyin cuaha xaan nyivi, tan ndaq' ra iin nuu yucu. Tan tsicunya ra ican. Tacan tan nyivi tsicá tsihin ra, tsinunduvi ñí tsi ra. ²Tacan tan quitsaha jacuahá ra tsi ñí tan catyí ra:

³Nasocó Nyoo tsi tandíhi nyivi tsa tsító tyin tsiñi ñuhu ra tsi ñí, tan tsa cuenda ñí cuví nu ndacá ñaha ra.

⁴Tan tandíhi nyivi tsa cuiihya cuñí tsa cuenda cuatyí ñí, nasocó Nyoo tsi ñí tan ñá cuua coo ca ñí tucuiihya iñi.

⁵Tan tandíhi nyivi tsa ñá cahnu jahá ñí tsi ñí, nasocó Nyoo tsi ñí, tan cuua naquihin cuenda ñí ñuhu ñayivi tsa catyí Nyoo tyin cuhva ra tsi ñí.

⁶Tan tandíhi nyivi tsa cuñí xaan javaha cuhva catyí Nyoo, nasocó Nyoo tsi ñí, tan cuua jatyinyee ra tsi ñí tan cuua cuvi javaha ñí cuhva cuñí maa ra.

⁷Tan tandíhi nyivi tsa cundaahví iñi tsi inga nyivi, nasocó Nyoo tsi ñí, tan cuua cundaahvi iñi ra tsi ñí.

⁸'Tan tandíhi nyivi tsa janduvahá Nyoo añaima, nasocó ra tsi ñí, tan cuua nyehe ñí tsi ra.

⁹'Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñí tan cuua catyí ra tyin sehe ra cuví tsi ñí.

¹⁰Tan tandíhi nyivi tsa javahá cuhva cuñí Nyoo tan ndasí cuñí nyivi nyehe ñí tsi ñí, nasocó Nyoo tsi ñí, tan tsa cuenda ñí cuví nu ndacá ñaha ra. ¹¹'Nasocó Nyoo tsi nyoho tsa caahán nyivi ndavaha ñí tsata, tan javahá ñí tsa uhví tsi ndo, tan caahán ñí cuendu tsa ñá nditsa siquí ndo tsa cuenda tsa tsinú iñi ndo tsi yu. ¹²Cusí iñi ndo tun tacan javahá nyivi tsihin ndo; sii cuñí ndo, tyin cahnu xaan tan sii xaan caá tsa cua ñíhi ndo nda gloria. Tyin juvin ñí tacan javahá nyivi tsa ñá vaha tsihin tandíhi ra cuví ndusu yuhu Nyoo tahán tsanaha.

*Tatunjandihi yo tsa tsinú iñi yo tsi Nyoo cuví yo tumaa ñuhu tsa ndihí tsa uhva
(Mr. 9.50; Lc. 14.34-35)*

¹³'Nyoho tsa tsinú iñi tsi yu, tumaa ñí vaha cuví ndo. Maa tyin tatun ñii, tan ndihí tsa uhva tsi, ñá cua jandu uhva ca tsi tsa catsi yo. Ñá vaha ca ñii can. Tacan tan javita yo can, tan cuua nyivi tsata can.

Tatun tyaa yahvi vaha yo tuhun caahán Nyoo, cuví yo tumaa ñuhu tsa jandunditsín nu tsicá nyivi nu naa

¹⁴'Nyoho cuví ndo tumaa ñuhu tsa jandunditsín nu tsicá nyivi. Iin ñuu tsa canyí jiñi iin yucu, ñá cua cuvi quihi xeehe tsi.

¹⁵Ña tuhvá yo tyaa ñuhu tyuma, tan tyihí xeehe yo itsi tsitsi iin caja. Tyin tuhvá yo tyaa ñuhu tan tinyí yo itsi iin nu sucun tyin tacan tan jandunditsín tsi nu yucú yo tsitsi vehe yo. ¹⁶Tan tacan taahán tsi jandunditsín tucu nyoho tsihin ñuhu Nyoo tsa iyó añaima ndo nu tsicá nyivi. Tacan tan nyehé ñí tsa vaha tsa javahá ndo, tan jacobinu ñí tsi Jutu yo Nyoo, ra nyaá gloria.

Nu jacuahá ra Jesús tyin ñiñi xaan javaha yo tandíhi tuhun tsa tsahá Nyoo tsi yo tan jacuahá yo itsi tsi nyivi

¹⁷Ñá cuñí ndo tyin yuhu vatsí janaa yu ley tsa tsahá Nyoo tsi ra Moisés tyin tyaa ra. Tan ndi ñá vatsí janaa yu tuhun tsa tyaa tandíhi ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaa yahvi yu tsa caahán ley

can, tan catyi tuhun yu tsihin ndo náa cuñí tsi catyí ley can.¹⁸ Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley tsa tyaa ra Moisés tyin tandihi maa tsa tyaa ra naha tan cua cundaa tsi.¹⁹ Yacan cuenda, ra tsa ña tyaa yahvi cuhva catyí Nyoo, vasu iin tsa luhlu ñi; tan janahá ra tsi nyivi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaa yahvi tandihi, tan janahá ra tsi inga nyivi, cahnu xaan cua cuvi ra nu ndacá ñaha Nyoo.²⁰ Catyí yu tsihin ndo tyin tun ña tyaa yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuvi quíhvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

²¹ 'Nyoooho tsa cuaha tsaha tsiñi ndo tsa catyi Nyoo tsihin nyivi tsicoo tahan tsanaha. Catyí ra: "Ña cahñi ndo tsi nyivi, tyin tatum cahñi ndo nyivi, taahán tsi tsa cutuñi ndo."²² Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyivi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatum catyí ndo tyin soho xaan caá ñi, taahán tsi cuhun ndo anyaya tsa cuenda cuatyí can.

²³ Tan yacan cuenda quívì cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javaha un tsi yañi un,²⁴ nacoo tsa cuahán tsihin un ityi nu altar vehe ñuhu. Tan cuhun jihna un ndacan un tucanhnu iñi tsi yañi un. Tacan tan cuhun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

²⁵ Tatun iin ra tsicán cuatyí tsaha un, tan cuahán un tsihin ra nda nu nyaá ra cumí tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihí ra naha tsi un vehe caa.²⁶ Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihi xuhun tsa cua ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayii tsi yo, tan ña vaha

²⁷ 'Nyoooho tsa tsiñi ndo tyin catyí Nyoo tahan tsanaha tyin nyoooho tsa iyó ñasiihi, ña cua coo inga ñaha tsi ndo, tan ndi ñaha tsa iyó yii tan ña taahán tsi coo inga rayii tsi ña.²⁸ Maa tyin yuhu catyí yu tsihin ndo, nyoooho tsa nyehé iin ñaha tan cuñí ndo coo ndo tsihin ña, tsa tsicoo cuatyí ndo.

²⁹ ²⁹Tatun tinuu cuaha un janacavá tsi un tsitsi cuatyí, vaha taxin ca tåva un tinuu un tan javita un can. Tyin vaha ca quíhvi un nu ndacá ñaha Nyoo tsihin intuhun ñi tinuu un, tan ñavin ca tsa cuhun un anyaya tsihin nduví taahan tsi.³⁰ O tatun iin ndaha un janacavá tsi un tsitsi cuatyí, vaha taxin ca cahnya un ndaha un tan javita un can. Tyin vaha ca tsa quíhvi un nu ndacá ñaha Nyoo tsihin tsa lundu ndaha un, tan ñavin ca tsa nanii un tan cuhun un anyaya.

Nu caahán ra Jesús tyin ña vaha tsa nacoo ihñi rayii tsi ñasiihi ra

(Mt. 19.9; Mr. 10.11-12; Lc. 16.18)

³¹ 'Tan juvin ñi catyi Nyoo tsihin nyivi tsicoo tahan tsanaha tyin yóo ra nacoo ihñi ñasiihi ra, cuñí tsi tsa caní ra tutu tsa tindahá ra tsihin ña.³² Maa tyin catyí yu tsihin ndo tyin nduve ndatu iyó tsi rayii tsa nacoo ra ñasiihi ra tatun ña quituvi ña tsihin inga rayii. Tyin tatum nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatum quihin ña inga rayii cua coo ndihí cuatyí ña. Tan tacan ra tsa cua quihin tsi ña cua coo ndihí cuatyí ra.

Ña cahan yo "naha Nyoo maa"

³³ 'Tan tsiñi ndihí ndo, tyin catyí tucu Nyoo tsihin nyivi tsicoo tahan tsanaha: "Tatum catyí ndo 'naha Nyoo maa' tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo."³⁴ Maa tyin yuhu catyí yu tsihin ndo tyin ña cahan ndo "naha Nyoo maa". Tan ña cahan ndo tuhun andivi, tyin yacan cuví nu nyaá Nyoo.³⁵ Tan ndi tuhun ñuhu ñayivi ihyá ña cahan ndo, tyin ihyá cuví nu tsañi Nyoo. Tan ndi ña cahan ndo tuhun ñuu Jerusalén, tyin icán cuví ñuu maa Nyoo tsa cuví ra Rey cahmu ca.³⁶ Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo

ndi intuhun ixi jiñi ndo. ³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyí ndo “naha Nyoo maa” nu ña vaha jacobán tsi ndo tsa cahan ndo tacan.

Nu caahán ra Jesúus tyin tatuń javahá nyiví tsa ña vaha tsihin yo, na javaha yo tsa vaha tsihin ñi

(Lc. 6.29-30)

³⁸Tan tsiñi tucu ndo tsa catyí Nyoo tahan tsanaha: “Tatun cañí nyiví tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihí ra cumi tyiñu tacan tsihin ñi, tumaa tsa javahá ñi tsihin ndo.”

³⁹Maa tyin yuhu catyí yu tsihin ndo, tyin ña javaha ndo tsa ña vaha tsa javahá nyiví xaan cuñí nyehe tsi ndo. Tyin tun yóo cañí iin tsiyo nuu ndo, taahán tsi tsa cuhva ndihí ndo inga tsiyo na cañí ndihí ñi, tan ña cuxaan ndo tsi ñi. ⁴⁰O tatuń tsicán ñi cuatyí tsaha ndo, tan cuñí ñi quihin nyaa ñi iin camisa ndo. Taahán tsi cuhva ndihí ndo chamarra ndo tsi ñi tan ña cua cuxaan ndo tsi ñi. ⁴¹O tatuń yóo cuñí cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. ⁴²Tatuń yóo nyiví tsicán tumañi iñi tsi ndo, cuhva ndo tsa nducu ñi. Ña catyí ndo tyin ña javaha ndo tumañi iñi can tsi ñi.

Na cuñí yo tsi nyiví xaan iñi tsi yo

(Lc. 6.27-28, 32-36)

⁴³Tan tsiñi tucu ndo tyin catyí Nyoo tahan tsanaha: “cuñí ndo tsi ra vaha iñi tsi ndo. Tan xaan cuñí ndo nyehe ndo tsi ra xaan iñi tsi ndo.” ⁴⁴Maa tyin yuhu catyí yu tsihin ndo, cuñí ndo tsi nyiví xaan iñi tsi ndo. Tan javaha ndo tsa vaha tsihin nyiví caahán tsi ndo, tan tsi nyiví ña cuñí nyehe tsi ndo. Tan ndacan tahvi ndo tsi Nyoo tsa cuenda nyiví tsa caahán nyaa tsi ndo tan tsa cuenda ñi tsa jacuví tsa uhvi tsi ndo. ⁴⁵Tatuń javahá ndo tacan, cuví ndo sehe Jutu yo ra nyáá gloria. Tyin maa ra jacańa ra nícanyi, tan jacuún ra savi nuu tsi nyiví vaha tan nyiví ña vaha.

⁴⁶Tatuń nyoho tan cuñí ndo tsi nyiví vaha iñi tsi ndo tan ndasi cuñí ndo nyehe ndo tsi nyiví xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñí maa ndo tyin quiñi xaan iyó ra can naha ra. ⁴⁷Tatuń

tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyiví, nduve tsa vaha xaan javahá ndo. Tyin juvin ñi tacan javahá nyiví tsa ña tsitó tuhun Nyoo. ⁴⁸Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyoho.

6

Nu caahán ra Jesúus nácaa javaha yo tumañi iñi

¹Jaha ndo cuenda tan ña nduyaas ndo náa tumañi iñi javaha ndo tsi nyiví. Tyin tatuń javaha ndo tumañi iñi tyin nyehe nyiví, Jutu yo, ra nyaá gloria, nduve náa cua cuhva ra tsi ndo. ²Tun cua javaha ndo tumañi iñi, ña cua jacoto ndo tsi inga nyiví tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyí nyiví tyin vaha xaan iñi ra naha. Yacan ñi ñihi ra can naha ra, tan nduve náa cua cuhva Nyoo tsi ra naha. ³Yacan cuenda quivi javahá ndo tumañi iñi tsi nyiví ndaaahvi, ña jacoto ndo ndi tsi ra tsa vaha xaan ca iñi tsi ndo. ⁴Xeehe ñi jatyinyee ndo tsi ñi ndaaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesúus nácaa ndacan tahvi yo tsi Jutu yo Nyoo

(Lc. 11.2-4)

⁵Tatuń cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyiví, tan nyecú nyityi ra naha tsitsi vehe ñuhu o ity cahnu tyin taahán iñi ra naha tsa cahan nyiví tyin vaha xaan ra naha. Tsa nditsa catyí yu tsihin ndo tyin yacan ñi ñihi ra naha. ⁶Maa tyin nyoho quiñi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyiví tsi ndo. Quiñi ndo tsitsi vehe ndo tan nacasi ndo yuvelhe ndo tan ndacan tahvi ndo tsihin tsa nii iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavín nuu nyiví. Tan cua cuhva ra tsa vaha tsi ndo.

⁷Tatuń cua cahan ndo tsihin Nyoo, ñavín juvin ñi tuhun tsa nduve yahvi nyaa cahan ndo. Tacan javahá nyiví tsa ña tsitó tsi

Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juvin ñi tuhun tsa tsa yaha cahan ñi. ⁸Ña jahava ndo tacan. Tyin Nyoo tsa tsító ra náa tsiñi ñuhu tsi ndo tsa ndi cumañi ca ndacan ndo tsi ra. ⁹Yacan cuenda nyoocho, tatum cua ndacan tahvi ndo tsi Nyoo, tyehen catyi ndo:
 Jutu Maiñi ndi, tsa nyaá un gloria.
 Jacahnú xaan ndi tsi un.
¹⁰ Na quitsi tsa ndaca ñaha un nu ñuhu ñayivi ihyá,
 tan na jahava tandíhi nyivi tandíhi cuhva cuñí maa un, tumaa cuví nda gloria.
¹¹ Cuhva tsa catsi ndi tahan tahan quiví.
¹² Jaha tucahnú iñi tsi ndi náa tsa ña vaha jahava ndi, tumaa tsa jahá maa ndi tucahnú iñi tsi nyivi tsa jahavá tsa ña vaha tsi ndi.
¹³ Ña cuhva un tsa nducu cuhva nu ña vaha tsi ndi, coto jahava ndi cuatyí nuu un. Tyin maa un cuví ra jacacú tsi ndi ndaha nu ña vaha.
 Tan maa un cuví ra ndacá ñaha tsi ndi.
 Tan iyó tandíhi tunyee iñi tsi un.
 Tan taahán tsi tyin jacobhnú tandíhi nyivi tsi maa ñi un tandíhi maa quiví tan na ña cundíhi tsi. Na cuvi tsi tacan ñi.
 Tyehen taahán tsi ndacan tahvi ndo tsi Nyoo.

¹⁴ Tyin tatum nyoocho tan jahá ndo tucahnú iñi tsi nyivi tsa jahavá tsa ña vaha tsi ndo, tacan tucu Jutu yo ra nyaá gloria, cua jaha ra tucahnú iñi tsi maa ndo. ¹⁵Maa tyin tatum ña jaha ndo tucahnú iñi tsi nyivi tsa jahavá tsa ña vaha tsi ndo, tacan tucu Jutu yo, ña cua jaha ra tucahnú iñi cuatyí maa ndo —catyí ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶Tan catyí tucu ra Jesús tsihin nyivi:

—Quiví tsa iyó nyitya ndo tyin nanducú ndo tsi Nyoo, ña cuihyá nyehe ndo, tumaa jahavá nyivi jahá tyin vaha xaan ñi. Tyin cahyí ñi nyaa nuu ñi tyin cuñí ñi tsa nyehe nyivi tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. ¹⁷Maa tyin nyoocho quiví tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tysi ndo cuca jiñi ndo,

¹⁸Tacan tan ña cua tuvi iñi nyivi tyin iyó

nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa jahavá ndo tsa xeehe ñi. Tan cuaha tsa vaha cua cuhva ra tsi ndo.

*Tsa vaha tsa iyó nda gloria
 (Lc. 12.33-34)*

¹⁹Ña jacaya ndo tsa cuca tsa iyó nu ñuhu ñayivi ihyá. Tyin coto tivi tsi jaha tiquixin o jaha cuxi. O cuví quihví ñasuhu, tan suhu nu tandíhi tsa jacaya ndo. ²⁰Vaha ca jacaya ndo tsa cuca tsa iyó nda gloria. Tyin ña cua cundíhi tsi ndacan. Tyin ña cuvi tivi tsi ndacan, tan nduve quití jativí itsi, ndi nduve ñasuhu. ²¹Tyin nu natyihí vaha ndo tsa cuca, ican cua cunyaa ndíhi añima ndo.

Nu caahán ra Jesús tyin na jaha yo cuenda ñuhu nditsin tsa tysi ra añima yo

(Lc. 11.34-36)

²²Tinuu ndo cuví ñuhu nditsin tsi ndo. Tatum vaha tinuu ndo, tanii cuñu ñuhu ndo tan iyó ñuhu nditsin. [Tan tuhun ihyá cuñí tsi catyi tyin tatum iyó ñuhu nditsin Nyoo añima ndo cuví ndo nyivi vaha.] ²³Maa tyin tatum ña vaha tinuu ndo, tandíhi cuñu ñuhu ndo tan nyií tsi nu naa. Tan tacan tucu tatum nduve ñuhu Nyoo iyó añima ndo, [cuví ndo tumaa iin ra cuaa. Nu naa cuahán ndo tan ña cuví nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatum cuñi xaan ca yo xuhun

(Lc. 16.13)

²⁴Ilin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyáa yahvi ra tsi iin ra, tan ñavin ca tsi inga ra. Tan tacan tucu nyoocho, ña cuví cuñi ndo tsi Nyoo, tan cuñi tucu ndo xuhun.

Nu caahán ra Jesús tyin ña caca xaan iñi yo náa ndíhi tsa tsiñi ñuhu tsi yo

(Lc. 12.22-31)

²⁵Yacan cuenda catyí yu tsihin ndo, tyin ña caca xaan iñi ndo nácaa ñihí ndo tsa catsi ndo tan tsa coho ndo. Ndi ña caca iñi ndo nácaa cua ñihí ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yií cuhva ra inga tsa tsiñi ñuhu tsi yo]. ²⁶Nyehe ndo cuhva iyó saa. Ña tatsí tì itu. Tan ña jahá tysi tì. Tan ndi ña tysi vaha tì tsa

catsi tī. Maa tyin tsatsí ti tyin Jutu yo Nyoo ra nyaá gloria tsahá ra tsa catsi tī naha tī. Tan nuu Nyoo cahnu ca cuví nyoho tan ñavin ca saa can naha tī. ²⁷ Tan vasu ndi maa tsicá xaan iñi ndo maa tyin ña cua cuví jandusucun ca ndo ndi luxu ca tsi ndo.

²⁸ ²⁸Tan tatum ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehé ndo nácaa iyó yutun ita tsitsi cuhu, tyin ña jahá tyífi tun tan ndi ña taví tun yuhva. ²⁹ Maa tyin catyí yu tsihin ndo tyin ndi ra cuví rey Salomón tsihin tandíhi tsa cuca ra, tan ña tsinditsi ra jahma sii ca caá tan ñavin ca tsa jacunditsí Nyoo tsi yutun ita can. ³⁰ Tatum tacan ñi jacunditsí Nyoo tsi yutun ita tsa iyó tsitsi cuhu vityin, tan tyaan cua cuvi tun nducu tan cayu tun. ¿A ña cua jatyinyee cuaha ca ra tsi ndo? Tyin nyoho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. ³¹ Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?” ³² Tyin nyivi tsa ña tsító tsi Nyoo tsicá xaan iñi ñi yacan. Maa tyin nyoho ña caca iñi ndo yacan tyin iyó Jutu yo Nyoo, ra nyaá gloria. Tan tsító ra náa ndihí tsa tsiní ñuhu tsi ndo. ³³ Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandíhi tsa tsiní ñuhu tsi ndo. ³⁴Jahá cuenda Nyoo tsi ndo vityin tan ityaan. Yacan ña caca iñi ndo tsa tsiní ñuhu tsi ndo ityaan. Caca iñi ndo tan nyehé ndo nácaa yahá ndo quívi vityin jahá Nyoo.

7

Ña cahan yo tsa caá inga nyivi
(Lc. 6.37-38, 41-42)

¹ Na cahan ndo tsa caá inga nyivi, tacan tan Nyoo ña cua cahan ra tsa caá ndo. ²Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo. ³¿Nácaa tyin nyehé un tsahan luhlu tsa nyífi tinuu yañi un, tan ña jahá un cuenda yutun cahnu tsa nyífi tinuu maa un? ⁴Tatum tinuu maa un nyífi in yutun cahnu, ¿nácaa cuví catyi un tsihin ra yañi un: “Naha, na tava yu tsahan

luhlu tsa nyífi tinuu un”? ⁵¡Yootho tsa jahá tyin vaha xaan un! Táva jihna yutun cahnu tsa nyífi tinuu un. Tyin tacan tan cuvi nyehe vaha un tsahan luhlu tsa cua tava un tinuu yañi un.

⁶ ⁶Ña jañihi ndo cahan ndo tuhun Nyoo tsihin nyivi ña cuñi coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quíni tsa tsacá tsaha iin ndaha tyífi tsa yahri nyaá, tyin caahán ñi tsa ndavaha ñi siqu tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo
(Lc. 11.9-13; 6.31)

⁷ ⁷Ndácan ndo tsa tsiní ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. ⁸Tyin tandíhi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ ⁹Tacan tucu nyoho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? ¹⁰O tatum tsicán tsi tyaca, ¿a cua cuhva ndo iin coo itsi? ¹¹Nyoho vasu ndi maa quiríi iyó ndo, maa tyin tsító ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatum ndacan ndo tsi ra.

¹² ¹²Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandíhi libru tsa tyaa ra cuví ndusu yuhu Nyoo tahán tsanaha.

Yuvehe tihin tan ityi cuiñi tsa cuahán nu nyaá Nyoo

(Lc. 13.24)

¹³ ¹³Ndycu ndo cuhva quíhvi ndo yuvehe tihin. Tyin quíhvin yuvehe, tan quíhvin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. ¹⁴Maa tyin tihin yuvehe tan cuiñi ityi tsa cuahán nu cuahán nyivi tsa ñihí ñayivi nyito coo ñi. Maa tyin ña cuaha nyivi nañihí ityi can.

Tsihín tsa javahá nyivi, tan nacotó yo tatum nyivi vaha, a nyivi ña vaha cuví ñi

(Lc. 6.43-44)

¹⁵ ¹⁵Jaha ndo cuenda tsi ndo tsihin ra vatyahaha ra. Tyin catyí ra naha tyin ndusu yuhu

Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiti xaan cuví ra naha.¹⁶ Nyoho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua cuhva tun mangu, tan ndi iin nduhva ña cuvi cuhva tsi yucu vixi.¹⁷ Tan tacan tucu tandíhi yutun vaha. Tsahá tun tsiti vaha. Tan tandíhi yutun ña vaha, tsahá tun tsiti ña vaha.¹⁸ Tyin yutun vaha, ña cuví cuhva tun tsiti ña vaha. Tan ndi yutun ña vaha ña cuví cuhva tun tsiti vaha.¹⁹ Tan tandíhi yutun tsa ña tsahá tsiti vaha, cahnya yo tsi tun. Tan cayu tun.²⁰ Tan tacan tsihin tsa javahá nyivi, cuví nacoto ndo tsi ñi tatuñ nyivi vaha o nyivi ña vaha cuví ñi.

Nu catyí ra Jesús tyin ña tandíhi nyivi tan cua quihví ñi nu ndacá ñaha Nyoo (Lc. 13.25-27)

²¹ 'Na tandíhi nyivi tsa catyí tsihin yu: "Jutu Mañi yu, Jutu Mañi yu", cua quihví ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quihví nu ndacá ñaha ra.²² Quiví tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: "Jutu Mañi yu, nyuhu cahan ndi tuhun cun tsihin nyivi. Tan tsihin sivi un tava ndi tatyí ña vaha tsa yihí tsi ñi. Tan cuaha xaan tsa iyo javahá ndi tsihin sivi un", cua catyí ñi tsihin yu.²³ Tacan tan yuhu cua catyí yu tsihin ñi: "Ña nacotó yu tsi nyoho. Çatsiyo nyaha ndo nu nyaá yu tandíhi nyoho tsa javahá maa maa ñi tsa ña vaha", cua catyí yu tsihin ñi.

Nu caahán ra Jesús nácaa cua cacu nyivi tsa tyáa yahvi tuhun caahán ra, tan nyivi tsa ña tyáa yahvi tsa caahán ra, ña cua cacu ñi (Lc. 6.47-49; Mr. 1.22)

²⁴ Tacan catyí yu tsihin ndo, tyin nyivi tsa tsiní tsa caahán yu tan javahá ñi cuhva cuñí yu, cuví ñi tumaa iin ra tsiní tuñi tsa janduvita tyihyo tsaha vehe ra tsata cava.²⁵ Tan quitsahá cuún ñihí savi. Tan cuaha xaan ndutya ñuhu yahá tsata vehe can. Tan

ñihí xaan quitsahá yihí tatyí. Maa tyin ña cuvi janduva tsi vehe can, tyin vaha sama tyihyo tsaha tsi tsata cava.²⁶ Maa tyin nyivi tsa tsiní tuhun caahán yu, tan ña javahá ñi

cuhva cuñí yu; cuví ñi tumaa iin ra soho, ra tsa javahá vehe nu nyiti.²⁷ Tan quitsahá cuún ñihí savi. Tan cuaha xaan ndutya ñuhu yahá nu nyaá vehe ra. Tan ñihí xaan yihí tatyí. Tan vehe can iin yaha cuui ñi nduvá tsi tan cunaq tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahan ra Jesús tsihin ñi, iyo xaan cuñí ñi tsihin tsa caahán ra,²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú

(Mr. 1.40-45; Lc. 5.12-16)

¹ Cuhva tsa nuu ra Jesús yucu can, cuaha xaan nyivi nyicún tsi ra.² Tan tsaa iin ra ndohó cuehe tyaahyú, tan tsicuñi tsiti ra nuu ra Jesús, tan catyí ra tsihin ra:

—Jutu Mañi yu, tatuñ yoooho tan cuñí un, cuví janduvaha un tsi yu —catyí ra tsihin ra.

³ Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñí yu janduvaha yu tsi un. Cua nduvaha un vityin —catyí ra.

Tan iin yaha ñi nduvahá ra.⁴ Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyivi. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaa ra Moisés. Tan cua cuvi tsi iin tsa ndaa tsi ra jutu can tan tsi nyivi tyin tsa nduvahá un.

Nu janduvahá ra Jesús tsi musu iin ra cuví capitán

(Lc. 7.1-10)

⁵ Quiví tsa tsaa ra Jesús ñuu Capernaum, iin ra cuví capitán, ra ñuu Roma, tsaa ra nu nyíi ra Jesús tan caahán ndaahví ra tsihin ra,⁶ tan catyí ra:

—Jutu Mañi yu, musu yu ñihí xaan cuuhví ra, canyí ra nu cama. Ña cuví nduvita ra tyin nduxii ra, tan yaha xaan cuhva cuñí ra.

⁷ Tan catyí ra Jesús tsihin ra:

—Cuhun maa yu tan cujanduvaha yu tsi ra —catyí ra tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. ⁹Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatum cua tava tyiñu yu tsi iin ra can, cua cuhun ra. Tan tatum cana yu tsi inga ra, cua quitsi ra. Tan tatum tava tyiñu yu tsi musu yu, cua jahava ra cuhva cuñí yu.

¹⁰Tan tsa tsíñi ra Jesús tsa cahán ra can, tan iyo xaan cuñí ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihu yu iin ra Israel tsa tsinú xaan iñi tumaa tsinú iñi ra ihyá. ¹¹Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. ¹²Tan nyivi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsaa ñi tan catsan ña cua cuvi nuhu ñi tsa cuenda tsa xaan cuñí ñi tyin nyehe ñi tundoho —catyí ra Jesús tsihin nyivi nyicún tsi ra.

¹³Tacan tan catyí ra tsihin ra capitán can:

—Cuaahan, tan na nduvaha musu un tsa cuenda tyn tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

*Nu janduvahá ra Jesús tsi tyiso ra Pedro
(Mr. 1.29-31; Lc. 4.38-39)*

¹⁴Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, caniyí ña nu tsito tyn yihí cahñi tsi ña.

¹⁵Tan tiñi ra ndaha ña, tan iin yaha ñi quita cahñi tsi ña. Tan nduvitá ña, tan quitsaha nanducú ña tsa catsi ra naha.

*Nu cuaha xaan nyivi cuuhví janduvahá ra Jesús
(Mr. 1.32-34; Lc. 4.40-41)*

¹⁶Tan tsa cunaaha, cuaha xaan nyivi yihí tatiyí ña vaha tsindaca nyivi tsi ra Jesús. Tan tsihin intuhun ñi tuhun cahán ra Jesús tan quita tatiyí ña vaha tsi ñi. Tan tandíhi ñi cuuhví iin yaha ñi nduvahá ñi. ¹⁷Tacan cuvi tyin tacan tan cundaas tsa cahán Jutu Mañi yo tsihin yuhu ra Isaías, ra cuvi ndusu yuhu ra tahán tsanaha. Tan catyí ra tyehen: “Maa ra quihin ra cuehe tsa yihí tsi yo, tan quihin nyaa ra tsa uhvi tsi yo.”

*Nyivi tsa cuñí quihví cuenda ra Jesús
(Lc. 9.57-62)*

¹⁸Tan tsa nyehe ra Jesús tyin cuaha xaan nyivi tsinú nduvi nu nyí ra, catyí ra tsihin ra tsicá tsihin ra tyin cua yaha ra naha inga tsiyo miñi. ¹⁹Tacan tan tsaa iin ra maestro cuenda ley vehe ñuhu tan catyí ra tsihin ra:

—Maestro, cuñí yu cunyicun yu tsi un tandíhi ñi ityi nu cuahán un —catyí ra.

²⁰Tan ra Jesús catyí ra tsihin ra:

—Ñacuui iyó vehe tì. Tan saa iyó taca tì. Maa tyin yuhu Rayii tsa quee nda gloria, nduve nu maa cunyanaa luxu jiñi yu iyó —catyí ra.

²¹Inga ra tsa tsicá tsihin ra nacahan ra tsihin ra:

—Taa, cuhva na cuhun jihna yu cucutsi yu tsi jutu yu, —catyí ra.

²²Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihin ñi —catyí ra.

*Nu jacutaxín ra Jesús tatyí xaan nu miñi
(Mr. 4.35-41; Lc. 8.22-25)*

²³Tacan tan quihví ra tsitsi yutun ndoo tan ra tsicá tsihin ra cuahán ra ñaha tsihin ra. ²⁴Tan ñihi xaan quitsaha yihí tatyí nu miñi can, tan cuaha xaan ndutya quihví tsitsi yutun ndoo ra naha. Maa tyin ra Jesús quixí ra. ²⁵Tan ra tsicá tsihin ra jandoto ra naha tsi ra, tan catyí ra naha:

—Jutu Mañi yu, jacacu tsi yo, tyin cuñí cunaay yo!

²⁶Tan catyí ra Jesús tsihin ra naha:

—¿Nacuenda yuuhví xaan ndo? ¡Nyoo-ooho tsa luxu xaan tsinú iñi tsi yu! —catyí ra Jesús.

Tacan tan nduvitá ra tan cahán ra tsihin tatyí tan tsihin ndutya, tan cutaxín tsi.

²⁷Tan iyo xaan cuñí ra naha tan catyí ra naha:

—¿Yóo ra cuví ra ihyá? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahá uvi ra ñuu Gadara ra yihí tatyí ña vaha naha ra

(Mr. 5.1-20; Lc. 8.26-39)

²⁸Tacan tan tsaa ra naha inga tsiyo miñi nda nu ñuhu Gadara. Tan tsaa uvi taahan ra yihí tatyí ña vaha. Tan quita ra naha nu ñaña cumí sandu. Xaan xaan ra naha, tan

yoñi maa cuví yaha ityi can.²⁹ Tan caná tsaa ra naha, tan catyí ra naha:

—¿Náa cuñí un tsihin ndi, yooho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaa quívi? —catyí ra naha jahá tatyi ña vaha can.

³⁰ Tan yatin ñi can yucú cuaha quíni tsatsí ti naha ti. ³¹ Tan catyí nu tatyi ña vaha can tsihin ra Jesús:

—Tatun cua tava un tsi ndi, cuhva tsa quihví ndi tsitsi quíni can naha ti —catyí nu tatyi ña vaha can nahnu.

³²—Vaha. Quihví ndo —catyí ra Jesús.

Tan quita nu tatyi ña vaha can nahnu, tan quihví nahnu tsitsi tandíhi quíni tsa nyecú can. Tan tandíhi quíni can tsinu ti naha ti tan cucoyo ti naha ti iin xahva yuhu miñi can, tan tsihí ti naha ti tsihin ndutya can.

³³ Tan ra jahá cuenda tsi quíni can, tsinú xaan ra naha cuahán ra naha tsitsi ñuu, tan nataciy tuhun ra naha tandíhi tsa cuvi tsi ra tsa yiñi tatyi ña vaha can naha ra.

³⁴ Tacan tan tandíhi nyívi ñuu can, tsahan ñi tsinyehé ñi tsi ra Jesús, tan cahan ndaahví ñi tsihin ra na quita ra ñuu can.

9

*Nu janduvahá ra Jesús tsi iin ra xii
(Mr. 2.1-12; Lc. 5.17-26)*

¹ Tacan tan quihví ra Jesús tsitsi iin yutun ndoo tan yahá ra miñi, tan tsaa ra nda ñuu nu iyó ra. ² Nu nyívi ra ican, tsindaca nyívi tsi iin ra cuuhví tsa ña cuví nacanda tyin nduxíi ra, tan canyií ra nu tsito. Tan tsaa nyehé ra Jesús tyin tsinú xaan iñi ñi tsi ra, quitsaha caahán ra tsihin ra cuuhví can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesús tsihin ra.

³ Tacan tan quitsahá tsicá iñi juhva ra maestro cuenda ley vehe ñuhu tsa yucú ican naha ra: “Ra ihyá tsicoó cuatyí ra nu Nyoo tsihin tuhun caahán ra”, cuñí ra naha tsicá iñi ra naha.

⁴ Maa tyin ra Jesús tsító ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

⁵ Tyin ȝndáa tsa yiñi ca catyí yo: a yiñi ca catyí yo: “Cuatyí un tsa yaha ndatsi”, o yiñi ca catyí yo: “Nduvita tan caca un”? ⁶ Vityin cua janaha yu tsi ndo tyin yuhu Rayii tsa quee nda gloria, iyó ndatu tsi yu nu ñuhu

ñayivi ihyá tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cuanuhu nda yuvehe un —catyí ra.

⁷ Tacan tan nduvitá ra tan cuanuhu ra nda yuvehe ra. ⁸ Tan nyívi tsa nyehé tsa cuvi, nayuhví xaan ñi. Tan quitsaha jacahnú ñi tsi Nyoo tyin tsahá ra tunyee iñi tsi nyívi.

*Nu canā ra Jesús tsi ra Mateo
(Mr. 2.13-17; Lc. 5.27-32)*

⁹ Yaha can tan quita ra Jesús ican. Tan nyehé ra tsi iin ra tsa nañí Mateo, nyaá ra naquihín ra xuhun tsa tyahví nyívi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvitá ra Mateo tan cuahán ra tsihin ra Jesús.

¹⁰ Tacan tan cuvi tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaa, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra. ¹¹ Tan tsa nyehé ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

¹² Tsa tsíñi ra Jesús tsa caahán ra naha, tan catyí ra tsihin ra naha:

—Ña tsíñi ñuhu doctor tsi nyívi iyó vaha, ñi ña cuuhví. Maa tyin nyívi cuuhví tsíñi ñuhu doctor tsi ñi. ¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñí yu tsa cundaahví iñi ndo tsi nyívi, tyin yacan cuví tsa ñiñi xaan ca tan ñavín ca tsa cahñi ndo quiti tan cuhva cuenda ndo tsi yu.” Yuhu ña vatsí yu jatyinyee yu tsi nyívi tsa tsicá iñi tyin vaha ñi, vatsí yu jatyinyee yu tsi nyívi tsító tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyívi tsi ra Jesús tatuun taahán tsi tsa coo nytya ñi

(Mr. 2.18-20; Lc. 5.33-35)

¹⁴ Tacan tan ra nyicún tsi ra Juan, ra jacoondutya tsi nyívi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

¹⁵ Tan nacahan̄ ra Jesús tan catyí ra:

—¿A cuví cunyecu cuiihya nyíví yucú vico tindaha tun nyíví ra cua tindaha tsihin ñi? Maa tyin coo quíví cua quita ra tindaha ican nu yucú ñi. Tacan tan cua coo ñi tucuihyá iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahu tsa iyó nyíví tsihin tuhun tsaa tsa jacuahá ra tsi ñi

(Mr. 2.21-22; Lc. 5.36-39)

¹⁶ Ña tuhvá nyíví naquicú iin jahma tuhu tsihin iin jahma tsaa, tyin cua nandiyí nu naquicú ñi tsihin tsa tsaa can, tan cua tyahnya tsi inga tsaha. ¹⁷ Tan tacan tucu, ña cuví tyihí nyíví vinu tsaa tsitsi ñii tsahnu tyin tatum tacan javaha ñi, cua tyahnya ñii can, tan cua tíví vinu can tan cua tíví ndihí tucu ñii can. Yacan cuenda taahán tsi tyili yo vinu tsaa tsitsi ñii tsaa. Tyin tacan tan ña tyahnya ñii can tan ndi vinu can ña tíví tsi.

Nu nduvahá ñaha sehe ra Jairo tan ñaha tsa tijín jahma ra Jesús

(Mr. 5.21-43; Lc. 8.40-56)

¹⁸ Tsitsi tsa caahán ra Jesús tuhun ihyá, tsaa iin ra cumí tyiñu cuenda vehe ñuhu nyíví Judea tan tsicuiñi tsiti ra nuu ra Jesús, tan catyí ra:

—Ndi tsihí cuii ñi sehe yu, maa tyin tatum yooho tan cuhun un tan tyiso ndaha un jini ña, cua nandoto ña —catyí ra tsihin ra Jesús.

¹⁹ Nduvitá ra Jesús tsihin ra tsicá tsihin ra tan cuahán ra naha tsihin ra.

²⁰ Tacan tan iin ñaha cuuhví natuhvá ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaq ña ndaha ña jahma ra, ²¹ tan cuñí ña tsicá iñi ña: “Tun nañi ndaha yu jahma ra cua nduvaha yu”, cuñí ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduníi iñi un, xihi, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

²³ Yahá can tan tsaa ra Jesús vehe ra cumí tyiñu can, tan nyehe ra tyin ra música ndatú ra naha tsa cucutsi ra naha tsi ndiyí

can. Tan nyíví tsa yucú can iyo xaan tsacú ñi. ²⁴ Tan catyí ra Jesús tsihin ñi:

—Quita ndo ihyá. Ñaha luhlu ihyá, ña tsihí ña. Quixí ña —catyí ra.

Tan tsa cahan̄ ra tacan quitsaha tsacú naaha ñi. ²⁵ Tan ra Jesús tavá ra tsi ñi ityi tsata vehe. Tacan tan quihví ra tsitsi vehe nu canyí ñaha can, tan tijín ra ndaha ñaha luhlu can, tan nduvita ña. ²⁶ Tan tandihí nyíví iyó ityi ñuu can tsito ñii tsa nandoto ñaha luhlu can.

Nu janduvahá ra Jesús tsi uvi taahan ra cuaa

²⁷ Tsa quita ra Jesús ican, tan uvi taahan ra cuaa nyicún tsi ra, caná tsaa ra naha tan catyí ra naha:

—Cundahví iñi tsi ndi, yooho ra cuví tata ra David! —catyí ra naha.

²⁸ Tan tsa yaha quihví ra Jesús tsitsi vehe, ra cuaa can, natuhvá ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi nido?

Tan nacahan̄ ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹ Tacan tan tyanaa ra Jesús ndaha ra tinuu ra naha tan catyí ra tsihin ra naha:

—Na cuvi maa tumaa cuhva tsinú iñi ndo —catyí ra.

³⁰ Tan nduvahá tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyíví.

³¹ Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandihí nyíví iyó ityi ñuu can.

Nu janduvahá ra Jesús tsi iin ra ñiihí

³² Tsa cuahán ra naha, juhva nyíví tsindaca ñi tsi iin ra ñiihí tsa yihí tatyí ña vaha nu nyíví ra Jesús. ³³ Tan tsa tavá ra Jesús tatyí ña vaha can, tacan tan nacahan̄ ra can. Tan iyo xaan cuñí nyíví, tan catyí ñi:

—Ñaha ca maa nyehe yo ñuu Israel ihyá ndi intuhun ra tavá tatyí ña vaha tsi nyíví —catyí ñi.

³⁴ Maa tyin ra cuví fariseo naha ra, catyí ra naha:

—Ra ihyá tavá ra tatyí ña vaha tsihin tunyee iñi nu ña vaha tsa cuví ityi nuu tsihin nahnu —catyí ra naha.

Nu caahán ra Jesús tyin ña cuaha maa nyiví jahá tyiñu cuenda Nyoo iyó

³⁵ Ra Jesús tsahan ra tandíhi ñuu jacuahá ra tsi nyivi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyivi. Tan janduvahá ra tandíhi nuu cuehe tsa ndohó ñii. ³⁶ Tan tsa nyehé ra tsi nyivi, cundaahví xaan iñi ra nyehé ra tsi ñii, tyin nyehé ñii tundoho tan iyó ñii tucuihya iñi, tumaa mbee ticatyi tsa nduve tsitoho iyó. ³⁷ Tacan tan catyí ra tsihin ra tsicá tsihin ra:

—Tsa nditsa, cuaha xaan tyiñu iyó, maa tyin ra jahá tyiñu, ña cuaha ra naha. ³⁸ Yacan cuenda, ndacan ndo tsi Ra Jatsii tyiñu ihyá, na jaquitsi ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyiñu ra

(Mr. 3.13-19; Lc. 6.12-16)

¹ Tacan tan cana ra Jesús tsi tsa utsi uvi ra tsicá tsihin ra tan tsaha ra ndatu tsi ra naha na tava ra naha tatyí ña vaha tsa yihí añima nyivi, tan na janduvahá ra naha tsi nyivi cuuhví náa ndíhi ca nu cuehe tan tsa uhvi.

²Ihyá nyaá síví tsa utsi uvi ra tsicá tyiñu ra: jihna ca, ra Simón, tsa nañí tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; ³ tan ra Felipe; ra Bartolomé; ra Tomás; tan ra Mateo ra tavá xuhun cuenda ra ndacá ñaha; ra Jacobo sehe ra Alfeo; ra Lebeo tsa nañí tucu Tadeo; ⁴tan ra Simón ra nyíví cuenda partido tsa cuñí cuuhun cuatyí síqui ñuu Roma tsa ndacá ñaha tsi ñii; tan ra Judas Iscariote, ra tsa xico tsi ra Jesús.

Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo
(Mr. 6.7-13; Lc. 9.1-6)

⁵Tan tava tyiñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cuuhun ndo nu iyó nyivi tsa ñavin nyivi Israel cuví, tan ndi ña quíhví ndo ñuu tsa cayucú Samaria. ⁶Cuaahan ndo nu yucú mbee tsa tsinaq tsa cuví nyivi Israel. ⁷Cuaahan ndo cua cahan ndo tyin tsa tsaa quíví tsa cua cundaca ñaha Nyoo

tsi nyivi. ⁸Janduvahá ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyoooho naquihín ndo tunyee iñi ihyá tsa cuatu ñi, janduvahá ndo nyivi tsihin tsi, tan ña ndacan ndo xuhun tsi ñi.

⁹Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha. ¹⁰Tan ña cuiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cuuhun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

¹¹Tatun tsaa ndo iin ñuu cahnu o iin ñuu luhlu, ndrucu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can. ¹²Tatun cua quíhví ndo iin vehe, cuhva ndo nacumi tsi nyivi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”. ¹³Tan tatum nyivi iyó yuvehe can tan nacotó ñi tyin tsíñi ñuhu tsa vaha can tsi ñi, cua ndoo can tsihin ñi. Maa tyin tatum ña tsító ñi tyin tsíñi ñuhu tsa vaha can tsi ñi, naquihin nyico ndo can. ¹⁴Tan tatum ña cuñí nyivi quihin cuenda ñi tsi ndo, tan ndi ña cuñí ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi síqui ñii. ¹⁵Tsa nditsa catyí yu tsihin ndo tyin quíví cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

Nu catyí tuhun tsi náa ndíhi tundoho cua nyehé nyivi tsicá tyiñu Nyoo

¹⁶!Nyéhe ndo! Tumaa mbee ticatyi cuví ndo, tan jacuhún yu tsi ndo nu yucú quíti xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan tì. ¹⁷Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. ¹⁸Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyivi tsa ñavin nyivi Israel cuví. ¹⁹Maa tyin tatum nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatum tsaa cuhva tsa cua

cahan ndo, Nyoo cua cuhva ra tuhun cahan ndo.²⁰ Tyin ñavin maa ndo cua cahan, tyin maa Tatyi li Jutu yo Nyoo tsa iyó añima ndo cua cuhya ra tsa cahan ndo.

²¹ Yihí rayíi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyiví cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyiví na cahñi nyiví can tsi ñi.²² Tandíhi nyiví, ndasi cua cuñi ñi nyehe ñi tsi ndo tsa cuenda yuhu. Maa tyin tatum ña jandíhi ndo tsa tsinú iñi ndo tsi yu, tacan tan cua cacu ndo.²³ Tatum nyaa ndaha ñi tsi ndo iin ñuu, cuhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cuhun ndo tandíhi ñuu nu iyó nyiví Israel tan cua quitsi nyico yuhu, Rayíi tsa quee nda gloria.

²⁴ Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra.²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatum maa yu, ra jatsii vehe, tan catyí nyiví tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyiví cuenda yu.

¿Yóo tsii taahán tsi nayuhvi yo, a tsii nyiví o tsii Nyoo?

(Lc. 12.2-7)

²⁶ Yacan cuenda ña nayuhvi ndo tsi nyiví, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyiví.

²⁷ Tandíhi tsa caahán yu tsihin ndo tsacuua, cahan ndo can tsinu cahñi. Tan tandíhi tsa caahán xeehe yu tsihin ndo, ndaa ndo jiñi vehe cana tsaa ndo can, na coto tandíhi nyiví.²⁸ Ña nayuhvi ndo tsi nyiví tsahní cuñu yuhu yo, tyin ña cuví cahñi ñi añima yo. Vaha ca nayuhvi ndo tsi maa Nyoo, ra cuví janaa cuñu yuhu ndo tan añima ndo tsitsi anyaya.

²⁹ Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatum ña cuhva maa Nyoo Jutu yo.

³⁰ Tyin nda cuanda ixi jiñi ndo tan tsitó Nyoo najava taahan tsi iyó, tyin tsa nacahví ra intuhun intuhun tsi.³¹ Yacan cuenda ña

nayuhvi ndo. Nyoooho, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyiví

(Lc. 12.8-9)

³² Tandíhi nyiví tsa caahán catsi tsihin nyiví yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.³³ Maa tyin nyiví cua tyihi xeehe tsi yu nuu inga nyiví, tacan tucu yuhu cua tyihi xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cañi tahan nyiví tsihin tahan ñi

(Lc. 12.51-53; 14.26-27)

³⁴ Ña cuñi ndo tyin yuhu vatsí cuhva yu tsa coo taxin nyiví nu ñuhu ñayiví ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.³⁵ Tyin yihí ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin sihi ña. Tan inga ña cua cañi tahan ña tsihin tyiso ña.³⁶ Tan yacan cuenda juvin ñi maa nyiví vehe ndo cua cuxaan iñi tsi ndo.

³⁷ Nyiví tsa cuñi ca tsi jutu ñi a tsi sihi ñi tan ñavin ca tsi yuhu, ña cuví cuvi ñi nyiví cuenda yu. Tan nyiví cuñi ca tsi sehe yií ñi a sehe sihi ñi, tan ñavin ca tsi yuhu, ña cuví cuvi ñi nyiví cuenda yu.³⁸ Tan nyiví tsa ña cuñi nyehe tundoho tan ndi ña cuñi ñi cuhva ñi ñayiví iyó ñi tsa cuenda yu, ña taahán tsi cuvi ñi nyiví cuenda yu.³⁹ Tyin nyiví cuñi xaan ca ñayiví iyó ñi, cua cunaa ñi. Maa tyin nyiví cua cuhva ñayiví iyó ñi tsa cuenda yu, cua ñihi ñi ñayiví nyito coo ñi.

Nu caahán ra Jesús nácaa cua ñihi yo tsa vaha Nyoo

(Mr. 9.41)

⁴⁰ Nyiví tsa naquihín cuenda tsi nyoooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsi tsi yu.⁴¹ Nyiví naquihín cuenda tsi iin ra cuví ndusu yuhu Nyoo tyin Nyoo jaquitsi tsi ra, cua ñihi ndihí ñi tsa vaha tsa cua ñihi ra cuví ndusu yuhu Nyoo can. Tan nyiví naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi.⁴² Tan yóo nyiví tsa cuhva intuhun vasu

ndutya vitsin coho nyivi tsa nyicún tsiyu, cua ñihí ndíhi ñí tsa cua cuhva Nyoo tsi ñí tsa nyicún tsiyu —catyí ra Jesús.

11

Nu jacuhun ra Juan tsi ra tsicá tsihin ra nu nyíi ra Jesús

(Lc. 7.18-35)

¹ Tsa ndíhi cahan ra Jesús tsihin tsa utsi uvi ra tsicá tsihin ra, tacan tan quíta ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

² Tan ra Juan nyíi ra vehe caa quíví can, tan ñihí tuhun ra tsajavahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyíi ra. ³ Tan catyí ra naha tsihin ra:

—¿A juvin yoho cuví ra Cristo tsa nyaas tsa cua quitsi jacacu tsi ndi? O tatum ñávin un cuví, cuatu ndi tsi inga ra —catyí ra naha tsihin ra Jesús.

⁴ Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandíhi tsa nyehé ndo, tan tsa tsiñi ndo. ⁵ Tan catyi ndo tsihin ra: nyivi cuaa nanyehé ñí, nyivi coxo nacacá ñí, nyivi ndohó cuehe tyaaheyú nduvahá ñí, nyivi soho nacuñí ñí, tan nandotó nyivi tsa tsa tsihin, tan nyivi ndaahví tsiñi ñí tuhun Nyoo nácaa cua cacu ñí.

⁶ Tan catyi ndo tsihin ra tyin sií xaan cua cuvi tsi nyivi tsa nyicún tsiyu tun ña ndu uvi iñi ñí —catyí ra Jesús tsihin ra naha.

⁷ Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quíví tsa tsahan ndo tsinyehé ndo nu tsiquí, ¿náa cua nyehe ndo cuñí maa ndo? ⁸ ¿A nyehe ndo iin ndoo tsa janduvá tatyí? ⁹ ¿O náa cuví tsa tsinyehé ndo? ¹⁰ ¿A iin ra nditsí jahma vaha cua nyehe ndo? Ñávin. Tyin tsitó ndo tyin ra nditsí jahma vaha, iyó ra vehe ra cuví rey. ¹¹ ¿A ña tsahan ndo tsinyehé ndo tsi iin ra cuví ndusu yoho Nyoo? Juvín. Tyin ra ican cahnu ca cuví ra tan ñávin ca tandíhi ra cuví ndusu yoho Nyoo. ¹² Juvín ñí tuhun ra Juan cuví tsa nyaas nuu tutu Nyoo. Tan catyí tsi tyehen: Yuhu cua jacuhun yu iin ra cahan tuhun yu tsa ndi cumañí ca cuhun yu.

Tyin natyiso vaha ra ityi nu cua cuhun un.

¹¹ Tsa nditsa catyí yu tsihin ndo, tyin tsitsi tsa tandíhi nyivi tsa tsicoq tan nyivi iyó vityin, tan ña cahnu ca cuví ñí tan ñávin ca ra Juan, ra jacoondutýa tsi nyivi. Maa tyin ra tsa ndaca ñaha Nyoo afíima, vasu ra lilihi ñí cuví ra, cahnu ca ra cuví ra tan ñávin ca ra Juan.

¹² Nda cuanda quíví tsa tsaa ra Juan tan nda vityin, nyivi ñihí iñi, nducú xaan ñí cuhva ñihí ñí tsa cundaca ñaha Nyoo tsi ñí. ¹³ Ra Moisés cahan ra tuhun nácaa cua cundaca ñaha Nyoo tsi nyivi, tan tacan tuco tandíhi ra cuví ndusu yoho Nyoo. Tacan tan quitsi ra Juan jacoto ra tsi nyivi tyin tsa tsaa quíví tsa cua cundaca ñaha Nyoo. ¹⁴ Tan ra Juan cuví ra Elías ra tsa nyaá tsa cua quitsi, tun nyoho tan cuñí ndo tsinu iñi ndo tsa caahán yu. ¹⁵ Nyoho tsa iyó soho, tyaa soho ndo tsa caahán yu.

¹⁶ ¿Náa tsihin jandu inducu yu tsi nyoho, nyivi tsa iyó quíví ihya? Tumaa ra nyihí cuví nyoho. Tyin ra nyihí jasiquí nuyahví. Caná tsaa tahan ra naha tan catyí ra naha: ¹⁷ “Tíví ndi tiyoo tan ña tsáñi ndo yaa. Tam tsita ndi yaa cuihyla, tan ña tsacu ndo”, catyí ra nyihí. [Tan tacan cuví nyoho tyin ndi intuhun cuhva ña taahán iñi ndo.] ¹⁸ Tyin ra Juan, ra jacoondutýa, quitsi ra tan ña tsatsí vaha ra, tan ña tsihí ra vinu. Tan nyoho catyí ndo tyin tatyí ña vaha yihí tsi ra. ¹⁹ Yahá can tan tsaa tuco yoho Rayí tsa quee nda gloria. Tan tsatsí yu tan tsihí yu. Tan catyí ndo tyin tsatsí xaan yu tan tsihí xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatiy naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuni ra tsi nyivi naquihín tuhun caahán yu tan tuhun cahan ra Juan, tan ñí ican cua janaha ñí tsi ndo tyin vaha tsa tsiñi tuni Nyoo —catyí ra Jesús.

Nyivi ña cuñí naquihín cuenda tuhun caahán ra Jesús cua nyehe ñí tundoho
(Lc. 10.13-15)

²⁰ Tacan tan quitsaha caahán ra Jesús tsihin nyivi tandíhi ñuu nu javahá ra cuaha tsa iyo, tyin ña nasama ñí cuhva iyó ñí, tan catyí ra:

²¹ —¡Ndaahvi nyoho, nyivi ñuu Corazin! ¡Ndaahvi nyoho nyivi ñuu Betsaida! Tyin nyehé ndo tsa iyo tsa javahá yu tan ña

nasama ndo cuhva iyó ndo. Tan ñuu Tiro tan ñuu Sidón nduve tsa nyehé ñi. Maa tyin tun tsatinyehe ñi tsa nyehé nyoooho vityin, numi xaan cua cunditsi ñi jahma tucuihyá iñi tan cua coso ñi nyaá nuu ñi: tyin ndú uvi iñi ñi cuatyí ñi. ²² Maa tyin catyí yu tsihin ndo tyin ñihí ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. ²³ Tan nyoooho nyiví ñuu Caper-naum, cuñí maa ndo tyin cundaa ndo nda gloria, maa tyin cua nuu ndo nda cuanda nu yucú nyivi tsihí anyaya. Tun tsatinyehe tsicoq tsa iyo nyehé ñi ñuu Sodoma tumaa tsa nyehé ndo ihya, ñuu can ñia tsinaaq tsi tan iyó tsi nda cuanda vityin. ²⁴ Maa tyin catyí yu tsihin ndo tyin quivi cua tatsi tuñi Nyoo tsi nyivi, ñihí ca cua tatsi tuñi ra tsi nyoooho tan ñavin ca nyivi ñuu Sodoma.

“Cuhva ndo tsi ndo tsiyu, tan cuhva yu tsa quitatú ndo”, catyí ra Jesucristo

(Lc. 10.21-22)

²⁵ Quivi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayivi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsí un tuhun ihya nuu ra nyihí. ²⁶Tacan Tyaa, tyin tacan cuñí maa un —catyí ra Jesús.

²⁷ Tacan tan catyí tucu ra tsihin nyivi:

—Jutu yu nacuhvá cuenda ra tandihí tsa iyó tsi ra tsiyu. Yoñí maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñí nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi. ²⁸Tandihi nyoooho tsa tatú tyin jahá tyiñu ndo, tan tsihin tundoho tsa iyó ndo, naha ndo nu nyaá yu, tan yuhu cua cuhva yu tsa quitatú ndo. ²⁹Cuhva ndo tsa cundaca ñaha yu tsi ndo tan cùtuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatú añima ndo. ³⁰Ña yíi tsa cuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

12

Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigú
(Mr. 2.23-28; Lc. 6.1-5)

¹ Iin quivi quitatú nyivi, yahá ra Jesús mahñu nu iyó tsa tatsi nyivi. Tan tsaa soco tsi ra tsicá tsihin ra. Tan quitsahá tuhún ra naha yoco trigú can tan tsatsí ra naha. ²Tan tsa nyehé ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quivi tsa tsaa soco tsi ra naha? ⁴Quihví ra tsitsi vehe Nyoo, quihin ra paan ii, tan tsatsi ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. ⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quivi quitatú yo? Tan ñavin cuatyí cuví can. ⁶Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷Nyoooho, ñaha ca cutuñi ñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuví tsa cundaahvi iñi ndo nyehé ndo tsi nyivi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatinyehe cutuñi iñi ndo tuhun ihya, ña cua tyaa ndo cuatyí tsata nyivi tsa nduve cuatyí. ⁸Yuhu, Rayíi tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

Nu janduvahg ra Jesús tsi iin ra na ityi ndaha

(Mr. 3.1-6; Lc. 6.6-11)

—Tacan tan quita ra Jesús icán, tan cuahán ra vehe ñuhu. ¹⁰Tan icán nyíi iin ra tsa na ityi ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyivi cuuhví quivi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndáa nyoooho, tatum canacava iin mbee jana ndo tsitsi iin yavi quivi quitatú yo, a ña cua cuhun ndo tan tava ndo tsi ti?

¹²Tan ja ña nyaá yahí ca iin nyivi tan ñavin ca mbee? Yacan cuenda taahán tsi javaha yo tsa vaha quivi quitatú yo —catyí ra.

¹³Tacan tan catyí ra Jesús tsihin ra tsa na ityi ndaha can:

—Janacaña ndaha un —catyí ra.

Tan cuhva tsa janacaña ra ndaha ra, iin yaha ñi nduvahá tsi tumaa inga tsyo.

¹⁴Tacan tan quita ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahq̄n tsanaha

¹⁵Tsa tsito ra Jesús tyin nducú ra naha tsi ra, quita ra ican. Tan cuaha nyíví tsinyicún tsi ra. Tan maa ra janduvahá ra tsi tandihí ñi cuuhví. ¹⁶Tan catyí ra tsihin ñi tyin na ña catyí tuhun ñi yóo ra cuví ra. ¹⁷Tacan cuví tyin tacan cahan ra Isaías, ra cuví ndusu yuhu Nyoo tahan tsanaha. Tan tyehen tyaa ra tuhun Nyoo:

¹⁸Ra ihya cuví musu yu, ra tsa nacatsi vaha yu.

Cuñí xaan yu tsi ra, tan sii xaan cuñí yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyíví tsa ñavin nyíví Israel cuví, nácaa cua janduvahá yu tsi ñi nuu yu.

¹⁹Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

²⁰Tan ndi intuhun ndoo yacula, tan ña cua cahnu ndihí ra.

Tan ndi ña cua ndahva ndihí ra tiñuhu lihli nu caná luxu yuhma.

Nda cuanda coto tandihí nyivi tyin maa ra cuví ra ndacá ñaha tsi ñi.

²¹Tan tandihí nyivi, tan cua cuita iñi ñi tsi ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo
(Mr. 3.20-30; Lc. 11.14-23; 12.10)*

²²Tacan tan tsindaca nyivi tsi iin ra yiñí tatyí ña vaha nu nyíí ra Jesús, cuua ra tan ñiñíhi ra. Tan ra Jesús janduvahá ra tsi ra. Tacan tan nacahan ra, tan nanyehe ra. ²³Iyo xaan cuñí tandihí nyivi, tan catyí ñi:

—¿A ñavin ra ihya cuví tata ra rey David?
—catyí ñi.

²⁴Tan cuhva tsa tsíñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

²⁵Maa tyin ra Jesús tsító ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihi tyíñu tsa ndacá ñaha ra naha. Tan tatuñ iin ñuu o tandihí nyíví iin vehe tan cusiñ ñi, tacan tan cua tivi nu yucú ñi. ²⁶Tan tacan tucu tatuñ nu ña vaha tan tava nu juvin ñi tahan maa nu, cuñí tsi catyí tyin ñia iin ñi cuví nahnu, tan cundihi tunyee ñi tsa iyó tsi nahnu. ²⁷Tan nyoho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatayin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyoho soho xaan tsicá iñi ndo. ²⁸Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí li Nyoo. Tan cuñí tsi catyí yacan tyin nditsa tyin tsa tsaa cuhva ndacá ñaha Nyoo nu yucú ndo.

²⁹Tan *ȝyóo* cuví quihvi tsitsi vehe iin ra xaan, tan quihin nyaa ra ndaha tyíñu ra? Yoñi. Maa tyin tatuñ cuhñi jihna ra tsi ra can, tacan tan cuví quihin nyaa ra tandihí tsa iyó tsi ra.

³⁰'Nyíví tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyyéed tsi yu tsa caahán yu tuhun Nyoo tsihin nyíví, cuñí tsi catyí tyin ña tsahá ñi tsa coto nyíví tuhun caahán yu.

³¹'Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatuñ cua cahan ñi ndavaha ñi siquí Tatyí li Nyoo, yacan nditsa, ña cua jaha Nyoo tucahnu iñi tsi ñi. ³²Tan yóo nyivi tsa caahán tsa ndavaha ñi siquí yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siquí Tatyí li Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayíví ihya, tan ndi inga ñuu ñayíví tsa cua coo.

*Tsihin tsa javahá nyivi tan nacoto yo tsi ñi tatuñ vaha ñi a ña vaha ñi
(Lc. 6.43-45)*

³³'In yutun vaha tsahá tun tsíñi vaha. Tan iin yutun ña vaha tsahá tun tsíñi ña vaha. Nacotó yo tatuñ yutun vaha cuví tun tsa

cuenda tsiti tun. ³⁴ ¡Nyoooho, nyívi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyívi caquiñi cuví ndo? Tyin tsa quitá tsitsi añima yo, yacan caahán yo. ³⁵ Nyívi vaha, vaha caahán ñi tyin yihí tsa vaha añima ñi. Tan nyívi caquiñi, tsa caquiñi caahán ñi, tyin tsa caquiñi yihí tsitsi añima ñi. ³⁶ Tan yuhu catyí yu tsihin ndo tyin quívi cua tatsi tuñi Nyoo tsi tandíhi nyívi, cua cuhva cuenda ñi tandíhi tuhun tsa ña vaha caahán ñi. ³⁷ Tyin tsa cuenda tsa caahán ndo, tan cua catyí Nyoo tun vaha ndo o ña vaha ndo.

Nyívi ña vaha, tsa iyo ñi cuñí ñi nyehe ñi

(Mr. 8.12; Lc. 11.29-32)

³⁸ Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesú:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹ Tan nacahan̄ ra Jesú tan catyí ra:

—Nyivi ña vaha tan nyivi tsa nyicún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javaha Nyoo tsihin ra Jonás ra cuví ndusu yuhu ra tahan̄ tsanaha.

⁴⁰ Tyin tumaa tsinyī ra Jonás tsitsi tyaca cahnu uñi quívi tan uñi tsacuaa, tacan cua cunyii yuhu Rayī tsa quee nda gloria tsitsi ñuhu uñi quívi tan uñi tsacuaa. ⁴¹ Tan quívi cua tatsi tuñi Nyoo tsi tandíhi nyivi, cua nduvita nyivi tsicō ñuu Nínive tahan̄ tsanaha tan cua catyí ñi na tatsi tuñi Nyoo tsi nyoooho nyívi tsa iyó vityin. Tan cua catyí ñi tyin cua cunaa ndo, tyin maa ñi tsa cuví ñi ñuu Nínive, nasam̄ ñi cuhva iyó ñi quívi cahān̄ ra Jonás tuhun Nyoo tsihin ñi. Tan ihyá nyíi ra cahnu ca cuví tan ñavin ca ra Jonás. [Tan ña cuñí ndo tyaa soho ndo tsa caahán yu.] ⁴² Tan tacan tucu ñaha tsa tsindac̄ ñaha ityi Sur, cua nduvita ña quívi cua cutuñi nyivi tan cua catyí ña tyin cua cunaa nyoooho nyívi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa cahān̄ Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán̄ ra Jesú tsihin yo nácaa quihví nu tatyí ña vaha añima yo inga tsaha tatum naa iñi yo tsi Nyoo

(Lc. 11.24-26)

⁴³ *Tatum iin nu tatyí ña vaha quita nu tsitsi añima iin nyívi, tsicá nuu nu ñuhu ityi, nanducú nu iin nu quitatu nu. Tan ña nañili maa nu nu quitatu nu. Tacan tan tsicá iñi nu: "Cunuhu yu nda vehe yu nu quee yu." Tacan tan cuahán nyico nu añima nu quee nu. Tan nyehe nu tyin ndiī xaan, tan yoñi iyó, tan siñi xaan caá. ⁴⁴ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihví tandíhi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuvi tsihin quívi iyó —catyí ra Jesú.*

Nu tsah̄ cuenda ra Jesú tyin tumaa cuvi yañi ra, tan tumaa cuví sihī ra, cuví tsi nyivi tsa javahá cuhva cuñí Nyoo

(Mr. 3.31-35; Lc. 8.19-21)

⁴⁶ *Ndi caahán̄ ca ra Jesú tsihin nyivi, tan tsaa sihī ra tan yañi ra, tan nyecú ñi ityi tsata vehe, tan cuñí ñi cahān̄ ñi tsihin ra.*

⁴⁷ *Tacan tan jacotō iin ra tsi ra Jesú, tan catyí ra:*

—Sihī un tsihin ra yañi un naha ra nyecú ñi tsata vehe. Tan cuñí ñi cahān̄ ñi tsihin un.

⁴⁸ *Tan nacahan̄ ra Jesú tan catyí ra tsihin ra can:*

—¿Yóo cuví sihī yu tan yóo cuví yañi yu?
—catyí ra.

⁴⁹ *Tacan tan janah̄ ndaha ra nu nyecú ra tsicá tsihin ra, tan catyí ra:*

—Ra ihyá naha ra cuví sihī yu tan yañi yu. ⁵⁰ Tyin tandíhi nyivi tsa javahá cuhva cuñí Jutu yu, ra nyaá gloria, juvin ñi can cuví yañi yu, tan cuhva yu, tan sihī yu —catyí ra Jesú.

13

Nu caahán̄ ra Jesú tyin tumaa iin ra tatsí, tacan cuví ra caahán̄ tuhun Nyoo

(Mr. 4.1-9; Lc. 8.4-8)

¹ *Quiví can quitā ra Jesú vehe nu nyíi ra tan cuahán̄ ra, tsicunyā ra yuhu miñi.* ² *Tan cuaha xaan nyívi ndu iin nu nyaá ra, yacan cuenda quihví̄ ra tsitsi iin yutun ndoo tan tsinyaā ra. Tan tandíhi nyivi ndoo ñi yuhu ndutuya.* ³ *Tacan tan quitsah̄ jacuahá̄ ra tsi*

ñi tan caahán ra tsihin ñi tsihin iin cuhva, tan catyí ra:

—Quitá iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.⁴ Tan cuhva tsa quití ra tsiti can, cucoyo juhva tsi yuhu ityi. Tan quitsí saa tan tsatsí tì tsiti can.⁵ Tan juhva ca tsiti can cucoyo tyañu yuu nu ña cuaha nyahyu yihí. Tan ican cana tsiti can tsa numi ñi tyin ña cuaha nyahyu yihí tyañu yuu can.⁶ Maa tyin cuhva tsa cana ñicanyii, numi ñi na ityi tsi, tyin ña cunu yihí yoho tsaha tsi.⁷ Juhva ca tsiti can cucoyo tyañu iñu. Tan quivi cana trigu can tsahnu tsi iin caa ñi tsihin iñu can, tan iñu can numi xaan ca tsahnu tsi tan tsahñi tsi trigu can.⁸ Maa tyin juhva ca tsiti can cucoyo nu ñuhu vaha. Tan quivi tsahnu tsi, vaha xaan tsahä tsi tsiti. Tyin tsa iin tsiti can, ciente tsiti quitä tsihin tsi. Tan inga tsiti can, uñi xico, tan inga tsi oco utsi tsiti tsahä tsi.⁹ ¡Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenda jacuahá ra tsi nyivi tan ña catyí tuhun catsi ra tsihin ñi

(Mr. 4.10-12; Lc. 8.9-10)

¹⁰ Tacan tan natuhvá ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

¹¹ Tan nacahan ra Jesús tan catyí ra:

—Tsi nyoho jactó Nyoo tuhun xeehe, cuhva ndacá ñaha ra, maa tyin nyivi ihyá ña cuví coto ñi tsa tsahä Nyoo tsi nyoho.¹² Tyin tandihí nyivi tsa cutuñi iñi tsa caahán yu tan jayahá ñi, cuaha ca cua cutuñi iñi ñi. Tan nyivi tsa ña cutuñi iñi, tan ña cuñí ñi jayahá ñi, cuah quihin nyaas ndihí yu tsa luxu ñi tsa tsító ñi.¹³ Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsíñi ñi maa tyin ña cutuñi iñi ñi, tumaa tsa ña tsíñi ñi cuví can.¹⁴ Tyin tacan tan cunda tsa cahan ra Isaías ra cuví ndusu yuhu Nyoo tahan tsanaha, tan catyí ra:

Tsa nditsa tyin nyoho tsíñi ndo tuhun yu, maa tyin ña cutuñi iñi ndo.

Cua nyehe ndo tsa jayahá yu, tan ña cua cutuñi iñi ndo.

¹⁵ Tyin tsa ndundava xaan añima nyivi ihyá,

tan ña catsi vaha tsíñi ñi.

tan ndasí tinuu ñi,
na ña cua nyehe ñi tsihin tinuu ñi,
tan ña cua cuñí ñi tsihin soho ñi.
Tan ndi ña cua cutuñi iñi ñi tsihin añima ñi.
Tan ndi ña cua nanducu ñi tsi yu, na jandu-
vaha yu tsi ñi.

¹⁶*Maa tyin sii xaan cuví tsi nyoho, tyin nyehé ndo tsihin tinuu ndo, tan tsíñi ndo tsihin soho ndo.¹⁷ Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñí ñi nyehe ñi tsa nyehé nyoho tsa jayahá yu, maa tyin ña nyehé ñi. Tan cuñí ñi tyaa soho ñi tandihí tsa tsíñi nyoho vityin, maa tyin ña tsíñi ñi.

Nu catyí tuhun ra Jesús tsa cuñí tsi catyí cuhva tsa cahan ra tsihin nyivi tsa cuenda ra tatsi can

(Mr. 4.13-20; Lc. 8.11-15)

¹⁸*Tyaa soho ndo tsa cuñí tsi catyí cuhva tsa cahan yu tsa cuenda ra tsa tatsí tsiti trigu can:¹⁹ Nyivi tsa tsíñi tuhun nácaa cuñí Nyoo cundaca ñaha ra añima ñi, tan ña cutuñi iñi ñi, cuví ñi tumaa nu cucoyo tsiti trigu yuhu ityi. Tan quitsí nu ña vaha tan quihin nyaas nu tuhun Nyoo tsa iyó añima ñi.²⁰ Tan tumaa nu cucoyo tsiti can tyañu yuu, juvin ñi nyivi tsa tsíñi tuhun Nyoo cuví can. Tan sii xaan naquihin vaha ñi itsi juhva ñi quivi.²¹ Tyin nduve ñuhu cunu ican, yacan cuenda cana tsiti can, maa tyin ña cuví cuhun yohu tsi. Tan tacan cuví nyivi can. Juhva ñi quivi tsinú iñi ñi. Maa tyin quivi tsa quitsahá nyehe ñi tundoho, tan caahán ndasí nyivi tsata ñi tsa cuenda tuhun Nyoo, tacan tan jandihí ñi tsa tsinú iñi ñi.²² Tan tumaa nu cucoyo tsiti can tsitsi iñu, juvin ñi nyivi tsa tsíñi tuhun Nyoo cuví can. Tsíñi ñi, maa tyin ña cuñí ñi jayahá ñi tumaa tsíñi ñi. Tyin tyaá xaan ca iñi ñi tundoho ñayivi tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatayú tsi tsi ñi, tan cuví ñi tumaa yutun tsa ña tsahá tsiti.²³ Tan ñuhu vaha nu cucoyo tsiti can, yacan cuví inga nyivi tsa tsíñi tuhun Nyoo, tan cutuñi iñi ñi, tan jayahá ñi tandihí tuhun caahán ra. Yihí ñi cuví ñi tumaa tsiti tsa cana tan tsaha tsi iin ciente tsiti, tan inga ñi cuví ñi tumaa tsiti tsa tsahä uñi xico, o tumaa tsiti tsa tsahä oco utsi tsiti intuhun intuhun.

*Nu caahán ra Jesús nácaa cuahán tuhun
trigu tan cuhu ña vaha*

²⁴Tan cahán tucu ra Jesús inga cuhva ihyá
tsihin ñi; tan catyí ra:

—Tsa ndacá ñaha Nyoo tsi nyíví cuví tsi
tumaa iin ra tsa tatsí tsítí trigu nu ñuhu
ra. ²⁵Tan cuhva tsa quixí tandíhi ra jahá
tyiñu naha ra, quihví iin ra xaan iñi tsi ra
jatsii can, tan quití ra tsítí cuhu ña vaha,
tan cuahán ra. ²⁶Tan quíví cana tsítí trigu
can, tan cana yoco tsi, cana ndihí tucu cuhu
ña vaha can. ²⁷Tacan tan ra cuví musu can
naha ra, tsahan ra naha tsicatyí tuhun ra
naha tsihin tsitoho ra naha: “Tata, maa ñí
tsítí trigu tatsí ndi, ¿tan nacuenda tyin cana
cuhu ña vaha can?” catyí ra naha. ²⁸Tan
nacahán ra can tan catyí ra: “Iyó iin ra xaan
iñi tsi yu javahá tsehe, tun cuvi.” Tacan tan
musu can, catyí ra naha tsihin tsitoho ra:
“¿A cuñí un tyin cuhun ndi tan tuhun ndi
cuhu ña vaha can?” ²⁹Tan tsitoho ra naha
catyí ra: “Ña tuhun ndo, tyin coto tuhun
ndihí ndo trigu can. ³⁰Jaña ndo, na cuahnu
maa tsi iin caa ñi tsihin trigu can, tatum
tsa tsitsa tsi, tacan tan cua tava tyiñu yu
na tuhun jihna ra naha cuhu ña vaha can,
tan cuhní ra naha cuenda jucun, tan cahmi
ra naha. Tan yaha can tan natyihí vaha ra
naha tsa vaha can tsitsi yaca yu.”

*Nu caahán ra Jesús tyin tumaa tsiti
mostaza cuví tsa ndacá ñaha Nyoo tsi yo
(Mr. 4.30-32; Lc. 13.18-19)*

³¹Tacan tan cahán ra Jesús inga cuhva
ihyá tsihin ñi tan catyí ra:

—Tsa ndacá ñaha Nyoo tsi nyíví cuví tsi
tumaa iin tsítí mostaza tsa tatsí iin ra nu
ñuhu ra. ³²Tyin tsítí can lihli ñi tsi tan ñavin
ca tandíhi ca tsítí. Maa tyin quíví tsahnú tsi
cuví tsi iin yutun. Tan quitsi saa, tan javahá
ti taca ti soco tun —catyí ra Jesús.

*Nu caahán ra Jesús tyin tumaa yutsan iya
tacan cuví tsa ndacá ñaha Nyoo tsi yo
(Lc. 13.20-21)*

³³Tan cahán ra Jesús inga cuhva ihyá
tsihin ñi tan catyí ra:

—Tsa ndacá ñaha Nyoo tsi nyíví cuví tsi
tumaa yutsan iya tsa nasacá nuu iin ñaha
tsihin uñi jahma yutyi paan. Tyin tumaa
ndaá tandíhi yutsan paan can jahá tsa luxu
ñi yutsan iya can, tacan cuví tsa ndacá ñaha
Nyoo tsi yo —catyí ra.

*Nu catyí tuhun ra Jesús nacuenda jacuahá
ra tsí nyíví tsihin cuhva*

(Mr. 4.33-34)

³⁴Tandíhi tuhun can cahán ra Jesús tsihin
nyíví tsihin cuhva. Tan tandíhi tsa cahán
ra tsihin ñí ña cahán catsi maa ra, maa ñí
maa tsihin cuhva cahán ra. ³⁵Tacan cuví
tyin tacan tan cundaas tsa cahán Jutu Mañí
yo tsihin yuhu ra cuví ndusu yuhu ra tahan
tsanaha tan tyaq ra tyehen:

Tsihin cuhva cua cahán yu tsihin nyíví.

Cua cahán yu tsihin ñi tuhun tsa yihí xeehe
nda cuanda tsa javahá Nyoo ñuhu
ñayíví.

*Nu caahán ra Jesús náa cuñí tsi catyí cuhu
ña vaha tsa caná tsihin tsítí trigu can*

³⁶Tacan tan jacunuuhu ra Jesús tsi nyíví,
tan quihví ra tsitsi vehe nu nyíí ra. Tan
natuhvá ra tsicá tsihin ra nu nyaá ra, tan
catyí ra naha tsihin ra:

—Catyí tuhun tsihin ndi náa cuñí tsi
catyí tsa cahán un tsihin nyíví tsa cuenda
cuhu ña vaha tan trigu can.

³⁷Tacan tan quitsa catyí ra Jesús tsihin
ra naha:

—Ra tsa tatsí tsítí trigu can cuví yuhu
Rayíí tsa quee nda gloria. ³⁸Tan ñuhu can
cuví nyíví iyó nu ñuhu ñayíví. Tan tsítí
trigu can cuví nyíví tsa ndacá ñaha Nyoo.
Tan cuhu ñaha vaha can cuví nyíví tsa nyicún
tsi nu ña vaha. ³⁹Tan nu tsa tatsí cuhu ña
vaha can, nu ican cuví nu ña vaha juvin
ñi nu tsa xaan iñi tsi yu. Tan quíví cua
naquihin yu tyiñu jahá yu, yacan cuñí tsi
catyí quíví cua cundíhi ñuhu ñayíví. Tan
ra tsa cua naquihin tsítí can, cuví ra ángel
naha ra. ⁴⁰Tumaa jataca ra naha cuhu ña
vaha can tyin cayu tsi, tacan cua cuví quíví
cua cundíhi ñayíví. ⁴¹Yuhu Rayíí tsa quee
nda gloria cua jaquitsi yu ángel tan jataca
ra naha tsi nyíví natyuhu tsi inga nyíví na
javaha ñi tsa ña vaha tan inga nyíví tsa
iyó cuatyí. ⁴²Tan cua tyihi ra naha tsi ñi
tsitsi ono nu cayú ñuhu. Tan ican cua
vacu tsaa ñi tan cahyu ña cua cuví nuhu
ñi. ⁴³Nyoocho tan nyíví javahá cuhva cuñí
Nyoo cua quituvi ndo nuu Jutu yo. Tan cua
cuví ndo tumaa tsa nditsin ñuhu ñicanyíi,
nu ndacá ñaha Jutu yo. Tatun iyó soho ndo,
tyaq soho ndo tsa caahán yu.

Xuhun cuaan tsa yihí xeehe

⁴⁴ "Tsa ndacá ñaha Nyoo tsi nyivi cuví tsi tumaa xuhun cuaan tsa yihií xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sií xaan cuñí ra cuanuhu ra tan xicó ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin cuhva tsa cahan ra Jesús cuenda iin yuu xiñu tsa yahvi xaan nyaá

⁴⁵ "Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra, ⁴⁶ tan tsa ñihí ra iin tsa yahví xaan nyaá, xicó ra tandihí maa tsa cumí ra, tan jata ra yuu xiñu vaha can.

Nu caahán ra Jesús iin cuhva cuenda traya

⁴⁷ "Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca. ⁴⁸ Tan tsa tsitya can tsihin tyaca, tavá ra naha traya can nu ity. Tan ican nacatsí ra naha tsi ti, naquihín vaha ra naha quiti vaha tsitsi iin tyica, tan javitá ra naha quiti ña vaha can. ⁴⁹ Tan tacan cua cuvi quivi naa ñayivi, cua quitsi ángel, quitsi tava siín ra naha tsi nyivi vaha tan nyivi ña vaha. ⁵⁰ Tan cua tyihí ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuvi nuhu ñi.

Nu caahán ra Jesús tyin vaha tuhun tsahnu Nyoo tan tuhun tsaa Nyoo

⁵¹ Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñí iñi ndo tandihí tsa cahan yu? Tan nacahan ra naha tan catyí ra naha: —Cutuñí iñi ndi, Jutu Mañi yu.

⁵² Tacan tan catyí ra Jesús tsihin ra naha:

—In ra cuví maestro cuenda ley tsa tsító maa ra tuhun tsahnu tan tatum cua coto ndihí ra nácaa ndacá ñaha Nyoo tsihin tandihí tuhun tsaa tsa caahán yu, cua cuvi ra tumaa iin ra jatsii vehe tan cua jacuahua ra nduvu taahan tuhun vaha can tsi nyivi —catyí ra Jesús.

Nu tsinuhu ra Jesús ñuu Nazaret nu tsahnu ra

(Mr. 6.1-6; Lc. 4.16-30)

⁵³ Tsa ndihí cahan ra Jesús cuhva ihyá tan quitá ra cuahán ra. ⁵⁴ Tan tsaa nyico ra ñuu ra. Tan quitsaha jacuahá ra tsitsi vehe ñuhu ñuu can. Tan iyo cuñí nyivi tan catyí ñi:

—¿Nu maa tahan cutuhvá ra ihyá tsa tsító xaan ra? ¿Tan nácaa cuví jahava ra tsa iyo? ⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas. ⁵⁶ Tan cuhva ra iyó tucu ñi ity nu iyó yo. Tun tacan, ¿nu maa tahan cutuhvá ra tandihí tsa tsító ra? —catyí ñi.

⁵⁷ Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyivi tandihí ñi ity jahá ñi tsa ñayivi tsi ra ndusu yuhu Nyoo, maa tyin nyivi ñuu ra ña tyaá yahvi ñi tsi ra tan ndi nyivi vehe ra —catyí ra Jesús.

⁵⁸ Tan ña cuaha tsa iyo jahavá ra ñuu ra tsa cuenda tyin ña tsinú iñi ñi tsi ra.

14

Nu catyí tsi nácaa tsihí ra Juan, ra jacoondutyá tsi nyivi

(Mr. 6.14-29; Lc. 9.7-9)

¹ Quivi can ra Herodes, ra ndacá ñaha nicahnu nu cuví Galilea, ñihí tuhun ra tsa jahavá ra Jesús. ² Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyivi, ra tsa tsihí tan vityin nandoto nyico ra. Yacan cuenda iyó tunyee iñi tsi ra tsa jahavá ra tsa iyo.

³⁻⁴ Tacan catyí ra tyin juvin ñi maa ra tava tyiñu tyin tihí ra naha tsi ra Juan. Tan cuhñí ra naha tsi ra tsihin cadena, tan tyihí ra naha tsi ra vehe caa. Tacan jahavá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasííhi ra Felipe, yañi ra.

⁵ Yacan cuenda ra Herodes cuñí ra cahñí ra tsi ra Juan, maa tyin yuuhví ra tsi nyivi, tyin tandihí ñi tsinú iñi ñi tyin ra Juan, ndusu yuhu Nyoo cuví ra. ⁶ Tan iin quivi iyó vico ra Herodes, tan sehe ña Herodías quitsaha tsaní ña yaa nu yucú ñi vico can. Tan tahan xaan iñi ra Herodes. ⁷ Tan catyí ra:

—Naha Nyoo tyin cua cuhva yu náa cua ndacan ñaha tyuvaah ihyá tsi yu —catyí ra Herodes.

⁸ Tacan tan natyuuhu sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyivi, tsi yu nu iin coho —catyí ña.

⁹ Tsa tsíñi ra rey Herodes tsa cahán ña, nducuihya cuñí ra. Maa tyin tsa cuenda tsa cahán ra tyin tandihí tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihí nyiví yucú vico can tan tsíñi ñi tsa cahán ra. Yacan cuenda tava tyínu ra na cuhva ra naha jiñi ra Juan tsi ña nu iin coho. ¹⁰ Tan tava tyínu ra na cucahrya ra naha jucun ra Juan nu nyír va vehe caa. ¹¹ Tacan tan tsíndaca ra naha jiñi ra Juan tsi ña, nyír tsi nu iin coho. Tan tsáha ra naha tsi ñaha tyuvaa can. Tan maa ña nacuhva cuenda ña tsi sihi ña.

¹² Tacan tan tsáa ra nyicún tsi ra Juan naha ra tan naquihín ra naha cuñú ñuhu ra, tan tyihí ra naha tsitsi ñuhu. Yaha can tan tsáhan ra naha tsjacoto ra naha tsi ra Jesús.

*Nu jacatsí ra Jesús tsi uhun mil rayíi
(Mr. 6.30-44; Lc. 9.10-17; Jn. 6.1-14)*

¹³ Tsa tsito ra Jesús tsa tahan ra Juan, qui-hin ra iin yutun ndoo, tan cuahán intuhun ñi maa ra nu taxin caa. Tan tsa tsito nyivi, quita ñi ñuu ñi, tan cuahán tsihin tsaha ñi nu nyír ra. ¹⁴ Tsa quita ra Jesús tsitsi yutun ndoo can, tan nyehe ra tyin cuaha xaan nyiví nyicún tsi ra. Tan cundaahví iñi ra nyehe ra tsi ñi. Tan janduvahá ra tsi nyiví cuuhví tsa tsáa tsihin ñi. ¹⁵ Tan tsa cuñí cuaa, tacan tan natuhvá ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñí xaan, tan yoñi nyiví iyó yatayin ñi ihyá. Yacan cuenda vaha ca cahán un tsihin nyiví ihyá na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cuhun ñi. Cuhva nyoho tsa catsi ñi.

¹⁷ Tan nacahan ra naha tan catyí ra naha:

—Nduve maa náa iyó ihyá. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndáca ndo can tsi yu.

¹⁹ Tacan tan catyí ra tsihin nyiví tyin na cunyeucu ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahví nyoo tsi Nyoo tan tsahú cuatyí ra paan can. Tan tsaha ra tsi ra tsicá tsihin ra, na tsatsa ra naha tsi nyiví can. ²⁰ Tan tandihí nyiví tsitsí ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica

tsihin tsa ñahñu icán. ²¹ Tan tsa tandihí ñi tsa tsatsí can, quita maa tumaa uhun mil tsa maa ñi maa rayíi. Tan siñ maa ñiñaha tan tsa nyihi.

*Nu tsicá ra Jesús nu ndutya
(Mr. 6.45-52; Jn. 6.16-21)*

²² Tsa yaha can tan catyí ra Jesús tsihin ra tsicá tsihin ra, na quihví ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyiví tyin na cuhun ñi. ²³ Tsa yaha tsa jacunuhy ra tsi ñi, tan ndaa ra yucu can cua ndacan tahví intuhun ñi maa ra tsi Nyoo. Maa tyin tsitsi tsa nyír ra can tan cuaa. ²⁴ Tan tsitsi tsa tsicán tahví ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañí tsi tsi yutun ndoo can tsa cuenda tyin ñihi xaan yihí tatyí nu cuahán ra naha. ²⁵ Tan tsa cua tuvi cuahán ndihí ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. ²⁶ Tan cuhva tsa nyehe ra naha tsi ra, tsicá ra nu ndutya can, nayuhví xaan ra naha. Tan caná tsaa ra naha, tan catyí ra naha:

—Jihna ndo xin. Tatyí vatsí can!

²⁷ Maa tyin nacahan ra Jesús tsihin ra naha, tan catyí ra:

—Ña nayuhví ndo tyin maa yu cuvíl —catyí ra.

²⁸ Tacan tan nacahan ra Pedro tan catyí ra:

—Jutu Mañi yu, tatum maa un vatsí juvin, cuhva tsa quitsi ndihí yu nu vatsí un.

²⁹ Tan ra Jesús catyí ra tsihin ra:

—Naha jiin.

Tacan tan quita ra Pedro tsitsi yutun ndoo can, tan quitsahá tsicá ra nu ndutya tan cuahán ra nda nu vatsí ra Jesús. ³⁰ Maa tyin cuhva tsa tuví iñi ra tyin ñihi xaan quitsahá yihí tatyí, nayuhví xaan ra, tacan tan quitsahá cuñí nyee ra, tan quitsahá caná tsaa ra tan catyí ra:

—Jacacu tsi yu, Jutu Mañi yu!

³¹ Tan iin yaha ñi tiñ ra Jesús ndaha ra, tan catyí ra tsihin ra:

—¿Nacuenda tsa nayuhví un, yooho tsa luxu xaan tsinú iñi tsi yu? —catyí ra Jesús tsihin ra.

³² Tan cuhva tsa quihví ra naha tsitsi yutun ndoo can, cutaxin tatyí can. ³³ Tacan

tan ra yucú tsitsi yutun ndoo can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvahá ra Jesús tsi nyivi cuuhví tsa iyó Genesaret
(Mr. 6:53-56)

³⁴ Tsa yahá sava ra naha miñi can, tsaar ra naha ñuhu Genesaret. ³⁵ Tan cuhva tsa nacoto nyivi iyó ican tsi ra Jesús tyin juvin ra cuví, jacoto ni tsi tandíhi nyivi iyó tanii cahnu can. Tan tsindacañi tandíhi nyivi cuuhví nu nyivi ra. ³⁶ Tan caahán ndaahvi ni tsihin ra, na cuhva ra tsa tiñi ni vasu luxu jahma ra. Tan tandíhi ni tsa tiñi jahma ra, nduvahá ni.

15

Tsa jatívi tsi nyivi nuu Nyoo
(Mr. 7:1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu queé ra naha ñuu Jerusalén. Tan tsahán ra naha nu nyivi ra Jesús tan tsicá tuhun ra naha tsi ra, tan catyí ra naha:

² —¿Nacuenda ña jayahá ra tsicá tsihin un naha ra cuhva nacoó tsii tsahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyí ra naha.

³ Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaá yahvi ndo tsa caahán Nyoo? ⁴ Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandíhi nyivi tsa caahán ndavaha ñi siqui jutu ñi o sihi ñi, cua cùu ñi”, catyí Nyoo. ⁵ Maa tyin nyoho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatinyee yu tsi un tyin tsa tsahá yu tandíhi tsa iyó tsi yu tsi Nyoo.” ⁶ Tatun tsa catyí ndo yacan, ña cuñí tsi tsa jatinyee ndo tsi jutu ndo o tsi sihi ndo, catyí ndo. Tan yacan cuví tsa jayahá ndo vityin, tyaá tsivo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo. ⁷ ¡Nyoho cuñí ndo tyin vaha xaan ndo, maa tyin ña nditsa ndo! Nditsa tsa cahán ra Isaías, ra cuví

ndusu yuhu Nyoo, siqui ndo jahá Nyoo. Tan catyí ra tyehen:

⁸ Nyivi ihya, jacaahnú ni tsi yu tsihin yuhu ñi. Maa tyin ñavin tsihin tsa niñi iñi ñi.

⁹ Yacan cuenda nduve yahvi nyaá jacaahnú ni tsi yu.

Tyin maa ni tuhun caahán jacuahá ni, tan ñavin tuhun yu jacuahá ni.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

¹⁰ Tacan tan cana ra Jesús tsi nyivi tan catyí ra tsihin ni:

—Tyaa soho ndo tsa caahán yu, tan nducu ndo cuhva cutuñi iñi ndo. ¹¹ Tyin nyivi tsa tiví nuu Nyoo, ñavin tsa quihví yuhu ñi jatívi tsi ni. Tyin tiví ni jahá tsa quítá yuhu ni.

¹² Tacan tan natuhvá ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñi ra naha tsa cahán un.

¹³ Tan maa ra Jesús nacahan ra tan catyí ra:

—Tandihi yutun tsa ña tatsi Jutu yu, ra nyaá gloria, cua tuhun ra nda cuanda yoho tun. ¹⁴ Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatuñi iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsaha catyí ra Pedro tsihin ra Jesús:

—Catyí tuhun tsihin ndi náa cuñí tsi catyí tsa cahán un nañi.

¹⁶ Tacan tan ra Jesús catyí ra tsihin ra naha:

—Ndi nyoho tan ña cutuñi ndihi ni ndo. ¹⁷ ¿A ña cutuñi iñi ndo tyin tsa tsatsí yo, tsitsi yo cuahán tsi? Yahá can tan cua quita nyico tsi. ¹⁸ Maa tyin tuhun tsa quítá yuhu yo, tsitsi añima yo queé can tan nyivi tiví ni nuu Nyoo jahá tsa caahán ni. ¹⁹ Tyin tsa caquíñi tsicá iñi ni tsitsi añima ni quítá can, tan cuñí ni cahñi ni nyivi. Cuñí ni suhu ni. Yihí nyivi caahán ni cuendu, o jacuñí nyaa ni tsi inga ca nyivi. Yihí ra cuñí ra coo inga ñaha ra, o ñiñaha iyó yiñ tsicá nuu ni tsihin inga rayii. Yihí ra tsicoó ra tsihin ñaha tan ña tindaha ra tsihin ñia. Tan yihí rayii quixí ra tsihin juvin ni maa rayii. Tan

ñiñaha yihí ñi quixí ñi tsihin juvin ñi maa ñaha. Tan tandíhi ca maa tsa caquiñi tsa javahá ñi tsihin cuñu ñuhu ñi. ²⁰ Yacan cuví tsa jativí tsi nyíví nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jativí can tsi ñi —catyí ra Jesús.

*Nu tsiny iñi iin ñaha inga ñuu tsi ra Jesús
(Mr. 7.24-30)*

²¹ Quita ra Jesús ñuu can tan cuahán ra ity ñuu Tiro tan Sidón. ²² Tan ity can iyó iin ñaha Canaán. Tan tsa nyehé ña tsi ra Jesús natuhvá ña nu nyaá ra tan caná tsaa ña tan catyí ña:

—Jutu Mañi yu, tata ra David, cýndaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

²³ Maa tyin tumaa tsa ña tsiñi ñi ra Jesús jahá ra tsi ra tan ña nacahan̄ ra tsa iin yaha ñi. Tacan tan natuhvá ra tsicá tsihin ra tan catyí ra naha tsihin ra:

—Cahan tsihin ña nu cunuhu ña tyin utsan xaan yo tsa caná tsaa ña tsata yo.

²⁴ Tacan tan catyí ra Jesús tsihin ra naha:

—Vatsí yu jaha Nyoo ñuu Israel tyin naquihin ndaaahvi yu nyíví ñuu can tsa cuví ñi tumaa mbee tsa cuanaá. Tan tsa cuenda nyíví can vatsí yu.

²⁵ Tan ñaha can natuhvá ña nu nyaá ra tan tsicuiñi tsití ña nuu ra, tan catyí ña tsihin ra:

—Jutu Mañi yu, jyatinyee tsi yu!

²⁶ Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

²⁷ Maa tyin ña ndasi cuñi ña tsa cahan̄ ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyó xuu mesa tsitoho ti —catyí ña.

²⁸ Tacan tan catyí ra Jesús tsihin ña:

—Yootho ñaha, tsinú xaan iñi un tsi yu. Na cuvi maa cuhva tsicá iñi un.

Tan juvin ñi cuhva can tan nduvahá sehe ña.

Nu cuaha xaan nyíví cuuhví janduvahá ra Jesús

²⁹ Tsa yaha yacan tan ra Jesús cuahán ra ity yuhu miñi Galilea, tan ndaa ra iin jiñi yucu tan ican tsinyaa ra. ³⁰ Tan cuaha xaan nyíví cuahán ñi nu nyaá ra cuandacá ñi

nyíví cuuhví tyin janduvahá ra tsi ñi. Yihí ñi coxo ñi, cuaa ñi, ñiñhi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandíhi ñi cuuhví can nu nyaá ra Jesús. Tan janduvahá ra tsi ñi. ³¹ Tan iyo xaan cuñi nyíví can nyehé ñi tyin nacahan̄ ñi ñiñhi tan nduvahá ñi lundu, tan nacacá ñi coxo, tan nanyehé ñi cuaa. Tan quitsaha jacahnu xaan ñi tsi Nyoo ñi, tsá cuví ñi nyíví Israel.

*Nu tsahá ra Jesús tsa catsi cumi mil rayíi
(Mr. 8.1-10)*

³² Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñi yu nyehé yu tsi nyíví ihyá, tyin tsa uñi quiví yucú ñi ihyá tsihin yo, tan nduve náa catsi ñi. Tan ña cuñi yu jacunuhu yu tsi ñi yuvehe ñi tyin ñaha ca catsi ñi, tan coto cíu naaha ñi ity cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyíví cuaha ihyá, tyin ihyá nduve nyíví iyó?

³⁴ Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyíví na cunyecu ñi nu ñuhu. ³⁶ Tacan tan quihin ra tsa utsa paan can tan tyaca can, tan nacuhvá ra tyahví nyoo tsi Nyoo. Tan quitsaha tsahnú cuatiyí ra paan tsihin tyaca, tan tsahá ra tsi ra tsicá tsihin ra tyin na tsatsa ra naha tsi nyíví. ³⁷ Tandíhi ñi tsatsí ñi, tan ndahá vaha iñi ñi. Tan tsa ndihí tsatsí ñi tan naquihin ra naha tsa ñahñu tsa ndoo can tan quita utsa tyica cuví tsi. ³⁸ Tan ra tsa tsatsí can naha ra quita maa cumi mil ra naha tan siñ maa ñiñaha tan tsa nyihi. ³⁹ Yaha can tan jacunuhu ra tsi ñi, tan quihví ra tsitsi yutun ndoo, tan cuahán ra ity Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahán ra naha nu nyíi ra Jesús, tyin cuñi ra naha nducu cuhva ra

naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ²Maa tyin nacahan̄ ra Jesús tan catyí ra tsihin ra naha:

—Tsa cueñi, tuhvá ndo catyí: “Sii xaan caa ityaan cua cuvi tyin cuaaha xaan nu vico”. ³Tan tsa tuvi catyí tucu ndo tyin ña sii maa caa cua cuvi, tyin iñi naaha xaan tan cuaaha xaan vico, catyí ndo. ⁴Nacuenda tyin tsitó tucu ndo yacan tan tsa cuví vityin ña cuvi nacoto ndo, nyoho ra jandaví ñaha? ⁵Nyivi tsa iyo vityin, quiñi xaan iyo ñi tan ña tsinú iñi ñi tsi Nyoo. Maa ñi tsa iyo cuñi ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuvi tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya
(Mr. 8.14-21)

⁵Cuhva tsa yaha ra tsicá tsihin ra Jesús inga tsyo miñi can, nducuhún iñi ra naha tyin nduve paan tsa catsi ra naha ndahá ra naha. ⁶Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷Tacan tan quitsah̄ natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸Tan tsa tuvi iñi ra Jesús tsa tsicá iñi ra naha, catyí ra tsihin ra naha:

—Nyoho tsa luxu ñi tsinú iñi tsi yu, ⁹nacuenda tyin tsicá xaan iñi ndo tyin nduve tsa catsi ndo ndahá ndo? ¹⁰¿A ñaha ca cutuñi iñi ndo? ¹¹¿A ña nducuhún iñi ndo quiv̄i tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñi tsa ndoo can? ¹²¿A tsa naá ndihí tucu iñi ndo quiv̄i tsa jacatsi yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan? ¹³¿Nacuenda ña tuví iñi ndo tyin ñavin tucu paan caahán yu tsa catyí yu tyin naha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹²Tacan tan cutuñi iñi ra naha tyin ñavin tsa cuenda yutsan iya paan can caahán ra,

maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo
(Mr. 8.27-30; Lc. 9.18-21)

¹³Cuhva tsa tsaa ra Jesús ityi ñuu Cesarea Filipo, tsicá tucun ra tsi ra tsicá tsihin ra tan catyí ra:

—¿Náa catyí nyivi? ¹⁴Yóo ra cuví yu, Rayii tsa quee nda gloria? —catyí ra.

¹⁴Tan nacahan̄ ra naha tan catyí ra naha:

—Yihí nyivi catyí ñi tyin ra Juan ra ja-coondutyä tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahen tsanaha cuví un.

¹⁵Tacan tan catyí ra tsihin ra naha:

—Tan nyoho, ¹⁶Yóo ra cuví yu, catyí ndo?

¹⁶Tacan tan nacahan̄ ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

¹⁷Tan nacahan̄ ra Jesús tan catyí ra:

—Sii xaan cuví tsi yooho, Simón, sehe ra Jonás, tyin ñavin nyivi janahá tucun ihyá tsi un, tyin maa Jutu yu, ra nyaá gloria janahá tsi un. ¹⁸Tan yuhu catyí yu tsihin un tyin yooho cuví ra Pedro. Tan siqui cava ihyá, cua javaha yu vehe ñuhu yu. Tan ña cua tani tsi jaha tucun tsiihí. ¹⁹Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihí tsa cuhñi un ihyá nu ñuhu ñayivi, tsa nuuhñi jahá Nyoo nda gloria. Tan tandihí tsa ndatsi un ihyá nu ñuhu ñayivi, tsa ndatsi maa Nyoo nda gloria.

²⁰Tacan tan catyí ra Jesús tsihin ra tsicá tsihin ra tyin ña cahan̄ ra naha tsihin nyivi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyivi tsi ra

(Mr. 8.31—9.1; Lc. 9.22-27)

²¹Nda quiv̄i can quitsah̄ catyí ra Jesús tsihin ra tsicá tsihin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi

ra naha tsi ra, maa tyin tsa tsinu uñi quiví cua nandoto ra inga tsaha. ²² Takan tan quihín ra Pedro tsi ra tan quita siín ra tsihín ra tan quitsahá caahán ra tsihín ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyicó coo ra Jesús, tan quitsahá caahán ra tsihín ra Pedro:

—Játsiyo nyaha tsi un, cuihna! Tyin cuní un casí un tsi yu. Tyin yootho ña tsicá iñi un cuhva cuñí Nyoo, tyin cuhva cuñí nyiví tsicá iñi un —catyí ra.

²⁴ Takan tan ra Jesús catyí ra tsihín ra tsicá tsihín ra:

—Tatun ndáa nyootho cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuví javaha ndo tsa cuñí Nyoo. Tan ña cua ndu uvi iñi ndo tsa yiñi ndo cuenda yu, vasu tandihí quiví nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu. ²⁵ Tan nyootho tsa ña cuñí nyehe tundoho, tan ña cuñí ndo cuhva ndo ñayiví iyó ndo tsa cuenda yu, cua nyehe ndo tundoho anyaya. Maa tyin nyootho tsa cua cuhva ñayiví ndo tsa cuenda yu, cua cacu ndo. ²⁶ Tyin nduve yahví nyaá tsa cua ñilhi ndo tandihí tsa iyó nu ñuhu ñayiví tun añima ndo tan ña cua cacu tsi. Tyin nduve maa náa tsihín tan cuví tyahvi ndo tan ña cua cunaa añima ndo. ²⁷ Tyin yuhu, Rayíi tsa quee nda gloria, cua quitsi nyico yu inga tsaha, maa tyin tsihín tsa cahnu cuví Jutu yu, tan cua quitsi ángel tsihín yu. Takan tan cua tyahvi yu tsi intuhun intuhun ndo tsa cuenda tsa javaha ndo. ²⁸ Tan tsa nditsa catyí yu tsihín ndo, tyin yiñi nyootho tsa yucú ihya vityin, cua nyehe ndo nu vatsí yu tsa cua cundaca ñaha yu, tsa ndi cumañi ca cíu ndo —catyí ra Jesús.

17

Nu nyehe uñi taahán ra tsicá tsihín ra Jesús nácaa tsa sii caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yaha iñu quiví, tan quihín ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iñi yucu sucun xaan tsihín ra naha. ² Tan ican nasama cuhva caá ra Jesús nuu ra yucú

tsihín ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu. ³ Takan tan nyehe ra naha tsi ra Moisés tan ra Elías, natuhún ra naha tsihín ra Jesús. ⁴ Tan quitsahá caahán ra Pedro tsihín ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñí un, javaha ndi uñi taahan tyahva, iñi tsi tsi maa un, tan inga tsi tsi ra Moisés, tan iñi tsi tsi ra Elías —catyí ra Pedro tsihín ra Jesús.

⁵ Tsitsi tsa caahán ra Pedro, quitsi iñi vico tsa xiñu xaan siquí ra naha. Tan tyasi tsi tsi ra naha. Tan tsiñi ra naha iñi ndusus tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan sii xaan cuñí yu tsihín ra. Tyaa yahvi ndo tsa caahán ra —catyí ndusus can.

⁶ Tsa tsiñi ra tsicá tsihín ra Jesús tuhun ihya, tsicavá tsihín nuu ra naha nda nu ñuhu, tyin nayuhví xaan ra naha. ⁷ Takan tan natuhva ra Jesús nu cayucú ra naha, tan tiñi ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tsihín ra naha:

—Ña cahan ndo tsa nyehe ndo ihya tsihín nyivi. Tsa yaha tsa cíu Rayíi tsa quee nda gloria tan nandoto ra, tacan tan cua cahan ndo can —catyí ra.

¹⁰ Takan tan tsicá tuhun ra tsicá tsihín ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihí. ¹² Maa tyin yuhu catyí yu tsihín ndo tyin tsa yaha quitsi ra Elías, tan ña nacoto nyiví tsi ra, tan javaha ñi tsihín ra tandihí cuhva cuñí maa ñi. Tan takan tucu yuhu, Rayíi tsa quee nda gloria, cua janyehe ñi tundoho tsi yu —catyí ra tsihín ra naha.

¹³ Takan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iñi ra luhlu tsa tsíiñi naahá jahá tatyí ña vaha

(Mr. 9.14-29; Lc. 9.37-43)

¹⁴ Cuhva tsa tsaa ra naha nu yucú nyivi, natuhvá iin ra tan tsicuiñi tsiti ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsiihí naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhu tan cayú ra, tan nduvá tucu ra nu yihí ndutya. ¹⁶ Tan tsindaca yu tsi ra tsi ra tsicá tsihin un, maa tyin ña cuví janduvalha ra naha tsi ra —catyí ra.

¹⁷ Tan nacahan ra Jesús tan catyí ra:

—¡Nyoho, nyivi tsa ña tsinú iñi cuví ndo! ¹⁸ ¡Tan caquiñi ndo! ¹⁹ ¿Ndáa nda quiñi cua cunyii yu tsihin ndo? ²⁰ ¿Tan ndáa nda quiñi cua cunyee iñi yu tsihin ndo, tyin nyoho ña tsinú vaha maa iñi ndo tsi yu? ²¹ Tindaca ndo tsi ra luhlu tsi yu —catyí ra.

¹⁸ Tacan tan tava ra Jesús tsi nu tatyi ña vaha can, tan quita nu tsi ra luhlu can. Tan juvin ñi cuhva can nduvahra.

¹⁹ Tsa yaha can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuví tava ndi tatyi ña vaha can?

²⁰ Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuví catyi ndo tsihin yuci ihyá na catisyo tsi tan cuhun tsi inga ityi, tan yucu ihyá cuhun tsi inga ityi. Tan nduve tsa ña cua cuví javaha ndo tatum nditsa tsa tsinú iñi ndo tsi yu.

²¹ Maa tyin tahan tatyi ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan ra Jesús tsa cua cahñi nyivi tsi ra

(Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayii tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa tsinu uñi quiñi tan cua nandoto yu —catyí ra.

Tsa tsiñi ra naha tuhun ihyá, cuiihya xaan cuñi ra naha cuví.

Nu tyahví ra naha cuenda tsa nduvahra vehe ñuhu cahnu

²⁴ Cuhva tsa tsaa ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahán ra naha tsinyeha ra naha nu nyíi ra Pedro tan tsica tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahan ra Pedro tan catyí ra:

—Tuhvá ra.

Tan tsa quihví ra Pedro tsitsi vehe nu iyó ra naha, jihna ca ra Jesús nacahan tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayivi ihyá yahví? ²⁶ ¿A tsi nyíi ñuu maa ra o tsi inga nyivi?

²⁶ Nacahan ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi. ²⁷ Maa tyin ña cuñi yo tsa cahan ra naha siquí yo, yacan cuenda vaha ca tsa cuhun un yuhu miñi can, tan jacuhun un yiquí tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu tì cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janahá ra Jesús yóo ra cahnu ca cuví nuu tandihí nyivi tsa ndacá ñaha Nyoo

(Mr. 9.33-37; Lc. 9.46-48)

²⁸ Quiñi can natuhvá ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

²⁹ Tacan tan ra Jesús cana ra tsi iin ra luhlu, tan tyaa ra tsi ra mahñu ra naha. ³⁰ Tan catyí ra:

—Tsa nditsa catyí yu tsihin ndo, tyin tatum nyoho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuvi quihví ndo nu ndacá ñaha Nyoo. ³¹ Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihyá. ³² Nyíi tsa naquihín tsi iin nyivi tumaa ra luhlu ihyá, tyin tsinú iñi ñi tsi yu, yuhu naquihín cuenda ñi.

*Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha
(Mt. 5.29-30; Mr. 9.42-48; Lc. 17.1-2)*

⁶Tatun yóo nyiví natyuhú tsi iin nyiví tsa ñaha ca tsinú vaha iñi tsi yu, naja vaha ñi tsa caquíñi, vaha ca na cunuhñi iin yuu yoso vee jucun ñi natyuhú can, tan cujanehñi nyiví tsi ñi nu cunu ndutya ñuhu.⁷ ¡Ndaahvi nyiví ñuu ñayiví, tyin tacan iyó tsa jativí tsi ñi! ¡Tan ndahvi tucu ra ndaahvi tsa jativí tsi ñi!

⁸Yacan cuenda tatum ndaha un o tsaha un javahá tsa ña vaha, cahnya can tan javita un. Tyin vaha ca quihví un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanií un tan jacuhun Nyoo tsi un nu cayú ñuhu tsa ña cua ndahva maa.⁹ Tun javahá un tsa ña vaha jahá tinuu un, tava can tan javita un. Tyin vaha ca quihví un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahan ra Jesús tyin tumaa mbee tsa cunaq, tacan cuví yo
(Lc. 15.3-7)*

¹⁰Na caca iñi ndo tyin ra nyihi cuenda yu ilhya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria.¹¹ Tyin yuhu, Rayii tsa quee nda gloria, vatsí jacacu yu tsi nyiví tsa cuanaa.

¹² ¿Nacaa cuñí nyooho? Tatun iin ra tan iyó iin cientu mbee jana ra, tan cunaa intuhun tì, ¿a ña nacoo ra tsa cumi xico tsahun cumi ti nu yucú tì, tan cuhun ra cu-nanducu ra tsi quítia cuanaa can?¹³ Tan tatun nañihi ra tsi tì, tsa nditsa tyin sii ca cua cuñí ra tsihin quítia can, tan ñavin ca tsihin tsa cumi xico tsahun cumi quítia tsa ña tsinaa.¹⁴ Tan tacan tucu, Jutu yo ra nyaá gloria, ña cuñí ra tsa cunaa ndi intuhun nyiví tsa cuví tumaa ra nyihi ilhya.

*Nacaa taahán tsijahá tahan yo tucahnu iñi tsi yo
(Lc. 17.3)*

¹⁵Tatun ra yañi un tan javahá ra tsa ña vaha tsi un, cahna tsihin intuhun ñi maa ra tan catyí un tsihin ra tyin ña vaha cuhva javahá ra. Tan tatun tyaa yahvi ra tuhun

caahán un, tsa jahá canaa un tsi ra inga tsaha cuenda Nyoo cuví can.¹⁶ Maa týin tatum ña tyaa yahvi ra tsi un, tacan tan cahna un tsi iin o uvi ra tyin cuvi ra naha tsa ndaa tsa cuenda tsa cua cahan un tsihin ra can.¹⁷ Tatum ña tyaa yahvi ra ndi maa tsi ra tsa tsahen tsihin un naha ra, tacan tan cahan tsihin tandíhi nyiví yucú vehe ñuhu. Tan tatum ña tyaa yahvi ra tsi ñi vehe ñuhu, tacan tan jaha ndo tumaa tsa ñavin ra yihí tuhun Nyoo cuví ra tan cuví ra tumaa ra caquíñi tsa tavá xuhun cuenda ra ndacá ñaha nda ñuu Roma.

¹⁸ 'Tsa nditsa catyí yu tsihin ndo, tyin tandíhi tsa cuhñi ndo ihyá nu ñuhu ñayiví, tsa nuuhñi tsi jahá maa Nyoo nda gloria. Tan tandíhi tsa ndatsi ndo ihyá nu ñuhu ñayiví, tsa ndatsi maa Nyoo nda gloria.

¹⁹ "Tan juvin ñi catyí tucu yu tsihin ndo, tatum uvi ndo ihyá nu ñuhu ñayiví, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo.²⁰ Tyin nu yucú uvi o uñi nyiví tan jacahní ñi tsi yu, ican nyaá yu mahñu ñi —catyí ra Jesús.

²¹ Tacan tan tsahen ra Pedro tsindaca tuhun ra tsi ra Jesús tan catyí ra:

—Jutu Mañi yu, tatum ra yañi yu tan javahá ra tsa ña vaha tsihin yu, ¡najava taahan tsaha taahán tsi jaha yu tucahnu iñi tsi ra? ¡A utsa taahan tsaha?

²² Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi centu cumi xico utsi tsaha taahán tsi jaha un tucahnu iñi.

Nu cahan ra Jesús iin cuhva cuenda iin ra tsa ña cuñí jaha tucahnu iñi

²³ Yacan cuenda tsa ndacá ñaha Nyoo tsi nyiví cuví tsi tumaa iin rey tsa nacaná tsi tandíhi musu ra tyin cua nyehe ra nácaa nyaá cuenda ra naha tsi ra.²⁴ Tan cuhva tsa quitsáha natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra.²⁵ Tan musu can nduve náaa tsihin tyahvi ra tsi tsitoho ra, yacan cuenda tsitoho ra catyí: "Xico ndo tsi ra iin cahnu ñi tsihin ñasíhi ra, tan tsihin sehe ra tan tandíhi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu."

²⁶ Tacan tan musu can tsicuñi tsi tì ra nuu tsitoho ra, tan cahan ndaahvi ra tsihin ra, tan catyí ra: "Tata, jaha tumañi iñi, cuatu un luxu, tan tyahvi yu tandíhi tsa

nyaá cuenda yu tsi un nda ñihi yu xuhun”, catyí ra.²⁷ Tan cundahví iñi tsitoho ra tsi ra, tan jahá ra tucahnu iñi tsi ra, tan janaa ra tandíhi tsa nyaá cuenda ra, tan jandoo nuña ra tsi ra.²⁸ Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiñi ra tsi ra can, tan quitsaha tiñi ra jucun ra, tan catyí ra tsihin ra: “Tyahví tsa nyaá cuenda un tsi yu.”²⁹ Tacan tan tsicuiñi tsiti ra can nuu ra, tan cahán ndaahvi ra tsihin ra tan catyí ra: “Cuato luxu tan nda ñihi yu xuhun tan cua tyahvi yu tandíhi tsa nyaá cuenda yu tsi un”, catyí ra.³⁰ Maa tyin maa ra ñia cuñi ra cuata ra, tan tsahan ra tsityiñi ra tsi ra can vehe caa nda cuanda tsa tyahví ra tsa nyaá cuenda ra tsi ra.³¹ Tsa nyehe inga ca musu tsa javahá ra, cuiihya xaan cuñi ra naha, tan tsahan ra naha tsinacatyí tuhun ra naha tsihin tsitoho ra naha tsa ña vaha tsa javahá ra can.³² Tacan tan tsitoho ra can tava tyiñi ra na quitsa ra can. Tan tsa tsaa ra, tan catyí ra tsihin ra: “Musu ñia vaha cuví un. Yuhu jahá yu tucahnu iñi tandíhi tsa nyaá cuenda un tsi yu, tyin cahán ndaahvi un tsihin yu.”³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehé yu tsi un”, catyí ra tsihin ra.³⁴ Tan cuxaan xaan tsitoho ra, tan tava tyiñi ra na tatsi tuñi ra naha tsi ra nda cuanda tsa tyahví ra tandíhi tsa nyaá cuenda ra.

³⁵ Tan nu ndíhi cahán ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyoocho tatum ña jaha ndo tucahnu iñi tsi nyiví ndo tsihin tsa niñi añima ndo.

19

*Nu caahán ra Jesús tyin ña vaha tsa nacoo ihñi rayii tsi ñasiihi ra
(Mr. 10.1-12; Lc. 16.18)*

¹Tsa yahá tsa cahán ra Jesús tuhun ihyá, tan quita ra cuenda Galilea can, tan cuahán ra cuenda Judea inga tsiyo yutya cahnu Jordán, ityí nu caná ñicanayii.² Cuaha xaan nyiví tsinyicún tsi ra, tan janduvahá ra tsi nyiví cuuhví.

³ Tacan tan juhva ra fariseo naha ra natuhví ra naha nu nyaá ra Jesús, tyin cuví ra naha nducu cuhva ra naha tsi ra tyin

tacan tan cuvi tyaa ra naha cuatyí siquí ra. Tan tsicá tuhun ra naha tsi ra tan catyí ra naha:

—¿A vaha tsa nacoo rayii tsi ñasiihi ra tsa cuenda náa ñi tisíhi tsahá ña tsi ra?

⁴Tan nacahan ra tan catyí ra:

—¿A ñia tuhvá ndo cahví nu tutu Nyoo nu catyí tsi tyin ra tsa javahá tsi ndo nda quivi jihna ñi, javaha ra rayii tan ñaha?⁵ Tan catyí tsi tyehen: “Taahán tsi nacoo rayii tsi jutu ra tan sihi ra, tan ndu in ra tsihin ñasiihi ra. Tan tsa nduvi taahan ñi cua cuvi ñi tumaa tsa intuhun ña nyiví.”⁶ Yacan cuenda, ñavin ca uvi taahan ñi, maa tyin nduvi ñi intuhun ña nyiví cuví ñi. Yacan cuenda, ñia taahán tsi tsa nacoo tahan ñi tsi ñi tyin maa Nyoo tsa jandu iñi tsi ñi —catyí ra.

⁷Tacan tan tsicá tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuví cani iin rayii tutu cuenda ley ra tan nacoo ra ñasiihi ra?

⁸Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsahá ra Moisés ndatu tsa nacoo ndo ñasiihi ndo. Maa tyin quivi jihna ñi ñavin tacan tsicóqo nyiví.⁹ Yuhu catyí yu tsihin ndo tyehen: Ra tsa nacoo ñasiihi, tan ñavin tsa cuenda tsa quituvi ña tsihin inga rayii, tan tindahá ra tsihin inga ñaha, tsicoo cuatyí ra nuu Nyoo. Tan ra tsa tindahá tsihin ñaha tsa nacoo rayii can, juvin ñi tsicoo tucu cuatyí ra can —catyí ra.

¹⁰ Tacan tan ra tsicá tsihin ra, catyí ra naha tsihin ra:

—Tatum tacan taahán tsi coo rayii tsihin ñasiihi ra, vaha ca ña tindaha yo.

¹¹Tan ra Jesús catyí ra tsihin ra naha:

—Ña tandíhi nyiví cuví naquihin cuenda tuhun ihyá. Maa tyin nyiví tsa tsahá Nyoo cuví naquihin cuenda ñi can.¹² Tsa ñia tindaha nyiví, cuaha ñi cuenda cuví tsi. Yihí ñi ña cuñi ñi tindaha ñi tyin iin cuhva caa maa ñi nda cacu ñi. Tan inga ñi ña cuñi ñi tindaha ñi tyin tsa nducapun ñi jaha nyiví. Tan yihí ñi ña tindahá ñi tsa cuenda tsa cuñi ñi javaha ñi maa ñi maa tyiñi Nyoo, na nducuaha ca añima tsa ndacá ñaha Nyoo. Tandíhi nyiví tsa cuví javaha yacan na javaha ñi —catyí ra Jesús.

*Nu nasocó ra Jesús tsi tsa nyihi
(Mr. 10.13-16; Lc. 18.15-17)*

¹³ Tacan tan quitsí ndaca nyíví juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahá caahán ra naha tsi nyivi tsa cuahán tsihin tsa nyihi can. ¹⁴ Maa tyin ra Jesús catyí ra:

—Jaña ndo tsi tsa nyihi na quitsí maa tsi naha tsi nu nyaá yu. Tan fia casí ndo. Tyin nyíví ndacá ñaha Nyoo cuví ñi tumaa tsa nyihi ihyá —catyí ra.

¹⁵ Tacan tan tyiso ndaha ra jiñi tsi naha tsi. Yaha can tan cuahán ra.

*Nu tsahá ra Jesús cuhva tyin yií xaan nacuhva cuenda iin ra cuca tsi ra tsi Nyoo
(Mr. 10.17-31; Lc. 18.18-30)*

¹⁶ Iin ra tyuvaa tsahan ra tsindacá tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayiví nyito tsa ñua cua naa maa?

¹⁷ Tan ra Jesús catyí ra tsihin ra:

—¿Nacuenda catyí un tyin ra vaha cuví yu? Intuhun fíi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatum cuñí un coo un ñayiví tsa ñia cua naa maa, javaha tandíhi tuhun tsa tsaha Nyoo tyin javaha yo —catyí ra tsihin ra.

¹⁸ Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahfíi un nyivi. Ña coo inga ñaha tsi un. Ña suhu un tsa tsii nyivi. Ña cahán un cuendu siquí nyivi. ¹⁹ Tyaa yahvi tsi jutu un tan tsi sihi un. Tan cuñí tsi nyivi, tumaa tsa cuñí un tsi maa un.

²⁰ Tan ra tyuvaa can, catyí ra tsihin ra:

—Tandíhi maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañí tsi yu?

²¹ Tan ra Jesús catyí ra tsihin ra:

—Tatum cuñí un tsa iin ndaha ñi cuvi un iin ra cuítí nuu Nyoo, cuyaahan tan xíco un tsa iyó tsi un, tan cuhva un tsi nyíví ndaahvi, tan quitsí nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin cuhva tsa tsiní ra tyuvaa can tsa cahán ra Jesús tsihin ra, cuíhya xaan cuñí ra cuví tan cuanuhú ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yií xaan tan cuví nacuhva cuenda nyíví cuca tsi ñi na cundaca ñaha Nyoo tsi ñi. ²⁴ Catyí yu tsihin ndo inga tsaha, tyin vasu yií xaan yaha iin camellu xuu iin yiquí tucu, maa tyin yií xaan ca tsa quíhví iin nyíví cuca nu ndacá ñaha Nyoo —catyí ra Jesús.

²⁵ Tsa tsiní ra tsicá tsihin ra Jesús tsa cahán ra, iyo xaan cuñí ra naha, tan quitsahá tsicá tuhun tahan ra naha, tan catyí ra naha:

—Tun tacan, yoñi cua cuvi cacu

²⁶ Tacan tan nanyehé ra Jesús nu nyecú ra naha tan catyí ra:

—Nyíví ñia cuví javaha ñi yacan, maa tyin Nyoo cuví javaha ra tandíhi.

²⁷ Tacan tan quitsahá caahán ra Pedro tsihin ra:

—Jutu Mañi yu, nyuhu tandíhi maa tsa iyó tsi ndi nacoq ndi tan nyicún ndi tsi un. ¿Náa cua ñihí ndi? —catyí ra tsihin ra.

²⁸ Tan nacahan ra Jesús tan catyí ra:

—Tsa nditsa catyí yu tsihin ndo, tyin quívi tsa cuadutsaa tandíhi tsa iyó, yacan cuví quívi cuá cunyaa yuhu Rayii tsa quee nda gloria nu tyayu sii xaan caá tan cuá cundaca ñaha yu. Tan nyoho tsa nyicún tsi yu, cuá cunyecu ndihí ndo nu utsi uvi taahan tyayu sii caá. Tan cuá cundaca ñaha ndo tsi tandíhi nyíví cuví tata tsa utsi uvi taahan sehe ra Israel. ²⁹ Tan tandíhi nyoho tan tandíhi inga nyíví tsa nacoq vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cuá ñihí ñi iin ciente ca tsaha siquí can, tan cuá ñihí tucu ñi ñayiví nyito tsa ñia cua naa maa coo ñi. ³⁰ Cuaha xaan nyíví cuahán ityí nuu vityin, ñi icán cuá cuhun nu ndihí ña. Tan cuaha xaan nyíví cuahán nu ndihí vityin, ñi icán cuá cuhun ityí nuu.

20

Nu jacuahá ra Jesús iin cuhva cuenda ra jahá tyiñu

¹ Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quíta ra cuahán ra cuanducú ra musu jaha tyiñu nu tyiñu jahá ra. ² Tan ndoo ra tuhun tsihin musu can tyin cuá tyahvi ra yahvi tsa iin quívi. Tan jacuhun ra tsi ra naha cuá jaha tyiñu ra naha nu iyó tyiñu jahá

ra. ³Yahā can tan cuahán ra inga tsaha cuhva caa iin tsa tuvi. Tan nyehe ra tsi juhva ca ra yucú taxin nuyahvi can. ⁴Tan catyí ra tsihin ra naha: “Cuaahan ndíhi tucu nyooho jahá tyiñu ndo nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndíhi tucu ra can naha ra. ⁵Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. ⁶Yahā can tan quita nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihyá.” ⁷Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndíhi ndo jahá tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra. ⁸Tan cuhva tsa cua cuaa, tsitoho tyiñu can catyí ra tsihin ra yiñí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihví nu ndíhi naha ra, tan nu cua ndíhi tan tyahvi un tsi ra tsa quihví tsa jihna ñi naha ra”, catyí ra. ⁹Tacan tan tsaa ra tsa quihví caa uhun tsa tseñi can naha ra. Tan intuhun intuhun ra naha quihín ra naha yahvi nanií iin quiví. ¹⁰Yahā can, tan cuhva tsa tahan tsi tsi ra tsa quihví tsa jihna ñi can naha ra, cuñí maa ra naha tyin cuaha ca cua tyahvi ra tsi ra naha. Maa tyin induci ñi yahvi iin quiví quihín ra naha. ¹¹Tan cuhva tsa quihín ra naha, quitsaha caahán ra naha tsi tsitoho tyiñu can. ¹²Tan catyí ra naha: “Ra tsa tsaa nu ndíhi ihyá naha ra, intuhun ñi hora jahá tyiñu ra naha. Tan iin ñi yahvi tyahví un tsi ra naha tsihin tucu nyuhu tan nduvi nduvi jahá tyiñu ndi nu ihní”, catyí ra naha. ¹³Maa tyin nacahan tsitoho tyiñu can, tan catyí ra tsihin iin ra can: “Tsaal, nduve tsa ña vaha javaha yu tsihin un. ¿A ñavin yahvi tsa iin quiví ndoo yo tuhun tyin cua tyahvi yu tsi un? ¹⁴Quihín yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihví nu ndíhi iin ñi cuhva tsa tyahví yu tsi yooho? ¹⁵¿A nduve ndatu iyó tsi yu tsa javaha yu náa cuñí maa yu tsihin xuhun yu? ¿A ndasi cuñí un tyin vaha iñi yu tsihin

inga ra can naha ra?” catyí ra. ¹⁶Tacan nyivi quihví nu ndíhi, cuhun ñi ityi nuu. Tan nyivi cuahán ityi nuu, nda nu ndíhi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

Inga tsaha jacotó ra Jesús cuhva cua cahñi nyivi tsi ra

(Mr. 10.32-34; Lc. 18.31-34)

¹⁷Cuhva tsa cuñí cuhun ra Jesús nda ñuu Jerusalén, cana siñin ra tsi tsa utsi uvi ra tsicá tsihin ra tan catyí ra tsihin ra naha:

¹⁸—Nyehe ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayii tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyí ra naha tyin taahán tsi cíu yu.

¹⁹Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quiví cua nandoto yu —catyí ra Jesús tsihin ra naha.

Nu tsicán siñi ra Jacobo tan ra Juan iin tumañi iñi tsi ra Jesús

(Mr. 10.35-45)

²⁰Tacan tan ñasiñi ra Zebedeo natuhvá ña nu nyíi ra Jesús tsihin nduvi sehe ña, ra Jacobo tan ra Juan. Tan tsicuiñi tsíti ña nuu ra tyin cua ndacan ña iin tumañi iñi tsi ra.

²¹Tan tsicá tuhun ra Jesús tsi ña tan catyí ra:
—¿Náa cuñí un?

Tan catyí ña:

—Quiví tsa cunyaa un nu ndacá ñaha un nda gloria, cuhva tsa cunyaa nduvi sehe yu xiñi un. Na cunyaa iin ra tsiyó cuaha un, tan inga ra tsiyó satiyin un.

²²Maa tyin nacahan ra Jesús tan catyí ra:

—Nyoooho ña tsitó ndo tsa tsicán ndo. ¿A cuví nyehe nyoooho tundoho tsa cua nyehe yuhu? ¿A cuví cuhun ndo tuhun tsihí tuumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

²³Tan catyí ra Jesús tsihin ra naha:

—Tsa nditsa tyin cua nyehe ndo tun-doho, tan cua cuhun ndo tuhun tsihí tuumaa cuhun yuhu tuhun tsihí. Maa tyin tsa cunyaa ndo tsiyó cuaha yu tan tsiyó satiyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

²⁴Tan tsa tsin̄i tsa utsi ca ra tsicá tsihin ra Jesús yacan, cuxaŋ̄n̄ ra naha tsi nduvi ra can naha ra. ²⁵Maa tyin canā ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ūn̄ha tsi nyiv̄i iyó nu ūnuhū ūn̄ayiv̄i ihyá, ūn̄hi xaan̄ ndacá ūn̄ha ra naha tsi ūn̄i. Tan ra cuví ityi nuu tsihin ra naha nduyaa xaan̄ ra naha. ²⁶Maa tyin ūnav̄in̄ tacan̄ taahán̄ tsi jahava nyoooho. Tyin̄ ra tsa cuñ̄i nducalhnu ca cuvi nu Nyoo, cuñ̄i tsi cuví ra musu tandih̄ nyoooho. ²⁷Tan ndáa nyoooho tsa cuñ̄i ndo cuví ndo ityi nuu, cuñ̄i tsi cuví ndo musu tandih̄ ca ra naha. ²⁸Tumaa yuhu, Rayīī tsa quee nda gloria, ūn̄a vatsí yu tyin̄ jatyinyee nyiv̄i tsi yu. Maa tyin̄ yuhu vatsí yu vatsí jatyinyee yu tsi maa ūn̄i, tan cua cuhva yu ūn̄ayiv̄i yu tsa cuenda ūn̄i. Tyin̄ tsihin yacan̄ cua tyahvi yu cuatyi tandih̄ ūn̄i.

Nu janduvahq̄ ra Jesús tsi uvi taahan̄ ra cuaa

(Mr. 10.46-52; Lc. 18.35-43)

²⁹Cuhva tsa cua quita ra Jesús ūnu Jericó tsihin ra tsicá tsihin ra, cuaha xaan̄ nyiv̄i cuahán̄ cua nyicun̄ tsi ra naha. ³⁰Tan yuhu ityi can nyecú uvi taahan̄ ra cuaa. Tan cuhva tsa tsin̄i ra naha tyin̄ cua yaha ra Jesús, quitsah̄ caná tsaa ra naha. Tan catyí ra naha:

—Jutu Mañī yu, tata ra David, cundaahvi ūn̄i tsi ndi! —catyí ra naha.

³¹Tan nyiv̄i quitsah̄ caahán̄ ūn̄i tsihin ra naha na casí ra naha yuhu ra naha. Maa tyin̄ ūn̄hi ca canā tsaa ra naha:

—Jutu Mañī yu, tata ra David, cundaahvi ūn̄i tsi ndi!

³²Tacan̄ tan tsicuiñ̄ ra Jesús tan cana ra tsi nduvi taahan̄ ra cuaa can, tan tsicá tuhun ra tsi ra naha tan catyí ra:

—¿Náa cuñ̄i ndo javaha yu tsi ndo?

³³Tan nacahan̄ ra naha tan catyí ra naha:

—Jutu Mañī yu, jananyehe tsi ndi.

³⁴Tacan̄ tan cundaahvi ūn̄i ra Jesús tsi ra naha, tan tiñ̄n̄ ra tinuu ra naha. Tan iin yaha ūn̄i nanyehē ra naha, tan cuít̄i cuanyicún̄ ndih̄ ra naha tsi ra Jesús.

21

Nu cuahán̄ ra Jesús ūnu Jerusalén

(Mr. 11.1-11; Lc. 19.28-40; Jn. 12.12-19)

¹Tsa cua tsaa ra naha ūnu Jerusalén, tan tsaa ra naha ūnu Betfagé, yatyī ūn̄i yucú Olivo nu iyó yutun olivo. Tacan̄ tan tava

tyiñ̄ ra Jesús tsi uvi ra tsicá tsihin ra. ²Tan catyí ra tsihin ra naha:

—Cuaahan̄ ndo ūnu tsa canyí ityi nuu ihyá. Tan ican̄ cua ūn̄hi ndo iin urru siih̄i, nuuhñ̄i t̄i. Tan ndacá t̄i iin urru luuhlu. Ndatsī ndo tsi t̄i, tan quitsī ndaca ndo tsi t̄i naha t̄i tsi yu. ³Tan tatum yóo tsicá tuhun tsi ndo: “¿Náa cuú ndo tsi t̄i naha t̄i?”, tan catyí ndo tsihin ūn̄i: “Tyin̄ tsin̄i ūnuhū t̄i naha t̄i tsi maa ra ndacá ūn̄ha, maa tyin̄ numi ūn̄i cua quitsī ndaca nyico ndi tsi t̄i naha t̄i”, catyí ndo tsihin ūn̄i —catyí ra.

⁴Tacan̄ cuví tyin̄ cundaa tsa cahān̄ ra cuví ndusu yuhu Jutu Mañī yo tahan̄ tsanaha nu catyí ra tyehen:

⁵Cahān̄ ndo tsihin nyiv̄i ūnu Sión: “Nyéhe ndo, vatsí rey ndo nu iyó ndo. Ndaahvi ūn̄i vatsí ra yosó ra iin urru luuhlu, sehe iin quít̄i tsa tuhvá nyisó carga”, catyí ra cuví ndusu yuhu Nyoo can.

⁶Tacan̄ tan cuahán̄ ra tsicá tsihin ra Jesús, tan jahavā ra naha tumaa tsa cahān̄ ra tsihin ra naha. ⁷Quitsī ndaca ra naha tsi t̄i tsihin sih̄i t̄i. Tan tyisō ra naha jahmā ra naha tsata t̄i, tan ndaā ra Jesús tsi t̄i. ⁸Tan cuaha xaan̄ nyiv̄i tsaquiñ̄ ūn̄i jahmā ūn̄i nu ūnu ityi nu cuahán̄ ra, tan inga ūn̄i tsahnyā ūn̄i ndaha yutun tsaquiñ̄ ūn̄i tsitsī ityi. ⁹Tan nyiv̄i tsa cuahán̄ ityi nuu tan ityī tsata, quitsah̄ caná tsaa ūn̄i tan catyí ūn̄i:

—¡Cahnu xaan̄ cuví ra cuví tata ra rey David! ¡Cahnu xaan̄ cuví ra tsa jaquitsī Jutu Mañī yo Nyoo! ¡Tan na jacobnu yo tsi Nyoo ra nyáa gloria! —catyí ūn̄i.

¹⁰Cuhva tsa tsaā ra Jesús ūnu Jerusalén̄ can, tandih̄ maa nyiv̄i ūnu quitsah̄ cuvaá jahá ūn̄i, tan cuaha xaan̄ ūn̄i tsicá tuhun tahan̄ ūn̄i tsi ūn̄i, tan catyí ūn̄i:

—¿Yóō ra cuví ra ihyá?

¹¹Tan catyí ūn̄i:

—Ra Jesús, ra cuví ndusu yuhu Nyoo, ra ūnu Nazaret tsa canyí Galilea cuví ra —catyí ūn̄i.

Nu tavā ra Jesús tsi nyiv̄i xicó tsitsī vehe ūnu cahnu

(Mr. 11.15-19; Lc. 19.45-48; Jn. 2.13-22)

¹²Yahá̄ can tan quihv̄ī ra Jesús tsitsī vehe ūnu cahnu Nyoo. Tan tavā̄ ra tsi tandih̄ nyiv̄i jatá̄ tan xicó ican̄. Tan janduvá̄ ra mesa nu nasamá̄ ūn̄i xuhun. Tan janduvá̄ ra tyayu nu xicó ūn̄i paloma. ¹³Tan catyí̄ ra tsihin nyiv̄i:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyoho jananduví ndo vehe ihyá, vehe ñasuhu —catyí ra tsihin ñi.

¹⁴ Tan tsa tsito juhva ra cuaa tan ra coxo naha ra tyin nyíi ra Jesús tsitsi vehe ñuhu cahnu, quíhví ra naha tan janduvahá ra Jesús tsi ra naha. ¹⁵ Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsíñi ra naha tyin caná tsaa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaan ra naha tsa tsíñi ra naha tsa caahán tsa nyihi can. ¹⁶ Tan catyí ra naha tsihin ra Jesús:

—¿A tsíñi un tsa caahán tsa nyihi can?

Tan nacahan̄ ra Jesús tan catyí ra:

—Tsíñi yu. Maa tyin ¿a ñaha ca cahví nyoho nu tutu Nyoo nu catyí tsi tyehen? Jutu Mañi yu, tsa nyihi tan lee tsa ndi tyaxín sii xaan tsitá tsi naha tsi jahá un. Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoq̄ ra tsi ra naha, tan quitā ra ñuu can cuahán ra ñuu Betania. Tan ican ndoō ra tsacuua can.

Nu cahan̄ ra Jesús tsi yutun higo tsa ña tsahá tsítî

(Mr. 11.12-14, 20-26)

¹⁸ Tan tsa tuvi cuii ñi inga quív̄i can, vatsí nyico ra Jesús nda ñuu Jerusalén, tan tsaā soco tsi ra. ¹⁹ Tan nyehē ra nyaá iin yutun higo yat�in ñi yuhu ityi can. Tan natuhvā ra nu nyaá tun, maa tyin nduve maa náa nañihí̄ ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ñia cua cuhva ca un tsítî!

Tan juvin ñi cuhva can na ityí tun. ²⁰ Tan tsa nyehē ra tsicá tsihin ra tsa javahá ra tsi tun, iyo xaan cuñí̄ ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityí yutun higo can?

²¹ Tan nacahan̄ ra Jesús tan catyí ra:

—Tsa nditsa catyí yu tsihin ndo, tyin tatuñ tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihyá ñi cuví javahá tucu nyoho, tyin cuví ndihī tucu catyí ndo tsihin yucu ihyá: “Cuatsiyo

ihyá tan cuhun un nda tsitsi ndutyá ñuhu.” Tan cua cuhun tsi. ²² Tan tandihí̄ tsa cua ndacan ndo nu cua ndacan tahvi ndo tsi Nyoo, tatuñ tsinú iñi ndo tyin cua cuhvā ra, cua ñihi ndo —catyí ra Jesús.

Nu tsica tuhun ra cumí tyiñi vehe ñuhu naha ra tsi ra Jesús yóo tavā tyiñi tsi ra tyin cahan̄ ra tsihin nyív̄i

(Mr. 11.27-33; Lc. 20.1-8)

²³ Yaha can tan quíhví̄ ra Jesús tsitsi vehe ñuhu cahnu, tan tsitsi tsa jacuhá̄ ra ican, natuhvá̄ ra jutu tsa cuví ityi nuu naha ra nu nyaá̄ ra, tan ra cuví mandoñī ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tavā tyiñi tsi un tsa javahá un tyehen? —catyí ra naha.

²⁴⁻²⁵ Tan nacahan̄ ra Jesús tan catyí ra:

—Yuhu tucu cuñí̄ yu ndaca tuhun yu tsi nyoho. ¿Yóo jaquitsi tsi ra Juan tyin jacoondutyá ra tsi nyív̄i? ¿A Nyoo jaquitsi tsi ra, o nyív̄i? Tatuñ catyí tuhun ndo tsihin yu, cua catyí tuhun tucu yuhu tsihin ndo yóo tavā tyiñi tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsahā caahán yuhu tahan̄ ra naha, tan catyí̄ ra naha:

—Tatuñ catyí yo tyin Nyoo jaquitsi tsi ra Juan, cua catyí̄ ra tsihin yo: “Tun tacan, ¿nacuenda ña tsinú iñi ndo tsi ra?” ²⁶ Tan tatuñ catyí yo tyin nyív̄i jaquitsi tsi yu, tyin tandihí̄ ñi tsinú iñi ñi tyin ra Juan, cuenda Nyoo cahan̄ ra —catyí̄ ra naha.

²⁷ Tacan tan catyí̄ ra naha tsihin ra Jesús:

—Ña tsító ndi.

Tacan tan ra Jesús catyí̄ ra tsihin ra naha:

—Tan ndi yuhu, tan ña catyí̄ tuhun yu tsihin ndo yóo tavā tyiñi tsi yu.

Nu caahán ra Jesús iin cuhvā cuenda uvi taahan̄ sehe iin rayíi

²⁸ Ra Jesús catyí̄ ra tsihin ra cumí tyiñi vehe ñuhu naha ra:

—¿Nacaa catyí̄ ndo cuenda tsa cua cahan̄ yu ihyá? Iin rayíi, iyó uvi taahan̄ sehe ra. Tan catyí̄ ra tsihin iin sehe ra: “Cyaahan̄ cua jaha tyiñi nu iyó tyiñi jahá yu.” ²⁹ Tan nacahan̄ sehe ra tan catyí̄ ra: “¡Ña cuhun yu!” Maa tyin yahá̄ can tan nasama cuhvā tsicá iñī ra tan tsahan̄ ra tsijahá̄ tyiñī ra.

³⁰ Yaha can tan jutu ra cahan̄ ra tsihin inga

sehe ra. Tan catyí tucu ra tsihin ra na cuhun ra cujaha tysiñu ra. Tan ra ican numi ñi quihiñ ra tysiñu tan catyí ra: "Vaha, tyaa, cuhun maa yu." Maa tyin ña tsahan ra.

³¹ Tsitsi tsa nduvu taahan ra can naha ra, ñandáa ra javahä tsa cahän jutu ra? —catyí ra Jesús.

Tan nacahan ra naha tan catyí ra naha:

—Ra tsa cahän ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavä xuhun cuenda ra ndacá ñaha tan ñi sii ñiñi caca nuu, jihna ca ñi cua quihiñ nu ndacá ñaha Nyoo tan ñavin ca nyoho. ³² Tyin ra Juan, ra jacoondutya tsi nyivi, quitsi ra jacuahä ra tsi ndo nácaa taahán tsi coo cuiti ndo, tan nyoho ña tsinu iñi ndo tsi ra. Maa tyin ra tavä xuhun naha ra tan ñi sii ñiñi caca nuu tsinu iñi ñi tsi ra. Tan nyoho vasu ndi maa nyehe ndo yacan, maa tyin ña nasamä ndo cuhva iyó ndo, tan ña tsinu iñi ndo tsi ra.

Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra

(Mr. 12.1-12; Lc. 20.9-19)

³³ "Tyaa soho ndo inga cuhva ihya: Tsico iin rayii, tan iyó ñuhu ra. Tan tatsi ra yoho yuci vixi tsa nañi uvas, tan tyihä ra cora. Tan javahä ra iin nu cua tava ra ndutya uvas can. Tan javahä tucu ra iin vehe sucun tyin cuvi jaha cuenda ra tandihi.

"Yahä can tan tsaha nuu ra ñuhu can tsi juhva ra cua jaha tysiñu naha ra, tan cuahán ra inga ñuu. ³⁴ Tan tsa tsaa quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tysiñu can naha ra, na cuhva ra naha juhva uvas tsa taahán tsi tsi ra. ³⁵ Maa tyin ra jahá tysiñu can tiñi ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. ³⁶ Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javahä ra naha tsihin ra tsa tsahan jihna naha ra, tacan ñi javahä nyico ra naha tsihin ra ihya naha ra.

³⁷ "Nu ndihi jacuhun ra tsi maa maa sehe ra, tyin cuñi maa ra tyin cua tyaa yahvi ra naha tsi sehe ra. ³⁸ Maa tyin cuhva tsa nyehe ra jahá tysiñu can naha ra tsi sehe ra, natuhun tahan ra naha tan catyí ra naha: "Ra ihya cua ndoo tsihin tandihi tsa iyó

ihya. Na cahñi yo tsi ra tan ndoo maa yo tsihin cora ihya", catyí ra naha. ³⁹ Tacan tan tiñi ra naha tsi ra, tan tavä ra naha tsi ri ityi tsata cora can, tan tsahñi ra naha tsi ra —catyí ra Jesús.

⁴⁰ Tacan tan tsicä tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ñnáa cua javahä ra tsihin ra jahá tysiñu can naha ra?

⁴¹ Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tysiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

⁴² Tacan tan catyí ra Jesús tsihin ra naha:

—¿A ñaha ca cahví nyoho nu tutu Nyoo nu catyí tsi tyehen?

Yuu tsa javitä ihñi ra javahä vehe,
Yacan cuví yuu tsa ñiñi ca.

Jutu yo Nyoo cuví ra tsa javahä tandihi can.
Tan iyo xaan cuñi yo nyehe yo, catyí tsi.

⁴³ "Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyivi tsa javahä cuhva cuñi ra tyin nditsa tsahá ñi tsi ñi cundaca ñaha ra. ⁴⁴ Tan tsa cuenda yuu can, yóo nyivi tsa nduva siquí tsi, cua tahnu cuatyí ñi. Tan tatum yuu can tan canacavala tsi siqui yóo nyivi, cua taxin nyihi ñi —catyí ra Jesús.

⁴⁵ Cuhva tsa tuyí iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahän ra Jesús cuhva ihya, ⁴⁶ cuñi ra naha tiñi ra naha tsi ra, maa tyin yuuuhví ra naha tsi nyivi tyin tsinú iñi ñi tyin ra Jesús caahán ra cuenda Nyoo.

22

Nu cahän ra Jesús iin cuhva cuenda vico tindaha

(Lc. 14.15-24)

¹ Quitsahä caahán ra Jesús tsihin nyivi inga tsaha tsihin cuhva, tan catyí ra:

² —Tsa ndacá ñaha Nyoo tsi nyivi cuví tsi tumaa iin rey tsa javahä iin vico tsa cuenda tsa cua tindaha sehe ra. ³ Tan jacuhun ra tsi musu ra na cucana ra naha tsi nyivi tsa jacoto ra tyin cuhun ñi, maa tyin ñi ican, ña cuñi ñi cuhun ñi. ⁴ Tan jacuhun nyico ra inga ca musu ra, tan catyí ra tsihin ra

naha: "Cahán ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indíqui tan inga quiti xaahan. Tan tsa iyó vaha tandíhi. Yacan na quitsi ñi", catyí ra. ⁵Maa tyin ñi icán ña tyaa yahvi ñi tsa cahán ra. Iin ra tsahán ra nu iyó cora ra, inga ra tsahan ra nu jahá tyiñu ra. ⁶Tan inga ra naha tiin ra naha tsi musu rey can naha ra tan cañi xaan ra naha tsi ra naha nda cuanda tsahñi ra naha tsi ra naha. ⁷Tacan tan ra rey can cuxañan xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha. ⁸Tacan tan catyí ra rey can tsihin musu ra: "Tandíhi tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi. ⁹Cyaahan ndo ityi cahnu tan cana ndo tsi tandíhi nyiví tsa nañihí ndo na quitsi ñi vico tindaha", catyí ra rey can. ¹⁰Musu can cuahán ra naha tandíhi ñi ityi, tan jandu iin ra naha tsi tandíhi nyiví nañihí ra naha: ñi caquñiñi tan ñi vaha iñi. Tacan tan tsitu tsitsi vehe ra tsihin nyivi.

¹¹"Tacan tan quihví ra rey can cua nyehe ra tsi tandíhi nyiví tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí. ¹²Tan catyí ra rey tsihin ra: "Tsaa, ¿nacuenda nyí un ihya tan nduve jahma vico tindaha nditsi un?" Tan ña nacahan maa ra can. ¹³Tacan tan catyí ra rey can tsihin ra tyihí mesa can naha ra: "Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra", catyí ra. ¹⁴Tyin cuaha xaan nyiví nacaná Nyoo, maa tyin juhva ñi ñi nacatsi ra —catyí ra Jesús.

Nu caahán ra Jesús tsa cuenda tsa tyahví nyiví xuhun tsi ra ndacá ñaha nda ñuu Roma

(Mr. 12.13-17; Lc. 20.20-26)

¹⁵Tacan tan cuahán ra fariseo naha ra tan ndoo ro naha tyiñu tyin cua jacobian ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siquí ra. ¹⁶Tan jacuhun ra naha tsi juhva ra yiñi cuenda ra naha, iin caa ñi tsihin juhva ra yiñi cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñí un nyehe un

tsi nyiví cuca tan nyiví ndaahvi. ¹⁷¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

¹⁸Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyoho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu? ¹⁹Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañi denario tsi ra. ²⁰Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

²¹Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

²²Tsa tsíñi ra naha tsa cahán ra Jesús, iyo xaan cuñí ra naha. Tan cuahán ra naha.

Nu cuñí ra cuví saduceo naha ra jandavi ñaha ra naha tsi ra Jesús
(Mr. 12.18-27; Lc. 20.27-40)

²³Juvín ñi quiví can juhva ra cuví saduceo naha ra tsahán ra naha nu nyí ra Jesús. Tan ra cuví saduceo can ña tsinú iñi ra naha tsa cua nandoto ndiyí quiví tsa cua naa ñuu nyiví. Yacan cuenda tsicá tuhun ra naha tsi ra Jesús, tan catyí ra naha:

²⁴—Maestro, ra Moisés catyí ra tyin tatuñ iin ra tindaha tan tsihiñ ra tan ña tsicoo sehe ra, taahán tsi tsa tindaha yañi ra tsihin ñasíhiñ ra. Tacan tan cua coo sehe ra tsihin ña tsa cuenda ra yañi ra tsa tsihiñ. ²⁵Vaha. Tun iin ra tan iyó utsa sehe yiñi ra, tan ra tsa jihna ñi tindahá ra. Tan nduve sehe ra tsicoo tsihin ñasíhiñ ra tan tsihiñ ra. Ndoog ñasíhiñ ra tsi yañi ra tsa tsinu uví. ²⁶Tan juvin ñi tsihiñ ndihí ra can. Tan ndoo ñaha can tsihin ra tsa tsinu uñi, maa tyin juvin ñi tacan tahán ndihí ra. Tan inducu ñi tahán tandíhi tsa utsa ra naha. ²⁷Tan nu ndihí ña tsihiñ ndihí maa ñaha can. ²⁸Tatun nditsa tsa cua nandoto nyiví tsihiñ, ¿ndáa tsa utsa taahan ra can naha ra cua cuvi yiñ ña? Tyin tandíhi maa ra naha tindaha tsihiñ ña —catyí ra naha.

²⁹Tan nacahan̄ ra Jesús tsihin ra naha tan catyí ra:

—Nyoho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nacaa tsa cahnu cuví tunyee iñi tsa iyó tsi Nyoo. ³⁰Tyin quivi cua nandoto nyivi tsihí, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria. ³¹Tyin tuhun Nyoo tsahá cuenda tsi nacaa cuví tuhun tsa cua nandoto nyivi tsa tsihí. ³²O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

³²"Yuhu cuví Nyoo cuenda ra Abraham, tan ra Isaac tan ra Jacob."

Ihya nehé yo tyin nyito añima ra can naha ra, vasu tsanaha tsihí ra naha. Tyin Nyoo ñavin Nyoo cuenda nyivi tsihí cuví ra, tyin Nyoo cuví ra Nyoo cuenda nyivi nyito —catyí ra.

³³Tan tsa tsiñi nyivi tsa caahán ra Jesús, iyo xaan cuñí ñi.

Ley tsa ñiñi ca tsa tsahá Nyoo

(Mr. 12.28-34)

³⁴Tsa tsitó ra fariseo naha ra tyin ra Jesús tyasi ra yuhu ra saduceo naha ra, ndu ijin ra naha. ³⁵Tan iin ra tsa nyií tsihin ra naha cuví ra maestro cuenda ley vehe ñuhu tan cuñí ra nducu cuhva ra tsi ra Jesús. Tan tsica tuhun ra tsi ra, tan catyí ra:

³⁶—Maestro, ¿ndáa ley cuví tsa ñiñi ca?

³⁷Tan catyí ra Jesús tsihin ra:

—“Cuñí tsi Jutu Mañi yo Nyoo tsihin tsa ñii iñi un tan tsihin tsa ñii iñi añima un, tan tsihin tandíhi tsa tsisí tuñi jiñi un.”

³⁸Ley ihyá cuví tsa ñiñi ca, tan tsa jihna ñi taahán tsi javaha yo. ³⁹Tan tsa tsinu uvi, tsa yatayín inducú ñi caahán tsi tumaa caahán tsa jihna ñi tan catyí tsi tyehen: “Cuñí tsi nyivi tahan un tumaa cuñí un tsi maa un.”

⁴⁰Tatun tyáa yahvi ndo nduví taahan ley ihyá, tsa tyáa yahvi ndihí ndo tandíhi ca ley tsa tyaa ra Moisés jahá Nyoo, tan tandíhi tuhun tsa jacuahá ra cuví ndusu yuhu Nyoo tahán tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

⁴¹Tsitsi tsa ndi yucú ra fariseo naha ra nu ndu ijin ra naha, ⁴²ra Jesús tsicá tuhun ra tsi ra naha, tan catyí ra:

—¿Nacaa tsicá iñi nyoho cuenda ra cuví Cristo? ⁴³Yóo tata cuví ra, cuñí maa ndo?

Tan nacahan̄ ra naha tan catyí ra naha:

—Tata ra David cuví ra.

⁴³Tacan tan ra Jesús catyí ra tsihin ra naha:

—Tun tacan, ¿nacuenda jacañan Tatyí li Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

⁴⁴Nyoo cahan̄ tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

⁴⁵¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

⁴⁶Tan yoñi maa cuví nacahan̄ nu cahan̄ ra ndi intuhun maa tuhun. Tan nda quivi can, yoñi ca maa cuñí nducu tuhun tsi ra.

23

Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹Tacan tan ra Jesús catyí ra tsihin tandíhi nyivi, tan tsihin ra tsicá tsihin ra:

²—Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaa ra Moisés. ³Yacan cuenda tyaa yahvi ndo tsa caahán ra naha tan javaha ndo tandíhi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siñ tsa jacuahá ra, tan siñ tsa javahá ra naha. ⁴Janducuahá ca ra naha ley tsa tsahá Nyoo tahán tsanaha. Tan cuñí ra naha tsa javaha nyivi tandíhi can. Maa tyin ña cunyee ñi javahá ñi tandíhi can, tan ndi maa ra naha tan ña cuñí ra naha javaha ra naha can. ⁵Tyin maa ra naha tyáa ra naha caja ñii nu yiñi tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsí ra naha jahma nañi ca tan ñavin ca tsa iyó tsi inga ca nyivi. Javahá ra naha tandíhi can tyin na nyehe nyivi tyin vaha xaan ca ra naha. ⁶Tan nu vaha ca, cuñí ra naha cunyecu ra naha nu iyó vico tan catsi ra naha. Tan nu vaha ca cuñí ra naha cunyecu ra naha tsitsi vehe ñuhu. ⁷Tan nu

tsicá nuu ra na ha cuñí ra na ha tyin cuhva nyiví nacumi tsi ra na ha tyin jahá ñi tsa ñayiví tsi ra na ha. Tan cuñí tucu ra na ha tsa catyi ñi “maestro” tsihin ra na ha.

⁸ Maa tyin nyoho, ña cuhva ndo tsa cahan nyiví “maestro” tsihin ndo. Tyin intuhun ñi maa ra Cristo cuví maestro tsa nyíf tsihin ndo, tan tandíhi ca maa ra na ha yañi ndo cuví tsi ra na ha. ⁹ Tan ña cahan ndo Jutu ndo tsihin ndi intuhun rayíi ñuu ñayiví ihyá, tyin intuhun ñi ra nyaá gloria cuví Jutu ndo. ¹⁰ Tan ña cahan ndo tyin ra cuví ityí nuu cuví ndo, tyin intuhun ñi maa ra Cristo cuví nuu tsihin ndo. ¹¹ Ra tsa jahá tyiñu tyiñu tandíhi ca ra na ha, ra ican cuví ra cahnu ca nu yucú ndo. ¹² Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducanhru ra jaha Nyoo.

¹³ ¹³ ’Ndahvi nyoho ra cuví maestro cuenda ley vehe ñuhu tan nyoho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuvi quíhví nyiví. Tan ndi maa ndo ña quíhví ndo, tan ndi ña tsahá ndo tsa quíhví nyiví tsa cuñí quíhví.

¹⁴ ¹⁴ ’Ndahvi nyoho ra cuví maestro cuenda ley tan nyoho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyiví tyin jahá ndo tyin vaha xaan ndo. Maa tyin nduve náa catyí tyin quíhín nyaa ndo vehe ñi ndaahvi tsa tsihí yií tyin ña cuví tyahvi ñi xuhun tsa tsicán ndo tsi ñi. Yácan cuenda cahnu ca tundoho cua nyehe ndo jaha Nyoo.

¹⁵ ¹⁵ ’Ndahvi nyoho ra maestro cuenda ley vehe ñuhu tan nyoho ra fariseo! ¹⁶ Jahá ndo tyin vaha xaan ndo, tan ña nditsa! Tyin nanducú ndo niñ cahnu nu ñuhu ñayiví tyin cuñí ndo nañihí ndo vasu intuhun nyiví cunyicun tsi ndo. Tatun tsa quíhví ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

¹⁶ ¹⁶ ’Ndahvi nyoho ra ndaahvi! Tyin cuñí ndo jaquihin ityi ndo tsi nyiví, jmaa tyin cuaa ndo! Caahán ndo tyin yóo nyiví cua cahan “Naha Nyoo” tsa cuenda vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun

cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. ¹⁷ ¹⁷ ¡Soho xaan ndo tan cuaa ndo! ¹⁸ ¿Ndáa tsa cahnu ca cuví? ¹⁹ A xuhun cuaan can, a vehe ñuhu tsa jandu íi tsi xuhun cuaan can? ²⁰ Tan juvin ñi catyí tucu ndo tyin yóo nyiví cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo. ²¹ ¡Soho xaan ndo tan cuaa ndo! ²² ¿Ndáa tsa cahnu ca cuví? ²³ ¿A tsa jamañí ndo nu altar can, o maa altar tsa jandu íi tsa jamañí ndo? ²⁴ Tyin nyiví caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndíhi ñi tsa cuenda tandíhi tsa yosó nu altar can. ²⁵ Tan nyiví caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican. ²⁶ Tan tacan tucu nyiví tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

²³ ²³ ’Ndahvi nyoho ra cuví maestro cuenda ley vehe ñuhu tan nyoho ra cuví fariseo! Jahá ndo tyin vaha xaan ndo tyin cahví ndo ndaha menta tan tsiti anis tsihin tsiti comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyáyahvi ndo ley nahnu ca tsa taahán tsi javaha yo: tsa javahá yo tsa vaha tsihin tandíhi nyiví, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandíhi can, tan ña cua jandíhi ndo tsa culva ndo diezmo can. ²⁴ Nyoho ra cuaa, cuñí ndo jaquihin ityi ndo tsi nyivi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyihí ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

²⁵ ²⁵ ’Ndahvi nyoho ra cuví maestro cuenda ley vehe ñuhu tan nyoho ra cuví fariseo! ²⁶ Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can,

nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo. ²⁶ ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndíhi ityi tsata.

²⁷ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyí, tyin ityi tsata tsi sií xaan caá, maa tyin ityi tsitsi tsitu yíqui ndiyi, tan tandíhi nuu tsa caquiñi. ²⁸ Tacan cuví nyooho, tyin cuñi nyiví tyin vaha xaan iñi ndo, maa tyin añima ndo ican quitá tsa jandaví ñaha ndo tan tandíhi tsa caquiñi ndo.

²⁹ ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutuyaquí ndo ñaña ra cuví ndusu yuhu Nyoo, tan nacahyí ndo ñaña nyiví vaha tsicoq tahan tsanaha. ³⁰ Tacan tan catyí ndo: “Tun tsatinyt tsicoq yo quívi tsicoq tsii tsaaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo. ³¹ ¡Tsihin yacan ñi tan nacotó ndo tyin cuví ndo tata nyiví tsahñi tsi ra cuví ndusu yuhu Nyoo! ³² ¡Yacan vityin nyehe maa ndo na jaha ndo, jayahá ndíhi ndo tsa jayahá tsii tsaaahnu ndo, tun cuñi ndo!

³³ ¡Nyooho nyiví caquiñi cuví ndo, tan nyiví cuví tata cool! ¡Nacaa cua cacu ndo tan ña cua cuhun ndo anyaya? Na cua cuvi. ³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. ³⁵ Yacan cuenda, tsata nyooho cua cunyaa cuatyí tsa cuenda tandíhi ra vaha tsa tsahñi tsii tsaaahnu ndo nda cuanda tsihí ra Abel tan nda cuanda quívi tsihí ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañí yo tsi Nyoo. ³⁶ Tsa nditsa catyí yu tsihin ndo, tyin tandíhi cuatyí can

cua coso siquí nyooho, nyiví tsa iyó vityin —catyí ra Jesús tsihin ra naha.

Nu nducuihyá cuñi ra Jesús nyehé ra tsi nyiví ñuu Jerusalén

(Lc. 13.34-35)

³⁷ ¡Ñuu Jerusalén! ¡Ndahvi nyooho nyiví ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandíhi ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndiví sihihsa jahá cuenda tsi sehe tì, tan naquihfín vaha tì sehe tì tsitsi nditsin tì, maa tyin ña cuñi ndo. ³⁸ Nyehé ndo vityin, tyin tsa nacoq ihñi Nyoo tsi ndo. ³⁹ Tan catyí yu tsihin ndo, tyin ña cua nyehe ca ndo tsi yu nda cuanda quita quívi tsa cua catyí ndo tyin cahnu xaan cuví ra vatsí tsihin sivi Nyoo Jutu yo —catyí ra Jesús.

24

Nu caahán ra Jesús tyin cua tani vehe ñuhu cahnu

(Mr. 13.1-2; Lc. 21.5-6)

¹ Quita ra Jesús tsitsi vehe ñuhu cahnu can, tan tsa cuñi cuhun ra, tan natuhvára tsicá tsihin ra nu nyaá ra, tan quitsahá caahán ra naha cuhva caá vehe ñuhu can tsihin ra. ² Maa tyin nacahán ra Jesús tan catyí ra:

—¿A nyehé ndo tandíhi tsa iyó ihyá? Tsa nditsa catyí yu tsihin ndo, tyin ihyá ndi intuhun ca yuu tan ña cua coso tsata inga tsi. Tandíhi maa can tan cua tani —catyí ra.

Nu caahán ra Jesús náa cua cuvi tsa ndi cumañi ca naa ñuhu ñayivi

(Mr. 13.3-23; Lc. 21.7-24; 17.22-24)

³ Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahán ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñi ndi tsa catyí tuhun un tsihin ndi, ama cua cuvi tandíhi tsa cahán un. ⁴ ¡Nacaa tan coto ndi tatuń tsa cuyatayin tsa cua quitsi un inga tsaha tan tsa cua naa ñuhu ñayivi?

⁴ Tacan tan nacahán ra Jesús:

—Jaha vaha ndo cuenda coto jandavi ñaha nyiví tsi ndo. ⁵ Tyin cuaha xaan ra cua quitsi, tan cua cutyíñu ra naha sivi yu, tan cua catyí ra naha: “Yuhu cuví ra Cristo,

ra tsa jaquitsi Nyoo." Tan cuaha nyivi cua jandavi ñaha ra naha. ⁶Tan cua ñihí tuhun ndo tyin iyó cuatyí tan cañí tahan nyivi ityi can tan ityi ihya. Maa tyin ña nayuhvi ndo, tyin tacan taahán maa tsi cua cuvi tsa ndi cumañí ca naa ñuhu ñayivi. ⁷Tyin nyivi iin ñuu cua cañí tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihí. ⁸Tandihi yacan cua cuvi nu ndi cua quitsaha nyehe nyivi tundoho.

⁹Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñí ra naha tsi ndo. Tan tandihi nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu. ¹⁰Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. ¹¹Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha. ¹²Tan cuaha xaan tsa caquiñí cua coo. Yacan cuenda cua jandihi ñi tsa cuñí tahan ñi tsi ñi. ¹³Maa tyin nyivi tsa tsinú iñi tsi yu nda cuanda nu ndihi, tan ña cua ndu ubi iñi ñi, cua cacu ñi. ¹⁴Tan tanñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihi ñuu tuhun vaha ihya, tacan tan cua naa ñayivi.

¹⁵'Ra Daniel, ra cuvi ndusu yuhu Nyoo, tyaa ra nu tutu Nyoo tyin coo tsa cua janducaquiñí, tsa cua jativi. Quivi tsa cua nyehe ndo can tsitsi vehe ñuhu Nu li, (nyooho tsa cahví, na cutuñi iñi ndo). ¹⁶Tyin quivi can, nyivi tsa iyó Judea taahán tsi tsa quita ñi icán tan cuhun ñi ityi yucu. ¹⁷Tan nyivi yucú jiñi vehe, cua nuu ñi, maa tyin ña cua quihví ñi tsitsi vehe ñi tan tava ñi tsa iyó tsitsi vehe ñi. ¹⁸Tan nyivi yucú tsitsi cuhu ña cua cumuhu jlhna ñi cunaquihín ñi jahma ñi. ¹⁹¡Ndahvi ñiñaha tsa ñuhú sehe quivi can! O tatum iyó sehe ñi tsa tyaxín, ¡ndahvi ñi can! ²⁰Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. ²¹Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. ²²Tyin tatum ña cua janducuiti

Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñí ra tsi nyivi nacatsi maa ra.

²³Tatum yóo cua cahan tsihin ndo: "Jihna ndo, ihya nyaá ra Cristo" o "Nyéhe ndo, ndacan nyaá ra Cristo", ña tsinu iñi ndo.

²⁴Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatayin cuvi jaha ra naha. ²⁵Vaha tyin tsa tsitó ndo vityin ihya, jaha ndo cuenda tsi ndo quivi can. ²⁶Yacan cuenda tatum catyí nyivi tsihin ndo: "Nyéhe ndo, va ra Cristo nyí nu tsiqui can", ña cahun ndo. O tatum catyí ñi tsihin ndo: "Nyéhe ndo, nyí ra tsitsi cuarto ihya", ña tsinu iñi ndo. ²⁷Tyin tumaa tsa cañí tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayii tsa quee nda gloria. ²⁸Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

Nacaa cua quitsi Rayii tsa quee nda gloria inga tsaha

(Mr. 13.24-37; Lc. 21.25-33; 17.26-30, 34-36)

²⁹Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda. ³⁰Tacan tan cua quituvi seña ityi andivi tyin vatsí yuhu Rayii tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsaa xaan ñi tsa cua nyehe ñi tsi yu. ³¹Tan cuaha ángel cuenda yu cua jaquitsi yu tyin ñihí cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita ñi tanñi cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

³²Cutuñi iñi ndo iin cuhva yutun tsa nañí higo: Tatum tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun. ³³Tan juvin ñi tacan, tatum tsa cuví tandihi yacan nyehé ndo, cua coto ndo tyin tsa cuyatinyi quitsi yu; tan tsa nyanaá yu yuvehe cuví tsi. ³⁴Tsa nditsa

catyá yu tsihin ndo tyin tandíhi yacan cua cuvi jihna, tsa ndi cumañi ca cúu nyíví iyó nu ñuhu ñayíví. ³⁵ Tan coo quíví cua cunaa andíví tan tsihin ñuhu ñayíví, maa tyin tuhun caahán yuhu, ña cua cundihi tsi tyin cua cundaa tandíhi tsí.

³⁶ 'Maa tyin quíví tan hora tsa cua cuvi yacan, yoñi tsító, ndi ángel iyó gloria tan ña tsító ra naha. Intuhun ñi maa Nyoo Jutu yo tsító.

³⁷ 'Tumaa cuví quíví tsa tsicoo ra Noé, tacan cua cuvi quíví tsa cua quítsi nyico yuhu Rayíi tsa quee nda gloria. ³⁸ Quíví tsa ndi cumañi ca cuun savi xaan, nyíví can, tsatsí ñi, tsilí ñi, tindahá ñi, tan tsahá ñi tsi sehe siíhi ñi tindahá nda cuanda quíví quihvíi ra Noé tsitsi yutun ndoo. ³⁹ Tan sana iñi ñi tan tsaa savi tan tañi tandíhi ñi. Tan tacan sana iñi ñi tan cua tahan tsi quíví quitsi nyico yuhu Rayíi tsa quee nda gloria. ⁴⁰ Tan tatum yucú uvi taahan rayíi tsitsi cuhu quíví can, intuhun ñi ra cua quihin yu, tan cua nacoo yu tsi inga ra. ⁴¹ Tan quíví can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña. ⁴² Cuatu vaha ndo tyin ña tsító ndo náa hora cua quitsi ra ndacá ñaha tsi ndo. ⁴³ Tan coto ndo tuhun ihyá tyin tatum iin tsitoho vehe tan tsító ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can. ⁴⁴ Yacan cuenda nyoocho, cuatu vaha ndo. Tyin sana iñi ndo, tan cua quitsi nyico yuhu Rayíi tsa quee nda gloria.

*Musu vaha tan musu ña vaha
(Lc. 12,41-48)*

⁴⁵ 'Musu tsa tyá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandíhi ca musu. ⁴⁶ Tan siíi xaan cuñi ra cuví musu vaha can, tatum cuhva tsa jahá tyiñu ra tan tsaa tsitoho ra. Tyin tyá yahvi ra tandíhi tsa taahán tsi ica ra. ⁴⁷ Tan tsa nditsa catyá yu tsihin ndo, tyin tsitoho ra cua nacuhva ra tandíhi cuii tsa cumí ra, cua quihí ndaha ra, tyin vaha tyá yahvi ra tsihin tyiñu jahá ra. ⁴⁸ Maa tyin iin musu ña vaha tsicá iñi ra tyin cua cucuee tsitoho ra. ⁴⁹ Tacan tan quitsaha cañí ra tsi inga musu, tan tsatsí ra tan tsihí ra nyixi tsihin ra tsíñi naha ra. ⁵⁰ Tacan tan sana iñi ra tan cua tsaa tsitoho ra quíví tsa ña ndatú ra tsi ra, tan hora tsa ña tsító ra. ⁵¹ Tacan tan tsitoho ra ñihi xaan cua tatsi tuñi ra

tsi ra tumaa tuhvá maa ra icá tsihin nyíví tsa jahá tyin vaha xaan ñi tan ña icá ñi tsá vaha. Tacan tan cua vacu ra cuví musu ña vaha can tan cahyu ña cua cuvi nuhu ra tsa nyehé ra tundoho.

25

Nu cahán ra Jesús iin cuhva cuenda utsi taahan ñaha yoco

¹ 'Tsa ndacá ñaha Nyoo tsi nyíví cuví tsi tumaa utsi taahan ñaha yoco tsa quihín lámpara tsa yihií acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi. ³ Ñi tsa soho ñuhú iñi can, nyisó ñi lámpara ñi maa tyin ña quihín ñi juhva ca acetye tsa natyihí ñi tsitsi lámpara ñi tatum ndihí tsi. ⁴ Tan ñi tsa catsi tsicá iñi can, nyisó siñi ñi inga yutyi acetye tsa cua natyihí ñi tsitsi lámpara can tatum ndihí acetye tsa yihií tsitsi lámpara can. ⁵ Tan ra tsa cua tindaha can cucueé xaan ra, tacan tan tiñi ñumaahna tsi tandíhi ñi, tan quixi ñi. ⁶ Tacan tan maa ñuu tsíñi ñi iin ndusu tsa catyí tyehen: "¡Tsa vatsí ra tsa cua tindaha! ¡Quita ndo, jatahan ndo tsi ral!" ⁷ Tandíhi ñi can nduvitá ñi tan quitsaha janduvahá ñi lámpara ñi. ⁸ Tacan tan quitsaha caahán tsa uhun ñi soho ñuhú iñi can tsihin inga uhun ñi can tan catyí ñi: "Cuhva ndo juhva acetye ndahá ndo tsi ndi, tyin cuñi ndahva lámpara ndi", catyí ñi. ⁹ Maa tyin ñi yoco tsa catsi tsicá iñi can nacahán ñi tyehen: "Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyoocho. Vaha ca cuhun maa ndo cujata ndo nu cuyahví tsi." ¹⁰ Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsaa ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundásí yuvehe can. ¹¹ Yaha can tan tsaa nyico ñi soho ñuhú iñi can, tan catyí ñi: "¡Yooho tata! ¡Nuña yuvehe na quihví ndi!", catyí ñi. ¹² Maa tyin maa ra nacahán ra, tan catyí ra: "Tsa nditsa catyí yu tsihin ndo tyin ña nacotó yu tsi ndo."

¹³ Tacan tan quitsaha caahán ra Jesús:

—Cuatu vaha ndo, tyin ña tsító ndo ndáda quíví tan náa hora cua quitsi nyico yuhu Rayíi tsa quee nda gloria.

*Nu caahán ra Jesús tsihin yo na jaha tyiñu
yo tsihin tsa tsahá Nyoo tsí yo*

(Lc. 19.11-27)

¹⁴ Tsa ndacá ñaha Nyoo tsi nyiví cuví tsi tumaa iin rayíi tsa nyaá cua quita cuhun inga ñuu nu cañí. Tan cana ra tsi musu ra, tan tsaha cuenda ra xuhun ra tsi ra naha tyin jaha cuenda ra naha.

¹⁵ In ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsító ra jaha tyiñu ra naha tan cua nandaa siquí xuhun can. Tacan tan cuahán ra. ¹⁶ Musu tsa quihiñ uhun mil xuhun can, ñihi jahá tyiñu ra tsihin xuhun can, tan jaha canaa ra inga uhun mil ca siquí tsi. ¹⁷ Tan juvin ñí tacan tucu ra tsa quihiñ uvi mil can, jahá canaa ra uvi mil ca tsihin xuhun can. ¹⁸ Maa tyin ra tsa quihiñ intuhun ñí mil can, tsahan̄ ra tan tsatyā ra iin yavi tsitsi ñuhu tan tyiñi xeehe ra xuhun tsitoho ra.

¹⁹ Cuaha quivi yaha tan tsaa nyico tsitoho musu can. Tan quitsahá natavá cuenda ra tsihin intuhun intuhun ra naha. ²⁰ Jihna ca ra tsa quihiñ uhun mil xuhun can tsaa, tan nacuhva cuenda ra uhun mil ca siquí can, tan catyí ra: “Taa, uhun mil tsahá un tsi yu, juhun inga uhun mil ihyá tsa jahá canaa yu siquí tsi.” ²¹ Tan tsitoho ra catyí ra tsihin ra: “Vaha. In musu vaha xaan cuví un. Tan javaha un tandíhi tsa cahán yu tsihin un. Luxu ñí xuhun tsahá yu tsi un tan vaha xaan tsatyiñ un itsi. Vityin cuaha ca cua cuhva cuenda yu tsi un. Quihví nu vaha ihyá, tan sii cuñí un tsihin yu”, catyí ra. ²⁴ Tan cuhva tsa tsaa musu tsa quihiñ intuhun ñí mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñí un naquihín un xuhun nu ña jahá tyiñu un, tan cuñí un naquihín un cosecha nu ña tatsi un. ²⁵ Yacan cuenda nayuhví yu tan tsahan̄ yu tan tyiñi xeehe yu xuhun un tsitsi ñuhu. Juhun xuhun ihyá tsa tsahá un tsi yu”, catyí

ra. ²⁶ Tacan tan nacahan̄ tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsító un tyin naquihín yu nu ña jahá tyiñu yu, tan quihiñ yu cosecha nu ña tatsi yu, ²⁷ ¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuví naquihín yu xuhun can tsihin xuhun siquí tsa jaha canaa tsi”, catyí ra. ²⁸ Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil. ²⁹ Tyin nyiví jahá tyiñu vaha tsihin tsa iyó tsi ñí, cua cuhva ca yu tsi ñí, tan cua coo cuaha tsi ñí, nda cuanda ndoo ca. Maa tyin nyiví tsa ña cuñí jaha tyiñu tsihin tsa tsahá yu, nda cuanda tsa luxu tsa cumí ñí, cua quihiñ nyaa ndihí yu. ³⁰ Tan musu tsa ña tsíñi ñuhu tsi yu ihyá, tava ndo tsi ra nacuhun ra nu naa ityí tsata, tan ndacan cua vacu tsaa ra, tan cahyu ña cua cuvi ñuhu ra tsihin tsa nyehé ra tundoho.”

Nu cahán ra Jesús tyin cua cutuñi tandíhi nyiví

³¹ Quihví cua quitsi nyico yuhu Rayíi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu sii caá tan cua cundaca ñaha yu. ³² Tandíhi cuui nyiví iyó naníi cahnu nu ñuhu ñayiví cua nataca ñí nu yu. Tan cua natava siñi yu tsi intuhun intuhun ñí, tumaa ra jahá cuenda mbee tavá siñi ra tsi mbee ticatyi tan tavá siñi tucu ra tsi mbee chivo. ³³ Tan cua tyaa yu tsi mbee ticatyi can tsiyó cuaha yu, tan inga mbee can cua tyaa yu tsiyó satyin yu. ³⁴ Tacan tan yuhu tsa cuví yu Rey cua catyí yu tsihin nyiví nyecú tsiyó cuaha yu: “Ñaha nyoho nyivi tsa nasoco Jutu yu. Na quihiñ cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihyá quihví javahá ra ñuhu ñayiví. ³⁵ Tyin quivi tsisoco yu, nyoho tsahá ndo tsa tsatsi yu. Quivi na ityí ñí yu, tsahá ndo ndutya tsihí yu. Tan quivi tsica nuu yu cuví yu ra inga ñuu, tsahá ndo nu quixí yu. ³⁶ Quivi cumañi jahma yu, tsahá ndo jahma tsinditsi yu. Quivi cuhví yu, tsinyehé ndo nu canyí yu. Tan quivi tsinyijí yu vehe caa, tsinyehé ndo nu nyíví yu”. Tacan cua cahán yu tsihin ñí. ³⁷ Tan ñí tsa vaha iñí can cua ndaca tuhun ñí tsi yu, tan catyí ñí: “Jutu Mañí yu, ¿ama nyehé

ndi tsisoc̄ un, tan tsah̄ ndi tsa tsatsī un? ¿Ama nyeh̄ ndi na itȳ iñi un tan tsah̄ ndi tsa tsih̄ un? ³⁸ ¿Ama nyeh̄ ndi tsi un tsicā nuu un cuv̄ un ra inga ñuu tan tsah̄ ndi vehe nu quixī un? ¿Ama cumañi jahma un, tan tsah̄ ndi jahma tsinditsī un? ³⁹ ¿Ama nyeh̄ ndi cuhv̄ un, o tsinyij un vehe caa, tan tsahan̄ ndi tsinyeh̄ ndi tsi un?" cua catyī iñi. ⁴⁰ Tan yuhu tsa cuv̄ Rey cua catyī yu tsihin iñi: "Tsa nditsa catyī yu tsihin ndo, tyin tandih̄ tumañi iñi tsa javah̄ ndo tsī ra ndaahvi, ra yañi yu, tsī yuhu javah̄ ndo tumañi iñi", cua catyī yu tsihin iñi.

⁴¹ "Tacan tan yuhu tsa cuv̄ Rey cua cahan̄ yu tsihin nyiv̄ yu yucú tsiyo satyin yu tyehen: "Catsiyo ndo nuu yu, nyooho, nyiv̄ taahán tsi cuhun anyaya. Cuaahan̄ ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatȳ ña vaha cuenda nu. ⁴² Tyin tsisoc̄ yu tan nyooho ña tsah̄ ndo tsa catsi yu. Na itȳ iñi yu tan ña tsah̄ ndo ndutya coho yu. ⁴³ Tsicā nuu yu cuv̄ yu iñi ra inga ñuu, tan ña tsah̄ ndo nu cusu yu. Cumañi jahma yu tan ña tsah̄ ndo jahma cunditsi yu. Nacuhv̄ yu tan tsinyij yu vehe caa, maa tyin ña tsahan̄ ndo tsinyeh̄ ndo tsi yu nu tsinyij yu", cua catyī yu tsihin iñi. ⁴⁴ Tacan tan cua catyī ñi tsihin yu: "Jutu Mañi yu, ¿ama nyeh̄ ndi tsisoc̄ un, o na itȳ iñi un, o tsic̄ nuu un cuv̄ un ra inga ñuu, o nduve jahma un, o nacuhv̄ un, o tsinyij un vehe caa, tan ña jatyinyee ndi tsi un?" cua catyī iñi. ⁴⁵ Tan yuhu tsa cuv̄ yu Rey cua catyī yu tsihin iñi: "Tsa nditsa caahán yu tsihin ndo tyin tandih̄ maa tsa ña javah̄ ndo tsihin nyiv̄ ndaahvi ihyá, ña javah̄ ndih̄ ndo tsihin yu, cuv̄ can", cua catyī yu tsihin iñi. ⁴⁶ Tacan tan ñi can cua cuhun ñi nu cayú ñuhu tsa ña cua ndahva maa. Tan nyiv̄ vaha can cua cuhun ñi coo ñi ñayiv̄ nyito tsa ña cua naa maa.

26

*Nu nducú ra mandoñi naha ra cuhva nácaa tan tiñiñ ra naha tsi ra Jesús
(Mr. 14.1-2; Lc. 22.1-2; Jn. 11.45-53)*

¹ Cuhva tsa ndih̄ cahán ra Jesús tandih̄ tuhun can, tan quitsah̄ catyī ra tsihin ra tsic̄ tsihin ra:

² —Nyooho tsitó ndo tyin ndi cumañi uvi ca quiví tan tahan̄ tsi vico pascua. Tan yuhu, Rayii tsa quee nda gloria, cua cuhva

cuenda nyiv̄ tsi yu na tyaa ra cumi tysiñu tsi yu nu cruu —catyí ra.

³ Quiví can jutu tsa cuv̄ itȳ nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iñi ra naha nuquehe vehe tysiñu ra Caifás, ra jutu tsahnu tsa cuv̄ itȳ nuu. ⁴ Tan jandaq̄ ra naha tysiñu nácaa cua jandavi ñaha ra naha tsi ra Jesús tan tiñiñ ra naha tsi ra tan caññi ra naha tsi ra. ⁵ Tan catyí ra naha:

—Ña cua cahñi yo tsi ra quiví maa vico, coto nduvaa xaan nyiv̄ —catyí ra naha.

*Nu tyosó iñi ñaha ndutya tami jiñi ra Jesús
(Mr. 14.3-9; Jn. 12.1-8)*

⁶ Ra Jesús nyif̄ ra ñuu Betania, vehe ra Simón, ra tsa yihi cuehe tyaahyu. ⁷ Tan natuhv̄a iñi ñaha nu nyaá ra Jesús, ndahá ña iñi yutyi yuu vaha tsitú can yihi ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra. ⁸ Tsa nyehe ra tsic̄ tsihin ra, nduxañan ra naha tan catyí ra naha:

—¿Nacuenda jativ̄ ña ndutya tami can?
⁹ Vaha ca tun tsatayin xic̄o ña can, tan ñihi cuaha ña xuhun tsihin can. Tan cuvi jatyinyee ña tsi nyiv̄ ndaahvi tsihin xuhun can —catyí ra naha.

¹⁰ Tan tsa tsiníñ ra Jesús tsa caahán ra naha, tacan tan catyí ra tsihin ra naha:

—¿Nacuenda cuñiñ ndo jandu uvi iñi ndo tsi ñaha ihyá? Tan tsa javah̄ ña tsihin yu, tsa vaha cuv̄ tsi. ¹¹ Tyin nyiv̄ ndaahvi tandih̄ ñi quiví cua coo ñi tsihin ndo, maa tyin yuhu, ña naha ca cua cunyii yu tsihin ndo. ¹² Tyoso ña ndutya tami siqui cuñu ñuhu yu, tyin janduvah̄ ña itsi tyin cua cuhun tsi tsitsi ñuhu. ¹³ Tsa nditsa catyī yu tsihin ndo, tyin tandih̄ ñi nu cua cahan nyiv̄ tuhun Nyoo taníñ cahnu ñuhu ñayivi, cua nacatyi tuhun tucu ñi tsa javah̄ ñaha ihyá, na nducuhun iñi nyiv̄ tsi ña —catyí ra Jesús.

*Nu xic̄o ra Judas Iscariote tsi ra Jesús
(Mr. 14.10-11; Lc. 22.3-6)*

¹⁴ Tacan tan iñiñ ra tsic̄ tsihin ra Jesús, ra tsa nañi Judas Iscariote, tsahan̄ ra tsicahñan̄ ra tsihin ra jutu tsa cuv̄ itȳ nuu naha ra.

¹⁵ Tan catyí ra tsihin ra naha:

—¿Nacaa cua tyahvi ndo tsi yu tatuñ cuhva cuenda yu tsi ra Jesús tsi ndo?

Tacan tan ra jutu can naha ra tsahā ra naha oco utsi xuhun cuitsin tsi ra. ¹⁶Tan nda quivī can tan quitsah̄ā nducú ra Judas cuhva cua nacuhva cuenda ra tsi ra Jesús tsi ra jutu can naha ra.

*Nu cuxiñi ra Jesús tsihin ra tsicá tsihin ra
(Mr. 14.12-25; Lc. 22.7-23; Jn. 13.21-30; 1 Co.
11.23-26)*

¹⁷Quivī jihna ñī tsa quitsah̄ vico nu tsatsí nyivī paan tsa nduve yutsan iya yihī, ra tsicá tsihin ra Jesús natuhvā ra naha nu nyaá̄ ra tan quitsah̄ tsicá tuhun ra naha tsi ra tan catyí ra naha:

—¿Numaa cuñī un tsa cujanduvaha ndi tsa cuxiñī un cuenda vico pascua ihyá?

¹⁸Tan catyí ra Jesús tsihin ra naha:

—Cuyaahan ndo tsitsī ñuu nda vehe rayiī ihyá. Tan catyí ndo tsihin ra: “Ra Maestro catyí ra tyin tsa yatyin cua cíū ra, tan vehe maa un cua jacobhnū ndi vico pascua”, catyí ndo tsihin ra —catyí ra Jesús.

¹⁹Tacan tan javah̄ā ra naha cuhva cahan̄ā ra Jesús tsihin ra naha. Tan janduvah̄ā ra naha tsa cuxiñī ra naha vico pascua can.

²⁰Tsa cunaaha tan tsicunyaǟ ra Jesús nu mesa tsihin tandih̄i utsi uvī ra tsicá tsihin ra. ²¹Tan tsitsī tsa tsatsí̄ ra naha, catyí̄ ra Jesús tsihin ra naha:

—Tsa nditsa catyí̄ yu tsihin ndo tyin iin nyoooho cua xico ndo tsi yu tsi ra xaan̄ iñī tsi yu.

²²Tan nducuihyā xaan̄ cuñī ra naha, tan quitsah̄ tsicá tuhun tan iin tan iin ra naha tsi ra tan catyí̄ ra naha:

—Jutu Mañī yu, ¿a ñavin yuhu cuví̄ can?

²³Tan nacahan̄ ra Jesús tan catyí̄ ra:

—Ra tsa tsatsí̄ iin ñī coho tsihin yu, ra ican cua xico tsi yu. ²⁴Yuhu, Rayiī tsa queē nda gloria, cua tahan yu tumaa tsa caahán nu tutu Nyoo. Maa tyin ndahvī ra ndaahvī tsa cua xico tsi yu. Vaha yihī ca tun tsatinyñī ña cacū ra —catyí̄ ra Jesús.

²⁵Tacan tan nacahan̄ ra Judas, ra tsa xico tsi ra, tan catyí̄ ra:

—Maestro, ¿a yuhu cuví̄ can?

Tan nacahan̄ ra Jesús, tan catyí̄ ra:

—Juvin un.

²⁶Tsitsī tsa tsatsí̄ ra naha, ra Jesús quihin̄ ra paan tan nacuhv̄ā ra tyahvī nyoō tsi Nyoo, tan tsahñū sava ra, tan tsahā̄ ra tsi ra tsicá tsihin ra, tan catyí̄ ra tsihin ra naha:

—Catsī ndo. Paan ihyá cuví̄ tumaa cuñū ñuhu yu.

²⁷Yaha can tan quihin̄ tucu ra vasu vinu, tan nacuhv̄ā ra tyahvī nyoō tsi Nyoo, tan jayah̄ā ra tsi tandih̄ī ra naha tan catyí̄ ra:

—Coho tandih̄ī ndo vinu ihyá. ²⁸Tyin cuví̄ tsi tumaa niñī yu. Tan tsihin niñī yu cua cundaay tyiñū tsa ndo Nyoō tsihin ndo, tyin cua catī niñī yu tsa cuenda tsa vaha tsi nyivī cuaha, tyin tsihin niñī yu cua coo tucahnū iñī cuatyí̄ ñī. ²⁹Tan catyí̄ yu tsihin ndo, tyin ña cua coho ca yu tahán vinu tsa cuvī ndutyra uvas ihyá, nda cuanda tsa coho yu vinu tsaa tsihin ndo nda nu ndacá ñaha Jutu yu gloria —catyí̄ ra.

Nu cahñan̄ ra Jesús tyin cua cahan̄ ra Pedro tyin ña nacotó̄ ra tsi ra

(Mr. 14.26-31; Lc. 22.31-34; Jn. 13.36-38)

³⁰Tsa yaha tsa tsitā ra naha iin yaa Nyoō, tan cuahán̄ ra naha yucu Olivo. ³¹Tacan tan quitsah̄ caahán̄ ra Jesús tsihin ra naha:

—Tandih̄ī nyoooho tan cua nacoo iñī ndo tsi yu vityin tsacuua ihyá. Tyin nu tutu Nyoō catyí̄ tsi tyehen: “Cua cahñī yu tsi ra jahá cuenda mbee ticatyí̄ jana yu, tan mbee can cua natsatsa tì̄ naha tì̄”, catyí̄ tsi. ³²Maa tyin tsa yaha nandoto yu, jihna ca yu cua cuhun Galilea, tsa ndi cumañī ca cuhun nyoooho.

³³Tacan tan nacahan̄ ra Pedro tan catyí̄ ra:

—Vasu ndi maa tandih̄ī ra tan ndu uvī iñī ra naha tsa nyicún̄ ra naha tsi un, maa tyin yuhu ña cua ndu uvī iñī yu.

³⁴Tacan tan catyí̄ ra Jesús tsihin ra:

—Tsa nditsa catyí̄ yu tsihin un tyin juvin̄ ñī maa tsacuua vityin, tsa ndi cumañī ca vacu tsitooho, uñī tsaha cua cahan̄ un tyin ña nacotó̄ un tsi yu —catyí̄ ra Jesús.

³⁵Tan ra Pedro catyí̄ ra:

—Vasu ndi maa cíū yu tsihin un, maa tyin ña cua catyí̄ yu tyin ña nacotó̄ yu tsi un —catyí̄ ra.

Tan juvin̄ ñī tacan catyí̄ tandih̄ī ca ra tsicá tsihin ra.

Nu tsicán tahvī ra Jesús tsi Nyoō nda Getsemaní̄

(Mr. 14.32-42; Lc. 22.39-46)

³⁶Tacan tan tsaā̄ ra Jesús tsihin ra tsicá tsihin ra iin nu iyó̄ cuaha yutun nu nañī Getsemaní̄, tan catyí̄ ra tsihin ra naha:

—Cunyecu ndo ihyá tsitsī tsa cuahán̄ yu ndacan cua ndacan tahvī yu.

³⁷Tan quihin̄ ra tsī ra Pedro tan nduvī sehē ra Zebedeo cuahán̄ tsihin ra. Tan

quitsi tucuiihya iñi cahnu tsi ra, tan tsa tuñu cuñí ra.³⁸ Tacañ tan catyí ra tsihin ra naha:

—Cahnu xaan tucuiihya iñi nyaá añima yu, nda cuanda cuñí cahñi ña can tsi yu. Ndoo ndo ihya tan cōo nyito ndo tsihin yu —catyí ra.

³⁹ Tacañ tan cuahán ra Jesús luxu ca ity nuu tan tsicuñi tsiti ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatayin cuvi jatsiyo nyaha un tundoho ihya siquí yu, vaha xaan. Maa tyin na ña cuvi cuhva cuñí maa yu, tan na cuvi cuhva cuñí maa un —catyí ra.

⁴⁰ Tacañ tan tsaā ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora? ⁴¹ Coo nyito ndo, tan ndacan tahvi ndo tsi Nyoo; tacañ tan ña cua javaha ndo cuhva cuñí nu ña vaha. Tsa nditsa tyin añima ndo, cuñí xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús.

⁴² Tan tsa tsahan̄ ra tsa tsinu uvi tsaha, tsicán tahvi ra tyehen:

—Tyaa, tatuñ ña cuvi tsa jatsiyo nyaha un tundoho ihya siquí yu, na cuvi cuhva cuñí maa un —catyí ra.

⁴³ Tacañ tan tsaā ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñí xaan ra naha cusu ra naha. ⁴⁴ Tacañ tan nacoo ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsicán tahvi ra tsi Nyoo juvin ñi maa tsihin tuhun tsa tsa yahā cahán ra. ⁴⁵ Tacañ tan tsaā nyico ra nu yucú ra tsicá tsihin ra, tan catyí ra tsihin ra naha:

—Vityin cysu ndo tan quitatu ndo. Tyin tsa tsaā cuhva tsa cua nacuhva cuenda ra can tsi Rayiī tsa quee nda gloria tsi ra iyó cuatyí naha ra. ⁴⁶ Ndoyvita ndo, cōhon ndo. Tyin tsa vatsí ra tsa xico tsi yu —catyí ra Jesús.

Nu tsahá cuenda ra Judas tsi ra Jesús tsi nu xaan iñi tsi ra nahnu

(Mr. 14.43-50; Lc. 22.47-53; Jn. 18.2-11)

⁴⁷ Ndi caahán ca ra Jesús yacan, tan tsaā ra Judas, ra tsa cuví iñi ra tsicá tsihin ra Jesús. Tan tsihin ra Judas tsaā tucu cuaha xaan nyivi ndahá mitiy tan yutun jacuhun ra cuví jutu tsa cuví ity nuu naha ra tan ra

cuví mandoñi nyivi Israel naha ra. ⁴⁸ Tan ra Judas, ra tsa tsahá cuenda tsi ra Jesús, tsa yahā tsahá ra iñi seña tsi ra can naha ra, tyin coto ra naha yóo cua tiñi ra naha. Tyin tsa yahā cahán ra tsihin ra naha:

—Ra tsa cua tyayuhu yu, ra ican cuví ra tsa cua tiñi ndo.

⁴⁹ Tacañ tan natuhvá ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

⁵⁰ Tacañ tan nacahan̄ ra Jesús tan catyí ra tsihin ra:

—¿Náa tyiñu vatsí un ñih?

Tacañ tan natuhvá ra can naha ra tan tiñī ra naha tsi ra Jesús.

⁵¹ Tacañ tan iñi ra cutahán tsihin ra Jesús, tava ra mitiy tan tsahnya ra soho musu jutu tsaañhu tsa cuví ity nuu. ⁵² Tan catyí ra Jesús tsihin ra:

—Natyihí mitiy un tsitsi vena un. Tyin tandihí nyivi tsa cañi tahan tsihin mitiy, juvin ñi tsihin mitiy cua cíuñ ñi. ⁵³ A ña tsitó un tyin tatun yuhu tan cuñí yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu? ⁵⁴ Maa tyin tatun tacañ javaha yu, žnácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

⁵⁵ Tacañ tan catyí ra Jesús tsihin tandihí nyivi:

—¿A vatsí tiñi ndo tsi yu tumaa cua tiñi ndo iñi ñasuhu? tyin ndahá ndo mitiy tan yutun. Tandihi quivi tsinyij yu jacuahá yu tsi ndo tsitsi vehe ñuhu cahnu, tan ña tiñi ndo tsi yu. ⁵⁶ Tandihi yacan cuví tyin tacañ tan cundaa cuhva catyí tuhun Nyoo, tsa tyaā ra cuví ndusu yuhu Nyoo taahán tsanaha.

Tacañ tan tandihí ra tsicá tsihin ra, tsinu ra naha. Tan ndoo intuhun ña maa ra.

Nu tsica tuhun ra mandoñi naha ra tsi ra Jesús tatuñ Sehe Nyoo cuví tsi ra

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Tan ra tsa tiñi tsi ra Jesús, tsindacá ra naha tsi ra nuu ra Caifás, ra jutu tsaañhu tsa cuví ity nuu. Tan iñi cahnu ñi yucú ra maestro cuenda ley vehe ñuhu naha ra ican tan ra mandoñi naha ra. ⁵⁸ Tan ra Pedro cuahán ra tsata ra naha, tan tsaā ra nda nuquehe vehe ra Caifás can. Tan quihví̄ ra

tan ndoo ra nyíí ra tsihin vitya can naha ra, tyin cua nyehe ra nácaa cua quita tuhun can.

⁵⁹ Ra jutu tsa cuví ityi nuu naha ra, tan ra mandoñi naha ra, tan tandíhi ra cumí tyíñu naha ra, nducū ra naha tsi ra cahan cuendu siquí ra Jesús. Tyin tacan tan cuvi cahñi ra naha tsi ra. ⁶⁰ Maa tyin ña ñihí maa ra naha cuatyi tyaa ra naha siquí ra, vasu ndi maa cuaha nyívi tsahan ñi tsicahan ñi cuendu siquí ra. Tan nu ndíhi tuhun, tsaa uvi ca tsa ndaa tsa caahán cuendu. ⁶¹ Tan catyí ra naha:

—Ra ihyá, catyí ra tyin cuví caní ra vehe ñuhu cahnu Nyoo, tan tsitsi tsa uñi quiví cua janduvita ra tsi inga tsaha —catyí ra naha.

⁶² Tacan tan ra jutu tsa cuví ityi nuu can, nduvitá ra, tan catyí ra tsihin ra Jesús:

—¿A ña nacahan un nu caahán ra ihyá naha ra? ¿A nditsa tsa caahán ra ihyá naha ra, o ña nditsa?

⁶³ Maa tyin ra Jesús ña nacahan ra. Tacan tan catyí ra jutu tsahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayíí tsa quee nda gloria, cunyaa yu xiin cuaha Nyoo ra iyó tandíhi tunyee iñi, tan cua nyehe ndo nua cuahímaa ra tsahna caahán ra tsaha —catyí ra.

⁶⁵ Tacan tan ra jutu tsahnu tsa cuví ityi nuu can tsahnya rajahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tsihin tandíhi ca ra naha:

—Ra ihyá tsicoo cuatyí ra nuu Nyoo tsihin tsa caahán ra. ¡Nyehe ndo vityin! Ña cuñi ca tsi tsa nducū yo inga tsa ndaa tyin tsa tsíñi maa ndo tsa ñia vaha tsa caahán ra. ⁶⁶ ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cíúra.

⁶⁷ Tacan tan tiví sii ra naha nuu ra tan cañi ra naha tsi ra. Inga ra cañi ra naha nuu ra tsihin tsiquí. ⁶⁸ Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

Nu cahan ra Pedro tyin ña nacotó ra tsi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tsitsi tsa ndi nyíí ra Pedro nuquehe ityi tsata vehe can, tan iin ñaha tsa cuví musu jutu can, natuhvá ña nu nyaá ra tan catyí ra tsihin ra:

—Yoho tucu tsicá un tsihin ra Jesús, ra Galilea can.

⁷⁰ Tan ra Pedro catyí ra nuu tandíhi nyívi yucú can:

—Ña tsicá yu tsihin ra can. Ña tsító yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsicá ndíhi tucu ra ihyá tsihin ra Jesús, ra ñuu Nazaret —catyí ña.

⁷² Tan inga tsaha tyíhi xeehé ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañí cuii ca, tan ra yucú can natuhvá ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cañi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacū tsitooho.

⁷⁵ Tacan tan nducuhun iñi ra Pedro tsa caahán ra Jesús tsihin ra: “Tsa ndi cumañi ca vacu tsitooho, yooho tsa yahá cahan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quita ra icán, tan tsacū xaan ra tsa cuiihya cuñi ra tsá javahá ra tacan.

27

Nu nacuhvá cuenda ra naha tsi ra Jesús tsi ra Pilato

(Mr. 15.1; Lc. 23.1-2; Jn. 18.28-32)

¹ Tan tsa tuví inga quiví, tandíhi ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyíñu tsa cua cañi ra naha tsi ra Jesús. ² Tan nuuhníj ra ja-há ra naha. Tan tsahan ra naha tsinacuhvá cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihí ra Judas

³ Tsa nyehē ra Judas, ra tsa xico tsi ra Jesūs, tyin cua cúu ra, tan ndu uví iñi ra tsa javahā ra, tan nacuhvā ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra:

—Tsico cuatyi yu, tyin tsahā cuenda yu tsi iin ra nduve cuatyi na cúu ra.

Tan nacahan̄ ra naha tan catyí ra naha:

—¿Nacuenda nyuhu? ¡Nyehē maa yooho!

⁵ Tacan tan tyosq ihñi ra Judas xuhun can tsitsi vehe ñuhu cahnu, tan quitā ra cuahán ra tsityihī ra yoho jucun ra tan ticaq̄ ra tsi ra iin nu yutun, tan tsihī ra.

⁶ Ra cuví ityi nuu tsihin jutu can naha ra naquihīn ra naha xuhun can tan catyí ra naha:

—Ña cuví tyihī yo xuhun ihyā tsitsi caja nu yihī xuhun tsa tsahā nyivī tsi Nyoo tyin xuhun tsa cuyahvī ra tsa cua cati niñi cuví can.

⁷ Tacan tan ndoq̄ ra naha tyiñu, tyin cua jata ra naha ñuhu tsa nañí “Ñuhu Ra Javahá Quisi” tsihin xuhun can. Tyin coo nu cu-cutsi ra naha tsi nyivī inga ñuu tun tsihīñi ñuu can. ⁸ Yacan cuenda nañí ñuhu can nda cuanda vityin “Ñuhu Cuenda Tsa Tsati Niñi Nyivī”. ⁹ Tacan cuví tyin cundaq̄ tsa tyaa ra Jeremías, ra cuvi ndusu yuhu Nyoo tahan tsanaha nu catyí tsi tyehen: “Juvín ñi maa ra naha quihin nyico tsa oco utsi xuhun cuitsin, tsa jatā ra naha tsi ra Cristo. ¹⁰ Tan tsihin can, jatā ra naha ñuhu tsa nañí ‘Ñuhu Ra Javahá Quisi’, tacan catyi Jutu Mañi yo tsihin yu”, catyí tsi.

Nu nyehē ra Pilato tyin nduve cuatyi ra Jesúس

(Mr. 15.2-5; Lc. 23.3-5; Jn. 18.33-38)

¹¹ Tsindacā ra mandoñi can naha ra tsi ra Jesú斯 nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyivī Israel?

Tan ra Jesú斯 catyí ra tsihin ra:

—Juvín yu, tumaa cuhva catyī maa un.

¹² Tacan cuhva tsa tyaa ra jutu can naha ra tan ra mandoñi naha ra cuatyi siquī ra, ña nacahan̄ maa ra. ¹³ Tacan tan catyí ra Pilato tsihin ra:

—¿A ña tsiñí un tandihi tsa caahán ra naha siquī un?

¹⁴ Maa tyin ra Jesú斯 ña nacahan̄ maa ra. Tan iyo xaan cuñí ra ndacá ñaha can tyin ña nacahan̄ ra.

Nu cahan̄ ra cumí tyiñu tyin taahán tsi cúu ra Jesú斯

(Mr. 15.6-20; Lc. 23.13-25; Jn. 18.38—19.16)

¹⁵ Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyivī, juvin ra cua quita nuña.

¹⁶ Tan quívī can nyivī iin ra tsa nañí Barrabás vehe caa. Tan tandihi nyivī tsitó tuhun ra.

¹⁷ Tan cuhva tsa ndu iin nyivī, ra Pilato tsicā tuhun ra tsi ñi, tan catyí ra:

—¿Ndáa ra cuñí ndo tsa tava nuña yu? ¿Ara Barrabás, ora Jesú斯, ra tsa nañí Cristo? —catyí ra.

¹⁸ Tyin tsitó ra tyin tsa cuenda tsa ndasi cuñí ra jutu can naha ra nyehē ra naha tsi ra Jesú斯, yacan cuenda tsahā cuenda ra naha tsi ra tsi ra Pilato.

¹⁹ Tsitsi tsa nyaá ra Pilato nu tyayu ra, nu jahá tyiñu ra, jacuhun ñasiihi ra tyiñu tsi ra tan catyí ña: “Ña tyihī un tsi un tsihin ra vaha can. Tyin cuñí nyehē yu ñumaahna tsa cuenda ra. Tan jayuhvī xaan tsi tsi yu”, catyí ña.

²⁰ Maa tyin ra jutu can naha ra tan ra mandoñi naha ra, cuñihī ra naha natuyuhú ra naha tsi nyivī na ndacan ñi tsa jañā ra Pilato tsi ra Barrabás, tan na cúu ra Jesú斯.

²¹ Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñí ndo tsa jañā yu?

Tan nacahan̄ ñi, tan catyí ñi:

—Jañā tsi ra Barrabás.

²² Tan ra Pilato tsicā tuhun ra tsi ñi, tan catyí ra:

—¿Tan náa cua javaha yu tsihin ra Jesú斯 tsa nañí Cristo ihyā?

Tandihi ñi nacahan̄ ñi tan catyí ñi:

—¡Tyaa tsi ra nu cruu na cúu ra!

²³ Tacan tan catyí ra Pilato tsihin ñi:

—Tan ñáa tsa ña vaha javahā ra?

Maa tyin maa ñi cana tsaa ñi inga tsaha tan catyí ñi:

—¡Tyaa tsi ra nu cruu na cúu ra!

²⁴ Tsa nyehē ra Pilato tyin ña cuvi jaha ra tsi nyivī, tyin ñihi xaan cuvaá jahá ñi. Tacan tan tsicān ra ndutya, tan nacatyā ra ndaha ra nuu nyivī can, tan catyí ra:

—Ña cua ndoo cuatyí tsa cua cíu ra vaha ihya siquí yuhu, tyin siquí nyoho cua ndoo cuatyí can.

²⁵ Tan tandihí nyiví nacahán ñi, tan catyí ñi:

—Na ndoo maa tsi siquí ndi tan siquí sehe ndi.

²⁶ Tacan tan ra Pilato jañá ra tsi ra Barrabás, tan tava ytiñu ra na ndoho ra Jesús, tan nacuhva cuenda ra tsi ra tsi ra andaru naha ra na cíu ra nu cruu.

²⁷ Tacan tan ra andaru cuenda ra Pilato, ra ndacá ñaha can tsindacá ra naha tsi ra Jesús nda vehe ytiñu ra Pilato, tan jandu iñi ra naha tsi tandihí ca andaru nu nyaá ra. ²⁸ Tacan tan tava ra naha jahma ra tan jacunditsi ra naha iñin jahma cuaaha tsi ra. ²⁹ Tan tyihí ra naha iñin corona tsa tsinu tsihin iñi jiñi ra. Tan tsaha ra naha iñin yutun tatum na cundaha ra tsihin ndaha cuaha ra. Tacan tan tsicuiñi tsiti ra naha nuu ra, tan tsacu nducu ra naha tsi ra tan catyí ra naha:

—¡Nacumi tsi un, yooho Rey cuenda nyiví Israel!

³⁰ Tan tiví sií ra naha tsi ra. Tan quihín ra naha yutun tatum can tan cañi ra naha jiñi ra. ³¹ Tsa yahá tsa tsacu nducu ra naha tsi ra tan tava ra naha jahma cuaaha tsa nditsí ra, tan jacunditsi nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaa ra naha tsi ra Jesús nu cruu
(Mr. 15.21-32; Lc. 23.26-43; Jn. 19.17-27)

³² Tsa quitá ra naha ican, tahan ra naha tsi iñi ra ñuu Cirene, tsa nañí Simón. Tan jañiñi ra naha tsi ra na cuiso ra cruu ra Jesús.

³³ Tan tsaa ra naha iñi nu nañí Gólgota, tan cuñí tsi catyí “Yiquí Jiñi Ndiyí”.

³⁴ Tan ican tsaha ra naha vinu nasaca tsihin ndutya uva xaan coho ra Jesús. Tan tsa yahá tsa tsihí ra luxu can, ña cuñí ca ra coho ra. ³⁵ Tan tsa yahá tsa tyaa ra naha tsi ra nu cruu, tacan tan ra andaru can quihín ra naha jahma ra tan tava cuenda ra naha tyin cua nyehe ra naha ndáa ra jahma canaa intuhun intuhun jahma ra. Tacan cuví tyin cunda tuhun tsa tyaa iñi ra cuví ndusu yuhu Nyoo tahán tsanaha nu catyí tsi tyehen: “Tava cuenda ra naha tan tsatsa ra naha jahma yu”, catyí tsi. ³⁶ Tacan tan tsinyecu ra naha ican tyin jaha cuenda ra naha tsi ra. ³⁷ Tan ityi jiñi ra tyaa ra naha

letra tsa catyí nacuenda cua cíu ra. Tan catyí tsi tyehen: “Ra ihya cuví ra Jesús, rey cuenda nyiví ñuu Israel.”

³⁸ Tan tyaa tucu ra naha uvi taahan ra suhu tsihin ra nu uvi taahan ca cruu. In ra tyaa ra naha xiin cuaha ra, tan inga ra xiin satyin ra. ³⁹ Tan nyiví tsa yahá ican, caahán ñi tsi ra, tan javicó ñi jiñi ñi tsa tsacu nducu ñi tsi ra. ⁴⁰ Tan catyí ñi tsihin ra:

—¡Yoho tsa cahán un tyin cua cani un vehe ñuhu cahnu, tan tsitsi tsa uñi quivi tan cua janduvaha nyico un itsi, jacacu tsi maa un vityin nu cruu juvin, tatum nditsa tyin Sehe Nyoo cuví tsi un! —catyí ñi tsihin ra.

⁴¹ Tan juvin ñi tacan tsacu nducu ra jutu tsa cuví ityí nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

⁴² —Jacacu ra tsi inga nyivi, maa tyin ña cuví jacacu ra tsi maa ra. Tun nditsa tyin Rey cuenda nyiví Israel cuví ra, na nuu ra nu cruu can, tan cua tsinu iñi yo tsi ra.

⁴³ Ndítá xaan iñi ra tsi Nyoo, vityin na jacacu Nyoo tsi ra, tatum nditsa tyin cuñí ra tsi ra. Tyin catyí ra tsihin yo tyin Sehe Nyoo cuví tsi ra.

⁴⁴ Tan nda cuanda nu ñasuhu nahnu tsa nyaá nu cruu xiin ra tan tsacu nducu ndihí nahnu tsi ra.

Nu tsihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaq tanii cahnu ñuhu ñayiví tsa ora tan nda cuanda caa uñi tsa tseñi. ⁴⁶ Tan juvin ñi cuhva can, ñihi xaan cana tsaa ra Jesús. Tan catyí ra:

—Elí, Elí, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenda nacog iñi un tsi yu?

⁴⁷ Juhva ra yucú can naha ra, tsiní ra naha tsa cahán ra, tan catyí ra naha:

—Ra Elías, ra cuví ndusu yuhu Nyoo tsanaha, caná tsaa ra.

⁴⁸ Tan juvin ñi cuhva can, cuahán iñi ra cua quihín ra iñi yahma cuhva caá catyí, tan jatyiñi ra tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra. ⁴⁹ Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatum cua quitsi jacacu ra Elías tsi ra.

⁵⁰ Inga tsaha cana tsaa ñihi ra Jesús, tacan tan tsihí ra. ⁵¹ Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu li Xaan, nda cuanda ityi síqui tan nda cuanda ityi tsaha. Tan ñihi xaan taqan. Tan tahví cuatyí cava nahnu. ⁵² Tan nuñá yuhu ñaña. Tan cuaha nyiví tsa tsinú ñihi tsi Nyoo tan tsihí ñi, nandoto ñi. ⁵³ Tan tsa yaha nandoto ra Jesús quita ñi nu ñaña tan quíhví ñi tsitsi ñuu Jerusalén, tan cuaha nyiví nyehe tsi ñi. ⁵⁴ Tacan tan ra capitán tan ra andaru tsa jahá cuenda tsi ra Jesús, nayuhví xaan ra naha tsa taqan, tan tsa nyehe ra naha inga ca tsa cuvi. Tan catyí ra naha:

—Nditsa nditsa cuiii, tyin Sehe Nyoo cuví tsi ra ihyá.

⁵⁵ Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehe ñi ndasava. ⁵⁶ Tan juhva ñi icam cuví ñi ihyá: ña María tsa quee Magdala, tan ña María sihi ra Jacobo tan ra José, tan ñasíhi ra Zebedeo.

*Nu tsicutṣí ra naha tsi ra Jesús
(Mr. 15.42-47; Lc. 23.50-56; Jn. 19.38-42)*

⁵⁷ Cuhva tsa cuñí cuaa, quitsí iin ra cuca tsa nañí José, ra ñuu Arimatea. Tan tsinú iñi ra tsi ra Jesús. ⁵⁸ Tan tsahan ra tsicahan ra tsihí ra Pilato, tan tsican ra cuñu ñuhu ra Jesús. Tacan tan tavá tyíñu ra Pilato na cuhva ra andaru naha ra cuñu ñuhu ra Jesús tsi ra. ⁵⁹ Tacan tan quihin ra José cuñu ñuhu ra, tan cavá nuu ra iin jahma cuitsin vaha tsi ra. ⁶⁰ Tan tyihí ra cuñu ñuhu ra Jesús tsitsi iin ñaña tsaa tsa cuví iin yavi yuu tsa tavá tyíñu ra tsatya ra naha. Tan tsa yaha tsa nacasi ra yuhu ñaña can tsihin iin yuu cahnu, tan cuahán ra. ⁶¹ Tan ña María tsa quee Magdala, tan inga ña María, ndoq ñi yucú ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quívi, quívi quitatú nyiví cuví can, tan ra jutu tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. ⁶³ Tan catyí ra naha tsihin ra:

—Yoho taa, nducuhun iñi ndi tyin ra vatya can, catyí ra tahan nyito ra tyin tsa yahá tsa uñi quívi tsa cua cíu ra tan cua nandoto ra. ⁶⁴ Yacan cuenda tava tyíñu na jahá cuenda vaha ra andaru naha ra ñaña can, nda yaha tsa uñi quívi, coto cuhun ra tsicá tsihin ra tsa tsacuaa, tan suhu ra naha

cuñu ñuhu ra. Yaha can tan cua catyí ra naha tsihin nyiví tyin tsa nandoto ra. Tatum tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

⁶⁵ Tan ra Pilato catyí ra:

—Quihin ndo andaru ihyá. Cuaahan ndo, tan jahá cuenda vaha ndo ñaña can, nácaa cunyee maa ndo jahá cuenda ndo —catyí ra.

⁶⁶ Tacan tan cuahán ra naha, tan jahá cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndásí can tyin tatum nacanda yuu can coto ra naha. Tan nacoo ra naha tsi ra andaru jahá cuenda ra naha ican.

28

*Nu nandotø ra Jesús
(Mr. 16.1-8; Lc. 24.1-12; Jn. 20.1-10)*

¹ Tsa yaha quívi tsa quitatú nyiví, cuhva tsa cuñí cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña. ² Tan ñihi xaan taqan tyin quitsí iin ángel Jutu Mañi yo quee ra andivi, tan tsaa ra nu ñaña can. Tan jatsiyo ra yuu tsa ndásí yuhu can, tan tsicunyaä ra tsata can. ³ Tan xiñu xaan ra, tumaa tsa cañí tatsa. Tan cuitsin xaan jahma ra. ⁴ Cuhva tsa nyehe ra andaru can naha ra tsi ra, nayuhví xaan ra naha tan quitsaha ñihí ra naha, tan nda cuanda tsihí naaha ra naha tsihin tsa yuuhví ra naha. ⁵ Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihí nu cruiu nanducú ndo. ⁶ Yoñi ca ra nyí ihyá, tyin tsa nandotø ra, tumaa catyí ra. Naha ndo tan nyehe ndo nu tinyíj ra naha tsi ra. ⁷ Janumi xaan ndo cuhun ndo cuyatyi tuhun ndo tsihin ra tsicá tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quita ñi nu ñaña can. Yuuhví ñi, tan sií xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsicá tsihin ra Jesús. ⁹ Tan cuhva can quituví ra Jesús nuu ñi tan tsahan ra nacumi tsi ñi. Tacan tan natuhvá ñi nu nyaá ra tan tsicuiñi tsiti ñi nuu ra tan jacahnu ñi tsi ra, tan tsicunumí nyaá ñi tsaha ra. ¹⁰ Tan catyí ra tsihin ñi:

—Ña nayuhvi ndo. Cuaahan ndo cujato coto ndo tsi yañi yu tyin na cuhun ra naha nda Galilea, tan ndacan cua ñahi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityí nuu naha ra.

¹² Tacan tan ra jutu can naha ra tsahen ra naha tsicahen ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsahá ra naha tsi ra andaru can naha ra. ¹³ Tan catyí ra naha tsihin ra naha:

—Nyoho cua cahan ndo tyin tsa tsacuas tsitsi tsa quixí ndo, tsahen ra tsicá tsihin ra Jesús tan quihín ra naha cuñu ñuhu ra. ¹⁴ Tan tatun cua coto ra ndacá ñaha tuhun ihyá, cua nyehé maa ndi nácaa cua cahan ndi tsihin ra, tan nyoho ña caca iñi ndo. Nduve náa cua tahan ndo. ¹⁵ Tacan tan quihín ra andaru can xuhun can, tan cuahán ra naha cuajavahá ra naha cuhva catyí ra naha tsihin ra naha. Tan nda quivi vityin tan tacan caahán nyiví ñuu Israel.

*Nu tavá tyiñu ra Jesús tsi ra tsicá tyiñu ra
(Mr. 16.14-18; Lc. 24.36-49; Jn. 20.19-23)*

¹⁶ Tan tacan, tandíhi tsa utsi iin ra tsicá tsihin ra, cuahán ra naha nda Galilea nda yucu nu catyí maa ra Jesús tsihin ra naha tyin cuhun ra naha. ¹⁷ Tan cuhva tsa nyehé ra naha tsi ra Jesús, jacahny ra naha tsi ra, maa tyin juhva ra naha uvi ñi tsicá iñi ra naha. ¹⁸ Tacan tan natuhvá ra Jesús nu nyecú ra naha tan catyí ra tsihin ra naha:

—Nyoo tsahá ra tsa cundaca ñaha yuhu tandíhi andívì tan nu ñuhu ñayiví ihyá.

¹⁹ Yacan cuenda, cuahan ndo tandíhi nu iyó nyiví, tandíhi ñi ñuu, tan catyí ndo tsihin ñi na cunyicun ñi tsi yu. Tan jacoondutyá ndo tsi ñi tsihin siví Jutu yo Nyoo tan tsihin siví yuhu Sehe ra, tan tsihin siví Tatyí li ra.

²⁰ Tan jacuaha ndo tsi ñi na tyaa yahvi ñi tandíhi tsa catyí yu tyin javaha ndo. Tan coto ndo tyin yuhu cunyaa yu tsihin ndo tandíhi quivi nda cuanda naa ñayiví —catyí ra Jesucristo tsihin ra tavá tyiñu ra.

Tan na cuví tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutyá tsi nyívi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

¹ Tyehen quitsaha tuhun ra Jesucristo, Sehe Nyoo. ² Tsanaha ra Isaías, ra cuví ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi na janduvaha ñi tsi ñi tsa ndi cumañi ca cuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsaa ra nu tsiquí, tan catyí ra:

“Nuñando iin ityi cuiti tan natyiso vaha ndo tsi ndo tyin tsa vatsí Jutu Mañi yo”, catyí tuhun tsa tyaa ra Isaías.

⁴ Tacan cuví; quitsi ra Juan nu tsiquí, tan javaha ra cuhva tyaa ra Isaías. Catyí ra tsihin nyívi tyehen: “Ndu uvi iñi ndo cuatyí ndo tan coondutyá ndo tyin tacan tan jaha Nyoo tucahnu iñi tsi ndo tsa cuenda cuatyí ndo.” ⁵ Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiní ñi tsa caahán ra, ndu uvi iñi ñi cuhva iyó ñi tan nahma ñi cuatyí ñi nu Nyoo. Tacan tan tsicoondutyá ñi yutya Jordán.

⁶ Tan jahma ra Juan tsiní tsi tsihin ixi camellu. Tan cinturón ra cuví ñii. Tan maa ñi tica xama tsatsí ra, tan tsihí ra ndutya ñuñu tsa iyó tsitsi cuhu. ⁷ Caahán ra tuhun Nyoo tsihin nyívi tan catyí ra:

—Tsa yatín cuii quitsi ra tsa cahnu ca cuví tan ñavin ca yuhu. Tan ndi ña taahán tsi tsi yu tsa ndatsi yu ñii nditsan ra, tyin cahnu ca cuví maa ra tan ñavin ca yuhu. ⁸ Yuhu jacoondutyá yu tsi ndo tsihin ndutya ñi. Maa tyin maa ra cua jacoondutyá ra tsi ndo tsihin Tatyí li Nyoo —catyí ra Juan.

Nu tsicoondutyá ra Jesús

(Mt. 3.13-17; Lc. 3.21-22)

⁹ Quivi can quita ra Jesús ñuu Nazaret, tsa canyí Galilea, tan cuahán ra nu nyífi ra Juan yutya Jordán tyin jacoondutyá ra

tsi ra. ¹⁰ Tsa quita ra Jesús tsitsi ndutya tsa yahá tsicoondutyá ra, nuña andiví tan nyehe ra vatsí nuú Tatyí li Nyoo siquí ra tan caá tsi tumaa caá iin paloma. ¹¹ Tan nacahan iin ndusu ityi andiví tan catyí tsi tsihin ra tyehen:

—Yoho cuví Sehe yu tan cuñi xaan yu tsi un. Tan sii xaan cuñi yu nyehé yu tsi un —catyí ndusu can.

Nu nducu cuhva nu ña vaha tsi ra Jesús
(Mt. 4.1-11; Lc. 4.1-13)

¹² Tsa yahá tsa tsicoondutyá ra Jesús tan tsindaca Tatyí li Nyoo tsi ra nu tsiquí. ¹³ Tan tsinyijí ra ican uvi xico quíví nu nduve nyívi iyó, maa ñi quítá xaan iyó. Tan nducu cuhva nu ña vaha tsi ra. Yahá can tan tsaq ángel Nyoo tan jatyinyee ra naha tsi ra.

Nu quitsahá caahán ra Jesús tuhun Nyoo tsihin nyívi iyó Galilea
(Mt. 4.12-17; Lc. 4.14-15)

¹⁴ Tsa yahá tsa tyihí nyívi tsi ra Juan vehe caa, tan tsinuhú ra Jesús Galilea tan caahán ra tsihin nyívi nácaa ndacá ñaha Nyoo. ¹⁵ Tan catyí ra:

—Tsa tsaa quíví tsa cua cundaca ñaha Nyoo tsi nyívi iyó nu ñuhu ñayiví ihya. Yacan cuenda ndu uvi iñi ndo cuatyí ndo, tan tsinú iñi ndo tuhun tsa jacacú Nyoo tsi nyívi —catyí ra Jesús.

Nu cana ra Jesús cumi taahan ra tiín tyaca
(Mt. 4.18-22; Lc. 5.1-11)

¹⁶ Lin quíví cuahán ra Jesús tsicá ra yuhu miñi tsa nañí Ndutya Ñuhu Galilea. Tan nyehe ra tsi ra Simón tan ra Andrés, yañi ra Simón, cañí ra naha traya ra naha nu ndutya, tyin ra tiín tyaca cuví ra naha. ¹⁷ Tan catyí ra Jesús tsihin ra naha:

—Naha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tiín ndo tyaca ihya, tacan cua ñihí ndo nyívi cua cuví nyívi Nyoo —catyí ra Jesús tsihin ra Simón tan tsihin ra Andrés.

¹⁸ Juvin ñi cuhva can tan nacoo ra naha traya can, tan cuahán ra naha cuanyicún ra naha tsi ra.

¹⁹ Ña cuahá ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. ²⁰ Cana ra tsi nduvi taahan ra naha. Tan nacoo ra naha tsi ra Zebedeo, jutu ra naha, tsitsi

yutun ndoo can tsihin ra cuví musu ra naha.
Tan cuahán ra naha tsihin ra Jesús.

*Nu quitq tatyi ña vaha tsi iin rayii
(Lc. 4.31-37)*

²¹ Tsa tsaa ra Jesús ñuu Capernaum tsihin ra tsicá tsihin ra, quihví ra Jesús tsitsi vehe ñuhu quiví quitatú nyivi. Tacan tan quitsaha jacuahá ra tuhun Nyoo tsi nyivi. ²² Tan iyo xaan cuñí ñi tsa tsíñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra. ²³ Tan tsitsi vehe ñuhu can nyíi iin ra yihí tatyi ña vaha. Tan cana tsaa ra tan catyí ra:

²⁴ —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsí un vatsí janaa un tsi ndi? Yuhu nacotó vaha yu tsi un, tan tsító yu tyin Sehe li Nyoo cuví un —catyí ra can tsihin ra Jesús jahá nu tatyi ña vaha can.

²⁵ Tacan tan nduxaṇ̄ ra Jesús tsi nu tan catyí ra tsihin nu:

—¡Ña cahan ca un! ¡Quita tsi ra ihya!
—catyí ra tsihin nu.

²⁶ Tacan tan quitsaha nihi rayii can jaha nu. Tan ñihi xaan cana tsaa ra jahá nu, tan quita nu tsi ra. ²⁷ Tandíhi nyivi iyo xaan cuñí ñi tan tsicá tuhun tahan ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaa jacuahá ra ihya? ¡Tyin iyó vaha tunyee iñi tsi ra, nda cuanda tatyi ña vaha tan tyaá yahvi tsi ra! —catyí ñi.

²⁸ Tan numi ñi tsito nyivi iyó tandíhi ñuu tsa cayucú Galilea tuhun ra Jesús.

*Nu nduvahá tyiso ra Simón Pedro
(Mt. 8.14-15; Lc. 4.38-39)*

²⁹ Tsa ndihí jacuahá ra Jesús tsi nyivi tsitsi vehe ñuhu, quita ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. ³⁰ Tan ña tyiso ra Simón cuuhví ña tsihin cahñi canyí ña nu tsito. Tan catyí tuhun nyivi ña tsihin ra Jesús tyin cuuhví ña. ³¹ Tacan tan natuhvá ra Jesús yuhu tsito nu canyí ña, tiñi ra ndaha ña, tan cañihí ra tsi ña. Juvín ñi cuhva can, quita cahñi tsi ña, tan quitsaha nducú ña tsa catsi ra naha.

*Nu cuaha xaan nyivi cuuhví janduvahá
ra Jesús
(Mt. 8.16-17; Lc. 4.40-41)*

³² Tsa tsa cuñí cuaa tsa tsa yahá tyiso ñicanvii, tandíhi nyivi cuuhví tan nyivi yihí tatyi ña vaha tsindacá nyivi tsi ñi nu nyív ra Jesús. ³³ Tan ndu iñi tandíhi nyivi ñuu can nu yucú ra naha. ³⁴ Tan janduvahá ra tsi tandíhi ñi tsa yihí siñ siñ cuehe, tan cuaha tatyi ña vaha tavá ra. Maa tyin ña tsahá ra tsa cahan tatyi ña vaha can, tyin tsitó nahnu yóo ra cuví ra.

*Nu tsicá ra Jesús caahán ra tuhun Nyoo
tandíhi ñuu tsa cayucú Galilea
(Lc. 4.42-44)*

³⁵ Ra Jesús nduvitá ra tsa ndi naa ca inga quivi, quita ra ñuu can tan cuahán ra iin nu taxin caá cuandacán tahvi ra tsi Nyoo.

³⁶ Tsa nyehé ra Simón tyin nduve ra, tacan tan cuahán ra tsihin tandíhi ca ra naha cuananducú ra naha tsi ra. ³⁷ Tan tsa nañihí ra naha tsi ra, catyí ra naha tsihin ra:

—Tandíhi nyivi tan nanducú ñi tsi un —catyí ra naha.

³⁸ Maa tyin catyí ra tsihin ra naha:

—Cohon ndo ñuu tsa cayucú yatin ñi ihya, tyin cuñí tsi cahan ndihí yu tuhun Nyoo ican, tyin yacan tysiñu vatsí yu —catyí ra Jesús tsihin ra naha.

³⁹ Tan tacan tsicá ra Jesús caahán ra tuhun Nyoo tsihin nyivi tsitsi vehe ñuhu tan iin tan iin ñuu tsa cayucú Galilea. Tan tavá ra tatyi ña vaha tsi nyivi.

*Nu janduvahá ra Jesús tsi ra ndohó cuehe
tyaahyú*

(Mt. 8.1-4; Lc. 5.12-16)

⁴⁰ Tsa ndi cuahán ra Jesús tsicá ra tan quita iin ra ndohó cuehe tyaahyú tsicuiñi tsiti ra nuu ra, tan catyí ra tsihin ra:

—Tun yooho tan cuñí un, cuví janduvahá un tsi yu —catyí ra.

⁴¹ Tan cundaahví iñi ra Jesús nyehé ra tsi ra, tan tyiso ndaha ra jiñi ra, tan catyí ra tsihin ra:

—Cuñí yu janduvahá yu tsi un. Tan vityin tsa nduvahá un —catyí ra tsihin ra.

⁴² Tsa cahan ra Jesús tacan tsihin ra, juvin ñi cuhva can tan nduvahá ra. ⁴³ Tacan tan catyí ra Jesús tyin tsa cuví cunuhu ra, maa tyin cahan vaha xaan ra tsihin ra na javaha ra tyehen:

⁴⁴ —Coto catyi tuhun un tsihin nyivi yóo janduvahá tsi un. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva tsa catyi ra Moisés tyin cuhva

ndo tsa cuenda tsa nduvahá ndo tun cuhvi
ndo. Yacan cua cuvi tsa ndaa tsi ra jutu
tan tsi nyivi tyin tsa nduvahá un —catyí ra
Jesús tsihin ra.

⁴⁵ Maa tyin ra ican cuahán ra, tan quitsa-
há catyí tuhun ra tsihin tandihí nyivi nácaa
nduvahá ra. Yacan cuenda ñá cuvi ca quíhví
nditsin ra Jesús tsitsi ndi intuhun maa ñuu.
Tan tsicá ra ityi tsata ñuu ñi nu nduve nyivi
iyó, maa tyin tandihí ñi ityi tan quita nyivi,
tan tsinyehé ñi tsi ra.

2

Nu janduvahá ra Jesús tsi iin ra xii
(Mt. 9:1-8; Lc. 5:17-26)

¹Tsa yaha juhva quivi tan cuahán ra Jesús
ñuu Capernaum inga tsaha. Tan tsa tsito
nyivi tyin tsaa nuhu ra yuvehe ra, ²iin yaha
ñi ndu cuaha ñi yuvehe ra tan ña tsitahan
maa ñi tsitsi vehe tan ndi yuvehe. Tan
caahán ra tuhun Nyoo tsihin ñi. ³Tacan tan
tsaa cumi taahan rayii nyisó ra naha iin ra
xii. Cuñí ra naha cuhun ra naha tsihin ra
nda nu nyaá ra Jesús. ⁴Maa tyin ñá cuvi
yaha ra naha yuvehe tan cuhun ra naha nu
nyaá ra Jesús tyin cuaha xaan nyivi nyecú
yuvehe can. Yacan cuenda ndaa ra naha jiñi
vehe, tan jatsiyo ra naha juhva tyiyo ndihí
cuhva nu nyaá ñi ra Jesús. Tacan tan januu
ra naha tsi ra cuuhví can nu nyaá ra Jesús
tsihin iin tsito. ⁵Tsa nyehé ra Jesús tyin
tsinú xaan iñi ra can naha ra, catyí ra tsihin
ra cuuhví can:

—Vityin, tsa jahá yu tucahnu iñi tsi un
tsa cuenda tandihí cuatyí un —catyí ra
Jesús tsihin ra.

“Tan nyecú juhva ra cuví maestro cuenda
ley vehe ñuu naha ra ican, tacan tan
quitsahá tsicá iñi ra naha tuhun ihyá:
⁷ “¿Nacuenda tyin caná iñi ra ihyá caahán
ra tyehen? Tan intuhun ñi maa Nyoo cuví
ra jahá tucahnu iñi tsi yo. Tsicog cuatyí ra
nuu Nyoo tsa cuenda tsa caahán ra tacan”,
cuñí ra naha, tsicá iñi ra naha. ⁸Maa tyin ra
Jesús iin yaha ñi tuví iñi ra cuhva tsicá iñi
ra naha. Tan catyí ra tsihin ra naha:

—¿Nacuenda tsicá iñi ndo tacan? ⁹Náa
yii ca cahan yo; “Cuateyi un tsa yaha ndatsí”,
o catyi yo: “Ndúvita, naquihin tsito un tan
caca”? ¹⁰Vaha. Cua janaha yu tsi ndo tyin
yuhu, tsa cuví yu Rayii quee nda gloria, iyó
ndatu tsi yu nu ñuhu ñayivi ihyá tsa jaha

yu tucahnu iñi tsi nyivi tsa cuenda cuatyí
ñi —catyí ra Jesús tsihin ra naha.

Tacan tan nacahan ra tsihin ra cuuhví
can:

¹¹—Catyí yu tsihin un; ndúvita, naquihin
tsito un, tan cuanuhu yuvehe un —catyí ra
Jesús tsihin ra.

¹² Tan iin yaha ñi nduvitá ra cuuhví can,
naquihin ra tsito ra, tan cuanuhu ra. Tan
iyo xaan cuñí tandihí maa nyivi tsa nyehe
can, tan quitsahá jacahnú ñi tsi Nyoo, tan
catyí ñi:

—Ndi iin tsaha maa tan ñaha ca nyehe yo
tsehe —catyí ñi.

Nu cana ra Jesús tsi ra Leví
(Mt. 9:9-13; Lc. 5:27-32)

¹³ Tsa yaha yacan tan cuahán ra Jesús
yuhu miñi inga tsaha. Tacan tan tsaa cuaha
nyivi nu nyií ra, tan quitsahá jacuahá ra
tsi ñi. ¹⁴Tsa ndihí jacuahá ra tsi ñi, tan
cuanuhu ra. Tan tsa cuahán ra yaha ra nu
nyaá vehe nu tyahví nyivi xuhun cuenda
ra ndacá ñaha ñuu Roma, tan ican nyaá
ra Leví, sehe ra Alfeo, naquihín cuenda ra
xuhun can. Nyehé ra Jesús tsi ra, tan catyí
ra tsihin ra:

—Cohon tsihin yu.

Tacan tan nduvitá ra Leví, tan cuahán ra
tsihin ra.

¹⁵ Yaha can tan cuahán ra Jesús cuacatsí
ra yuvehe ra Leví tsihin ra tsicá tsihin ra.
Tsinyaa ra nu mesa tan tsinyecu ndihí tucu
ra tavá xuhun cuenda ra ndacá ñaha tan
inga ca nyivi iyó cuatyí. Tyin cuaha xaan
nyivi nyicún tsi ra. ¹⁶Maa tyin tsa nyehe
ra cuví maestro cuenda ley vehe ñuhu tan
ra cuví fariseo naha ra tyin tsatsí ra Jesús
tsihin ra tavá xuhun tan ra iyó cuatyí, catyí
ra naha tsihin ra tsicá tsihin ra:

—¿Nacuenda tyin tsatsí tan tsihí ra mae-
stro ndo tsihin ra tavá xuhun tan ra iyó
cuatyí?

¹⁷Tsa tsiní ra Jesús tsa cahan ra naha tan
catyí ra:

—Yuhu ñá vatsí yu vatsí jatyinyee yu tsi
nyivi cuñí tyin vaha iyó ñi; vatsí yu vatsí
jatyinyee yu tsi nyivi tsító tyin iyó cuatyí
ñi tumaa nyivi cuuhví, tyin nyivi cuuhví
tsiñí ñuhu doctor tsi ñi. Maa tyin nyivi vaha
cuñí, ña tsiní ñuhu doctor tsi ñi —catyí ra
Jesús tsihin ra naha.

*Nu tsicá tuhun nyivi tsi ra Jesús tun taahán tsi coo nyitya ñi
(Mt. 9.14-15; Lc. 5.33-35)*

¹⁸lin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahán juhvá nyivi nu nyivi ra Jesús, tan tsicá tuhun ñi tsi ra, tan catyí ñi:

—¿Nacuenda tyin tsicoó nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsicoó nyitya ra naha? —catyí ñi.

¹⁹Nacahan ra Jesús tan catyí ra:

—¿A cuví coo nyitya nyivi yucú nu iyó vico tindaha tun, ndi nyír ra cua tindaha tsihin ñi? Ña cuví coo nyitya ñi tun ndi nyif ra tsihin ñi. ²⁰Maa tyin coo quivi ñia cuya cunyii ca ra tsihin ñi. Tacañ tan cua coo nyitya ñi —catyí ra Jesús tsihin ñi.

*Nu caahán ra Jesús tyn ña nacatsi tahan tuhun tsahnu tsa iyó nyivi tsihin tuhun tsaa tsa jacuahá ra tsi ñi
(Mt. 9.16-17; Lc. 5.36-39)*

²¹Tan catyí ra Jesús:

—Ña tuhvá nyivi natyaá jahma tsaa iin jahma tuuhu, tyin jahma tsaa can cua nandiyi can tan cua nducanhnu ca nu ndata jahma tuuhu can jaha can. ²²Tacañ tucu ñi ñii yihí vinu tun tyihí yo vinu tsaa tsitsi ñii tsahnu cua ndata ñii can, tan cua cati vinu can tan cua tiví can. Yacan cuenda cuñi tsi tsaa tyihí yo vinu tsaa tsitsi ñii tsaa —catyí ra Jesús.

*Nu jocón ra tsicá tsihin ra Jesús yoco trigu quivi quitatú nyivi
(Mt. 12.1-8; Lc. 6.1-5)*

²³lin tsaha yaha ra Jesús tsitsi tsa tatsi nyivi tan cuví tsi quivi quitatú ñi. Tan tsa yaha ra tsicá tsihin ra quitsahá tuhún ra naha yoco trigu. ²⁴Tacañ tan tsa nyehé ra fariseo naha ra can quitsahá caahán ra naha tsihin ra Jesús:

—¡Nyehé tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihyá —catyí ra naha.

²⁵Tan nacahan ra Jesús tsihin ra naha:

—¿A ñaha ca cahví ndo nu tutu nu tsahá cuenda tsi tsa javahá ra David tan ra cutahán tsihin ra quivi tsisoco ra naha? ²⁶Ra David quihví ra tsitsi vehe Nyoo quivi cuví ra Abiatar jutu tsahnu cuví ityí nuu. Tan quihín ra paan ii, tsa taahán tsi catsi maa ñi maa ra jutu naha ra. Maa ra tan tandihí

ra cutahán tsihin ra tsatsi ra naha paan can —catyí ra Jesús.

²⁷Tacañ tan catyí ra Jesús tsihin ra naha:

—Nyoo javahá ra quivi quitatú yo tyin tacañ tan cuví quitatú cuñu ñihu yo; tan ñavín maa yo tsinu tsa cuenda quivi quitatú yo. ²⁸Yacan cuenda yuhu tsa cuví yu Rayiñ quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

3

Nu nduvahá ra na ityi iin ndaha

(Mt. 12.9-14; Lc. 6.6-11)

¹Tsa quihví ra Jesús inga tsaha tsitsi vehe ñihu, nyiñ iin ra na ityi iin ndaha icán. ²Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacañ tan cua cuvi tyaa ra naha cuatyí siquí ra.

³Tacañ tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihyá.

—Tacañ tan tsicá tuhun ra tsi ra tsa yucú icán naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahan ra naha. ⁵Tacañ tan nanyehé xaan ra Jesús nuu ra naha, tan nducuihyá cuñi ra tyin ña cuñi ra naha cutuñi ñi naha. Tan catyí ra tsihin ra cuuhví can:

—Jandundo ndaha un.

Tacañ tan jandundo ra can ndaha ra, tan iin yaha ñi nduvahá ndaha ra. ⁶Tacañ tan quita ra fariseo naha ra, tan quitsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyír ra Jesús yuhu miñi

⁷Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

⁸Tsa tsito nyivi tyin nahnu xaan tsa iyo javahá ra, cuaha ñi tsahán nu nyír ra tyin

cuñí ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsyo yutya Jordán. Tan quee tucu juhva ñi ñuu Tiro tan ñuu Sidón tan tandihí ca ñuu tsa cayucú yatinyu cayucú nduvi ñuu can. ⁹Tsa nyehe ra Jesús tsaá nyíví, catyí ra tsihin ra tsicá tsihin ra na caquin nyaa vaha ra naha iin yutun ndoo tyin tun cua ndutuví ca nyíví, cuví quihví ra tsitsi yutun ndoo can tyin tacan tan ña cua tindahí ñi tsi ra. ¹⁰Tsa cuaha xaan nyíví janduvalha ra, yacan cuenda tsahán cuaha ca nyíví cuuhví nu nyíví ra. Tsicá iñí maa ñí tyin tun nañí luxu ndaha ñi tsi ra tan cua nduvaha ñí. ¹¹Yíhi ñí cuuhví can yíhí tatyí ña vaha tsi ñí. Tan tsa natuhví ñí tsa yíhí tatyí ña vaha nu nyáá ra Jesús tsicuiñⁱ tsiti ñí, tan nu tatyí ña vaha tsa yíhí tsi ñí cana tsaa nu tan catyí nu tsihin ra:

—¡Yooho cuví Sehe Nyoo!

¹²Tan tandihí ñí cuhva tsa caahán tatyí ña vaha yóo ra cuví ra, tyasí ra nu cahan nu.

Nu nacatsí ra Jesús tsi utsi uví ra caca tyínu ra
(Mt. 10.1-4; Lc. 6.12-16)

¹³Tsa yaha yacan tan ndaa ra Jesús iin yucu tan cana ra tsi ra tsa cuñí maa ra cana ra. Tacan tan cuahán ra naha nu nyí ra.

¹⁴Tan tsitsi tsa tandihí ra tsa cana ra, nacatsí ra utsi uví ra naha tyin caca ra naha tsihin ra, tan caca ra naha cahan ra naha tuhun Nyoo. ¹⁵Tan tsahá ra ndatu tsi ra naha tsa janduvalha ra naha tsi nyíví cuuhví, tan tava ra naha tatyí ña vaha yíhí tsi nyíví. ¹⁶Ihya nyecú sivi ra naha: ra Simón, tsa jacunañi tucu ra Jesús Pedro; ¹⁷tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihyá cuñí tsi catyi: “ra caahán tumaa ñíhi caahán saví”. ¹⁸Tan tandihí ca raha nañí ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañí tucu Simón, iin ra tsa cuñí cuhun cuatyí siquí ñuu Roma tsa ndacá ñaha tsi ñí; ¹⁹tan ra Judas Iscariote, tsa xicó tsi ra Jesús.

Tsa yaha yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñí tsi ra Jesús catyi nahnu tyin tsihin tunyee iñí nu ña vaha javahá ra tsa iyó
(Mt. 12.22-32; Lc. 11.14-23; 12.10)

²⁰Tan nducuahá nyíví nu yucú ra naha inga tsaha, tan nda cuanda ña cuyatyí ca ra naha catisi ra naha. ²¹Tsa tsito nyíví ra Jesús tyin nyíví ra ican, tsahán ñí tsiquihín ñi tsi ra tyin cunuhu ra tsihin ñí, tyin catyí nyíví tsihin ñí tyin ndusáná iñí ra.

²²Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaq ra naha nu nyíví ra Jesús tan catyí ra naha:

—Ra ihyá tavá ra tatyí ña vaha tsi nyíví tsihin tunyee iñí nu Beelzebú, tsa cuví ityí nuu tsihin tandihí tatyí ña vaha —catyí ra naha.

²³Tsa tuví iñí ra Jesús tyin tacan caahán ra naha, cana ra tsi ra naha tan tsahá ra iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvin ñí maa tahan nu? Ña cuví. ²⁴Tyin tun ra ndacá ñaha naha ra tan cua natahví sava ra naha, tan cua quitsaha cañí tahan ra naha, cua cundihí tsa ndacá ñaha ra naha. ²⁵Tacan tucu ñí tun nyíví iyó iin caa ñí iin vehe tan cañí tahan ñí, cua cusiñ ñí tan ña cua cuví coo vaha ñí. ²⁶Tan tun nu ña vaha tan ndusíñ nu tan nduvita iin nu siquí inga nu, ¿náa cua tahan nahnu? Cua ndusíñ nahnu tan cua cundihí nahnu.

²⁷Yoñí cuví quihví tsitsi vehe iin ra xaan tan suhu ra tsa iyó tsi ra, tun ña cuhñí jihna ra tsi ra. Maa ñí cuñí tsi cuhñí jihna ra tsi ra jatsii vehe can tan cuví quihví ra suhu ra tsa tsii ra.

²⁸Tsa nditsa catyí yu tsihin ndo tyin cuví coo tucahnú iñí tsi nyíví tsa cuenda tandihí nuu cuatyí javahá ñí, tan tsa cuenda tucu tsa caahán ñí tsa ña vaha. ²⁹Maa tyin tun cahan ñí ndavaha ñí siquí Tatyí li Nyoo, ña cua jaha maa Nyoo tucahnú iñí tsi ñí; cua coo cuatyí ñí yoso cuahan quíví —catyí ra Jesús.

³⁰Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yíhí tsi ra.

Nu catyí ra Jesús tyin nyíví tyáá yahvi tuhun Nyoo, juvin ñí cuví yañí ra, tan sihi ra
(Mt. 12.46-50; Lc. 8.19-21)

³¹Tacan tan tsaa sihi ra Jesús tan yañí ra nu nyíví ra, maa tyin ndoo ñí ityí tsata vehe, tan catyí ñí tsihin ra nyecú ican naha ra tyin

cana ra naha tsi ra Jesús. ³²Tan catyí nyíví nyecú nanii canduvi xiin ra Jesús tsihin ra:

—Síhi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³Maa tyin catyí ra:

—¿Yóo cuví síhi yu tan yañi yu?

³⁴Tacan tan nanyehe ^{ra} nañii canduvi nu nyaá ra, tan catyí ra:

—Nyíví nyecú ihyá cuví síhi yu, yañi yu tan cuhva yu. ³⁵Tyin tandihí nyíví jahavá cuhva cuñí Nyoo, juvin ñi cuví yañi yu, cuhva yu tan síhi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsí

(Mt. 13.1-9; Lc. 8.4-8)

¹ Quitsahá jacuahá ra Jesús inga tsaha yuhu miñi. Tan cuaha xaan nyíví ndu iin nu nyíví ra. Tan tsa cuenda tsa cuaha xaan ñi cuví, quihví ^{ra} tsitsi yutun ndoo tsa canyí ^{nu} ndutya yuhu miñi can, tan tsinyaq ^{ra} tsitsi can. Tan ndog tandihí maa nyíví nu nyiti. ²Tacan tan cuaha xaan tsa jacuahá ^{ra} tsi ñi tsihin cuhva. Tan tsitsi tsa jacuahá ^{ra} tsi ñi, catyí ^{ra} tsihin ñi:

³—Tyaqá soho ndo tsa cua cahan yu. Iin ra quita ^{ra} yuvehe ra. Tan cuahán ^{ra} cua tatsí ^{ra} trigú nu ñuhu ^{ra}. ⁴Tan cuhva tsa quiti ^{ra} tsiti trigú can, cucoyo juhva tsi yuhu ity. Maa tyin quitsí saa tan tsatsí tì naha tì itsi. ⁵Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi cana tsiti can tyin ña cuaha nyahyu yihí tyañu yuu can. ⁶Maa tyin tsa cana ñicanyí, iin yaha ñi na ityí tsi tyin ña cunu cuahán yoho tsi. ⁷Tan juhva ca tsiti can cucoyo tsi tyañu iñu. Quivi cana tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahní can trigú can. Yacan cuenda ña tsaha trigú can tsiti. ⁸Maa tyin juhva ca tsiti can cucoyo tsi nu ñuhu vaha. Cana tsi tan tsahný tsi, tan cuaha tsiti tsaha tsi. Tyin tsa intuhun tsiti can, tsaha tsi oco utsi tsiti tsitsi yoco tsi. Tan inga tsiti can tsaha tsi uñi xico, tan inga tsi tsaha tsi iin ciente —catyí ^{ra} Jesús tsihin ñi.

⁹Tan catyí nyico ^{ra} tsihin ñi:

—Nyoooho tsa iyó soho, tyaa soho ndo tsa caahán yu.

Nu tsahá cuenda ^{ra} Jesús nacuenda jacuahá ^{ra} tsi nyíví tsihin cuhva
(Mt. 13.10-17; Lc. 8.9-10)

¹⁰Tsa yahá yacan tan ndoo maa ña ra Jesús tsihin ^{ra} tsicá tsihin ^{ra} tan nyíví nyicún tsi ^{ra}. Tan tsicá tuhun ñi:

—¿Náa cuñí tsi catyí tsa cahán un nañi?

¹¹Tan catyí ^{ra} tsihin ñi:

—Maa Nyoo catyí tyin jacotó ^{yu} tsi ndo tuhun xeehe nácaa ndacá ñaha ^{ra}. Maa tyin inga ca nyíví jacotó ^{yu} can tsi ñi tsihin cuhva ñi tyin ña cuñí ñi cunyicun vaha ñi tsi ^{yu}. ¹²Tyin vasu ndi maa nyehé ñi tsa jahavá yu, cua cuví tsi tumaa tsa ña nditsin nyehé ñi; vasu ndi maa tsiñí ñi, ña cua cutuñí iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ^{ra} Jesús tsihin ñi.

Nu tsahá cuenda ^{ra} Jesús tsa cuñí tsi catyí tuhun ^{ra} tatsí

(Mt. 13.18-23; Lc. 8.11-15)

¹³Tan catyí ndihí ^{ra} tsihin ñi:

—Tun ña cutuñí iñi ndo tuhun cahán yu nañi, ndi ña cua cutuñí iñi ndo tandihí ca tsa cua jacuahá yu tsi ndo tsihin cuhva ñi. ¹⁴Ra tatsí trigú can cuví ^{ra} caahán tuhun Nyoo. ¹⁵Yihí nyíví cuví ñi tumaa nu cucoyo tsiti trigú yuhu ity tyin tsiñí ñi tuhun Nyoo, maa tyin yahá can, tan iñi yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsí ra añima ñi. ¹⁶Tan juhva nyíví cuví ñi tumaa nu cucoyo tsiti trigú tsata yuu tyin tsata yuu can luxu cuií ñi nyahyu yihí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyíví can, tyin quivi vatsí tundoho siquí ñi, tan caahán nyíví tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo. ¹⁸Tan juhva nyíví cuví ñi tumaa nu cucoyo tsiti tyañu iñu tyin tsiñí ñi tuhun Nyoo, ¹⁹maa tyin tsicá xaan iñi ñi tundoho ñayíví ihyá tan ña tsicá iñi ñi tuhun Nyoo. Nyiyo iñi ñi tsa cuca, tan cuñí ñi coo tandihí tsa iyó nu ñuhu ñayíví ihyá tsi ñi. Tan tandihí yacan jatyañú can tsi ñi, tan cuví ñi tumaa cuví

yutun tsa ña tsahá tsiti. ²⁰ Maa tyin nyivi tsa tsiñi tuhun Nyoo tan naquihín vaha ñi itsi, tan javahá ñi tandihi tsa caahán tsi, juvin ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihi tsi tsahá tsi oco utsi tsiti. Inga tsi tsahá tsi uñi xico tsiti, tan inga tsi tsahá tsi ciente tsiti.

Nu cahan ra Jesús tyin ña taahán tsi tyihi xeehe yo ñuhu Nyoo tsa jandunditsín añima yo coto quihin nyaa ra itsi

(Lc. 8.16-18)

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naníi tsitsi vehe. ²² Tyin nduve tsa yihi xeehe tan ña cua quituvi, tan ndi tsa xeehe tan ña cua coto nyivi. Tyin tandihi maa tan cua quita nu nditsin tan coto yo can. ²³ Nyoooho tsa iyó soho, tyaa soho ndo tsa caahán yu —catyí ra Jesús tsihin ñi.

²⁴ Tan catyí tucu ra:

—Tyaa soho vaha ndo tsa caahán yu tyin tun tyáa yahvi ndo tuhun tsíni ndo, cuaha ca tsa cua cuhva Nyoo tsi ndo. ²⁵ Tyin nyivi tyáa soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyáa soho, cua quihin nyaa ra nda cuanda tsa luxu tsa iyó tsi ñi tsa tsa yahá ñihí ñi.

Nu tsahá ra Jesús iin cuhva nácaa tsahnú iin tsiti

²⁶ Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi. ²⁷ Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatum tsa yaha cuaha quivi tsa tatsí ñi, tacan tan cuahán ñi cuanyehe ñi inga tsaha. Tsa tsáa ñi tsa cana tsi, tsa tsahnú tsi. Maa tyin ña tsító ñi nácaa caná tsi tan tsahnú tsi, ²⁸ tyin juvin ñi maa ñuhu jacuahnu itsi. Tsa jihna ñi caná nuu tsi, yaha can tan quitá yoco tsi. Tsa yaha quita yoco tsi, tacan tan tsahá tsi tsiti. ²⁹ Tan tatum tsa tsitsa tsiti tsi, tacan tan jocón ñi itsi tyin tsa tahán maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13.31-32; Lc. 13.18-19)

³⁰ Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. ³¹ Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihi ca tan ñavin ca tandihi ca tsiti tsa iyó nu ñuhu ñayivi. ³² Maa tyin tsa yaha tatsí tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi
(Mt. 13.34-35)

³³ Tacan jacuahá ra Jesús tsi nyivi, tsihin cuaha cuhva, ndihi cuhva cuví cutuñí iñi ñi. ³⁴ Tan tandihi tsaha tsa cahan ra tsihin ñi maa ñi maa tsihin cuhva cahan ra. Maa tyin cahan catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi
(Mt. 8.23-27; Lc. 8.22-25)

³⁵ Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsio miñi.

³⁶ Tacan tan ra Jesús tan ra tsicá tsihin ra nacoq ra naha tsi nyivi tan quihví ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihi juhva nyivi tsi ra naha. ³⁷ Tan quitsahá yihi tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñí cutu yutun ndoo can. ³⁸ Tan ra Jesús canyí ra quixí ra tsa yatin xuu yutun ndoo can, tan nyanaá iin jahma jiñi ra. Jandoto ra naha tsi ra, tan catyí ra naha tsihin ra:

—¡Maestro! ¡a ña jahá un cuenda tyan cuñí nyee yo?

³⁹ Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuii ñi cuví. ⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñí ra naha tsa nyehe ra naha tsa cuví. Tan tsicá tuhun tahan ra naha tan catyí ra naha:

—¿Yoo ra cuví ra ihya? Tyin nda cuanda tatyi tan ndutyá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsí Nu nduvahq iin ra Gadara tsa yihi tatyi ña vaha

(Mt. 8.28-34; Lc. 8.26-39)

¹ Tsaq̄ ra naha inga tsyo miñi nda nu ñuhu cuenda Gadara. ² Tsa quit̄a ra Jesús tsitsi yutun ndoo, tan quit̄a iin ra yihi tatyi ña vaha nu ndaa cumi santu, tan tsaq̄ ra nu nyaá ra. ³ Tan nu ndaa can iyó maa ra can. Tsaañí ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñí ra. ⁴ Cuaha xaan tsaha tsahní nyiví tsaha ra tan ndaha ra tsihin cadena, maa tyin tsaañí cuatyí ra can. Tan yoñi maa cuví cunyee tsi ra. ⁵ Tan tsicá nuu maa ra caná tsaa ra jiñi yucu tan nu ndaa cumi santu tsa tsa cuua tan tsa tsinu cahñi. Tan jañicuehé ra tsi ra tsihin yuu. ⁶ Maa tyin ndi cañi ca quit̄a ra Jesús, tan nyehe ra can tsi ra, tan tsinu xaan ra tsahan̄ ra, tsicuiñi tsit̄i ra nuu ra. ⁷ Tan cana tsaa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaañí yu tsihin un, ña janyehe un tundoho tsi yu.

⁸ Tacañi catyí nu tatyi ña vaha can tsihin ra Jesús tyin tsa yahá cahañ̄ ra tsihin nu tyehen:

—¡Yooho tatyi ña vaha, jaña tsi ra ihya!
—catyí ra.

⁹ Tan ra Jesús tsicá tuhun ra tsi nu, tan catyí ra:

—¿Náa nañí un?

Tan catyí nu tatyi ña vaha can tsihin ra:

—Yuhu nañí yu Legión, tyin cuaha xaan ndi.

¹⁰ Tan caahán ndaañí nu tsihin ra Jesús na ña jacuhun cañi ra tsi nahnu. ¹¹ Yatinyi ñi yucu can yucú cuaha quiní tsatsí tì naha tì. ¹² Tacañi catyí tandihí nahnu tsihin ra Jesús:

—Jacuhun tsi ndi tsitsi quiní nyecú ican, tan cuhva ndatu tsa quihví ndi tsitsi tì naha tì —catyí nahnu.

¹³ Tacañi tan tsahá ra Jesús ndatu tsi nahnu, tan quihví nahnu tsitsi quiní can. Quita nahnu tsi ra can tan quít̄a tumaa uvi mil quiní yucú can. Tsa quihví nahnu tsitsi

tì naha tì, quitsahá tsinú tì naha tì, tan yahá tì naha tì yuhu xahva tan cucoyó tì naha tì tsitsi miñi, tan tsihí tì naha tì tsitsi ndutyá.

¹⁴ Tacañi tan ra jahá cuenda quiní can naha ra, nayuhví xaan ra naha tan tsinú xaan ra naha cuahán ra naha cuanuhú ra naha cuacatý tuhun ra naha tsa cuví can tsihin nyiví ñuu can tan inga ca nyiví tsa taahán ra naha ityí cuhu. Tan tandihí nyiví tsa cahñ̄ ra naha tsihin, tsahan̄ ñi tsinyehe ñi tsa cuví can. ¹⁵ Cuhva tsa tsaq̄ ñi nu nyiví ra Jesús, nayuhví xaan ñi tsa nyehe ñi tsi ra tsa yihi tatyi ña vaha can. Nyá taxin ra, nditsí ra jahma, tan vaha cuñí ra. ¹⁶ Tan tandihí maa nyiví tsa nyehe tsa tahan̄ ra can tan tsa tahan̄ quiní can, catyí tuhun ñi can tsihin inga ca nyiví. ¹⁷ Tacañi tan quitsahá caahán ndaañí ñi tsihin ra Jesús, na ña ndoo ra nu ñuhu ñi.

¹⁸ Tsa tsa cua quihví nyico ra Jesús tsitsi yutun ndoo can, ra tsa yihi tatyi ña vaha can caahán ndaañí ra tsihin ra Jesús na cuhva ra cuhun ra tsihin ra. ¹⁹ Maa tyin ña tsahá ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyiví un, tan catyí tuhun tsihin ñi tandihí tsa javaha Jutu Mañi yo Nyoo tsihin un, tan nácaas cundaahví ñiñi ra tsi un.

²⁰ Tacañi tan cuanuhú ra tan quitsahá catyí tuhun ra tsihin nyiví iyó tandihí ñuu tsa cayucú Decápolis tandihí tsa javaha ra Jesús tsihin ra. Tan iyo xaan cuñí ñi.

Nu nduvahq sehe ra Jairo tan ñaha tsa tiñin jahma ra Jesús

(Mt. 9.18-26; Lc. 8.40-56)

²¹ Tsa tsaq̄ ra Jesús tsihin yutun ndoo nda inga tsyo miñi can, tsaq̄ cuaha nyiví nu tsaq̄ ra. Tan ndoō ra yuhu miñi ican.

²² Tacañi tan tsaq̄ iin ra nyisó tyiñu vehe ñuhu, nañí ra Jairo. Cuhva tsa nyehe ra tsi ra Jesús, tsicuiñí tsit̄i ra nuu ra. ²³ Tan caahán ndaañí ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvahá ña tyin tsa cuñí cuuñi ña ña.

²⁴ Tacañi tan cuahán ra Jesús tsihin ra, tan cuaha xaan nyiví cuahán cuanyicún tsi ra, nda cuanda catyihí tahan̄ ña maa ñi.

²⁵ Tsihin nyiví can cuahán ndihí iin ñaha cuuhví. Ñaha ihya tsa quit̄a maa utsi uvi cuiya ndohó ña cuehe tsa cuún niñí ña.

²⁶ Tan cuaha xaan tundoho nyehe ña tsihin

tsa cuaha doctor. Tandihi xuhun ña janaa ña tsihin ra naha, maa tyin nduve maa náa catyijanaa ña xuhun ña tyin vihi ca nduñihí cuuhvi ña. ²⁷ Tsa tsiñi ña caahán nyiví tyin tsaa ra Jesús, natuhvá ña ityi tsata ra tan tiín ña jahma ra. ²⁸ Tyin tsicá iñi maa ña: “Tatun tiín yu vasu tan jahma ra, cua nduvahaya”. ²⁹ Tsa tiín ña jahma ra iin yaha ñi cutaxin tsaa cuún niñi ña. Tan tuví iñi cuñu ñihu ña tyin tsaa janduvahá ra tsi ña. ³⁰ Tsa tuví iñi ra Jesús tyin nduvahá iin nyiví tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyí ra:

—¿Yóo tiín jahma yu?

³¹ Tacan tan catyí ra tsicá tsihin ra:

—¿Nacuenda tsicá tuhun ca un: yóo tiín jahma un? tan nyehé vaha un tyin cuaha xaan nyiví nyicún tsi un tan tyañu xaan jahá ñi —catyí ra naha tsihin ra.

³² Maa tyin ra Jesús nanyehé ra nanií ñi tyin cuñí ra coto ra yóo tiín jahma ra.

³³ Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvahá ña. Yuuhví ña tan niñi ña tsahan ña tsicatyí tuhun ña tandihi tsaa nditsa tsihin ra. ³⁴ Tan catyí ra Jesús tsihin ña:

—Nduvahá un tyin tsinú iñi un. Na cuhun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsaa nyiví quee yuvehe nu cuahán ra, tan catyí ñi tsihin ra jatsii vehe can, ra nyisó tyañu vehe ñuhu:

—Tsa tsihí ñaha luhlu sehe un. Ña cahan yuhu ca un tan ña jatyañu ca un tsi ra Maestro ihyá —catyí ñi tsihin ra.

³⁶ Maa tyin ra Jesús ña tyaä yahvi ra tsa caahán ñi, tan catyí ra tsihin ra nyisó tyañu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsaha ra cuhun cuaha nyiví tsihin ra. Tan quihin ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. ³⁸ Tsa tsaa ra naha yuvehe ra nyisó tyañu vehe ñuhu, nyehé ra Jesús tyin tsacú xaan nyiví tan caná tsaa ñi. ³⁹ Quihví ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacú xaan ndo? Naha luhlu ihyá quixí ña; ñavin tsihí ña —catyí ra tsihin ñi.

⁴⁰ Maa tyin ña tsinu iñi ñi tan tsacú naaha ñi nyehé ñi tsi ra. Tacan tan tava ra tsi tandihi ñi nuquehe, tan quihin ra tsi jutu ñaha luhlu tsa tsihí can tan sihi ña tan ra tsa tsaa tsihin ra, tan quihví tandihi ñi nu canyí ña. ⁴¹ Tan tiín ra ndaha ña, tan catyí ra tsihin ña:

—Talita cumi —tan cuñí tsi catyí tsi tyehen: Catyí yu tsihin yooho ñaha luhlu, ñduvitá!

⁴² Juvín ñi cuhva can tan nduvitá ña, tan nacaca ña. Utsi uvi cuiya ña. Tan tsa nyehe nyiví tsa iyo tsa javahá ra Jesús, iyo xaan cuñí ñi cuví. ⁴³ Maa tyin ra Jesús ñihi tsaha cuenda ra tsi ñi tyin na ña cahan ñi tsa nyehe ñi tsihin ndi intuhun maa nyiví. Tan tava tyañu ra tsi sihi ña na cuhva ña tsa catsi ña.

6

Nu tsinuhu ra Jesús ñuu Nazaret nu tsahnú ra

(Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhu ra nda ñuu ra. Tan ra tsicá tsihin ra cuahán ndihi ra naha tsihin ra. ² Tan tsa tahán tsi quívi quitatú nyiví, tacan tan cuahán ra naha vehe ñuhu tan quitsaha jacuahá ra Jesús tsi nyivi. Tan cuaha ñi yucú tyaá soho ñi tsa caahán ra. Iyo cuñí ñi tsa tsiní ñi tsa caahán ra, tan catyí ñi:

—¿Numaa tahan cutuhvá ra ihyá tandihi tsa tsitó ra? ¿Yóo tsaha tsa tsiní tuñi iñi ra? ¿Tan nácaa cutuhvá ra javahá ra tsa iyo?

³ Tan ra tahlví yutun cuví ra. Tan sehe ña María cuví ra. Tan yañi ra cuví ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihyá —catyí ñi.

Tan ña cuñí ñi tyaä yahvi ñi tsi ra. ⁴ Maa tyin catyí ra tsihin ñi:

—Tandihi ñi ityi tan jahá tandihi nyiví tsa ñayiví tsi ra cuví ndusu yuhu Nyoo, maa tyin nyiví ñuu ra, tan nyiví ra, tan nyiví vehe ra ña tyaä yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyiví cuuhví, tan janduvahá ra tsi ñi, maa tyin ña cuví javahá ra inga ca tsa iyo. ⁶ Tan iyo cuñí ra tyin ña tsinu iñi ñi tsi ra. Tacan tan cuahán ra cujacuahá ra tsi nyiví iyó tandihi ñi ñuu nyihi tsa cayucú yatin ñi ñuu can.

*Nu jacuhun ra Jesús tsi ra tsicá tsihin ra
cucahan ra naha tuhun Nyoo
(Mt. 10.5-15; Lc. 9.1-6)*

⁷Tsa yahā yacan tan canā ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsahā jacuhún ra uvi uvi ra naha. Tan tsaha ra ndatu tsi ra naha tsa tava ra naha tatyī ūa vaha tsi nyivi. ⁸Tan catyí ra tsihin ra naha tyin ūa cundaha ra naha tsa cundaha ra naha; ndi marali, ndi tsa catsi ra naha, tan ndi xuhun. Nduve náa cundaha ra naha; maa tyin cuví cundaha ra naha yutun ūi. ⁹Tan cunyaa nditsan tsaha ra naha. Tan ūa cundaha ra naha inga nditsi jahma, na cuhun ra naha tsihin cuhva nditsi ūi maa ra naha. ¹⁰Tan catyí ra tsihin ra naha:

—Cuhva tsa tsaa ndo iin ūuu, quihvī ndo iin vehe, tan ndoqo ndo ican nda cuanda quita ndo ūuu can. ¹¹Tan tatum tsaa ndo iin ūuu tan ūa naquihin cuenda nyivi iyó ūuu can tsi ndo, tan ūa cuñi ūi tyaa soho ūi tsa cua cahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyī ūi siqui ūi. Tsa nditsa catyí yu tsihin ndo, tyin quivī cua tatsi tuñi Nyoo tsi nyivi, ūhi ca cua tatsi tuñi ra tsi ūi can tan ūavin ca nyivi ūuu Sodoma tan ūuu Gomorra —catyí ra Jesús tsihin ra naha.

¹²Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ūi cuatyī ūi, tan na nanducu ūi tsi Nyoo. ¹³Tan cuaha ūi nyivi tava ra naha tatyī ūa vaha. Tan tyihī ra naha acetye tsi nyivi cuuhvī tan nduvahā ūi.

*Nu tsahá cuenda tsi nácaa tsihī ra Juan, ra jacoondutyā tsi nyivi
(Mt. 14.1-12; Lc. 9.7-9)*

¹⁴Ra rey Herodes tsító ra tsa javahá ra Jesús tyin tandihí nyivi tan caahán ūi tsa javahá ra, tan tsicá iñi ra tyehen:

—Ra ihyá cuví rā Juan, ra jacoondutyā tsi nyivi, ra tsa tsihī. Vityin nandoto ra. Juvín ra cuví can, yacan cuenda iyó tunyee iñi tsi ra —cuñi ra Herodes, tsicá iñi ra.

¹⁵Yihī nyivi catyí ūi:

—Ra Elás, ra cuví ndusu yuhu Nyoo tahān tsanaha, cuví ra.

Tan catyí tucu inga ūi:

—Ndusu yuhu Nyoo cuví ra, tumaa ra tsicoq tahān tsanaha naha ra —catyí ūi.

¹⁶Tsa tsinjí ra Herodes tandihí tsa caahán nyivi, tan catyí ra:

—Ra ihyá cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

¹⁷Tacan catyí ra tyin juvin ūi maa ra tava tyiñu na tyihi ra naha tsi ra Juan vehe caa tan cuhīi ra naha tsi ra tsihin carena. Tacan javaha ra Herodes tsihin ra Juan tsacatyī ūi Herodías tsa cuví ūasihīi ra Felipe yañi ra. Ra Herodes quihīi ra tsi ūi Herodías tyin cuví ūi ūasihīi ra ¹⁸Tan tsa tacan javahā ra, catyī ra Juan tsihin ra tyin ūa vaha tsa quihīi ra tsi ūi Herodías tyin ūasihīi yañi ra cuví ūi.

¹⁹Yacan cuenda ndasí cuñi ūi Herodías nyehé ūi tsi ra Juan. Cuñi ūi cahñi ūi tsi ra, maa tyin ūa cuví, ²⁰tyin ūi tsahá ra Herodes tyin tsító ra tyin ra vaha cuví ra Juan tan cuítí iyó ra nuu Nyoo, tan yuuhvī ra Herodes tsi ra. Yacan cuenda jahá cuenda vaha ra tsi ra. Vasu ndi maa ūa cutuñi iñi ra Herodes tandihí tsa caahán ra Juan, maa tyin vaha cuñi ra tyaá soho ra tsa caahán ra. ²¹Maa tyin tsa tahān tsi quivī cacu ra Herodes javahā ra iin vico. Tan canā ra tsi ra cumí tyiñu naha ra, tan ra yihī ndaha andaru naha ra, tan nyivi cuca tsa iyó ityi Galilea. Quivī ihyá tsicán ūi Herodías tsa cuñi ūi tsi ra Herodes. ²²Tyin ūaha sehe ūi tsahán ūi tsicuañi ūi yaa nu iyó vico ra Herodes. Tan tahān xaan iñi ra Herodes tan ra nyecú cuxiñi tsihin ra cuhva tsaañi ūi. Tacan tan catyí ra Herodes tsihin ūi:

—Ndacan tsi yu náa cuñi maa un. Náa tahān ūi maa tsi cua ndacan un tsi yu cua cuhva maa yu can tsi un. ²³Tsító maa Nyoo tyin cua cuhva yu tsa cua ndacan un. Tun ndacan un sava ūuhu tsa ndacá ūaha yu, cua cuhva yu can tsi un —catyí ra tsihin ūi.

²⁴Tacan tan quita ūi, cuahán ūi cuandacá tuhun ūi tsi sihi ūi tan catyí ūi:

—¿Náa ndacan yu tsi ra?

Tan catyí sihi ūi:

—Ndacan jiñi ra Juan, ra jacoondutyā tsi nyivi tsi ra —catyí ūi.

²⁵Tacan tan numi ūi quihvī nyico ūaha tyuavaa can nu nyií ra rey Herodes, tan catyí ūi tsihin ra:

—Cuñi yu jiñi ra Juan, ra jacoondutyā tsi nyivi. Cähnya jucun ra tan tinyii un jiñi ra

nuu iin coho, cuhva un tsí yu vityin vityin
ñi —catyí ñia tsihin ra.

²⁶ Tacan tan cuihyla xaan cuñí ra rey can cuví. Maa tyin tsa cuenda tsa cahan ra tyin cua cuhva maa ra tsa cua ndacan ña, ña cuñí ra jandaví ñaha ra tsí ña tyin tandihí maa nyiví yucú vico can tan tsíñi ñi tsa cahan ra, yacan cuenda tsaha ra tsa tsican ña. ²⁷ Numi ñi tava tyíñu ra rey can tsí iin andaru na cuquihin ra jiñi ra Juan. ²⁸ Tsahan andaru can tsitsi vehe caa, tan tsahnya ra jucun ra Juan. Tan tsindaca ra jiñi ra Juan tsi ñaha tyuvaan can, nyíí tsí nu iin coho. Tan nacuhva cuenda ña can tsí sihi ña.

²⁹ Tsa tsito ra nyicún tsí ra Juan tsa cuví, tsahan ra naha tsiquihín ra naha cuñu ñuhu ra, tan tsicutsi ra naha can.

Nu jacatsí ra Jesús uhun mil rayíí
(Mt. 14.13-21; Lc. 9.10-17; Jn. 6.1-14)

³⁰ Tsa yahá yacan tan ndu iñi ra tsicá tyíñu ra Jesús tsihin ra, tan catyí tuhun ra naha tsihin ra tandihí tsa javahá ra naha, tan tsa jacuahá ra naha nu tsahan ra naha tsicahán ra naha tuhun Nyoo tsihin nyiví. ³¹ Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahán tan vatsí, tan ndi ña cuyattyí ra naha catsi ra naha jahá ñi. ³² Tacan tan quihví ra Jesús tsihin ra naha tsitsi iin yutun ndoo tan cuahán ra naha iin nu taxin caa. ³³ Maa tyin cuaha xaan nyivi nyehé ñi cuahán ra naha. Tan nacotó ñi tsí ra Jesús. Tacan tan cuahán ñi tsihin tsaha ñi, quita ñi tandihí ñi ñuu tan jihna ca ñi tsaa ñu cua tsaa ra Jesús. ³⁴ Cuhva tsa tsaa ra naha, quita ra Jesús tsitsi yutun ndoo tan nyehé ra tyin cuaha xaan nyivi yucú ican. Tan cundaahví iñi ra nyehé ra tsí ñi, tyin yucú ñi tumaa tsiyucú mbee tun nduve ra jahá cuenda tsi ti naha tì. Tacan tan quitsaha jacuahá ra cuaha xaan tuhun vaha tsí ñi. ³⁵ Tsa tsa cua cuiso ñicanyii, tan natuhvá ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyiví iyó yatin ñi ihyá. ³⁶ Vaha ca jacunuhi un tsi nyivi tyin ihyá nduve tsa catsi ñi. Tan na cujata ñi paan catsi ñi vehe tsa iyó tsitsi cuhu ihyá tan ñuu tsa cayucú yatin ñi —catyí ra naha tsihin ra.

³⁷ Maa tyin nacahan ra Jesús, tan catyí ra:

—Cuhva nyoho tsa catsi ñi.

Tacan tan nacahan ra naha tan catyí ra naha:

—Vasu ndi maa jaha tyíñu ndi iñu yoo, ña cua ñihí ndi xuhun jata ndi paan catsi tandihí nyiví ihyá.

³⁸ Tan catyí ra Jesús tsihin ra naha:

—Nyehe jihna ndo najava paan ndahá ndo —catyí ra.

Cuhva tsa tsito ra naha najava paan ndahá ra naha, tacan tan tsicahán ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyiví na cun-

yece ñi nu cuhu can. ⁴⁰ Tan tsinyecu cuenda cientu tan cuenda uvi xico utsi ñi tsa iin cuhva tsinyecu ñi. ⁴¹ Tacan tan quihín ra Jesús tsa uhun paan can tan nduvi tyaca can. Tan nanyehe ndaa ra ityi siquí, tan nacuhvá ra tyahví nyoo tsi Nyoo, tsa yahá tan tsahnu cuatyí ra paan can, tan tsaha ra can tsi ra tsicá tsihin ra tyin tsatsa ra naha can tsi nyiví. Tsa ndihí tsatsa ra naha paan can, tan tsatsa ndihí ra naha tyaca. ⁴² Tsatsi tandihí ñi tan ndahá iñi ñi. ⁴³ Tan jacutu ra naha utsi uvi tyica tsihin paan tan tyaca tsa ndoo. ⁴⁴ Tan uhun mil rayíí tsatsi paan can.

Nu tsicá ra Jesús nu ndutya
(Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhi ra tsi nyivi yuvehe ñi. ⁴⁶ Tsa yahá cuanuhu nyiví, tacan tan cuahán ra Jesús cuandacán tahví ra tsi Nyoo iin jiñi yucu. ⁴⁷ Tsa tsa cuñí cuaa, yutun ndoo nu cuahán ra tsicá tsihin ra Jesús tsa cuahán can nda mahruí miñi, tan maa ra ndi nyíí ra yuhu miñi can. ⁴⁸ Tan tsa nyehé ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñí tuvi, nyicún tsicá nyicún tsicá ñi ra tsi ra naha. Tan tsa cua yaha tsivo ra nu cuahán ra naha. ⁴⁹ Maa tyin tsa nyehé ra naha tsicá ra nu ndutya, tsicá iñi ra naha tyin tatyí cuví ra, tacan tan quitsaha caná tsa ra naha ⁵⁰ tyin tandihí ra naha nyehé ra naha tsi ra tan nayuhví ra naha. Maa tyin nacahan ra tan catyí ra tsihin ra naha:

—Ña nayuhví ndo tyin maa yu cuví!

⁵¹ Tacan tan quīhví ra tsitsi yutun ndoo nu yucú ra naha, tan tsa yaha quīhví ra, in yaha ñi cutaxín tatyí can. Tan iyo xaan cuñí ra naha cuví ⁵² tyin ñaha ca cutuñi iñi ra naha tsa iyo tsa javahá ra tsihin paan, tyin ndi ndava añima ra naha.

*Nu janduvahá ra Jesús nyíví cuuhví tsa iyó nduhva tsa nañí Genesaret
(Mt. 14.34-36)*

⁵³ Yahá sava ra naha nu miñi can tan tsaa ra naha Genesaret inga tsiyo yuhu miñi can, tan tsahní ra naha yutun ndoo can yatyin ñi yuhu ndutýa. ⁵⁴ Cuhva tsa quitá ñi ra naha tsitsi yutun ndoo can, tan nacoto nyíví tsi ra Jesús. ⁵⁵ Tacan tan tsinú xaan ñi cuahán ñi cuajacotó ñi tsi nyíví iyó naní cahnu ityi can tyin tsaa ra Jesús. Tan tsaa cuaha nyíví quee tandíhi ñi ñuu nu nyíví ra, tan yucú nyíví cuuhví nu tsító tsaa tsihin ñi.

⁵⁶ Tan tandíhi ñi ityi nu cuahán ra tsitsi ñuu nyihi o tsitsi ñuu nahnu, o tsitsi cuhu, tsaquín nyíví nyíví cuuhví yuhu ityi. Tan caahán ndaahvi ñi tsihin ra na cuhva ra tiñi ñi cuuhví can vasu tan yuhu jahma ra tan nduvaha ñi. Tan tandíhi maa nyíví tsa tiñi jahma ra nduvahá ñi.

7

Tsa jatíví tsi nyíví nu Nyoo

(Mt. 15.1-20)

¹ Tacan tan tsaa juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyíra Jesús. ² Ra ihyá naha ra nyehe ra naha tyin juhva ra tsicá tsihin ra Jesús ña nacatyá ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahá ra can naha ra. ³ Tyin ra fariseo naha ra javahá ra naha tumaa catyí costumbre tsii tsahnu ra naha tacan tucu ñi tandíhi ca nyíví Israel ñia cuví catsi ñi tun ñia nacatyá ñi ndaha ñi cuaha tsaha tumaa iyó maa ñi.

⁴ Tan tatuń ña nacatyá ñi ndaha ñi tsa tsaa ñi quee ñi nuyahvi, ñia cuvi catsi ñi. Iyó cuaha ca costumbre tsa tuhvá ñi javahá tumaa tsa nacatyá ñi vasu, jarra, tan tandíhi ndaha tyiñu tsa tsinú tsihin caa tsa iyó tsi ñi tan nda cuanda cama ñi. ⁵ Tacan tan tsicá tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoq tsii tsahnu yo naha ra? Tyin ña nacatyá jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

“Tan nacahanára Jesús, tan catyí ra:

—Nditsa tsa cahan ra Isaías, ra cuvi ndusu yuhu Nyoo tuhun nyoho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyíví ihyá jacahnú ñi tsi yu tsihin yuhu ñi. Maa tyin ñavin tsihin tsa ñi iñi añima ñi.

⁷ Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyíví jacuahá ñi tan ñavin tuhun yu jacuahá ñi, catyí ra Isaías tuhun ndo jahá Nyoo, catyí ra Jesús tsihin ra naha.

⁸ Tyin nyoho nacoq ndo cuhva caahán Nyoo, tan nyicún ndo cuhva caahán nyíví ñi, tumaa tuhvá ndo nacatyá ndaha tyiñu ndo, tan inga ca tsa tuhvá ndo javahá.

⁹ Nyoho tyaá tsiyo ndo tuhun caahán Nyoo, tacan tan javahá ndo tuhun tsahnu tsa nacoq tsii tsahnu ndo. ¹⁰ Tyin catyí ley Nyoo tsa tyaá ra Moisés: “Tyaa yahvi ndo tsi jutu ndo tan tsi sihi ndo, tyin tandíhi nyíví tsa cua cahan ndavaha ñi tsi jutu o tsi sihi, cua cíu ñi” catyí ley Nyoo tsa tyaá ra Moisés. ¹¹ Maa tyin nyoho catyí ndo tyin cuví catyí iin nyivi tsihin jutu ñi o sihi ñi tyehen: “Ña cuvi jatyinyee yu tsi un tyin tandíhi tsa iyó tsi yu cuví tsi Corbán.” (Tuhun ihyá cuñí tsi catyí: “Tsa ndihi can tsaha cuenda yu tsi Nyoo.”) ¹² Tan tatuń catyí nyíví tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo. ¹³ Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴ Tacan tan cana nyico ra Jesús tsi nyivi tan catyí ra tsihin ñi:

—Tyaa soho vaha tandíhi ndo tsa cua cahan yu, tan nducu ndo cuhva cutuñi iñi ndo. ¹⁵ Tsa quíhví yuhu nyíví, ñia cuví jatíví tsi tsi ñi. Tsa jatíví tsi ñi cuví tsa quitá añima ñi. ¹⁶ Nyoho tsa iyó soho, tyaa soho ndo tsa caahán yu —catyí ra Jesús tsihin ñi.

¹⁷ Tsa yahá nacoo ra Jesús tsi nyivi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahán ra. ¹⁸ Tan catyí ra tsihin ra naha:

—¿A ndi nyoho tan ña cutuñí iñi ndo?

¿A ña tsító ndo tyin tsa quihví tsitsi yo ña cuví jatívi tsi tsi yo? ¹⁹ Tyin tsitsi yo quihví tsi tan ñavin añima yo. Yaha can tan quitá tsi tsitsi cuñú ñuhu yo —catyí ra Jesús.

Tsihin tsehe janahá ra tyin tandíhi nyayu tan vaha catsi yo itsi. ²⁰ Tan catyí tucu ra:

—Tsa quitá añima nyivi, yacan jatívi tsi ñi. ²¹ Tyin tsa caquiñi tsa tsicá iñi ñi tsitsi añima ñi quitá can, tacan tan rayii cuñí ra coo inga ñaha tsi ra, o ñiñaha cuñí ñi coo inga rayii tsi ñi. Yihí ra tsicoó ra tsihin inga ñaha tan ña tindahá ra tsihin ña. Yihí rayii tsicoó ra tsihin ra ndusíhi. Tan yihí ñiñaha tsicoó ñi tsihin ñi nduyí. Tan yihí ñi cuñí ñi cahñi ñi nyivi, ²² o cuñí ñi suhu ñi. Yihí ñi cuñí ñi coo tsa tsii inga nyivi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. ²³ Tandihi tsa ña vaha ihyá, quitá can tsitsi añima nyivi, tan jatívi can tsi ñi —catyí ra Jesús tsihin ra naha.

*Nu tsinu iñi iñi ñaha inga ñuu tsi ra Jesús
(Mt. 15.21-28)*

²⁴ Tsa yahá yacan tan quitá ra Jesús ñuu can, tan cuahán ra ñuhu nu canyií ñuu Tiro tan ñuu Sidón. Tsa tsaa ra ican, quihví xeehe ra tsitsi iñi vehe tyin ña cuñí ra coto nyivi numaa nyií ra. Maa tyin ña cuví cunyí xeehe ra ²⁵ tyin yatyí xaan tsito sihi iñi ñaha tuyuva tsa yihí tatyí ña vaha nu nyií ra. Tacan tan cuahán ña nu nyií ra. Tsa tsaa ña tan tsicuiñi tsiti ña nuu ra. ²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaa ña nu nyií ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. ²⁷ Maa tyin catyí ra Jesús tsihin ña:

—Ña cahán yuhu ca un; na catsi jihna nyivi Israel, ñi cuví sehe Nyoo, tyin ña vaha quihin nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú tì tan tsatsí tì titsehe tsa cucoyó xuu mesa jahá sehe tsitoho tì —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quita tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaa ña yuvehe ña, canyií taxin sehe ña nu cama, tyin tsa yahá quita tatyí ña vaha tsi ña.

Nu janduvahá ra Jesús tsi ra soho tan ñiihi

³¹ Quita nyico ra Jesús ñuhu nu canyií ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaa ra miñi Galilea. ³² Tsa tsaa ra Jesús ican, tsahan nyivi tsindaca ñi iñi ra soho tsa ña cuví cahán nu nyií ra. Cahán ndaahvi ñi tsihin ra na tyiso ra ndaha ra jiñi ra can. ³³ Tacan tan quihín ra tsi ra can cuahán tsyo tsihin ra nu nduve nyivi. Tan tyaxin ra nundaha ra tsitsi soho ra can, tan tiví sii ra, tan tiñi ra nu yaa ra can. ³⁴ Tacan tan nanyehé ndaa ra ityi andivi. Tan ixta tatyí ra, tan catyí ra:

—¡Efata! —tan tuhun ihyá cuñí tsi catyí:
¡Nuña!

³⁵ Tan tsihin can nuñä soho ra can, tan nduvahá yaa ra, tan cuví nacahan ra. ³⁶ Tan catyí ra Jesús tsihin ñi tyin ña cahán ñi can tsihin nyivi, maa tyin vasu ndi maa caahán ra tacan tsihin ñi, cuñihí ca ñi caahán ñi tsai jahahá ra. ³⁷ Iyo cuñí ñi tan catyí ñi:

—Tandihi tsa javahá ra tan vaha javahá ra itsi. Nyivi soho nacuñí ñi jahá ra tan nyivi ñiihi nacahan ñi.

8

*Nu tsahá ra Jesús tsa catsi cumi mil nyivi
(Mt. 15.32-39)*

¹ Quiví can nataca cuaha nyico nyivi nu nyií ra Jesús. Tan nduve maa tsa catsi ñi iyó. Tacan tan cana ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñí yu nyehé yu nyivi ihyá, tyin tsa uñi quiví yucú ñi tsihin yo, tan nduve ca tsa catsi ñi. ³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cúu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

⁴Tan nacahan ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyíví ihya, tan nduve nyíví iyó ihya tan xico ní tsa catsi yo?

⁵Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ní.

⁶Tacan tan catyí ra tsihin nyíví na cunyecu ní nu ñuhu. Tsa yaha cahan ra yacan, tacan tan quihín ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnú cuatyí ra can tan tsaha ra can tsi ra tsicá tsihin ra, tyin tsatsa ra naha can tsi nyíví. ⁷Tan ndahá tucu ra naha juhva tyaca nyihi. Tsaha ndihí ra Jesús tyahvi nyoo tsi Nyoo tsa cuenda can, tacan tan tsaha ra can tsi ra naha tyin tsatsa ra naha tsi nyíví. ⁸Tandihi ní tsatsi ní, tan ndahá vaha iñi ní. Tsa ndihí tsatsi ní tan jacutu ra naha utsa tyica tsihin tsa ndoo. ⁹Tan quita maa cumi mil nyíví jacatsi ra. Yaha can tan jacunuñu ra tsi ní. ¹⁰Tsa yaha cuanuhu ní, tacan tan quihví ra tsihin ra tsicá tsihin ra tsitsi iñin yutun ndoo. Tan cuahán ra naha ityi Dalmanuta.

Nu tsicán ra fariseo naha ra tsi ra Jesús tyin jahava ra iñin tsa iyo

(Mt. 16.1-4; Lc. 12.54-56)

¹¹Tsaqá ra fariseo naha ra nu nyíi ra Jesús, tan quitsaha caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsi tsi ra, yacan cuenda catyí ra naha tsihin ra tyin jahava ra iñin tsa iyo nyehe ra naha. ¹²Tacan tan ra Jesús níhi xaan ixta tatyí ra, tan catyí ra:

—¿Nacuenda tyin tsicán nyíví iyó vityin tsa iyo? Tsa nditsa catyí yu tsihin ndo tyin ná cuu nyehé ndo ndi intuhun tsa iyo —catyí ra tsihin ra naha.

¹³Tacan tan nacoo ra tsi ra naha, tan quihví nyíco ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya

(Mt. 16.5-12)

¹⁴Ra tsicá tsihin ra Jesús naqá iñi ra naha cundha ra naha tsa catsi ra naha. Tan intuhun ní paan ndahá ra naha yucú ra naha tsitsi yutun ndoo can. ¹⁵Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

¹⁶Tan ra tsicá tsihin ra quitsaha natuhún tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

¹⁷Tsa tuví iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo?

—¿Nacuenda ndi ndava xaan añima ndo?

¹⁸Nyecú tinuu ndo, tan ná nyehé ndo. Nyecú soho ndo, tan ná tsisí ndo. ¿A ná nducuhún iñi ndo tsa jahava yu ¹⁹quíví tsa jacatsi yu uhun mil rayí tsihin uhun taahan ní paan? ¿A ná ñuhú iñi ndo najava tyica jacutu ndo tsihin tsa ndoo? —catyí ra Jesús, tsicá tuhun ra tsi ra tsicá tsihin ra.

Nacahan ra naha tan catyí ra naha:

—Utsi uvi tyica.

²⁰Tan catyí nyico ra Jesús tsihin ra naha:

—Tan quíví jacatsi yu cumi mil nyíví tsihin utsa taahan ní paan, ¿najava tyica jacutu ndo tsihin tsa ndoo?

Nacahan ra naha tan catyí ra naha:

—Utsa taahan tyica.

²¹Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvahá ra Jesús iñin ra cuua nda ñuu Betsaida

²²Tsa yahá yacan tan cuahán ra Jesús tsihin ra tsicá tsihin ra nda ñuu Betsaida. Tsa tsaqá ra naha ican, tsindacá nyíví ñuu can iñin ra cuua nu yucú ra naha. Tan cahan ndaahvi ní tsihin ra Jesús tyin tiñin ra tsi ra cuua can tan janduvahá ra tsi ra. ²³Tacan tan tiñin ra ndaha ra cuua can, tan quihín ra tsi ra cuahán tsihin ra ityi tsata ñuu. Tyaa sií ra nu ndaha ra tan tiñin ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu.

²⁴Ra cuua can nanyehe ra tan catyí ra:

—Nyehé yu juhva nyíví, tan caá ní tumaa caá yutun, maa tyin tsicá ní —catyí ra.

²⁵Tacan tan tiñin nyico ra Jesús tinuu ra inga tsaha, tan nanyehe vaha ra tan nduvahá ra. Nanyehe catsi vaha ra tandihí tsa iyo.

²⁶Tacan tan jacunuñu ra Jesús tsi ra yuvehe ra, tan catyí ra tsihin ra:

—Ña quihví un tsitsi ñuu ihyá tan ña nacatyí tuhun tsehe tsihin nyiví —catyí ra Jesús tsihin ra.

Nu cahgán ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yahá can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javahá ra Felipe. Tsitsi tsahána, tan tsicá tuhun ra Jesús tsihin ra naha, tan catyí ra:

—¿Náa caahán nyiví tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahán ra naha tan catyí ra naha:

—Yíhi nyiví catyí ñi tyin ra Juan, ra jacoondutya tsi nyivi, cuví un. Inga ñi catyí ñi tyin ra Elías. Yíhi ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicá tuhun ra tsi maa ra naha, tan catyí ra:

—Tan nyoho, ¿yóo ra cuví yu, cuñi ndo?

Tan nacahán ra Pedro tsihin ra:

—Yoho cuví ra Cristo, ra jacacú tsi nyivi.

³⁰ Maa tyin cahan ra Jesús tsihin tandihí ra naha tyin ña cahan ra naha can tsihin ndi intuhun maa nyiví.

Nu cahgán ra Jesús tyin cua cíu ra

(Mt. 16.21-28; Lc. 9.22-27)

³¹ Tacan tan quitsaha jacuahá ra tyin Rayii tsa quee nda gloria cua nyehe xaan ra tun-doho. Tan ña cua tsinu iñi ra mandoñi naha ra tan ra jutu cuví ityi nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cañni nyiví tsi ra maa tyin cua nandoto ra tsa tsinu uñi quivi. ³² Tacan cahan catsi ra tsihin ra naha. Tacan tan quihin ra Pedro tsi ra cuahán tsihin ra tsata vehe tan quitsaha caahán ra tsihin ra Jesús tyin ña vaha tsa cahan ra. ³³ Maa tyin ra Jesús nanyico coo ra, tan nanyehe ra nu nyecú inga ra tsicá tsihin ra. Tan quitsaha caahán ra tsihin ra Pedro, tan catyí ra:

—¡Cuatsiyo nuu yu ihyá, cuihna! Tyin yooho ña tsicá iñi un tumaa tsicá iñi Nyoo, tyin tsicá iñi un tumaa tsicá iñi nyiví —catyí ra Jesús tsihin ra Pedro.

³⁴ Tacan tan cana ra Jesús tsi nyivi tan tsi ra tsicá tsihin ra tan catyí ra:

—Tatun ndáa nyoho cuñi cunyicun tsi yu, cahnya iñi ndo nacoo ndo tsa cuñi maa ndo javaha ndo, tyin tacan tan cuvi javaha ndo cuhva cuñi Nyoo. Tan ña cua ndu uvi iñi ndo tsa yihí ndo cuenda yu, vasu ndi maa tandihí quivi nyehé ndo tundoho tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu.

³⁵ Tyin nyoho tsa ña cuñi nyehé tundoho tan cuhva ndo ñayiví ndo tsa cuenda yu, cua nyehé ndo tundoho anyaya. Maa tyin nyoho tsa cua cuhva ñayiví tsa cuenda yu tan tsa cuenda tuhun Nyoo, cua cacu ndo.

³⁶ Tyin nduve yahvi nyaá cua ñihi ndo tandihí tsa iyó nu ñuhu ñayiví ihyá tun ña cua cacu añima ndo. ³⁷ Tyin nduve maa náa tsihin tyahvi ndo tan cuvi cacu añima ndo tan ña cunaat tsi. ³⁸ Tyin nyiví cua nducahan nuu tsa cuenda yu tan tsa cuenda tuhun caahán yu quivi cahan ñi tsihin nyiví caquiñi tsa ña tyá yahvi tuhun Nyoo, yuhu Rayii tsa quee nda gloria cua nducahan nuu yu nyehé yu tsi ñi quivi quitsi yu tsihin ángel cuenda Nyoo Jutu yu tan tsihin tsa sií caá ra.

9

¹ Tan tsa nditsa catyí yu tsihin ndo, tyin yihí nyoho tsa yucú ihyá vityin, cua nyehé ndo nácaa ndacá ñaha Nyoo tsihin tunyee iñi ra tsa ndi cumañi ca cíu ndo.

Nu nyehé uñi ra tsicá tsihin ra Jesús nu nasama cuhva caá ra

(Mt. 17.1-13; Lc. 9.28-36)

² Tsa yahá iñu quivi, tacan tan quihin ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasama cuhva caá ra tan nyehe ra yucu tsihin ra can. ³ Xíñu xaan tan cuitsin xaan jahma ra cuví tumaa cuitsin vico. Ndi intuhun maa nyiví iyó nu ñuhu ñayiví ihyá tan ña cuví janducuitsin ñi jahma tumaa cuitsin jahma ra. ⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra. ⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihyá! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro.

⁶ Cahan ra tacan tyin ña tsító ra náa cahan ra tyin maa ra tan ra yucú tsihin ra nayuhví xaan ra naha.

⁷Tacan tan nuu iin vico siqui ra naha tan tyasi tsi ts'i ra naha. Tan tsitsi vico can nacahan iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyaa yahvi ndo tsa caahán ra —catyí ndusu can.

⁸Tan cuhva tsa nanyehé ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahan naha ra naha tsa nyehé ra naha. Cuví cahan maa ra naha can nda yaha nandoto Rayii quee nda gloria, tan rayii can cuví maa ra. ¹⁰Yacan cuenda ña cahan maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra.

¹¹Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayivi ihya inga tsaha?

¹²Tan nacahan ra, tan catyí ra:

—Nditsa tyin jihna ca ra Elías taahán tsi quitsi tsa ndi cumaño ca quitsi yuhu tyin janduvaha ra tandíhi. ¿Tan náa catyí tuhun Nyoo cuenda yuhu Rayii quee nda gloria? Catyí tsi tyin cua nyehé yu tundoho, tan ña cua cuñi nyivi nyehé ñi tsi yu. ¹³Maa tyin yuhu catyí yu tsihin ndo tyin tsa yahá quitsi ra Elías. Tan nyivi javahá ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvahq ra Jesús iin ra tyuvaas tsa yihí tatyí ña vaha

(Mt. 17.14-21; Lc. 9.37-43)

¹⁴Tsa yahá yacan tan cuahán ra naha nu yucú tandíhi ca ra tsicá tsihin ra naha. Tsa tsaa ra naha ican, nyehé ra naha tyin yucú cuha nyivi naníi canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. ¹⁵Tsa nyehé nyivi can tsi ra Jesús, iyo xaan cuñi tandíhi ñi cuvi. Tacan tan tsahán ñi nu nyaá ra tsicuhvá ñi nacumi tsi ra. ¹⁶Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷Tacan tan nacahan iin ra tsa nyaá tyañu tandíhi nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñiñihí ra jahá nu. ¹⁸Tyin tandíhi ñi nu tiñiñ tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yahá cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹Nacahan ra Jesús tan catyí ra:

—¡Nyoooh noyivi ña tsinú iñi tan caquñi! ¿Ndáa nda quivi cua cunyiyu tsihin ndo? ¿Tan najava ca quivi cua cunyee iñi yu nyehé yu tsi ndo tyin ña tsinú vaha iñi ndo tsi yu? Ndaca ndo tsi ra luhlu can tsi yu ihya —catyí ra.

²⁰Tacan tan tsindacá jutu ra luhlu can tsi ra tsi ra Jesús. Tan cuhva tsa nyehé nu tatyí ña vaha can tsi ra Jesús, janduvá nu tsi ra luhlu can tan quitsaha tsicó tuvi ra nu ñuhu jahá nu. Tan quita tiñuu yuhu ra. ²¹Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsaha taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra. ²²Tan cuaha tsaha tyihí tatyí ña vaha can tsi ra nu cayú ñuhu, tan nu ndutya. Cuñi nu cahñi nu tsi ra. Maa tyin tun cuví javaha un náa javaha un tsihin ra, cundaahvi iñi tsi ndi, tan jatinyee tsi ndi —catyí jutu ra luhlu can tsihin ra Jesús.

²³Tan catyí ra Jesús tsihin ra:

—Tun tsinú iñi un, tandíhi tan cua cuvi tyin tsa cuenda ra tsa tsinú iñi tandíhi tan cuví —catyí ra Jesús.

²⁴Tacan tan cana tsaa jutu ra tan catyí ra tsihin ra Jesús:

—¡Tsinú iñi yu! ¡Jatinyee tsi yu na tsinú ca iñi yu! —catyí ra tsihin ra.

²⁵Cuhva tsa nyehé ra Jesús tyin cuaha nyivi ndu iñi nu nyaá ra, tacan tan tava ra tatyí ña vaha can, tan catyí ra tsihin nu:

—Yoho tatyí ña vaha tsa janduñiñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quíhví ca un tsi ra —catyí ra Jesús tsihin nu tatyí ña vaha can.

²⁶Tacan tan quiñi xaan cana tsaa nu tatyí can tan janduvá nu tsi ra inga tsaha, tan

quitā nu tsi ra. Tan jacúu naaha nu tsi ra. Tan cuñí maa nyíví tyin tsa tsihí ra.²⁷ Maa tyin ra Jesús tiñ̄n ra ndaha ra luhlu can, tan cañihí ra tsi ra, tan tsinyaa nyityi ra.

²⁸ Tacan tan quihví ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

Nu cahān ra Jesús inga tsaha tyin cua cahñí nyíví tsi ra

(Mt. 17.22-23; Lc. 9.43-45)

³⁰ Quivi tsa quitā ra Jesús ican, tan ra tsicá tsihin ra yahá ra naha ñuhú Galilea. Tan ña cuñí ra Jesús tsa coto nyíví iyó ican tyin nyíf ra nu iyó ñí. ³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayíi tsa quee nda gloria cua nacuhva cuenda nyíví tsi yu tsi ra xaan iñí tsi yu. Tan cua cahñí ra naha tsi yu. Maa tyin cua nandoto yu tsa tsinu uñí quivi.³² Maa tyin ra ican naha ra ña cutuñí iñí ra naha tsa caahán ra tsihin ra naha. Tan ña cuñí ra naha ndaca tuhun ra naha tsi ra tyin yuuvhí ra naha.

Nu janahá ra Jesús yóo ra cahnu ca cuví tsitsi tsa tandíhi nyíví tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaā ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicá tuhun ra.

³⁴ Tsa cahán ra Jesús tacan, taxin ña cuví ra naha, tyin ityi vatsí ra naha natuhun ra naha yóo ra cahnu ca cuví tsa nuu tandíhi ra naha.³⁵ Tacan tan tsinyaā ra Jesús tan canā ra tsi tandíhi tsa utsi uvi ra tsicá tsihin ra, tan catyí ra tsihin ra naha:

—Nyoho tsa cuñí cuví ityi nuu, cuñí tsi cuví ndo nda nu ndihí ña tsa nuu tandíhi ndo, tan jatyinyee ndo tsi tandíhi nyíví —catyí ra Jesús tsihin ra naha.

³⁶ Tacan tan quihín ra iin ra luhlu tyaā ra mahñú ra naha. Tan tyihí jucun ndaha ra tsi ra luhlu can, tan catyí ra

³⁷ —Nyíví naquihin iin nyíví tumaa ra luhlu ihya, yuhu naquihin cuenda ñí. Tyin naquihin cuenda ñí tsi ñí tsa cuenda tsa cuñí ñí tsi yu. Tan nyíví naquihin cuenda tsi yuhu, naquihin cuenda tucu ñí tsi ra tsa jaquitsi tsi yu tan ñavin maa ñí maa yu naquihin cuenda ñí.

Nyíví tsa ña cuxaán tsi yo, juvin ñí ican jatyinyé tsi yo

(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús:

—Maestro, nyehé ndi iin ra tavá tatyí ña vaha tsi nyíví tsihin siví un. Maa tyin tyasi ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

³⁹ Maa tyin catyí ra Jesús tsihin ra:

—Ña casí ndo nu javaha nyíví tacan. Tyin ndi intuhun ñí tsa javaha tsa iyo tsihin siví yu tan ña cua cana iñí ñí cahan ñí ndavaha ñí tsi yu.⁴⁰ Tyin nyíví tsa ña xaan iñí tsi yo, tsihin yo cutahán ñí.⁴¹ Tan nyíví tsa cua cuhva vasu tan iin yatsin ndutya coho ndo tyin tsinú iñí ndo tsi yu, cua cuhva Nyoo tsa cua cuhva ra tsi ñí.

Nu tsahá cuenda ra Jesús tsi yo nácaa jaha cuenda yo tsi yo tan ña javaha yo tsa ña vaha

(Mt. 18.6-9; Lc. 17.1-2)

⁴² 'Nyíví cua natuhu tsi iin nyíví tsa ñaha ca tsinú vaha iñí tsi yu tyin javaha ñí tsa caquihí, vaha ca cuhñí nyíví yuu yoso vee jucun ñí tan cujanehñí ñí tsi ñí tsitsi nu cunu ndutya ñuhu.⁴³ Tatun ndaha un javahá tsa ña vaha, casí nu javahá can tacan. Tatun ña cuví, cahnya can tan javita un, tyin vaha ca cuhun un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un.

⁴⁴ Tyin tindacu tsa iyó ican ña cua cíu maa can, tan ña cua ndahva maa ñuhu ndi iin tsaha.⁴⁵ Tatun tsaha un tan javahá tsa ña vaha, casí nu javahá can tacan. Tatun ña cuví, cahnya can tan javita un, tyin vaha

ca cuhun un coo un tsihin Nyoo tsihin tsa intuhun ñí tsaha un tan ñavin ca tsa cuhun un tsihin nduve tsaha un anyaya nu ña cua ndahva maa ñuhu.⁴⁶ Tyin tindacu tsa iyó ican ña cua cíu maa can, tan ña cua ndahva maa ñuhu ndi iin tsaha.⁴⁷ Tun tinuu un javahá tsa ña vaha, casí nu javahá can tacan.

Tatun ña cuví, tava can tan javita un tyin vaha ca quihví un nu ndacá ñaha Nyoo

tsihin iin tinuu un tan ñavin ca tsa jacuhun Nyoo tsi un anyaya tsihin nduvu tinuu un.

⁴⁸Tyin tindacu tsa iyó ican ña cua cíu maa can, tan ña cua ndahva maa ñuhu ndi iin tsaha.

⁴⁹Maa tyin tandihí nyiví nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñii. ⁵⁰Vaha xaan ñii. Maa tyin tun ndihí tsa uhva tsi, ña jandu uhva ca tsi tan ña cuvi ca cuatyíñu nyiví itsi. Yacan cuenda nyooho, ña jandihíndo tsa coo tuhun Nyoo añima ndo tyin cuví tsi tumaa ñii. Tyin tacan tan cuvi coo taxin ndo tsihin tahan ndo.

10

Nu caahán ra Jesús tyin ña vaha nacoo rayii ñasíhi ra
(Mt. 19.1-12; Lc. 16.18)

¹Quita ra Jesús ñuu Capernaum tan cuahán ra cuenda Judea inga tsyo yutya Jordán. Tan ndu iin cuaha nyico nyiví nu nyiví ra, tacan tan quitsahá jacuahá ra tsi ñi tumaa tuhvá maa ra javahá. ²Tacan tan natuhvá juhva ra fariseo naha ra nu nyáa ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatuun vaha nacoo rayii ñasíhi ra. ³Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴Tan nacahan ra naha tan catyí ra naha:

—Ra Moisés catyí ra tyin cuví caní ndi tutu cuenda ley ndi, tacan tan cuvi nacoo ndi ñasíhi ndi —catyí ra naha tsihin ra.

⁵Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo.

⁶Maa tyin quíví jihna ñi, quíví javahá Nyoo tandihí maa tsa iyó, catyí nu tutu ra tyin javahá ra rayii tan ñaha. ⁷“Yacan cuenda taahán tsi nacoo rayii jutu ra tan sihí ra tan ndu iin ra tsihin ñasíhi ra. ⁸Tan nduvu ñi cua cuvi ñi tumaa intuhun ña nyivi.” Yacan cuenda ca uvi taahan ñi, tyin intuhun ña nyivi cua cuvi ñi. ⁹Yacan cuenda, ña cuví jasiñu nyivi tsa jandu iin Nyoo —catyí ra Jesús tsihin ra naha.

¹⁰Yahá can tan cuanuhu ra nda yuvehe, tan quitsahá nducú tuhun nyico ra tsicá tsihin ra siqui tuhun can. ¹¹Tan catyí ra Jesús tsihin ra naha:

—Ra tsa cua nacoo ñasíhi tan quihin ra inga ñaha, cua coo cuatyí ra nu Nyoo.

¹²Tacan tucu ñi ñaha: Tun nacoo ña tsi yií ña tan tindaha ña tsihin inga rayii, juvin ñi cua coo tucu cuatyí ña —catyí ra Jesús.

Nu nasocq ra Jesús tsi tsa nyihi

(Mt. 19.13-15; Lc. 18.15-17)

¹³Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsahá cuxaán ra naha tsi nyivi cuahán cuandacá tsa nyihi. ¹⁴Maa tyin tsa nyehé ra Jesús tsa javahá ra naha tacan, cuxañan ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña casí ndo itsi naha tsi tyin nyiví ndacá ñaha Nyoo cuví ñi tumaa cuví tsa nyihi tyin tsinú iñi ñi tsi Nyoo. ¹⁵Tan tsa nditsa catyí yu tsihin ndo tun ña cuita iñi nyiví tsi Nyoo tumaa nyitá iñi iin ra luhlu tsi jutu ra, ña cua cuvi quíhví ñi nu ndacá ñaha Nyoo —catyí ra Jesús tsihin ra naha.

¹⁶Tacan tan quihin ra intuhun intuhun tsa nyihi can tan tyiso ndaha ra jiñi tsi naha tsi, tan tsicán tahvi ra tsi Nyoo na nasoco ra itsi naha tsi.

Nu tsahá cuenda ra Jesús tyin yií xaan nacuhua cuenda iin ra cuca tsi ra tsi Nyoo

(Mt. 19.16-30; Lc. 18.18-30)

¹⁷Yahá yacan tan cuahán ra Jesús. Tan tsinú xaan iin rayii cuahán ra cuanyicún ra tsi ra. Tsa tahan ra tsi ra, tsicuñi tsiti ra nuu ra, tan tsicá tuhun ra tsi ra, tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayiví nyito tsa ña cua naa maa? —catyí ra tsihin ra Jesús.

¹⁸Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. ¹⁹Yoho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi sihí un” —catyí ra Jesús tsihin ra.

²⁰Nacahan ra tan catyí ra:

—Maestro, tandihí tuhun ihyá tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan sií cuñí ra Jesús nyehé ra tsi ra. Tan catyí ra tsihin ra:

—Intuhun ña tsa cumañi jahaha un. Cuaahan yuvehe un tan xico un tandíhi tsa iyó tsi un, tan cuhva un xuhun can tsi nyiví ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahní nyiví tsi un —catyí ra Jesús tsihin ra.

²² Tsa tsíñi ra tyuvaan can tsa cahán ra Jesús tacan, cuihya xaan cuñí ra cuví, tan tsihin tucuihya iñi cuanuhu ra yuvehe ra tyin cuca xaan ra.

²³ Tacan tan nanyehe ra Jesús naníi canduvi nu nyaá ra, tan catyí ra tsihin ra tsicá tsihin ra:

—Yii xaan tan cuvi nacuhva cuenda nyiví cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsíñi ra tsicá tsihin ra tsa caahán ra, iyo xaan cuñí ra naha cuví. Maa tyin catyí tucu ra tsihin ra naha inga tsaha:

—Sehe yu, nyiví tyaá xaan jiñi tandíhi tsa cuca, yii xaan tan quíhví ñi nu ndacá ñaha Nyoo! ²⁵ Yatyi ca cuvi yaha iin camellu xuu iin yíqu tucu, tan ñavin ca tsa quíhví iin nyiví cuca nu ndacá ñaha Nyoo —catyí ra Jesús.

²⁶ Tsa tsíñi ra naha tuhun ihyá, iyo xaan cuñí ra naha cuví, tan quitsaha tsicá tuhun tahan ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehe ra Jesús tsi ra naha tan catyí ra tsihin ra naha:

—Nyiví ña cuví jahaha ñi tsehe, maa tyin Nyoo cuví jahaha ra tyin tsa cuenda Nyoo nduve maa tsa yii.

²⁸ Tacan tan catyí ra Pedro tsihin ra:

—Jutu Mañi yu, tandíhi maa tsa iyó tsi ndi nacoq ndi can tan nyicún ndi tsi un.

²⁹ Nacahán ra Jesús tan catyí ra:

—Tsa nditsa catyí yu tsihin ndo tyin tandíhi nyoho tan tandíhi inga ca nyiví tsa cua naco vehe, o yañi, o cuhva, o jutu, o sihi, o ñasiihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyiví tyin cuñí Nyoo jacacu ra tsi ñi, ³⁰ cua ñihí ñi ciente ca tsaha siqu tsa naco ñi nu ñuhu ñayiví ihyá. Cua ñihí ñi vehe, cua ñihí ñi nyiví cua cuvi yañi ñi, cuhva ñi, sihi ñi, sehe ñi, tan cua ñihí tucu ñi ñuhu ñi, vasu ndi

maa cua janyehe nyiví tundoho tsi ñi. Tan nu inga ñuhu ñayiví tsaa tsa vatsí, cua ñihí ñi ñayiví nyito tsa ña cua naa maa coo ñi.

³¹ Cuaha ñi nyiví cuahán ityi nuu vityin, cua cuhun ñi nda nu ndíhi ña. Tan nyiví cuahán nu ndíhi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyiví tsi ra

(Mt. 20.17-19; Lc. 18.31-34)

³² Tsa tsá cuñí cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandíhi nyiví tsa cuahán cuanyicún tsi ra. Iyo xaan cuñí ñi tan tsihin tsa yuuhví ñi cuahán ñi. Tacan tan tavá siñi ra tsi tsa utsi uvi ra tsicá maa tsihin ra. Tan quitsaha catyí tuhun ra tsihin ra naha tsa cua tahan ra. ³³ Tan catyí ra:

—Vityin tsa cua cuyatayin yo ñuu Jerusalén nu cua nacuhva cuenda nyiví tsi yuhu, Rayii quee nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihyá naha ra cua catyí ra naha tyin taahán tsi cíu yu tan cua nacuhva cuenda ra naha tsi yu tsi ra ñuu Roma naha ra. ³⁴ Cua vacu inducra naha tsi yu, cua cañi ra naha tsi yu, cua tivi sií ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quívi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús

(Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhvá ra naha nu nyaá ra Jesús, tan catyí ra naha tsihin ra:

—Maestro, jáha tumañi iñi tan jahaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñí ndo jahaha yu?

³⁷ Tacan nacahán ra naha tan catyí ra naha:

—Cuñí ndi tsa cuhva un cunyecu ndi tsihin un nu ndacan ñaha un, iin ndi xiin cuahá un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyoho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cíu ndo tumaa cua cíu yu? —catyí ra tsihin ra naha.

³⁹ Tacan nacahán ra naha:

—Cuví maa.
Tan catyí ra Jesús
—Nditsa tyin cua nyehe ndo tundoho tan cua cúa ndo tumaa cua tahan yuhu.
⁴⁰ Maa tyín tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyi yóo cua ñihí can —catyí ra Jesús tsihin ra naha.

⁴¹ Tsa tsiní tsa utsi ca ra tsicá tsihin ra Jesús yacan, cuxaqan ra naha tsi ra Jacobo tan ra Juan. ⁴² Maa tyin caná ra Jesús tsi ra naha tan catyí ra tsihin ra naha:

—Tsa tsító ndo tyin ra ndacá ñaha tsi nyíví iyó nu ñuhu ñayíví ihyá, ñihí xaan ndacá ñaha ra naha tsi ñí. ⁴³ Maa tyin ñavin tacan taahán tsi javaha nyoho tyin ra tsa cuñí cuvi ra cahnu ityí nuu Nyoo, cuñí tsi cuvi ra musu tandíhi ndo. ⁴⁴ Tan nyoho tsa cuñí cuví ityí nuu, cuñí tsi cuví ndo musu tandíhi ca ndo. ⁴⁵ Tyin yuhu, Rayíi tsa quee nda gloria, ñá vatsí yu tyin cuñí yu jatyinyee nyíví tsi yu. Yuhu vatsí yu vatsí jatyinyee yu tsi maa ñí tan cuhva yu ñayíví yu tsa cuenda ñí tumaa iin tsa tyahvi yu tan jacacu yu cuaha ñí —catyí ra Jesús.

Nu jananyehé ra Jesús tsi ra Bartimeo
(Mt. 20.29-34; Lc. 18.35-43)

⁴⁶ Tacan tan tsaa ra naha ñuu Jericó. Tan yaha ñí ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyíví cuahán cua nyicun tsi ra naha. Tan ityí yahá ra naha nyaá iin ra cuaa nañí Bartimeo, sehe ra Timeo, tsicán ra caridaa. ⁴⁷ Tan cuhva tsa tsító ra cuaa can tyin tsa cua cuyatinyahá ra Jesús, ra ñuu Nazaret, nu nyaá ra, quitsahá caná tsaa ra, tan catyí ra:

—¡Jesús, tata ra David, cündaaahvi iñi tsi yu! —catyí ra caná tsaa ra.

⁴⁸ Tacan tan quitsahá cuxaan nyíví tsi ra tan catyí ñí tsihin ra na cutaxin ra, maa tyin cuñihí ca ra caná tsaa ra tan catyí ra:

—¡Tata ra David, cündaaahvi iñi tsi yu!
—catyí ra.

⁴⁹ Tacan tan tsicuiñí ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Ndúvita, cohon tyin caná ra tsi un —catyí ra naha tsihin ra.

⁵⁰ Tacan tan janeñíi ra jahma ndasi ra nda sava. Tan cuahan ra iin yaha ñí nda nu nyaá

ra Jesús. ⁵¹ Tacan tan tsicá tuhun ra Jesús tsi ra:

—¿Náa cuñí un javaha yu?

Tan nacahan ra cuaa can tan catyí ra:

—Maestro, cuñí yu janduvaha un tinuu yu na nanyehe nyico yu —catyí ra.

⁵² Tacan catyí ra Jesús tsihin ra:

—Cuanuhu. Tsa nduvahá un tyin tsinú iñi un tsi yu.

Juvín ñí cuhva can tan nanyehe ra can. Tan cueta cuahán ra cuanyicún ra tsi ra Jesús.

11

Nu quihví ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

¹ Tsa tsa cuñí tsaa ra Jesús tan nyivi nyicún tsi ra nda ñuu Jerusalén, yatin nu canyí ñuu Betfagé tan ñuu Betania, tan yatin ñí yucu nu iyó yutun Olivo, tan catyí ra Jesús tsihin uvi ra tsicá tsihin ra:

² —Cuaahan ndo ñuu tsa canyí ityí nuu ihyá. Tsa tsaa ndo ican cua nañihí ndo iin urru. Quíti yoco cuví tí, nyaá tí nuuhní tí, tan ñaha ca quihi tyayu tí. Ndatsi ndo tsi tí, tan quihiñ ndo tsi tí quitsa ndaca ndo tsi yu.

³ Tatun cusana ndaca tuhun nyíví tsi ndo: “¿Nacuu ndo urru ihyá?” Tacan tan catyí ndo tsihin ñí: “Tsiní ñuhu tí tsi Jutu Mañí yo, maa tyin cua jaquitsi nyico ñí maa ra tsi tí”, catyí ndo tsihin ñí —catyí ra Jesús tsihin ra naha.

⁴ Tacan tan cuahán ra naha, tan tsa tsaa ra naha, nañihí ra naha urru can nuuhní tí tsitsi ityí tsata yuhu iin cora. Tan ndatsí ra naha tsi tí. ⁵ Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsí ndo urru can? —catyí ra naha tsihin ra naha.

⁶ Tacan tan nacahan ra naha tumaa cahán ra Jesús tsihin ra naha. Tan tsahá ra can naha ra quihiñ ra naha urru can. ⁷ Tacan tan tsindacá ra naha urru can tsi ra Jesús. Tyiso ra naha jahma ra naha tsata tí, tan tsicoso ra Jesús tsi tí. ⁸ Tan tsaquín cuaha nyíví jahma ñí tsitsi ityí nu yahá ra, tan inga ñí tsahnya ñí ndaha yutun tan tsaquín ñí tsitsi ityí.

⁹ Tacan tan nyíví tsa cuahán ityí nuu ra tan ityí tsata ra, quitsahá caná tsaa ñí tan catyí ñí:

—¡Cahnu xaan cuví Nyoo! ¡Na jacahnu yo tsi Jutu Mañí yo, ra tsa jaquitsi Nyoo!

¹⁰ ¡Na jacobnu yo tsi ra vatsí cundaca ñaha tumaa tsindacá ñaha ra David, tsii tsaaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihví ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yaha nyehé ra tandíhi tsa iyó nuquehe vehe ñuhu can, cuahán ra ñuu Betania tsihin tsa utsi uví ra tsicá tsihin ra tyin tsa cueñi xaan.

Nu cahan ra Jesús tsi yutun higo tsa ña tsahá tsiti
(Mt. 21.18-19)

¹² Tsa tuvi inga quivi tsa quita ra Jesús tan ra tsicá tsihin ra ñuu Betania, tsaa soco tsi ra Jesús. ¹³ Tsa quita ra naha ndasava nyehé ra Jesús nu nyaá iin yutun higo tsa iyó numa. Tsahan ra tsinyehé ra tun iñi tsiti tun, maa tyin nduve tsiti tun, maa ñi maa ndaha tun iñi, tyin ñaha ca tahan tsi quivi culva tun tsiti. ¹⁴ Tacan tan cahán ra Jesús tsi tun, tan catyí ra:

—Ndi iin sava ca quivi ña cua quee ca tsiti catsi nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

Nu jacunu ra Jesús nyivi xicó nuquehe vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Tsa tsaa ra naha ñuu Jerusalén, cuahán nyico ra Jesús vehe ñuhu cahnu tan quitsaha jacunu ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma. ¹⁶ Tan ñia tsaha ca ra yaha sava ñi nuquehe vehe ñuhu can tsihin ndaha tyiñu. ¹⁷ Tan quitsaha jacuahá ra tsi nyivi, tan catyí ra:

—¿A ñia tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nanii nu ñuhu ñayivi tsi Nyoo”? Tan nyoho jananduví ndo itsi vehe ñasuhu —catyí ra tsihin ñi.

¹⁸ Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsaha nducú ra naha cuhva cahñi ra naha tsi ra tyin yuuhví ra naha nyehé ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra. ¹⁹ Maa tyin tsa tsa cuñi cuaa, quita ra Jesús ñuu can tsihin ra tsicá tsihin ra.

Nu na ityi yutun higo

(Mt. 21.20-22)

²⁰ Tsa tuvi inga quivi, yaha nyico ra naha nu nyaá yutun higo tsa cahán ra Jesús. Tan nyehé ra naha tyin na ityi tun tan nda cuanda yoho tun na ityi. ²¹ Tacan tan tsa nyehé ra Pedro yutun higo can, nducuhún iñi ra tsa javahá ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahán un —catyí ra.

²² Nacahán ra Jesús, tan catyí ra:

—Tsínu iñi ndo tsi Nyoo. ²³ Tyin tsa nditsa catyí yu tsihin ndo tyin nyivi cua cahan tsihin yucu ihyá tyehen: “Cuatsiyo ihyá tan cuaahan tsitsi ndutya ñuhu”, tan tatuñ tsinú iñi ñi tyin cua cunda tsa cahán ñi tan ña uví tsicá iñi ñi, cua cunda tsi. ²⁴ Yacan cuenda catyí yu tsihin ndo tyin tandíhi tsa cua ndacan ndo tsi Nyoo tsa cua ndacan tahvi ndo tsi ra, tun tsinú iñi ndo tyin tsa naquihín cuenda ndo can, cua naquihín ndo can. ²⁵ Tan tsa cua ndacan tahvi ndo tsi Nyoo, tun nducuhún iñi ndo tyin xaan cuñi ndo tsihin nyivi, jaha ndo tucahnu iñi tsi ñi, tyin tacan tan jaha Jutu ndo, ra nyaá gloria, tucahnu iñi tsi maa ndo tsa cuenda cuatyí ndo. ²⁶ Maa tyin tun ña jaha ndo tucahnu iñi tsi nyivi, ndi Jutu ndo, ra nyaá gloria, tan ñia cua jaha ra tucahnu iñi tsi maa ndo.

Nu tsica tuhun ra cumí tyiñu vehe ñuhu naha ra tsi ra Jesús yóo tava tyiñu tsi ra tsa cahán ra tsihin nyivi

(Mt. 21.23-27; Lc. 20.1-8)

²⁷ Tacan tan tsaa nyico ra naha ñuu Jerusalén. Tsa nyivi ra Jesús tsicá nuu ra nuquehe vehe ñuhu cahnu, natuhvá ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandóñi nyivi Israel naha ra nu nyaá ra. ²⁸ Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁹⁻³⁰ Tan nacahán ra Jesús, tan catyí ra:

—Cuñi tucu yuhu ndaca tuhun yu tsa ndaca tuhun yu tsi nyoho. ¿Yóo jaquitsí tsi ra Juan tyin jacoondutya ra tsi nyivi? ¿A Nyoo o nyivi? Tatuñ catyí tuhun ndo tsihin yu yóo jaquitsí tsi ra, cua catyí tuhun tucu yuhu tsihin nyoho yóo tava tyiñu tsi yu

jawahá yu tyehen —catyí ra Jesús tsihin ra naha.

³¹ Tacan tan quitsahá caahán yuhu tahan ra naha, tan catyí ra naha:

—Tun catyi yo tyin Nyoo jaquitsí tsi ra Juan, cua catyi ra tsihin yo tyehen: “Tun Nyoo jaquitsí tsi ra, ¿nacuenda ña tsinú iñi ndo tsa cahan ra?” ³² ¿A vaha tun catyi yo tyin nyivi jaquitsí tsi ra? Ña cuvi —catyí ra naha, tyin yuuhví ra naha tsi nyivi, tyin tandíhi ñi tan tsinú iñi ñi tyin ndusu yuhu Nyoo cuví ra.

³³ Tacan tan catyí ra naha tsihin ra Jesús:

—Ña tsító ndi.

Tacan tan catyí ra Jesús tsihin ra naha:

—Tun ña tsító ndo, ndi yuhu tucu, tan ña cua catyi tuhun yu tsihin ndo yóo tava tyiñu tsi yu tsa jayahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsahá caahán ra Jesús tsihin ra naha tsihin cuhva ihyá, tan catyí ra:

—Tsicoo iin rayii tsa tatsí yoho yucu vixi tsa nañí uva, ra ican tyasí ra iin cora naníi canduvi nu tatsí ra yucu vixi can. Tan jayahá ra iin nu cua tava ra ndutya uvas can. Tan jayahá tucu ra iin vehe sucun tyin tacan tan cuvi jaha cuenda ra naníi cahnu nu ndaha tyiñu ra.

² Tsa yahá yacan tan tsahá nuu ra ñuhu can tsi juhva rayii tyin jaha tyiñu ra naha tsihin tsi. Tacan tan cuahán ra inga ñuu.

³ Tsa tahan tsi quivi iyó uvas can, jacuhún ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra. ³ Maa tyin ra ican naha ra tiñi ra naha tsi ra. Tan cañí ra naha tsi ra. Tan jacunuhu ra naha tsi ra tsihin ndaha ndii ra. ⁴ Tacan tan tsitoho ñuhu can jacuhún nyico ra inga musu, maa tyin cañí ra naha tsi ra can tsihin yuu, tan tahví ra naha jiñí ra, tan cahán nyaa ra naha tsi ra. ⁵ Tsitoho ñuhu can jacuhún nyico ra inga musu. Tan tsahñí ra naha tsi ra. Yaha yacan tan cuaha ca ra naha jacuhún ra. Maa tyin cañí ra naha tsi juhva ra naha tan tsahñí ra naha juhva ca ra naha.

⁶ ⁶ Tan cumañí intuhun ña ra tsa cuví jacuhún ra. Tan ra ican cuví sehe ra tsa cuñí xaan ra. Nu ndihí tuhun jacuhún ra

sehe ra tyin cuñí maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuví ra”, cuñí ra. ⁷ Maa tyin tsa nyehé ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihyá cua naquihin cora ihyá. Yacan vaha ca cahñí yo tsi ra, tan ndoo maa yo tsihin can”, catyí ra naha. ⁸ Tacan tan tiñi ra naha tsi ra tan tsahñí ra naha tsi ra. Tan tava ra naha cuñí ñuhu ra ityi tsata cora can —catyí ra Jesús.

⁹ Tacan tan tsicá tuhun ra Jesús tsi ra naha tan catyí ra:

—¿Náa cua jayahá tsitoho ñuhu can? Cua cuhun ra tan cua cahñí ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. ¹⁰ ¿A ñaha ca cahví ndo nu tutu Nyoo nu catyí tsi tyehen?

Yuu tsa javitá ra jayahá vehe naha ra, yacan cuví yuu tsa tsíñi ñuhu ca.

¹¹ Maa Nyoo Jutu yo jahá tsa cahnu ca cuví yuu ihyá. Tan iyo xaan cuñí yo nyehé yo can, catyí tsi —catyí ra Jesús tsihin ra naha.

¹² Tacan tan ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducu ra naha cuhva tyihi ra naha tsi ra Jesús vehe caa tyin tsító ra naha tyin tuhun maa ra naha caahán ra tsa tsatyiñu ra cuhva can. Maa tyin ña tiñi ra naha tsi ra tyin yuuhví ra naha nyehé ra naha tsi nyivi. Nacoq ra naha tsi ra, tan cuahán ra naha.

Nu caahán ra Jesús siquí tuhun tsa tyahví nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹³ Tacan tan jacuhún ra naha juhva ra yihi cuenda ra Herodes tan juhva ra fariseo naha ra nu nyíi ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra. ¹⁴ Tsa tsaaq ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsító ndi tyin tsa nditsa caahán un. Tan inducu ñi cuñí un nyehé un nyivi cuca tan nyivi ndaaahvi. Tan nditsa tyin ityi Nyoo janahá un. Yacan cuenda cuñí ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi

yo, ra tsa nyaá nda ñuu Roma, o ña vaha?
 ¿A taahán tsi tyahvi yo can, o ña taahán tsi?
 —catyí ra naha tsihin ra Jesús.

¹⁵ Tan tsító ra Jesús tyin ñavin tsa vaha
 tsicá iñi ra naha, yacan cuenda catyí ra
 tsihin ra naha:

—¿Nacuvi tyin nducú cuhva ndo tsi yu?
 Ndaca ndo iin xuhun tsi yu ihyá, na nyehe
 yu —catyí ra.

¹⁶ Tsindacá ra naha xuhun can tsi ra. Tsa
 nyehe ra can tan tsicá tuhun ra tsi ra naha,
 tan catyí ra:

—¿Yóo nuu tan yóo sivi nyaá tsata
 xuhun ihyá? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

¹⁷ Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá
 ñaha tsi ra, tan cuhva ndo tsa tsii Nyoo si
 Nyoo —catyí ra Jesús tsihin ra naha.

Tan iyo xaan cuñí ra naha tsihin tsa
 nacahan ra.

*Nu cuñí ra saduceo naha ra jandavi ñaha ra
 naha tsi ra Jesús*

(Mt. 22.23-33; Lc. 20.27-40)

¹⁸ Tacan tan cuahán juhva ra saduceo
 naha ra nu nyí ra Jesús. Tan ra saduceo can
 naha ra catyí ra naha tyin ña cua nandoto
 nyívi. Yacan cuenda cahan ra naha tyehen
 tan catyí ra naha tsihin ra Jesús:

¹⁹ —Maestro, ra Moisés tyaa ra nácaa
 taahán tsi javaha yo tatum iin rayíi tsihí tan
 ndoo ñasíhi ra tan nduve sehe ña tsicoog
 tsihin ra. Catyí ra tyin taahán tsi tindaha
 yañi ra tsihin ñaha can. Tyin tacan tan cua
 co sehe ra tsihin ña tsa cuenda ra yañi ra
 tsa tsihí. ²⁰ Iin tsaha iin rayíi tsicoog utsa sehe
 yíi ra. Ra tsa jihna ñi tindaha ra tsihin iin
 ñaha, maa tyin nduve sehe ra tsicoog tsihin
 ña, tan tsihí ra. ²¹ Tacan tan tindaha ra yañi
 ra tsa tsinu uvi tsihin ñaha tsa ndoo can.
 Maa tyin juvin ñi ña tsicoog sehe ra tsihin
 ña tan tsihí ra. Juvín ñi tacan tahan tucu
 ra tsa tsinu uñi. ²² Tandihi tsa utsa ra naha
 tindaha ra naha tsihin ñaha can. Tan ndi
 intuhun ra naha tan ña tsicoog sehe ra naha
 tsihin ña. Tan nu ndihí tuhun, tsihí ndihí
 maa ña. ²³ Tan vityín, tun nditsa tsa cua
 nandoto nyívi, ¿ndáa tsa utsa taahan ra can
 naha ra cua cuvi yíi ña quíví cua nandoto
 ñi? Tyin tandíhi maa ra naha tan tindaha
 ra naha tsihin ña —catyí ra naha tsihin ra
 Jesús.

²⁴ Tacan tan nacahan ra Jesús tan catyí ra
 tsihin ra naha:

—Caahán soho ñi maa nyoho, tyin ña
 tsító ndo tsa catyí tuhun Nyoo, tan ndi ña
 tsító ndo nácaa tsa cahnu cuví tunyee iñi
 tsa iyó tsi Nyoo. ²⁵ Quíví cua nandoto nyívi,
 ndi ña cua tindaha ñi tan ndi ña cua tindaha
 sehe ñi, tyin cua cuvi ñi tumaa ángel iyó
 gloria. ²⁶ Tan tuhun tsa cua nandoto nyívi,
 ña ñaha ca cahví ndo nu libru tsa tyaa ra
 Moisés nu catyí tsi nácaa cahan Nyoo tsihin
 ra nu cayú yutun iñu? Tyin catyí ra tsihin
 ra tyehen: “Yuhu cuví Nyoo ra Abraham,
 ra Isaac, tan ra Jacob”, catyí Nyoo tsihin ra
 Moisés. ²⁷ Ihyá nyehé yo tyin nyito añima
 ra can naha ra vasu ndi maa tsanaha tsihí
 ra naha tyin Nyoo ñavin Nyoo nyívi tsihí
 cuví ra, tyin Nyoo cuví ra Nyoo nyívi nyito.
 Yacan cuenda catyí yu tyin nyoho caahán
 soho ñi maa ndo —catyí ra Jesús tsihin ra
 naha.

Ley tsa ñiñi ca tsa tsaha Nyoo

(Mt. 22.34-40)

²⁸ Ña naha ñi tan tsaa iin ra maestro
 cuenda ley vehe ñuhu, tan tsíñi ra tsa
 caahán ra Jesús tsihin ra saduceo can naha
 ra. Tan cuhva tsa tsito ra tyin ra Jesús vaha
 nacahan ra tsihin ra naha, tsica tuhun ra tsi
 ra tan catyí ra:

—Tsitsi tsa tandíhi ley, ¿ndáa tsa ñiñi ca
 cuñí tsi javaha yo? —catyí ra.

²⁹ Tan nacahan ra Jesús tan catyí ra:
 —Ley tsa jihna ñi tan ñiñi ca cuñí tsi
 javaha yo tsa nuu tandíhi ley, cuví ley
 ihyá: “Nyoho nyívi Israel, tyaa soho ndo:
 intuhun ñi maa Nyoo Jutu yo iyó. ³⁰ Cuñí
 ndo tsi Jutu Mañi yo Nyoo tsihin tsa ñiñi iñi
 ndo, tan tsihin tsa ñiñi iñi añima ndo, tan
 tsihin tandíhi tsa tsíñi tuñi jiñi ndo, tan
 tsihin tandíhi tunyee iñi tsa iyó tsi ndo.”
 Ley ihyá cuví tsa ñiñi ca tan tsa jihna ñi
 taahán tsi javaha yo. ³¹ Tan tsa tsinu uvi tsa
 yatiny induci ñi caahán tsi tsihin tsa jihna
 ñi tan catyí tsi tyehen: “Cuñí tahan ndo tsi
 ndo tumaa cuñí ndo tsi maa ndo.” Nduve ca
 ley tsa ñiñi ca javaha yo tsa nuu nduvi tsehe
 —catyí ra Jesús.

³² Tacan tan ra maestro cuenda ley can
 catyí ra tsihin ra:

—Vaha xaan nacahan un, Maestro.
 Nditsa tsa caahán un. Intuhun ñi Nyoo iyó,
 tan nduve inga ca Nyoo iyó. ³³ Tan tsa cuñí
 yo tsi Nyoo tsihin tsa ñiñi iñi yo, tan tsihin

tandíhi tsa tsíñi tuñi jiñi yo, tan tsihin tsa nii iñi añima yo, tan tsihin tandíhi tunyee iñi iyó tsi yo, tan tsa cuñi tahan yo tsi yo tumaa cuñi yo tsi maa yo, tandíhi yacan tan cahnu ca cuví can tan ñavin ca tsa jamañí yo tsi Nyoo, tsa tsahñí yo quítí tan tsahñí yo can nu altar —catyí ra maestro cuenda ley can tsihin ra Jesús.

³⁴Tsa nyehé ra Jesús tyin vaha nacahan ra tsihin tsa catsí jiñi ra, tan catyí ra tsihin ra:

—Luxu cuui ña tan ñihí un cuhva nácaas nacuhva cuenda un añima un tsi Nyoo na cundaca ñaha ra tsi un —catyí ra Jesús tsihin ra.

Ndi intuhun ca maa nyiví tan ña cana ca iñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juvin ñi cuví tucu ra tata ra David
(Mt. 22.41-46; Lc. 20.41-44)

³⁵Jacuahá ra Jesús tsitsi vehe ñihu cahnu, tan catyí ra:

—¿Nacuenda tyin catyí ra maestro cuenda ley vehe ñihu naha ra tyin tata ra David cuví ra Cristo? ³⁶Tan juvin ñi maa ra David catyí tuhun ra Cristo tyehen:

Nyoo cahán ra tsihin Jutu Mañi yu, tan catyí ra:

“Cunyaa xiin cuaha yu ihyá nda cuanda caquin yu tsi ra xaan iñi tsi un naha ra tsaha un”, catyí ra David tahan tsanaha jahá Tatyí li Nyoo.

³⁷¿Nacaa cuví cuú tucu ra Cristo tata ra David, tan juvin ñi maa ra David catyí tyin ra Cristo cuví Jutu Mañi ra? —catyí ra Jesús.

Tan cuaha nyiví yucú tyaá soho tsa caahán ra tan sií xaan cuñí ñi.

Nu caahán ra Jesús tyin iyó cuaha cuatyí ra maestro cuenda ley vehe ñihu naha ra
(Mt. 23.1-36; Lc. 11.37-54; 20.45-47)

³⁸Quitsaha jacuahá ra Jesús tan catyí ra tyehen:

—Jahá ndo cuenda tsi ndo tsihin ra maestro cuenda ley vehe ñihu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahví na jahá ndo tsa ñayiví tsi ra naha, tan cuhva ndo nacumi tsi ra naha. ³⁹Tan nanducú ra naha tyayu vaha ca cunyecu ra naha tsitsi vehe ñihu. Tan tsa cua catsí ra naha nu iyó vico, nanducú ra naha nu vaha ca cunyecu ra naha. ⁴⁰Tan quihín nyaá ra naha vehe ñi

ndaahvi tsa tsíhi yií tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyiví tuhun ra naha. Yacan cuenda naha tsicán tahvi ra naha tsi Nyoo nu tuvi nyiví. Maa tyin nduve náa catyi jahahá ra naha tacan tyin ñihí ca cua tatsi tuñi Nyoo tsi ra naha —catyí ra Jesús.

Tsa tsahá ñaha ndaahvi tsíhi yií
(Lc. 21.1-4)

⁴¹Iin tsaha nyí ra Jesús tsitsi vehe ñihu cahnu tan nyaá ra yatyin ñi nu nyí tsatun nu tyihí nyiví xuhun tsa tsahá ñi tsi Nyoo. Tan nyehé ra nu tyihí nyiví xuhun tsitsi tsatun can. Tan cuaha nyiví cuca tyihí ñi cuaha xaan xuhun. ⁴²Tsitsi tsa nyaá ra ican tsaa iin ñaha ndaahvi tsíhi yií, tan tyihí ña uvi taahan ñi xuhun nyihí tsa caaha xaan nyaá. ⁴³Tacan tan cana ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsahá ñaha ndaahvi ihyá tan ñiñaví ca inga nyiví. ⁴⁴Tyin tsahá ñi tsa ndoo siquí xuhun ñi. Maa tyin ñaha ihyá tyihí ña tandíhi tsa iyó tsi ña —catyí ra Jesús.

13

Nu caahán ra Jesús tyin cua taní vehe ñihu cahnu

(Mt. 24.1-2; Lc. 21.5-6)

¹Cuhva tsa cua quita ra Jesús tsitsi vehe ñihu cahnu can, iin ra tsicá tsihin ra catyí ra tsihin ra:

—¡Maestro, nyehé jihna tsa sií caá yuu yihí vehe ihyá! ¡Nyehé tsa nahnu vehe ihyá! —catyí ra tsihin ra Jesús.

²Maa tyin nacahan ra Jesús, tan catyí ra tsihin ra:

—Nditsa nahnu vehe ihyá tan sií caá tsi nyehé yo vityin. Maa tyin catyí yu tsihin un tyin coo quíví nduve ca maa náa cua ndoo ihyá. Ndi intuhun yuu tan ña cua coso tahan tsi tsihin inga tsi, tyin tandíhi maa tsi tan cua taní tsi —catyí ra Jesús.

Nu tsahá cuenda ra Jesús náa cua cuvi tsa ndi cumañi ca naa ñihu ñayiví

(Mt. 24.3-28; Lc. 21.7-24; 17.22-24)

³Tacan tan cuahán ra Jesús tsihin ra tsicá tsihin ra yucu yutun Olivo tsa canyí inga tsiyo nu nditsin nyehé tsi vehe ñihu cahnu. Tsa tsinyaá ra Jesús ican, ra Pedro,

ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

⁴—Cuñí ndi tsa catyi tuhun un tsihin ndi ama cua cuvi tandíhi tsa cahán un. ¿Nacaá tan coto ndi tatum tsa cuyatyin cundaa tandíhi can? —catyí ra naha.

⁵ Nacaáhan ra Jesús tan catyí ra:

—Jáha ndo cuenda tsi ndo coto jandavi ñaha nyiví tsi ndo. ⁶Tyin cuaha xaan nyiví cua quitsi, tan cua cuatyin ñi sivi yu, tan cua catyi ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyiví cua jandavi ñaha ñi.

⁷ Maa tyin tun ñihi tuhun ndo tyin iyó cuatyin tan cañí tahan nyiví ityi can tan ityi ihyá, ña nayuhvi ndo tyin tacan taahán maa tsi cuvi tsa ndi cumañi ca naa ñuhu ñayiví. ⁸Tyin nyiví iin ñuu cua cañí tahan ñi tsihin nyiví inga ñuu, tan cua coo cuatyin iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaña nyiví. Vasu ndi maa nyehe nyiví tundoho ihyá, ña cua naa naha ñuhu ñayiví tyin ndi nyaa ca cua nyehe ñi tundoho.

⁹ Maa tyin jáha ndo cuenda tsi ndo tyin cua cuhva cuenda nyiví tsi ndo tsi ra cumí tyin ñaha ra. Tan cua cañí ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumí tyin ñaha ra, ña caca iñi ndo náa cua cahan ndo. Tyin juvin ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyi li Nyoo cua cahan. ¹² Yihí ra naha cua nacuhva cuenda ra naha juvin ñi maa yañi ra naha tan cua ndacan ra naha tsa cíu ra can naha ra. Yihí nyiví cua nacuhva cuenda ñi juvin ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cíu ñi. ¹³Tandíhi nyiví iyó nu ñuhu ñayiví ndasí cua cuñí ñi nyehe ñi tsi ndo tsacatyi yuhu. Maa tyin nyoocho tsa cua cuyatee iñi tsinú iñi tsi yu nda nu ndihi, cua cacu ndo.

¹⁴ Tandíhi nyoocho tsa cahví nu tutu Nyoo nu tyaa ra Daniel, ra cuvi ndusu yuhu Nyoo tsa tsicoo tahan tsanaha, cuyuñi iñi ndo tyin iyó tsa janducaquiñi tan tsa jativi.

Quiví tsa nyehe ndo tyin tsa nyí yacan nu ña taahán tsi cunyii can, nyoocho nyiví iyó Judea, quita ndo ñuu ndo tan cuhun ndo ityi yucu. ¹⁵ Nyoocho tsa cua cuyucu jiñi vehe quiví can, cua nuu ndo, maa tyin ña cua nuu ndo tsa quíhví ndo tsitsi vehe ndo tan tava ndo tsa iyó tsi ndo.

¹⁶ Nyoocho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. ¹⁷ ¡Ndahvi ñiñaha tsa ñuhú sehe quiví can! ¡Tan ndahvi ñi iyó sehe lee tsa ndi tyaxín! ¡Ndahvi ñi! ¹⁸ Ndácan tahvi ndo tsi Nyoo na ña tahan tsi cunu ndo quiví vitsin.

¹⁹ Tyin tundoho tsa cua nyehe nyiví quiví can, ñaha ca maa coo can ndaha tsinu maa ñuhu ñayiví nda cuanda vityin. Tan ndi ityi nuu ca tan ña cua nyehe nyiví tahan tundoho can inga tsaha. ²⁰ Tun tsatinyin Jutu Mañi yo tan ña jandíhi ra tsa cua nyehe yo tundoho quiví can, yoñi maa cua cacu. Maa tyin cua jandíhi ra can tsa cuenda tsa cuñí ra tsi nyiví yihí cuenda ra, nyiví nacatsi vaha maa ra.

²¹ Tatan catyi nyiví tsihin ndo: “Jihna ndo, ihyá nyaá ra Cristo” o “Nyehe ndo, ican nyaá ra Cristo”, ña tsinu iñi ndo. ²² Tyin cua quitsi nyiví jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyiví nacatsi maa Nyoo, tatan cunyee ñi javaha ñi tacan. ²³ Maa tyin nyoocho jaha cuenda vaha ndo tsi ndo vityin tsa tsa tsítido ndo tandíhi yacan tsa ndi cumañi ca tahan tsi quiví can —catyí ra Jesús.

Nu jacoto ra Jesús nácaa cua quitsi nyico ra inga tsaha

(Mt. 24.29-35, 42-44; Lc. 21.25-36)

²⁴ Tan catyí nyico ra Jesús tyehen:

—Maa tyin tsa cua yaha nyehe nyiví tundoho quiví can, cua ndunaa ñicanyii, yoo ña cua jandunditsin ca tsi, ²⁵ tan cucaucyo tiñuu. Tan tandíhi tsa iyó andivi tan cua nacanda tsi naha tsi. ²⁶ Tacan tan cua nyehe ndo tsi yuhu, Rayíi tsa quee nda gloria, vatsí yu nu víco tsihin tunyee iñi cahnu tan tsihin tsa cahnu cuví Nyoo. ²⁷ Tan cuaha ángel cuenda yu cua jaquitsi yu tyin jandu iin ra naha nyiví nacatsi maa Nyoo. Cua quita ñi naníi cahnu nu ñuhu ñayiví,

nda nu ndíhi ñuhu ñayiví tan nda nu ndíhi andivi.

²⁸ 'Cytuñi iñi ndo cuhva iyó yutun tsa nañi higo: Tun tsa nduyutýa soco tun tan cana ndaha yutya tun, tsító ndo tyin tsa cua quee tsítí tun. ²⁹ Tan juvin ñí tacan, tatum tsa cuví tandíhi tsa iyo tsa caahán yu tuhun tsihin ndo, cua coto ndo tyin tsa cuyatayin quitsi yu; tan tsa nyanaá yu yuvehe cuví tsi. ³⁰ Tsa nditsa catyí yu tsihin ndo tyin tsa ndi cumañi ca cíu nyiví iyó nu ñuhu ñayiví ihya tan cua cuví tandíhi tsa caahán yu tuhun tsihin ndo. ³¹ Tan coo quíví cua cundihi andíví tan cua cundihi ñuhu ñayiví, maa tyin tuhun caahán yuhu, ña cua cundihi maa tsi tyin tandíhi tsi tan cua cundaa tsi.

³² 'Maa tyin quíví tan hora tsa cua cuví tandíhi yacan, yoñi maa tsító can, ndi maa ca ángel tan ña tsító ra naha, ndi yuhu tsa cuví yu Sehe Nyoo tan ña tsító yu. Intuhun ñi maa Nyoo Jutu yo tsító ama cua javaha ra tandíhi.

³³ 'Yacan cuenda cōo nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsító ndo náa quíví tan náa cuhva cua quitsi nyico yu. ³⁴ Tumaa iin rayii tsa cua cuhun nu cañi. Ra ican tsa ndi cumañi ca cuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra. ³⁵ Yacan cuenda nyoocho cōo nyito ndo tyin ña tsító ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitooho, o tsa cua cana ñicanyii. ³⁶ Yacan cuenda coonyito vaha ndo tan ña cusu ndo tyin sana iñi ndo tan cua quitsi yu. ³⁷ Tsa caahán yu tsihin nyoocho, caahán tucu yu tsihin tandíhi ca nyivi: Cōo nyito ndo.

14

*Nu nducu ra jutu cuví ityi nuu naha ra cuhva tiñi ra naha tsi ra Jesús
(Mt. 26.1-5; Lc. 22.1-2; Jn. 11.45-53)*

¹Tsa ndi cumañi uvi quíví ca tan tahan tsi vico pascua tan vico nu tuhvá nyiví tsatsí paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducú ra naha cuhva tiñi xeehe ra naha tsi ra Jesús tan cahñi ra

naha tsi ra. ² Maa tyin natuhun tahan ra naha tan catyí ra naha:

—Ña cua tiñi naha yo tsi ra quíví maa vico tyin coto nduvaa xaan nyiví —catyí ra naha.

*Nu tyiñi iin ñaha ndutya tamí jiñi ra Jesús
(Mt. 26.6-13; Jn. 12.1-8)*

³ Tsa ndi cumañi ca tahan tsi vico can, nyíí ra Jesús ñuu Betania, vehe ra Simón, ra tsa tsindohó cuehe tyaahyu. Tsitsi tsa nyaá ra Jesús tsatsí ra, tsaa iin ñaha ndahá ña iin yutyi tsa tsing tsihin yuu tsa nañi alabastro. Tsitu can yihí ndutya tamí tsa nañi nardo. Tan yahvi xaan nyaá ndutya tamí can. Nuña ña yuhu yutyi can tan tava ña ndutya tamí can tan tyiñi ña can jíñi ra Jesús. ⁴ Maa tyin juhva ra tsa yucú ican naha ra nduxaan ra naha tan catyí ra naha:

—¿Nacuenda tyin jatívi ñaha ihya ndutya tamí can? ⁵ Tun tsatyin xicq ña can, cuaha xaan xuhun cua ñihi ña tsihin can, tan cuvi jatinyee ña tsi nyiví ndaahvi tsihin xuhun can —catyí ra naha.

Tan cuxaan ra naha tsi ña.

⁶ Maa tyin ra Jesús catyí ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu. ⁷ Tyin nyiví ndaahvi tandíhi ñí quíví cua cuyucu ñi tsihin ndo, maa tyin yuhu, ña naha ca cunyii yu tsihin ndo. ⁸ Ñaha ihya javahá ña ndihi cuhva cuví ñi javahá ña. Tyiñi ña ndutya tamí cuñi ñuhu yu, tumaa tuhvá maa yo javahá tsihin cuñi ñuhu nyiví tsa ndi cumañi ca quihví ñuhu ñi. ⁹ Tsa nditsa catyí yu tsihin ndo, tyin tandíhi ityi nu cua cahan nyiví tuhun Nyoo naníi cahnu nu ñuhu ñayiví, cua cahan ñi tuhun ñaha ihya tan tsa javahá ña, tyin tacan tan ña naa iñi nyiví tsi ña —catyí ra Jesús.

*Nu xicq ra Judas tsi ra Jesús
(Mt. 26.14-16; Lc. 22.3-6)*

¹⁰ Tsa yahá yacan tan quitá iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsahan ra tsicahán ra tsihin ra jutu cuví ityi nuu naha ra, tan jandaq ra tyiñu tsihin ra naha tyin cua cuhva cuenda ra tsi ra Jesús tsi ra naha.

¹¹ Cuhva tsa tsíñi ra naha tsa caahán ra, siíi xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra.

Tacan tan quitsah_ä nducú ra Judas cuhva cuhva cuenda ra tsi ra Jesús tsi ra naha.

*Nu cuxiñi ra Jesús tsihin ra tsicá tsihin ra
(Mt. 26.17-29; Lc. 22.7-23; Jn. 13.21-30; 1 Co.
11.23-26)*

¹² Quív_i jihna ñi tsa quitsah_a vico nu tsatsí nyiví paan tsa nduve yutsan iya yihí tan quív_i tuhvá ñi tsahñí mbee lee tan jamañí ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñí un cuhun ndi janduvaha ndi tsa cuxiñi un cuenda vico pascua ihyá?

¹³ Tacan tan tavá tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsí ñuu, tan ican cua nañíhi ndo iin rayíi yosó soco iin quiyí ndutya. Tsa nyehe ndo tsi ra, cuanyicun ndo tsi ra. ¹⁴ Tsa tsaa ndo yuvehe nu cua quihví ra, catyí ndo tyehen tsihin tsitoho vehe can: “Ra Maestro cuñí ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo. ¹⁵ Tan cua janaha ra iin cuarto cahnu nu tsinu uvi pisu tsi ndo. Tsa nduvah_a maa tsitsí tsi jaha ra, Javaha ndo tsa cuxiñi yo tsitsí vehe can—catyí ra Jesús tsihin ra naha.

¹⁶ Tacan tan cuahán ra naha. Tsa tsaa ra naha tsitsí ñuu can, nañíhi ra naha tandíhi maa cuhva catyí ra Jesús tsihin ra naha. Tan javah_a ra naha tsa cua cuxiñi ra naha cuenda vico pascua. ¹⁷ Tsa ndihí javah_a ra naha tsa cua cuxiñi ra naha, tacan tan cuahán nyico ra naha nu nyíra Jesús. Tan tsa cunaaha, cuahán ra Jesús, cuacuxiñi ra tsihin tsa utsi uvi ra tsicá tsihin ra. ¹⁸ Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyn iin nyoho tsa tsatsí tsihin yu cua xico tsi yu tsi ra xaan iñi tsi yu.

¹⁹ Tacan tan nducuihyá xaan cuñí ra naha, tan quitsah_a tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰ Tan nacahan_a ra Jesús tan catyí ra:

—Ña tandíhi ndo. Intuhun ñi ra tsitsí tsa utsi uvi ndo. Tan ra ican cuví ra tsa jatyí paan iin ñi tsitsí coho tsihin yu. ²¹ Tyn yuhu, Rayii tsa quee nda gloria, cua tahan yu tumaa caahán maa nu tutu Nyoo tyn

cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatiny ña cacu ra —catyí ra Jesús.

²² Tan tsitsí tsa tsatsí ra naha, tacan tan quihín ra Jesús iin paan tan nacuhvá ra tyahvi nyoo tsi Nyoo tsa cuenda can, tan tsahñu sava ra can, tan tsah_a ra can tsi ra tsicá tsihin ra, tan catyí ra:

—Catsí ndo paan ihyá tyin tsehe cuví tumaa cuñú ñuhu yu —catyí ra tsihin ra naha.

²³ Tsa yah_a yacan quihín ndihí ra vasu nu yihí vinu. Tsa yah_a tsah_a ra tyahvi nyoo tsi Nyoo, tacan tan tsah_a ra can tsi ra naha. Tandíhi ra naha tan tsihí ra naha vinu tsa yihí tsitsí vasu can. ²⁴ Tan catyí ra tsihin ra naha:

—Vinu ihyá cuví tumaa niñi yu tyn tsihin niñi yu cua ndoo Nyoo tuhun tsasí tsihin ndo tyn cua cati niñi yu tsa cuenda tsa vaha tsi nyoho tan tsa vaha tsi cuaha nyivi. ²⁵ Tsa nditsa catyí yu tsihin ndo tyn ña cua coho ca yu vinu tsa cuví ndutya yucu vixi uva, nda cuanda coho yu vinu tsaa nda nu ndacá ñaha Nyoo quív_i tsaa yu ndacan —catyí ra Jesús tsihin ra naha.

Nu jacotó ra Jesús tyn cua cahan ra Pedro tyn ña nacotó ra tsi ra

(Mt. 26.30-35; Lc. 22.31-34; Jn. 13.36-38)

²⁶ Tsa ndihí tsita ra naha yaa Nyoo, tan cuahán ra naha yucu yutun Olivo. ²⁷ Tacan tan catyí ra Jesús tsihin tandíhi ra naha:

—Tandíhi maa ndo tan cua nacoo ihñi ndo tsi yu tsa cuaa vityin tyn catyí nu tutu Nyoo tyehen: “Tandíhi mbee ticatyí jana yu cua cuhun tsyo tí naha tí siñ siñ ityí tyn cua cahñí yu tsi ra jahá cuenda tsi tí naha tí”, catyí tsi. ²⁸ Maa tyn tsa yah_a nandoto yu, jihna ca yu cua cuhun Galilea tsa ndi cumañí ca cuhun nyoho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacoo ihñi tandíhi ra naha tsi un, maa tyn yuhu ña cua nacoo ihñi maa yu tsi un —catyí ra tsihin ra Jesús.

³⁰ Maa tyn ra Jesús catyí ra tsihin ra:

—Tsa nditsa catyí yu tsihin un, tyn tsa cuaa vityin, tsa ndi cumañí ca vacu tsitooho tsa tsinu uvi tsaha, uñi tsaha cua cahan un tyn ña nacotó un tsi yu —catyí ra Jesús tsihin ra Pedro.

³¹ Maa tyn jañiñí ra Pedro tan catyí ra:

—Vasu ndi maa cúa yu tsihin un, maa tyin ña cua catyi yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

Nu nyí ra Jesús Getsemaní tsicán tahvi ra tsi Nyoo

(Mt. 26.36-46; Lc. 22.39-46)

³² Tacan tan tsaqá ra Jesús tan ra tsicá tsihin ra iin nu nañí Getsemaní. Tan catyí ra Jesús tsihin ra naha:

—Ndoo ndo ihyá tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quihin ra tsi ra Pedro, ra Jacobo tan ra Juan cuahán tsihin ra. Tan tsaqá tucuiihya iñi cahnu tsi ra tan tuñu cuñí ra. ³⁴ Tan catyí ra tsihin ra naha:

—Cuihyla xaan cuñí yu; cahñi ña maa tucuiihya iñi ihyá tsi yu, cuñí yu. Ndoo ndo ihyá, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuñí tsiti ra nu ñuhu tan tsaquín ra nuu ra nda nu ñuhu. Tan tsicán tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicán tahvi ra.

³⁶ Tan tsa tsicán tahvi ra, catyí ra:

—Jutu Mañi yu, tsa cuenda yooho nduve tsa ña cuví jahava un. Tun yooho tan cuñí un cuví jatsiyo un tundoho ihyá siquí yu. Maa tyin na cuvi maa cuhva cuñí maa un, tan ñavin cuhva cuñí maa yu —catyí ra Jesús tsicán tahvi ra.

³⁷ Tacan tan cuahán ra nu nacoo ra tsi uñi ra tsicá tsihin ra. Tsa tsaqá ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeé iñi un coo nyito un tsihin yu ndi intuhun hora? ³⁸ Ña cusu ndo; ndacan tahvi ndo tsi Nyoo, tyin tacan tan ña cua jahava ndo cuhva cuñí nu ña vaha. Tsa nditsa tyin añima ndo cuñí xaan tsi nanducu tsi tsi Nyoo, maa tyin cuñú ñuhu ndo cuví tsa vita cuñí —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsicán tahvi ra tsi Nyoo juvin ñi tsihin tuhun tsa cahñan ra tsa jihna ñi. ⁴⁰ Tacan tan tsaqá nyico ra inga tsaha, nu yucú ra naha tan nyehe ra tyin quixí nyico ra naha, tyin tsindasi maa tinuu ra naha jahá ñumaahna.

Tan ña tsitó ra naha náa nacahan ra naha tsihin ra. Ndi maa ra tan ña cahñan ca ra.

⁴¹ Tan cuahán nyico ra. Tsa tsaqá ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan qitatu ndo tyin tsa cundaas tyinu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahán tsi hora tsa cua cuhva cuenda tsi yu, Rayíi tsa quee nda gloria. ⁴² Ndúvita ndo, cohon ndo tyin tsa vatsí ra tsa xico tsi yu —catyí ra Jesús tsihin ra naha.

Nu tsaha cuenda ra Judas tsi ra Jesús tsi nu xaan iñi tsi ra nahnu

(Mt. 26.47-56; Lc. 22.47-53; Jn. 18.2-11)

⁴³ Ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyiví Israel naha ra; cuaha xaan nyiví jacuhun ra naha tsihin ra Judas, iin ra tsicá tsihin ra Jesús, tyin tiñi ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaqá ra Judas tsihin nyiví cuaha can. ⁴⁴ Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyiví náa cua jahava ra tan coto ñi ndáa ra cuvi ra Jesús. Tan cahñan ra tyehen:

—Ra tsa cua tyaa yuhu yu, ra ican cuví ra Jesús tsa cua quihin ndo. Quihin ndo tsi ra tan jaha cuenda vaha ndo coto cunu ra —catyí ra nu quitsi tsi.

⁴⁵ Tsa tsaqá ra Judas nu nyí ra Jesús natuhvára nu nyaá ra tan catyí ra tsihin ra:

—Maestro.

Tan tyaa yuhu ra tsi ra. ⁴⁶ Tacan tan quihin ra naha tsi ra Jesús cuahán tsihin ra naha.

⁴⁷ Maa tyin iin ra nyí tsihin ra Jesús, tava ra mityi ra tan tsahnya ra soho musu ra jutu tsahnu cuví ityi nuu. ⁴⁸ Tacan tan catyí ra Jesús tsihin ra quihin tsi ra:

—¿A ñasuhu cuví yuhu? tyin vatsí ndo vatsí quihin ndo tsi yu tsihin mityi tan yutun. ⁴⁹ Ndíhi quivi tsinyí yu jacuahá yu tsi ndo tsitsi vehe ñuhu cahnu, tan ña quihin ndo tsi yu. Tandihí tsehe cuví tyin tacan tan cundaas tsa catyí nu tutu Nyoo —catyí ra Jesús tsihin ra naha.

⁵⁰ Tacan tan tsinu tandihí ra tsicá tsihin ra, tan ndoo intuhun ña maa ra jahá ra naha. ⁵¹ Maa tyin ndoo intuhun ca ra tyuvaa tan cuahán ra cuanyicún ra tsi ra, ndásí ra tsihin iin ticiayi tan tiñi ndíhi ra naha tsi

ra.⁵² Maa tyin nacooq ihñi ra tictayi can tan tsinu tandíhi ra.

Nu tsicq tuhun ra mandoñi naha ra tsi ra Jesú tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindacá ra naha tsi ra Jesú tsi ra jutu tsahnu cuví ityi nuu tan ndu iñin tucu tandíhi ra jutu cuví ityi nuu naha ra tan ra cuví mandoñi nyivi Israel naha ra, tan ra maestro cuenda ley vehe ñuhu naha ra.⁵⁴ Ra Pedro nyicún tsica nyicún tsica ñi ra tsi ra naha cuahán ra. Tan tsaaq ra nda nuquehe yuvehe ra jutu tsahnu cuví ityi nuu can. Tan ndoq ra tuñú ra ñuhu tsihin ra vitya naha ra.

⁵⁵ Ra cuví jutu ityi nuu naha ra, tan tandíhi ca ra cumí tyiñu naha ra nducú ra naha cuatyi tyaa ra naha siquí ra Jesú, tyin tacan tan cuvi cahñi ra naha tsi ra. Maa tyin ña ñihí maa ra naha cuatyi tyaa ra naha tsi ra.⁵⁶ Cuaha xaan nyivi cahán cuendu siquí ra, maa tyin ña nacatsí tahan maa tuhun caahán ndi intuhun ñi.⁵⁷ Yihí ñi nduvitá ñi tan cahán ñi maa ñi maa cuendu siquí ra, tan catyí ñi:

⁵⁸—Nyuhu tsiñi ndi tsa cahán ra tan catyí ra tyehen: “Yuhu cua caní yu vehe ñuhu caahnu tsa javahá nyivi. Tan cua janduvita yu inga vehe ñuhu tsitsi tsa uñi quivi ñi. Maa tyin ñavín tahan vehe ñuhu tsa javahá nyivi” catyí ra —catyí ñi.

⁵⁹ Vasu ndi maa tacan caahán ñi, maa tyin ña nacatsí tahan maa tsa cahán ñi.

⁶⁰ Tacan tan nduvitá ra jutu tsahnu cuví ityi nuu mahñu tandíhi ra yucú ican naha ra, tan tsicq tuhun ra tsi ra Jesú, tan catyí ra:

—¿A ña cua nacahan un nu caahán nyivi ihyá? ¿A nditsa tsa caahán ñi, o ña nditsa? —catyí ra

⁶¹ Maa tyin ña nacahan maa ra Jesú tan nduve maa náa cahán ra. Tacan tan ra jutu tsahnu cuví ityi nuu tsica tuhun ra tsi ra inga tsaha, tan catyí ra:

—¿A yooho cuví ra Cristo, Sehe Nyoo ii tsa tsahá tsa vaha?

⁶² Tan ra Jesú catyí ra tsihin ra:
—Juvin. Nyoho cua nyehe ndo tsi yuhu, Rayii tsa quee nda gloria, nyaá yu xiin cuaha Nyoo, ra iyó tandíhi tunyee iñi, tan cua nyehe tucu ndo nu quitsi yu nu vico ityi andiví —catyí ra tsihin ra.

⁶³ Tacan tan tsahnya ra jutu tsahnu cuví ityi nuu jahma ra tumaa iñin seña tyin ña taahán iñi ra tsa caahán ra Jesú tyin cuñí maa ra tyin ña vaha tsa caahán ra, tan catyí ra:

—Ña tsiní ñuhu ca tsa nducu yo tsi ra cuvi tsa ndaa. ⁶⁴ Tyin tsa tsiñi maa ndo tsa cahán ra. Tsicoq cuatyi ra nuu Nyoo tsihin tuhun cahán ra. ¿Náa catyí ndo vityin? —catyí ra.

Tacan tan nacahan tandíhi ra naha tan catyí ra naha tyin taahán tsi cùu ra.

⁶⁵ Tacan tan quitsahá tiví sií juhva ra naha tsi ra. Tyasi ra naha nuu ra, tan cañi ra naha tsi ra tsihin tsiquí tan catyí ra naha tsihin ra:

—¡Cahan tsihin ndi yóo cañi tsi un! —catyí ra naha tsihin ra.

Tan cañi tucu ra vitya naha ra nuu ra.

Nu cahgn ra Pedro tyin ña nacotó ra tsi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Tsitsi tsa ndi nyíí ra Pedro nuquehe tsata vehe ra jutu tsahnu cuví ityi nuu, tsaaq iñi ñaha cuví musu ra jutu can.⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quitsahá nyehé xaan ña tsi ra, tan catyí ña tsihin ra:

—Tsica tucu yooho tsihin ra Jesú, ra ñuu Nazaret can —catyí ña tsihin ra.

⁶⁸ Maa tyin ra Pedro tyihí xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quita ra ityi yuhu cora. Tan tsacu ñi tsitooho.⁶⁹ Tacan tan ñaha can nanyehé nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihyá —catyí ña.

⁷⁰ Maa tyin tyihí xeehe nyico ra inga tsaha. Tacan tan ñaha iñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooho, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¡Tsító vaha maa Nyoo tyin ña nacotó yu tsi ra tsa caahán ndo tuhun! ¡Na cañi

maa Nyoo tsiyu tun ña nditsa yutsa caahán yu! —catyí ra.

⁷² Juvín ñi cuhya can navacu tsitooho tsa tsinu uvi tsaha. Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho uvi tsaha, yooho tsa yahá cahan un ñuni tsaha tyin ña nacotó un tsiyu.” Tsa nducuhun iñi ra Pedro tsehe, quitsahá ra tsacú ra.

15

*Nu jaqueé yuhu ra Pilato tsi ra Jesús
(Mt. 27.1-2, 11-14; Lc. 23.1-5; Jn. 18.28-38)*

¹ Tan tsa tuví inga quíví ndu iñi ra jutu cuví ityi nuu naha ra tsihin ra mandoñi naha ra tsihin ra maestro cuenda ley vehe ñuhu naha ra, tan tandíhi ca ra cumí tyínu tsa yihí ndaha tsi nyívi Israel. Nuuhní ñi maa ra Jesús tan tsindacá ra naha tsi ra nuu ra Pilato. ² Tan tsicá tuhun ra Pilato tsi ra, tan catyí ra:

—¿A juvin un cuví rey nyívi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu cahán ra cuví jutu ityi nuu naha ra siquí ra Jesús. ⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cuha nacahan maa un? Nyéhe, cuaha xaan cuatyí tyáa ra naha siquí un —catyí ra.

⁵ Maa tyin ra Jesús ña nacahan maa ra. Yacan cuenda ña ñihí ra Pilato náa cahan ra.

*Nu tsahá ra Pilato ndatu tsa ciúra ra Jesús
(Mt. 27.15-31; Lc. 23.13-25; Jn. 18.38-19.16)*

⁶ Vico pascua tuhvá ra Pilato nacoó nuña iñi ra yucú vehe caa. Tan tavá ra ndáa ra cuní maa nyívi tyin tava ra. ⁷ Quíví can nyí iñi ra nañí Barrabás vehe caa, tsihin inga ca ra tsahñí nyívi nu cuvaqá nyívi siquí ra ndacá ñaha. ⁸ Tan tsahán nyívi tsicahan ñi tsihin ra Pilato na jaña ra iñi ra yucú vehe can tumaa tuhvá maa ra javahá. ⁹ Tan nacahan ra Pilato, tan catyí ra:

—¿A cuní ndo tsa jaña yu tsi ra cuví Rey ndo?

¹⁰ Tacan cahán ra tyin tuví iñi ra tyin tsaha cuenda ra jutu cuví ityi nuu naha ra tsi ra Jesús tsi ra tsa cuenda tsa ndasí cuñí ra naha nyéhe ra naha tsi ra tyin cuaha nyívi nyicún tsi ra. ¹¹ Maa tyin ra jutu cuví ityi nuu can naha ra natyuhú ra naha tsi nyívi

tsa cahan ñi na tava ra Pilato tsi ra Barrabás vehe caa. ¹² Tacan tan tsicá tuhun ra Pilato tsi ñi, tan catyí ra:

—¿Tun tacan, náa cuñí ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

¹³ Tacan tan caná tsaa ñi, tan catyí ñi:

—¡Tyaa tsi ra nu cruu na ciúra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javaha ra? —catyí ra.

Ñi ican quitsahá caná tsaa nyico ñi tan catyí ñi:

—¡Tyaa tsi ra nu cruu na ciúra! —catyí ñi.

¹⁵ Tacan tan tsa cuñí ra Pilato ndoo vaha ra nuu nyívi, tavá ra tsi ra Barrabás vehe caa. Tsa yahá tavá ra tsi ra can, tavá tyínu ra na ndoho ra Jesús. Tsa yahá ndohó ra Jesús, tan tsaha cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacá ra andaru can naha ra tsi ra nuquehe vehe tyínu. Tan jandu iñi ra naha tandíhi ca andaru. ¹⁷ Tan jacunditsi ra naha iñi jahma cuaaha tuun tsi ra. Tan javahá ra naha iñi corona iñu. Tan tyíhi ra naha can jiñi ra. ¹⁸ Tsa yahá yacan tan quitsahá caná tsaa ra naha tsata ra tan tsacú nducu ra naha tsi ra, tan catyí ra naha:

—¡Nacumi tsi un, yooho Rey nyívi Israel! —catyí ra naha.

¹⁹ Tan cañí ra naha jiñi ra tsihin yutun, tan tiví sií ra naha tsi ra. Tan tsicuñi tsiti ra naha nuu ra jahá ra naha tyin jacahnú ra naha tsi ra. ²⁰ Tsa yahá tsacú nducu ra naha tsi ra, tavá ra naha jahma cuaaha tuun tsa jacunditsi ra naha tsi ra. Tacan tan jacunditsi nyico ra naha jahma maa ra tsi ra. Tan cuahán ra naha tsihin ra cuatícaá ra naha tsi ra nu cruu.

*Nu tyaqá ra naha tsi ra Jesús nu cruu
(Mt. 27.32-44; Lc. 23.26-43; Jn. 19.17-27)*

²¹ Ityi cuahán ra naha tahán ra naha iñi ra ñuu Cirene tsa nañí Simón. Tan cuví ra jutu ra Alejandro tan ra Rufo. Ndi vatsí nuhu ra quee ra cuhu. Cuhva tsa cua yaha ra, jañiñi ra andaru naha ra tsi ra na cuioso ra cruu ra Jesús.

²² Tan tsindacá ra naha tsi ra Jesús iñi nu nañí Gólgota, tan cuñí tsi catyí Yíquí Jiñi Ndiyi. ²³ Tan ican jacoho ra naha vinu saca nuu tsihin numeri tsa nañí mirra tsi ra. Maa

tyin ra Jesúś ña cuñi ra coho ra can.²⁴ Tsa yahä tyaa ra andaru naha ra tsi ra nu cruu, quihin ra naha jahma ra tan tava cuenda ra naha tyin cuñi ra naha coto ra naha yóo cua jaha canaa intuhun intuhun jahma can.

²⁵ Tyaq̄ ra naha tsi ra nu cruu caa iin tsatuvu. ²⁶ Tan letra tsa tyaq̄ ra naha jiñi cruu ra, catyí tsi nacuenda cua cíu ra. Tan catyí tsi tyehen: “Ra ihyá cuví Rey nyiví Israel.”

²⁷ Tan tyaq̄ ndihí ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra. ²⁸ Tacan cuví tan cundaç cuhva catyí nu tutu Nyoo tyehen: “Javaha nyivi tsihin ra tumaa jayahá ñi tsihin ra caquiñi.” ²⁹ Tan nyiví yahá ican jacuñi nyaa ñi tsi ra, tan javicó ñi jiñi ñi tsa tsacú nducu ñi tsi ra, tan catyí ñi:

—¡jaan! ¡yooho tsa cahan tyin cua caní un vehe ñuhu cahnu, tan tsitsi tsa uñi quiví cua janduvaha nyico un itsi,³⁰ jacacu tsi un vityin tan nnu nu cruu juvin! —catyí ñi.

³¹ Tan juvin ñi tacan tsacú nducu tucu ra jutu cuví ityi nnu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—Jacacu ra tsi inga ca nyiví, maa tyin ña cuví jacacu ra tsi maa ra!³² Tun nnu ra nu cruu vityin nyehé yo, tacan tan cua tsinu iñi yo tyin juvin ra cuví ra Cristo, Rey cuenda yo tsa cuví yo nyiví Israel —catyí ra naha.

Tan nda cuanda nu ñasuhu tsa ticaá nu cruu nduvi tsivo xiin ra tan tsacu nducu ndihí nahnu tsi ra.

Nu tsihí ra Jesúś

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunañ naniñ cahnu nda cuanda caa uñi tsa tseñi.³⁴ Tan juvin ñi cuhva can cana tsaa ra Jesúś tsihin tandihí tunyee iñi ra, tan catyí ra:

—Eloi, Eloi, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu? —catyí ra.

³⁵ Juhva ra yucú ican naha ra tsiní ra naha tsa cahan ra tan catyí ra naha:

—¡jhina ndo! Caná tsaa ra tsi ra Elías, ra cuví ndusu yuhu Nyoo tahan tsanaha —catyí ra naha.

³⁶ Tacan tan tsinú xaan iin ra tsiquihin ra iin yahma tsa caá tumaa caá catyí, tan jatyíi ra can tsihin vinu iya. Tan tyaq̄ ra can iin nu yutun tan jatuhvá ra yuhu ra Jesúś tyin coho ra vinu can, tan catyí ra:

—Na cuatu nuu yo. Nyehe yo tun quitsa Elías januu ra tsi ra nu cruu can —catyí ra.

³⁷ Tacan tan ñihi xaan cana tsaa ra Jesúś, tan tsihí ra. ³⁸ Tan jahma tsa ticaá tsitsi vehe ñuhu cahnu ndata sava tsi, nda siquí tan nda cuanda ityi tsaha. ³⁹ Tan ra capitán tsa yihí ndaha andaru tsa nyaá yatayin ñi nu ticaá ra Jesúś nyehe ra nácaa cana tsaa ra, tan nácaa tsihí ra, tacan tan catyí ra:

—Nditsa nditsa cuii tyin Sehe Nyoo tsi ra ihyá —catyí ra.

⁴⁰ Tan ndasava ñi nyecú tucu juhvá ñiñaha nyehé ñi. Tan mahñu ñi can nyí ña María tsa quee ñuu Magdala, tan ña María sihi ra José tan ra Jacobo ra tuvaa ca. Tan nyí tucu ña Salomé.⁴¹ Ñiñaha ihyá tsinyicún ñi tsi ra Jesúś, tan jatyinyee ñi tsi ra quívi tsicá nuu ra ityi Galilea. Tan yucú cuaha tucu ñiñaha inga ñuu tsa tsaa tsihin ra ñuu Jerusalén ican.

Nu tsicutsi ra naha tsi ra Jesúś

(Mt. 27.57-61; Lc. 23.50-56; Jn. 19.38-42)

⁴² Quiví tsa tuhvá nyiví janduvaha tsa catsi ñi cuenda inga quívi tuhvá ñi quitatu, juvin ñi tseñi can⁴³ tsaa ra José ra ñuu Arimatea nu nyí ra Pilato. Ra José can cuví ra iin ra nyisó tysiñu cahnu vehe tysiñu, tan ndatú tucu maa ra tsi ra tsa cua jaquitsi Nyoo tysiñu cundaca ñaha nu ñuhu ñayiví. Ña nayuhví ra tan tsahan ra tsindacan ra cuñu ñuhu ra Jesúś tsi ra Pilato.⁴⁴ Tsa tsito ra Pilato tysiñu tsa yahä tsihí ra Jesúś, iyo xaan cuñi ra. Tacan tan cana ra tsi iin capitán tan tsicá tuhun ra tsi ra tun nditsa tysiñu tsa tsihí ra Jesúś.⁴⁵ Tan tsa tsito vaha ra Pilato tysiñu tsa yahä tsihí ra Jesúś, tavya tysiñu ra na cuhva ra andaru naha ra cuñu ñuhu ra tsi ra José.⁴⁶ Tacan tan tsijata ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesúś nu cruu. Yaha can tan cavá nuu ra jahma can cuñu ñuhu ra. Tacan tan tysiñu tsa tsihin iin yuu cahnu.⁴⁷ Tan ña María, tsa quee ñuu Magdala, tan ña María, sihi ra José, tsahan ñi, tsinyehé ñi nu tinyij ra José can cuñu ñuhu ra Jesúś.

¹ Tsa yah_a quíví quitatú nyivi, ña María ñuu Magdala, tan ña María sihi ra Jacobo, tan ña Salomé jata ñi ndutya tami tyin cuñí ñi cuhun ñi cutyihí ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsín cuii ñi quíví quitsahá vitya. Tan tsaa ñi ican cuhva tsa cua cana cuii ñi ñicanyii. ³ Tan ityi cuahán ñi natuhún tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaa ñi nyehé ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quíhví ñi tsitsi cava nu nyaá ñaña can, nyehé ñi nyaá iin ángel tsivo cuaha. Tan caá ra tumaa caá iin ra tuyuva. Nditsí ra jahma cuitsin cañi. Tan nayuhví xaan ñi. ⁶ Maa tyin catyí ra tsihin ñi:

—Ña nayuhví ndo. Tsitó yu tyin nanducú ndo tsi ra Jesús, ra ñuu Nazaret, ra tsa tsihí nu cruu. Maa tyin nduve ca ra nyíl ihyá vityin tyin tsa nandoto ra. Nyehé ndo nu tinyij ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca ra tsicá tsihin ra Jesús. Tan catyi ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cíu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihi ñi jahá tsa yuuhví ñi. Tan ña cahán maa ñi tsa cahan ñi tsihin ndi intuhun maa nyíví tyin yuuhví xaan ñi.

Nu quituví ra Jesús nuu ña María quee ñuu Magdala

(Jn. 20.11-18)

⁹ Ra Jesús nandoto ra quíví quitsahá vitya. Tan quituví ra jihna cuii ca nuu ña María ñuu Magdala. Juvín ña cuví ña tsa tavá ra utsa tatyí ña vaha. ¹⁰ Tsahan ña tsijacoto ña tsi ra tsicá tsihin ra, tyin yucú ra naha tsihin tucuihyá iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehé ña tsi ra, ña tsinú iñi ra naha.

Nu quituví ra Jesús nuu uvi ra tsicá tsihin ra

(Lc. 24.13-35)

¹² Tsa yah_a yacan, tan quituví ra Jesús nuu uvi ra tsa cuahán ityi cuhu naha ra. Maa tyin siín cuhva caá ra nyehé ra naha. ¹³ Tan tsinuhú ra naha tsijacoto ra naha tsi tandíhi

ca ra naha. Maa tyin juvin ñi ña tsinú iñi ra naha tsa cahán ra can naha ra.

Nu tsah_q ra Jesús tyiñu tsi ra tsa tsicá tsihin ra

(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituví ra Jesús nuu tandíhi tsa utsi iin ra tsa tsicá tsihin ra, tsitsi tsa nyecú ra naha nu mesa. Tan cuxaan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinú iñi ra naha tsa cahán nyíví tsa nyehe tsi ra tsa yah_a nandoto ra. ¹⁵ Tan catyí ra tsihin ra naha:

—Cuaahan ndo naníi cahnu nu ñuhu ñayíví, tan cahán ndo tuhun Nyoo tsihin tandíhi nyíví, tan catyí ndo tsihin ñi nácaa jacacú Nyoo tsi ñi. ¹⁶ Tan nyíví tsa cua tsinú iñi tan coodutyi ñi, cua cacu ñi. Maa tyin ñi tsa ña cua tsinú iñi cua ndoo cuatyi ñi siqui ñi tan cua cunaa ñi. ¹⁷ Tan tandíhi tsa iyo ihyá cua javaha nyíví tsa cua tsinú iñi tsi yu: Tsihin siví yu cua tava ñi tatyí ña vaha, tan cua cahán ñi inga yuhu tsa ña tuhvá ñi cahán. ¹⁸ Cua tiñi ñi coo, tan tatum coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyíví cuuhví, tan cua nduvaha nyíví.

Nu ndaq ra Jesús andiví
(Lc. 24.50-53)

¹⁹ Tsa ndihí cahán Jutu Mañi yo Jesús tsihin ra naha, tacan tan ndaq ra andiví, tan tsinyaq ra xiin cuaha Nyoo. ²⁰ Tacan tan ra tsicá tsihin ra quitá ra naha tan tsahan ra naha tandíhi ñi ityi tsicahán ra naha tuhun Nyoo nácaa jacacú ra tsi yo. Juvín ñi maa Jutu Mañi yo jatyinyee tsi ra naha tyin tsahá ra tsa javaha ra naha cuaha tsa iyo. Tan tsihin yacan nyehé nyíví tyin nditsa tsa cahán ra naha.

Tan na cuvi tsi tacan ñi.

Tuhun Nyoo Tsa Tyaa Ra Lucas

*Nu quitsahajacotó ra Lucas tuhun ra Cristo
tsi ra Teófilo*

¹ Cuaha ñi nyiví nducu ñi cuhva tyaa ni nuu tutu tandíhi tsa cuví nu yucú ndi ihyá. Tyaa ñi cuhva ² nacatý tuhun nyiví tsihin yo, ñi tsa nyehe tan cahan tuhun ra Jesús nda quíví jihna ñi. ³ Tan yuhu tucu tsa yahá cuhviyu tan nducu tuhun vaha yu tandíhi tsa cuví nda nu quitsahá. Yacan cuenda cuví yu tyaa yu tuhun ihyá tsa cuenda un, yooho Teófilo, nda nu quitsahá tan nda nu ndíhi. ⁴ Tyin tacan tan coto un tyin nditsa tsa jacuahá nyiví tsi un.

*Nu jacotó iin ángel tsi ra Zacarías ama cua
cucu ra Juan, ra cua jacoondutya tsi nyiví*

⁵ Quíví tsa cuví ra Herodes rey taníi cahnu cuenda Judea, tsicoó iin ra cuví jutu, nañí ra Zacarías. Tan yihí ra cuenda ra cuví jutu naha ra tsa nañí Abías. Tan ñasíhihi ra nañí ña Elisabet. Tata ra Aarón, ra cuví jutu tahán tsanaha, cuví ña. ⁶ Tan nduve maa cuatyí ñi nuu Nyoo. Tyin vaha xaan tyá yahvi ñi tuhun caahán Nyoo Jutu yo. Tan yoñí maa cuví tyaa cuatyí tsi ñi. ⁷ Tan nduve maa sehe ñi tsicoó. Tyin ña Elisabet, ña cuví coo sehe ña. Tan tsa tsahnu xaan nduve taahan ñi.

⁸ Iin quíví taahán tsi tandíhi ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuví jutu naha ra, tavá ra naha suerte, ndáa ra cua tahan tsi quihví tsitsi vehe ñuhu Jutu Nyoo, tyin cahmi ra cutu. Quíví can tahan tsi tsi ra Zacarías. ¹⁰ Tan cuaha nyiví yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can. ¹¹ Tan tsitsi tsa ndi nyí ra ican tan quituví iin ángel Jutu Nyoo nu nyí ra. Tan nyaá nyityí ángel can ityi xiin cuaha nu nyaá altar nu tsahmí ra cutu. ¹² Tan tsa nyehe ra Zacarías tsi ángel ican, iyo xaan cuñí ra. Tan nayuhví xaan ra. ¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñí ra tsa cahan un tsihin ra. Tan cua coo iin sehe ña Elisabet ñasíhihi un. Tan cua cunañí ra Juan. ¹⁴ Siíxaan cua cuñí un. Tan cuaha xaan nyiví cua cusíi ndíhi iñi

quíví cua cacu ra. ¹⁵ Tyin sehe un, cahnu xaan cua cuvi ra nuu Nyoo Jutu yo. Ña cua coho ra vinu tan ndi nyixi. Tan ñihí xaan cua quíhi Tatyi li Nyoo tsi ra tsa ndi cumañí ca cacu ra tan tandíhi tyembu tsa cua coo ra. ¹⁶ Tan cuaha xaan nyiví Israel cua cunyicun ñi tsi Jutu yo Nyoo jaha ra. ¹⁷ Juvin ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quíhi xaan Tatyi li Nyoo tsi ra. Tyin cua cuvi ra tumaa ra Elías, ra cuví ndusu yuhu Nyoo tahán tsanaha. Tan cua cuhva cuenda ra nácaa coo vaha nyiví iyó sehe tsihin sehe ñi. Tan cua janaha ra tsi nyiví caquiñí, na tyaa yahvi ñi tuhun caahán Nyoo. Tacan cua janduvaha ra tsi nyiví tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsica tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasíhihi yu? Tyin yuhu tsa tsahnu xaan yu. Tan tacan tucu ñasíhihi yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañí yu. Tan tsicá yu tyiñu Nyoo. Maa ra tavá tyiñu tsi yu tyin jacoto yu tyiñu ihyá tsi un tan jacoto yu tuhun vaha ihyá tsi un. ²⁰ Tan vityin cua nduñíhihi un. Tyin ña tsinú iñi un tsa caahán yu tsihin un. Tan ña cua cuvi cahan un nda cuanda tsa yahá cacu sehe ñasíhihi un. Tan nda quíví cunda tandíhi tsa cahan yu tsihin un —catyí ángel ican tsihin ra.

²¹ Tan nyiví tsa ndatú tsi ra Zacarías ityi tsata vehe ñuhu, iyo xaan cuñí ñi tyin cucuee xaan ra tsitsi vehe ñuhu can. ²² Tan cuhva tsa quita ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsahá caahán ra tsihin ñi tsihin ndaha ra. Tyin ña cuví cahan ra.

²³ Tan quíví ndíhi tyiñu jahá ra Zacarías vehe ñuhu can, tan cuanuhu ra yuvehe ra. ²⁴ Tsa yahá quíví can tan tsicuhun sehe ñasíhihi ra, ña Elisabet. Tan ña quita maa ña tsata vehe tsa tandíhi tsa uhun yoo. Tan tsicá iñi ña: ²⁵ “Tyehen javahá Jutu Mañi yu tsihin yu, tyin tacan tan ña cahan nyaá ca nyiví tsi yu”, cuñí ña tsicá iñi ña.

*Nu jacotó iin ángel tsi ña María tyin cua
cucu ra Jesús*

²⁶ Tsa quita iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel

ñuu Nazaret tsa canyií Galilea.²⁷Tyin cahan ra tsihin iin ñaha yoco tsa nañí María. Tan tsa nyaá maa tsa cua tindaha ña tsihin ra nañí José, ra cuví tata ra rey David.²⁸Tan quihví ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihí ca ñaha —catyí ángel ican tsihin ña:

²⁹Tan tsa tsiní ña tsa cahan ra, iyo xaan cuñí ña tsa cahan ra. Tan tsicá iñi ña: “¿Nacuenda tacan caahán ra ihyá nacumi tsi yo?” tsicá iñi ña.

³⁰Tan catyí ángel ican:

—Ña nayuhvi un, María, tyin ñihí un tumañi iñi Nyoo.³¹Vityin cua cuhun sehe un. Tan cua cunañi ra Jesús.³²Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuví ra David, tsii tsaañhu ra.³³Tyin cua cundaca ñaha ra tsi nyiví Israel tandihí maa tyembu. Tan ña cua ndíhi maa tsa cundaca ñaha ra —catyí ángel can tsihin ña.

³⁴Tacan tan tsicá tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo iyí yu.

³⁵Tan nacahan ángel tan catyí ra:

—Maa Tatyí li Nyoo cua quitsi síquí un. Tan tunyee iñi Nyoo, ra nyaá gloria, cua quitsi tan cua casí tsi síquí un tumaa in vico. Yacan cuenda Ra li tsa cua cacu cua cunañi ra Sehe Nyoo.³⁶Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyiví tyin ñaha can ña cuví coo sehe ña. Maa tyin vityin tsa ñuhú sehe ña. Tsa iñu yoo tsa ñuhú sehe ña.³⁷Tyin Nyoo nduve tsa ña cuví jaha ra —catyí ángel tsihin ña.

³⁸Tan catyí ña María:

—Yuhu cuíví yu musu Jutu Mañi yo. Na jahava maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyiví ña Elisabet

³⁹Tan iin quivi can, numi fi cuahán ña María iin ñuu tsa canyií Judea nu maa fi maa yucu iyó.⁴⁰Tan quihví ña tsitsi vehe ra Zacarías. Tan nacuhva ña nacumi tsi ña Elisabet.⁴¹Tan tsa tsiní ña Elisabet tsa cahan ña María, tan natuñu sehe ña tsitsi

ñia. Tan ñihí nyaá Tatyí li Nyoo tsihin ña.

⁴²Tan ñihí xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihí ca ñihaha. Tan nasoco ra tsi sehe un.⁴³¿Tan yóo cuví yuhu? Tyin quitsi sihi Jutu Mañi yu quitsi nyehé ña nu nyaá yu.⁴⁴Cuhva tsa tsiní yu tsa cahan un, tan natuñu sehe yu tsitsi yu. Tyin sií xaan cuñí ra.⁴⁵Tan sií xaan cuñí tucu maa añima un tyin tsinú iñi un. Tyin cua cuvi cuhva tsa cahan Nyoo tsihin un —catyí ña Elisabet.

⁴⁶Tan catyí ña María:

—Jacahnú yu tsi Nyoo tsihin tandihí añima yu.

⁴⁷Tan sií xaan cuñí añima yu tsihin Nyoo ra jacacú tsi yu.

⁴⁸Tyin cuví yuhu iin ñaha ndaahvi tan Nyoo nyehé ndaahvi ra tsi yu.

Tan vityin tandihí quivi cua cahan nyiví tyin cahnu xaan tumañi iñi ñihí yu.

⁴⁹Tyin Nyoo, cahnu xaan cuví ra. Tan cahnu tsa javahá ra tsihin yu.

Tan ii xaan sivi ra.

⁵⁰Tan ndaahvi cuñí ra tsihin tandihí nyivi tsa cua coo tan tyaa yahvi ñi tsi ra.

⁵¹Cahnu xaan tsa javahá ra tsihin tunyee iñi tsa iyó tsi ra.

Jatsiyo ra tsi nyiví tsa cahnu xaan tsicá iñi ñi.

⁵²Quinyaa ra tunyee iñi iyó tsi nu cuví rey.

Tan cua janducahnu ra tsi nyiví ndaahvi.

⁵³Tsahá Nyoo tsa vaha tsi nyiví cuñí coto tsa vaha.

Tan nyiví cua tsa cuñí tyin nduve tsa tsiní ñuhu tsi ñi, tsihin ndaha ndíi ñi, jacuhún ra tsi ñi.

⁵⁴Jatinyéé ra tsi nyiví Israel tsa cuví ñi musu ra.

Tan ña naá iñi ra tsi ñi. Nyehé ndaahvi ra tsi ñi.

⁵⁵Tumaa cuhva catyí Nyoo tsihin ra Abrahám, tsii tsaañhu yo, tan tsihin sehe ra, tacan ñi javahá maa Nyoo —catyí ña María.

⁵⁶Tan ña María ndoo ña tsihin ña Elisabet uñi yoo. Tan tsa yahá uñi yoo can tan cuanuhu ña nda yuvehe ña.

Quivi cacu ra Juan, ra tsa jacoondutyá tsi nyiví

⁵⁷Tsa tsaa quivi tsa cacu sehe ña Elisabet, jacacu ña iin rayíi.⁵⁸Tan nyiví vehe ña tsihin nyiví tsa iyó yatyn ñi yuvehe ña, sií xaan cuñí ñi.

Tacan tucu maa ña. Tyin vaha xaan tsa javahá Nyoo tsihin ña.⁵⁹Tan

tsa quítä una quívi tsa cacü ra, tan tyaa ra
naha tuñi Nyoo tsi ra tumaa cuhva iyó maa
ñi. Tan cuñí ra naha tsa cunañi ra Zacarías
tumaa nañí maa jutu ra. ⁶⁰ Maa tyin sihi ra
catyí ña:

—Na cuví. Tyin Juan cua cunañi ra.

⁶¹ Tan catyí ra naha:

—¿Nacuenda jacunañí un Juan tsi ra?
Tan yoñi nyivíndo nañí tacan —catyí ra
naha.

⁶² Tan quitsahä tsicá tuhun ra naha tsihin
ndaha ra naha tsi jutu ra. Tyin coto ra naha
náa siví cuñí ra tsa cunañi ra. ⁶³ Tan tsican
jutu ra iin vitu, tan nuu vitu ican tyaa ra:
“Juan cua cunañi ra”, tyaa ra.

Tan tandihí maa ra ican naha ra iyo xaan
cuñí ra naha tsa tacan. ⁶⁴ Juvín ñi maa
hora can nacahanra Zacarías. Tan quitsahä
jacahnú ra tsi Nyoo. ⁶⁵ Tan tandihí maa nyiví
iyó yatayin yuvehe ñi, iyo xaan cuñí ñi cuví.
Tan tandihí maa nyiví tsa iyó yucu iyó Judea
ican nacatyí tuhun tahan ñi tsa cuví can.

⁶⁶ Tan tandihí maa nyiví tsa tsito can, tsicá
iñi ñi, tan tsicá tuhun tahan ñi tsi ñi:

—¿Yóo ra cua cuvi ra lee ihya? —catyí
ñi.

Tyin nditsa, Nyoo nasocó xaan ra tsi ra.

Nu jacobny ra Zacarías tsi Nyoo

⁶⁷ Ra Zacarías jutu ra Juan, ñihi nyaá Tatyí
Ii Nyoo tsihin ra. Tan tsahä cuenda ra tsa
caahán Nyoo tsihin ra, tan catyí ra:

⁶⁸ —Cahnu xaan ra cuví Jutu yo Nyoo
cuenda yo nyiví Israel.

Tyin quitsi ra nu yucú yo, tsa cuví yo nyiví
maa ra. Tan jacacú ra tsi yo.

⁶⁹ Tan tsahä ra iñi ra tsa cahnu xaan cuví tsi
yo, ra cua jacacu tsi yo.

Tata ra David, ra tsa cuví musu Nyoo cuvi
ra.

⁷⁰ Tacan cua javaha ra, catyí Nyoo tahan
tsanaha, quivi cahen ra cuví ndusu
yuhu ra, tan catyí ra naha tyehen:

⁷¹ Cua jacacu Nyoo tsi yo ndaha nu xaan iñi
tsi yo, tan nuu tandihí nu tsa ndasi
cuñí nyehe tsi yo.

⁷² Tan cua cundaahvi iñi ra nyehe ra tsi nyiví
yo tsa tsicoog tahan tsanaha.

Tan cua nducuhun iñi ra tsa cahen ra tsihin
ñi tahan tsanaha.

⁷³ Cahen maa Nyoo tsihin ra Abraham, tsii
tsaahnu yo,

⁷⁴ tan catyí ra tyin cua jacacu ra tsi yo ndaha
nu xaan iñi tsi yo.

Tyin ña cua nayuhvi ca yo jacahnú yo tsi ra.

⁷⁵ Tan maa ra cua janaha ra cuhva coo yo.
Tan vaha cua coo yo nuu ra tan coo yo
maa ñi tsa cuenda maa ra tandihí
quivi tsa cua coo yo ñayiví —catyí
ra Zacarías.

⁷⁶ Tan catyí ra Zacarías tsihin lee can:

—Sehe luhlu yu, yooho cua cuvi un ndusu
yuhu Nyoo, ra nyaá gloria.
Tyin cuhun un ityu nuu Jutu Mañi yo. Tan
cua cahen un tuhun ra tsihin nyiví
tyin tsa cuñí quitsi ra.

⁷⁷ Tan cua jacoto un tsi nyiví tyin cua jaha
Nyoo tucahnú iñi tsi ñi.
Tacan tan caca añima ñi.

⁷⁸ Tyin Jutu yo Nyoo cuñí ra tsi yo. Tan
cundaahví xaan iñi ra tsi yo.
Tan cua jaquitsi ra iñi ra jatyinyee tsi yo.
Tan cuvi ra tumaa ñuhu ñicanyii.

⁷⁹ Tyin cua janaha ra ñuhu nditsin nu iyó
nyiví nu naa, nu ndatú tuhun tsihí
tsi ñi.
Cua janaha ra ityu ra tsi yo, ityu vaha —catyí
ra Zacarías.

⁸⁰ Tan ra luhlu can cua cuahnu ca ra. Ñihi
xaan tsicoog tunyee iñi tsi ra tsihin Tatyí
Ii Nyoo. Tan tsicoog ra iñi tsiqui ndii nda
cuanda quivi tsa nacoto nyiví Israel tsi ra.

2

Quivi cacü ra Jesús
(Mt. 1.18-25)

¹ Quivi ican tsicog iñi ra ndacá ñaha, ra
cuví rey cahnu, nañí ra Augusto. Tava tyiñu
ra tsi ra nyisó tyiñu naha ra na tyaa ra naha
siví tandihí nyivi tanii cahnu ñuu ñayiví.

² Ihyá cuví tsa jihna ñi tsinyaä siví nyiví. Tan
ra Cirenio cuví ra ra ndacá ñaha tandihí ñuu
nu cuví Siria. ³ Tan tandihí nyiví cuanuhú
ñi ñuu ñi, tyin cua ndaca ñi siví ñi. ⁴ Yacan
queé ra José ñuu Nazaret tsa canyí Galilea.
Tan cuahán ra ñuu Belén tsa canyí Judea,

nu cacu ra rey David, tyin tata ra David cuví
ra. ⁵ Cuahán ra cuandacá ra siví ra tsihin ña
María, tan tsa nyaá maa tsa cua tindaha ñi.
Tan ñuhu sehe ña. ⁶ Tan tsa ndi yucú ca ñi
ñuu Belén ican tan quitsahä cuuhví tsitsi ña
tyin tsa cua cacu sehe ña. ⁷ Tan ican cacu
sehe nuu ña. Tan cava nuu ña jahma tsi ra.

Tan nacaquin ña tsi ra tsitsi iñi canuva nu
tsatsí quiti itya. Tyin ña ñihí ñi iñin vehe coo
ñi.

*Cuhva cahen ángel tsihin ra jahá cuenda
mbee*

⁸ Yatyin ñi ñuu Belén can yucú ra jahá cuenda mbee tsa tsacuaa. ⁹ Tan sana iñi ra naha quituví iin ángel Nyoo. Tan jandunditsín Jutu yo Nyoo taníi cahnu nu yucú ra naha. Tan nayuhví xaan ra naha.

¹⁰ —Na nayuhví ndo —catyí ángel can—. Tyin vatsí cahan yu iin tsa vaha xaan tsihin ndo. Síi xaan cua cuñí tandihí cuii maa nyiví tsa cuenda tsi. ¹¹ Vityin nda ñuu ra David cacú iin ra cua jacacu tsi nyiví. Cuví ra Cristo, ra cuví Jutu Mañi yo. ¹² Tan tsihin cuhva ihyá cua nacoto ndo tsi ra: cua nañíhi ndo tsi ra lee ican, cavá nuu ra jahá tan canyíi ra tsitsí iin canuva nu tsatsí quítí —catyí ángel can tsihin ra jahá cuenda mbee can.

¹³ Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

¹⁴ Cahnu xaan cuví Nyoo, ra nyaá gloria. Tan nu ñihu ñayiví, na coo tsa vaha añíma nyiví tsa ñíhi tumañi iñi Nyoo, catyí ra ángel naha ra.

¹⁵ Tacan tan tsa cuanuhú ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacotó tsi yo —catyí ra naha.

¹⁶ Tacan tan numi xaan cuahán ra naha, tan nañíhi ra naha tsi ra lee can tsihin ñá María tan tsihin ra José. Tan canyíi ra lee can tsitsí iin canuva nu tsatsí quítí itya.

¹⁷ Tan cuhva tsa nyehé ra naha tsi ra, quitsáha natuhún ra naha tandihí tuhun cahán ángel tsihin ra naha tsa cuenda lee ican tsihin ñi. ¹⁸ Tan tandihí nyiví tsa tsíñi tuhun caahán ra naha, iyo xaan cuñí ñi. ¹⁹ Maa tyin ñá María naquihín cuenda ñá tuhun ican tsitsí ariúma ñá, tan tandihí tuhun ican tsicá iñi ñá. ²⁰ Tan cuanuhú ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehé ra naha tan tsa tsíñi ra naha. Tyin cundaá cuhva tsa catyí ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsí vehe ñuhu cahnu

²¹ Tsa ndu una quíví ra Jesús, tan tyaa ñi tuñí Nyoo tsi ra tyin tacan catyí tuhun tsahnu maa ñi. Tan jacunañi ñi Jesús tsi ra. Juvin ñi maa síví tsa catyí ángel tsihin ñá María quíví tsa ndi cumañi ca cuhun ra Jesús tsitsí ñá.

²² Tan tsa yahá quíví cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacú sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

²³ Tacan ñi javahá ñi tyin catyí ley Nyoo tyin: “Tandihí sehe nuu ñi tsa cuví rayii, cua tyaa cuenda ñi tsi ra ndaha Jutu yo Nyoo”, catyí ley ican. ²⁴ Tan tsahan ñi tsijamañi ñi uvi taahan quítí, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵ Tan quíví can iyó iin ra ñuu Jerusalén nañí ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyiví ñuu Israel ican. Tan nyaá Tatyi li Nyoo tsihin ra Simeón. ²⁶ Tan jacotó Tatyi li tsi ra tyin ña cíu naha ra tsa ndi cumañi ca nyehé ra tsi ra Cristo, ra cua jaquitsi Jutu yo Nyoo.

²⁷ Tan Tatyi li jacuhun ra tsi ra Simeón can nda vehe ñuhu. Tan juvin ñi cuhva can tsaa jutu ra tan sihí ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. ²⁸ Tan cuhva tsa tsaa ñi nu nyaá ra Simeón tan quihín ra Simeón tsi ra Jesús. Tan tyihi jucun ndaha ra tsi ra. Tacan tan quitsáha jacahnú ra tsi Nyoo, tan catyí ra:

²⁹ —Jutu Mañi yu, vityin tsa cundaá cuhva tsa catyí maa un tsihin yu, tsa cuví yu musu un, cuví jaña ndaha un tsi yu vityin, tan na cíu yu tsihin tsa vaha.

³⁰ Tyin tsa nyehé tsihin nuu yu tsi ra cua jacacu tsi ndi.

³¹ Tsa iyó ra ihyá ityi nuu tandihí nyiví.

³² Tan cua cuvi ra ñuhu tsa cua jandunditsín añíma nyiví tsa ñavin nyiví Israel cuví.

Tan cahnu ca cua jaha ra tsi nyiví Israel, tsa cuví ndi nyiví cuenda maa un —catyí ra Simeón.

³³ Tan ra José tsihin sihí ra Jesús, iyo xaan cuñí ñi tsa tsíñi ñi tsa cahan ra Simeón tsa cuenda lee ican. ³⁴ Tacan tan tsicán tahvi ra Simeón tsa cuenda ñi. Tan catyí ra tsihin ñá María sihí ra Jesús:

—Nyehé tsi lee ihyá. Cuaha xaan nyiví Israel ñuu Nyoo cua tsinu iñi tsi ra quíví coto ñi tuhun ra, tan cua cacu ñi. Maa tyin cuaha ñi ñá cua tsinu iñi ñi tsi ra. Nyoo

tsahā ra tsi ra tan cuví ra tumaa seña tsa cuenda yo.³⁵ Tacan tan coto tandih̄ yo náa tsicá iñi nyiví tun tsinú iñi ñi o ña tsinú iñi ñi tsi ra. Maa tyin tsa cuenda yooho, Maríā, tsehe cuví tumaa iin mityi xaam tsa cu ayaña añima un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyí tu cu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu xaan ña. Tan nda luhlu ña tan tindah̄ ña, maa tyin utsa cuiya ñi tsicoq ña tsihin yiñ ña tan tsihin ra.³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jachahnú ña tsi Nyoo, tan tsicán tahvi ña tan iyó nyitya ña.³⁸ Tan juvin ñi tsa ndi nyí ca ra José tan ña Maríā tsihin lee ican, tan tsaa ña Ana nu yucú ñi. Tan quitsahá nacuhvá ña tyahvi nyoo tsi Nyoo. Tan cahán ña tuhun ra Jesús tsihin tandih̄ nyiví tsa yucú ican, nyiví tsa ndatú tsa cacu ñuu Jerusalén.

Nu cuanuhu ñi nda ñuu Nazaret

³⁹ Tacan tan tsa yahá tsa javahá ñi tandih̄ maa tsa taahán tsi javahá ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyí Galilea nu cuví ñuu maa ñi.⁴⁰ Tan ra luhlu Jesús vatsí cuahnu ca ra. Tan cua ndunyea ca ra, tan tsihin tsa tsiní tuñi tsi maa ra. Tan Nyoo nasocó xaan ra tsi ra.

Nu cahán ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya.⁴² Tan tsa quita tsa utsi uvi cuiya ra Jesús, tan tsahan tandih̄ ñi nda ñuu Jerusalén, cuhva tuhun tsa iyó maa ñi.⁴³ Tan quivi ndihí vico, tan vatsí nuhu ñi, maa tyin ra luhlu Jesús ndog ra ñuu Jerusalén can. Tan ña jahá jutu ra tan sihi ra cuenda.⁴⁴ Tsicá iñi maa ñi tyin vatsí maa ra tyañu tandih̄ nyiví ican. Tan ndihí iin quivi tsicá ityi ñi. Tacan tan quitsahá nanducú ñi tsi ra tyañu nyiví nacotó tsi ñi.⁴⁵ Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yahá uñi quivi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe

ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

⁴⁷ Tan tandih̄ nyiví tsiní tsa caahán ra, iyo xaan cuñí ñi tsihin tsa tsiní tuñi tsa iyó tsi ra, tan tsihin tsa nacatý tuhun ra.⁴⁸ Cuhva tsa nyehe jutu ra tan sihi ra tsi ra, iyo xaan cuñí ñi, tan sihi ra catyí ña tsihin ra:

—Sehe luhlu yu. ¿Nacuvi tyin jayahá un tyehen? Jutu un tan yuhu tuñu xaan cuñí ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñí tsi nyehé yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuhu ra tsihin ñi nda ñuu Nazaret. Tan vaha jayahá ra tyin tyaá yahvi ra tsi ñi. Tan sihi ra naquihín vaha ña tandih̄ tuhun ihyá tsitsi añima ña.⁵² Tan ra Jesús cua cuahnu ca ra tan tsaá ca tsa tsiní tuñi jiñi ra. Tan sii xaan cuñí Nyoo tsihin ra, tacan tucu nyiví, sii xaan cuñí ñi tsihin ra.

3

Nu cahan ra Juan, ra jacoondutyá tsi nyivi, tuhun Nyoo nuu tsiquí

(Mt. 3.1-12; Mr. 1.1-8; Jn. 1.19-28)

¹ Tsa quita tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisanias ndacá ñaha ra Abilinia quivi can.² Tan ra Anás tsihin ra Caifás cuví ra naha jutu tsahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiquí.³ Tan ra Juan tsicá nuu ra tandih̄ ñuu tsa cayucú yatyin ñi yutya cuahnu Jordán, caahán ra tuhun Nyoo tsihin nyiví. Tan catyí ra tsihin ñi tyin na ndu uvi iñi ñi cuatyí ñi tan coondutyá ñi. Tacan tan Nyoo cua jaha ra tucahu iñi cuatyí ñi, catyí ra.⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahan tsanaha. Tan catyí ra:

Cua tyaa soho yo ndusurra nu caná tsaa ra nu tsiquí tan catyí ra:

“Nuñá ndo iin ityi cuíti tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu,

jandoó ndo ityi yacua, tan janduvahá ndo nu quiñi.

⁶Tacan tan tandihí nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷Tan tsa cuahán nyivi tsa cuñi ñi jacoondutya ra tsi ñi, tan catyí ra tsihin ñi:

—¡Nyoho cuví ndo tumaa tata cool! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuvi. ⁸Yacan násama ndo cuhva iyó ndo, na nyehe yo tyin tsa ndu uví iñi ndo cuatyi ndo nuu Nyoo. Tan ña nduya ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. ⁹Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua jahava Nyoo tsihin ndo —catyí ra Juan.

¹⁰Tacan tan nducy tuhun ñi tsi ra tan catyí ñi:

—¿Tan nácaa jahava ndi? —catyí ñi.

¹¹Tacan tan nacahan̄ ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹²Tan tsaā tucu ra tsa tavá xuhun cuenda ra ndacá ñaha nda ñiu Roma, tsa cuñi ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa jahava tucu nyuhu? —catyí ra naha.

¹³Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa jahava ndi? —catyí ra naha.

Tan nacahan̄ ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyi tsi ñi tatum nduve cuatyi ñi. Tan ndoo ndo vaha tsihin yahvi ndo —catyí ra Juan.

¹⁵Tan quiñi can tandihí nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo. ¹⁶Maa tyin ra Juan catyí ra tsihin tandihí ñi:

—Tsa nditsa tyin jacoondutýa yu tsi ndo tsihin nduty. Maa tyin vatsí inga ra tsa

cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuvi yu musu ra tan ndatsi yu ñii nditsan ra. Tan ra ican cua jacoondutya ra tsi ndo tsihin Tatyí li Nyoo, tan tsihin ñuhu ihñi. ¹⁷Tan ra ican ndahá ra pala tyin cua jandava ra trigu. Cua natava siñi ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan tsihin ñi.

¹⁸Tan tacan cahan̄ ra Juan tsihin nyivi can. Tan náa ndíhi ca maa cuhva cahan̄ ra tan jacoto ra tsi ñi nácaa tsa cua quitsi Sehe Nyoo. ¹⁹Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihin ra tsi ña Herodías, ñasihí ra Felipe, yaní ra, tsihin tsa cuenda náa ndihí tsa ña vaha javahá ra. ²⁰Maa tyin ña tyaa yahvi maa ra Herodes tuhun cahan̄ ra Juan. Nu ndíhi tuhun tinyij ra tsi ra Juan tsitsi vehe caa.

*Nu jacoondutya ra Juan tsi ra Jesucristo
(Mt. 3.13-17; Mr. 1.9-11)*

²¹Tsa ndi cumañi ca cuhun ra Juan vehe caa tan jacoondutya ra tsi tandihí nyivi. Tan jacoondutya ndíhi ra tsi ra Jesús. Tsa yahá tsicoondutya ra, tsican tahvi ra tsi Nyoo, tacan tan nuña andívi. ²²Tan nuu Tatyí li Nyoo siqui ra tumaa iin paloma. Tan cahan̄ iin ndusu ityi siqui andívi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

*Cuhva quitsi tata ra Jesucristo
(Mt. 1.1-17)*

²³Tan tsa iyó maa tan oco utsi cuiya ra Jesús tan quitsaha jahá tyiñu ra tyiñu Nyoo. Tan tandihí nyivi cuñi maa ñi tyin sehe ra José cuví tsi ra. Tan ra José, sehe ra Elí cuví tsi ra. ²⁴Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵Tan ra José, sehe ra Matatías cuví tsi ra. Tan ra Matatías, sehe ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. ²⁶Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra.

ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra.²⁷ Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra.²⁸ Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra.²⁹ Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra.³⁰ Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquím cuví tsi ra.³¹ Tan ra Eliaquím, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra.³² Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra.³³ Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra.³⁴ Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra.³⁵ Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra.³⁶ Tan ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra Arfaxad, sehe ra Sem cuví tsi ra. Tan ra Sem, sehe ra Noé cuví tsi ra. Tan ra Noé, sehe ra Lamec cuví tsi ra.³⁷ Tan ra Lamec, sehe ra Matusalén cuví tsi ra. Tan ra Matusalén, sehe ra Enoc cuví tsi ra. Tan ra Enoc, sehe ra Jared cuví tsi ra. Tan ra Jared, sehe ra Mahalaleel cuví tsi ra. Tan ra Mahalaleel, sehe ra Cainán cuví tsi ra.³⁸ Tan ra Cainán, sehe ra Enós cuví tsi ra. Tan ra Enós, sehe ra Set cuví tsi ra. Tan ra Set, sehe ra Adán cuví tsi ra. Tan ra Adán, sehe Nyoo

cuví tsi ra.

4

*Nu nducú cuhva nu ña vaha tsi ra Jesús
(Mt. 4.1-11; Mr. 1.12-13)*

¹ Tan ñihi nyaá Tatyi li Nyoo tsihin ra Jesús tsa yahá tsicoondutýa ra, quitá ra yutya Jordán tan cuanuhú ra. Tan quihín Tatyi li Nyoo tsi ra, tan tsahán ra iin nu cuví nu tsíquí² nu tsinyíjí ra uvi xico nduvi. Tan ña tsatsí maa ra tandíhi quíví ican. Yaha can tan quitsí tsa tsisocó ra. Tan nducú cuhva nu ña vaha tsi ra. ³Tan catyí nu tsihin ra:

—Tatun juvin Sehe Nyoo cuví tsi un, cahan tsihin yuu ihya, na nanduvi tsi paan catisi un.

⁴Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyiví coonyito ñi, tyin coonyito ñi tsihin tandíhi tuhun caahán Nyoo —catyí ra Jesús tsihin nu ña vaha.

⁵Tacan tan quihín nu ña vaha tsi ra Jesús, cauhán ra iin jíñi yucu sucun. Tan iin yaha ñi janahá nu tandíhi tsa cuca nu ndacá ñaha nu ñiu ñayiví ihya tsi ra Jesús. ⁶Tan catyí nu tsihin ra:

—Cuhva yu tandíhi tsa nyehé un tun cuñí un tyin maa Nyoo tsahá tsa cundaca ñaha yu tandíhi can, tan ndára cuñí yu cuhva yu can, cuví tsii ra. ⁷Tatun yootho tan cuiñi tsiti un nuu yu ihya tan jacobhnu un tsi yu, tandíhi can cua cuhva yu tsi un —catyí nu ña vaha tsihin ra.

⁸Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacobhnu tsi intuhun ñi maa ra taahán tsi javaha un.”

⁹Tacan tan quihín nu ña vaha tsi ra Jesús inga tsaha. Tan cauhán nu tsihin ra nda ñihu Jerusalén. Tan jandaá nu tsi ra iin nu sucun xaan nda jíñi vehe ñihu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñihu. ¹⁰Tyin catyí tsi nu tutu Nyoo tyin:

Nyoo cua tava tyiñu ra tsi ángel ra tan jaha cuenda ra naha tsi un.

¹¹Cua janahndi ra naha tsi un. Tan ña cua nañi tsaha un nu yuu.

¹²Tacan tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsaha caahán ra Jesús tuhun Nyoo tsihin nyivi

(Mt. 4.12-17; Mr. 1.14-15)

¹⁴ Tan tsa yahá tsa nducu cuhva nu ña vaha tsi ra Jesús tan cuanuhú ra nda Galilea tsihin tsa tsítu tuynee iñi Tatyi li Nyoo tsi ra. Tan tsító nyiví tuhun ra niñ cahnu Galilea can. ¹⁵ Tan jacuahá ra tsi nyiví nu cuví vehe ñuhu tandihí ñi ñuu. Tan tandihí ñi jacahnu ñi tsi ra.

Tsa tsaaq nyico ra Jesús ñuu Nazaret nu tsahnú ra

(Mt. 13.53-58; Mr. 6.1-6)

¹⁶ Tacan tan tsaaq nyico ra Jesús ñuu Nazaret nu tsahnú ra. Tan iin quíví quitatú nyiví, quíhví ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo. ¹⁷ Tan tsahá ra naha iin libru tsa tyaa ra Isaías ra cuví ndusu yuhu Nyoo. Tan cuhva tsa nuña ra, nañihí ra iin nu catyí tsi:

¹⁸ Iyó Tatyi li Nyoo tsihin yu, tyin maa Nyoo tava tyiñu tsi yu
cahan yu tuhun ra tsihin nyiví ndaaahvi.
Tan janduvaha yu tsi nyiví tsa uhvi añima.
Tan maa ra tava tyiñu tsi yu tyin jacoto yu
tsi nyiví yihí ndaha nu ña vaha, tyin
tsa cua quita nuña ñi tan maa ra cua
jacacu tsi ñi.

Tan cua jananyehe yu tsi nyiví cuua.
Tan cua nacoq nuña yu tsi nyiví tsa iyó tundoho.

¹⁹ Tan jacoto yu tsi nyiví tyin tsa quita quíví tsa nyaá Nyoo tumañi iñi tsihin ñi.

²⁰ Tacan tan ndihí cahví ra tan nacasi ra nuu libru can. Tan nacuhvá ra tsi iin ra tsa jatinyee tsihin tyiñu vehe ñuhu can. Tan tsinyaa ra Jesús. Tacan tan tandihí nyiví tsa nyecú icar, ndoo ñi tsa nyehé ñi tsi ra.

²¹ Tacan tan catyí ra tsihin ñi:

—Vityin quíví ihya tsa cundaq cuhva catyí tuhun Nyoo tsa cahví yu tsiñi ndo —catyí ra Jesús tsihin ñi.

²² Tan tandihí nyiví tsa nyecú can, vaha xaan cahán ñi tuhun ra. Tan iyo xaan cuñi ñi tsihin tandihí tsa vaha tsa cahán ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

²³ Tan nacahan ra Jesús:

—Tsa nditsa tyin tyehen tsicá iñi ndo nyehé ndo tsi yu: “Yooho ra janduvahá tsi nyiví, janduvaha jihna tsi maa un.” Tan cuñi tucu ndo catyí ndo: “Tandihí tsa javaha un ñuu Capernaum tsító ndi, javaha ndihí tucu can ñuu maa un ihya.”

²⁴ Tan cahán ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyiví ñuu ra naha tsi ra naha. ²⁵ Tan tsa nditsa tyin cuaha xaan ñi ndaaahvi tsa tsihí yíi tsicoo Israel ihya quíví tsa tava Nyoo tyiñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahán ra tuhun Nyoo. Tan quíví can ña cuñi maa savi uñi cuiya sasava. Tan tsicoo tama cahnu xaan.

²⁶ Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elíseo. Cuaha xaan ra cuuhví tsihin cuehe tyaaheyú tsicoo Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra quee ñuu Siria —catyí ra Jesús.

²⁷ ²⁸ Tacan tucu quíví tsicá inga ra cuví ndusu yuhu Nyoo cuenda nyiví Israel, ra Elíseo. Cuaha xaan ra cuuhví tsihin cuehe tyaaheyú tsicoo Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra quee ñuu Siria —catyí ra Jesús.

²⁸ Tsa yahá tsiñi ñi tandihí tuhun can, tandihí nyiví tsa yucú tsitsi vehe ñuhu can xaan cuñi ñi cuví. ²⁹ Tan nduvitá ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñi ñi janacava ñi tsi ra ican. ³⁰ Maa tyin ra Jesús yahá ra tayañi ñi tan cuahán ra.

Nu quítatyi ña vaha tsa yihí tsi iin rayíi
(Mr. 1.21-28)

³¹ Tan cuahán ra Jesús ñuu Capernaum tsa canyí Galilea. Tan jacuahá ra tsi nyiví tsitsi vehe ñuhu tandihí sauru, quíví tuhvá nyiví quítatú. ³² Tan iyo xaan cuñi ñi tsihin tsa cahán ra. Tyin ñihí xaan cahán ra tumaa tuhvá ra cumí tyiñu caahán. ³³ Tan iin quíví nyiví ra Jesús vehe ñuhu tan iin ra yihí tatyí ña vaha catyí ra caná tsaa ra jaħa tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducu un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe li Nyoo.

³⁵Tacan tan nduxaan ra Jesús tsi tatyí ña vaha tsa yiñí tsi ra can tan catyí ra:

—Taxin ñi coo yooho. Quita tsi ra ihyá —catyí ra Jesús tsihin nu.

Tacan tan nyehé ñi nyiví nduvá ra can nu ñuhu jahá tatyí ña vaha can, tan nduve ca náa jahá nu tsi ra can. Tan quitá nu cuahán nu. ³⁶Tandíhi nyiví tsa nyehe can, iyo xaan cuñí ñi tan yuuhví ñi cuví. Tan quitsahá tsicá tuhun tahan ñi:

—¿Náa tuhun cuví tsa caahán ra ihyá? Tyin nda cuanda tsihin tatyí ña vaha tan ñihí caahán ra, tan quitá tatyí ña vaha ican —catyí ñi.

³⁷Tacan tan tandíhi ñi ityi quitá natuhún nyiví tuhun ra Jesús.

Nu janduvahá ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸Tacan tan quitá ra Jesús tsitsi vehe ñuhu can. Tan cuahán ra vehe ra Simón. Tan nu tsaa ra can, canyí ña tyiso ra Simón cuuhví ña tan ñihí xaan yiñí cahñí tsi ña. Tacan tan caahán ndaahvi ñi tsihin ra na janduvahá ra tsi ña. ³⁹Tacan tan natuhva ra nu canyí ña tan nacañí nuu ra jiñi ra tan cahán ra tsihin cahñí can na quita tsi. Tacan tan quitá cahñí can iin yaha ñi, tan nduvitá ña can, quitsahá nanducú ña tsa catsi ra Jesús.

Nu cuaha xaan nyiví cuuhví janduvahá ra Jesús

(Mt. 8.16-17; Mr. 1.32-34)

⁴⁰Tan tsa tyiso ñicanyii, tandíhi nyiví tsa iyó ñi cuuhví vehe ñi tsihin siñi siñi nuu cuehe, quitsí ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahá ra tsi ñi. ⁴¹Tan cuaha xaan nyiví quitá tatyí ña vaha tan cana tsaa nahnu, tan catyí nahnu:

—Yoho cuví Sehe Nyoo.

Maa tyin ra Jesús nduxaan ra tsi nahnu tan ña tsahá ra tsa cahan nahnu, tyin tsító nahnu tyin juvin ra cuví Cristo.

Nu tsicá ra Jesús cahñan ra tuhun Nyoo tandíhi ñiuu cayucú Galilea

(Mr. 1.35-39)

⁴²Tsa tuvi inga quivi, tan quee ra Jesús ñiuu can. Tan cuahán ra iin nu taxin caá. Tan nyiví nanducú ñi tsi ra. Tan tsaa ñi nda nu nyí ra ican. Tan cuñí ñi tsa ña cuuhun ca ra. ⁴³Tacan tan catyí ra Jesús tsihin ñi:

—Ndi cuñí ca tsi jacoto yu tsi nyivi tandíhi ca ñuu nácaa tan quihvi Nyoo aíima ñi tan cundaca ñaha ra tsi ñi. Tyin yacan cuenda vatsí yu nu ñuhu ñayiví ihyá.

⁴⁴Tan tacan ñi tsicá ra Jesús caahán ra tuhun Nyoo vehe ñuhu tandíhi ñi ñuu tsa cayucú Galilea.

5

Nu tsahá ra Jesús ndatu tsa cuaha xaan tyaca ñihí ra naha

(Mt 4.18-22; Mr. 1.16-20)

¹Iin quivi nyaá ra Jesús yuhu miñi nu cuví Genesaret. Tan tsaa cuaha xaan nyiví, tyin cuñí ñi tyaa soho ñi tuhun Nyoo. Tan tihín xaan nyí ra Jesús tyañu ñi. ²Tan nyehé ra uvi taahan yutun ndoo yatayn ñi yuhu miñi ican. Yoñi yucú tsitsi yutun ndoo can tyin tsa quitá ra tiñi tyaca. Tan nacatayá ra naha traya. ³Tacan tan quihví ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaá ra Jesús tsitsi yutun ndoo can. Tan quitsahá caahán ra tsihin nyiví. ⁴Cuhva tsa ndihí cahán ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tiñi ndo tyaca.

⁵Tan nacahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatum maa un catyí, cua jacuhun nyico ndi traya.

⁶Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsahá tyaahnyá tsihin tsa vee tyaca can. ⁷Tacan tan jandaha ra naha tsi ra tsa yucú inga yutun ndoo tyin quitsi ra naha cutahan rá naha tsihin ra naha. Tacan tan tsaa ra can naha ra. Tan jacutu ra naha nduvi taahan yutun ndoo can tsihin tyaca. Tan cuñí nyee yutun ndoo ra naha tsihin tsa tsitú tyaca. ⁸Tsa nyehé ra Simón Pedro tsa cuví tacan, tan tsicuñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹Tyin ra Simón tsihin tandíhi ra yucú tsihin ra, nayuhví xaan ra naha tsa cuenda tsa cuaha xaan tyaca ñihí ra naha. ¹⁰Tacan

tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhví xaan ra naha. Tan ra Jesús catyí ra tsihin ra Simón:

—Ña nayuhví un, tyin vityin tan nda nu cuahán ca tsi ityi nuu, tumaa tsa tiñindo tyaca ihyá, tacan cua ñihí un nyíví cua cuvi nyíví Nyoo, tan cua tava un tsi ñi nu caquiñi, na quihví ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoo ra naha tandíhi tsa iyó tsi ra naha. Tan cuahán ra naha tsihin ra Jesús.

Nu janduvahá ra Jesús tsi iin ra ndohó cuehe tyaaheyú

(Mt 8.1-4; Mr. 1.40-45)

¹² Iin quihví nyíví ra Jesús iin ñuu nu iyó iin ra ndohó cuehe tyaaheyú. Tan tsa nyehé ra tsi ra Jesús, tan tsicuñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahví ra tsihin ra Jesús, tan catyí ra:

—Jutu Mañi yu, tun yooho tan cuñí un, cuví janduvahá un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñí yu janduvahá yu tsi un. Cua nduvahá un vityin —catyí ra Jesús tsihin ra cuuhví can.

Tan iin yaha ñi nduvahá ra. ¹⁴ Tacan tan catyí ra Jesús tsihin ra:

—Coto catyí tuhun un tsihin nyíví. Intuhun ñi tsa cua cahan yu tsihin un, cuaahán nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaa ra Moisés, tan cua cuvi tsi iin tsandaa tsi ra jutu can tan tsi nyíví tyin tsa nduvahá un —catyí ra Jesús tsihin ra.

¹⁵ Vasu ndi maa tsa ña cuñí ra Jesús tsa coto nyíví, ñihí ca quitá tuhun ra. Tan cuaha xaan nyíví ndu ín tyin cuñí ñi tyaa soho ñi tsa caahán ra tan janduvahá ra tsi ñi. ¹⁶ Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahví ra tsi Nyoo Jutu ra.

Nu janduvahá ra Jesús tsi iin ra xii

(Mt. 9.1-8; Mr. 2.1-12)

¹⁷ Iin quihví jacuahá ra Jesús tsi nyivi. Tan yucú juhva ra fariseo, ra tyaa yahvi xaan ley Nyoo tsa tyaa ra Moisés tsanaha. Tan yucú tucu juhva ra maestro cuenda ley vehe

ñuhu ican. Quita ra naha ñuu Jerusalén, tan inga ñuu nyihi tanii cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvahá ra tsi nyíví cuuhví.

¹⁸ Tacan tan tsaa ra naha tan nyisó ra naha iin ra cuuhví tsihin cuehe xii nu tsito. Tan cuñí ra naha quihví ra naha tsitsi vehe tan caquin ra naha tsi ra cuuhví can nu nyíí ra Jesús. ¹⁹ Maa tyin ña ñihí ra naha nu quihví ra naha tyin tuvi xaan nyíví. Tacan tan ndaa ra naha ityi jiñi vehe. Tan jatsiyo ra naha tyijo. Tacan tan januu ra naha tsi ra cuuhví can nuu nyíí ra Jesús tyaa nu tuvi nyíví can. ²⁰ Tan nyehé ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoog tucahnu iñi tsi un, tsa cuenda cuatyí un —catyí ra Jesús tsihin ra can.

²¹ Tacan tan ra maestro cuenda ley vehe ñuhu tsihin ra cuví fariseo, quitsahá tsicá iñi ra naha: “¿Yóo ra cuví ra ihyá? Tsicoog cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoog tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—Nacuenda tsicá iñi ndo tacan? ²³ ¿Náa tsa yih ca catyí yo? ¿A yih catyí yo: “Cuatyí un tsa yahá ndatsi”, a yih ca catyí yo tsihin iin nyíví xii: “Ndúvita tan caca un”? ²⁴ Maa tyin vityin cua janaha yu tsi ndo tyin yuhu Rayií tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yahá cahan ra tacan, tan catyí ra tsihin ra cuuhví can:

—Ndúvita. Naquihin tsito un tan cuanuhu yuvehe un.

²⁵ Tan nduvitá ra can, tan naquihín ra tsito ra. Tan cuanuhu ra yuvehe ra, juvin ñi jacahnú ra tsi Nyoo. ²⁶ Tandíhi nyíví iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

²⁷ Yahá can tan quita ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma.

Tan nañí ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

²⁸Tacan tan nduvitá ra Leví. Tan nacoo ra tandíhi tsa iyó tsi ra. Tan cuahán ra tsihin ra Jesús.

²⁹Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi. ³⁰Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaá ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹Tan ra Jesús nacahan ra, tan catyí ra:

—Ña tsíñ ñuhu doctor tsi ra tsa vaha maa. Ra cuuhví, cuví ra tsíñ ñuhu doctor.

³²Yuhu ña vatsí yu jatyinyee yu tsi nyivi tsa tsicá iñi tyin vaha ñi, vatsí yu jatyinyee yu tsi nyivi tsító tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janaha ra Jesús tyin tatum tsa cuahán ra cua coo nyitya nyíví nyicún tsi ra

(Mt. 9.14-15; Mr. 2.18-20)

³³Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoo nyitya ra naha, tan ña tsatsí ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quivi tsatsí ra naha tan tsihí ra naha. ¿Nacuvi? —catyí ra naha.

³⁴Tan nacahan ra Jesús, tan catyí ra:

—¿A cuví coonyitya nyíví yucú vico tindaha jaha ndo tatum nyíi ra tsa cua tindaha tsihin ñi? Ña cuvi. [Tyin sií cuñí ñi, tan cuñí ñi catsí ñi.] ³⁵Maa tyin cua quita quivi tsa cua jatsyo ra tindaha ican tsi ra nu yucú ñi. Tacan tám cua coonyitya ñi.

Nu jacuahá ra Jesús tyin ña nacatsí tahan tuhun tsahnu tsa iyó nyíví tsihin tuhun tsaa tsa jacuahá ra

(Mt. 9.16-17; Mr. 2.21-22)

³⁶Tacan tan cahan tucu ra Jesús iin cuhva tsihin nyivi, tan catyí ra:

—Yoñi tsahnyá iin jahma tsaa, tan naquicú ñi tsihin jahma tuuhu. Tyin tatum javaha ñi tacan, nandiyí jahma tsaa can.

Tan ña ndoo vaha tsi tsihin jahma tuuhu can.

³⁷Tan tacan tucu, ña cuví tyihi nyíví vinu tsaa tsitsi ñii tsahnu. Tyin cua tyahnya ñii can tsihin vinu tsaa can. Tan cua tivi vinu can tan tivi ndihí tucu ñii tsahnu can.

³⁸Yacan cuenda taahán tsi tyihi yo vinu tsaa tsitsi ñii tsaa. Tyin tacan tan nduvu taahan tsi tan cuha cuenda tahan tsi itsi. ³⁹Tan yoñi tsihí vinu tsahnu, tan cuñí ñi coho ñi vinu tsaa. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quivi quitatú nyivi

(Mt. 12.1-8; Mr. 2.23-28)

¹Iin quivi quitatú nyivi, yaha ra Jesús mahñu tsa tatsi nyivi. Tan ra tsicá tsihin ra tuhún ra naha yoco trigu. Tan jocón ra naha can tsihin ndaha ra naha. Tan tsatsi ra naha tsítí can. ²Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñ tsa ña taahán tsi javaha yo quivi quitatú yo? ³Tan nacahan ra Jesús, tan catyí ra:

—¿A ñaha ca cahví ndo nu tsahá cuenda tsi tsa javaha ra David tan ra cutahán tsihin ra quivi tsa tsisoco ra naha? ⁴Quihví ra tsitsi vehe Nyoo. Tan quihín ra paan tsa tyiso nyíví nuu altar Nyoo. Tan tsatsi ra. Tan tsahá ndihí ra tsi ra tsa cutahán tsihin ra. Tan maa ñi maa ra cuví jutu naha ra taahán tsi cätsi paan can —catyí ra Jesús.

⁵Tacan tan catyí ra Jesús:

—Rayví tsa quee nda gloria iyó ndatu tsi ra tsa cahan ra tsihin intuhun intuhun ndo ñáa taahán tsi javaha ndo quivi quitatú yo —catyí ra.

Nu janduvahá ra Jesús tsi iin ra na ityi ndaha

(Mt. 12.9-14; Mr. 3.1-6)

⁶Inga quivi quitatú nyíví quihví ra Jesús tsitsi vehe ñuhu. Tan quitsahá jacuahá ra tsi nyivi. Tan nyehe ra tsi iin ra tsa na ityi ndaha cuaha. ⁷Tan ra cuví maestro cuenda ley vehe ñuhu naha ra tsihin ra cuví fariseo naha ra, nanducú cuhva ra naha tsi ra Jesús, tatum janduvahá ra tsi ra cuuhví icán quivi quitatú nyivi, tyin tacan tan cuvi tyaa ra naha cuatyí tsi ra Jesús. ⁸Maa tyin ra Jesús

tsító ra tsa tsicá iñi ra naha. Tan catyí ra tsihin ra na ityí ndaha can:

—Ndývita. Cunyaa nyityi mahñú ra naha ihya.

Tacan tan ra na ityí ndaha can nduvitára. Tan tsinyaá nyityi ra mahñú ra naha.
⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ⁽Náa taahán tsi javaha yo quíví quitatú yo? ⁽A taahán tsi javaha yo tsa vaha, a tsa ña vaha? ⁽A taahán tsi jacacu yo tsi nyíví, o cahñí ndíhi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yaha can tan catyí ra tsihin ra tsa na ityí ndaha can:

—Cañíhi ndaha un.

Tacan tan ra na ityí ndaha ican cañíhi ra ndaha ra. Tan nduvahá ndaha ra. ¹¹ Maa tyin ra yucú ican naha ra, cuxañan ra naha. Tan quitsahá tsicá tuhun tahan ra naha tsi ra naha:

—Ṅacaa javaha yo tan cuvi casí yo nu caahán ra Jesús ihya? —catyí ra naha.

Nu nacatsí ra Jesús tsa utsi uvi taahan ra cua caca tyíñu ra

(Mt. 10.1-4; Mr. 3.13-19)

¹² Quíví ican ndaáq ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, caná ra tsi tandíhi ra nyicún tsi ra. Tan nacatsí ra utsi uvi taahan ra naha. Tan jacunañí ra tsi ra naha apóstol, tan cuñí tsi catyi tsi “ra tsa tavá tyíñu Nyoo”. ¹⁴ Tan ihya nyaá síví tandíhi tsa utsi uvi ra naha: ra Simón, ra tsa jacunañí ra Cristo “Pedro”; tan yañí ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra la cuenda partido tsa cuñí cuhun cuatyí siquí ñuu Roma tsa ndacá ñaha tsi ñi; ¹⁶ tan ra Judas, yañí ra Jacobo; tan ra Judas Iscariote, ra tsa xico tsi ra Jesús.

Nu jacuahá ra Jesús tsi nyíví cuaha
(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iñi nyívi tsa nyicún tsi ra tsaha yucu can. Tan tsaa cuaha tucu nyíví quee ñuu Jerusalén tsihin tandíhi ca ñuu cayucú Judea, tsihin tucu nyíví quee ityi yuhu ndutyu ñuhu tsa cayucú yatyin ñi ñuu Tiro tsihin ñuu Sidón.

Tan tsaa ñi tyin tyaa soho ñi tuhun caahán ra Jesús. Tan tandíhi nyíví cuuhví cuñí ñi tsa janduvaha ra tsi ñi. ¹⁸ Tan tandíhi nyíví tsa yihí tatyí ña vaha janduvaha ra tsi ñi. ¹⁹ Tan tandíhi ñi cuñí ñi tiñi ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe cahgn ra Jesús tsihin nyíví tsa naquihín ndaahvi ra
(Mt. 5.1-12)

²⁰ Tacan tan nanyehe ra Jesús tsi ra tsicá tsihin ra. Tan catyí ra tsihin ra naha:

—Tandíhi nyoooho tsa ndaahvi, sií xaan cua cuñí ndo, tyin taahán tsi cundaca ñaha Nyoo tsi ndo.

²¹ Tandíhi nyoooho tsa tsisocó vityin, sií xaan cua cuñí ndo. Tyin coo quíví ña cua cusoco ca maa ndo. Tan tandíhi nyoooho tsa tsacú tsa cuiihya cuñí ndo, sií xaan cua cuñí ndo tyin ña cua coo ca ndo tucuiihya iñi. Tan cua vacu naaha xaan ndo tsihin tsa sií cuñí ndo.

²² 'Cusíñ iñi ndo, quíví ndasi cuñí nyíví nyehe ñi tsi ndo, quíví tava ñi tsi ndo nu iyó ñi, quíví nduxaan ñi tsi ndo, quíví catyí ñi tyin nyíví ña vaha cuví ndo tyin tsinú iñi ndo tsi maa yu tsa cuví yu Rayíñ quee nda gloria. ²³ Sií cuñí ndo quíví can tyin tacan tucu javahá nyíví ñi tahan tsanaha. Cuxañan ñi tsi ra cuví ndusu yuhu Nyoo. Ndava ndo tsihin tsa sií cuñí ndo. Tyin cahnu xaan ndatu cua ñihí ndo nda gloria.

Tsehe cahán ra Jesús tsihin nyíví ña tsinú iñi tsi ra

²⁴ Maa tyin ndahvi nyoooho, ñi cuca. Tyin vityin sií xaan cuñí ndo tsihin tandíhi tsa cuca ndo. Maa tyin cua coo quíví maa ñi maa tundoho cua nyehe ndo. Tyin nduve tsa cua ñihí ndo nu nyaá Nyoo.

²⁵ Tan ndahvi nyoooho tsa cuñí maa ndo tyin nduve tsa cumañí tsi ndo tsa vityin, tyin coo quíví cua cusoco ndo. Nyoooho tsa sií cuñí vityin, ndahvi nyoooho, tyin coo quíví cua coo ndo tucuiihya iñi. Tan cua vacu xaan ndo. ²⁶ Tan ndahvi nyoooho tsa vaha caahán nyíví tuhun ndo. Tyin tacan caa tucu nyíví tsicoo tsanaha, vaha xaan cahán ñi tuhun ra tsa cahán tsa ña nditsa tsihin ñi.

Cuñí ndo tsi nyíví xaan iñi tsi ndo
(Mt. 5.38-48; 7.12)

²⁷ *Tandihí nyoooho tsa tsíñí tsa caahán yu, catyí yu tsihin ndo tyin: Cuñí ndo tsi nyíví xaan iñí tsi ndo. Javaha ndo tsa vaha tsihin nyíví tsa ndasí cuñí nyehe tsi ndo.*

²⁸ *Cahan ndo tsa vaha tsihin nyíví tsa caahán ndavaha ñí tsi ndo. Tan ndacan tahvi ndo tsi Nyoo tsa cuenda nyíví caahán nyaa tsi ndo.* ²⁹ *Tatun iin ra cañí iin tsyo nuu ndo, cuhva ndihí ndo inga tsyo, nacañí ndihí maa ra. Tatun iin ra quinyaá tsqaqueta nditsí ndo, cuhva ndihí ndo camiseta ndo.*

³⁰ *Cuhva ndo náa ndihí tsicán nyíví tsi ndo. Tatun quinyaá ñí náa tsa iyó tsi ndo, ña ndacan ca ndo can tsi ñí.* ³¹ *Tumaa cuñí ndo tsa javaha nyíví tsa vaha tsihin ndo, tacan javaha tucu maa ndo tsa vaha tsihin ñí.*

³² *Tatun cuñí ndo tsi maa ñí maa nyíví tsa cuñí tsi ndo, nduve tsa vaha javahá ndo. Tyin tacan icá tucu nyíví quiñí iyó.* ³³ *Tan tatun tsihin nyíví tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyíví, nduve tsa vaha icá ndo cuví can, tyin nyíví caquiñí, tacan icá tucu ñí can.* ³⁴ *Tatun javahá ndo tumañí iñí tsi iin nyíví, tan nyítá iñí ndo tyin cua javaha tucu ñí can tumañí iñí tsi ndo, nduve tsa vaha icá ndo. Tyin nyíví caquiñí, tacan icá ñí. Tatun náa tumañí iñí javahá ñí tsi nyíví vaha iñí tsi ñí, ndatú ñí tsa nacuhva tucu ñí can tumañí iñí tsi ñí.* ³⁵ *Maa tyin nyoooho, cuñí ndo tsi nyíví xaan iñí tsi ndo. Tan javaha ndo tsa vaha tsihin ñí. Tan cuhva nuu ndo náa nducú ñí. Maa tyin ña cuatu ndo náa tumañí iñí cua nacuhva ñí tsi ndo. Tacan tan cahnu xaan tsa cua ñíhi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñí ra nda cuanda tsihin nyíví tsa ña nacuhvá tyahvi nyoo tsi ra, tan tsihin nyíví caquiñí.* ³⁶ *Cu uhvi iñí ndo tsi nyíví, tumaa uhvi cuñí Nyoo Jutu yo nyehé ra tsi yo.*

*Ña cahan nyaa yo tsi inga nyíví
(Mr. 7:1-5)*

³⁷ *Na cahan nyaa ndo tsi nyivi, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñí anyaya, tacan tan ña cua jacuhun Nyoo tsi ndo anyaya. Jaha ndo tucahnu iñí tsi nyíví. Tan Nyoo cua jaha ra tucahnu iñí tsi maa ndo.* ³⁸ *Cuhva ndo tsa tsíñí ñuhu tsi nyíví. Tacan tan cua cuhva tucu maa Nyoo tsa tsíñí ñuhu tsi maa ndo. Cuaha cua cuhva ra tsi ndo. Tyin tumaa*

cuhva cua cuhva ndo tsi nyivi, tacan cuhva cua cuhva Nyoo tsi ndo —catyí ra Jesús.

³⁹ *Tan tsahá ra Jesús cuhva ihyá tsi ñí, tan catyí ra:*

—In ra cuaa ña cuví janaha ra ityi tsi inga ra cuaa. Tyin nduví taahan ra naha ña nyehé ra naha ityi cuahán ra naha. Tan cuví canacava ra naha tsitsi iin xahva. ⁴⁰ Ndi intuhun ra cutuhvá ña cua cuvi coto ra tsa tsító ra jacuhá tsi ra. Tyin ndi quitsahá cahví ra. Cua coto ra nda ndihí cahví ra.

⁴¹ *¿Nacaa tyin nyehé un tsahan luhlu tsa nyíñi tinuu yañi un, tan ña jahá un cuenda yutun cahnu tsa nyíñi tinuu maa un?* ⁴² *Tatun tinuu maa un nyíñi iin yutun cahnu, ¿nácaa cua cuvi catyi un tsihin ra yañi un: “Náha, na tava yu tsahan luhlu tsa nyíñi tinuu un.”?* *¡Yoooho tsa jahá tyin vaha xaan un!* *Tava jihna yutun cahnu tsa nyíñi tinuu maa un. Tyin tacan tan cuvi nyehe vaha un tsahan luhlu tsa cua tava un tinuu yañi un.*

*Tsihín tsa javahá nyíví tan nacoto yo tsi ñí tatuñí vaha, a ñí ña vaha cuví ñí
(Mt. 7:17-20; 12:34-35)*

⁴³ *Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.* ⁴⁴ *Tandihí yutun nacotó yo tsi tun tsihin tsító tun. Tyin tiñata, ña cua cuhva tun mangu. Tan ndi intuhun iñúnduuuhva ña cua cuhva tun uvas [tsa cuví yucu vixi].* ⁴⁵ *Tan tacan tandihí nyíví vaha, vaha caahán ñí, tyin yiñí tsa vaha añima ñí. Maa tyin nyíví ña vaha, maa ñí maa tsa ña vaha caahán ñí tyin yiñí tsa caquiñí añima ñí. Tyin tsihin yulu yo caahán yo tandihí tsa quitá tsitsi añima yo.*

*Cua cacu nyíví tsa tyáá yahvi tuhun caahán ra Jesús, tan nyíví ña tyáá yahvi tsa caahán ra, ña cua cacu ñí
(Mt. 7:24-27)*

⁴⁶ *¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu?* ⁴⁷ *Vityin cua catyi yu tsihin ndo yóo ndacú nyoooho tsa vatsí ndo tsi maa yu, tan tyáá soho ndo tsa caahán yu, tan javahá ndo cuhva catyí yu.* ⁴⁸ *Cuví ndo tumaa cuví iin ra tsító janduvita vehe. Tyin jihna ca tayví cunu xaan ra tan tahañ ra yuu. Tan tyáá ra tyihyo tsaha vehe can tsata yuu can. Tan quiví nduñihí cuún savi, ndutya can tsatya xaan tsi tsaha vehe, maa tyin vehe can ña taní maa tsi tyin vaha*

xaan quita tyihyo tsaha tsi. ⁴⁹ Maa tyin nyivi tsa tsiñi tsa caahán yu tan ña jayahá ñi tsa caahán yu, cuví ñi tumaa iin ra jayahá vehe tan ña vaha jayahá ra itsi. Tyin nduve tyihyo tsaha tsi jayahá ra. Tan quivi tsaa savi, tan cuñihí cuún savi, tan yahá ndutyá cuaha tsaha vehe can. Tan vehe can, iin yahá ñi taní tsi —tacan catyí ra Jesús.

7

Nu janduvaha ra Jesús musu iin ra capitán andaru

(Mt. 8.5-13)

¹ Ndihí cahán ra Jesús tsihin nyivi, tacan tan cuanuhára inga tsaha nda ñuu Caper-naum. ² Tan ñuu can iyó iin ra capitán. Tan iyó iin musu ra tsa cuñí xaan ra. Tan cuuhvíra can. Tan tsa cuñí cíu ra. ³ Tan tsaa tsító ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ⁴⁻⁵ Tacan tan tsaa ra tsahnu ican naha ra nu nyíi ra Jesús. Tan quitsaha caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda jayahá ña ra iin vehe ñuhu yo. Tan taahán tsi tyin jatinyee un tsi ra. Tyin cuuhví xaan musu ra. Tan cuñí ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaa ra naha nu nyíi ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra. ⁷ Yacan ña cana iñi ra quitsi ra nu nyíi un. ⁸ A ña jaha un tumañi iñi tsi ra, tyin ihyá cahan un iin tuhun, tan cua nduvaha musu ra, catyí ra? ⁹ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha rä tsi ra cuatyí cutahán tsihin ra. Tatum tava tyiñu ra tsi iin ra cuatyí ican, na cuhun ra, caahán ra. Tatum catyí ra tsihin inga ra, na quitsi ra, vatsí ra. Tatum jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatum catyí un na nduvaha musu ra, tacan tan cua

nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahán ra can naha ra, tan iyo xaan cuñí ra. Tan nanyehé ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihí yu tsi ndi intuhun ra Israel tsa tsinú xaan iñi tumaa ra can —catyí ra Jesús.

¹⁰ Tacan tan cuanuhára vaha iñi tsi ra capitán can naha ra. Tan tsa tsaa ra naha nda yuvehe, tan nyehe ra naha tyin tsa nduvaha musu ra.

Nu janandotó ra Jesús tsi sehe iin ñaha ndaahvi tsihí yíi

¹¹ Tsa yahá yacan tan cuahán ra Jesús iin ñuu tsa nañí Naín. Tan cuahán tucu ra tsicá tsihin ra. Tan cuahán ndihí tucu cuaha xaan nyivi. ¹² Tacan tan cuhva tsa cua tsaa ra yatinyee ñuu ican, nyehe ra tyin cuaha xaan nyivi quítá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihí yíi. Tan intuhun ñi maa ra cuví sehe ña, tan tsihí ra. ¹³ Tan tsa nyehe ra Jesús tsi ña, tan cundaahví iñi ra nyehe ra tsi ña. Tan catyí ra tsihin ña:

—Ña vacu un.

¹⁴ Tsahan natuhvára tan tiñi ra tsatun tsa nyíi ndiyi can. Tacan tan ra nyisó tsi ndiyi can naha ra tsicuñi ra naha. Tan catyí ra Jesús tsihin ndiyi can:

—Nduvita, yooho ra tyuva —catyí ra.

¹⁵ Tacan tan nduvitá ndiyi can. Tan na-cunyaqára. Tacan tan quitsaha caahán ra. Tan ra Jesús nacuhva cuenda ra tsi ra tsi sihi ra. ¹⁶ Tsa nyehe ñi tsa tacan nandoto ra jahára Jesús tan yuuuhví xaan ñi, tan quitsaha jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaa nu yucú yo ihyá.

Tan catyí tucu ñi:

—Maa Nyoo cuví ra vatsí nu iyó yo, vatsí jatinyee ra tsi yo —catyí ñi.

¹⁷ Tan tandihí maa nyivi taníi cahnu Judea, tsito ñi tsa jayahá ra Jesús.

Nu jacuhun ra Juan uvi taahan ra tsa tsicá tsihin ra nu nyíi ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa jayahá ra Jesús. Tacan tan cana ra Juan tsi uvi taahan ra naha. ¹⁹ Tan tava tyiñu ra tsi ra naha na cuhun ra naha nu nyíi ra Jesús, tan ndaca

tuhun ra naha tsi ra tatum juvin ra cuví Crísto, ra tsa cua jaquitsi Nyoo. Tyin tatum ñavin ra Crísto cuví ra, cuatu ra naha tsi inga ra.²⁰ Tacan tan ra tsa jacuhyn ra Juan, cauhán ra naha. Tan tsaa ra naha nu nyíi ra Jesús. Tan catyí ra naha:

—Ra Juan, ra jacoondutýá, tava tyiñu ra tsi ndi tyin ndaca tuhan ndi tsi un tatum juvin un cuví Crísto, ra tsa cua jaquitsi Nyoo. Tyin tatum ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyíi cuuhví janduvahá ra Jesús. Tan tacan tucu nyíi yihí tatyí ña vaha. Tan cuaha tucu nyíi cuaa nanyehe ñi jahá ra.²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyi tuhun ndo tsihin ra Juan tandíhi tsa nyehé ndo, tan tandíhi tsa tsíñi ndo. Tan catyí ndo tsihin ra: ra cuaa nanyehe ra, ra coxo nacacára, ra ndohó cuehe tyaahyú nduvahá ra, ra soho nacuñi ra, ndiyí nandotg, tan caahán yu tuhun Nyoo tsihin ñi ndaahvi nácaa cacuñi. Tan catyí ndo tsihin ra tyin²³ sií xaan cuñi ñi nyicún tsi yu tun ña ndu uví iñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsahá caahán ra Jesús tuhun ra Juan tsihin nyíi. Tan catyí ra:

—¿Náa nyehe ndo quiví tsahan ndo nuu tsiquí ndii ican? ¿A nyehe ndo iin ndoo tsa janduvá tatyí?²⁵ ¿A iin ra tsa nditsí jahma vaha nyehe ndo? Ñavin. Tyin tsító ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.²⁶ ¿A ña nyehe ndo tsi iin ra cuví ndusu yuhu Nyoo? Juvin. Cahnu ca cuví ra tan ñavin ca ra ndusu yuhu Nyoo.²⁷ Juvin ñi tuhun ra Juan cuví tsa nyaá nuu tutu tsa tyaa ra Isaías tahan tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

²⁸ Tacan catyí yu tsihin ndo tyin tsitsi tsa tandíhi ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutýá. Maa tyin ra tsa ndacá ñaha Nyoo añima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ Tandíhi nyíi tan ra tavá xuhun naha ra, tsa tsicoondutýa jahá ra Juan, nacoto ñi tyin cuhva javahá Nyoo, cuiti xaan tsi.³⁰ Maa tyin tandíhi ra fariseo tsihin ra maestro cuenda ley vehe ñuhu, ña cuñi ra naha tsa jacoondutýa ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús.³¹ Tan catyí tucu ra:

—¿Náa cua jandu inducu yu tsihin nyoooho, nyíi iyó quiví ihya? ¿Yóo caá tumaa caá ndo?³² Tumaa ra nyihi cuví nyoooho. Tyin ra nyihi jasiquí tuyahvi. Tan caná tsaa tahan ra naha, tan catyí ra naha: “Tiyíndi tiyoo tan ña tsañi ndo yaa. Tan tsita ndi yaa cuuihya, tan ña tsacu ndo”. catyí ra nyihi. [Tan tacan ñi cuví nyoooho tyin ndi intuhun cuhva ña taahán iñi ndo.]³³ Tyin ra Juan, ra jacoondutýá, quitsi ra tan ña tsatsí vaha ra. Tan ña tsihí ra vinu. Tan nyoooho catyí ndo tyin tatyí ña vaha yihí tsi ra.³⁴ Tan quitsi tucu yuhu tan cuví yu Rayíi tsa quee nda gloria. [Tan tsatsí yu tan tsihí yu.] Tan nyoooho catyí ndo tyin tsatsí xaan yu tan tsihí xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra.³⁵ Maa tyin catyí yu tsihin ndo tyin tsa tsíñi tuñi Nyoo tsahá ra tsi nyíi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsíñi tuñi Nyoo —catyí ra Jesús.

Nu nyíi ra Jesús vehe ra Simón ra cuví fariseo

³⁶ Iin ra fariseo tsa nañí Simón jacoto ra tsi ra Jesús tyin cuhun ra cucatsi ra nda yuvehe ra. Tan tsaa ra Jesús vehe ra, tan tsicunyaära nu mesa.³⁷ Tacan tan iin ñaha sií iñi ñuu ican tsitq ña tyin nyíi ra Jesús ican. Tan tsaa ña tsihin iin yutyi yuu xiñu tsitú tsi ndutya tami.³⁸ Tan tsinyaä ña yatyin ñi tsaha ra. Tan quitsahá tsacú ña tyin ndu uví iñi ña cuatyí ña. Tan cuúndutya nuu ña. Tan tsihin ndutya nuu ña nacatyá ña tsaha ra Jesús. Yahá can tan jana ityi ña tsaha ra tsihin ixi jiñi ña. Tan tyayuhu ña tsaha ra. Tacan tan tyoso ña ndutya tami ican tsata tsaha ra.³⁹ Tsa nyehe ra fariseo can tsa tacan icá ña, tan tsicá iñi ra: “Tatun nditsa tsa Nyoo jaquitsi tsi ra ihya, cua nacoto ra yóo ñaha tñi tsaha ra, tyin ñaha ican, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ican:

—Yoho Simón, iyó iin tsa cua cahan yu tsihin un —catyí ra tsihin ra.

Tacan tan nacahān ra Simón, tan catyí ra:

—Vaha, cahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayíi nyaá cuenda ra xuhun tsi iin ra tsa tuhvá tsahá nuu xuhun. Tan iin ra icán nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahví ra naha. Tan ra tuhvá tsahá nuu xuhun ican, jaha ra tucanhnu iñi tsi nduvi taahan ra naha. Tan vityin catyí tsihin yu, yoho Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

⁴³ Tacan tan nacahān ra Simón, tan catyí ra:

—Ra tsa cuaha ca jahá ra tucanhnu iñi tsi —catyí ra.

Tacan tan catyí ra Jesús:

—Nditsa tsa caahán un —catyí ra.

⁴⁴ Tacan tan nanyehé ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihyá? Yuhu quihví yu tsitsi vehe un, tan ñia tsahá un ndutya tsa ndoo tsaha yu tumaa cuhva tsaiyó yo. Tan ñaha ihyá nacatya ñia tsaha yu tsihin ndutya nuu ña. Tan jana ityí ñia tsihin ixi jiñi ña. ⁴⁵ Yoho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihví yu ihyá tan ña jandihí ña tsa tyayuhú ña tsaha yu. ⁴⁶ Tan yoho ña tyihí un acetye jiñi yu, maa tyin ñaha ihyá tyihí ña ndutya tamí tsaha yu. ⁴⁷ Tan catyí yu tsihin un, yoho Simón, vasu cahnu xaan cuatyí ña, maa tyin jahá yu tucanhnu iñi tsi ña. Yacan cuenda cuñi xaan ña tsi yu. Tan nyiví tsa jahá yu tucanhnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

⁴⁸ Tacan tan catyí ra Jesús tsihin ña can:

—Cuatyí un tsa yaha catsiyo, tyin tsa jaha Nyoo tucanhnu iñi tsi un —catyí ra Jesús tsihin ña.

⁴⁹ Tacan tan ra yucú tsihin ra quitsaha tsicá iñi ra naha: “¿Yóo ra cuví ra ihyá? tyin jahá ra tucanhnu iñi cuatyí nyiví.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacu un tyin tsinu iñi un tsi yu. Cuaahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹Tsa yaha can, tan cuahán ra Jesús tsicá ra iin iin ñuu nahnu tan iin iin ñuu nyivi. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tavá tyiñu ra, cuahán ra naha tsihin ra. ²Tan cuahán tucu juhva ñiñaha tsa janduvahá ra: ñi cuhví tan ñi yihí tatyí ña vaha. Tan tsihin ñi cuahán ña María tsa quee ñuu Magdal, tan juvin ña cuví ña yihí utsa tatyí ña vaha tan nduvahá ña. ³Tan cuahán tucu ña Juana, ñasiñhi ra Chuza, ra cumí tyiñu cuenda ra Herodes, tan ña Susana tsihin tandihí ca ñiñaha tsa jatyinyéé tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo

(Mt. 13.1-9; Mr. 4.1-9)

⁴Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tsihin ñi tsihin iin cuhva tsaha cuenda ra, tan catyí ra:

⁵—Quita iin ra vehe ra. Cuahán ra nu iyó tyiñu jahá ra, tyin cua tatsí ra tsití trigu nu ñuhu ra. Tan cuhva tsa tatsí ra quítí ra tsití can, tan cucoyó juhva yuhu ityí. Tan tsaní nyivi tsata can. Tan quitsí saa tan tsatsí ti.

⁶Tan juhva ca tsití can cucoyó tyáñu yuu. Caná tsití ican. Maa tyin na ityí tsi tyin luxu cuii ñi ñuhu yihí tsaha tsi. Tan nduve catsin. ⁷Tan juhva ca tsití cucoyó tyáñu iñu. Maa tyin quíví caná trigu iin caa ñi tsihin iñu can, iñu can tsahñí tsi trigu can. ⁸Maa tyin juhva ca tsití cucoyó nu ñuhu vaha. Tan quíví tsahñu tsi, vaha xaan tsahá tsi tsití. Tyin tsa iin ñi tsití ican, cientu tsití quítá tsihin tsi —catyí ra Jesús.

Tan tsa yaha tsahá ra cuhva can, tan quitsaha caná tsaa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi
(Mt. 13.10-17; Mr. 4.10-12)

⁹ Yahå can tan ra tsicá tsihin ra, nducu tuhun ra naha tsi ra náa cuñí tsi catyi cuhva tsa cahān ra tsihin nyívì. ¹⁰ Tacan tan catyf ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiní ñi maa tyin ña cua cutuñi iñi ñi náa tuhun cuví can.

Nu tsahå cuenda ra Jesús cuenda ra tsatsí

(Mt. 13.18-23; Mr. 4.13-20)

¹¹ Cuhva tsa tsahå yu tsi ñi, cuñí tsi catyi tsi tyehen: tsiti can, tuhun Nyoo cuví tsi.

¹² Tan nu cucoyó tsití trigu ican yuhu ityi, nyívì tsa tsiní tuhun Nyoo cuví can. Maa tyin quitsí nu ña vaha tan quinyaq nu tuhun Nyoo tsi ñi tan coto tsinu iñi ñi tan cacu ñi.

¹³ Tan nu cucoyó tsití can tyañu yuu, juvin ñi nyívì tsa tsiní tuhun Nyoo cuví can. Sii xaan naquihín vaha ñi itsi juhva ñi quiví. Maa tyin ña yihí vaha yoho ñi, juhva ñi quiví tsinu iñi ñi, tan quiví tsa quitsahå nyehé ñi tundoho, tan jandihí ñi tsa tsinú iñi ñi.

¹⁴ Tan nu cucoyó tsití tyañu iñu, juvin ñi nyívì tsiní tuhun Nyoo cuví can. Tsiní ñi tuhun Nyoo maa tyin ña nasama ñi cuhva iyó ñi.

Tyin yihí ñi, tyaá ca iñi ñi tuhun tundoho tan ñavín ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñí ñi tsihin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsaha tsiti. ¹⁵ Maa tyin nu cucoyó tsití nu ñuhu vaha, yacan cuví nyívì tsa tsiní tuhun Nyoo, tan vaha añima ñi tyin tsinú iñi ñi tsihin taníi añima ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

Nu cahán ra Jesús tyin ña cua tyihí xeehe yo ñuhu tsa jandunditsín Nyoo añima yo coto quinyaq ra itsí

(Mr. 4.21-25)

¹⁶ Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquín nyaa yo can iñi nu sucun, tacan tan quihví nyívì tsitsi vehe maa tyin nditsin.

¹⁷ Tyin nduve iñi tsa nyíi xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan

nacoto yo. ¹⁸ Yacan cuenda tyaa soho ndo tuhun caahán yu. Tyin tatum tyaá yahvi ndo tuhun caahán yu, cuaha ca cua janaha yu tsi ndo. Maa tyin tatum ña cua tyaa soho ndo, tacan tan cua quinyaq Nyoo nda cuanda tsa luxu ñi tsa cuñí maa ndo tyin cumí ndo.

Nu tsahå cuenda ra Jesús tyin tumaa yañi ra, tan tumaa sihi ra, tacan cuví nyívì tyaa yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaa sihi ra Jesús tsihin yañi ra nu nyívì ra. Maa tyin ña cuví tsaa ñi tyin tuvi xaan nyívì. ²⁰ Tacan tan jacoto nyívì nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyívì tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iñi quiví quihví ra Jesús tsitsi iñi yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsio miñi ihyá.

Tacan tan cuahán ra naha tsihin yutun ndoo ican. ²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaa tatyí ñihi xaan. Tan quitsahå tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha ndutya quihví. ²⁴ Tacan tan jandoto ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. ²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahå tsicá tuhun tahan ra naha:

—¿Yóo ra cuví ra ihyá? Tyin nda cuanda tatyí tan ndutya tan tyaá yahvi tsi tsa caahán ra.

*Nu nduvahq iin ra yihí tatyi ña vaha nda Gadara
(Mt. 8.28-34; Mr. 5.1-20)*

²⁶ Tacan tan tsaa ra naha nda Gadara tsa canyí yuhu miñi ity nuu Galilea tsa canyí inga tsiyo miñi can. ²⁷ Tan quita ra Jesús tsitsi yutun ndoo ican. Tan ican tsaa iin ra ñuu tsa canyí Gadara can tsijatahan ra tsi ra. Tan tsanaha xaan yihí tatyi ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu. ²⁸⁻²⁹ Tan tuhvá tatyi ña vaha ican jacunú sana nu tsi ra. Tan yacan cuenda tuhvá ñi tsaañí ndaha ra tan tsaha ra tsihin cadena. Maa tyin tatyi ña vaha ican tsahá tunyee ñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyivi iyó. Ra ican tsaa ra nu nyíi ra Jesús. Tan cuhva tsa nyehe ra can tsi ra Jesús, tsicuiñi tsiti ra nuu ra. Tan caná tsaa ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyi ña vaha ican tsihin ra Jesús, tyin ra Jesús tava tyiñu ra tsi nu tsaa quita nu tsi ra ndaaahvi ican.

³⁰ Tan nducu tuhun ra Jesús tsi tatyi ña vaha ican, tan catyí ra:

—¿Náa nañí un?

Tan tatyi ña vaha ican jacahan nu tsi ra can, tan catyí ra:

—Nyuhu nañí ndi, Legión.

Tacan catyí ra tyin cuaha xaan tatyi ña vaha yihí tsi ra. [Cuenda mil nahnu yihí tsi ra.] ³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu. ³² Tan tsican nahnu tsi ra Jesús na cuhva ra quihví nahnu tsitsi quiñi tsa yucú yuhu miñi ican tsatsí ti naha ti. Tacan tan tsaha ra Jesús ndatu tsa quihví nahnu tsitsi quiñi ican naha ti. ³³ Tan quita nahnu tsi ra ndaaahvi can. Tan quihví nahnu tsitsi quiñi ican naha ti. Tacan tan tsinu quiñi can naha ti. Tan yatin ican nyaá iin xahva cunu yuhu miñi ican. Ican cucoyo tì naha tì tsitsi miñi ican. Tan tsihí tì naha tì tsitsi ndutyá.

³⁴ Tacan tan ra jahá cuenda tsi quiñi ican naha ra, nayuhví xaan ra naha. Tan tsinú ra naha cuahán ra naha cua nacatyi tuhun ra naha tsa cuvi can tsihin nyivi nda ñuu.

Tan tandihí ñi nyivi tsa nyehe ra naha, tan nacatyi tuhun ra naha tsa cuvi ican. ³⁵ Tacan tan tsahan nyivi tsinyehé ñi náa tsa cuvi, tan tsaa ñi nu nyíi ra Jesús. Tan nañihí ñi tsi ra tsa tsa yaha quita tatyi ña vaha can. Nyáá ra tsaha ra Jesús. Tan tsa ñuhú ra jahma. Tan tsa vaha cuñi jiñi ra. Tan nayuhví xaan ñi cuvi. ³⁶ Tacan tan tandihí ñi tsa nyehe tsa cuvi ican, nacatyi tuhun ñi tsihin tandihí ca nyivi nácaa quita tatyi ña vaha tsi ra ndaaahvi can, tan nduvahra. ³⁷⁻³⁹ Tacan tan tandihí nyivi iyó Gadara can quitsaha caahán ñi tsihin ra Jesús na cuhnuh ra ityi nu quee ra. Tyin nayuhví xaan ñi tsa javahá ra tsihin nu tatyi ña vaha ican. Tacan tan ra tsa quita nu tatyi ña vaha can nahnu, cahan ndaaahvi ra tsihin ra Jesús, na cuhva ra cuhun ndihí ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihí tsa javahá Nyoo tsihin un —catyí ra.

Tacan tan ra Jesús quihví ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaaahvi tsa nduvahra ican, cuanuhu ra nda ñuu ra. Tan ityi cuahán ra nacatyi tuhun ra tsihin tandihí nyivi ñuu ican nácaa janduvahra Jesús tsi ra.

Nu nduvahq ña sehe ra Jairo tan ñaha tsa tiñi jahma ra Jesús

(Mt. 9.18-26; Mr. 5.21-43)

⁴⁰ Quivi tsa tsaa ra Jesús inga tsaha tsa tsahan ra inga tsiyo miñi can, cuaha xaan nyivi ndatú tsi ra. Tan siñi xaan cuñi ñi tyin tsaa nyico ra. ⁴¹ Tacan tan tsaa iin ra tsa nañí Jairo, ra cuví ityi nuu vehe ñuhu, tan tsicuiñi tsiti ra nuu ra Jesús. Tan quitsaha caahán ndaaahvi ra tsihin ra na cuhun ra vehe ra. ⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñi cíu ña jahá cuehe. Tacan tan cuahán ra Jesús vehe ra. Tan cuha xaan nyivi cuahán tsihin ra, tan tyañu xaan nu cuahán ra tyañu ñi. ⁴³ Tan tsihin nyivi ican cuahán iin ñaha cuuhví. Tsa iyó utsi uvi cuiya ndohó ña cuehe tsa cuún niñi ña. Tan tsa ndihí maa xuhun ña janaaq ña tsihin doctor tan ña nduvahra ña. ⁴⁴ Maa tyin tsaa ña nu cuahán ra Jesús, ityi tsata ra. Tan tiñi ña jahma ra. Tan iin yaha ñi, tan tsicuiñi tsa cuún niñi ña.

⁴⁵ Tacan tan catyí ra Jesús:

—¿Yóo tiñi jahma yu?

Tan tandihí ñi cuahán tsihin ra catyí ñi:
—Yoñi.

Tan ra Pedro tsihin ra cutahan tsihin ra,
catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyáñu xaan nu cuahán un. Tan juvin ñi maa ñi tyandahí tsi un. Tan nducú tuhun ca un “¿Yóo tiñ jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyivi tiñ jahma yu, tyin tuví iñi yu cuahán juhua tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quitsahá niñi ña tsihin tsa yuuhví ña. Tan tsicuiñi tsiti ña nuu ra. Tan nacatyi tuhun ña tsihin ra nacuenda tiñ ña jahma ra, tan nácaa nduvahá ña iin yaha ñi ican. Tan tsiní tandihí nyivi tsa nacatyi tuhun ña. ⁴⁸ Tacan tan catyí ra Jesús tsihin ña:

—Tsa nduvahá un tyin tsinú iñi un tsi yu. Cuaahan tsihin tsa vaha —catyí ra.

⁴⁹ Ndi caahán ca ra Jesús, tan tsaa ñi iin ra quee vehe ra Jairo, ra cuví ityí nuu vehe ñuhu. Tan catyí ra tsihin ra Jairo:

—Sehe un tsa yaha tsihí ña. Ña cuhva ca un tsihi tsi ra Maestro ihyá —catyí ra.

⁵⁰ Maa tyin tsa tsiní ra Jesús tsa cahan ra ican, tan catyí ra tsihin ra Jairo:

—Ña nayuhvi un. Tsinu iñi. Tan ña sehe un cua nduvahá ña —catyí ra.

⁵¹ Tan cuhva tsa tsaa ra Jesús vehe ra Jairo, ña tsahá ra quihví nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihví ñi tsitsi vehe nu canyí ñaha luhlu tsa tsihí can. ⁵² Tan tandihí ñi tsacú xaan ñi tsa cuenda tyin tsihí ña. Maa tyin ra Jesús catyí ra tsihin ñi:

—Ña vacu ca ndo. Tyin ña tsihí ña. Quixí ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihí ña. ⁵⁴ Tacan tan tiñ ra Jesús ndaha ña. Tan tsaa nacahán ra tan catyí ra tsihin ña:

—Nduyvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuví ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Cana ra Jesús tsa utsi uvi taahan ra tsicá tsihin ra. Tan tsahá ra tunyee iñi cahnu tsi ra naha tyin cuvi tava ra naha tatyí ña vaha tsi nyivi, tan cuvi janduvaha ra naha tsi nyivi cuuhví.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tava tu cu tucu ra tyiñu tsi ra naha na janduvaha ra naha tsi nyivi cuuhví. ³ Tan catyí ra tsihin ra naha:

—Nduve tsa cuiso ndo ityi cuhun ndo, ndi tatum ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. ⁴ Tan ndáa cuví ñi vehe tsaa ndo, ndgo ndo ican nda cuanda quita quívi tsa cuhun ndo inga ñuu. ⁵ Tan nu ña cuñi nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndo cuatyí ñi siqui ñi —catyí ra Jesús tsihin ra naha.

⁶ Tacan tan cuahán ra naha tandihí maa ñuu. Tan caahán ra naha tuhun Nyoo tan nácaa cuñi tsi tan cacu ñi. Tan janduvaha ra naha tsi nyivi cuuhví.

Nu cuñi ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [taníi cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yiñi nyivi catyí ñi tyin ra Juan nandoto. ⁸ Tan yiñi ñi catyí ñi tyin ra Elías quituvi nyico. Tan yiñi ñi catyí ñi tyin inga ra cuví ndusu yuhu Nyoo tsanaha nandoto. ⁹ Maa tyin catyí ra Herodes:

—Maa maa yu tyiñi tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiní yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehé ra tsi ra.

Nu tsahá ra Jesús tsa catsi uhun mil rayii

(Mt. 14.13-21; Mr. 6.30-44; Jn 6.1-14)

¹⁰Tan cuhva tsa tsaa nyico ra tava tyiñu ra Jesús, tan natatyí tuhun ra naha tsihin ra Jesús tandihí maa tsa cuví nu tsahan ra naha. Tacan tan tava siín ra Jesús tsí ra naha tan cuahán ra naha yatyin ñí iin ñuu tsa nañí Betsaida. ¹¹Maa tyin cuhva tsa ñili tuhun nyívi tyin cuahán ra Jesús ndacan, tan cuahán ñí nda nu nyívi ra. Tan naquihín cuenda ra tsi ñí. Tacan tan quitsaha caahán ra tsihin ñí nácaa ndacá ñaha Nyoo tsi ñí. Tan janduvahá ra tsi nyívi cuuhví.

¹²Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyívi ihya, na cunuhi ñí na quitatu ñí, na nanducu ñí tsa catsi ñí ñuu tsa canyií yatyin ñí ihya, tyin ihya nduve maa tsa catsi yo iyó —catyí ra naha.

¹³Tacan tan catyí ra Jesús tsihin ra naha:

—Cuhva nyoho tsa catsi ñí —catyí ra.

Tacan tan catyí ra naha:

—Nduve maa tsa iyó ihya. Uhun taahan ñí paan, tan uvi taahan ñí tyaca iyó. Maa tyin ña ñihí tsa catsi tandihí nyívi ihya. Ndi maa cuhun ndi cujata ndi, maa tyin ña cua ñihí tsa catsi ñí tyin cuaha xaan ñí —catyí ra naha.

¹⁴Tyin vasiquí quitá maa uhun mil rayii yucú ican. Tan siín maa ñiñaha tsihin sehe ñí. Tacan tan ra Jesús catyí ra tsihin ra naha:

—Na cunyecu nyívi tsa uvi xico utsi taahan ñí iin iin nu cunyecu ñí.

¹⁵Tacan tan tsicunyecu tandihí ñí jaha ra naha. ¹⁶Tan quihín ra Jesús uhun taahan paan ican tsihin uvi taahan tyaca ican. Tan nanyehé ndaa ra ityi andívì, tan nacuhvá ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsahá ra tsi ra tsicá tsihin ra, na tsatsa ra naha can tsi nyívi. ¹⁷Tacan tan tandihí ñí tsatsí ñí, tan ndaha vaha iñi ñí. Yaha can tan ndoq ca tsa ñahñu, tan jacutú ra naha utsi uvi taahan tyica tsihin tsa ñahñu ican.

Nu catyí ra Pedro tyin ra Jesús cuví ra Cristo, rajacacú tsi yo

(Mt. 16.13-19; Mr. 8.27-29)

¹⁸Iin quiví quitá siín ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyívi tuhun yu, yóo ra cuví yu, catyí ñí?

¹⁹Tan nacahan ra tsicá tsihin ra, tan catyí ra naha:

—Yihí ñí catyí ñí tyin ra Juan, ra jacoondutyá tsi nyívi, cuví un. Tan yihí ñí catyí ñí tyin ra Elías cuví un. Tan yihí ñí catyí ñí tyin inga ra cuví ndusu yuhu Nyoo tahán tsanaha cuví un —catyí ra naha.

²⁰Tacan tan nducu tuhun ra Jesús tsí ra naha, tan catyí ra:

—Tan nyoho, ¿yóo ra cuví yuhu, cuñí maa ndo?

Tan nacahan ra Pedro, tan catyí ra:

—Yoho cuví ra Cristo, ra tsa quee nu nyaá Nyoo.

²¹Tan catyí ra Jesús tsihin ra naha tyin ña cahan ra naha can tsihin nyívi.

Nu jacoto ra Jesús nácaa cua cahñi nyívi tsi ra

(Mt. 16.20-28; Mr. 8.30—9.1)

²²Tacan tan catyí ra tsihin ra naha inga tsaha:

—Yuhu Rayii tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quiví cua nandoto yu —catyí ra Jesús.

²³Tacan tan catyí ra tsihin ra naha:

—Nyoho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihí quiví nyehé ndo tundoho. Tyin yacan cuví tumaa cruu tsa taahán tsi cuiso ndo tatum cua cunyicun ndo tsi yu.

²⁴Tan nyoho tsa ña cuñí nyehé tundoho tan ña cuñí ndo cuhva ndo ñayivi iyó ndo tsa cuenda yu, cua nyehé ndo tundoho anyaya. Maa tyin nyoho tsa cua cuhva ñayivi iyó ndo tsa cuenda yu, cua cacu ndo.

²⁵Nduve yahvi nyaá cua ñihí ndo tandihí tsa iyó nu ñuhu ñayivi ihya, tun ña cua cacu añima ndo. ²⁶Tyin tatum cahan nuu ndo tsa xaan cuñí nyívi nyehé ñí tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehé yu tsi ndo na tsaa quiví quitsi yu inga tsaha.

Tyin cua quitsi nyico yuhu Rayii tsa quee

nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. ²⁷Tan tsa nditsa catyí yu tsihin ndo tyin yiñí ndo tsa nyecú ndo ihyá vityin, ña cua cíu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

²⁸Una quivi yaha tsa cahán ra Jesús yacan, tan ndaq̄ ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra. ²⁹Tan tsa ndi tsicán tahvi ca ra Jesús, tan nasamá cuhva caá nuu ra tan jahma ra. Siñ xaan cuitsin tsi tan xiñu tsi. ³⁰Tacan tan quituvi uvi taahan ra natuhún tsihin ra, ra Moisés tan ra Elías. ³¹Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cíu ra. ³²Tan vasu cuñí xaan ra Pedro naha ra cusu ra naha, maa tyin ña quixí maa ra naha tyin nyehe ra naha tsa nditsin cuví nu nyaá ra Jesús tsihin ra nyecú tsihin ra. ³³Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihyá. Na jahava ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴Tan tsa ndi caahán ca ra tan quitsi iin vico siquí ra naha. Tan nayuhví xaan ra naha tsa quihví ra naha tsitsi vico ican. ³⁵Tacan tan tsitsi vico ican tsiní ra naha iin ndusu tsa catyí:

—Juvín ra ihyá cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶Tan tsa yaha cahán ndusu ican, tan nayehe ra naha tyin intuhun ña maa ra Jesús nyaá ican. Tan yoñi maa tsihin cahán ra naha tsa nyehe ra naha.

Nu janduvahga ra Jesús tsi iin ra luhlu tsa yiñí tatyí ña vaha

(Mt. 17.14-21; Mr. 9.14-29)

³⁷Tan tsa inga quivi tsa nuu ra Jesús yucu ican, cuaha xaan nyiví tsijatahan tsi ra.

³⁸Tacan tan cana tsaa iin ra cuahán tsihin nyiví cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahví iñi tsi sehe yu. Tyin intuhun ñi maa ra cuví

sehe yu. ³⁹Tan tuhvá tatyí ña vaha quihví tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra. ⁴⁰Tsa cahán yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tava ra naha tsi nu —catyí ra.

⁴¹Tacan tan nacahanan ra Jesús tan catyí ra:

—Nyoooho, nyiví ña tsinú vaha iñi. Tan caquiñi ndo. ¿Najava taahan ca quivi cunyaa yu tsihin ndo tan cunyee iñi yu nyehe yu tsi ndo nda cuanda cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴²Tan cuhva tsa natuhvá ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tava ra tsi nu tatyí ña vaha ican. Tan janduvahá ra tsi ra. Tacan tan nacuhvá cuenda ra tsi ra tsi jutu ra. ⁴³Tan tandihí nyiví, iyo xaan cuñí ñi tsa cahnu tsa jahava Nyoo nu yucú ñi.

Tsitsi tsa iyo cuñí nyiví tsa jahava ra Jesús, tan catyí ra tsihin ra tsicá tsihin ra:

Nu cahán ra Jesús inga tsaha tyin cua cahñi nyiví tsi ra

(Mt. 17.22-23; Mr. 9.30-32)

⁴⁴—Tyaa soho vaha ndo tuhun caahán yu. Tan ña naa iñi ndo. Tyin Rayví tsa quee nda gloria, cuahva cuenda nyiví tsi ra tsi ra xaan iñi tsi ra —catyí ra Jesús.

⁴⁵Maa tyin ra tsicá tsihin ra ña cutuñi iñi ra naha nacuenda cahán ra tacan. Tyin Nyoo ña tsahá ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús náa cuví tsa caahán ra.

Nu janahqá ra Jesús yóo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

⁴⁶Tacan tan ra tsicá tsihin ra quitsaha caahán yuhu tahan ra naha, ndáa ra cahnu ca cuví tsitsi tsa utsi uvi taahan ra naha.

⁴⁷Tan tsító ra Jesús tsa tsicá iñi ra naha, tan quihín ra iin ra luhlu. ⁴⁸Tan catyí ra tsihin ra naha:

—Tatun tsihin siví yu naquihín cuenda ndo tsi iin nyiví tsa ña cahnu jahá ñi tsi ñi tumaa ra luhlu ihyá, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi

tsi yu, naquihín cuenda ndo. Tyin nu yucúndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Niyíví tsa ña cuxaán tsi yo, juvin ñi ican jatyinyéé tsi yo
(Mr. 9:38-40)

⁴⁹ Tacan tan ra Juan catyí ra tsihin ra Jesús:

—Maestro, nyehé ndi tsi iin ra tavá tatyí ña vaha. Caahán ra síví un tan tavá ra tatyí ña vaha. Maa tyin ña tsahá ca ndi jahava ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casí ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahán ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyin quíví tsa cunuhu ra gloria. Tan jandu iñi ra iñi ra, tan quihín ra ityi tan cuahán ra ñuu Jerusalén. ⁵² Tan tavá tyiñu ra na cuhun ra tsicá tsihin ra ityi nuu ca. Tan cuahán ra naha dina iñi ñuu cuenda Samaria, tyin nducú ra naha nu quíatatu ra Jesús. ⁵³ Maa tyin nyíví Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyíví Samaria ndasi cuñí ñi nyehé ñi tsi nyíví ñuu Jerusalén. ⁵⁴ Tan tsa tsító ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ícqá ra Elías? Cua ndacan yo tsi Nyoo na jaquitsi ra ñuhu andíví tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

⁵⁵ Tacan tan nyehé ra Jesús nuu ra naha. Tan cuixaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyn ña cutuñí iñi ndo náa tyiñu vatsí yuhu.

⁵⁶ Tyin Rayíi tsa quee nda gloria, ña vatsí ra tyin janaa ra tsi nyíví, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Niyíví tsa cuñí quíhvi cuenda ra Jesús
(Mt. 8:19-22)

⁵⁷ Tan tsitsi tsa tsicá ityi ra naha, quita iñi ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandíhi ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuui iyó vehe ti. Tan saa iyó taca tì. Maa tyin Rayíi tsa quee nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahán ra ican, tan catyí ra:

—Taa, cuatu nuu tsi yu, na cuhun jihna yu cucusiti yu tsi jutu yu —catyí ra.

⁶⁰ Tacan tan ra Jesús nacahán ra tan catyí ra tsihin ra:

—Nacoo tsi nyíví ña iyó Nyoo añima na cucutsi tahan maa ñi tsi ñi tsitsi ñuhu tun tsihí ñi. Maa tyin yooho cuaahan cahan un tuhun Nyoo tsihin nyíví na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin cuhva na cuhun jihna yu cuchahan yu tsihin nyíví vehe yu —catyí ra.

⁶² Tacan tan Jesús catyí ra tsihin ra:

—Tumaa iñi ra tahví ñuhu tsihin indiquí, tatum nanyehe tsata ra, ña quita vaha yucun nu jahá tyiñu ra. Tan tacan cuví iñi ra nyicún tsi yu, tatum cuñí nyico ra tsa tsa nacoq ra, ña cuvi cuhva ra tsi ra cundaca ñaha Nyoo —catyí ra Jesús tsihin ra.

10

Nu tavá ra Jesús tyiñu tsi uñi xico utsi taahan ra cua cahán tuhun Nyoo tsihin nyíví

¹ Tsa yahá can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandíhi ñi ñuu, uví uvi ra cuahan tsa iñi nu cuahán ra nu cua cuhun ra Jesús. ² Tan catyí ra tsihin ra naha:

—Tumaa iñi itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyíví. ³ Tan cuaahan ndo tan nyehé ndo tyin cua jacuhun yu tsi ndo tumaa mbée mahñu lobo tsa cuví quíti xaan. Tyin lobo tuhvá tì tsahñi tsi mbée. Tan tacan tucu cua cuñí nyíví cahñi ñi tsi ndo. ⁴ Tan ña cua cuiso ndo ndi marali tan ndi nu yiñi xuhun ndo, tan ndi inga pari nditsan ndo ña cuso

ndo. Janumi ndo. Tun taahán ndo nyívi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi.⁵ Cuhva tsa quíhvi ndo tsitsi vehe iin nyívi, cahan ndo tsihin ñi. Tan catyi ndo, na coo tsa vaha añima ñi. ⁶Tan tacan tucu tatuń iyó nyívi vaha iñi vehe ican, cua ndoo tsa vaha can tsihin ñi. Maa tyin tatuń yoñi ñi vaha añima, ña cua ndoo tsa vaha tsihin ñi. ⁷Tan ndoo ndo juvin ñi maa vehe ican. Tatuń tsahá ñi tsa catsi ndo, catsi ndo. Tatuń tsahá ñi tsa coho ndo, coho ndo itsi. Tyin ra jahá tyiñi, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsaa quívi tsa cuhun ndo inga ñuu. ⁸Tan nu tsaa ndo iin ñuu tan vaha cahan ñi tsihin ndo, catsi ndo tandíhi tsa cuhva ñi catsi ndo. ⁹Tan janduvaha ndo tsi ñi cuuhví ñuu ican. Tan catyi ndo tsihin ñi: “Tsa nyanaá yatyin Nyoo, ra cuñi quíhvi añima ndo cundaca ñaha ra tsi ndo.”¹⁰ Maa tyin tatuń tsaa ndo iin ñuu tan ña cuñi nyívi tyaa soho ñi tsa caahán ndo, quita ndo ity cahnu. Tan catyi ndo tsihin ñi: ¹¹“Nda cuanda nyaca ñuhu ñuu ndo tsa iñi tsaha ndi, tan cua naquísi ndi. Tyin cuñi tsi catyi tyin cuatyi ndo ndoo can siqui ndo. Tyin Nyoo nyanaá yatyin ra tsihin ndo tan ña tyá soho ndo tsa caahán ra nácaa cuñi tsi tsa cundaca ñaha ra tsi ndo.” Tacan catyi ndo tsihin ñi —catyí ra Jesús tsihin ra tsa uñi xico utsi can naha ra.

¹²Tan catyi tucu ra tsihin ra naha:

—Quívi cua tatsi tuñi Nyoo tsi nyivi, yaha ca cuhva cua nyehe nyívi ñuu ican tundoho tan ñavin ca nyívi tsicoq tahan tsanaha ñuu Sodoma, —catyí ra Jesús.

Nyívi ña tyá soho tuhun caahán ra Jesús cua nyehe ñi tundoho

(Mt. 11.20-24)

¹³Tan catyi ra Jesús:

—¡Ndaahvi nyoooho, nyívi ñuu Corazin! Tan jndahvi nyoooho nyívi ñuu Betsaida! Tyin nyehé ndo tsa iyo javahá yu, tan ña cuñi ndo nasamá ndo cuhva iyó ndo. Maa tyin nyívi ñuu Tiro tan ñuu Sidón nduve tsa nyehe ñi. Maa tyin tun tsatayin nyehe ñi tsa nyehé nyoooho vityin, numi xaan cua cunditsi ñi jahma tucuihya iñi tan cunyecu ñi nu nyaa: tsa ndu uvi iñi ñi cuatyi ñi cuví can. ¹⁴Yacan cuenda, nyoooho nyívi ñuu Corazin tsihin ñuu Betsaida, ñihi ca cua

tatsi tuñi Nyoo tsi ndo tan ñavin ca nyívi ñuu Tiro tan nyívi ñuu Sidón can.¹⁵ Tan nyoooho nyívi ñuu Capernaum, cuñi maa ndo tyin cundaa ndo nda cuanda andívi. Maa tyin cua nuu ndo nda cuanda nu yucú ndiyi anyaya, tyin ña tyá yahvi ndo tuhun Nyoo —catyí ra Jesús.

¹⁶Tan catyi ra tsihin tsa uñi xico utsi taahan ra can naha ra:

—Nyívi tsa tyá soho tsa caahán nyoooho, tsa caahán yuhu tyá soho ñi. Tan nyívi ña tyá soho tsa caahán nyoooho, tsa caahán yuhu ña tyá yahvi ñi. Tan ñi ña tyá yahvi tsa caahán yuhu, tsa caahán ra tsa jaquitsi tsi yu, ña tyá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahán tsicahán tuhun Nyoo

¹⁷Ihya cuví nu tsaq nyico tsa uñi xico utsi ra tsa tsahán tsicahán tuhun Nyoo tsihin nyivi. Tan sii xaan cuñi ra naha. Tan catyi ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyá yahvi nahnu tsa cahán ndi tsihin siví un —catyí ra naha.

¹⁸Tacan tan catyi ra Jesús tsihin ra naha:

—Tacan tyin yuhu nyehe yu andívi nu canacavá nu ña vaha, nu nañi Satanás. Tu-maa cañi iin tatsa savi, tacan canacavá nu.

¹⁹Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhuma, tan nduve tsa cua jaha tì naha tì tsi ndo. ²⁰Maa tyin ña cusíi xaan iñi ndo tyin cuví tava ndo tatyí ña vaha ican. Cusíi ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa sii cuñi ra tyin janahá Nyoo tsa vaha tsi nyívi ndaahvi (Mt. 11.25-27; 13.16-17)

²¹Tacan tan sii xaan cuñi ra Jesús jahá Tatyí li Nyoo, tan catyi ra:

—Jacahnú yu tsi un, Jutu yu, tyin yooho cuví ra ndacá ñaha andívi tan nu ñuhu ñayivi ihyá. Tyin maa un janahá un tuhun maa un tsi nyívi ndaahvi ihyá. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñi maa un —catyí ra Jesús.

²²Tan catyi ra Jesús tsihin tandíhi ra naha:

—Tandíhi maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi

yu. Tan yoñi tsitó yóo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yóo ra cuví Nyoo Jutu, intuhun ñi Sehe ra tsitó tsi ra. Tan coto tucu nyíví tsa cuñí Sehe Nyoo jacoto ra tsi ñi —catyí ra Jesús.

²³Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sií xaan cuñí nyoho tan nyíví tsa iyó vityin tyin nyehe ndo tsa javahá yu. ²⁴Tyin cuaha xaan rey tan ra cuví ndusu yuhu Nyoo tahan tsanaha, cuñí ra naha nyehe ra naha tsa nyehe nyoho vityin. Maa tyin ña nyehe ra naha. Tan cuñí ra naha tyaa soho ra naha tsa tsíñi nyoho vityin. Maa tyin ña tsíñi ra naha —catyí ra Jesús tsihin ra tsicá tsihin ra.

Nu jacuahá ra Jesús tsi yo tyin taahán tsi jatyinyee yo tsi tandíhi ñi maa nyíví

²⁵Tacan tan tsaq iin ra maestro cuenda ley vehe ñuhu. Tan quitsaha tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayíví nyito tsa ña cua naa maa?

²⁶Tacan tan nacahan ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahví un?

²⁷Tacan tan nacahan ra maestro cuenda ley ican tan catyí ra:

—Catyí ley tyin cuñí yo tsi Nyoo tsihin taníi añima yo tan tsihin tandíhi cuhva tsicá iñi yo, tan tsihin tandíhi tunyee iñi tsa iyó tsi yo, tan tsihin tandíhi tsa tsíñi tuñi tsa iyó tsi yo. Tan cuñí yo tsi nyíví tumaa tsa cuñí yo tsi maa yo. Tacan catyí ley —catyí ra ican.

²⁸Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayíví nyito tsa ña cua naa maa —catyí ra Jesús.

²⁹Maa tyin ra maestro cuenda ley can cuñí ra cuvi ra ra vaha nuu ra Jesús, tan catyí ra tsihin ra:

—¿Tan yóo nyíví cuñí yu? —catyí ra.

³⁰Tacan tan nacahan ra Jesús, tan catyí ra:

—In ra quee ñuu Jerusalén cuahán ra nda ñuu Jericó. Tan tahan ra tsi nu ñasuhu nahnu. Tan suhu nahnu tandíhi maa tsa nyisó ra, nda cuanda jahma ra. Tan cañí nahnu tsi ra nda cuanda tsaquín taxin ña nahnu tsi ra. Tan nacoq ihñi nahnu tsi ra

ican. ³¹Tacan tan yahá iin ra cuví jutu ityi can. Maa tyin tsa nyehe ra tsi ra canyí ican, ndasava ñi yahá tsiyo ra. ³²Tacan tan yahá tucu iin ra yiñí cuenda vehe ñuhu, ra cuví tata ra Leví. Maa tyin tsa nyehe ra tsi ra canyí ican, juvin ñi ndasava yahá ra.

³³Tacan tucu iin ra Samaria yahá ra juvin ñi ityi can. Tan nyehe ra tsi ra canyí ican, tan quitsi tsa ndaahvi cuñí ra nyehe ra tsi ra.

³⁴Tan natuhvá ra nu canyí ra, tan quitsaha tyaá ra numeri tsi ra, tysihi ra acetye tsihin vinu nu uhvi can. Tan tyaq̄ ra iin jahma vita nu uhvi can. Yahá can tan jandaq̄ ra tsi ra tsata burru jana ra, tan quihín ra tsi ra, cuahán tsihin ra nu nyáá iin vehe. Tan jahá cuenda ra tsi ra. ³⁵Tan tsa inga quivi tsa cuñí cuhun ra Samaria. Tan tavá ra uvi taahan xuhun. Tan tsahá ra tsi ra jatsii vehe can. Tan catyí ra tsihin ra: “Jahá cuenda vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñí ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶Nu ndihí nacatyí tuhun ra Jesús, tan nducy tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

³⁷Tacan tan catyí ra maestro ican:

—Ra tsa cundaahví iñi tsi ra —catyí ra. Tacan tan catyí ra Jesús:

—Cuaahan tan ica tucu yooho tacan tsihin nyíví tsa nyehe tundoho —catyí ra.

Nu tsinyaq̄ ra Jesús vehe ña Marta tsihin ña María

³⁸Tan quihín ra Jesús ityi cuahán ra. Tan tsaq̄ ra iin ñuu. Tan ican iyó iin ñaha tsa ñañí Marta. Tan tsaq̄ ra vehe ñia. Tan tsaha ña quihví ra tsitsi vehe ñia. ³⁹Tan ña Marta, iyó iin tahan ña ñañí María. Tan ña María tsicunya ña yatín ñi tsaha ra Jesús, tyin tyaa soho ña tsa caahán ra. ⁴⁰Tan ña Marta cuaha xaan tyiñu javahá ñia. Tan tsaq̄ ña nu nyáá ra Jesús, tan catyí ña tsihin ra:

—Yoho tata. ¿A ña tsicá iñi yooho tyin ña tahan yu nacoq̄ ña tsi intuhun ñi maa yu tsihin tysiño ihya? Cahan tsihin ña na jatyinyee ña tsi yu —catyí ña tsihin ra.

⁴¹Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can.⁴² Maa tyin iyó intuhun tsa ñiñi ca taahán tsi caca iñi yo. Tan ña Maríá ihya nacatsi ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

*Nu jacuaha ra Jesús tsi ra tsicá tsihin ra nácaa ndacan tahvi ra naha tsi Nyoo
(Mt. 6.9-15; 7.7-11)*

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janahá ra Juan tsi ra tsicá tsihin ra —catyí ra.

²Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tyehen ndacan tahvi ndo, catyi ndo: Jutu Mañi ndi, yooho tsa nyaá un gloria.

Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na jahava nyivi nu ñuhu ñayivi ihya tandihi cuhva cuñí maa un, tumaa cuhva cuví nda gloria.

³ Cuhva tsa catsi ndi tan yaha ndi iin iñi quivi.

⁴ Jaha tucahnú iñi tsi ndi tsa cuenda cuatyi ndi. Tyin nyuhu jahá tucu maa ndi tucahnú iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunyee nu ña vaha tsihin ndi.

Tacan ndacan tahvi ndo —catyí ra Jesús.

⁵Tan catyí tucu ra:

—Na catyi yo tyin iin nyoho iyó iin ra vaha iñi tsi ndo, tan tsaa ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. ⁶Tyin iin ra vaha iñi tsi yu ndi tsaa ra yuvehe yu. Tan cañi xaan quee ra. Tan nduve tsa cuhva yu catisi ra.” ⁷Tan nyoho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan ña cuví nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra. ⁸Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatuñ caahán yuhu

ra tsihin ndo, jandatsan ra yuvehe ndo tan caná tsaa ra tsi ndo tsa ña cua cuvi cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. ⁹Tan tacan tucu nyoho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰Tyin tatuñ ndacan ndo, cua ñihi ndo. Tatuñ nanducu ndo, cua nañihi ndo. Tatuñ cua jandatsan ndo yuvehe, cua nuña tsi.

¹¹Tacan tucu nyoho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. ¹²Tan ña tuhvá ndo cuhva tujuhuma tsi sehe ndo tatuñ tsicán tsi ndivi catsi tsi. ¹³Nyoho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyi li ra cunyaa añima ndo tun ndacan ndo tsi ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo
(Mt. 12.22-30; Mr. 3.20-27)*

¹⁴ Ra Jesús tavá ra tatyi ña vaha tsa janduñihi tsi iin rayii. Tsa quita nu tatyi can tsi ra can, cuví nacahan ra. Tacan tan iyo xaan cuñí nyivi tsa nyehé ñi tsa cuví. ¹⁵Tan yihí ñi catyí ñi:

—Ra ihya, tavá ra tatyi ña vaha tsihin tunyee iñi nu Beelzebú nu cuví itiy nuu tsihin tandihi tatyi ña vaha —catyí ñi.

¹⁶ Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na jahava ra iin tsa iyo tsa quita andivi. ¹⁷Maa tyin ra Jesús tsító ra tsa tsicá iñi ñi. Tan catyí ra tsihin ñi:

—Tatuñ ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatuñ iin vehe tan natahvi nyivi tsihin tahan ñi, tacan tan cua tiví nu yucú ñi. ¹⁸Tan tacan tucu nu ña vaha, tatuñ natahvi nahnu, cua cundihi tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyi ña vaha nahnu.

¹⁹ Maa tyin tun tsatyin tavá yu tsi nahnu tumaa cuhva catyí ndo, ndacu tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin

nyooho soho xaan tsicá iñindo. ²⁰ Maa tyin catyíyu tsihin ndo tyin yuhu taváyu tatyíñi vaha tsihin tunyee iñi Nyoo. Tan cuñítsi catyi yacan tyin nditsa tyin Nyoo, ra taahán tsi cundaca ñaha tsi nyiví, tsa tsaaq ra nu yucúndo.

Nu jacuahq ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatan iin ra tan iyóxaan tunyee iñitsi ra tan nyisóra mityi ra, tan jahá cuenda ra vehe ra, nu yihí xeehe vaha ndaha tysiñi ra tsitsi vehe ra, tsa ña cua cuvi quinyaa ñasuhu. ²² Maa tyin tatan quitsi iin ra tsa cuaha ca tunyee iñiyó, tan cañí tahan ra tsihin ra, tan cuvíjaha canaa ra tsi ra, tacan tan quinyaa ra ndaha tysiñi ra tan natsatsa ra tsi ra vaha iñitsi ra.

²³ Nyiví ña jahá tysiñi tsihin yu, jatíví ñi tysiñi jahá yu. Tan tatum ña caahán ñi tuhun Nyoo tsihin nyiví, tyin cunyicun ñi tsi yu; cuñítsi catyi tsi tyin ña tsahá ñi tsa cunyicun nyiví tsi yu.

Nu jacuahq ra Jesús tsi yo nácaa quihví tatyí ña vaha tsi yo inga tsaha tatum naa iñiyo

²⁴ Tatum iin nu tatyí ña vaha quita nu tsi iin nyiví, tsicánuu nu iin ñuhu ityi, nanducúnu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: "Cunuhu nyico yu nda vehe yu nu queeyu." ²⁵ Tacan tan tsaaq nyico nu añima nu quee nu. Tan nyehé nu tyin ndiixaan tan siixaan caá. ²⁶ Tacan tan cua quihin nu utsataahan ca tatyí ña vaha tsa yaha ca caquiñi tan ñavin ca maa nu. Tacan tan iin caañi cua quihví tandihí nahnu añima ñiican. Yacan cuenda yaha ca caquiñi ñi tan ñavin ca tsa jihna ñi —catyíra Jesús.

Nyivítsa nditsa iyóvaha ñi nu ñuhu nyiví

²⁷ Tsitsi tsa ndi caahán ca ra Jesús yacan, tan cana tsaa iin ñaha tsa nyiví mahñu nyivíican. Tan catyí ña:

—¡Nátsa sii cuñí ñaha tsa jacacu tsi un, ñaha tsa jacaxin tsi un! —catyí ña.

²⁸ Maa tyin ra Jesús catyíra:

—Siixaan ca cuñí nyivítsa tsiñi tuhun caahán Nyoo tan tyaáyahvi ñi itsi —catyíra.

Nyiví ña vaha, maa ñi maa tsa iyo cuñí ñi nyehé ñi

(Mt. 12.38-42; Mr. 8.12)

²⁹ Tacan tan tsaaq ca nyivínu nyivíra Jesús. Tan catyíra tsihin ñi:

—Nyivítsa iyóvityin quiñixaan iyó ñi. Tan nyiyo xaan iñi ñi. Cuñí ñi nyehé jihna ñi tsa iyo. Maa tyin intuhun ñi tsa iyo cua nyehé ñi, yacan cuvítsa javahá Nyoo tsihin ra Jonás, ra cuvíndusu yuhu Nyoo tsanaha. Nduve inga ca tsa iyo cua nyehé ñi. ³⁰ Tumaa tsa janahára Jonás tsi nyiví ñuu Nínive tahan tsanaha tyin ii Nyoo, tacan tucu yuhu, Rayii tsa queénda gloria, janaháyu tsi nyivítsa iyóvityintyin ii Nyoo. ³¹ Quíví cua tatsi tuñi Nyoo tsi nyiví, cua nandoto ñaha cuvíreina ityi sur tahan tsanaha, tan cua catyi ña tyin cuhun ndo anyaya tysiñi maa ña vasu cañí ñuu ña, maa tyin quitsi ña, quitsi tyaa soho ña tsa tsiñi tuñi tsa cahánra Salomón. Tan vityin cahnu ca cuvíra nyaátsihin ndo tan ñavin ca ra Salomón. ³² Tan quíví cua cutuñi tandihínyiví, cua nandoto nyivítsicoo ñuu Nínive tahan tsanaha, tan cua catyi ñi tyin nyoocho nyivítsa iyóvityin cuhun ndo anyaya, tysiñi nyiví Nínive ican, nasama ñi cuhva iyó ñi quívícahanra Jonás tuhun Nyoo tsihin ñi. Tan vityin cahnu ca cuvíra nyaátsihin ndo tan ñavin ca ra Jonás.

Nu janahq ra Jesús tyin na jaha yo cuenda añima yo na coo tsa nditsin jahá Nyoo
(Mt. 5.15; 6.22-23)

³³ Ndi intuhun ndo tan ña tuhvá ndo tyaáñuhu tyuma tan tysiñi xeehe ndo can, a tinyíñi ndo can tsitsi iin caja. Tyin ñuhu can taahán tsi cunyíi can nu sucun. Tyin tatum quihví nyivítsitsi vehe ndo, nditsin.

³⁴ Tinuu yo, iin ñuhu nditsin cuvítsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatum iyótsa nditsin jahá Nyoo añima yo, vaha nyivícuviyo. Tacan nduve tsa nditsin jahá Nyoo añima yo, tumaa iinra cuaa cuvíyo, ña cuvínyehéyo ityi vaha tsa cuahán nu nyaá Nyoo. ³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. ³⁶ Tatum tsitú añima ndo tsihin tsa nditsin jahá Nyoo, nduve ca maa tsa naa iyótsihin ndo, tysiñi jandunditsin tsi tanii cahnu ndo. Tumaa tsa nyaá iin ñuhu tyuma jandunditsin tsi tanii cahnu ndo cuvícan —catyíra Jesús.

Nu cuxaan ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷Tsa ndihí cahán ra Jesús tsihin nyíví, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaa ra Jesús vehe ra. Tan quíhví ra tsicunyaáa ra nu mesa.

³⁸Tacan tan ra fariseo ican iyo cuní ra tyin ña nacatya ra Jesús ndaha ra tsa ndi cumañí ca catsi ra, tumaa cuhva iyó maa ra naha.

³⁹Maa tyin Jutu Mañí yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñí xaan caá can tyin ña nacatya ndo can. Tacan cuví nyooho. Tyin cuñí nyíví tyin vaha ndo. Maa tyin xeehe ñi suhú ndo tan javahá ndo tsa ña vaha.

⁴⁰Ndava xaan iñi ndo. ¿A ña tsító ndo tyin ra tsa javahá ityi tsata ndo, juvin ñi maa ra javahá ityi tsitsi ndo? ⁴¹Taahán tsi javahá ndo tumaní iñi tsi nyíví ndaahví, tan jatyinyee ndo tsi ñi tsihin taníi añima ndo. Javahá ndo tsa vaha tsihin ñi, tacan tan nduvahua tucu ityi tsitsi ndo.

⁴²¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaa yahvi ndo tsa vaha tsa cuñí Nyoo javahá yo tan tsa cuñí yo tsi ra. Taahán tsi tsa cuñí vaha ca ndo tsi Nyoo tan javahá ndo cuhva cuñí ra, tan ña jandihí ndo tsa cuhva ndo diezmo can. ⁴³¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaa yahvi nyíví tsi ndo nuyahvi. ⁴⁴¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyí tsa ña nditsin ca canyíi. Tyin tsaní nyíví tsata can tan ña tsító ñi tyin nyíví ndiyí tsitsi ñaña icán. Tyin nduve ca cuhva canyíi nu nyíví ndiyí icán. Cuñí maa nyíví tyin vaha ndo, tan ña tsító ñi tyin ña vaha añima ndo —catyí ra Jesús.

⁴⁵Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahán nyaa ndihí un tsi ndi —catyí ra.

⁴⁶Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahan tsanaha. Tan ña taahán tsi. Tan yoñi ndoyó carga can, tan jañiñí ca ndo na javaha nyíví can, tan maa ndo ndi luxu ña jatyinyé ndo tsi ñi.

⁴⁷¡Ndahvi nyooho! tyin janduvahá vaha ndo ñaña nu ñuhú yiquí ra cuví ndusu yuhu Nyoo tsa tsahñí ra cuví tsii tsaañhu ndo tahan tsanaha. ⁴⁸Yacan cuñí tsi catyí tyin ndoó ndo vaha tsa javahá tsii tsaañhu ndo naha ra. Tyin tsii tsaañhu ndo tsahñí ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha.

⁴⁹Yacan cuenda catyí Nyoo tahan tsanaha tsihin tsa tsíñi tuñi ra tyin cua jaquitsi ra tsi ra cuva cuví ndusu yuhu ra tan ra caca tyíñu ra nu iyó ndo. Tan cua cahñí ndo juhva ra naha tan inga ra cua jacunu ndo tsi ra naha.

⁵⁰Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyíví iyó vityin tsa cuenda tandihí ra cuví ndusu yuhu ra tsa tsahñí tsii tsaañhu ndo naha ra nda cuanda tsíñi ñuhu ñayiví tan nda cuanda vityin. ⁵¹Nda cuanda niñí ra Abel tsa tsatí tsa tsahñí ra Caín yañí ra tsi ra, tan nda cuanda niñí ra Zacarías tsa tsahñí nyíví tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyíví tsa iyó vityin tsa catyí cuatyí nyíví tsa tsicoó tahan tsanaha. ⁵²¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quíhví nyíví ityi nu nyaá Nyoo. Tan ndi maa ndo ña quíhví ndo nu nyaá Nyoo. Tan ndi ña tsahá ndo tsa quíhví inga nyíví tsa cuñí quíhví —catyí ra Jesús.

⁵³Ndihí cahán ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxañan xaan ra naha tan quitsaha nducú tuhun xaan ra naha tsi ra Jesús. ⁵⁴Tyin cuñí ra naha tsa cahan ra Jesús iin tsa ña vaha, tyin tacan tan cuví tyaa ra naha cuatyí tsi ra.

12

Nu jacuahá ra Jesús tyin ña cuví tyihí xeehe yo cuatyí yo

¹Cuenda mil nyíví ndu iñi nda cuanda catyihí tahan ña ñi, tyin cuaha xaan ñi. Tacan tan ra Jesús cahán jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyi ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyi ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyi ra naha. ²Tyin nduve iin tsa yiíh xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyivi. ³Yacan cuenda, náa ndihí tsa caahán ndo nu xeehe, cua quita tsi nu nditsin. Tan náa ndihí tsa caahán ndo tsitsi vehe ndo, cua cana tsaa nyivi jiñi vehe.

¿Yóo taahán tsi nayuhvi yo, a tsi nyivi a tsi Nyoo?

(Mt. 10.28-31)

⁴Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo. ⁵Maa tyin cua catyi yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶Saa, ña yahvi nyaá ti. Cuví jata yo uhun taahan ti tsihin ubi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti. ⁷Tan nyoho, nyaá yahvi ca ndo nu Nyoo tan ñavin ca tsa cuaha saa can, tan nda cuanda ixi jiñi ndo tan tsító Nyoo najava taahan tsi iyó tyin tsa nacahvíra intuhun intuhun tsi. Yacan cuenda ña nayuhvi ndo.

Na ña nayuhvi yo cahan yo tuhun ra Jesu-cristo tsihin nyivi

(Mt. 10.32-33; 12.32; 10.19-20)

⁸Catyí yu tsihin ndo tyin tandíhi nyoho tsa janahá ndo tsi nyivi tyin tsímú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu. ⁹Maa tyin nyoho tsa janahá ndo tyin ña tsímú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuenda yu cuví ndo. ¹⁰Tan vasu cuxaan nyivi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyivi caahán tsa ndavaha ñi siqui Tatyí li Nyoo ña cua coo tucahnu iñi tsi ñi cuenda yacan.

¹¹'Quivi tsa cua cundaca nyivi tsi ndo tsitsi vehe ñuhu, nu juez, a nuu ra cumí

tyiñu naha ra, ña caca iñi ndo náa tuhun cua nacahan ndo. ¹²Tyin cuhva tsa cua nacahan ndo, cua cuhva maa Tatyí li Nyoo náa tuhun taahán tsi cahan ndo —catyí ra Jesús.

Nu tsaha cuenda ra Jesús tyin ña taahán tsi nyivo iñi yo tsa cuca

¹³Iin ra tsa nyíi tsihin nyiví cuaha tsa ndu iñi nu nyíi ra Jesús, catyí ra tsihin ra Jesús:

—Maestro, cahán tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴Tacan tan catyí ra Jesús tsihin ra:

—¿Tsaa, yóo tsaha tsi yu tsa cuví yu juez tan natahvi yu ndaha tyiñu ndo? —catyí ra.

¹⁵Tan yahá can tan catyí ra nuu nyivi cuaha can:

—Jaha xaan ndo cuenda tan ña nyivo xaan iñi ndo tyin ña tsímú ñuhu tsa coo cuaha ndaha tyiñu yo tan coonyito yo.

¹⁶Tacan tan tsaha cuenda ra Jesús iin cuhva tsi tandíhi nyivi, tan catyí ra:

—Tsicog iin ra cuca. Tan cuaha xaan ndaha tyiñu ñihí ra nu jahá tyiñu ra.

¹⁷Tacan tan tsicá iñi ra: “¿Nacaa javaha yu? Nduve nu quihi tandíhi ndaha tyiñu ihyá.”

¹⁸Tan catyí ra: “Tsa tsító yu nácaa cua javaha yu. Cua cani yu tandíhi yaca nyihi yu, tan cua javaha yu tsa nahnu ca, tan natyihí yu tandíhi ndaha tyiñu can tsihin tandíhi ca tsa iyó tsi yu tsitsi can. ¹⁹Tacan tan cua catyi yu tsihin yu: Cuaha xaan ndaha tyiñu naquihín vaha un, tan vityin cuahán maa cuiya, quitatu, catsi vaha, coho vaha, tan cusíi iñi.” ²⁰Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihín vaha un ¿Yóo tsii cua cuví yacan?” catyí Nyoo tsihin ra can.

²¹Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihí tsa tsímú ñuhu tsi yo

(Mt. 6.25-34)

²²Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihí ndo tsa catsi ndo, tan ndi jahma tsa cunditsi ndo. ²³Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. ²⁴Jaha ndo

cuenda saa tyin ña jahá tysiñu tì. Tan ndi ña tyihí vaha tì tsa catsi tì. Maa tyin tsatsí tì, tysiñ Nyoo tsahá ra tsa catsi tì. Tan nuu Nyoo nyaá yahvi ca nyoho tan ñavin ca saa.²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo.²⁶ Tatun ndi luxu can tan ña cuví jahá ndo, ¿nacuenda tsa tsicá xaan iñi ndo tandihí ca tsa tsisí ñuhu tsi ndo?

²⁷ 'Jaha ndo cuenda nácaa iyó yutun ita tyin ña jahá tysiñu tun tan ndi ña taví tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sií caá tsa tsinditsí ra tumaa tsa jacunditsí Nyoo tsi yutun ita ican.²⁸ Tatun tacan ñi jacunditsí Nyoo tsi yutun ita tsa iyó nu tsiquí vityin, tan ityaan cua cayu tun tsitsi horno, tan nyoho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsí ndo? Maa tyin maa ndo ña tsinú vaha iñi ndo tsi ra.²⁹ Ña caca xaan iñi ndo tuhun tsa catsi ndo tan tsa coho ndo.³⁰ Tyin nyivi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsisí ñuhu tsi ndo.³¹ Vaha ca tsa ndedu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsisí ñuhu tsi ndo.

Tsa vaha tsa iyó gloria

(Mt. 6.19-21)

³² 'Ña nayuhvi nyoho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihví ndo nu ndacá ñaha ra.³³ Xíco ndo tsa iyó tsi ndo. Tan jatyinyee ndo tsi nyíví ndaa hví. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo jatívi can ndacan, ndi nu ñasuhu, tan ndi quiti.³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí añima ndo —catyí ra.

Nu jacuahá ra Jesús tsi yo nácaa cuatu yo tsi ra quíví quitsi ra inga tsaha

³⁵ 'Cuatu vaha ndo tsi yu tsihin ñuhu nditsin Nyoo quíví quitsi yu inga tsaha.

³⁶ Tan cuví ndo tumaa musu tsa ndatú tsi tsitoho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsitoho ra naha tsa tsaa ra.³⁷⁻³⁸ Tan sií xaan cua cuví ra naha nyehe ra naha tsi ra cuví tsitoho ra

naha. Tyin ndatú ra naha tsi ra nda cuanda tsa tsaa ra, vasu ñiu taxin, vasu tsa naha ca. Tan cua tyaa ra tsi ra musu ican naha ra yuhu mesa tan cuhva ra tsa catsi ra naha. Tacan tan sií xaan cua cuñí musu can naha ra.³⁹ Tan coto ndo tyin tatum tsitoho vehe, tan tsitó ra náa cuhva cua quihví ñasuhu vehe ra, cua jaha ra cuenda vehe ra. Tan ña cua cuhva ra quihví nu ñasuhu ican tsitsi vehe ra.⁴⁰ Tan tacan cuví tucu nyoho, cuatu ndo. Tyin yuhu, Rayii tsa queé nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha
(Mt. 24.45-51)

⁴¹ Tacan tan quitsahá nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyívi?

⁴² Tacan tan nacahan ra Jesús, tan catyí ra tsihin ra:

—Musu tsa tyá soho tsa caahán tsitoho ra, juvin ra cuví musu vaha. Tyin jahá tsa cuenda vehe tsitoho ra. Tan vaha cuhva tsahá ra tsa catsi tandihí ca musu ican.⁴³ Tan sií xaan cuñí musu ican tatum cuhva tsa jahá tysiñu ra, tan cua tsaa tsitoho ra. Tyin tyá yahvi ra tandihí tsa taahán tsi ica ra.⁴⁴ Tan catyí yu tsihin ndo tyin tsa nditsa. Tyin tsitoho ra cua nacuhva ra tandihí tsa cumí ra, cua quihí ndaha ra. Tyin vaha tyá yahvi ra tsihin tysiñu jahá ra.⁴⁵ Maa tyin tatum tsicá iñi musu ican tyin naha xaan cuahán tsitoho ra, tan quitsahá cañí ra tsi inga musu tsa cutahán tsihin ra tan ñiñaha jahá tysiñu ican, tan ña cuñí ra jaha tysiñu ra. Tyinu tsatsí ñi tan tysiñu tsisí nyixi ñi iyó ra.⁴⁶ Tacan tan sana iñi ra cua tsaa tsitoho ra quíví tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsisí iñi tsa caahán ra.

⁴⁷ Tan iin musu tsa tsitó nácaa iyó tsitoho ra tan ña javahá ra cuhva cuñí tsitoho ra, cuaha xaan tundoho cua nyehe ra.⁴⁸ Maa tyin tatum iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsito ra can, tan javahá ra. Tatun iin musu tan cuaha tsa tsahá tsitoho ra tsi ra, cuaha tysiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha

xaan tysiñu taahán tsi nacuhva cuenda ra tsi tsitoho ra.

*Nu cahán ra Jesús tyin tsacatyi ra cua cañi tahan nyivi tsihin nyivi ñi
(Mt. 10.34-36)*

⁴⁹ Tumaa tsa jatahán yu ñuhu nu ñuhu ñayivi, tacan cuví tysiñu vatsí yu. ⁵⁰Tan cuñí xaan yu tsa nacayu catyin ña ñuhu ihyá!

⁵⁰Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihí tysiñu jahá yu. ⁵¹Cuñí maa ndo tyin tsa vatsí cuhva yu tsa taxin coo ndo nu ñuhu ñayivi ihyá. Maa tyin yuhu vatsí yu tyin jasiín yu tsi ndo. ⁵²Tyin tsa vityin tan itiy nuu ca, uhun taahan nyivi iin vehe ñi cua cusiín ñi. Úñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin úñi taahan ñi. ⁵³Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe siíhi cua cañi tahan ña tsihin sehe siíhi ña. Tan ña cuví sehe siíhi can cua cañi tahan ña tsihin siíhi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

*Nu cahán ra Jesús tsihin nyivi tyin ña nacotó ñi tyin tsa tsaq Sehe Nyoo nu yucú ñi
(Mt. 16.1-4; Mr. 8.11-13)*

⁵⁴Catyí tucu ra Jesús tsihin nyivi cuaha tsa yucú ican:

—Tatum nyehé ndo tyin tsa yihi vico, catyí ndo tyin tsa cua cuun savi. Tan tacan tsa cuii cuví. ⁵⁵Tatum tsa nyehé ndo tyin tsa yihi tatyí quee itiy ndutuya ñuhu, catyí ndo tyin tsa cua ndu ihñi. Tan quita tsa cuii nu caahán ndo. ⁵⁶Nyoho jahá ndo tsa tsító xaan ndo, tan nacotó ndo tandihí tsa cuví andivi, tan tandihí tsa cuví nu ñuhu ñayivi ihyá. Tan ¿nacuenda tsa ña nacotó ndo náá tyembu iyó ndo vityin?

*Nduyu yo cuhva nácaa coo vaha yo tsihin ra tsicán cuatyi tsaha yo coto cuhun yo anyaya
(Mt. 5.25-26)*

⁵⁷¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸Tatum iin ra tsicán cuatyi tsaha ndo tan cuahán ndo tsihin ra nu nyaá ra cumí tysiñu, itiy cuahán ndo ndrucu ndo cuhva coo vaha ndo tsihin ra tsa ndi cumañi ca tsaa ndo nu nyaá ra

cumí tysiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. ⁵⁹Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihí tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹Tacan tan juvin ñi quivi can nyecu juhva ra naha. Tan quitsahä nacatyí tuhun ra naha tsihin ra Jesús tsa javahä ra Pilato tsihin juhva ra Galilea naha ra. Tyin tavára tysiñu na cahñi andaru naha ra tsi ra Galilea tsa tsijamañi quítí jana ra naha tsi Nyoo. Tan tacan sacá nuu niñi ra ican naha ra tsihin niñi quítí tsa tsijamañi ra ican naha ra. ²Tan nacahan ra Jesús tan catyí ra tsihin ra naha:

—¿A tsicá iñi nyoho tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihí ra naha? ³Ñavin. Tyin tatum nyoho tan ña nasama ndo cuhva iyó ndo, tacan cua cunaa ndo. ⁴Tan tsa tsahun uñi taahan ra tsihí can naha ra tsa canacavá torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicó ñuu Jerusalén, cuñí maa ndo? ⁵Ñavin. Tyin tatum nyoho tan ña nasama ndo cuhva iyó ndo, cua cunaa ndo.

Nu tsahä cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶Tacan tan tsahä cuenda ra Jesús iin cuhva ihyá. Tan catyí ra:

—Iin ra iyó yutun tsa nañí higuera tsi ra. Tan nyaa tun nu ñuhu ra. Tan tsaharan tsinyehé ra tatum iñi tsítí tun. Tan nyehé ra tyin nduve. ⁷Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehé yu tatum iyó tsítí tun. Tan nduve maa tsiti tun iñi. Cähnya tsi tun. Tyin nyaá cuatu ñi maa tun nu ñuhu ihyá. Tyin nduve tsiti tsahá tun”, catyí ra. ⁸Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyáa nuu maa tun inga cuiya ihyá. Cua janduvita yu ñuhu tsaha tun tan cua tyihi yu ñuhu tyahayú. ⁹Vasiquí tacan

tan cua cuhva tun tsiti. Maa tyin tatum ña cuhva tun tsiti, tacan tan cahnya yo tsí tun”, catyí ra tsa jahá cuenda ñuhu can —catyí ra Jesús.

Quivi quitatú nyiví janduvahá ra Jesús tsi iin ñaha tihí tsata

¹⁰ Iin quivi tsa quitatú nyiví, jacuahá ra Jesús tsi nyiví tsitsi vehe ñuhu. ¹¹ Tan ican nyáa iin ñaha tsa yihi tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví indundoo ña. ¹² Tacan tan nyehe ra Jesús tsi ña. Tan cana ra tsi ña. Tan quitsaha caahán ra tsihin ña, tan catyí ra:

—Tsa nduvahá un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan indundo ña. Tacan tan quitsaha jacaahnú ña tsi Nyoo. ¹⁴ Maa tyin ra cuví ityi nuu vehe ñuhu, cuxaan xaan ra tsi ra. Tyin quivi quitatú janduvahá ra tsi ña. Tan catyí ra tsihin nyiví nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuvi ndo numeri. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyoho tsa jahá ndo tyin vaha ndo. ¿A ña ndatsí tucu nyoho quitti jana ndo tan jacobó ndo ndutyta tsi tì quivi quitatú yo? ¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhní ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa cahan ra Jesús yacan, tandíhi maa nu xaan iñi tsi ra nducahan nuu nahnu. Maa tyin tandíhi ca maa nyiví sií xaan cuñi ñi tsihin tsa cahnu tsa iyo javahá ra Jesús.

Nu cahan ra Jesús tyin tumaa iin tsiti mostaza cuví tsa ndacá ñaha Nyoo tsi yo

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa tsihin jandu inducu yo itsi?

¹⁹ Tumaa iin tsiti mostaza, tacan cuví tsi. Tyin iin ra tatsí ra iin tsiti ican nu ñuhu ra, tan cana iin yutun luhlu, tan tsahnu tun. Tan cuví tun iin yutun cahnu xaan. Tacan

tan tsaa saa naha tì nuu yutun ican. Tan javahá tì taca tì nuu tun.

Nu cahan ra Jesús tyin tumaa yutsan iya, tacan cuví tsa ndacá ñaha Nyoo tsi yo
(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuví tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaa tanii yutsan paan ican jahá yutsan iya ican, tacan cuví tsa ndacá ñaha Nyoo tsi yo —catyí ra.

Yuvehe tihin tan ityi cuiñi tsa cuahán nu nyáa Nyoo

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra tuhun Nyoo tsihin nyiví tandíhi ñi ñuu nu yahá ra. ²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyiví cua cacu? —catyí ra.

Tacan tan nacahan ra Jesús, tan catyí ra:

²⁴ —Nanducu ndo cuhva quihví ndo yuvehe tihin. Tyin tacan cuví quihví ndo nu ndacá ñaha Nyoo. Tyin cuaha xaan ndo cuñi ndo quihví ndo ndacan, tan ña cuvi.

²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyoho tsa nyecú ndo ityi tsata cua jandatsan ndo yuvehe, tan cua catyi ndo: “Nuña yuvehe.” Tan ra ican cua catyi ra tsihin ndo: “Ña tsitó yu ndáa ityi quee nyoho.” ²⁶ Tacan tan nyoho cua catyi ndo: “Nyuhu tsatsí ndi tan tsihí ndi tsihin un. Maa un jacuahá un tuhun Nyoo tsi ndi ityi nu nyecú vehe ndi”, cua catyi ndo tsihin ra. ²⁷ Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Çatsiyo nyaha ndo nu nyáa yu tandíhi nyoho nyiví javahá tsa ña vaha” ²⁸ Tacan tan cua vacu ndo tan catsan ña cua cuvi nuuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandíhi ra cuví ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyoho ndoq ndo ityi tsata. ²⁹ Tan cua quitsi nyiví ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecu ñi catisi ñi tsihin Nyoo nu

ndacá ñaha ra.³⁰ Tan juhva nyívi tsa cuahán ityí nuu vityin, ñi can cuhun nu ndíhi. Tan juhva nyívi tsa cuahán nu ndíhi ña, ñi can cuahún ityí nuu —catyí ra.

Nu cuihyá xaan cuñí ra Jesús nyehé ra tsi nyívi ñuu Jerusalén
(Mt. 23.37-39)

³¹ Juvín ñi maa quíví can tsaa juhva ra fariseo. Tan catyí ra naha tsihin ra Jesús:

—Quita ihyá tyin ra Herodes cuñí ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuui, tyin nda cuanda quita quíví tsa ndíhi tyíñu jahá yu tsa tavá yu tatyí ña vaha tsi nyívi tan tsa janduvahá yu tsi nyívi cuuhví tsihin cuehe, tacan tan cundihi tyíñu jahá yu.³³ Maa tyin nda cuanda tahan tsi tsa ndíhi maa tyíñu jahá yu, tacan tan cuhun maa yu cua cíú yu nda ñuu Jerusalén. Tyin ña cuví cíú iin ra cuví ndus yuhu Nyoo ityi tsata ñuu Jerusalén.

³⁴ ¶Ndahvi nyoho nyívi Jerusalén! tyin tsahñí ndo tsi ra cuví ndus yuhu Nyoo. Tan cañí ndo yuu tsi tandíhi ra tsa jaquitsí Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda iin ndívi siihi sehe tì, tan naquihín vaha tì tsi tì naha tì tsitsi nditsin tì. Maa tyin maa ndo ña cuñí ndo.³⁵ Nyéhe ndo vityín tyin tsa naco yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quíví tsa cua catyí ndo tyin cahnu xaan ra vatsí tsihin sivi Nyoo Jutu yo —catyí ra Jesús.

14

Nu janduvahá ra Jesús tsi iin ra cuuhví tsa iyó cuiñu quíví quitatú nyívi

¹ Cuví tsi iin quíví quitatú nyívi. Tan ra Jesús cuahán ra cua catsi ra vehe iin ra cuví ityí nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús.² Tacan tan yatyín ñi nuu ra Jesús nyaá iin ra cuuhví tsa iyó cuiñu.³ Tan catyí ra Jesús tsihin ra maestro cuenda ley vehe ñihu naha ra tan tsihin ra fariseo naha ra:

—¿A vaha janduvaha yo nyívi cuuhví quíví quitatú yo? ¿Náa catyí ley Nyoo? —catyí ra.

⁴ Tacan tan tandíhi ra naha, taxin ña tsinyecu ra naha. Tacan tan tyisq ndaha ra

Jesús jiñi ra cuuhví can. Tan janduvahá ra tsi ra. Tan catyí ra tsihin ra na cunuhu ra.

⁵ Tacan tan catyí ra Jesús tsihin ra fariseo naha ra:

—Tatun nyoho tan canacavá iin burru jana ndo, a inga quiti jana ndo, tsitsi xahva, ña cua tava ndo tsi tì tsa numi ñi, vasu ndi maa quíví quitatú yo cuví? —catyí ra.

⁶ Tacan tan taxin ña tsinyecu ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

⁷ Nyehé ra Jesús tyin tandíhi ra nyecú vico ican nacatsjí ra naha tyayu vaha ca cunyecu ra naha. Tacan tan tsahá cuenda ra tyehen tsi ra naha:

⁸ —Ndáa quíví cuhun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuvi tan ñavin ca maa ndo,⁹ tan coto quitsi ra tsa cana tsi ndo tan catyí ra tsihin ndo: “Cuhva tyayu can tyin cunyaa ra ihyá.” Tacan tan nyoho tsihin tsa cahan nuu ndo, tan cua cuhva ndo tyayu can. Tacan tan cua cunyecu ndo nu ndíhi ña.¹⁰ Maa tyin catyí yu tsihin ndo, tyin ndáa quíví cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quitsi maa ra tsa cana tsi ndo tan cua cahan ra tsihin ndo: “Amigos, náha ndo, cunyecu ndo nu tyayu vaha ihyá.” Tacan cua jacahnu ca ra tsi ndo nu nyívi nyecú yuhu mesa tsihin ndo.¹¹ Tyin ra tsa cahnu jahá tsi maa ra, cua tahan ra ticanuu. Tacan cua cuahán ca ra tsi ndo nu nyívi nyecú yuhu mesa tsihin ndo, cahnu ca cua cuvi ra —catyí ra Jesús.

¹² Tacan tan catyí tucu ra tsihin ra cana tsi ra nu iyó vico can:

—Ndáa quíví coo vico vehe un, ña cua cana un tsi ra vaha ñi tsi un, ndi tsi ra yañi un, ndi tsi ra cuví nyívi un, ndi tsi nyívi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahán ñi vico vehe un.¹³ Maa tyin catyí yu tsihin un tyin ndáa quíví coo vico vehe un, cana tsi nyívi ndaaahvi, nyívi cuuhví, nyívi coxo, tan tsihin nyívi cuaa.¹⁴ Tacan tan sii cua cuñí un, tyin ñi ican ña cua cuvi natyahvi ñi tsi un. Maa tyin cua natyahvi Nyoo tsi un quíví cua nandoto un tsihin nyívi vaha.

Nu tsahá cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

¹⁵Tan tsin̄ iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyíví tsa cua catsi nu ndacá ñaha Nyoo —catyí ra.

¹⁶Tacan tan catyí ra Jesús tsihin ra:

—In ra ican jacoq̄ ra iin vico cahnu xaan vehe ra. Tan cana ra cuaha xaan nyivi.

¹⁷Tacan tan tsaa cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahān tsi cuhva cuxiñi ñi.

¹⁸Maa tyin tandihi ñi ican quitsahá caahán ñi tyin ña cua cuhun ñi. Tan iin ra ican catyí ra: “Ndi jatā yu iin ñuhu. Tan cuñi tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.” ¹⁹Tacan tan inga ra ican catyí ra: “Ndi jatā ñi yu uhun taahan yunta. Tan cuhun yu cunyehe yu tatum vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuvi cuhun yu.” ²⁰Tacan tan inga tucu ra ican catyí ra: “Ndi tindahá cuui ñi yu, tan ña cua cuvi cuhun yu”, catyí ra. ²¹Tacan tan musu ra ican cuanuhú ra. Tan catyí tuhun ra tandihi tsa cuvi ican tsihin ra tsitoho ra. Tsa tsin̄ tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihi maa ityi. Tan quitsi ndaca un tsi nyíví ndaahvi, nyíví cuuhví, nyíví coxo, tan tsihin nyíví cuua”, catyí ra. ²²Tan tsa yahá tsaa nyico musu ican tan catyí ra tsihin ra tsitoho ra: “Tsa jahava yu tandihi maa tsa cahan un tsihin yu. Tan nuña ca tsitsi vehe”, catyí ra. ²³Tacan tan tsitoho ra catyí ra tsihin ra: “Cuaahan cua nducu ca nyíví tandihi maa ityi. Tan jañiñi un tsi ñi na quitsi ñi, tyin na cutu tsitsi vehe yu. ²⁴Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatum cuenda ra Jesús yihí yo

(Mt. 10.37-38)

²⁵Cuaha xaan nyíví nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶—Tandihi nyoho tsa nyicún tsi yu, tatum cuñi ca ndo tsi nyíví ndo tan ñavin

ca tsi yuhu, ñavin cuenda yu yihí ndo. Tan tatum cuñi ca ndo tsi maa ndo tsa nuu yuhu, ñavin cuenda yu yihí ndo.

²⁷Tyin nyoho tsa ña cuñi nyehé tundoho tsa cunyicun ndo tsi yu, ña taahán tsi cuvi ndo nyíví cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo.

²⁸Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi ñi ndo tun quita vehe cahnu can tsihin xuhun tsa nyíví tsi ndo.

²⁹Tyin tatum quitsahá jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyíví tsi ndo.

³⁰Tan cua catyí ñi: “Ra ican quitsahá javahá ra vehe ra, tan ndi ña cuví jandihí ra can”, cua catyí ñi.

³¹A tatum iin rey tan cuñi ra cañi tahan ra tsihin inga rey ja ña cunyaa jihna ra tan nyehé ra tatum ñihí tsa utsi mil ñi andaru tsa caahán tsihin ra cua cañi tahan ra naha tsihin inga rey tsa vatsí tsihin oco mil andaru ican?

³²Tan tatum tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey ican, tan cuajacuhun ra tsi musu ra tyin na catyí tuhun ra naha tsihin inga rey ican na jandihí taxin ra itsi.

³³Tan tacan cuví nyoho.

Tatum ña cahnya iñi ndo tandihi maa tsa cuñi ndo tan tandihi tsa cumí ndo,

ñá cua cuvi cunyicun ndo tsi yu.

Nu jacuahá ra Jesús tyin tumaa ñii tsa ndihi tsa uhva, tacan cuví yo tatum ndu uvi iñi yo tsasín iñi yo tsi ra

(Mt. 5.13; Mr. 9.50)

³⁴Vaha ñii tyin jacuuhá tsi tsa catsi yo. Maa tyin tatum ndihi tsa uhva tsi, ña vaha ca tsi.

³⁵Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyoho tsa iyó soho, tyaa soho ndo tuhun caahán yu —catyí ra Jesús.

15

Nu jacuahá ra Jesús tyin tumaa mbee tsa cuanaá tacan cuví yo

(Mt. 18.10-14)

¹Tandihi ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhvá ra naha nu nyíí ra Jesús, tan tyaá soho ra naha tsa caahán ra.

²Tacan tan ra fariseo naha ra tsihin ra maestro cuenda ley vehe ñuhu naha ra quitsahá caahán nyaa ra naha tsi ra Jesús, tan catyí ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyí ra naha.

³ Tacan tan ra Jesús tsahá cuenda ra cuhva ihya, tan catyí ra:

⁴ —Nyoocho tsa iyó iin centu mbee jana, tun cunaa intuhun tí, ja ña cua nacoo ndo tsi tandíhi ca tí, tan cunanducu ndo tsi mbee tsa cunaa can nda cuanda tsa nañíhi ndo tsi tí? ⁵ Tan tsa yaha nañíhi ndo tsi tí, tyiso soco ndo tsi tí. Tan sii xaan cua cuñí ndo. ⁶ Tan tsa tsaa nyico ndo vehe ndo, tan ndu iín ndo tsihin ra vaha iñi tsi ndo tan tsihin nyivi iyó yatayin yuvehe ndo, tacan tan catyí ndo tsihin ñi tyin na cusíi ndihí iñi ñi tsihin ndo tyin nañíhi ndo mbee jana ndo tsa tsinaa. ⁷ Tan catyí yu tsihin ndo, tyin tacan tucu sii xaan ca cuñí ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñí ca tsi tsa nasama ñi cuhva iyó ñi.

Ñaha tsa tsinaa xuhun tan nañíhi ña

⁸ Tan catyí yu tsihin ndo, tyin tatuń iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihví ña taníi tsitsi vehe ña. Tan cua nanducu ña xuhun can nda cuanda tsa nañíhi ña can. ⁹ Tan tsa yaha nañíhi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatayin yuvehe ña, tan cua cahan ña tsihin ñi: “Cusíi ndihí iñi ndo tsihin yu tyin tsa nañíhi yu xuhun yu tsa tsinaa”, cua catyí ña. ¹⁰ Tan catyí yu tsihin ndo tyin tacan tucu sii cuñí ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahá ra Jesús nácaa cuñí Nyoo tsi iin ra ndu uvi iñi cuatyí

¹¹ Tacan tan tsahá cuenda ra Jesús inga cuhva ihya tan catyí ra:

—In ra, iyó uvi taahan sehe ra. ¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahví sava ra tsa tsii ra tan tsahá ra tsi nduví taahan sehe ra. ¹³ Tan ña cuaha ñi quiví tan ra luhlu icán xico ra tandíhi maa tsa tsahá jutu ra tsi ra. Tan jandu iin ra xuhun ra, tan quihín ra ityi, cuahán ra iin ñuu cañí xaan. Tan ndacan tsicoo ra tan janaa ra tandíhi maa xuhun ra tsihin tusíi iñi. Tan quiñí xaan icá ra tsicá nuu ra.

¹⁴ Tacan tan tsaa tama ityi nu iyó ra. Tan quitsahá tsisocó ra tyin tandíhi xuhun ra janaa ra. ¹⁵ Tacan tan tsahán ra tsinducú ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quiñí jana ra, tyin jaha cuenda ra tsi tí naha tí. ¹⁶ Tan cuví tsi iin tsaha tsisocó xaan ra can. Tan nduve maa tsa catsí ra iyó, ndacua cuñí ra catsí ra tsa tsatsí quiñí ican naha tí. Tan yoñí maa tsahá tsa catsí ra. ¹⁷ Tacan tan nducuhun iñi ra tsi jutu ra. Tan nacañí jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañí tsi ra naha. Tan yoo vityin cuñí cíu yo jahá soco. ¹⁸ Vityin cua cunuhu yo nu nyaá jutu yo. Tan cua catyí yo tsihin ra tyin tsicoo cuatyí yo nuu Nyoo tan tacan tucu nuu maa ra. ¹⁹ Tan ña taahán ca tsi tsi yo tsa cuví yo sehe ra, tan na jaha ra tyin iin musu ña ra cuvi tsi yo” cuñí ra tsicá iñi ra.

²⁰ Tacan tan quihín ra ityi cuanuhu ra nda vehe jutu ra. Tan cañí ca vatsí ra tan nyehe jutu ra tsi ra, tan cundaahví iñi ra nyehé ra tsi sehe ra. Tan tsinu xaan ra tsijatahan ra tsi ra. Tan tsinumi nyaá ra tsi ra. ²¹ Tacan tan catyí ra tsihin jutu ra: “Tyatya, tsicoo cuatyí yu nuu Nyoo tan tsicoo cuatyí yu nuu tucu maa un. Tan yacan ña taahán ca tsi tsi yu tsa cuví yo sehe un”, catyí ra tsihin jutu ra. ²² Maa tyin jutu ra tavá tyiñu ra, tan catyí ra tsihin musu ra: “Tava ndo jahma vaha tan jacunditsi ndo tsi ra ihyá. Tan tyihi ndo iin xehe nundaha ra. Tan tyihi ndihí ndo zapatu tsaha ra. ²³ Tan cahní ndo iin becerru tsa xaahan vaha ca, tyin catsí yo tsi tí. Tyin vityin cua coo yo vico. ²⁴ Tyin ra sehe ye ihyá tsa tsihí ra cuñí maa yu, tsicá iñi yu. Cuñí maa yu tyin ña cua nyehe ca yu tsi ra, tan tsaa nyico ra”, catyí jutu ra can. Tacan tan quitsahá tsicoo ñi vico. Tan sii xaan cuñí ñi tyin tsaa nuhu nyico ra.

²⁵ Tacan tan inga sehe ra, ra tsa tsitsa, nyíí ra tsicuhu. Tan tsa cua tsaa nuhu ra nda yuvehe ra, tan tsíi ra tyin iyó yaa. Tan tuví iñi ra tyin tsafí ñi yaa. ²⁶ Tacan tan tsa cuyatayin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuví xaan can. ²⁷ Tacan tan musu can catyí ra: “Ra yañí un tsaa nuhu ra. Tan yacan tavá jutu un tyiñu tyin na cahní ra naha iin becerru xaahan. Tyin vaha tsaa ra yañí un, tan nduve náa tahan ra”, catyí musu can tsihin ra. ²⁸ Tacan tan nduxaañ

xaan cuñí ra can. Tan ña cuñí ra quihvi ra tsitsi vehe. Tan jutu ra tsahen ra tsicahan ndaahvi ra tsihin ra, tyin na quihvi ra tsitsi vehe. ²⁹Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaa yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu.” ³⁰Maa tyin vityin tsaañ muhu nu sehe un ihyá, nu tsa janaa xuhun tsihin ñaha siñ iñi. Tan tsaha un iñi becerro quiti xaahan tsi nu”, catyí ra tsihin jutu ra. ³¹Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihi quivi. Tan tandihi tsa cumí yu, tsii un cuví can. ³²Tan vityin taahán tsi tyin javaha yo vico ihyá, tan cuñi iñi yo. Tyin tsaañ muhu ra yañi un, ra tsa tsihin, cuñi maa yu. Tumaa tsa nandoto nyico ra cuví can, tyin tsinaañ ra, tan nañihí yo tsi ra inga tsaha”, catyí ra tsihin sehe ra —catyí ra Jesú.

16

Nu jacuahá ra Jesú tsí yo nácaa javaha yo tumañi iñi tsihin tsa iyó tsí yo

¹Tacan tan catyí ra Jesú tsihin ra tsicá tsihin ra:

—iyó iñi ra, cuca xaan ra. Tan iyó iñi ra yihí ndaha tandihi tyiñu jahá ra cuca can. Tan tsahen iñi musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaa ra tandihi tsa iyó tsi ra. ²Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsitoho yu ña cuñí ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahan xaan nuu yu caya yu tsitsi ñuu. ⁴Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsaa yu vehe ñi”, tsicá iñi ra can. ⁵Tacan tan cana ra tsi intuhun intuhun ra tsa nyaá cuenda tsi tsitoho ra. Tan catyí ra tsihin iñi ra ican: “¿Náa nyaá cuenda un tsi tsitoho yu?” catyí ra. ⁶Tacan tan nacahan ra ican

tan catyí ra: “Yuhu nyaá cuenda yu cumi mil litru acetye.” Tacan tan ra yiñi ndaha tyiñu ican catyí ra tsihin ra: “Quihin un inga tutu ihyá. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra. ⁷Tacan tan tsaañ inga ra. Tan tsicá tuhun tucu ra tsi ra ican: “¿Náa nyaá cuenda un tsi tsitoho yu?” Tan nacahan ra ican: “Nyaá cuenda yu iñi mil arroba trigu”, catyí ra. Tacan tan catyí ra yiñi ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸Tacan tan tsitó tsitoho ra tsa ña vaha tsa javahá ra. Tan iyo xaan cuñí ra cuca can, tyin yatyi xaan ñihí ra cuhva ica ra —catyí ra Jesú.

Tan catyí ra tsihin ra tsicá tsihin ra:

—Nyivi nu ñuhu ñayivi ihyá tsa ña tyaa yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añaima.

⁹Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihyá, tan jatyinyee ndo tsi nyivi. Tan quivi tsa cua ndihí tsa cuca, cua ñihí ndo coo ndo nu ña cua naa maa.

¹⁰Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatum cuaha coo tsi ndo cua cuatyíñu vaha ndo itsi. Tyin tatum ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatum cuaha coo tsi ndo. ¹¹Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihyá, Nyoo ña cua cuhva ra tsa vaha tsa iyó gloria tsi ndo. ¹²Tyin tandihi tsa iyó tsi ndo, maa Nyoo tsahá nuu itsi tsi ndo. Tan tatum ña javahá ndo tumañi iñi tsihin tsi, ña cua cuhva ra tsa cuvi tsii ndo.

¹³Ilin musu ña cuví coo uvi taahan tsitoho ra. Tyin musu ican cua cuñí ca ra tsi iñi ra, tan ñavin ca tsi inga ra. Tan vaha ca cua tyaa yahvi ra tsa cahan iñi ra, tan inga ra, ña cua tyaa yahvi ra tsa cahan ra can. Ña cua cuvi cuñí ndo tsi Nyoo tatum cuñí tucu ndo tsa cuca —catyí ra Jesú. ¹⁴Tan tsa tsiiñi ra fariseo naha ra tandihi tsa cahan ra Jesú, tacan tan quitsaha tsacú nducu ra naha tsi ra. Tyin maa ra fariseo naha ra cuñí xaan ra naha xuhun. ¹⁵Tacan tan catyí ra Jesú tsihin ra naha:

—Vaha xaan jahá maa ndo tsi ndo nuu nyiví. Maa tyin tsa tsító Nyoo tyin ña vaha añima ndo. Tandihí tsa cahnu cuñí maa nyiví, Nyoo ña cuñí ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ "Ley tsa tsahá Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahan tsanaha, yacan cuví tsa janahá ityí tsi nyiví nda cuanda quíví tsa quitsi ra Juan. Tan ra Juan quitsahá caahán ra tuhun vaha tyin tsa cuñí quitsi Nyoo tyin cua cundaca ñaha ra. Tan tandihí nyiví nducú xaan ñi cuhva tsa quíhví ñi nu ndacá ñaha ra.

¹⁷ "Tan catyí yu tsihin ndo, tyin vasu cuñaan andíví tan nu ñuhu ñayiví ihyá, maa tyin tsa cuví ley Nyoo tsa tyaa ra Moisés, ña cua cuñaan tsi tyin cua cundaa tandihí tsi.

Nu jacuahá ra Jesús tyin ña vaha tsa nacoo ihñi rayii ñasiihi ra

(Mt. 19.1-12; Mr. 10.1-12)

¹⁸ "Tatun iin rayii tan iyó ñasiihi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayii tsihin ñaha tsa nacoo yíi, coo tuco cuatyí ra can nuu Nyoo.

Nu jacuahá ra Jesús tsi nyiví cuenda ra cuca tsihin ra Lázaro

¹⁹ "Tsicoq iin ra cuca. Tan vaha xaan jahma tsinditsí ra. Tan tandihí quíví iyó vico jahá ra tan tsatsí vaha ra. ²⁰ Tan tsicoq tuco iin ra ndaahvi tsa tsinañi Lázaro. Tan ra ihyá cuaha xaan ndihýi iñi tsi ra. Tan nyaára yuvehe ra cuca ican. ²¹ Ra ndaahvi can, cuñí ra catsi ra, vasu tsa cucoyó xuu mesa ra cuca can. Tan nda cuanda ina tan tsaa tì naha tì nu nyaára, tan tsacayaá tì nu uhvi ra. ²² Tan iin quíví tsihí ra ndaahvi can. Tan ángel maa Nyoo na quihin tsi ra tan tsindacá ra naha tsi ra nda nu nyaára Abraham gloria. Tacan tan tsihí tuco ra cuca can. Tan tsicutsi ñi tsi ra. ²³ Tacan tan ra cuca ican nyehé xaan ra tundoho nu nyiví ra anyaya. Tan nanyehe ra nu cañí xaan nu nyaára Abraham tsihin ra Lázaro. ²⁴ Tacan tan cana tsaar ra cuca can tan catyí ra: "Tyatya Abraham, cundaahvi iñi tsi yu. Jaquitsi tsi ra Lázaro tan na jatyyi ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihyá", catyí ra. ²⁵ Tan ra Abraham catyí ra tsihin ra: "Nduçuhun iñi

tyin vaha xaan tsicoq un nu ñuhu ñayiví. Tan ra Lázaro, tuhun ndaahvi tsicoq ra. Tan vityin vaha iyó ra ihyá, tan yooho nyehé un tundoho. ²⁶ Tan inga tuco tuhun, tyin mahñu nu yucú yo ihyá cunu xaan xahva. Tan ra yucú nyehe ña cuví cuhun ra naha nu nyiví un. Tan ndi ra yucú nu nyiví un, ña cuví quitsi ra naha nyehe", catyí ra Abraham tsihin ra cuca can. ²⁷ Tacan tan catyí ra cuca ican: "Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu. ²⁸ Tyin iyó uhun taahan ca ra yañi yu naha ra. Tan cuñí yu tyin catyí tuhun ra Lázaro tsihin ra naha nácaa nyiví yu nyehé yu tundoho ihyá, coto quitsi ndihí ra naha ihyá", catyí ra. ²⁹ Tacan tan catyí ra Abraham: "Iyó ley tsa tyaa ra Moisés. Tan iyó tuhun tsa tyaa ra cuví ndusu yuhu Nyoo tahan tsanaha. Na tyaa yahvi ra yañi un naha ra, tun cuñí rà naha", catyí ra Abraham. ³⁰ Tacan tan catyí ra cuca ican: "Tyatya Abraham. Ña cua tyaa yahvi ra naha. Maa tyin tatuń yóo tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó raha", catyí ra cuca ican. ³¹ Tan ra Abraham catyí ra: "Tatun ña cuñí ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, vasu ndi maa nandoto iin nyiví tan cahan ñi tsihin ra naha ña cua tsinu iñi ra naha."

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jatíví tsi nyiví. Maa tyin ndahvi ra ndaahvi tsa jatíví tsi nyiví. ² Vaha taxin ca na cunuhñi iin yuu jucun ra, tan jacuhun nyiví tsi ra nu ndutya ñuhu. Coto jatíví ca ra tsi nyiví ndi nasama cuhva iyó.

³ "Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javahá ra. Tun nasama ra cuhva iyó ra, jaha ndo tucahuñi iñi tsi ra. "Tan ndi maa javaha ra tsa ña vaha tsihin ndo utsa tsaha tsa iin quíví, tatun tandihí tsa utsa tsaha tan catyí ra tsihin ndo tyin ndu uvi

iñi ra tsa javahá ra; tandíhi tsa utsa taahan tsaha can, jaha ndo tucahuñ iñi tsi ra.

Nu jacuahá ra Jesús tsi yo tyin tatum tsinú iñi yo tsi ra, cuví javahá yo cuaha tsa vaha

⁵ Tacan tan catyí ra tava tyiñu ra Jesús tsihin ra:

—Cuhva tsa tsinu ca iñi ndi tsi un —catyí ra naha.

“Tan catyí ra Jesús tsihin ra naha:

—Tatum tsinú iñi ndo tsi yu vasu tumaa cuhva iñi tsiti mostaza tsa luhlu cuii ñi tsi, cua cahan ndo tsihin yutun cahnu tsa nañí sicómoro tsa nyaá ihyá: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatum iñi nyoocho tan iyó iñi musu ndo, tan tsaa ra tsa tsahan ra tsicuhu tsijahá tyiñu ra, a tsijahá cuenda ra quiti jana ndo, ⁸ ja catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra. ⁹ Maa tyin tyehen tuhvá ndo caahán tsihin ra: “Javahá tsa cuxiñi yu. Tan tyihi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra. ¹⁰ Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra. ¹¹ Tacan tucu maa ndo tsihin Nyoo. Quiví ndíhi javahá ndo tandíhi tsa cahan ra tsihin ndo, taahán tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyaaheyú

¹¹ Cuahán ra Jesús ityi ñuu Jerusalén tan yahá ra nu cuví xahñu Samaria tsihin Galilea. ¹² Tan nu tsaa ra iñi ñuu, quita utsi taahan ra cuuhví tsihin cuehe tyaaheyú. Tan tsicuiñi ra naha ndasava. ¹³ Tan caná tsaa ra naha tan catyí ra naha:

—Yoho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityi cuahán ra naha tan nduvahá ra naha.

¹⁵ Tacan tan tsa nyehe iñi ra ican tyin tsa nduvahá ra, vatsí tsihin tsata nyico ra nu nyíi ra Jesús. Tan quitsaha caná tsaa ra, jacaahnú ra tsi Nyoo. ¹⁶ Tan tsa tsaa ra nu nyíi ra Jesús, tsicuiñi tsiti ra, tan nacañí nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihyá, ra Samaria cuví ra.

¹⁷ Tacan tan catyí ra Jesús:

—¿A ñiavín utsi taahan ndo nduvahá? ¿Náa inga iñi taahan ca ra naha? ¹⁸ ¿A intuhun ñi maa ra inga ñuu ihyá vatsí, vatsí jacaahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihyá

(Mt. 24.23-28, 36-41)

²⁰ Tsicá tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihyá nu ñuhu ñayivi. ²¹ Ña cua cuvi catyi nyíi: “Juvín ra nyíi ihyá, juvin ra nyíi ityi ican.” Tyin Nyoo tsa tsaa ra mahñu ndo, tan ndacá ñaha ra tsi nyíi yihí cuenda ra —catyí ra tsihin ra naha.

²² Yaha yacan tan catyí ra tsihin ra tsicá tsihin ra:

—Cua tsaa quivi tsa cua cuñi ndo nyehe ndo tsi yuhu Rayii quee nda gloria. Maa tyin ña cua nyehe ndo tsi yu. ²³ Yihí ñi cua catyi ñi tsihin ndo: “Ihyá nyíi ra.” Inga ñi cua catyi ñi: “Ndacan nyíi ra.” Maa tyin coto cuhun ndo cunyehe ndo. Tan ña cunyicun ndo tsi ra can tyin ñavin yu cuvi can. ²⁴ Tyin tandíhi nyíi cua nyehe tsi yuhu, Rayii tsa quee nda gloria, quivi cua quitsi nyico yu inga tsaha. Tumaa tsa nyehé tandíhi nyíi nu cañi tatsa savi tan quituvi ñuhu tatsa can niñi canduvi andivi, tacan cua cuvi quivi cua quitsi yu inga tsaha. ²⁵ Maa tyin cua nyehe jihna yu tundoho cahnu xaan. Tyin nyíi tsa iyó vityin, ndasi cua cuñi ñi nyehe ñi tsi yu. ²⁶ Tumaa quivi tsa tsicoo ra Noé, tacan cua cuvi quivi cua quitsi nyico yuhu Rayii quee nda gloria.

²⁷ Quíví tsicoog ra Noé, tsatsí nyivi. Tsihí ñi. Tindahá ñi. Tan tsahá ñi sehe siihí ñi tindaha, nda cuanda quíví quihví ra Noé tsitsi yutun ndoo tan cuún savi xaan. Tan tandihí ñi can tsihí ñi jahá ndutya. ²⁸ Tacan tucu cuví quíví tsicoog ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi. ²⁹ Tan quíví tsa quita ra Lot ñuu Sodoma ican, cuún ñuhu tsihin azufre tsa quee nda andívi. Tan tsahí ñuhu can tandihí nyivi Sodoma. ³⁰ Tacan cua cuví quíví quitsi nyico yu tsa cuví yu Rayí quee nda gloria.

³¹ Tatum nyecú ndo nuquehe quíví quitsi yu, ña quihví ndo tsitsi vehe tan tava ndo ndaha tyiñu ndo. Tan tatum yucú ndo tsitsi cuhu, ña cunuha ca ndo yuvehe ndo.

³² Nducuuhun iñi ndo tsa tahan ñasiíhi ra Lot.

³³ Tandihí nyoooho tsa cuñí tsa iyó nu ñuhu ñayivi ihyá, cua cunaa ndo. Tan tandihí nyoooho tsa ña tyaá yahvi tsa iyó nu ñuhu ñayivi ihyá, cua cacu ndo.

³⁴ Tan catyí yu tsihin ndo tyin tsacuua can, uvi taahan nyivi cua cava iín nu tsito. Iin ñi cua naquihin yu. Tan inga ñi cua ndoo ñi. ³⁵ Tan uvi taahan ñiñaha, iin caa ñi cua nyico ñi quíví can. Intuhun ña cua naquihin yu. Tan inga ña cua ndoo ña. ³⁶ Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷ Tsa tsíñi ra naha tsa cahan ra Jesús tacan, tsica tuhun ra naha tsi ra:

—¿Numaa tahan cua cuví yacan, Jutu Mañi yu? —catyí ra naha.

Tacan tan nacahan ra Jesús, tan catyí ra:

—Nu canyií ndiyí, ican cua nataca ndit-sii.

18

Nu jacuahq ra Jesús tyin tumaa tsa cahan yuhu iin ñaha tsihí yii tsihin juez, tacan taahán tsi ndacan yo tsi Nyoo

¹ Tsahá cuenda ra Jesús iin cuhva ihyá. Tyin iin nyita ñi cuñí tsi tsa ndacan tahví ra naha tan ña cundihi iñi ra naha. ² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra. ³ Tan juvin ñuu ican iyó iin ñaha ndaahvi tsa tsihí yii. Tan tsahán ña tsicahán ña tsihin ra can, tyin tsicán ña cuatyí tsaha iin nu xaan

iñi tsi ña. ⁴ Tan juez ican ña tyaá yahvi nu tsa caahán ña. Ña jandaq maa nu tyiñu tsicán ña. Tan tsanaha xaan tsicán ña. Tacan tan quitsahá tsicá iñi nu juez can: “Vasu ndi maa ña tsinú iñi yu tsi Nyoo, tan nduve ñá cuenda yu tsi nyivi, ⁵ maa tyin ñaha ihyá tsahá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. ⁷ Tan vihi ca cuví Nyoo tsihin yo, ja ña cua jatyinyee ra tsi nyivi tsa nacatsi ra tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸ Catyí yu tsihin ndo, tyin numi ca cua jatyinyee ra tsi ñi. Maa tyin quíví tsa cua quitsi nyico yu tsa cuví yu Rayí tsa quee nda gloria, tsitó Nyoo tun nañihi ca yu tsi nyivi tsa tsinú tsá cuui iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsahá cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahví ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹ Tan ra fariseo ican nduvitá nyityi ra, tan quitsahá caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihi ra naha iyó ñasiíhi ra tan iyó inga ñaha ra naha. Tan ña cuví yu tumaa ra tavá xuhun ihyá.

¹² Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin centiu tsa jahá canaa yu tsi un”, catyí ra can. ¹³ Tan ra tsa tavá xuhun can tsa cañi luxu nyaá ra. Tan ña cañi iñi ra nanyehe ndaa ra. Tan cañi ndaha ra yiquí nyica ra tyin ndu uví iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí *yu tsihin ndo tyin Nyoo jahá ra tucahnu iñi tsi ra tavá xuhun ican*. Janaa Nyoo cuatyí *ra tan cuanuhú ra nda yuvehe ra*. Maa *tyin ra fariseo ican*, nduve *tucahnu iñi tsicoo tsi ra*, *tyin nyivi tsa cahnu xaan jahá ñi tsi ñi*, *ña cahnu cuví ñi jahá Nyoo*, *tan nyivi tsa ndaahvi jahá tsi*, *cua jacahnu Nyoo tsi ñi* —catyí *ra Jesús*.

Nu nasocó ra Jesús tsi tsa nyihi
(Mt. 19.13-15; Mr. 10.13-16)

¹⁵ Tacan tan quitsi ndaca nyivi tsa nyihi tsi *ra Jesús tyin tyiso ndaha ra jiñi tsi naha tsi*. Maa *tyin cuhva tsa nanyehé ra tsicá tsihin ra tyin cuaha tsa nyihi tsaa nu nyaá ra*, *cuxaan ra naha tan ña tsahá ra naha cuhun tsa nyihi can*. ¹⁶ Tacan tan caná *ra Jesús tsi ra naha*, *tan catyí ra tsihin ra naha*:

—Jaña *ndo na quitsi maa tsi naha tsi nu nyaá yu*. *Tan ña casí ndo*. *Tyin nyivi tsa ndacá ñaha Nyoo*, *cuví ñi tumaa tsa nyihi ihya*. ¹⁷ *Tan catyí yu tsihin ndo tyin tatuñ ña nyitá iñi ndo tsi Nyoo*, *tumaa nyitá iñi in tsa luhlu ihya tsi jutu tsi*, *ña cua cuvi quihví ndo nu ndacá ñaha Nyoo*.

Nu tsaha ra Jesús cuhva tyin yií xaan nacuhva cuenda iñi ra cuca tsi ra tsi Nyoo
(Mt. 19.16-30; Mr. 10.17-31)

¹⁸ Tacan tan iñi *ra tsa cuví ityi nuu cuenda vehe ñihu tsicá tuhun ra tsi ra Jesús*, *tan catyí ra*:

—Maestro, *ra vaha cuví un*. *¿Nacaa cua javaha yu tan coo yu ñayivi tsa ña cua naa maa?* —catyí *ra*:

¹⁹ Tacan tan catyí *ra Jesús tsihin ra*:

—¿*Nacuenda catyí un tyin ra vaha cuví yu?* *Tan intuhun ñi maa Nyoo cuví ra vaha*.

²⁰ *Yooho tsító un tandíhi tuhun tsa tsaha Nyoo tyin javaha yo*: “*Tsa ña coo inga ñaha tsi un*. *Ña cahñi un nyivi*. *Ña suhu un*. *Ña cahan un cuendu siquí nyivi*. *Tan tyaa yahvi un tsi jutu un tan sihi un*” —catyí *ra Jesús*.

²¹ Tacan tan *ra ican catyí ra*:

—Tandíhi maa *yacan tan tyaá yahvi yu nda tahán luhlu yu tan nda cuanda vityin* —catyí *ra*.

²² *Tsa tsíñi ra Jesús tsa cahán ra can*, *tacan tan catyí ra tsihin ra*:

—Maa *tyin cumañi javaha un inga tsa taahán tsi javaha yo*. *Xico tandíhi tsa iyó tsi un*. *Tan cuhva un xuhun can tsi nyivi*

ndaahvi. *Tan quitsi nyicun un tsi yu*. *Tacan tan coo tsa cuca tsi un nda gloria* —catyí *ra*.

²³ *Maa tyin tsa tsíñi ra tsa cahán ra Jesús*, *nducuiihya xaan cuñí ra*, *tyin cuca xaan ra*.

²⁴ *Tan tsa nyehé ra Jesús tyin nducuiihya cuñí ra*, *tan catyí ra*:

—Yíi *xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi*. ²⁵ *Yatyi xaan ca cuvi yaha iñi camellu xuu iñi yiquí tucu*, *tan ñavin ca tsa quihví iñi nyivi cuca nu ndacá ñaha Nyoo* —catyí *ra*.

²⁶ *Tan nyivi tsa tsíñi tsa cahán ra catyí ñi*:

—Tatum tacan, *¿yóo cua cuvi cacu?* —catyí *ñi*.

²⁷ Tacan tan *ra Jesús catyí ra*:

—Tandihi tsa ña cuví *javahá nyivi*, *Nyoo cuví javahá ra tandíhi* —catyí *ra*.

²⁸ Tacan tan *ra Pedro catyí ra*:

—Jutu Mañi yu, *nyuhu tandíhi maa tsa iyó tsi ndi nacoq ndi*, *tan nyicún ndi tsi un* —catyí *ra*.

²⁹ Tacan tan *catyí ra Jesús tsihin ra*:

—Tsa nditsa *catyí yu tsihin ndo*, *tyin tandíhi nyooho tsa nacoq vehe*, *a ñasíhi ndo*, *a yañi ndo*, *a jutu ndo*, *a sehe ndo tsacatyí tsa tsahá ndo tsa cundaca ñaha Nyoo tsi ndo*, ³⁰ *cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo*, *cua ñihi ndo ñayivi tsa ña cua naa maa* —catyí *ra Jesús*.

Inga tsaha jacto ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

³¹ *Tan caná siñi ra Jesús tsi tsa utsi uvi taahan ra tsicá tsihin ra*, *tan catyí ra tsihin ra naha*:

—Vityin cuhun *yo nda ñuu Jerusalén*. *Tyin ndacan cua cundaa tyiñu Rayii tsa quee nda gloria*: *tandihi tyiñu tsa tyaa ra cuví ndusu yuhu Nyoo tahán tsanaha*.

³² *Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu*, *ra tsa ñavin ra ñuu Israel cuví*. *Tan cua vacu nducu ra naha tsi yu*. *Tan cua cahan nyaa ra naha tsi yu*. *Tan cua tiví siñi ra naha nuu yu*. ³³ *Tan cua cañi ra naha tsi yu*, *tan cua cahñi ra naha tsi yu*, *maa tyin tsa tsinu uñi quiví tan cua nandoto yu inga tsaha* —catyí *ra Jesús*.

³⁴ *Maa tyin ña cutuñi iñi ra tsicá tsihin ra tsa cahán ra*, *tan ndi ña tsitó ra naha náa*

tuhun cahān ra tsihin ra naha. Tyin ña cuví cutuñi iñi ra naha.

Nu janduvahq̄ ra Jesús iin ra cuaa ñuu Jericó

(Mt. 20.29-34; Mr. 10.46-52)

³⁵Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra.

³⁶Tacan tan tsíñi ra cuvaa tsa yahá cuaha nyíví. Tan tsíca tuhun ra náa cuenda ñíhi xaan cuvaa.

³⁷Tan catyí tuhun nyíví tsihin ra tyin ra Jesús, ra ñuu Nazaret, vatsí.

³⁸Tacan tan quitsahá caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

³⁹Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca cana tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

⁴⁰Tacan tan tsicuiñi ra Jesús. Tan tava tyiñu ra na cuhun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

⁴¹—¿Náa cuñi un javaha yu tsihin un?

Tacan tan ra cuaa ican nacahan̄ ra, tan catyí ra:

—Jutu Mañi yu, cuñi yu nanyehe yu —catyí ra.

⁴²Tacan tan catyí ra Jesús tsihin ra:

—Nanyehe. Tsa nduvahq̄ tinuu un tyin tsinú iñi un tsi yu —catyí ra.

⁴³Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihi nyivi tsa nyehé tsa cuví can, jacahnú ndíhi tucu maa ñi tsi Nyoo.

19

Nu cuahán ra Jesús vehe ra Zaqueo

¹Tacan tan quíhví ra Jesús ñuu Jericó. Tan cua yaha ra tsitsi ñuu.

²Tan ñuu can iyó iin ra cuca xaan, nañí ra Zaqueo. Tan cuví ra ityi nuu tsihin ra tavá xuhun cuenda

ra ndacá ñaha nda ñuu Roma.

³Ra ihya cuñi xaan ra nacoto ra tsi ra Jesús. Tan ña cuví nyehé ra tsi ra tyin cuaha xaan nyíví cuahan tsihin ra.

⁴Tacan tan tsinú xaan ra cuahán ra ityi nuu, tan ndaq̄ ra iin nu yutun cahnu tsa

nañí sicómoro tsa nyaá yuhu ityi nu cua yaha ra Jesús, tan cuví nyehé ra tsi ra Jesús.

⁵Tan cuhva tsa quita ra Jesús nu nyáá yutun

can, nanyehe ndaa ra ityi siquí tan nyehé ra tsi ra Zaqueo. Tan catyí ra tsihin ra:

—Zaqueo, janumi ñuu un nu yutun juvin. Tyin vityin cuñi tsi tsa cuhun yu yuvehe un —catyí ra tsihin ra.

⁶Tacan tan numi xaan nuu ra Zaqueo. Tan siī xaan cuñi ra. Tan quíhín ra tsi ra Jesús cuahán tsihin ra yuvehe ra.

⁷Tan tsa nyehé nyíví tsa tacan cuví, tandihi ñi quitsahá caahán nyaá ñi tsi ra Jesús. Tan catyí ñi tyin ndoó ra vehe iin ra iyó cuatyí.

⁸Tan nu nyecú ra naha tsitsi vehe, ra Zaqueo tsinyaq̄ nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyíví ndaahvi. Tan tatum jandaví ñaha yu tsi nyíví tan suhú yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹Tacan tan catyí ra Jesús:

—Vityin cacu un, tan nyíví ra Abraham cuví tsi un. [Tyin nacuhvá cuenda un tsi un tsi Nyoo tumaa nacuhvá cuenda ra Abraham tsi ra tsi Nyoo.] ¹⁰Tyin yuhu, Rayií tsa quee nda gloria, vatsí yu vatsí nanducu yu tan vatsí jacacu yu tsi nyíví tsa cuanaa maa —catyí ra Jesús.

Nu jacuahq̄ ra Jesús tsi yo na jaha tyiñu yo tsihin tsa tsahq̄ Nyoo tsi yo

(Mt. 25.14-30)

¹¹Tan tsitsi tsa tsíñi nyíví tsa caahán ra Jesús, tan quitsahá tsahá cuenda ra inga cuhva ihya tsi ñi. Tyin tsa cuñi tsaa ra ñuu Jerusalén. Tan nyíví cuñi maa ñi tyin tsa qua quitsahá cundaca ñaha ra ndacan.

¹²Tacan tan catyí ra:

—Tsicoq̄ iin ra cuca tan tsa cuñi cuhun ra iin ñuu cañi. Tyin ndacan cua quihin cuenda ra tysiñu tsa cuví ra rey, tyin tacan tan cua quitsi nuhu nyico ra ñuu ra.

¹³Tsa ndi cumañi ca cuhun ra, cana ra utsi taahan musu ra. Tan tsahá cuenda ra iin xuhun tsi iin iin ra naha. Tan catyí ra tsihin ra naha:

“Jaha tysiñu ndo tsihin xuhun ihya nda cuanda quitsi nyico yu”, catyí ra.

¹⁴Maa tyin nyíví ñuu ra, ndasi cuñi ñi nyehé ñi tsi ra tan ña cuñi ñi tsa cundaca ñaha ra tsi ñi.

Tan jacuhün ñi tsi ra cuhun cunyicun tsi ra, tyin cahan ra naha tyin ña cuñi ñi tsa

cundaca ñaha ra tsi ñi.

¹⁵Maa tyin ra ican cuví maa ra rey. Tacan tan tsaa ra, cana ra tsi musu ra, ra tsa nacoq̄ ra xuhun tsihin.

Tyin cuñí ra coto ra nácaa xuhun jahá canaa xuhun ra tsa nacoq ra.¹⁶ Tan tsaa iin ra ican. Tan catyí ra: "Yooho taa, jahá canaa yu utsi taahan ca siquí xuhun tsa nacoq un tsi yu", catyí ra.¹⁷ Tacan tan catyí ra rey can tsihin ra: "Vaha xaan. Yooho cuví musu vaha. Tyin javahá un ndihi tyiñu tsa tava yu tsi un. Tan vityin cua cundaca ñaha un utsi taahan ñuu", catyí ra rey can tsihin ra.¹⁸ Tacan tan tsaa tucu inga ra tsa tsahá ra xuhun. Tan catyí ra: "Juhun xuhun ihyá. Jahá canaa yu uhun taahan ca siquí xuhun tsa nacoq un tsi yu", catyí ra.¹⁹ Tacan tan catyí ra rey tsihin ra: "Yooho cua cundaca ñaha un uhun taahan ñuu", catyí ra.²⁰ Tacan tan tsaa tucu inga ra can. Tan catyí ra: "Juhun xuhun tsa tsahá un tsi yu. Yuhu naquihin vaha yu itsi tsitsi pañitu. ²¹ Tyin yuuhví xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsí un. Tan naquihín un ndaha tyiñu quita nu jahá tyiñu inga nyívi", catyí ra can. ²² Tacan tan ra rey ican catyí ra tsihin ra: "Yooho musu ña vaha cuví un. Vityin juvin ñi tsihin tsa cahan un tsi yu, cua cahan yu tsi un. Tatum tsító un tyin yuhu xaan yu, tan tsító un tyin naquihín yu tsa ña tatsí yu, tan naquihín yu ndaha tyiñu inga nyívi,²³ ¿nacuví tyin ña tsityihí un xuhun yu banco tyin tsaa yu maa tyin tsa nandaa xuhun yu?" catyí ra rey can. ²⁴ Tacan tan catyí ra tsihin ra nyecú ican: "Quinyaa ndo xuhun tsa tsahá yu tsi ra ihyá, tan cuhva ndo tsi ra tsa jahá canaa utsi taahan ca siquí tsa tsahá yu tsi ra", catyí ra. ²⁵ Tacan tan catyí ra naha tsihin ra rey can: "Maa tyin ra ican, tsa iyó utsi taahan tsi ra", catyí ra naha. ²⁶ Tacan tan ra rey ican catyí ra: "Maa tyin catyí yu tsihin ndo tyin ra tsa vaha ca jahá tyiñu tsihin tsa tsahá yu tsi ra, cuaha ca cua cuhva yu tsi ra. Tan ra tsa tsahá yu luxu ñi, tan ña cuñí ra jahá tyiñu ra tsihin tsi, cua quinyaa yu tandíhi can tsi ra.²⁷ Tan tandíhi nyívi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihyá", catyí ra rey can —catyí ra Jesús.

*Nu tsaa ra Jesús ñuu Jerusalén
(Mt. 21.1-11; Mr. 11.1-11; Jn. 12.12-19)*

²⁸ Tsa yahá cahan ra Jesús yacan, tan jañihí ra cuahán ra ñuu Jerusalén. ²⁹ Tacan tan tsa cuñí tsaa ra ñuu Betfagé tsihin ñuu

Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra.³⁰ Tan catyí ra tsihin ra naha:

—Cuaahan ndo ñuu tsa canyií yatyin ñi ihyá. Ican cua nañihí ndo iin burru luhlu, quiti tsa ñaha ca quihi tyayu. Nuuhní ti. Ndatsí ndo tsi ti. Tan quitsi ndaca ndo tsi ti tsi yu.³¹ Tatum yóo tsicá tuhun tsi ndo: "¿Nacuenda ndatsí ndo tsi ti?" catyí ndo tsihin ñi: "Ndatsí ndi tsi ti tyin tsiñí ñuhu tsi tsi ra ndacá ñaha."

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahan maa ra tsihin ra naha.³³ Tan cuhva tsa ndatsí ra naha tsi ti, tsaa tsitohó ti. Tan nducu tuhun ra can naha ra tsi ra naha tan catyí ra:

—¿Nacuenda ndatsí ndo burru ihyá?
—catyí ra naha.³⁴ Tacan tan nacahan ra can naha ra:

—Ndatsí ndi tsi ti tyin tsiñí ñuhu tsi tsi ra ndacá ñaha —catyí ra naha.

³⁵ Tacan tan quihin ra naha tsi ti. Tan tsindaca ra naha tsi ti nu nyíra Jesús. Tan tyiso ra naha jahma ra naha tsata ti. Tacan tan jandaq ra naha tsi ra Jesús tsata ti.³⁶ Tacan tan cuahán ra Jesús. Tan cuaha xaan nyívi cuahán tsihin ra tsaquín ñi jahma ñi nu ñuhu ityí nu cua yaha ra, yosó ra burru ican.

³⁷ Tsa tsa cua cuyatín tandíhi nyívi tan ra Jesús nu iñi nuu yucu Olivo, quitsahá caná tsaa tandíhi ñi tsinú iñi tsi ra tsihin tsa sií cuñí ñi. Tan jacahnú ñi tsi Nyoo tyin cuaha xaan tsa iyo javahá ra nyehe ñi.³⁸ Tan catyí ñi:

—¡Na jacahnú yo tsi ra Rey ihyá tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnú yo tsi Nyoo!
—catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyívi ihyá
—catyí ra naha.

⁴⁰ Tan nacahan ra Jesús tan catyí ra:

—Tatum nyívi ihyá tan cutaxin ñi, yuu cua cana tsaa, tan cua jacahnú tsi tsi yu
—catyí ra Jesús.

⁴¹ Tacan tan tsa tsaa ra Jesús yatyin ñi yuhu ñuu Jerusalén, nanyehé ra ñuu can tan quitsahá tsacú ra tsa cuihiya cuñí ra.

⁴² Tan catyí ra:

—Vaha xaan tun tsatyin cuvi coto ndo tan cutuñi iñi ndo nácaa ñihí ndo tsa taxin coo añima ndo vityin ihya. Maa tyin xeehe xaan yiñí tsa vaha can, tan ña cuví nañihí ndo can.⁴³ Coo quívi cua nyehé ndo tun-doho jaha nu xaan iñi tsi ndo cua tyihí cutu nahnu tsi ndo. Tandihi ityí cua quitsi nahnu. Tan cañí tahan nahnu tsihin ndo.⁴⁴ Tan cua caquín nahnu tsi ndo nu ñuhu tan cua cahñí nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

Nu tava ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

⁴⁵ Tacan tan quívì ra Jesús tsitsi cora vehe ñuhu cahnu. Tan quitsahá tavá ra tandihi nyiví xicó tan nyiví jatá tsa yucú nu quehe.⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyoo ho jananduvi ndo itsi vehe ñasuhu —catyí ra Jesús.

⁴⁷ Tan tandihi quívi tsaaahnára Jesús tsjacuahára tsi nyiví tsitsi vehe ñuhu cahnu can. Maa tyin ra jutu tsa cuví ityí nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducúra naha cuhva cahñíra naha tsi ra.⁴⁸ Maa tyin ña ñihí maa ra naha nácaa javaha ra naha tyin tandihi nyiví tan vaha tyá soho ñi tsa caahánra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahánra tsihin nyiví

(Mt. 21.23-27; Mr. 11.27-33)

¹ Iin quívi jacuahára Jesús tsi nyiví tsitsi vehe ñuhu cahnu, tan caahánra nácaa jacacú Nyoo tsi ñi. Tan tsaa ra jutu tsa cuví ityí nuu naha ra tsihinra maestro cuenda ley vehe ñuhu naha ra, tan tsihin tucu ra cuví mandoñi naha ra.² Tan catyíra naha tsihinra Jesús:

—Catyí tuhun tsihin ndi ¿yóo tava tyiñu tsi un javaha un tyiñu ihya? —catyíra naha.

³ Tacan tan ra Jesús catyíra tsihinra naha:

—Yuhu cuñí tucu yu nducu tuhun yu tsi ndo.⁴ ¿Yóo jaquitsi tsi ra Juan tyin jacoondutya ra tsi nyiví? ¿A Nyoo jaquitsi tsi ra, a nyiví?

⁵ Tacan tan ra ican naha ra quitsaha caahán yuhu tahan ra naha tan catyíra naha:

—Tun catyí yo tyin Nyoo jaquitsi tsi ra Juan, cua catyi ra tsihin yo nacuenda ña tsinu iñi yo tsa cahánra Juan.⁶ Tun catyí tuco yo tyin nyiví jaquitsi tsi ra, tandihi nyiví cua cahñí ñi tsi yo tsihin yuu. Tyin tandihi ñi, tan cuñí ñi tyin ndusu yuhu Nyoo cuvi ra Juan —catyíra naha.

⁷ Tacan tan nacahánra naha tsihinra Jesús tyin ña tsítóra naha yóo tava tyiñu tsi ra Juan jacoondutya ra tsi nyiví.⁸ Tacan tan ra Jesús catyíra tsihinra naha:

—Ndi yuhu, tan ña cua catyi tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuaha ra Jesús tyin tumaa cuví juhva ra caquín nahra, tacan cuvíra tsa cua cahñí tsi ra

(Mt. 21.33-44; Mr. 12.1-11)

⁹ Tacan tan tsahá cuenda ra Jesús iin cuhva ihya tsi nyiví:

—In ra, tatsí cuaha ra nu ñuhu ra yoho tsití yucu tsa cua cuvi vinu. Yahá can tan tsahá nuu ra ñuhu can tsi juhva ra jahá tyiñu. Tacan tan naha cuahánra inga ñuu.¹⁰ Tan quívi tsa iñí tsití nu yoho can, tacan tan jacuhun ra iin musu tyin naquihinra juhva tsití tsa taahánra tsi maa ra. Maa tyin cañíxaanra jahá tyiñu ican naha ra tsi musu can. Tan nundíi ra jacunuhyu ra naha tsi ra.¹¹ Tacan tan tsitoho yoho can jacuhunra inga musu. Juvin ñi cañíxaanra can naha ra tsi ra. Tan cahán nyaa ra naha tsi ra. Tan jacunuhyu ra naha tsi ra. Tan juvin ñi nduve tsa tsahára naha cuiso ra cunuhu ra.¹² Tacan tan ra cuví tsitoho yoho can jacuhun nyico ra inga ra. Maa tyin juvin ñi tacan javaha nyico ra naha tsihinra can. Tan jañicueehe ra naha tsi ra. Tan tava ra naha tsi ra.

¹³ ¹⁴ Yahá can tan catyítsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñíxaan yu. Vasíqui cua tyaa yahvi ra naha tsi ra, tyin sehe yu cuví tsi ra”, catyíra.¹⁴ Maa tyin tsa nyehéra jahá tyiñu can naha ra tsi ra sehe ra, natuhún tahanra naha: “Juvin ra

ihya cua ndoo tsihin ñuhu ihya tatum cùu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha.¹⁵ Tacan tan tavá ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyíví nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi¹⁶ ra naha sehe ra? ¹⁶Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyíví tsa caahán ra, nayuhví xaan ñi cuví. Tan catyí ñi:

—¡Ña cuñi Nyoo tahan yo tacan! —catyí ñi.

¹⁷Maa tyin ra Jesús nanyehe re nuu ñi tan catyí ra:

—Tun tacan tsicá iñi ndo ¿náa cuñi tsi catyi tsa nyaá nu tutu Nyoo? Tyin catyí tsi tyehen:

Yuu tsa ña cuñi¹⁸ ra javahá vehe cuatyiñu ra, yacan cuví yuu tsa tsiñi ñuhu ca.

¹⁸Yóo nyíví cua canacava tsata yuu can, cua tahnu cuatyí ñi. Tan tatum maa yuu can canacava tsata ñi cua taxin nyihi ñi —catyí ra Jesús.

¹⁹Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuvi iñi ra naha tyin tsa cahan ra Jesús tacan, tsi maa ra naha nañi can. Tan cuñi¹⁹ ra naha tiñi ra naha tsi ra tyin cahñi ra naha tsi ra. Maa tyin ña tsító maa ra naha nácaa javaha ra naha, tyin nayuhví ra naha tsi nyíví.

Nu jacuahá ra Jesús tsa cuenda tsa tyahví nyíví xuhun tsi ra ndacá ñaha ñuu Roma (Mt. 22.15-22; Mr. 12.13-17)

²⁰Tacan tan jacuhún ra naha tsi juhva ra nducu cuhva tsi ra Jesús. Tan jahá ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví tiñi ra naha tsi ra. Tan cuhva cuenda ra naha tsi ra tsi ra ndacá ñaha.

²¹Yacan tsicá tuhun ra naha tsi ra Jesús:

—Maestro, tsító ndi tyin vaha tsa caahán un. Tan jacuahá un tsa vaha tsi nyíví. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un.

²²Catyí tsihin ndi ¿a vaha tsa tyahvi yo tsa

tsicán ra ndacá ñaha nda ñuu Roma tsi yo, a ña vaha? —catyí ra naha.

²³Tan ra Jesús tuví iñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñí ndo nducu cuhva ndo tsi yu?²⁴Janaha jihna ndo iin xuhun tsi yu, na nyehé yu. ¿Yóo nuu nyaá xuhun can tan yóo sivi nyaá can? —catyí ra.

Tacan tan nacahan ra naha:

—Nuu ra ndacá ñaha, ra cuví rey cahnu, nyaá can tan juvin ñi sivi ra nyaá can —catyí ra naha.

²⁵Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyíví. Tan iyo xaan cuñi²⁷ ra naha tsa nacahan ra. Tan taxin ña cuví ra naha.

Nu cuñi²⁸ ra cuví saduceo naha ra jandavi ñaha ra naha tsi ra Jesús

(Mt. 22.23-33; Mr. 12.18-27)

²⁷Tsa yahá can tan tsaa juhva ra cuví saduceo nu nyíví ra Jesús. Maa ra naha cuví ra tsa catyí tyin ña nandoto nyíví tun tsa tsihí ñi.

²⁸Tacan tan catyí ra naha tsihin ra Jesús:

—Maestro, jandoo²⁹ ra Moisés tyiñu ihya tyin tatum iin ra tsihí³⁰ tan nandoq ñasihi³¹ ra, tatum nduve sehe ra tsicog tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.³²Maa tyin cuñi³³ ndi coto ndi nácaa, tyin tsicog³⁴ iin ra tan tsicog utsa sehe ra. Tan ra tsa ñihi ca tsicog ñasihi³⁵ ra, maa tyin nduve sehe ñi tsicog, tan tsihí ra.³⁶Tacan tan naquihín³⁷ ra tsa tsinu uví tsi ña can. Tan nduve tucu sehe ñi tsicog. Tan tsihí tucu ra can.³⁸Tan juvin ñi tacan javahá ra tsinu uñi. Tandihí tsa utsa ra naha javahá tacan. Ndi intuhun ra tan ña tsicog³⁹ sehe ra tsihin ña.³²Tan nu ndihí tuhun tsihí⁴⁰ ndihí maa ña.³³Tan cuñi⁴¹ ndi coto ndi yóo ra cua cuvi yí⁴² ña tsitsi tsa tandihí tsa utsa taahan ra naha quivi cua nandoto nyíví —catyí ra saduceo naha ra.

³⁴Tacan tan nacahan ra Jesús, tan catyí ra:

—Ihya nu ñuhu ñayíví, rayí⁴³ tan ñaha tindahá ñi.³⁵Maa tyin nyíví tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.³⁶Tan nduve

tuhun tsihí iyó ndacan tyin cua cuvi íi tumaa ángel. Tan cua cuvi íi sehe Nyoo tyin nandoto ñi. ³⁷ Tan tsa cuenda tuhun tsa nandotó ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca íñu can. Tsihin can jacoto ra tsi yo tyin nyíví tsihí cua nandoto ñi. Tyin catyí ra: "Jutu yo Nyoo cuenda ra Abraham, tan cuenda ra Isaac, tan cuenda ra Jacob", catyí ra Moisés. ³⁸ Tacan catyí ra tyin Nyoo, ñavin Nyoo cuenda nyíví tsihí cuví ra. Nyoo cuenda nyivi nyito cuví ra. Tyin tsa cuenda Nyoo tandihí yo tan nyito añima yo vasu tsa tsihí cuñu ñuhu yo —catyí ra Jesús.

³⁹ Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

⁴⁰ Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tacan tan tsicá tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra? ⁴²⁻⁴³ Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunyaa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahmu”, catyí Nyoo tsa tsatyiñu ra yuhu ra David taħan tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahān ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyíví tsíñi ñi tsa cahān ra Jesús tsihin ra tsicá tsihin ra nu cahān ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taħahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyíví yucú nuyahvi nacumi tsi ra naha tsihin tsa jaha ñi tsa ñayíví tsi ra naha. Tan nanducú

ra naha tyayu vaha cunyecu ra naha tsitsi vehe ñuhu, tan nu cuahán ra naha vico.

⁴⁷ Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyíví tan catyi íi tyin vaha xaan nyíví cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsihí yií tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

*Tsa jamañi iin ñaha ndaahvi tsa tsihí yií
(Mr. 12.41-44)*

¹Tan nyehe ra Jesús tyin cuaha xaan nyíví cuca tyihí ñi xuhun tsitsi caja tsa nyíi tsitsi vehe ñuhu cahnu. ²Tan nyehe tucu ra tsi iin ñaha ndaahvi tsa tsihí yií. Tan tyihí ña uvi taahan ñi xuhun nyihi. ³Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihyá tan ñavin ca tandihí ñi cuca can. ⁴Tyin tsa ndoo ña tyihí ñi. Tan ñaha ihyá tyihí ña tandihí tsa iyó tsi ña —catyí ra.

Nu cahān ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

⁵Tacan tan juhva nyíví natuhún ñi tuhun cuenda vehe ñuhu cahnu ican. Tan catyí ñi tyin siíi xaan caá yuu. Tan siíi xaan caá tsa jamañi nyíví. Tacan tan catyí ra Jesús:

⁶ —Coo quivi tan cua tani tandihí tsa nyehé ndo ihyá. Tan ndi intuhun ca yuu tan ña cua coso ca siqui inga tsi. Ndihí tsi cua caní nu xaan iñi tsi ndo.

Tsa cua cuvi tsa ndi cumañi ca naa ñuhu ñayíví

(Mt. 24.3-28; Mr. 13.3-23)

⁷Tacan tan nducú tuhun nyíví tsi ra Jesús, tan catyí ñi:

—Maestro, ¿jama cua cuvi tandihí tsa caahán un ihyá? ¿Nacaa tan coto ndi tatum tsa cuyatyiñu tsa naa ñuhu ñayíví? —catyí ñi.

⁸Tacan tan catyí ra Jesús:

—Jaha vaha ndo cuenda, coto jandavi ñaha nyíví tsi ndo. Tyin cuaha xaan ra cua quitsi, tan cua cuatyíñu ra naha siví yu, tan cua catyi ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayíví”, cua catyi ra. Maa tyin ña cunyicun ndo tsi ra naha. ⁹Tan quivi cua

ñihí tuhun ndo tyin tsa iyó cuatyí tan ñihí cañí tahan nyíví, ñá nayuhvi ndo. Tyin tandíhi can taahán tsi cuvi tsajihna ñí. Maa tyin cumañí ca tsaa quíví tsa cua naa ñuhu ñayíví.

¹⁰Tan catyí tucu ra:

—Nyíví iyó iin ñuu cua cañí tahan ñí tsihin nyíví inga ñuu. Tan cua coo cuatyí.
¹¹Tan ñihí xaan cua taan, Tan cua coo tama. Tan cua coo cuehe tandíhi ñí ityi. Tan cua nyehe nyíví tsa yuuhví ityi andíví. Tan cuaña xaan tsa iyo nahnu tsa ñá tuhvá nyíví nyehe tan cua nyehe ñí.
¹²Maa tyin tsa ndi cumañí ca cuvi yacan, cua cuxaan iñí nyíví tsi ndo. Tan cua ndacan ñí cuatyí tsaha ndo. Tyin cua cutuñí ndo tan cua cuhva cuenda ñí tsi ndo tsi ra jutu. Tan cua tyihi ñí tsi ndo tsitsi vehe caa. Tan cua cundaca ñí tsi ndo nuu rey tan nuu ra ndacá ñaha tsacatyí sivi yuhu.
¹³Tacan tan cuví cahan ndo tuhun yu tsihin ñí.
¹⁴Maa tyin jaha ndo cuenda tan ñá cua caca iñí ndo náa tuhun cua nacahan ndo tsihin ra ndacá ñaha icán.
¹⁵Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñí ndo nu cua cahan ndo. Ndi intuhun nu xaan iñí tsi ndo tan ñá cuvi jaha nahnu tsi ndo.
¹⁶Maa tyin nyíví cua cuhva cuenda ñí tsi ndo tsi nu xaan iñí tsi ndo. Nda cuanda jutu ndo tan siñí ndo, ra cuví yañí ndo, nyíví ndo, tan ra vaha iñí tsi ndo cua cuhva cuenda ra nahá tsi ndo tsi nu xaan iñí tsi ndo. Tan yiñí nyoocho cua cahñí nyíví tsi ndo.
¹⁷Tandíhi nyíví tan ndasí cua cuñí ñí nyehe ñí tsi ndo tsacatyí yuhu.
¹⁸Maa tyin ndi intuhun ixi jiñí ndo tan ñá cua cunaa.
¹⁹Tatun ñá ndu uvi iñí ndo tsa nyicun ndo tsi yu, cua cacu ndo.

²⁰'Quíví cua nyehe ndo tyin níi canduvi yuhu ñuu Jerusalén ihyá nyecú andaru, coto ndo tyin tsa cuñí naa ñuu ihyá.
²¹Tan nyíví iyó ñuu tsa cayucú Judea, cua cunu ñí tan cuhun xeehe ñí ityi yucu. Tan nyíví iyó ñuu Jerusalén ihyá, cua quita ñí. Tan nyíví iyó tsitsi cuhu, ñá cua quitsi nuhu ñí ñuu ihyá.
²²Tyin yacan cuví quíví tsa cua tatsi tuñí Nyoo tsi nyíví ñuu ihyá. Tyin tsa cua cuvi tandíhi cuhva catyí nu tutu Nyoo.
²³Tan ndahvi ñíñaha tsa ñuhú sehe quíví can. Tan ndahvi ñí tsa iyó sehe lee tsa ndi tyaxín. Tyin cuaha xaan tun-doho cua nyehe ñí tan tandíhi nyivi. Tyin cahnu xaan tsa uhvi cua nyehe nyíví ñuu Jerusalén ihyá cua jaha Nyoo.
²⁴Andaru cua

cahñí ra naha tsi juhva nyíví tsihin mityí. Tan cua tñí ra naha juhva ñí tan cundaca ra naha tsi ñí ñuu nahnu. Tan nyíví tsa ñavin nyíví Israel cuví, cua cuyucu ñí ñuu Jerusalén ihyá nda cuanda quíví tsa catyí maa Nyoo.

Nacaa cua quitsi Rayii tsa quee nda gloria inga tsaha

(Mt. 24.29-35, 42-44; Mr. 13.24-37)

²⁵Tacan tan cuaha tsa iyo cua nyehe nyíví nu ñicanyii, tan nu yoo, tan nu tiñuu. Tan ihyá nu ñuhu ñayíví cua nayuhvi ñí tsihin tsa iyo cua nacatyín ndutyá ñuhu.
²⁶Tan cua cíu naaha ñí tsihin tsa yuuhví ñí tsa tsicá iñí ñí náa ndihí tsa cua cuvi ihyá nu ñuhu ñayíví. Tyin nda cuanda tsa iyó andíví cua nacanda tan taan.
²⁷Tacan tan cua nyehe ñí tsi yuhu, Rayii tsa quee nda gloria, vatsí nuu yu tsitsi vico tsihin tunyee iñí Nyoo, tan tsihin tsa cahnu cuví ra.
²⁸Tan cuhva tsa cua quitsaha yacan tan jandu iin ndo iñí ndo tan cüsii iñí ndo tyin numi xaan cua cazu ndo —catyí ra.

²⁹Tacan tan tsahqá cuenda ra Jesús iin cuhva ihyá, tan catyí ra:

—Jaha ndo cuenda yutun higuera, tsihin tandíhi ca yutun.
³⁰Tatun tsa nduyutýá numa tun tsa cuyatyín cuun savi.
³¹Tan tacan tucu nyoocho, tatun tsa nyehe ndo tyin tsa quitsahá cuví tandíhi tsa cahan yu tsihin ndo, coto ndo tyin tsa nyanaá quíví tsa cundaca ñaha Nyoo nu ñuhu ñayíví ihyá.

³²Maa tyin tsa nditsa catyí yu tsihin ndo tyin yacan cua cuvi jihna tsa ndi cumañí ca cíu nyíví tsa iyó nu ñuhu ñayíví.
³³Coo quíví cua naa andíví tan ñuhu ñayíví, maa tyin tuhun caahán yu, ñá cua cundihi tsi.

³⁴Tan jaha ndo cuenda tsi ndo coto ndundava iñí ndo tsihin tsa cua javaha ndo tsa caquiñí, a tsa coho ndo nyixi, a tsa caca xaan iñí ndo tundoho ñayíví ihyá. Jaha ndo cuenda coto ndundava iñí ndo tsihin yacan. Tan coto sana iñí ndo tan quita quíví cua quitsi yu tan cua quitsi tundoho cua nyehe ndo.
³⁵Tyin tacan cua cuvi, tandíhi nyíví iyó nu ñuhu ñayíví, sana iñí ñí tan tumaa iin tsa cua nacasi Nyoo nu yucú ñí tan ñá cua cuvi quita ñí.
³⁶Maa tyin nyoocho cuatu ndo. Ndacan tahvi ndo tsi Nyoo tandíhi quíví, na jacacu ra tsi ndo. Tan ñá nyehe ndo tandíhi tundoho tsa cua coo. Ndacan tahvi ndo,

tacan tan cua cuvi tsaa ndo nu nyaá yuhu, Rayii tsa quee nda gloria —catyí ra Jesús.

³⁷ Tan tandíhi quivi jacuahá ra Jesús tsi tandíhi nyivi tsitsi vehe ūnuhu cahnu. Tan tsa tsacuua tsicá ra yuku Olivo. ³⁸ Tan tandíhi nyivi tsaa ñi tsitsi vehe ūnuhu cahnu ndihi tsa tuvi, tyin tyaa soho ñi tsa caahán ra.

22

*Nu cua xico ra Judas Iscariote tsi ra Jesús
Mt. 26.1-5, 14-16; Mr. 14.1-2, 10-11; Jn.
11.45-53)*

¹Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihi. ²Tan ra jutu tsa cuví ityi nuu naha ra tsihin ra maestro cuenda ley vehe ūnuhu naha ra, nducú xaan ra naha cuhva cahni ra naha tsi ra Jesús. Maa tyin yuuhví ra naha tsi nyivi.

³Tacan tan quihvi nu ña vaha tsi nu Judas Iscariote. Tan nu ihyá cuví iin tsa utsi uvi taahan ra tsa nacatsi ra Jesús. ⁴Tan nu ihyá, tsahan nu tsicahán nu tsihin jutu tsa cuví ityi nuu tan tsihin ra yihi ndaha tsi ra jahá cuenda vehe ūnuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵Tan ra ican naha ra sii xaan cuví ra naha. Tan tyihi ra naha cuhva tyin cuhva ra naha xuhun tsi ra Judas. ⁶Tan ra Judas ndoo ra vaha. Tan quitsahá nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

*Nu cuxiñi ra Jesús tsihin ra tsicá tsihin ra
(Mt. 26.17-29; Mr. 14.12-25; Jn. 13.21-30; I
Co. 11.23-26)*

⁷Tan tsaa quivi tsa cuvi vico tsa tsatsí nyivi paan tsa nduve yutsan iya yihi. Tan juvin ñi quivi ican tuhvá ñi tsahní iin mbee luhlu tsa vico pascua can. Tyin catsi ñi tsi ti.

⁸Tan ra Jesús jacuhun ra tsi ra Pedro Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

¹⁰Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyiso iin quiyi ndutyia.

Cuaahan ndo tsata ra tan quihvi ndo vehe nu quihvi ra. ¹¹Tan catyí ndo tsihin tsitoh vehe can: “Ra cuví Maestro, cuñi ra coto ra numaa nyaá cuartu nu cua cuxiñi ra tsihin ra tsicá tsihin ra, tyin jacobnu ra vico pascua.” Tacan catyí ndo tsihin ra. ¹²Tacan tan cua janahá ra iin cuartu cahnu ityi siqui, nu tsin uvi pisu tsi ndo. Tan tsa nduvahá maa tsi. Tan ndacan cua javaha ndo tsa cuxiñi yo —catyí ra tsihin ra naha. ¹³Tacan tan cuahán ra naha. Tan nañihi ra naha tandíhi tumaa tsa cahán ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴Tacan tan tsa tahan tsi cuhva tsa cuxiñi ra Jesús tsihin tandíhi ra tavá tyiñu ra, tsinyecu ra naha yuhu mesa. ¹⁵Tacan tan catyí ra Jesús:

—Cuñi xaan yu cuxiñi yu tsihin ndo cuenda vico pascua ihyá tsa ndi cumañi ca nyehe yu tundoho tan cíu yu. ¹⁶Tan catyí yu tsihin ndo tyin ña cua catsi ca yu inga tsaha tsa cuenda vico ihyá, nda cuanda tahan tsi inga tsaha nda nu ndacá ñaha Nyoo —catyí ra.

¹⁷Tacan tan quihin ra iin vasu vinu. Nacuhvá ra tyahvi nyoo tsi Nyoo. Yahá can tan catyí ra tsihin ra nyecu tsihin ra:

—Quihin ndo tsehe. Tan coho ndo luxu luxu. ¹⁸Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ūnuhu ñayivi ihyá —catyí ra.

¹⁹Yahá can tan quihin ra paan, tan tsaha ra tyahvi nyoo tsi Nyoo, tan tsahnya sava ra can. Tsahan tsaha ra can tsi ra naha. Tan catyí ra tsihin ra naha:

—Paan ihyá cuví tumaa cuñi ūnuhu yu. Tyin cua cuhva cuenda yu tsi yu tan cíu yu tsa cuenda tsa vaha tsi maa ndo. Tacan cuñi tsi nducuhun iñi ndo tsi yu tan cuxiñi ndo tyehen —catyí ra.

²⁰Tan tsa yahá cuxiñi ra naha, tacan tan quihin ra vasu vinu, tan catyí ra:

—Tsihin vinu ihyá ndoo Nyoo tyiñu tsihin ndo vityin. Tyin vinu tsa yihi tsitsi vasu ihyá, tumaa niñi yu cuví tsi. Tan tsa vaha tsi nyoocho tan cua cati niñi yu. Tan cua cíu yu.

²¹*Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihyá. ²²Tyin yuhu, Rayii tsa quee nda gloria, cua tahan yu tumaa tsa nyaá maa tsa

cua tahan yu. Maa tyin jndahvi ra tsa cua nacuhva cuenda tsi yu! —catyí ra Jesús.

²³Tacan tan ra tsicá tsihin ra Jesús quitsa-ha nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahan yahu tahan ra tsicá tsihin ra Jesús, yóo ra cahnu ca cuví

²⁴Yahá can tan quitsahá caahán yahu tahan ra tsicá tsihin ra Jesús, ndáa ra cahnu ca cuví. ²⁵Tan ra Jesús catyí ra:

—Tsitó nyoho tyin ra ndacá ñaha tsi nyiví iyó nu ñihu ñayiví, ñihí xaan ndacá ñaha ra naha tsi ñi. Tan cuñí ra naha tyin catyi nyiví tyin jatyinyéé ra naha tsi ñi. ²⁶Maa tyin nyoho ña taahán tsi javaha ndo tumaa jayahá ra ican naha ra. Tyin tatum cuñí ndo cuví ndo ra cuví ityí nuu, taahán tsi janduluhlu ndo tsi ndo. Tan tatum cuñí ndo cundaca ñaha ndo, cuñí tsi tsa cuvi ndo musu tandíhi ndo. ²⁷Tyin nu ñihu ñayiví ihya, ra cuví ityí nuu cuví ra tsa ña jahá tysiñu. Tan nyaá ra yahu mesa tan musu ra tsahá tsa catsi ra. Maa tyin yahu, ra cuví ityí nuu cuví yu, tan cuví yu musu ndo.

²⁸"Tan nyoho cuví ndo tsa nyecú tsihin yu tandíhi nu nyehé yu tundoho. ²⁹Yacan cuenda, yahu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu. ³⁰Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyiví cuví tata tsa utsi uvi sehe ra Israel.

Nu caahán ra Jesús tyin cua catyi ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹Tacan tan catyí ra Jesús tsihin ra Pedro:

—Nyehé vaha un, yooho Simón. Tyin nu ña vaha tsa tsicán ndatu nu tsi Nyoo tsa nducu cuhuva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. ³²Maa tyin tsicán tahvi xaan yu tsi ra tsa cuenda un, na ña jandíhi un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandíhi ra naha tsa tsinú iñi ra naha tsi yu —catyí ra Jesús tsihin ra Simón.

³³Tan ra Simón catyí ra tsihin ra:

—Jutu Mañi yu, tsa ndu iin vaha iñi yu tsa cuhun yu tsihin un vasu vehe cua, vasu cíu yu tsihin un —catyí ra.

³⁴Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyi un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsaa cuhva tsa cua nacuhva cuenda ra Judas tsi ra Jesús

³⁵Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quivi tsa jacuhun yu tsi ndo tsa cahan ndo tsihin nyiví, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶Tacan tan catyí ra Jesús tsihin ra naha:

—Maa tyin vityin, tatum iyó xuhun ndo, cundaha ndo. Tan tatum iyó xuhun ndo, cundaha ndo. Tatum nduve mityi ndo, xico ndo iin jahma ndo tan jata ndo mityi ndo.

³⁷Tyin catyí yu tsihin ndo, tyin tandíhi tuhun yu tsa nyaá nu tutu Nyoo cua cundaa tsi, tyehen catyí tsi: "Cua tatsi tuñi nyiví tsi ra tumaa tsa cuví ra iin ra caquíñi." Tacan catyí tuhun yu nu tutu Nyoo. Tan tandíhi tsa catyí tsi tsa cuenda yu cua cundaa tsi —catyí ra.

³⁸Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.

—Tsa iyó vaha ñi —catyí ra Jesús.

Nu tsicán tahvi ra Jesús tsi Nyoo nda Getsemaní

(Mt. 26.36-46; Mr. 14.32-42)

³⁹Tacan tan quita ra Jesús vehe nu nyifí ra. Tan cuahán ra yulu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰Tan tsa tsaa ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

⁴¹Tacan tan cuahán ra Jesús tsa cañi luxu ca, tumaa tsa cañi tsaa iin yuu tun cañi yo can. Tacan tan tsicuiñi tsiti ra. Tan quitsahá caahán ra tsihin Nyoo, ⁴²tan catyí ra:

—Tyatya Jutu yu, tun yooho tan cuñí un, jatsiyo tundoho tsa cua nyehe yu ihya. Maa

tyin na ña cuvi cuhva cuñí maa yu. Na cuvi cuhva cuñí maa un —catyí ra Jesús.

⁴³ Tacan tan quituví iin ángel Nyoo, tyin cuhva ra tunyee iñi tsi ra Jesús. ⁴⁴ Tan tsitsi tsa nyehé xaan ra Jesús tundoho tsa cuiihya xaan cuñí ra, tan ñíhi ca tsicán tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñíni.

⁴⁵ Tacan tan nduvitá ra tsa ndihí cahán ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuiihya xaan cuñí ra naha, ña cunyee iñi ra naha ñumaahna tan quixí ra naha.

⁴⁶ Tacan tan catyí ra Jesús tsihin ra naha:
—¿Nacuenda quixí ndo? Ndúvita ndo. Tan ndacan tahvi ndo tsi Nyoo, tyin tacan tan ña cuvi jaha canaa nu ña vaha tsi ndo.

*Nu tsahq cuenda ra Judas tsi ra Jesús tsi nu
xaan iñi tsi ra*

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaa cuaha ra catsaa. Tan ityi nuu, vatsí nu Judas, iin ra tsicá tsihin ra Jesús. Tan natuhvá nu nu nyaá ra Jesús tyin tyayuhu nu tsi ra. ⁴⁸ Tacan tan cahán ra Jesús tsihin nu:

—Yoho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayii tsa quee nda gloria tsi nu xaan iñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

⁵⁰ Tacan tan iin ra can, tsahnyá ra soho tsyo cuaha iin ra tsa cuví musu ra jutu tsahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tiín ra Jesús soho ra ican tan janduvahá ra itsi. ⁵² Tan ra jutu tsa cuví ityi nuu naha ra tsihin ra yiñí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahan tsitiín tsi ra Jesús. Tan catyí ra Jesús tsihin ra naha:

—¿A vatsí tiín ndo tsi yu tumaa tiín ndo iin ñasuhu? tyin ndaha ndo mityi tan yutun. ⁵³ Ndihi quiví tsinyii yu tsitsi vehe ñuhu cahnu, tan ña tiín ndo tsi yu ndacan. Maa tyin vityin tsaa cuhva tsa ndunaq tyin

nu ña vaha ndacá ñaha. Yacan cuenda vatsí tiín ndo tsi yu.

*Nu cahán ra Pedro tyin ña nacotó ra tsi ra
Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tacan tan tiín ra naha tsi ra Jesús. Tan tsindaca ra naha tsi ra nda vehe ra jutu tsahnu tsa cuví ityi nuu. Tan ra Pedro ndasava ñi cuahán ra nyicún ra. ⁵⁵ Tan tsa tsaa ra naha vehe ra jutu tsahnu tsa cuví ityi nuu, jatahen ra tsa cuví musu naha ra ñuhu nuquehe. Tan tsinyecu ra naha tanii canduvi nu cayú ñuhu can. Tan tsinyaa ndihí ra Pedro tyañu ra naha. ⁵⁶ Tan tsa ndunditsín tsa cayú ñuhu ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyiví tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yahq iin hora, tan nyehe tucu inga tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

⁶⁰ Tacan tan catyí ra Pedro:

—Ña tsító yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsitooho.

⁶¹ Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cahán ra Jesús tsihin ra: “Tsa ndi cumañi ca navacu tsitooho, yoho tsa cahan un uní tsaha tyin ña nacotó un tsi yu.”

⁶² Tacan tan quita ra Pedro ityi tsata vehe. Tan tsacu xaan ra tsa cuiihya cuñí ra.

*Nu tsacu nducu nyaá ra naha tsi ra Jesús
tan cañi ra naha tsi ra*

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsaha tsacu nducu ra naha tsi ra. Tan cañi ra naha tsi ra. ⁶⁴ Tsahñi ra naha jahma nuu ra, tan quitsaha cañi ra naha nuu ra. Tan catyí ra naha tsihin ra:

—Nacoto yóo ra cañí tsi un —catyí ra naha tsihin ra.

⁶⁵ Tan cuaha xaan ca maa tsa cahān nyaa ra naha tsi ra.

Nu tsicá tuhun mandoñi naha ra tsi ra Jesús tatum Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsín inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, caahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyi yu tsihin ndo tyin juvin yu cuví, ñia cua tsinu iñi ndo tsa cahan yu. ⁶⁸ Tan tatum nducu tuhun tucu maa yu tsi ndo, ñia cua nacahan ndo, tan ndi ñia cua jaña ndo tsi yu. ⁶⁹ Maa tyin vityin tan ityi nuu ca, Rayii tsa quee nda gloria cua cunyaa ra xiin cuaha Nyoo, ra tsa iyó tandíhi tunyee iñi —catyí ra Jesús.

⁷⁰ Tacan tan tandíhi ra naha tsicá tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiní ndo tsa caahán ra. Na cuñí ca tsi tsandaa. Tyin tsa tsiní maa yo tsa cahān ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvitá tandíhi ra naha. Tan tsindaca ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

² Tacan tan quitsahá tyáa ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyn ñia vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyn cuví ra Cristo, ra tsa jaquitsí Nyoo tyin cuví ra rey —catyí ra naha tsihin ra Pilato.

³ Tacan tan ra Pilato tsicá tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ni.

⁵ Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tisíhi tsahá ra, tyin jacuahá ra tsi nyivi. Tsa jihna ñi quitsahá caahán ra tsihin nyivi iyó ñuu tsa cayucú Galilea. Tan nanií ityi vatsí ra, jacuahá ra tsi nyivi. Tan vityin tsa tsaa ra Judea ihya tan juvin ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiní ra Pilato yacan, tan nducu tuhun ra tatum ra Galilea cuví ra Jesús.

⁷ Tan catyí nyivi tsihin ra tyin juvin. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyivi ra ñuu Jerusalén.

⁸ Tan cuhva tsa nyehe ra Herodes tsi ra Jesús, sii xaan cuñí ra. Tyin tsanaha xaan cuñí ra nyehe ra tsi ra. Tyin ñihí tuhun ra tyin cuaha xaan tsa iyo javahá ra.

Tan cuñí xaan ra nyehe ra iin tsa iyo tsa cua javaha ra Jesús.

⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ñia nacahan maa ra.

¹⁰ Ican nyecú ndihí tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaqxaan ra naha cuatyí tsi ra Jesús.

¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsí nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

¹² Tan quivi can ra Pilato tsihin ra Herodes nduvahá iyó ra naha. Tyin nu quitsí quivi, ñia cuví nyehe tahan ra naha tsi ra naha.

Nu cutuñí ra Jesús tyin cua cúu ra

(Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí

tyiñu vehe ñuhu naha ra, tan tsihin tandíhi nyivi.¹⁴ Tan catyí ra tsihin ñi:

—Nyoooho quitsí ndaca ndo tsi ra ihyá nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahán ndo can nañihí yu.¹⁵ Tan ndi ra Herodes tan ña nañihí ra ndi intuhun cuatyí ra. Yacan jaquitsí nyico ra tsi ra inga tsaha nu nyaá yu. Nyehé ndo tyin nduve cuatyí ra. Tan yacan ña taahán tsi tsa cíu ra.¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

¹⁷ Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.¹⁸ Maa tyin tandíhi nyivi iin caa ñi cana tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

¹⁹ Tan ra Barrabás can nyíi ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyivi.²⁰ Tan ra Pilato cuñi ra jaña ra tsi ra Jesús. Tan quitsaha caahán ra tsihin nyivi can inga tsaha tyin cua jaña ra tsi ra.²¹ Maa tyin nyivi tsaa ca cana tsaa ñi:

—¡Tyaq tsi ra nu cruu. Na cíu ra nu cruu!

²² —¿Náa tsa ña vaha javahá ra ihyá? Tan nyehé yu tyin ña taahán tsi tsa cíu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

²³ Maa tyin nyivi cana tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñi ñi tyin cana tsaa xaan ñi.²⁴ Tacan tan javahá ra Pilato cuhva cahán ñi.²⁵ Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

*Nu tyaq ra naha tsi ra Jesús nu cruu
(Mt. 27.32-44; Mr. 15.21-32; Jn. 19.17-27)*

²⁶ Tacan tan quihín andaru tsi ra Jesús. Tan cuahán ra tsihin ra naha. Tan tñiñi tucu ra naha tsi iin ra ñuu Círene nañí Simón. Ra ican ndi vatsí nuhu ra queé ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

²⁷ Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú

xaan ñi tsa cuiihya cuñi ñi tsacatyí tundoho tahan ra.²⁸ Maa tyin ra Jesús nanyehe ra nuu ñi. Tan catyí ra tsihin ñi:

—Tandíhi nyoooho, ñiñaha ñuu Jerusalén ihyá, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo.²⁹ Tyin cua quitsí quivi cua nyehé xaan ndo tundoho. Tan cua cahan nyivi tsi tandíhi ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsico tyin cuaha xaan tundoho nyehé yo vityin”, cua catyí ñi tsihin ndo.³⁰ Tyin quivi can cua cuñi ñi nduva yucu tsata ñi tan quihví yeehe ñi.³¹ Tyin tatum tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

³² Tan quihín tucu andaru can naha ra tsi uvi taahan ra iyó cuatyí, tyin cahñi ndihi ra naha tsi ra naha iin caa ñi tsihin ra Jesús.

³³ Tacan tan tsaq ra naha iin nu nañí Yíqui Jiñi Ndiyi. Tan ican tyaq ra naha tsi ra Jesús nu cruu. Tan tacan tyaq ndihi tucu ra naha tsi nduvi taahan ra iyó cuatyí can naha ra. Iin ra tyaq ra naha nuu cruu xiin cuaha ra Jesús. Tan inga ra can tyaq ra naha nuu cruu xiin satyin ra.³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tavá ra naha suerte tsihin jahma ra Jesús, tyin nyehé ra naha ndáa ra cua jaha canaa jahma can.³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsí Nyoo, cuví ra —catyí ra naha.

³⁶ Tan juvin ñi cahán nyaá ra andaru can naha ra tsi ra. Tan natuhvá ra naha nu ticaá ra. Tan tsahá ra naha vinu iya tsihí ra.³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaq ra Pilato tsihin sahan griego, sahan latín, tan sahan hebreo. Tyehen caahán

letra can: "Juvín ra ihyá cuví Rey cuenda nyiví ñuu Israel" —catyí letra can.

³⁹Tan iin ra tsa iyó cuatyí tsa nyaá nu cruu xiin ra Jesús, quitsahá caahán nyaar tsi ra:

—Tatun nditsa tyin ra Cristo cuví un, jácacu tsi un. Tan jácacu ndihí tsi nyuhu —catyí ra can.

⁴⁰Maa tyin inga ra can catyí ra tsihin ra:

—¿A ñia yuuhví un tsi Nyoo? Tyin juvin ñi tundoho tsa taahán ra ihyá, tan taahán un vityin. ⁴¹Maa yo nyehé yo tundoho maa tyin iyó cuatyí yo. Tan ra ihyá nduve cuatyí ra iyó —catyí ra can.

⁴²Tacan tan catyí ra can tsihin ra Jesús:

—Yootho Jesús, ndycuhun iñi tsi yu quíví cundaca ñaha un —catyí ra.

⁴³Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyiví tsinú iñi tsi Nyoo] —catyí ra Jesús tsihin ra.

Nu tsihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴Tacan tan cuhva ora quitsahá ndunaá nu ñuhu ñayiví, nda cuanda caa uñi tsa tseñi. ⁴⁵Tyin ndunaá ñicanyii. Tan jahma tsa ticaá tsitsi vehe ñuhu cahnu, ndata sava tsi. ⁴⁶Tacan tan cana tsaa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahán ra tacan, tan tsihí ra.

⁴⁷Tan ra cuví capitán cuenda andaru can naha ra, nyehé ra tandihí tsa cuví. Tan jacobahnu ra tsi Nyoo, tan catyí ra:

—Nduve tsa cuii cuatyí ra ihyá tsico —catyí ra.

⁴⁸Tan tandihí nyiví tsa nyecú ican, nyehé ñi tsa cuví. Tan cuahán ñi tan quitsahá cañí ndaha ñi yíquí nyica ñi. Tyin tsití ñi tyin ña vaha tsa javahá ñi tsihin ra Jesús. ⁴⁹Tan tandihí nyiví tsa nacotó tsi ra Jesús, tan ñiñaha tsa tsinyicún tsi ra nda Galilea, nyecú ñi ndasava. Tan nyehé ñi tandihí tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

⁵⁰Tan iyó iin ra vaha, nañí ra José. ra ñuu Arimatea tsa canyí Judea. Tan cuví ra iin ra cuví ityi nuu cuenda Junta Cahnuy iví Israel. ⁵¹Tan ra José can ndatú ra quíví tsa cua cundaca ñaha Nyoo. Tan ña ndoo

ra vaha tsihin tsa javahá ra cutahán tsihin ra, ra cuví jutu tsa cuví ityi nuu naha ra.

⁵²Tacan tan tsahan ra José can tsindacan ra cuñu ñuhu ra Jesús tsi ra Pilato. ⁵³Tan yahá tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi in ñaña tsaa tsa cuví yavi yuu tsa javahá nyiví tan ñaha ca quíhví ndiyí tsitsi can. ⁵⁴Tan viernes cuví can, quíví tsa janduvahá nyiví tsa cutsi ñi tsa sabaru, quíví quitatú ñi. Tan tsa cua tahan tsi quivi can.

⁵⁵Tan tandihí ñiñaha tsa quee tsihin ra Jesús Galilea, cuahán ñi cua nyehé ñi tsitsi yavi yuu can. Tan nyehé ñi cuhva canyí cuñu ñuhu ra. ⁵⁶Tan cuanuhu ñi nda yuvehe ñi. Tan janduvahá ñi ndutya tami tyn cua tyihi ñi cuñu ñuhu ra Jesús. Tacan tan quitatu ñi inga quíví can tumaa catyí maa tuhun tsa tsahá cuenda Nyoo tsi yo.

24

Nu nandotra Jesús

(Mt. 28.1-10; Mr. 16.1-8; Jn. 20.1-10)

¹Tsa tuví tumingu quíví nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi.

²Tan cuhva tsa tsaq ñi, nyehé ñi tyin tsa cuatsiyo yuu tsa ndasí yuhu ñaña can. ³Tan quíhví ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús. ⁴Tan yucú ñi tsihin tsa yuuhví ñi. Tan ña tsító ñi náa cua javaha ñi. Tan sana iñi ñi quítuví uvi taahan rayíi nuu ñi. Tan xiñu xaan jahma nditsí ra naha. ⁵Tan tsihin tsa yuuhví ñi, tan tsaquín ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyí? ⁶Nduve ca ra nyí ihyá, tyin tsa nandotra. Ndycuhun iñi ndo tsa cahán ra tsihin ndo quíví tsica ra Galilea. ⁷Catyí ra tyin taahán tsi nacuhva cuenda nyiví tsi ra ndaha ra iyó cuatyí naha ra. Tyin cuví ra Rayíi tsa quee nda gloria. Tan taahán tsi tyin cahñí ra can naha ra tsi ra nu cruu. Maa tyin tsa tsinu uñi quíví cua nandoto ra. Tacan catyí ra tsihin ndo —catyí ángel can naha ra tsihin ñi.

⁸Tacan tan nducuhun iñi ñi tsa cahán ra Jesús quíví can. ⁹Tan cuanuhu ñi. Tan nacatyí tuhun ñi tsihin tsa utsi iin ra tsa tava tyíñu ra Jesús tan tsihin tandihí ca nyiví tsa tsinyicún tsi ra. ¹⁰Tan ñiñaha tsa

tsicatyí tuhun tsihin ra naha cuví ñii: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. ¹¹ Maa tyin ra tava tyiñu ra Jesús cuñí maa ra naha tyin caahán ñii maa ñii. Tan ña tsinú iñi ra naha tsca caahán ñii.

¹² Maa tyin ra Pedro nduvitá ra tan tsinú xaan ra cuahán ra cua nyehe ra tsitsi ñaña nu tinyijí ra naha ra Jesús tatum nditsa. Tan nyehe ra tsitsi yavi yuu can tyin jahma tsa tsindasí ña ra canyíí nda sava. Tacan tan cuanuhu ra yuvehe nu yucú tandihí ca ra naha. Tan iyo xaan cuñí ra tsa cuvi.

*Tsa cuvi ityi cuahán ñuu Emaús
(Mr. 16.12-13)*

¹³ Juvín ñii maa quívi can, uvi taahan ra tsinyicún tsi ra Jesús cuahán ra naha ñuu Emaús, tumaa utsi iin kilómetro tsa queé yo ñuu Jerusalén. ¹⁴ Tan cuahán ra naha tan natuhún tahan ra naha náa ndihí tsa cuvi. ¹⁵ Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha. ¹⁶ Maa tyin vasu nyehe ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyásí tsi nuu ra naha, tan ña cuví nacoto ra naha tsi ra Jesús. ¹⁷ Tacan tan nducu tuhun ra Jesús tsi ra naha:

—¿Náa natuhún xaanndo? —¿Nacuenda cuiihya xaan cuñí ndo? —catyí ra tsihin ra naha.

¹⁸ Tan iin ra tsa nañí Cleofas nacahan ra tan catyí ra:

—Tandihí nyíví tsító tsa cuvi ñuu Jerusalén. —¿A ra inga ñuu cuví yooho tyin ña tsito un tsa cuvi? —catyí ra.

¹⁹ Tacan tan catyí ra Jesús tsihin ra naha:

—¿Náa cuvi?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan tsihin tunyee iñi cahnu Nyoo javahá ra tsa cahnu tan cahan ra tsa vaha nuu Nyoo tan nuu tandihí nyíví. ²⁰ Maa tyin ra jutu tsa cuví ityi nuu naha ra tan ra cumí tyiñu cuenda vehe ñuhu, tsahá cuenda ra naha tsi ra tsi ra ndacá ñaha cuenda ñuu Roma. Tan tsahíí ra naha tsi ra. Tan tsihí ra nu cruu. ²¹ Tan vityin tsa quítä uní quívi tsa cuvi yacan. Tan nyuhu cuñí maa ndi tyin juvin ra cua jacacu tsi yo tsa cuví yo nyíví Israel. ²² Maa tyin vityin iyo xaan cuñí ndi tsa nacatyí juhva ñiñaha tsihin ndi. Tyin

maa ñii tsahán ñii nu ñaña ra tsa tuvi. ²³ Tan nduve ca cuñu ñuhu ra canyíí. Tan nacatyí tuhun ndihí ñii tyin nyehe ñii uvi taahan ángel. Tan catyí ángel can naha ra tsihin ñii tyin ra Jesús nyito ra. ²⁴ Yahá yacan tan tsahán tucu juhva ra cutahán tsihin ndi tsinyehé ra naha nu ñaña. Tan nyehe ra naha tyin tsa nditsa cuví tsa cahan ñiñaha can. Maa tyin ña nyehe ra naha tsi ra Jesús —catyí ra naha tsihin ra Jesús.

²⁵ Tacan tan catyí ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cahan ra cuví ndusu yuhu Nyoo tahán tsanaha. ²⁶ ¿A ña tsító ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyí ra Jesús tsihin ra naha.

²⁷ Tacan tan quitsahá tsahá cuenda ra nácaa cuahán tuhun maa ra nu tutu Nyoo. Tan quitsaha caahán ra tuhun tsa tyaa ra Moisés tahán tsanaha. Tan yahá can tan cahan ra tuhun tandihí libru tsa tyaa ra cuvi ndusu yuhu Nyoo.

²⁸ Tan culva tsa tsaa ra naha nda ñuu Emaús, nu cuahán ra naha, tan jahá ra Jesús tyin cañí ca cuahán ra. ²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñiçanyii —catyí ra naha.

Tacan tan cuahán ra Jesús tsihin ra naha.

³⁰ Tan culva tsa tsinyaa ra yuhu mesa tsihin ra naha, quihín ra paan. Tan tsahá ra tyahví nyoo tsi Nyoo. Tan tsahnu sava ra, tan tsahá ra tsi ra naha. ³¹ Tan iin yaha ñi nuñá nuu ra naha tan nacoto ra naha tsi ra Jesús. Maa tyin ra Jesús naq ihñí ñi ra. ³² Tacan tan quitsahá natuhún tahan ra naha tan catyí ra naha:

—Yacan cuenda vaha xaan cuñí añima yo tsa vatsí ra tsihin yo, tan tsahá cuenda ra tuhun Nyoo tsa nyaá nu tutu Nyoo tsi yo —catyí ra naha.

³³ Ña ndatu ca ra naha, tan cuanuhu ra naha nda ñuu Jerusalén. Tan ñiñí tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can naha ra nacatyí tuhun ra naha tsihin ra tsa ndi tsaa can naha ra:

—Nditsa tyin Jutu Mañi yo nandoto ra. Tyin ra Simón nyehe ra tsi ra —catyí ra naha.

³⁵ Tacan tan ra tsa ndi tsaa can nacatyí tuhun ndihí ra naha nácaa natuhún ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnú sava ra paan.

Nu quituvi ra Jesús nu yucú ra tsica tsihin ra

(Mt. 28.16-20; Mr. 16.14-18; Jn. 20. 19-23)

³⁶ Ndi natuhún ca ra naha yacan tan quituvi ra Jesús tyañu ra naha. Tan tsaha ra nacumi tsi ra naha, tan catyí ra:

—Na coo tsa vaha añaima ndo.

³⁷ Tacan tan nayuhví xaan ra naha. Tan cuñí ra naha tyin tatyí ndiyí cuví can.

³⁸ Tacan tan catyí ra Jesús tsihin ra naha:

—¿Nacuenda yuhuví xaan ndo? ¿Tan nacuenda tsicá xaan iñii ndo? ³⁹ Nyehé ndo ndaha yu. Tan nyehe ndo tsaha yu. Tyin juvin ñii maa yu cuví. Tiñin ndo tsi yu tan coto ndo. Tyin tatyí ndiyí nduve cuñu ñuhu can iyó. Tan nduve yíquí can tumaa tsa nyehé ndo tsi yuhu —catyí ra Jesús.

⁴⁰ Tan cuhva tsa cahan ra yacan, tan jana-ha ra ndaha ra tsihin tsaha ra tsi ra naha. ⁴¹ Maa tyin maa ra naha, tsa cuenda tsa iyo cuñí ra naha tan sií cuñí ra naha, nda cuanda ña cuví ca tsinú vaha iñi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

⁴² Tacan tan tsaha ra naha luxu tyaca tyihyo tsihin ndutyá ñuñu tsi ra. ⁴³ Tan quihín ra. Tan quitsahá tsatsí ra nu nyecú ra naha. ⁴⁴ Tacan catyí ra tsihin ra naha:

—Tandihi tsa tahán yu, yacan cuví tsa catyí yu tsihin ndo quíví can. Tan catyí yu tsihin ndo tyin tacan cua cuví, tumaa cuhva nyaá tuhun tsa tyaq ra Moisés tan ra cuví ndusú yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsaha cuenda ra Jesús cuhva catyí nu tutu Nyoo. Tan cutunu iñi tandihí ra naha jaha ra. ⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cíu ra Cristo. Tan tsa tsinu uñi quíví cua nandoto ra. ⁴⁷ Tan taahán tsi coto nyíví tuhun ra Cristo, tyin tatum ndu uvi iñi ñi cuatiyí ñi, cua coo tucahnu iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén,

yaha can tan tandihí ca ñuu taníi cahnu nu ñuhu ñayivi.

⁴⁸ Tan catyí tucu ra Jesús tsihin ra naha:

—Tan nyoho cuví tsandaa tsa cuenda tandihí tsehe. ⁴⁹ Tan cua jaquitsi maa yu Tatyi li Nyoo siquí ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihyá. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16.19-20)

⁵⁰ Tacan tan ra Jesús cuahán ra tsihin tandihí ra tsica tsihin ra nda ñuu Betania. Tan cañihí ra ndaha ra. Tan nasoco ra tsi ra naha. ⁵¹ Tan tsitsi tsa nasocó ra tsi ra naha, nandaa ra andívi. ⁵² Tacan tan tandihí ra naha quitsahá jacahnú ra naha tsi ra. Tan sií xaan cuñí ra naha, cuanuhu ra naha nda ñuu Jerusalén. ⁵³ Tan tandihí quíví tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

Tuhun Nyoo tsa Tyaa Ra Juan

Tuhun tsa Caahán Nyoo nanduví tsi iin rayii, tan rayii can cuví ra Cristo

¹ Nda quivi jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíf ra tsihin Nyoo. Tan Nyoo cuví ra. ²Tan iyó ra tsihin Nyoo nda quivi jihna ñi. ³Tan tsihin ra, javahá Nyoo tandihí cuui maa tsa iyó. Tan nduve tsa javahá Nyoo tsa intuhun ñi maa ra. ⁴Ra tsa cuví Tuhun tsa Caahán Nyoo iyó ñayiví nyito tsa ña cua naa maa tsi ra. Tan juvin ñayiví can, cuví ñuhu tsa jandunditsín añima nyiví. ⁵Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶Tsicoo iin ra tsa jaquitsi Nyoo, nañí ra Juan. ⁷Quitsi ra cuví ra tsa ndaa. Tyin cahan ra tumañi iñi cuenda ra cuví ñuhu can, tyin tacan tan tsinu iñi tandihí nyiví tsi ra. ⁸Ra Juan, ñavin ñuhu can cuví ra. Lin tsa ndaa cuenda ra cuví ñuhu can cuví ra. ⁹Tyin ñuhu nditsa can, ndi cua quitsi tsi nu ñuhu ñayiví, tan cua jandunditsín tsi añima tandihí nyiví tsa iyó nu ñuhu ñayiví ihyá.

¹⁰Ra cuví Tuhun tsa Caahán Nyoo quitsi ra nu ñuhu ñayiví. Tan juvin ñi maa ra tsihin Jutu ra javahá ra naha ñuhu ñayiví. Maa tyin nyiví iyó nu ñuhu ñayiví ihyá, ña nacoto ñi tsi ra tsa ra Cristo cuví ra. ¹¹Quitsi ra nu iyó nyiví ñuu ra, nyiví Israel, tan ña naquihín vaha ñi tsi ra. ¹²Maa tyin tandihí nyiví tsa naquihín vaha tsi ra, tan tsinu iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. ¹³Juvín ñi nacacu tsaa. Maa tyin ñavin tumaa tsa cacu ñi tsa culee ñi cuenda cuñu ñuhu ñi. Tan ndi ñavin tsa cuenda tsa cuñi iin rayii coo ra tsihin iin ñaha. Ñavin tsa cuenda tsa cuñi nyiví coo sehe ñi. Maa tyin nacacu tsaa ñi jahá maa Nyoo.

¹⁴Tan ra cuví Tuhun tsa Caahán Nyoo nanduví iin rayii. Tan tsicoo ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsitu ra tsihin tsa nditsa tan tsa vaha. ¹⁵Tan ra Juan can cahan ra tumañi iñi tsa cuenda ra, tan catyí ra:

—Juvín ra ihyá cuví ra tsa cahan yu tuhun quivi can, tyin ra tsa vatsí ityi tsata yu, cahnu ca cuví ra tan ñavin ca maa yu. Tyin nda quivi cacu yu tan tsa iyó maa ra —catyí ra Juan.

¹⁶Tandihi yo naquihín yo tumañi iñi cahnu tsa tsahá ra tsi yo, tyin nasocó xaan ra tsi yo. ¹⁷Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihín yo tsa vaha Nyoo. Tan caahán ra tsa nditsa tsihin yo. ¹⁸Tan nduve maa yóo nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

*Nu caahán ra Juan, rajacoondutyá, tumañi iñi cuenda ra Jesucristo
(Mt. 3.11-12; Mr. 1.7-8; Lc. 3.15-17)*

¹⁹Ra cuví ityi nuu tsihin nyiví Israel tsa iyó ñuu Jerusalén, tavá tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cuhn ra naha nu nyiví ra Juan tan ndaca tuhun ra naha tsi ra yóo ra cuví ra. ²⁰Tan tsicá tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyiñi xeehe ra.

²¹Tacan tan tsicá tuhun nyico ra naha tsi ra Juan:

—¿Yóo ra cuví un? ¿A ra Elías, ra cuvi ndusu yuhu Nyoo tahan tsanaha cuví un?
—catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihí ca ra naha tsicá tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

²²Tan tsicá tuhun nyico ra naha tsi ra Juan inga tsaha:

—¿Yóo ra cuví un? Tyin cuñi tsi catyí tuhun ndi tsihin ra tsa tavá tyiñu tsi ndi yóo ra cuví un —catyí ra naha tsihin ra.

²³Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añima ndo tyin tsa vatsí Jutu Mañi yo.” Tumaa cahan ra Isaías ra cuví ndusu yuhu Nyoo tuhun

yu tahan tsanaha —catyí ra Juan tsihin ra naha.

²⁴ Ra fariseo naha ra cuví ra tavá tysiñu tsi ra can naha ra, na ndaca tuhun ra naha tsi ra Juan. ²⁵ Tan tsicá tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacuvi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyivi tsihin ndutyá. Maa tyin mahñu ndo nyii iin ra tsa ña nacotó ndo. ²⁷ Tan cahnu cá cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuvi ndatsi yu ñii nditsan ra —catyí ra Juan.

²⁸ Tandihí yacan cuví nu nañí Betábara tsa canyií inga tsayo yutya cahnu Jordán nu tsinyijí ra Juan jacoondutyá ra.

Ra Jesucristo, Mbee Ticatyi Luhlu jana Nyoo

²⁹ Tsa inga quivi nyehe ra Juan tsi ra Jesús cuahán ra nu nyii ra, tacan tan catyí ra Juan:

—Nyehe jihna ndo, ra ihya cuví Mbee Ticatyi Luhlu jana Nyoo ra tsa quihín nyaya cuatyí nyivi iyó nu ñuhu ñayivi ihyá.

³⁰ Tuhun ra cahán yu quivi catyí yu tsihin ndo tyin ityi tsata yu vatsí inga ra tsa cahnu ca cuví tan ñavin ca maa yu, tyin tsa iyó maa ra tan tsicoq yu. ³¹ Ndi yuhu tan ña nacoto yu tsi ra quivi can. Maa tyin vityin vatsí yu jacoondutyá yu tsihin ndutyá tyin tacan tan nacoto nyivi Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyehe yu Tatyi li Nyoo tsa quitsi ityi andivi tan quitsi tsi tumaa iin paloma, tan ndoo tsi tsihin ra. ³³ Yuhu ñaha ca nacoto yu yóra cuví ra quivi can. Maa tyin Nyoo, ra tsa tavá tysiñu tsi yu jacoondutyá yu tsi nyivi tsihin ndutyá, catyí ra tsihin yu: “Quivi nyehe un Tatyi li, vatsí nuú tsi siquí iin rayii, tan ndoo tsi tsihin ra, juvin ra can cuví ra tsa cua jacoondutyá tsi nyivi tsihin Tatyi li yu”, catyí Nyoo tsihin yu. ³⁴ Yuhu tsa yaha nyehe yu tsi ra. Tan cuví yu tsa ndaa tyin juvin ra cuví Sehe Nyoo —catyí ra Juan.

Ra tsa quitsaha nyicún jihna tsi ra Jesús

³⁵ Tsa inga quivi nyii nyico ra Juan nu nyif ra tan yucú ndihí uvi taahan ra tsicá tsihin

ra. ³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyi Luhlu jana Nyoo —catyí ra.

³⁷ Tsa tsinji nduvi taahan ra nyicún tsi ra Juan tsa cahán ra, tacan tan cuahan ra naha cuanyicun ra naha tsi ra Jesús. ³⁸ Tacan tan nanyehe ra Jesús ityi tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahan ra naha tan catyí ra naha:

—Maestro, ¿numaa iyó un?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan cuaa, tyin tsaq ra naha ndacan tumaa caa cumi tsa tseñi.

⁴⁰ Iin ra tsa tsinji tsa cahán ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro. ⁴¹ Tan ra Andrés numi xaan tsinanducu ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quitsi ra cuvi ra rey tsa cuenda yo.

⁴² Tacan tan quihin ra Andrés tsi ra Simón yañi ra cuahán tsihin ra nu nyii ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tumaa iin yuu cahnu].

Nu cang ra Jesús tsi ra Felipe tan ra Natanael

⁴³ Tsa inga quivi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Naha quitsi nyicun un tsi yu —catyí ra.

⁴⁴ Ra Felipe ihyá, ra ñuu Betsaida cuví ra. Tan ican iyó tucu ra Andrés tan ra Pedro.

⁴⁵ Tacan tan tsahan ra Felipe tsinanducu ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahān tucu ra cuví ndusu yuhu Nyoo tuhun tahan tsanaha. Tan nañí ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶Tan catyí ra Natanael:

—¿A cuví quita tsa vaha ñuu Nazaret can? —catyí ra tsihin ra Felipe.

Tan nacahan̄a en Felipe tan catyí ra:

—Naha tan nyehe un —catyí ra.

⁴⁷Tacan tan tsa cua cuyatín ra Natanael nu nyíí ra Jesús. Tan nanyehé ra Jesús týin vatsí ra, tan quitsaha catyí ra:

—Jíhna ndo! Ihya vatsí iin ra tsa nditsa nditsa týin ra ñuu Israel cuví ra, týin ña tuhvá ra jandaví ñaha —catyí ra Jesús.

⁴⁸Tacan tan tsica tuhun ra Natanael tsi ra:

—¿Nacaa tsa tsító un tsi yuhu?

Tan nacahan̄a en Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyíí un tsaha yutun higo can —catyí ra Jesús tsihin ra.

⁴⁹Tacan tan quitsaha catyí ra Natanael:

—Jutu Mañi yu, yooho cuví Sehe Nyoo. Tan juvin un cuví rey cuenda nyuhu tsa cuví yo nyívi Israel.

⁵⁰Tan catyí ra Jesús tsihin ra Natanael:

—¿A tsinú iñi un tsi yu tsa cuenda týin catyí yu týin nyehe yu tsi un tsaha yutun higo? Maa týin nahnu ca tsa cua nyehe un tan ñavin ca yacan —catyí ra tsihin ra.

⁵¹Tan catyí ra Jesús tsihin ra naha:

—Tsa nditsa, catyí yu tsihin ndo týin nyooho cua nyehe ndo cua nuña andívì tan cuaha xaan ángel Nyoo cua ndaa, tan cua nuu ra naha siqu yuhu Rayíi tsa quee nda gloria —catyí ra Jesús tsihin ra naha.

2

Nu iyó vico tindaha ñuu Caná iin ñuu tsa canyií Galilea

¹Tsa yahá uní quiví tan tsicog iin vico tindaha ñuu Caná tsa canyií Galilea. Tan ican nyívi sihi ra Jesús. ²Tan nyívi javaha vico can caná ndihí ñi tsi ra Jesús tan tsihin tandihí ra tsicá tsihin ra týin cuhun ra naha. ³Tacan tan cuahán ra naha. Tan tsitsi tsa yucú ra naha nu iyó vico can, tan ndihí vinu ñi javahá vico can. Tacan tan catyí sihi ra Jesús tsihin ra:

—Nduve ca vinu ñi —catyí ña.

⁴Tan catyí ra Jesús tsihin ña:

—¿Náa tsa ndihí iñi yo yacan, Miyan? Tyin ñaha ca tsaa hora yu —catyí ra tsihin ña.

⁵Maa týin sihi ra cahān ña tsihin ra tsa týihí mesa nu iyó vico can naha ra:

—Javaha nyooho tandihí tsa cua cahān ra tsihin ndo —catyí ña tsihin ra naha.

⁶Tan nyecú iñu quisí yuu nahnu tsa yihí ndutyá tsai tuhvá ra Israel naha ra tsatayíñu nu nacatyá xaan ra naha ndaha ra naha cuhva tsa iyó maa ra naha. Tan intuhun intuhun quisí can tsitahan uvi xico utsi, a uñi xico utsi, litru ndutyá tsitsi can. ⁷Tacan tan catyí ra Jesús tsihin ra tsa týihí mesa can naha ra:

—Jacutu ndo quisí ihya tsihin ndutyá —catyí ra tsihin ra naha.

Tacan tan tsitu cuii quisí can jahá ra naha. ⁸Tacan tan catyí ra Jesús tsihin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihyá —catyí ra Jesús tsihin ra naha.

Tan tacan icá ra naha. ⁹Ra cuví ityi nuu cuenda vico can tsihí ra naha ndutyá tsai nanduví vinu. Maa týin ña tsító ra naha nu maa quee can. Maa ñi maa ra tsa týihí mesa can naha ra tsító, týin maa ra naha tava ndutyá can. Tacan tan ra cuví ityi nuu cuenda vico can caná ra tsi ra tsa tandaha can. ¹⁰Tan catyí ra tsihin ra:

—Tandihí nyívi, jíhna ca vinu vaha tuhvá ñi tava. Yaha can tan tatuń tsa tsihí xaan nyívi, tacan tan tava ñi vinu ndaaahvi. Maa týin yooho tsicumí vaha un vinu vaha. Tan nda vityin tava un can —catyí ra tsihin ra.

¹¹Tsa javahá ra Jesús ñuu Caná tsa canyií Galilea, yacan cuví tsa iyo tsa jíhna ñi javahá ra tan janahá ra tsa cahnu cuví ra tsi nyívi. Tan ra tsicá tsihin ra tsinú iñi ra naha tsi ra týin ra ican cuví ra tsa jaquitsí Nyoo.

¹²Tsa yahá yacan tan cuahán ra ñuu Capernaum tsihin sihi ra tan tsihin yañi ra. Tan cuahán ndihí ra tsicá tsihin ra. Tan ican tsiyucú ñi juhva quiví.

Nu jacunu ra Jesús tsi nyívi xicó nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³Tsa cua tahan tsi quiví vico pascua tsa jacahnú nyívi Israel. Yacan cuenda cuahán ra Jesús ñuu Jerusalén. ¹⁴Tsa tsaa ra ñuu can, quihví ra nuquehe vehe ñuhu

cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticiaty, tan paloma. Tan yucú ndihí tucu nyivi nasamá xuhun.¹⁵ Tsa nyehe ra Jesúz tandihí yacan, tacan tan jahava ra in yoho. Tan tsihin yoho can jacunu ra tsi tandihí nyivi nuquehe vehe ñuhu in cahnu ñi tsihin mbee tan tsihin indiqui jana ñi. Tan ñi nasamá xuhun can, jatucuatyi ra xuhun ñi nu ñuhu tan janduvá ra mesa ñi.

¹⁶ Tan catyí ra tsihin ñi xicó paloma:

—¡Tava ndo paloma can ihyá! ¡Na jahava ndo vehe Jutu yu tumaa in nuyahvi! —catyí ra tsihin ñi.

¹⁷ Tacan tan ra tsicá tsihin ra, nducuhun iñi ra naha tsa catyí nu tutu Nyoo tyehen: “Cuiñ xaan yu vehe un”, catyí tsi, nducuhun iñi ra naha.

¹⁸ Tacan tan ra cuví ityi nuu tsihin nyivi Israel quitsahá tsicá tuhun ra naha tsi ra Jesúz:

—¿Náa seña jahava un nyehe ndi tan janaha un tyin nditsa tsa tsahá Nyoo ndatudo tsi un tsa jahava un yacan? —catyí ra naha tsihin ra.

¹⁹ Tan nacahan ra Jesúz tan catyí ra:

—Cani ndo vehe ñuhu ihyá, tan tsitsi tsa uñi quivi ñi tan cua janduvita nyico yu itsi inga tsaha —catyí ra tsihin ra naha.

²⁰ Tacan tan quitsahá catyí ra nyecú ican naha ra tsihin ra:

—Uvi xico iñu cuiya jahá tyiñu ra naha tan tsinu vehe ñuhu ihyá. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tsihin ra.

²¹ Maa tyin ñavin tuhun vehe ñuhu can cahan ra Jesúz, tyin cahan ra tuhun cuñu ñuhu ra.²² Yacan cuenda tandihí ra tsicá tsihin ra nducuhun iñi ra naha yacan quivi nandoto ra. Tan cutuñi iñi ra naha tyin tuhun tsa nyaá nuu tutu Nyoo caahán tsi cuenda ra Jesúz. Tan tsinu iñi ra naha tsa cahan ra Jesúz tan tsa nyaá nu tutu Nyoo.

Ra Jesúz tsitó ra tsa iyó añima nyivi

²³ Tsitsi tsa ndi nyii ra Jesúz ñuu Jerusalén, quivi iyó vico pascua, cuaha xaan nyivi quitsahá tsinu iñi tsa caahán ra tsa cuenda tsa cuaha tsa iyo jahava ra.

²⁴ Maa tyin ra Jesúz ña ni cuñi ra nyehe ra tsi tandihí ñi tyin tsitó ra cuhva tsicá ifii ñi.

²⁵ Ña tsiniñuhu tsa nacatyi tuhun yo tsihin

ra nácaa iyó nyivi, tyin tsa tsitó maa ra náa iyó tsitsi añima yo.

3

Nu jacuahá ra Jesúz tsi ra Nicodemo

¹ Tsicoo iin ra cuví fariseo tsa nañí Nicodemo. Tan cuví ra iin ra cuví ityi nuu tsihin ra Israel naha ra.² Ra Nicodemo ihyá, tsahan ra nu nyii ra Jesúz iin tsacuaa. Tan catyí ra tsihin ra:

—Maestro, tsitó ndi tyin Nyoo tavá tyiñu tsi un tsa quitsi un jacuahá un tsi ndi. Tyin yoñi nyivi tan cuví jahava ñi tsa iyo tsa jahavá un, tatum nduve Nyoo iyó tsihin ñi —catyí ra tsihin ra Jesúz.

³ Tacan tan catyí ra Jesúz tsihin ra:

—Tsa nditsa catyí yu tsihin un tyin tatum ña cua nacacu tsaa nyivi inga tsaha, ña cua cuví nyehe ñi nu ndacá ñaha Nyoo —catyí ra.

⁴ Tacan tan tsicá tuhun ra Nicodemo tsi ra Jesúz tan catyí ra tsihin ra:

—¿Nacaa cuví cacu iin rayii inga tsaha tatum tsa tsahnu ra? ¿A cuví quihvi nyico ra tsitsi sihi ra tan nacacu tsaa ra inga tsaha? —catyí ra.

⁵ Nacahan ra Jesúz tan catyí ra:

—Tsa nditsa catyí yu tsihin un tyin ñavin tsihin tsa cacu nyivi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsaa ñi tsihin Tatyi li Nyoo.⁶ Tyin nyivi cacu tsihin cuñu ñuhu, cuñu ñuhu ñi cuví ñi. Tan nyivi nacacu tsaa tsihin Tatyi li Nyoo, Tatyi li Nyoo iyó añima ñi.⁷ Ña cu iyo iñi un tsa caahán yu tsehe tsihin un tyin tandihí nyivi cuñi tsi nacacu tsaa ñi.⁸ Tumaa tsa yihi tatyi tandihí ñi ityi tan tsini un cucayú vatsí tsi, maa tyin ña tsitó un numaa ityi quee tsi, tan ndáa ityi cuahán tsi; tacan cuví tandihí nyivi nacacu tsaa tsihin Tatyi li Nyoo —catyí ra Jesúz tsihin ra.

⁹ Tacan tan nducu tuhun nyico ra Nicodemo tsi ra inga tsaha tan catyí ra:

¹⁰ —¿Nacuenda caahán un tacan? —catyí ra tsihin ra.

¹¹ Nacahan ra Jesúz tan catyí ra:

—Yooho tsa cuví un maestro cuenda nyivi Israel, taahán tsi coto un tsehe.¹² Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyoho ña tsinu ñi ndo tsa caahán ndi tsihin ndo.¹³ Tatum ña

tsinú iñi ndo tsa caahán yu tuhun nu ñuhu ñayiví ihya tsihin ndo, ¿nácaa cua tsinu iñi ndo tatum cua cahan yu tuhun gloria tsihin ndo?

¹³Yoñi tsahen gloria tsinyehé nácaa iyó. Intuhun iñi maa yuhu Rayii tsa quee nda gloria nyehé yu nácaa iyó gloria, tyin ndacan quee yu. ¹⁴Tumaa tsa ticaa ra Moisés iin coo tsa tsinu tsihin caa nu yutun iin nu tsiqui, tacan cua ticaa nyiví tsi yuhu Rayii tsa quee nda gloria nuu cruu. ¹⁵Tacan tan tandihí nyiví tsa tsinu iñi tsi yu, ña cua cunaa ñi. Tan cua coo ñi ñayiví nyito tsa ña cua naa maa.

Nyoo cuñi xaan ra tsi tandihí nyiví

¹⁶Nyoo cuñi xaan ra tsi tandihí nyiví iyó nu ñuhu ñayiví. Yacan cuenda tsahen ra tsa cíu Sehe mañi ra nu cruu tsa cuenda ñi. Tyin tacan tan tandihí ñi tsa tsinu iñi tsi Sehe ra, ña cunaa ñi, tan coo ñi ñayiví nyito tsa ña cua naa maa. ¹⁷Tyin Nyoo jaquitsi ra tsi Sehe ra nu ñuhu ñayiví tyin jacacu ra tsi nyiví, tan ña jaquitsi ra tsi ra tsa jacunaa ra tsi ñi.

¹⁸Yacan cuenda nyiví tsa tsinu iñi tsi yu tsa cuví yu Sehe Nyoo ña cua cunaa ñi, maa tyin nyiví tsa ña tsinu iñi tsi yu, tsa cunaa ñi tyin ña tsinu iñi ñi tsi yu tsa cuví yu Sehe mañi Nyoo. ¹⁹Nyiví ña tsinu iñi, tsa cunaa ñi. Tyin quivi quitsi yu jandunditsin yu nu ñuhu ñayiví, ña naquihín cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. ²⁰Tandihí nyiví javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi. ²¹Maa tyin nyiví taahán iñi tsa nditsa, naquitá ñi nu nditsin tyin tacan tan nyehe nyiví tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyiví, tuhun ra Jesús inga tsaha

²²Tsa yahá yacan, ra Jesús tan ra tsicá tsihin ra cuahán ra naha nu cuví Judea. Tan ndoo ra naha ican juhva quivi, tyin jacoondutyá ra naha tsi nyivi. ²³Tacan tucu ra Juan nyíi ra jacoondutyá ra tsi nyivi nu cuví Enón yatyin ñi nu cuví Salim, tyin ican ñuhú cuaha ndutya. Tan tsáa nyivi tan tsicoondutyá ñi. ²⁴Yacan javahá ra Juan tsa ndi cumañi ca quíhví ra vehe caa.

²⁵Tacan tan quitsaha caahán yuhu tahan juhva ra tsicá tsihin ra Juan tsihin inga ca

ra naha tsa cuenda tsa janduvaha nyiví tsi ñi nuu Nyoo. ²⁶Tacan tan cuahán ra naha nu nyiví ra Juan. Tan catyí ra naha tsihin ra:

—Maestro, ra tsa tsinyij tsihin un inga tsiyo yutya cahnu Jordán, ra tsa cahen un tuhun tsihin ndi, vityin jacoondutyá ndihi ra tsi nyiví tan tandihí nyiví nyicún tsi ra —catyí ra naha tsihin ra.

²⁷Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatayin ña tsahá Nyoo tunyee iñi ra tsi yo. ²⁸Nyooho tsa tsitó maa ndo tyin ñavin yuhu cuví ra Cristo tyin tsiñi maa ndo tsa cahen yu quivi catyí catsi yu tyin ra jaquitsi Nyoo ityi nuu ra Cristo cuví yu. ²⁹Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyiví ra ican. Tan cusíi iñi ra tsiñi ra tsa caahán ra tsa cua tindaha. Tan tacan tucu yuhu, sii cuñi yu tyin naquihín nyiví tuhun caahán ra Jesús tan nyicún ñi tsi ra. ³⁰Maa ra cuví ra cahnu ca cuvi. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayiví

³¹Ra tsa quee nda gloria, cahnu ca cuví ra tan ñavin ca tandihí nyiví. Tyin nyiví iyó nu ñuhu ñayiví ihya, cuenda nu ñuhu ñayiví cuví ñi. Tan caahán ñi tuhun tsa iyó nu ñuhu ñayiví. Maa tyin ra tsa quee nda gloria, cahnu cuví ra. ³²Tan caahán ra tsa nyehé ra tan tsa tsiñi ra, maa tyin yoñi tsinu iñi tsa caahán ra. ³³Tatun yoo tan tsinu iñi yo tsa caahán ra, cua cuví yo tsa ndaa tyin Nyoo ña vatya ra. ³⁴Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsaha ra itsi tsi ra. Tsaha ra naníi Tatyí li ra tsi ra. ³⁵Nyoo Jutu yo cuñi ra tsi Sehe ra. Tan nacuhva cuenda ra tandihí maa tsi ra. ³⁶Nyiví tsa tsinu iñi tsa caahán Sehe Nyoo, iyó ñi ñayiví nyito tsa ña cua naa maa. Maa tyin nyiví tsa ña cuñi tsinu iñi tsi ra, ña cua coo ñi ñayiví nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹Tsa tsito ra cuví fariseo naha ra tyin cuaha xaan ca nyiví nyicún tsi ra Jesús tan ñavin ca ra Juan. Tan cuaha xaan ñi

tsicoondutya.² Maa tyin ñavin maa ra Jesús jacoondutýa tsi ñi, tyin ra tsicá tsihin ra jacoondutýa tsi ñi. ³ Tan quíví tsa tsito ra Jesús tyin tsito ra naha yacan, queé ra Judea can tan cuanuhú ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñí tsi yaha ra ican. ⁵ Tacan tan tsaq ra iin ñuu tsa canyí Samaria tsa nañí Sicar yatinyín ñi nu cuví ñuhu ra Jacob nu tsaha ra tsi ra José sehe ra. ⁶ Ican nyáá iin soco pila tsa catyí nyíví tyin tsii ra Jacob cuví. Tsa quítá ra Jesús nu nyáá soco can tan tsinyaa ra yuhu soco can tyin tatu xaan ra tyin cañí xaan itiyí tsicá ra tan maa hora cuví. ⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaq iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yoho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyíví Israel ña vaha iyó ñi tsihin nyíví Samaria.) ¹⁰ Tacan tan nacahan̄ ra Jesús tan catyí ra:

—Tun tsatytin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu?

¹² Ra Jacob tsii tsahnu yo, nacoq ra soco ihya tsi ndi. Juvín ihya tsihí maa ra ndutya tan tsihin tandihí sehe ra. Tan juvin ñi ihya tsihí tucu quítá jana ra naha. ¿A calnu ca ra cuví yooho tan ñavin ca ra can? —catyí ña tsihin ra.

¹³ Tacan tan nacahan̄ ra Jesús tan catyí ra tsihin ña:

—Tandihí nyivi tsihí ndutya ihya, cua na itiyí nyico iñi ñi. ¹⁴ Maa tyin nyíví tsihí ndutya tsa tsahá yuhu, ña cua na itiyí ca iñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin

ndohyo, tyin iin ndohyo ña tuhvá tsi ndoco. Tan tacan cua coo ñi ñayiví nyito —catyí ra tsihin ña.

¹⁵ Tacan tan quitsahá caahán ña tsihin ra:

—Yooho tatta, cuhva ndutya can coho yu na ña na itiyí ca iñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan̄ cua quihin yíi un tan quitsi ndo —catyí ra tsihin ña.

¹⁷ Tan nacahan̄ ña tan catyí ña:

—Nduve yíi yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yíi un iyó. ¹⁸ Tyin tsa uhun yíi un tsicoo, tan ra cumí tsi un vityin ñavin yíi un tsi ra. —catyí ra tsihin ña.

¹⁹ Tsa tsíñi ña tsa cahan̄ ra tacan, quitsahá catyí ña tsihin ra:

—Yooho tatta, tuví iñi yu tyin ra cuví ndusyu yuhu Nyoo cuví un. ²⁰ Tsii tsahnu ndi, ra ñuu ihya naha ra, jacahnu ra naha tsi Nyoo yucu ihya. Maa tyin nyoho tsa cuví nyíví Israel catyí ndo tyin nda Jerusalén taahán tsi jacahnu yo tsi Nyoo —catyí ña tsihin ra.

²¹ Tacan tan nacahan̄ ra Jesús tan catyí ra tsihin ña:

—Tsinu iñi tsa caahán yu tsihin un. Tyin vatsí hora tsa cua jacahnu ndo tsi Jutu yo Nyoo. Maa tyin ña tsíñiñuhú ca tsa quitsi ndo yucu ihya, a cuhun ndo nda Jerusalén.

²² Nyoho nyivi Samaria, ña tsitó ndo yóo jacahnu ndo. Maa tyin nyuhu tsitó ndi yóo jacahnu ndi. Tan tsitó ndi tyin cua jacacu iin ra Israel tsi nyíví jaha Nyoo. ²³ Maa tyin cua tsaa hora, tan hora can iyó yo vityin tyin nyíví tsa nditsa jacahnu tsi Nyoo Jutu yo, cua jacahnu ñi tsi ra tsihin añima ñi tan tsihin tsa nditsa. Tumaa jaquihín itiyí maa Tatyí li Nyoo tsi ñi. Tyin Nyoo Jutu yo tacan cuví ra javaha ñi tsa jacahnu tsi ra. ²⁴ Tyin Nyoo Tatyí li cuví ra. Tan nyíví jacahnu tsi ra cuñí tsi jacahnu ñi tsi ra tsihin tsa nditsa tumaa jaquihín itiyí maa Tatyí li tsi ñi —catyí ra tsihin ña.

²⁵ Tacan tan nacahan̄ ña tan catyí ña tsihin ra:

—Yuhu tsitó yu tyin cua quitsi ra cuví Mesías, ra Cristo, ra cuví rey tsi yo. Tan quíví quitsi ra, maa ra cua nacatyí tuhun tandihí tsihin yo —catyí ña tsihin ra.

²⁶Tacan tan nacahán ra Jesús tan catyí ra tsihin ña:

—Ra tsa caahán un tuhun can, juvin ra caahán tsihin un —catyí ra tsihin ña.

²⁷Tacan tan tsaa nyico ra tsicá tsihin ra, tan iyo xaan cuñí ra naha tyin natuhún ra Jesús tsihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñí ra, o ndaca tuhun ra naha tsi ra nacuenda natuhún ra tsihin ñaha can.

²⁸Tacan tan nacoq ña quiyí ña tan cuanuhu ña nda ñuu. Tan catyí ña tsihin nyivi:

²⁹—Cohonndo cunyehe ndo tsi iin ra tsa cahan tandíhi cuhva iyóyu. ¿A ñavin ra Cristo tsa cua jaquitsi Nyoo cuvíra? —catyí ña tsihin ñi.

³⁰Tacan tan quita nyivi ñuu can tan cuahán ñi cua nyehe ñi nu nyíi ra Jesús.

³¹Tan tsa ndi cumañi ca tsaa ñi nu nyíi ra, ra tsicá tsihin ra, jañiñi ra naha tsi ra na catisi ra luxu. Tan catyí ra naha tsihin ra:

—Maestro, çatsi luxu —catyí ra naha.

³²Maa tyin catyí ra Jesús tsihin ra naha:

—Yuhu iyó iin tsa tsatsí yu tan nyoho ña tsítido náa cuví can —catyí ra tsihin ra naha.

³³Tacan tan ra tsicá tsihin ra, quitsaha natuhún tahan ra naha, tan catyí ra naha:

—¿A iyó yóo quitsí quitsí ndaca tsa catsi ra? —catyí ra naha.

³⁴Maa tyin ra Jesús catyí ra tsihin ra naha:

—Tsa tsatsí yuhu juvin tsi cuví tsa jahavá yu cuhva cuñí ra tsa jaquitsi tsi yu, tan jahavá yu tyiñu tsahá ra tsi yu. ³⁵Nyoho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tsihin ndo: Nyeho ndo tyin tsa ndíhi tsa tatsi ndo cuaan tan tsa nyecú vaha tsi tsa cua naquihin vaha yo itsi. ³⁶Ra tsa naquihín vaha can ñihí ra yahví ra. Tan tsa naquihín vaha ra, cuví tsi nyivi tsa cua coo ñayivi nyito tsa ñia cua naa maa. Tacan tan ra tsa tatsi tan ra tsa naquihín cusii iñi ra naha. ³⁷Tan iyó iin cuhva tuhvá nyivi caahán tan catyí ñi tyin siin nyivi tatsí tan siin nyivi naquihín vaha. Tan nditsa yacan. ³⁸Yuhu jacuhyn yu tsi ndo tyin cua cahnu ndo niñi tsa iyó nu ñajahá tyiñu ndo, nu jahá tyiñu inga ra. Tan nyoho cuchahnu ndo tan cua naquihin vaha ndo niñi can —catyí ra Jesús tsihin ra naha.

³⁹Tan cuaha xaan nyivi ñuu Samaria can quitsaha tsinú iñi ñi tsi ra Jesús tsa cuenda

tsa cahan ñaha can, tyin catyí ña: “Cahán ra tsihin yu tandíhi cuhva iyó yu”, catyí ña. ⁴⁰Cuhva tsa tsaa ñi nu nyíi ra Jesús, tan cahan ndaahvi ñi tsihin ra na ndoo ra tsihin ñi. Tan ndoo ra tsihin ñi uvi quivi. ⁴¹Tan cuaha ca nyivi quitsaha tsinú iñi ñi tsa tsinú ñi tsa caahán ra. ⁴²Tacan tan quitsaha catyí ñi tsihin ñaha can:

—Vityin tsinú iñi ndi, maa tyin ñavin tsa cuenda tsa cahan un tsihin ndi, tyin tsíi maa ndi tsihin soho ndi tsa caahán ra, tan tsítido vaha ndi tyin juvin ra cuví ra Cristo ra jacobú tsi nyivi iyó nu ñuhu ñayivi ihyá —catyí ñi.

Nu janduvaha ra Jesús sehe iin ra cumítyiñu

⁴³Tsa yahá uvi quivi tan quee ra Jesús nu cuví Samaria tan cuahán ra ityi nu cuví Galilea, nu cacu ra. ⁴⁴Vasu ndi maa juvin ñi maa ra cahan tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi ra. ⁴⁵Tacan tan tsa tsaa ra Galilea, nyivi iyó icán, vaha caahán ñi tsihin ra, tyin tsahán ñi vico Jerusalén, tan nyehe ñi tsa vaha tsa jahavá ra.

⁴⁶Tacan tan cuanuhu nyico ra Jesús nda ñuu Caná tsa canyií Galilea nu nanduvíndutya vinu jahá ra. Tan iyó iin ra nyiso tyiñu cahnu nuu rey. Ra icán iyó iin sehe ra tsa cuhví nda ñuu Capernaum. ⁴⁷Quivi tsa tsito ra can tyin tsa tsaa nyico ra Jesús nda Galilea tsa tsahán ra nda Judea, tsahán ra tsinyehé ra tsi ra Jesús. Tan tsicán ra tumañi iñi tsi ra na cuhun ra vehe ra tan janduvaha ra tsi sehe ra, tyin tsa cuñí cíu cuí ña sehe ra. ⁴⁸Tacan tan catyí ra Jesús tsihin ra:

—Nyoho ña cua tsinu iñi ndo tatuñ ña nyehe jihna ndo tsa iyo —catyí ra tsihin ra.

⁴⁹Maa tyin ra can catyí ra tsihin ra Jesús:

—Yoho taa, cohon ñi tsihin yu tsa ndi cumañi ca cíu sehe yu —catyí ra tsihin ra Jesús.

⁵⁰Tacan tan catyí ra Jesús tsihin ra:

—Cuanuhu yuvehe un. Sehe un nyito ra, tsa nduvahra —catyí ra tsihin ra.

Tacan tan ra can tsinu iñi ra tsa cahan ra Jesús tan cuanuhu ra. ⁵¹Tsa tsa cuyatín ra yuvehe ra, quita musu ra tan caahán ra naha tsihin ra:

—Taa, sehe un nyito ra; tsa nduvahra!

⁵²Tacan tan quitsaha tsicá tuhun ra tsi ra naha náa hora quitsaha vaha cuñí ra. Tan catyí ra naha tsihin ra:

—Icu culva caa iin tsa yahá hora quita cahñí tsi ra —catyí ra naha.

⁵³Tacan tan tsito ra can, tyin hora can cahan ra Jesús tsihin ra, “Cuanuhu tyin sehe un nyito ra, tsa nduvahá ra.” Tan maa ra can tsihin tandíhi nyíví ra quitsaha tsinú iñí ñi tsi ra Jesús.

⁵⁴Yacan cuví tsa iyo tsa tsinu uvi jayahá ra Jesús tsa tsaa nyico ra Galilea tsa yaha tsahán ra Judea.

5

Nu janduvahá ra Jesús iin ra cuuhví

¹Tsa yahá can tan cuahán ra Jesús ñuu Jerusalén inga tsaha tyin nyíví ñuu Israel jacahnú ñi iin vico. ²Tan yahu cora cahnu ñuu can iyó iin yuvehe tsa nañí Yuvehe Cuenda Mbee Ticatyi. Tan yatin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yahu hebreo nañí vehe can Betesda. Tan iyó uhun corredor. ³Tan ican yucú cuaha nyíví cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can. ⁴Tyin nda naha nda naha ñi tan nuú iin ángel tan jacandá ra ndutya can. Tan nyíví tsa quihví jihna tsa yahá ñi nacandá ndutya can, nduvahá ñi vasu ndi maa cuehe cahnu ndohó ñi. ⁵Tan ican canyí iin ra cuuhví tan tsa iyó oco tsahun uñi cuiya cuuhví ra. ⁶Tsa nyehe ra Jesús tsi ra ican canyí ra, tuví iñí ra tyin tsa cuaha xaan cuiya cuuhví ra. Tan tsicá tuhun ra tsi ra ndaahví can, tan catyí ra:

—¿A cuñí un nduvahá un?

⁷Tan ra cuuhví can nacahan ra tan catyí ra:

—Tata, yoñí maa tyihí tsi yu tsitsi ndutya ihyá tatum tsa nacandá tsi. Tyin tahán ñi tsaha tsa cuñí yu quihví yu, inga nyíví quihví jihna —catyí ra cuuhví can tsihin ra Jesús.

⁸Tacan tan catyí ra Jesús tsihin ra:

—Nduvita, naquihin yuvi un tan caca un —catyí ra tsihin ra.

⁹Juvín ñi hora can tan nduvahá ra, naquihin ra yuvi ra, tan nacaca ra. Maa tyin quihví quitatú nyíví cuví quihví can. ¹⁰Yacan ra cuví ityi nuu tsihin nyíví Israel catyí ra naha tsihin ra tsa nduvahá can:

—Quihví quitatú yo cuví vityin, yacan cuenda ña taahán tsi cuiso un yuvi un —catyí ra naha tsihin ra.

¹¹Tan ra tsa nduvahá can nacahan ra tan catyí ra:

—Ra tsa janduvahá tsi yu, catyi ra tsihin yu: “Naquihin yuvi un tan caca un”, catyí ra tsihin yu.

¹²Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cahan tsihin un tyin naquihin un yuvi un tan caca un? —catyí ra naha.

¹³Maa tyin ra tsa nduvahá can ña tsitó ra yóo janduvahá tsi ra. Tyin cuaha xaan nyíví nyecú ican, tan ra Jesús nduve ca ra nyaá tyin tsa cuahán ra. ¹⁴Yahá can tan nañihí ra Jesús tsi ra tsa nduvahá can tsitsi vehe ñuhu cahnu, tan catyí ra tsihin ra:

—Jihna, vityin tsa nduvahá um, ña jayahá ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵Tacan tan tsahán ra tsicahán ra tsihin ra Israel naha ra tyin ra Jesús cuví ra janduvahá tsi ra. ¹⁶Tsa cuenda tsa janduvahá ra Jesús tsi ra can quihví quitatú nyíví, xaan cuñí ra Israel naha ra nyehe ra naha tsi ra. Tan cuñí ra naha cahñí ra naha tsi ra. ¹⁷Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yahu —catyí ra.

¹⁸Tan tsa cuenda tsa cahan ra yacan, xaan ca cuñí ra Israel can naha ra. Tan ñihi ca cuñí ra naha cahñí ra naha tsi ra tyin cuñí maa ra naha tyin ña jahá ra Jesús tsa cahnu cuví quihví quitatú nyíví, tan inga tucu tuhun, iñí ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yahu, Sehe Nyoo cuví tsi yu, tan nduve tsa jayahá yu tsa maa ñi maa yu. Tyin jayahá yu tsa nyehé yu jayahá Jutu yu. Tandíhi tsa jayahá Jutu yu tan jayahá tucu maa yu.

²⁰Tyin cuñí xaan ra tsi yu, tyin Sehe ra cuví tsi yu, tsa cuenda yacan janahá ra tandíhi tsa jayahá ra tsi yu. Tan nahnu ca tsa cua janahá ra tsi yu, tan nyoho iyo cua cuñí ndo nyehe ndo can. ²¹Tumaa janandotó Nyoo Jutu yu ndiyí, tan tsahá ra ñayíví coo

ñi, tacan tucu yuhu tsa cuví yu Sehe ra, tsahá yu ñayíví coo nyíví cuñí maa yu cuhva yu. ²² Tacan Nyoo Jutu yu, ña jandaa ca ra cuatyí ndi intuhun nyíví tyin tsa tsahá ra ndatu tsi yuhu tsa cuví yu Sehe ra tyin jandaa yu cuatyí nyíví. ²³ Tacan icá Nyoo Jutu yu tsa cuñí ra jacobnu nyíví tsi Sehe ra tumaa tsa jacobnu maa ñi tsi maa ra. Nyíví tsa ña jacobnu tsi yuhu tsa cuví yu Sehe Nyoo, ndi Jutu yu tan ña jacobnu ñi. Tyin maa ra jaquitsí tsi yu.

²⁴ Tan tsa nditsa caahán yu tyin nyíví tyaa soho tsa caahán yu tan tsinú iñi ñi tsi ra tsa jaquitsí tsi yu, iyó ñi ñayíví nyito tsa ña cua naa maa. Tan ña cua cuhun ca ñi anyaya tsa catyi cuatyí ñi tyin tsa jacobnu Nyoo tsi ñi tan ña yihi ndaha ca tuhun tsihí tsi ñi, tan tsahá ra ñayíví nyito iyó ñi. ²⁵ Nyíví; tumaa ndiyí cuví ñi. Tan tsa nditsa caahán yu tsihin ndo tyin vatsí quíví cua cuñí ñi ndusu Sehe Nyoo. Tan nyíví tsa cua tyaa yahvi tsa caahán ra, cua coo ñi ñayíví nyito tsa ña cua naa maa. Tan vityin cuví quíví tsa caahán yu tuhun. ²⁶ Tyin Nyoo Jutu yu iyó ra ñayíví nyito tsa ña cua naa maa. Tan tsahá ra ndatu can tsi yuhu tsa cuví yu Sehe ra tyin cuhva yu ñayíví can coo nyíví.

²⁷ Tan tsahá tucu Nyoo ndatu tsi yu tsa jandaa yu cuatyí nyíví, tyin Rayí queé nda gloria cuví yu. ²⁸ Ña iyo cuñí ndo tsa caahán yu tyehén, tyin cua tsaa quíví tsa cuñí ndiyí yucú tsitsi ñaña ndusu Sehe Nyoo. ²⁹ Tan cua quita ñi tsitsi ñaña ñi. Tacan tan nyíví tsa jacobna tsa vaha cua nandoto ñi tyin coo ñi ñayíví nyitó. Maa tyin nyíví tsa jacobna tsa ña vaha cua nandoto ñi tyin cuhun ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayíví nyito coo nyíví

³⁰ Yuhu ña cuví jacobna yu tsa jacobna yu tsa intuhun ñi maa yu. Yuhu jandaa yu cuatyí nyíví tumaa cuhva tyaq tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña jacobna yu cuhva cuñí maa yu, tyin jacobna yu cuhva caahán maa Jutu yu, ra tsa jaquitsí tsi yu. ³¹ Tan tatan juvin ñi maa yu cuví tsa ndaa tsa cuenda yu, nduve yahvi nyaá tsa ndaa can. ³² Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. ³³ Nyoho tyaq tyiñu ndo na ndaca tuhun ra naha tsi ra Juan. Tan tuhun tsa cahan ra, tsa nditsa cuví tsi.

³⁴ Maa tyin yuhu ña tsinú iñi tsa cuví rayí tsa ndaa tsa cuenda yu. Maa tyin caahán yu tuhun tsa cahan ra Juan tsihin ndo tsa cuenda tsa vaha tsi maa ndo, tyin tacan tan tsinú iñi ndo tsi yu tan cacu ndo. ³⁵ Ra Juan cuví ra tumaa iin lámpara tsa cayú tan jandunditsín tsi. Tan nyoho juhva ñi quíví cušíi iñi ndo tsihin ñuhu nditsin can. ³⁶ Maa tyin yuhu iyó iin tsa ndaa vaha ca tsi yu tan ñavin ca tsa caahan ra Juan. Tyin tandihí tsa jacobna yuhu, maa Jutu yu catyí tsihin yu na jahava yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsí tsi yu. ³⁷ Tacan tucu Jutu yu, ra tsa jaquitsí tsi yu, cuví ra tsa ndaa tsa cuenda yu. Nyoho ñaha ca cuñí ndo ndusu ra, tan ndi ñaha ca nyehe ndo tsi ra. ³⁸ Tan ña ndeo tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsí tsi yu. ³⁹ Nyoho tsihin cuenda xaan cahví ndo nu tutu Nyoo, tyin cuñí maa ndo tyin nuu tsi cua ñihí ndo ñayíví nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. ⁴⁰ Tan nyoho ña cuñí ndo quitsí ndo nu nyaá yu tan cuhva yu ñayíví nyito coo ndo.

⁴¹ Yuhu ña nducú yu tsa jacobnu nyíví tsi yu. ⁴² Tyin yuhu tsitó yu tsi ndo tan tsitó yu tyin ña cuñí ndo tsi Nyoo. ⁴³ Yuhu vatsí yu cuenda Jutu yu tan nyoho ña naquihín ndo tsa caahán yu. Maa tyin tatan inga ra cua quitsí tsa cuenda maa ra, ra ican cua tsinú iñi ndo. ⁴⁴ Nyoho ña cuví tsinú iñi ndo tsi yu tyin cuñí ndo nduvaha ndo nuu nyíví tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. ⁴⁵ Ña caca iñi ndo tyin cua ndacan yu cuatyí tsahá ndo nuu Jutu yu. Nyoho cuñí maa ndo tyin ley tsa tyaq ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsahá ndo tyin ña jacuví ndo ley tsa tyaq ra. ⁴⁶ Tyin tun tsatayin nditsa tsa tsinú iñi ndo tsa cahan ra Moisés, tacan cua tsinú ndihí iñi ndo tsa caahán yuhu. Tyin tuhun yuhu cuví tsa tyaq ra. ⁴⁷ Maa tyin tatan ña tsinú iñi ndo tuhun tsa tyaq ra, ¿nácaa cua tsinú iñi ndo tsa caahán yuhu? —catyí ra Jesús tsihin ra cuví ityí nuu tsihin ra Israel naha ra.

6

*Nu jacatsí ra Jesús uhun mil rayii
(Mt. 14.13-21; Mr. 6.30-44; Lc. 9.10-17)*

¹Tsa yaha yacan, tan cuahán ra Jesús inga tsyo miñi cahnu tsa nañí Ndutya Ñuhu Galilea. Tan juvin ñi nañí tucu tsi Miñi Tiberias. ²Cuaha xaan nyivi cuahán nyicun tsi ra tyin nyehé ñi tsa iyo tsa javahá ra tyin janduvahá ra tsi nyivi cuuhví. ³Tacan tan ra Jesús ndaaq ra iin yucu tan tsinyaa ra ican tsihin ra tsicá tsihin ra. ⁴Tan tsa cuyatyin cuii tahan tsi quívi vico pascua tsa jacaahnú nyivi Israel. ⁵Tan nyehe ra Jesús tyin cuaha xaan nyivi nyicún tsi ra, tacan tan quitsaha caahán ra tsihin ra Felipe:

—¿Numaa cua jata yo tsa catsi nyivi cuaha ihyá? —catyí ra tsihin ra.

⁶Caahán ñi maa ra tsihin ra Felipe tyin nducú cuhva ra tsi ra náa cua cahan ra, tyin tsa tsító maa ra Jesús náa cua javaha ra. ⁷Tacan tan nacahan ra Felipe tan catyí ra:

—Xuhun tsa quihin yo tsa jahá tyiñu yo tsa uvi cienu quívi, ndi ña cua cutahan can jata yo luxu tsa catsi nyivi ihyá —catyí ra Felipe.

⁸Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

—Ihya nyíi iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyivi ihyá —catyí ra Andrés.

¹⁰Tacan tan catyí ra Jesús tsihin ra naha:

—Cahan ndo tsihin tandíhi nyivi na cun-yeuc ñi —catyí ra.

Tan cuaha xaan itya ican tan tsinyecu ñi, uhun mil rayii, [tan siñi maa ñi ñaha tsihin tsa nyihil]. ¹¹Tacan tan quihin ra Jesús paan can tan tsa yahá tsahá ra tyahvi nyoo tsi Nyoo, tan tsahá ra can tsi ra tsicá tsihin ra. Tan ra can naha ra, tsahá ra naha can tsi tandíhi nyivi tsa nyecú can. Juvin ñi tacan ica nyico ra tsihin tyaca can. Tan tsatsí ndaha iñi ñi. ¹²Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihin vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

¹³Naquihin vaha ra naha can, tan jacutu ra naha utsi uvi tyica tsihin tsa ñahñu tsa ndoo tsa uhun taahan paan can. ¹⁴Tacan tan tsa yahá nyehe nyivi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihyá, juvin ra nyaá tsa quitsa maa nu ñuhu ñayivi ihyá —catyí ñi.

¹⁵Maa tyin tsa tuví ñi ra Jesús tyin cuñí ñi tsa quihin ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyii intuhun ñi maa ra.

Nu tsicá ra Jesús nu ndutya

(Mt. 14.22-27; Mr. 6.45-52)

¹⁶Tsa cunaaha, nuu ra tsicá tsihin ra Jesús yuhu miñi can. ¹⁷Tan quíhví ra naha tsitsi yutun ndoo tyin cua yaha sava ra naha mahñiñ miñi can tan cua tsaa ra naha ñuu Capernaum. Tsa cunaaha tan ra Jesús ñaha ca maa tsaa ra. ¹⁸Tacan tan tsaq tatyí ñihi. Tan iyo nduvitá ndutya miñi can. ¹⁹Tsa tsa yaha ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyin ra nu cuahán yutun ndoo can, nayuhví xaan ra naha. ²⁰Maa tyin catyí ra Jesús tsihin ra naha:

—¡Maa yu cuví, ña nayuhví ndo!

²¹Tacan tan tsaha ra naha quíhví ra Jesús tsitsi yutun ndoo can. Tan iin yaha ñi tsaa ra naha yuhu miñi nu cuahán ra naha.

Nu nanducú nyivi tsi ra Jesús

²²Tsa tuvi inga quívi tan tsito nyivi tsa ndoo inga tsyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha. ²³Maa tyin tsaa taahan ca yutun ndoo tsa quee ñuu Tiberias yatiñ ñi nu nacuhvá Jutu Mañi yo tyahvi nyoo tsi Nyoo tan tsatsí nyivi paan. ²⁴Tacan tan tsa nyehe nyivi tyin nduve ra Jesús tan ndi ra tsicá tsihin ra, quíhví ñi tsitsi yutun ndoo tsa tsaa tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayivi nyito coo yo

²⁵Tsa tsaa ñi inga tsyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaa un ihyá? —catyí ñi tsihin ra.

²⁶Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoho nanducú ndo tsi yu maa tyin ñavin cuenda tsa nyehe ndo tsa iyo tsa javahá yu. Nanducú ndo tsi yu tyin tsatsí ndo tan

ndaha iñindo. ²⁷Na jaha tysiñu ndo cuenda tunyee iñi tsa tsatsí ndo tsa cua ndihí ñi maa, jaha tysiñu ndo cuenda tunyee iñi tsa catsi ndo tsa ña cua ndihí tan tsahá tsi ñayivi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tavä tysiñu ra tsi yu tyin yuhu cuví Rayii tsa quee nda gloria —catyí ra Jesús.

²⁸Tacan tan quitsaha tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñí Nyoo? —catyí ñi.

²⁹Tacan tan catyí ra Jesús tsihin ñi:

—Tsa cuñí Nyoo javaha ndo, cuví tsa tsicuñu iñi ndo tsa caahán yuhu, ra tsa jaquitsi ra —catyí ra Jesús tsihin ñi.

³⁰Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsicuñu iñi ndi tsa caahán un? ³¹Tsii tsahnu ndi tsatsí ñi maná nu tsiquí, tumaa tsa caahán tuhun Nyoo tyehen: “Andívi quee paan tsatsí nyivi jaha Nyoo” —catyí ñi tsihin ra Jesús.

³²Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsaha paan tsa quee andívi tsatsí ñi, tyin maa Nyoo Jutu yu cuví ra tsahá paan nditsa tsa quee andívi. ³³Tyin paan tsa tsahá Nyoo, yacan cuví ra tsa quee andívi. Tan juvin ra cuví ra tsahá ñayivi nyito coo nyivi iyó nu ñuhu ñayivi —catyí ra Jesús.

³⁴Tacan tan quitsaha catyí ñi tsihin ra:

—Taa, cuhva paan can catsi ndi tandihí ñi quivi —catyí ñi.

³⁵Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyivi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ity iñi ñi. ³⁶Maa tyin tumaa tsa caahán yu tsihin ndo, nyehé vaha ndo tsi yu, maa tyin ña cuñí ndo tsinú iñi ndo tyin juvin yu cuví ra tsa cuví jatyinyee tsi ndo ³⁷Tandihí nyivi tsa tsaha Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. ³⁸Tyin yuhu tsa quee andívi; vatsí yu vatsí javahá yu cuhva cuñí ra tsa jaquitsi tsi yu. Ña vatsí yu vatsí javaha yu cuhva cuñí ñi maa yu. ³⁹Tan cuhva cuñí ra tsa jaquitsi tsi yu, yacan cuví tsehe: tsa ña cunaa ndi intuhun nyivi

tsa tsahá ra tsi yu, tan janandoto yu tsi ñi nu cua cundihí quivi. ⁴⁰Jutu yu, ra tsa jaquitsi tsi yu, cuñí ra tyin tandihí nyivi tsa cutuñi iñi tyin Sehe Nyoo cuví tsi yu, tan tsicuñi iñi tsa caahán yu, cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihí quivi —catyí ra Jesús tsihin ñi.

⁴¹Tsa cuenda tsa cahán ra Jesús yacan, tan quitsaha caahán nyaa nyivi Israel tsi ra tyin catyí ra: “Yuhu cuví paan tsa quee andívi”, catyí ra. ⁴²Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andívi quee ra? —catyí ñi.

⁴³Tacan tan catyí ra Jesús tsihin ñi:

—Jandihí ndo tsa caahán nyaa ndo. ⁴⁴Yoñi maa nyivi cuví quitsi quitsi nyicún tsi yu tatuñi ñavin Jutu yu, ra tsa jaquitsi tsi yu, caná tsi ñi. Tan cua janandoto yu tsi ñi nu cua cundihí quivi. ⁴⁵Nu libru tsa tyaa ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyivi” catyí tsi. Yacan cuenda nyivi tsa tyaa soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶’Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehé tsi ra. Tan juvin yu cuví ra tsa quee nu nyaá ra. ⁴⁷Tsa nditsa catyí yu tsihin ndo tyin nyivi tsa tsinú iñi tsa caahán yu tsa iyó ñi ñayivi nyito tsa ña cua naa maa. ⁴⁸Yuhu cuví paan tsa tsahá tsa coo nyito añima ñi. ⁴⁹Tsii tsahnu ndo tsatsí ñi maná nu tsiquí, maa tyin juvin ñi tsihí ñi. ⁵⁰Maa tyin yuhu, tuhun paan tsa quee andívi caahán yu tsihin ndo, tyin nyivi tsa cua catsi paan can, ña cua cíu ñi. ⁵¹Juvín ñi maa yu cuví paan nyito tsa quee andívi. Nyivi tsa cua catsi paan ihya ña cua cundihí tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihí nyivi iyó nu ñuhu ñayivi —catyí ra Jesús tsihin ñi.

⁵²Tacan tan nyivi Israel can quitsaha natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³Tan catyí ra Jesús:

—Tsa nditsa catyí yu tsihin ndo, tyin yuhu cuví Rayii tsa quee nda gloria, tan tatum nyoho tan ña cua catsi ndo cuñu ñuhu yu, tan ña coho ndo niñi yu, ña cuvi coo ndo ñayivi nyito. ⁵⁴ Nyivi tsatsí cuñu ñuhu yu tan tsihí ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsí ñi nu cua cundíhi quivi. ⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. ⁵⁶ Nyivi tsatsí cuñu ñuhu yu tan tsihí ñi niñi yu, iin ñi cuví ñi tsihin yu. Tan iin ñi cuví yu tsihin ñi. ⁵⁷ Jutu yu, ra tsa jaquitsí tsi yu, Nyoo nyito cuví ra. Tan yuhu iyó yu tsihin tunyee iñi ra. Tan juvin ñi tacan tucu nyivi tsatsí cuñu ñuhu yu, cua coo ñi tsihin tunyee iñi tsa iyó tsi yu. ⁵⁸ Tuhun paan tsa quee andiví caahán yu. Paan ihyá ñavin tumaa maná tsa tsatsí tsii tsaa hnu yo cuví tsi, tyin juvin ñi tsihí ñi. Nyivi tsatsí paan tsa cuví cuñu ñuhu yu, ña cua cundíhi maa tsa coo ñi —catyí ra Jesús.

⁵⁹ Juvín yacan jacuahá ra Jesús nu ndu ijin nyivi tsitsi vehe ñuhu ñuu Capernaum.

⁶⁰ Cuaha xaan nyivi nyicún tsi ra Jesús. Tan cuhva tsa tsíñi ñi yacan catyí ñi:

—Tuhun tsa caahán ra ihyá, yíi xaan naquihin vaha yo itsi. Yoñi maa cua tsinu iñi tsa caahán ra —catyí ñi.

⁶¹ Tacan tan tuví iñi ra Jesús tyin ña cuñi ñi naquihin ñi tsa caahán ra. Tan tsica tuhun ra tsi ñi:

—¿A ndasi cuñi ndo tsa caahán yu ihyá? ⁶² Tan ñnáa cua javaha ndo tatum nyehe ndo tsi yuhu Rayii tsa quee nda gloria nandaa nyico yu inga tsaha ityi nu quee yu? ⁶³ Tatyí Ii Nyoo tsahá ñayivi nyito. Tan cuñu ñuhu, ña jatyinyé tsi tsa coo yo ñayivi can. Tan tsa caahán yuhu tsihin ndo, Tatyí Ii Nyoo cuví tsi tan tsahá tsi tsa coo nyító añaima ndo. ⁶⁴ Maa tyin yiñi ndo ña tsinú iñi ndo tsi yu —catyí ra Jesús.

Tyin nda quivi jihna tan tsa tsító maa ra yóo ña cua tsinú iñi tsi ra tan yóo cua xico tsi ra. ⁶⁵ Tan catyí ra:

—Yacan cuenda catyí yu tsihin ndo tyin yoñi nyivi cuví quitsi nyicún tsi yu tatum ñavin maa Nyoo Jutu yu caná tsi ñi —catyí ra Jesús.

⁶⁶ Nda quivi can, tan cuaha xaan nyivi nyicún tsi ra Jesús nacoq ñi tsi ra. Tan ña tsicá ca ñi tsihin ra. ⁶⁷ Tacan tan tsicá tuhun

ra Jesús tsi tsa utsi uvi ra tsicá tsihin ra, tan catyí ra:

—¿A cuñi ndíhi tucu nyoho cuhun ndo? —catyí ra tsihin ra naha.

⁶⁸ Maa tyin nacahan ra Simón Pedro tan catyí ra:

—Jutu Mañi yu, ¿yóo cunyicun ndi? Tan intuhun ñi maa un caahán tuhun ñayivi nyito tsa ña cua naa maa. ⁶⁹ Nyuhu tsinú iñi ndi, tan tsító ndi tyin yooho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsi tsi tandíhi tsa utsi uvi ndo? Tan intuhun ndo yiñi nu ñava —catyí ra.

⁷¹ Tuhun tsa caahán ra Jesús ihyá, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan iñi tsi ra, vasu iin ra tsa utsi uvi can cuví ra.

7

Nu ña tsinú iñi yañi ra Jesús tsi ra

¹ Tsa yahá yacan, tan nyíi ra Jesús tsicá nuu ra nu cuví Galilea. Ña cuñi ra cuhun ra nu cuví Judea tyin ra cuví ityi nuu tsihin nyivi Israel can naha ra cuñi ra naha cañi ra naha tsi ra. ² Tan tsa cuyatayin quivi vico tsa jacahnú nyivi Israel ndíhi ñi cuiya. Tan nañí tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihyá. Cuaahan Judea tyin nyivi nyicún tsi un tsa iyó ndacan nyehe ñi tuiñu javahá un. ⁴ Tyin tatum cuñi yo tsa coto nyivi tsi yo, ña javahá xeehe yo tsa javahá yo. Tan yooho tatum nditsa tsa javahá un, javaha can nuu tandíhi nyivi —catyí tandíhi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra.

⁶ Tacan tan catyí ra Jesús tsihin ra naha:

—Ñaha ca tsaa hora tsa cuhun yuhu. Maa tyin nyoho ndáa quivi ñi cuví cuhun ndo. ⁷ Tyin vaha cuñi nyivi nyehé ñi tsi ndo, maa tyin yuhu ndasi cuñi ñi nyehé ñi tsi yu tsa cuenda tyin caahán catsi yu tsihin ñi tyin ña vaha tsa javahá ñi. ⁸ Cuaahan nyoho vico can. Yuhu ña cuhun yu tyin ñaha ca tsaa hora tsa taahán tsi cuhun yu —catyí ra.

⁹ Yahá can tan ndoo ra nu cuví Galilea.

Nu nyíi ra Jesús nu iyó vico Tyahva

¹⁰Tsa yahā cuahán yañi ra Jesús vico can, tsahan cuahán ndihí ra, maa tyin cuahán xeehe ñi ra. ¹¹Tan ra cuví ity i nuu tsihin nyíví Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíví ra can? —catyí ra naha.

¹²Tan caahán nyíví yucú vico can tuhun ra. Yihí ñi catyí ñi: “lin ra vaha cuví ra.” Tan inga ñi catyí ñi: “Ña vaha ra, jandaví ñaha ra tsi nyíví”, catyí ñi.

¹³Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ity i nuu can naha ra.

¹⁴Tsa cusava iyó vico tan tsaā ra Jesús tsitsi vehe ñuhu cahnu tan quitsaha jacuaha ra tsi nyíví. ¹⁵Tan ra cuví ity i nuu can iyó cuñí ra naha tan quitsaha natuhun tahan ra naha:

—¿Nacaa tyin tsító ra ihyá tan ña cahvi ra? —catyí ra naha.

¹⁶Tan nacahan̄ ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsī tsi yu cuví tsi. ¹⁷Tatun yihī nyoocho tsa cuñí jacuahá cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. ¹⁸Nyíví tsa caahán cuenda maa ñi, caahán ñi tyin cuñí ñi tsa jacahnu nyíví tsi ñi. Maa tyin ra nducú tsa jacahnu nyíví tsi Nyoo, ra tsa jaquitsī tsi ra, ra ican caahán tsa nditsa. Tan ña jandaví ñaha ra.

¹⁹—¿A ña nditsa tyin ra Moisés tsahá̄ ra ley tsi ndo? Maa tyin ndi intuhun nyoocho tan ña tyá yahvi ndo ley can. ¿Nacuenda cuñí ndo caññi ndo tsi yu? —catyí ra.

²⁰Tan nacahan̄ nyíví tan catyí ñi tsihin ra:

—Tatyí ña vaha yihī tsi yooho. Yoñi cuñí caññi tsi un —catyí ñi tsihin ra.

²¹Tan catyí ra Jesús:

—Tsacaytī tsa javahá yu tsa iyo quíví quietu yo, yacan ndasí cuñí ndo nyehé ndo tsi yu. ²²Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yiñ ndo. Vasu ñavin ra quitsaha tsihin tuhun can, maa tyin nyíví cuví nyíví ra ity tsata, jihna ca ñi javahá tacan. Yacan cuenda javahá ndo can vasu taahán tsi quíví quitatu yo. ²³Tan vityin, vaha tatum tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu

quíví quitatú yo cuví. Maa tyin tatum tacan javahá ndo, ¿nacuenda tyin cuxaan ndo tsi yu tsa janduvahá yu tsi ra can quíví quitatú yo? ²⁴Ña tyaa ndo cuatyí siquí nyíví tatum ña tsító vaha ndo náa javahá ñi. Cuatyí ndo nda nyehe vaha ndo, tacan tan coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahan̄ ra Jesús tuhun maa ra

²⁵Tacan tan juhva nyíví iyó Jerusalén, quitsahā tsicá tuhun ñi:

—¿A ñavin ra ihyá nanducú xaan ra naha tyin cua cahñi ra naha tsi ra? ²⁶Caahán nditsin ra tsihin nyíví. Tan yoñi caahán náa caahán tsihin ra. Vasiquí tsinú ndihí maa iñi ra cuví ity i nuu naha ra tyin juvin ra ihyá cuví ra Cristo ra cuví rey tsa jaquitsi Nyoo. ²⁷Yoo tsító vaha yo nu queē ra ihyá, tan quíví quitsī ra Cristo yoñi maa cua coto numaa ity i cuá queē ra —catyí ñi.

²⁸Ra Jesús nyíví ra tsitsi vehe ñuhu jacuahá ra, tan tsító ra tsa natuhún nyíví, yacan cuenda ñihí cahán̄ ra tan catyí ra:

—¡Nyoocho cuñí maa ndo tyin nacotó ndo tsi yu tan tsító ndo numaa queē yu! Maa tyin yuhu ña vatsí yu cuenda maa yu. Yuhu vatsí yu cuenda ra tsa jaquitsī tsi yu, ra tsa cuví tsa nditsa. Nyoocho ña nacotó ndo tsi ra. ²⁹Yuhu nacotó yu tsi ra tyin cuenda ra vatsí yu, tan maa ra jaquitsī tsi yu —catyí ra Jesús.

³⁰Tacan tan cuñí ra naha tyilí ra naha tsi ra tsitsī vehe caa. Maa tyin ndi intuhun ra naha tan ña caná iñi ra naha tiñ̄ ra naha tsi ra tsa cuenda tyin ñaha ca tahan̄ tsi quíví tsa taahán maa tsi tiñ̄ ra naha tsi ra. ³¹Maa tyin cuaha xaan nyíví tsing iñi tsi ra. Tan catyí ñi:

—Ra ihyá cuví ra Cristo. ¿A cuaha ca tsa iyo cua javaha inga ra tatum quitsī ra tan ñavin ca ra ihyá? —catyí ñi.

Nu jacuhun̄ ra cuví fariseo naha ra tsi ra vitya tiñ̄ tiñ̄ ra naha tsi ra Jesús

³²Tsa tsiní̄ ra fariseo naha ra tsa caahán nyíví tuhun ra Jesús, maa ra naha tan ra cuví ity i nuu tsihin ra jutu naha ra, jacuhun̄ ra naha vitya cuenda vehe ñuhu, na tiñ̄ ra naha tsi ra Jesús. ³³Tacan tan catyí ra Jesús:

—Juhva cuií ña quíví cua cunyaa yu tsihin ndo. Yahá can tan cuacunuhu yu nu nyaá̄ ra tsa jaquitsī tsi yu. ³⁴Nyoocho cua nanducu ndo tsi yu. Maa tyin ña cua nañhi

ndo tsi yu. Tyin ña cua cuvi cuhun ndo nu cua cunyaa yu —catyí ra Jesús.

³⁵ Tacan tan quitsahá natuhún tahan ra cuví ity nuu tsihin nyíví Israel naha ra:

—¿Numaa cua cuhun ra ihyá tsa ña cua nañíhi yo tsi ra? ¿A cuhun ra nu iyó ra Israel ñuu Grecia naha ra tyin jacuahára tsi nyíví iyó Grecia can? ³⁶ ¿Náa cuví tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañíhi ca ndo tsi yu tyin ña cua cuvi cuhun ndo nu cua cunyaa yu”—tacan caahán yuhu tahan ra naha tuhun ra Jesús.

Nyíví tsinú iñi tsi Nyoo cua coo Tatyi li ra añima ñi

³⁷ Quíví ndíhi tsicoó vico, yacan cuví quíví tsa ñiñi ca. Tan quíví can nduvita ra Jesús tan ñíhi caahán ra tan catyí ra:

—Tatun ndáa nyoho na ityi iñi ndo, naha ndo tan tsinú iñi ndo tsa caahán yu.

³⁸ Tyin nyíví tsa tsinú iñi tsa caahán yu, cuna ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuví ra catyí ra tyin ñi tsinú iñi tsi ra cua ñíhi ñi Tatyi li Nyoo, tyin quíví can ñaha ca quitsi Tatyi li Nyoo tyin ra Jesús, ñaha ca cunuhu ra nda gloria nu cua jachahu Jutu ra tsi ra.

Nu natahví sava nyíví tsa cuenda ra Jesús

⁴⁰ Juhva nyíví tsa tsinú yacan, catyí ñi:

—Nditsa tsa cuii tyin ra ihyá cuví ndusu yuhu Nyoo tsa nyaá tsa cua quitsi —catyí ñi.

⁴¹ Tan inga ñi catyí ñi:

—Ra icán cuví ra Cristo ra tsa jaquitsi Nyoo —catyí ñi.

Maa tyin inga nyivi catyí ñi:

—¿Nácaa tyin ra Galilea cua cuvi ra Cristo? ⁴² Tyin nu tutu Nyoo catyí tsi tyin ra Cristo cua cuvi ra nyíví tata ra rey David, tan ra ñuu Belén tsa canyíí nu cuví Galilea cua cuvi ra, tumaa ra David —catyí ñi.

⁴³ Tacan tan nyíví can natahví sava ñi tsa cuenda ra Jesús. ⁴⁴ Yíhí ñi cuñí ñi quihin ñi tsi ra tan tysihi ñi tsi ra tsitsi vehe caa. Maa tyin yoñi tñiñ tsi ra.

Ra cuví ity nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuví ity nuu tsihin

ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¡Ndi intuhun tsaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandaví ñaha ndíhi ra can tsi ny-

oooh? ⁴⁸ Nyehé ndo tyin ndi intuhun ra cuví ity nuu tsihin ndi, tan ra cuví fariseo naha ra, tan ña tsinú iñi ra naha tsi ra can. ⁴⁹ Maa ñi maa nyíví ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahan nu nyíví ra Jesús tsa tsacuaa, cuví ndíhi tucu ra fariseo, tan catyí ra tsihin ra naha:

⁵¹ —Catyí ley tyin ña cuví tatsi tuñi yo tsi iin nyíví tatuñ naha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

⁵² Tacan tan nacahan ra naha tan catyí ra naha tsihin ra:

—¿A juvin ñi ra Galilea cuví ndíhi tucu yooho? Cähvi nu tutu Nyoo tan nyehé un, tyin ndi intuhun ra cuví ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Naha tsa quituví tsihin rayii tsa ñavin yií ña cuví

⁵³ Tacan tan cuanuhu intuhun intuhun ra naha nda yuvehe ra naha.

8

¹ Maa tyin ra Jesús cuahán ra yucu Olivo.

² Tsa conditsin inga quíví, cuahán nyico ra Jesús inga tsaha vehe ñuhu cahnu. Tan tandíhi nyíví natuhvá ñi nu nyíví ra. Tan tsinyáa ra tan quitsahá caahán ra tsihin ñi.

³ Tacan tan ra jacuahá ley vehe ñuhu tan ra cuví fariseo naha ra tsaa ra naha tsihin iin ñaha iyó yií tyin tñiñ ra naha tsi ña nu tsicoó cuayti ña tsihin inga rayii. Tan tyaa ra naha tsi ña mahñu nyíví tsa nyecú can.

⁴ Tan quitsahá catyí ra naha tsihin ra Jesús:

—Maestro, tñiñ ndi tsi ñaha ihyá nu tsicoó cuayti ña tsihin inga rayii. ⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nácaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí siquí ra. Tacan tan tsinyaá tyayíi ra Jesús nu ñuhú tan quitsaha tyaá ra letra nu ñuhú tsihin nundaha ra.

⁷ Maa tyin nducú tuhun ca ra naha tsi ra, tacan tan nduvitá nyityi ra tan catyí ra tsihin ra naha:

—Nyoho tsa nduve cuatyí jihna ca ndo quihin yuu tan cañí ndo tsi ña —catyí ra tsihin ra naha.

⁸ Tan tsinyaá tyayíi nyico ra tan quitsaha jañihí ca ra tyaá ra letra nu ñuhú. ⁹ Tsa tsíñi ra naha tsa caahán ra tacan, tuyí iñi ra naha tyin iyó tucu cuatyí maa ra naha. Tan quitsaha quitá intuhun intuhun ra naha, jihna ca ra tsahnu naha ra quita. Cuhva tsa ndihí ra naha quita cuahán tan ndoo intuhun ña maa ra Jesús tsihin ñaha can mahñú nu nyecú nyiyí can. ¹⁰ Tacan tan nduvitá nyityi ra Jesús tan nyehé ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaá cuatyí siquí un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahan ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyiyí

¹² Tacan tan cahán nyico ra Jesús tsihin nyiyí inga tsaha, tan catyí ra tsihin ñi:

—Yuhu cuví ra tsa jandunditsín añima nyiyí iyó nu ñuhu ñayivi. Yóo nyiyí tsa nyicún tsi yu, cua coo ñi iin ñayivi nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuví fariseo naha ra catyí ra naha tsihin ra:

—Yoho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahan ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsító yu numaa ityi quee yu tan numaa ityi cua cuhun yu. Maa tyin nyoho ña tsító ndo numaa ityi quee

yu tan numaa ityi cua cuhun yu. ¹⁵ Nyoho yati yaan caahán ndo tsa caa nyivi. Maa tyin yuhu, ña caahán yu tsa caa ñi. ¹⁶ Tyin tatuñ cahan yu tsa caa nyivi, tsa nditsa cua cahan yu. Tyin ñavín intuhun ñi maa yu nyehé tsa iyó añima ñi, tyin Jutu yu ra tsa jaquitsi tsi yu, ra ican nyehé iin caa ñi tsihin yu. ¹⁷ Nu ley nyoho nyaá tyin tatuñ uvi ra tsahá tsa ndaa, cuñí tsi tsinú iñi yo tsa caahán ra naha. ¹⁸ Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsi tsi yu, cuví inga tsa ndaa —catyí ra Jesús tsihin ra naha.

¹⁹ Tacan tan tsicá tuhun ra naha tsi ra:

—¿Numaa nyiyí jutu un?

Tan catyí ra Jesús:

—Nyoho ña tsító ndo tsi yuhu. Tan ndi Jutu yu tan ña tsító ndo. Tun tsatinyin tsító ndo tsi yu, coto ndihí ndo tsi Jutu yu —catyí ra.

²⁰ Tuhun ihyá cahan ra Jesús tsitsi tsa jacuahá ra tsitsi vehe ñuhu cahnu, nu nyí caja nu tyihí nyiyí xuhun. Maa tyin yoñi tyihí tsi ra vehe caa, tyin ñaha ca tahan tsi quíví tsa taahán tsi cuhun ra.

“Nu cuhun yuhu ña cua cuví cuhun ndo”, catyíra Cristo

²¹ Tacan tan quitsaha caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan cua nanducu ndo tsi yu, maa tyin cua cúu ndo tan cua ndoo cuatyí ndo siquí ndo. Tyin nu cua cuhun yuhu, nyoho ña cua cuví cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuví cuhun yo nu cuahán ra —catyí ra naha.

²³ Tacan tan catyí ra Jesús:

—Nyoho ra cuenda nu ñuhu ihyá cuví ndo. Maa tyin yuhu nda ityi siquí quee yu. Nyoho cuenda ñuhu ñayivi ihyá cuví ndo. Maa tyin yuhu ñayivi cuenda nu ñuhu ñayivi ihyá cuví yu. ²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siquí ndo. Tyin tatuñ ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siquí ndo quíví cúa ndo —catyí ra Jesús tsihin ra naha.

²⁵ Tacan tan quitsaha tsicá tuhun ra naha tsi ra, tan catyí ra naha:

—¿Yóo ra cuví yoho?

Nacahan̄ ra Jesús tan catyí ra:

—Tsa yaha cahan̄ yu tsihin ndo nda quiví jihna. ²⁶ Cuaha xaan̄ ca tsa ndi cumañi cahan̄ yu tsihin ndo, tan ndi cumañi cahan̄ yu cuhva iyó ndo. Maa tyin tsa caahán yu tsihin nyíví iyó nu ñihu ñayíví, cuví tsi tsa tsíñi yu tsa caahán ra tsa jaquitsí tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñi iñi ra naha tatum tuhun Nyoo Jutu yo cahan̄ ra tsihin ra naha. ²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayiñ tsa quee nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu jahá yu can, maa tyin caahán yu tsa janahá Jutu yu tsi yu. ²⁹ Tyin Jutu yu, ra tsa jaquitsí tsi yu, nyíví ra tsihin yu. Tan ña nacoó ra tsi yu tsa maa ñi maa yu. Tyin yuhu jahá yu maa ñi maa cuhva cuñí ra —catyí ra Jesús.

³⁰ Tsa cahan̄ ra Jesús yacan, cuaha xaan̄ ra naha quitsahá tsinú iñi tsi ra.

Nyíví cuví sehe Nyoo tan nyíví jahá tsa caquiñi

³¹ Tacan tan catyí ra Jesús tsihin nyíví Israel, tsa quitsahá tsinú iñi tsi ra:

—Tatum nyoho tan jañili ca ndo tyaa yahvi ndo cuhva jacuahá yu tsi ndo, cua tsaa ndo cuvi ndo nyíví tsa nditsa yiñi cuenda yu. ³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahan̄ ra naha tan catyí ra naha:

—Nyuhu nyíví tata ra Abraham cuví ndi. Ndi iin tsaha tan ñaha ca cuvi ndi musu nyíví. ¿Nacaa tsa catyí yooho tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandíhi nyíví jahá tsa caquiñi, musu cuenda tsa caquiñi cuví ñi. ³⁵ Iin musu ñia ndoo cuui ra vehe tsitoho ra. Maa tyin ra cuví sehe tsitoho vehe can, ndoo cuui ra vehe jutu ra. ³⁶ Yacan cuenda tatum yuhu tsa cuví yu Sehe Nyoo tan jacacu yu tsi ndo, tsa nditsa cuui tyin ñia cua cundaca ñaha ca tsa ñia vaha tsi ndo. ³⁷ Tsa tsitó yu tyin tata ra Abraham cuví ndo. Maa tyin yiñi ndo cuñí ndo cahñi ndo tsi yu, tyin ñia naquihín vaha ndo tsa caahán yu. ³⁸ Yuhu caahán yu tsa

janahá Jutu yu tsi yu. Tan nyoho jahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahan̄ ra naha tan catyí ra naha:

—Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatayin nditsa tsa tata ra Abraham cuví tsi ndo, cua jahá ndo tsa jahára. ⁴⁰ Maa tyin nyoho, vasu caahán yu tsihin ndo tsa nditsa tsa janahá Nyoo tsi yu, nyoho cuñí ndo cahñi ndo tsi yu. ¡Ra Abraham ña jahára tacan! ⁴¹ Nyoho jahá ndo tumaa jahá jutu ndo —catyí ra tsihin ra naha.

Tacan tan nacahan̄ ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatayin nditsa tyin Nyoo cuví jutu ndo, cua cuñí ndo tsi yu. Tyin yuhu quee yu nu nyaá ra tan tsaa yu ihyá. Ña vatsí yu cuenda maa yu, tyin maa Nyoo jaquitsí tsi yu. ⁴³ ¿Nacaa tsa cutuñi iñi ndo tsa caahán yu tsihin ndo? Tsa cuenda tyin ña cuñí ndo tyaa soho ndo tsa caahán yu.

⁴⁴ Cuihna cuví jutu ndo. Tan sehe nu tsi ndo. Tan cuñí ndo jahá ndo cuhva cuñí nu. Tan nu ña vaha can cuví nu tsahñi nyíví nda quiví jihna. Tan ña jahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyíví tyin cuñí nu tsa coo ñi cuhva iyó nu tyin vatya xaan̄ nu. Tan jutu nyíví vatya cuví nu. ⁴⁵ Tan yuhu caahán yu tsa nditsa, maa tyin nyoho ña tsinú iñi ndo tsa caahán yu. ⁴⁶ ¿Ndáa nyoho tan cuví janahá ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú iñi ndo tsi yu? ⁴⁷ Nyíví cuenda Nyoo tyáa soho ñi tuhun caahán ra. Maa tyin nyoho ñavin nyíví cuenda Nyoo cuví ndo, yacan cuenda ña cuñí ndo tyaa soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tsihin ra:

—⁴⁸A ña nditsa tyin yooho ra ñuhu Samaria cuví un, tan yihi tatyi ña vaha tsu un? —catyí ra naha tsihin ra.

⁴⁹Tan nacahan̄ ra Jesús tan catyí ra:

—Nduve tatyi ña vaha yihi tsi yuhu. Tsi Jutu yu jacaahnú yu. Tan nyoho caahán ndo ndavaha ñi tsi yu. ⁵⁰Yuhu ña nducú yu tsa jacobnu nyivi tsi yu, maa tyin iyó in ra nanducú tsa jacobnu ñi tsi yu. Tan maa ra cua jandaa cuatyi ndo tatuñ ña jacobnu ndo tsi yu. ⁵¹Tsa nditsa catyí yu tyin nyivi tsa tyáyahvi tsa caahán yu ña cua tsaa tuhun tsiihí añima ñi —catyí ra Jesús tsihin ra naha.

⁵²Tacan tan nacahan̄ ra Israel can naha ra tan catyí ra naha:

—Vityin tsitó vaha ndi tyin yihi tatyi ña vaha tsi un. Tyin ra Abraham tan tandíhi ca ra cuví ndusu yuhu Nyoo tsihí ra naha. Tan yoho catyí un tyin nyivi tyáyahvi tsa caahán un ña cua cíu ñi. ⁵³¿A cahnu ca ra cuví yoho tan ñavin ca ra Abraham jutu yo? Maa ra tsihí ra tan tacan tucu ra cuví ndusu yuhu Nyoo. ¿Yóo ra cuví yoho cuñí maa un? —catyí ra naha tsihin ra.

⁵⁴Tan nacahan̄ ra Jesús tan catyí ra:

—Tatun juvin ñi maa yu jacobnu tsi yu, nduve yahvi nyaá yakan. Maa tyin ra jacobnu tsi yu, juvin ra cuví Jutu yu. Tan juvin ra cuví ra tsa caahán nyoho tuhun tyin Nyoo ndo cuví tsi ra. ⁵⁵Maa tyin ña nacotó ndo tsi ra. Tan yuhu, nacotó yu tsi ra. Tun tsatayin catyí yu tyin ña nacotó yu tsi ra, cuví yu in ra vatya tumaa nyoho. Maa tyin yuhu nditsa tsa nacotó yu tsi ra, tan tyáyahvi yu tsa caahán ra. ⁵⁶Ra Abraham tsii tsaahnu yo sií xaan cuñí ra tyin cua nyehe ra quívi cua quitsi yuhu nu ñuhu ñayivi. Nyehe ra quitsi yu tan sií xaan cuñí ra —catyí ra Jesús tsihin ra naha.

⁵⁷Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸Tan nacahan̄ ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

⁵⁹Tacan tan quihin ra naha yuu tyin cua cañi ra naha tsi ra Jesús. Maa tyin in yaha ñi quihví xeehe ra tan yahá ra mahñu

ra naha tan quitá ra tsitsi vehe ñuhu can cuahán ra.

9

Nu janduvahá ra Jesús tsi iin ra cuaa nda cacu ra

¹Cuhva tsa yahá ra Jesús iin nu yahá ra, nyehe ra tsi iin ra cuaa nda cacu ra. ²Tan quitsahá tsicá tuhun ra tsicá tsihin ra tsi ra:

—Maestro, ¿nacuvi tyin cuaa ra ihya cacu ra? ¿A tsa cuenda cuatyi jutu ra tan sihi ra, o tsa cuenda cuatyi maa ra? —catyí ra naha tsihin ra.

³Tan nacahan̄ ra Jesús tan catyí ra:

—Ñavin tsa cuenda cuatyi maa ra, tan ndi ñavin tsa cuenda cuatyi jutu ra tan sihi ra. Cuaa maa ra tyin tacan tan cuví janaha Nyoo tunyee ñi ra tsi nyivi tsa cuenda ra can. ⁴Tsa tsinu cahñi, cuñí tsi tsa javaha yu tyiñu ra tsa jaquitsi tsi yu. Tyin tsa yatyin cuui cua cuaa tan ña cua cuvi ca jaha tyiñu yo. ⁵Tsa ndi nyivi yu nu ñuhu ñayivi ihya, ñuhu jandunditsín [cuenda nyivi iyó] nu ñuhu ñayivi ihya cuví yu.

⁶Tsa yahá tsa cahñan̄ ra Jesús tacan, tan tiví sií ra nu ñuhu. Tan jatyií ra luxu nyahu tsihin sií ra tan tyaqá ra tinuu ra cuaa can.

⁷Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sívi can cuñí tsi catyí: “Jacuhún Yu Tsí Un.”

Tacan tan ra cuaa can tsahan̄ ra tsinacatya ra nuu ra. Tan cuhva tsa tsaa nyico ra, tsa nyehe ra. ⁸Tacan tan nyivi iyó yatyin yuvehe ra, tan nyivi tsa nyehe tsi ra tsa ndi cuaá ra catyí ñi:

—¿A ñavin ra ihya cuví ra tuhvá tsinyaá tsicán xuhun? —catyí ñi.

⁹Tan yihi ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰Tacan tan quitsahá tsicá tuhun ñi tsi ra:

—¿Tan nácaa tyin cuví nyehe un vityin? —catyí ñi.

¹¹Tan catyí ra:

—Ra tsa nañí Jesús, ra ican jatyií nyahu tan tyaqá ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan̄ yu. Tan tsa yahá

nacatya yu nuu yu tan nanyehe yu —catyí
ra tsihin ñi.

¹²Tacan tan quitsaha tsicá tuhun ñi tsi ra:
—¿Tan numaa nyíi ra can vityin?
Tan catyí ra tsihin ñi:
—Ña tsító yu —catyí ra.

*Nu janahma ra cuví fariseo naha ra tsi ra
cuaq tsa nduvahá*

¹³Tacan tan tsindaca ñi tsi ra tsa nduvahá
can nuu ra cuví fariseo naha ra.¹⁴Tyin quiví
tsa jatyíi ra Jesús nyahyu tan janduvahá
ra tsi ra can, cuví tsi quiví quitatú nyivi.¹⁵Yacan cuenda ra cuví fariseo naha ra tsica
tuhun nyíco ra naha tsi ra nácaa tyin nyehe
ra. Tan catyí ra tsihin ra naha:

—Tyaa ra nyahyu tinuu yu, tan nacatya
nuu yu tan vityin nditsin nyehe yu —catyí
ra tsihin ra naha.

¹⁶Tacan tan catyí juhva ra fariseo naha ra:

—Ra tsa javahá yacan ñavin cuenda
Nyoo cuví ra, tyin ña tyaá yahvi ra quiví
quitatú yo —catyí ra naha.

Maa tyin catyí inga ra naha

—¿Nácaa tsa cuví javahá ra tsa iyo ihyá
tatun ra iyó cuatyí cuví ra? —catyí ra naha.

Tan siín siín tsa caahán ra naha. Tan
natahvíi sava ra naha.¹⁷Tan tsicá tuhun
nyíco ra naha tsi ra nduvahá can inga tsaha,
tan catyí ra naha tsihin ra:

—¿Tan yooho, náa catyí un tuhun ra tsa
janduvahá tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu
Nyoo cuví ra —catyí ra.

¹⁸Maa tyin ra cuví ityi nuu tsihin nyívi
Israel ña cuní ra naha tsinu ñi ra naha tsa
cuaq ra can tan nanyehe ra. Nda cuanda
cana ra naha tsi jutu ra tan tsi sihi ra.¹⁹Tan
tsicá tuhun ra naha tsi ñi, tan catyí ra naha:

—¿A ra ihyá cuví sehe ndo tsa catyí ndo
tyin cuaá ra cacu ra? ¿Nácaa tsa cuví nyehe
ra vityin? —catyí ra naha.

²⁰Nacahan jutu ra tan sihi ra tan catyí ñi:

—Tsító ndi tyin ra ihyá cuví sehe ndi.
Tan cuaa ra quiví cacu ra.²¹Maa tyin ña
tsító ndi nácaa tsa cuví nyehe ra vityin. Tan
ndi ña tsító ndi yóo janduvahá tinuu ra.
Ndaca tuhun maa ndo tsi ra. Tsa iyó tucu
maa cuiya ra. Tan cuví nacatyí tuhun maa
ra tsihin ndo —catyí ñi tsihin ra naha.

²²Jutu ra tan sihi ra caahán ñi tacan tsa
cuenda tyin yuuhví ñi tsi ra cuví ityi nuu
tsihin nyívi Israel naha ra, tyin tsa natuhún

tahan ra naha tyin cua tava cuii ra naha tsi
nyívi vehe ñuhu, tun cahan ñi tyin ra Jesús
cuví ra Cristo, ra tsa jaquitsi Nyoo.²³Yacan
cuenda catyí ñi: “Ndaca tuhun ndo tsi maa
ra. Ra tsa ñihí cuví ra.”

²⁴Tacan tan cana nyíco ra naha tsi ra tsa
nduvahá can inga tsaha. Tan catyí ra naha
tsihin ra:

—Nda nuu Nyoo cahan tsa nditsa tsihin
ndi. Tyin nyuhu tsító ndi tyin ra ican, ra iyó
cuatyí cuví ra —catyí ra naha.

²⁵Tacan tan nacahan ra tsa nduvahá can
tan catyí ra:

—Yuhu ña tsító yu tatum ra iyó cuatyí
cuví ra, a ñavin. Intuhun ñi tsa tsító yu
tum yuhu ra cuaa cuví yu, maa tyin vityin
nditsin nyehe yu —catyí ra.

²⁶Tan tsicá tuhun nyíco ra naha tsi ra inga
tsaha tan catyí ra naha:

—¿Náa icá ra tsihin un? ¿Nácaa icá ra tan
nanyehe un? —catyí ra naha tsihin ra.

²⁷Tan catyí ra:

—Tsa cahan yu tsihin ndo, tan ña tyaá
yahvi ndo tsi yu. ¿Náa cuenda cuñi ndo
tsa cahan yu inga tsaha? ¿A cuñi ndihí ndo
cunyicun ndo tsi ra can?

²⁸Tacan tan nduxaán ra naha tsi ra, tan
catyí ra naha:

—Yooho tsa yihi un cuenda ra, maa tyin
nyuhu cuenda ra Moisés ra tsa tsicoo tsa
naha yihi ndi. ²⁹Nyuhu tsító ndi tyin Nyoo
cahan tsihin ra Moisés tahán tsa naha. Maa
tyin ra can, ndi ña tsító ndi numaa quee ra
—catyí ra naha.

³⁰Tacan tan nacahan ra tsa nduvahá can
tan catyí ra:

—¿Náa tsa iyo cahnu cuví tsehe! Nyoho
ñi tsító ndo numaa quee ra, tan jananyehe
ra tsi yu.³¹Tsító vaha yo tyin Nyoo ña tyaá
soho ra nu caahán ra iyó cuatyí. Maa tyin ra
jacahnú tsi ra tan icá ra cuhva cuñi ra, tyaá
soho Nyoo tsa caahán ra.³²Ndi iin tsaha tan
ñaha ca cuñi yo tatum iyó iin ra jananyehe
tsi iin ra cuaá nda cacu ra.³³Tun tsatyin ra
ihya tan ñavin cuenda Nyoo vatsí ra, nduve
tsa cuví javaha ra —catyí ra tsihin ra naha.

³⁴Tacan tan catyí ra naha tsihin ra:

—Yooho ra iyó cuatyí cuví un nda cacu
un. ¿Tan cuñi un jacuaha un tsi nyuhu?
—catyí ra naha.

Tan tava cuii ra naha tsi ra vehe ñuhu.

Nyiví tsa nduve tuhun Nyoo iyó añima
tumaa tsa cuua ñi

³⁵Tsitó ra Jesús tyin tavá ra naha tsi ra tsa
janduvahá ra vehe ñuhu. Tan tsa ñihí tahan
ra tsihin ra tan catyí ra tsihin ra:

—¿A tsinú iñi yootho tsa caahán Rayii tsa
quee nda gloria? —catyí ra tsihin ra.

³⁶Tan nacaran ra tan catyí ra:

—Catyí tuhun tsihin yu, taa, yóo ra cuví
ra tyin tsinú iñi yu tsi ra —catyí ra tsihin ra.

³⁷Tan catyí ra Jesús:

—Tsa nyehé un tsi ra. Tan juvin ra
natuhún tsihin un —catyí ra tsihin ra.

³⁸Tacan tan tsicuñiñ tsiti ra tsaha ra Jesús
tan catyí ra tsihin ra:

—Tsinú iñi yu tsi un, Jutu Mañi yu
—catyí ra tsihin ra Jesús.

³⁹Tan catyí ra Jesús:

—Yuhu vatsí yu tyin catyi tuhun yu tsa
iyó añima nyiví iyó nu ñuhu ñayiví ihyá.
Tyin nyiví cuua, ñi ña tsitó tuhun Nyoo cua
nanyehe ñi tyin coo tuhun Nyoo añima ñi.
Tan nyiví cuñi tyin nditsin nyehé ñi, catyí
ñi tyin tsitó ñi tuhun Nyoo, coto ñi tyin
cuña ñi tyin ña tsinú iñi ñi tsi yu —catyí ra
Jesús.

⁴⁰Tacan tan juhva ra fariseo tsa nyecú
tsihin ra Jesús tsinú ra naha tsa caahán ra,
tan catyí ra naha tsihin ra:

—¿A cuua ndihí tucu nyuhu? —catyí ra
naha.

⁴¹Tacan tan catyí ra Jesús tsihin ra naha:

—Tun tsatytin cuua ndo cua coto ndo
tyin tsinú ñuhu tuhun Nyoo tsi ndo, tan ña
cua coo cuatyí ndo. Maa tyin catyí ndo
tyin nyehé ndo tan tsitó ndo, yacan cuenda
ndoó cuatyí ndo siqui ndo —catyí ra tsihin
ra naha.

10

Mbee ticatyi jana Nyoo cuví nyiví yihi
cuenda ra, tan tsitó ñi tsi ra tsa jaquitsi
Nyoo tyin jahá cuenda ra tsi ñi

¹'Caahán nyico ra Jesús tan catyí ra:

—Tsa nditsa catyí yu tsihin ndo, tatum
iin ra cua quihvi tsitsi cora mbee ticatyi,
tan ñavin yuhu cora quihvi ra, ra ican
cuví ñasuhu. ²Maa tyin ra tsa quihvi ityi
yuhu cora, ra jahá cuenda mbee can cuví
ra. ³Ra nyiví yuhu cora can nuña ra tyin
quihvi ra jahá cuenda mbee can. Tan mbee
can nacotó tì naha tì ndusu ra. Intuhun
intuhun tì tan iyó sivi tì jahá ra, caná ra

tsi tì tan tavá ra tsi tì ityi tsata cora. ⁴Tsa
yahá tavá ra tsi tì, tan cuahán ra ityi nuu tan
nyicún tì naha tì tsi ra, tyin nacotó tì ndusu
ra. ⁵Maa tyin tatum nyiví tsa ña nacotó
tì ndusu, tsinú tì nuu ñi tan ña cuahán tì
cuanyicún tì tsi ñi.

⁶Tyehen cahán ra Jesús tsihin nyiví. Maa
tyin maa ñi ña cutuñi iñi ñi náa tuhun
caahán ra tsa caahán ra tacan.

*Ra Jesús cuví ra jahá cuenda vaha mbee
ticatyi*

⁷Tacan tan catyí ra Jesús tsihin nyiví inga
tsaha:

—Tsa nditsa catyí yu tsihin ndo, yuhu
cuví tumaa iin yuhu cora nu quihvi nyiví
yihi cuenda yu tan cuví ñi tumaa mbee
ticatyi jana yu. ⁸Tandihi ra tsa quitsi tsa
ndi cumañi quitsi yu, ra suhu cuví ra naha.
Maa tyin mbee jana yu ña tyaq yahvi tì naha
tì tsa cahán ra naha. ⁹Yuhu cuví yuvehe
gloria. Nyiví tsa cua quihvi yuvehe can,
cua cacu ñi tan ña cua cuhun ca ñi anyaya.
Tan cuví ñi tumaa mbee tsa quihvi tan quítá
tsitsi cora can. Tan ñihí tì cuhu tsatsí ti.

¹⁰'In ra ñasuhu, vatsí ra, vatsí suhu ra,
vatsí cahñi ra, vatsí jatívi ra. Maa tyin yuhu
vatsí yu tyin coo vaha ndo ñayiví nyító
tsa ña cua naa maa. ¹¹Yuhu cuví ra vaha
jahá cuenda mbee. Tyin ra jahá cuenda
mbee tsahá ra ñayiví ra tsa cuenda mbee
can. ¹²Maa tyin ra cuví musu, tatum nyehé
ra vatsí lobo tsa cuví quítí xaam, nacoó ra
mbee jana tsitoho ra. Tan tsinú ra. Tyin
ñavin jana maa ra cuví tsi tì naha tì. Tacan
tan cua tiín quítí xaam can tsi mbee can. Tan
jacunu tì tsi mbee can ityi can tan ityi ihyá.

¹³Musu can tsinú ra tyin jahá tyinú ra tsa
cuenda xuhun ñi. Tan ña jahá cuenda vaha
ra tsi mbee can, tyin ñavin jana ra cuví tsi
ti naha tì.

¹⁴¹⁵Yuhu cuví ra jahá cuenda vaha mbee
jana yu. Tan nacotó yu tsi tì naha tì. Tan
nacotó tucu maa tì naha tì tsi yu, ¹⁵tumaa
tsa nacotó Jutu yu tsi yu, tan yuhu nacotó
yu tsi ra. Yuhu tsahá yu ñayiví yu cuenda
mbee jana yu. ¹⁶Iyó tucu inga mbee jana
yu tsa ña yihi tsitsi cora ihyá. Cuñi tsi tsa
cuhun yu cunaquihin yu tsi tì naha tì. Tan
cua tyaq yahvi tì tsi yu. Tan iin ñi nu cua
quihvi tandihí tì. Tan cua coo intuhun ñi ra
cua jaha cuenda tsi tì naha tì.

¹⁷ 'Jutu yu cuñí ra tsi yu tyin tsahá yu ñayivi yu tsacatyi nyivi. Maa tyin yaha can, tan cua nacuhva nyico ra ñayivi yu. ¹⁸ Yoñi cuvi quihin nyaá ñayivi yu, tyin tsa iyó iñi maa yu tan tsahá yu can. Iyó ndatu tsi yu tsa cuhva yu ñayivi yu tan cíu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

¹⁹ Tsa tsíñi nyico ra tsa cuví ityi nuu tsihin nyivi Israel naha ra tsa caahán ra Jesús tacan, natahví sava nyico ra naha inga tsaha. ²⁰ Tan cuaha xaan ra naha catyí:

—¿Nacuenda tyáyahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

²¹ Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuua? —catyí ra naha.

Nu ña cuñí ra cuví ityi nuu tsihin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiyu na nacuhva cuenda ñi vehe ñuhu cahnu. ²³ Tan ra Jesús tsicá nuu ra vehe ñuhu can ityi nu nañi corredor ra Salomón. ²⁴ Tan tsinu nduvu ra cuví ityi nuu tsihin nyivi Israel naha ra tsi ra Jesús. Tan quitsaq tsicá tuhun ra naha tsi ra:

—¿Ama cua cahan catsi un tsihin ndi tatus juvin un cuví ra Cristo ra tsa jaquitsi Nyoo? Cahan catsi tsihin ndi vityin ihyá —catyí ra naha.

²⁵ Tan catyí ra Jesús:

—Tsa yaha cahan yu tsihin ndo, tan ña tsinu iñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. ²⁶ Maa tyin nyoho ña tsinu iñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo. ²⁷ Mbee jana yu nacotó tì naha tì ndusu yu, tan yuhu nacotó yu tsi tì naha tì. Tan nyicún tì tsi yu. ²⁸ Yuhu tsahá yu ñayivi nyito tsa ña cua naa maa coo tì. Tan ña cua cunaa tì. Tan ndi yoñi cuví quihin nyaá tsi tì naha tì tsitsi ndaha yu. ²⁹ Maa Jutu yu tsaha tsi tì naha tì tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaá tsi tì tsitsi ndaha ra. ³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. ³² Tan catyí ra Jesús tsihin ra naha:

—Cuaha xaan tsa vaha javahá yu nuu ndo tsihin tunyee iñi jutu yu. ¿Tan ndáa tsa ña taahán iñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahá un cua cañi ndi tsi un tsihin yuu, cua cañi ndi tsi un tsa cuenda tyin tsicó cuatyi un nuu Nyoo tsihin tsa caahán un. Tyin iin rayii ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyoooho nyoo cuví ndo”, catyí Nyoo.

³⁵ Tsító yo tyin tsa caahán tuhun Nyoo, ña cua cuvi catyí yo tyin ña nditsa. Tan Nyoo jacunañí ra nyoo tsi nyivi naquihín tsa caahán ra. ³⁶ Tatun maa Nyoo nacatsí tsi yuhu tan jaquitsí ra tsi yu nu ñuhu ñayivi ihyá ñáca tsa catyí nyoho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu? ³⁷ Tatun ña javahá yu tsa javahá Jutu yu, ña tsinu iñi ndo tsi yu. ³⁸ Maa tyin tatus javahá yu, vasu ña cua tsinu iñi ndo tsi yu, maa tyin tsinu iñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñí ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutýa ra Juan tsa jihna, tan ndoq ra ican. ⁴¹ Cuaha nyivi tsahan tsinyehé tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihí tsa cahan ra cuenda ra ihyá tan nditsa —catyí ñi.

⁴² Tan cuaha xaan nyivi tsa iyó ityi can tsinu iñi tsa caahán ra Jesús.

11

Nu tsihí ra Lázaro

¹ Ñuu Betania tsicó iin ra cuuhvi tsa nañí Lázaro. Tan ñuu can iyó ña María tsihin ña Marta tahan ña. ² Ña María, cuhva ra Lázaro, juvin ña cuví ñaha tsa tyoso ndutyá

tami tsaha Jutu Mañi yo, tan jana ityi ña tsaha ra tsihin ixi jiñi ña. ³Tacan tan nduvu taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

*Tsa tsíñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quívi nduvaha ra cua nyehe nyíví tyin cahnu xaan cuví Nyoo tan tacan tucu Sehe ra —catyí ra Jesús.

⁵Cuñí xaan ra Jesús tsi ña Marta tan ña tahan ña, tan ra Lázaro cuhva ñi. ⁶Maa tyin quívi tsa tsíñi ra tyin cuuhví ra Lázaro, ndoq ra uvi quívi ca nu nyíi ra. ⁷Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸Tacan tan ra tsicá tsihin ra catyí ra naha tsihin ra:

—Maestro, ñaha ca ndunahua tsa cuñí ra cuví ityi nuu tsihin nyíví Israel naha ra cahñi ra naha tsi un tsihin yuu. Tan vityin, cuñí nyico un cuhun un inga tsaha ¿Nacuenda?

⁹Tan catyí ra Jesús:

—¿A ñavin utsi uvi hora iyó tsa iin quívi? Tyin tatum tsinu cahñi tsicá nuu iin ra, ña cua nduvu ra tyin nditsin nyehé ra ñuhu tsa jandunditsín nu ñuhu ñayíví ihya. ¹⁰Maa tyin tatum tsacuua tsicá nuu ra, cuvi nduvu ihñi ra tyin nduve ñuhu Nyoo jandunditsín nu cuahan ra.

¹¹Tacan tan quitsaha catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

¹²Tacan tan catyí nyico ra tsicá tsihin ra:

—Taa, tatum quixí ra, cuñí tsi catyí can tyin cua nduvaha ra —catyí ra naha.

¹³Maa tyin ra Jesús cuñí ra catyí ra tyin ra Lázaro tsa tsihí ra. Tan ra tsicá tsihin ra, cuñí maa ra naha tyin nditsa tsa quixí ra. ¹⁴Tacan tan cahñan catsi ra Jesús tsihin ra naha:

—Ra Lázaro tsa tsihí ra. ¹⁵Tan cusí iñi yu tyin yoñi yu nyíi ndacan. Tyin tacan vaha ca tsa cuenda nyoocho na tsinu iñi ndo tsa caahán yu. Cohon ndo cunyehe yo tsi ra —catyí ra Jesús tsihin ra naha.

¹⁶Tacan tan ra Tomás, tsa jacunañi ra naha “tiníhi”, catyí ra tsihin ñinga ra tsicá tsihin ra Jesús:

—Cohon ndíhi yo tyin cíú yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayíví nyito coo yo

¹⁷Tsa tsaa ra Jesús Betania, ñihí tuhun ra tyin tsa cumi quívi nyíi ra Lázaro tsitsi ñuhú. ¹⁸Ñuu Betania can canyíi tsi yatyin ñi nu canyíi ñuu Jerusalén, tumaa iin cuhva tsa uvi kilómetro sasava. ¹⁹Tan cuaha ra cuví ityi nuu tsihin nyíví Israel cuahan cua nyehe nu nyíi ña Marta tan ña María cua jatyinyee ra naha tsi ñi tyin tsihí cuhva ñi.

²⁰Tan ñihí tuhun ña Marta tyin tsa cua tsaa ra Jesús. Tan cuahán ña cua jatahan ña tsi ra. Maa tyin ña María ndoo ña yuvehe.

²¹Tan catyí ña Marta tsihin ra Jesús:

—Jutu mañi yu, tun tsatyin ihyá nyíi maa un, ña cua cíú cuhva yu. ²²Maa tyin yuhu tsító yu tyin Nyoo cua javaha ra tandíhi tsa ndacan un tsi ra —catyí ña tsihin ra.

²³Tan catyí ra Jesús tsihin ña:

—Cuhva un cua nandoto ra.

²⁴Tan catyí ña Marta:

—Nditsa, tsító yu tyin cua nandoto ra quívi nandoto ndiyí nu cua cundihi quívi —catyí ña.

²⁵Tacan tan catyí ra Jesús tsihin ña:

—Yuhu cuví ra janandotó ndiyí. Tan tsahá yu tsa coo nyító nyíví. Nyíví tsinu iñi tsa caahán yu, vasu tsa tsihí ñi maa tyin coo nyico ñi. ²⁶Tan tandíhi ñi nyító tan tsinu iñi ñi tsi yu, ña cua cíú ñi. ¿A tsinu iñi un tsa caahán yu ihyá? —catyí ra tsihin ña.

²⁷Tan catyí ña:

—Tsinu iñi yu, Jutu Mañi yu, tyin yooho cuví ra Cristo Sehe Nyoo, ra tsa nyáá tsa quitsi nu ñuhu ñayíví ihya —catyí ña.

Nu tsacu ra Jesús nu ñaña ra Lázaro

²⁸Tsa yaha tsa cahán ña Marta tacan, tan tsahán ña tsiquihín ña tsi ña María tahan ña, tan xeehe ñi cahán ña tsihin ña:

—Tsa tsaa Ra Maestro ihyá. Tan caná ra tsi un —catyí ña.

²⁹Tsa tsíñi ña María tsa caahán ña, numi xaan ña nduvitá ña, tan cuahán ña nu nyíi ra Jesús. ³⁰Tan ñaha ca quívi ra Jesús tsitsi ñuu hora can, ndi nyíi ra nu nañihí ña Marta tsi ra. ³¹Tan nda yuvehe ña María, yucú ra cuví ityi nuu tsihin nyíví Israel jatyinyee ra naha tsi ñi. Tan nyehe ra naha tyin numi quita ña. Tan cuñí maa ra naha tyin cuahán ña nu ñaña cua vacu ña. Tan cuahán ndíhi ra naha tsata ña.

³²Tan cuhva tsa tsaa ña María nu nyíi ra Jesús tsicuiñi tsiti ña tsaha ra, tan catyí ña:

—Jutu Mañi *yu*, tun tsatyin nyíí un ihyá,
ña tsihí ra cuhva *yu* —catyí ña.

³³Tsa nyehé ra Jesús tyin tsacú ña Maríá
tan tsacú ra Israel tsa cuahan tsihin ña,
nducuihya xaan cuñí *ra*. ³⁴Tan tsicá tuhun
ra tsí ñí:

—¿Nu maa tinyíí ndo tsi *ra*? —catyí *ra*.

Tan catyí ñí:

—Jutu Mañi *yu*, cohon tan nyehé un
—catyí ñí tsihin *ra*.

³⁵Tan tsacú *ra* Jesús.

³⁶Tacan tan catyí *ra* Israel can naha *ra*:

—Nyehé ndo tyin yahá xaan cuñí *ra* tsi
ra —catyí *ra* naha.

³⁷Maa tyin catyí juhva *ra* naha:

—Ra ihyá jananyehe *ra* tsi *ra* cuaa.

¿Nacuvi tyin ña cuví ica *ra* iin cuhva tan ña
cúu *ra* Lázaro ihyá? —catyí *ra* naha.

*Nu janandotó ra Jesús tsi *ra* Lázaro*

³⁸Nducuihya xaan cuñí nyico *ra* Jesús
inga tsaha tan natuhvá *ra* nu ñaña can.
Tyin tsitsi yavi yuu cuví can. Tan ndasí iin
yuu yuhu can. ³⁹Tan catyí *ra* Jesús:

—Jatsiyo ndo yuu can —catyí *ra*.

Tan ña Marta, cuhva ndiyí can, catyí ña:

—Maa tyin tsa caná xico iñí, Jutu Mañi
yu, tyin tsa cumi quívi tsa nyíí *ra* ican
—catyí ña.

⁴⁰Maa tyin catyí *ra* Jesús tsihin ña:

—¿A ña caahán *yu* tsihin un tyin tatum
tsinú iñí *un*, cua nyehé un tsa cahnu cuví
Nyoo? —catyí *ra* tsihin ña.

⁴¹Tacan tan jatsiyo *ra* naha yuu can. Tan
nanyehe ndaa *ra* Jesús ityí andívi, tan catyí
ra:

—Tyatya, Jutu Mañi *yu*, tyahvi nyoo *tsi*
un tyin tsíñi *un* tsa caahán *yu*. ⁴²Yuhu tsító
yu tyin maa ñí maa tsíñi *un* tsa caahán *yu*.
Maa tyin tyehen caahán *yu* tsa cuenda tsa
vaha tsi nyívi nyecú ihyá, na tsinu iñí ñí
tyin maa un jaquitsi tsi *yu* —catyí *ra* Jesús
tsihin Nyoo.

⁴³Tsa yahá tsa cahán *ra* tacan, cana tsa
ra, tan catyí *ra*:

—Lázaro, quíta nu nyíí *un* juvin!

⁴⁴Tan quita *ra* tsa tsíñi can, cavá nuu iin
jahma tsi *ra*, tan nuuhñí ndaha *ra* tan tsaha
ra tsihin jahma. Tan nuuhñí nuu *ra* tsihin
iin jahma tumaa javahá nyívi Israel tsihin
ndiyí. Tan catyí *ra* Jesús tsihin nyívi nyecú
ican:

—Ndatsi ndo tsi *ra*. Tan jaña ndo tsi *ra*
na cuhun *ra* —catyí *ra* Jesús tsihin ñí.

*Nu nducú cahñi *ra* naha tsi *ra* Jesús*

(Mt. 26.1-5; Mr. 14.1-2; Lc. 22.1-2)

⁴⁵Tan cuaha xaan *ra* cuví ityí nuu tsihin
nyívi Israel tsa tsahan tsihin ña Maríá quit-
saha tsinú iñí *ra* naha tsa nyehé *ra* naha
tsa javahá *ra* Jesús. ⁴⁶Maa tyin juhva *ra*
naha tsahan *ra* naha tsijacotó *ra* naha tsi *ra*
fariseo naha *ra* tsa javahá *ra* Jesús. ⁴⁷Tacan
tan *ra* fariseo can naha *ra* tan *ra* cuví ityí
nuu tsihin *ra* jutu naha *ra* jatitahán *ra* naha
tsi *ra* tuhvá ndu iín naha *ra* tan catyí *ra*
naha:

—¿Nacaa cua javahá *yo*? Tyin cuaha
xaan tsa iyo javahá *ra* can. ⁴⁸Tatun cuhva
yo tsa javahá *ca* *ra* tacan, tandíhi nyívi tan
cua tsinu iñí ñí tsi *ra*. Tan *ra* cumí tyíñu nda
ñuu Roma cua quitsi *ra* naha tan cua caní
ra naha vehe ñuhu *yo* tan ñuu *yo* —catyí *ra*
naha.

⁴⁹Maa tyin *ra* Caifás *ra* tsahnu tsa cuví ityí
nuu tsihin *ra* jutu naha *ra* cuiya can, cahán
ra tan catyí *ra* tsihin *ra* naha:

—Nyooho nduve maa náá tsító ndo.

⁵⁰Ndi ña cutuñí iñí ndo tyin vaha *ca* tsa cíu
intuhun ñí rayíi tsa cuenda tandíhi nyívi
ñuu, tan ñavin *ca* tsa cíu tandíhi *yo* —catyí
ra Caifás.

⁵¹Ra Caifás can ñavin tsa cuñí maa *ra*
tan caahán *ra*, tyin *ra* cuví ityí nuu tsihin
tandíhi jutu cuví *ra* cuiya can, yacan cuenda
maa Nyoo jachahen tsi *ra* nu catyí *ra* tyín *ra*
Jesús cua cíu *ra* tsa cuenda tandíhi nyívi
ñuu Israel. ⁵²Tan ñavin tsa cuenda maa ñí
maa nyívi can, maa tyin *ca* jandú iin *ra* tsi
tandíhi nyívi cuví sehe Nyoo tsa iyó tandíhi
ca ñuu. ⁵³Tacan tan nda quívi can *tan* *ra*
cuví ityí nuu tsihin nyívi Israel can naha *ra*,
nducú *ra* naha cuhva cahñi *ra* naha tsi *ra*
Jesús.

⁵⁴Yacan cuenda ña tsicá nuu nditsin *ca*
ra Jesús nu iyó nyívi Israel. Quee *ra* Judea
can. Tan cuahán *ra* iin ñuu tsa nañí Efraín
tsa canyí yatayn ñí nu tsiquí, nu cuví ñuhu
ityí. Tan ndoó *ra* ican tsihin *ra* tsicá tsihin
ra.

⁵⁵Ña cuaha *ca* quívi tan tahan tsi *vico*
cuenda nyívi Israel, vico tsa nañí pascua.
Tan cuaha xaan nyívi quee ñí ñuu ñí tan
cuahán ñí nda ñuu Jerusalén cua javahá ñí
tsa tuhvá maa ñí javahá *tsa* janduvahá ñí
tsi ñí nuu Nyoo tsa ndi cumañí *ca* tahan tsi
quívi vico can. ⁵⁶Nanducú ñí tsi *ra* Jesús.
Tan cuhva tsa nyecú ñí tsitsi vehe ñuhu

cahnu can tan tsicá tuhun tahan ñi, tan catyí ñi:

—¿Nacaa cuñí nyooho? ¿A cua quitsi ra can vico ihyá, o ña cua quitsi ra? —catyí ñi.

⁵⁷ Tan ra cuví fariseo tan ra cuví ityi nuu tsihin jitu, catyí ra naha tyin tatum ndáa nyiví tsító nu nyíí ra Jesús, na catyí tuhun ñi. Tyin cuquihin ra naha tsi ra tyin cunyii ra vehe caa.

12

Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

¹ Cumañi iñu quíví ca tsa tahan tsi vico pascua, tan tsaa ra Jesús ñuu Betania nu iyó ra Lázaro, ra tsa janandoto ra. ² Ican javahá ñi tsa cuxiñi ra Jesús. Ña Marta tyihi ña coho nu mesa. Tan tsinyaa ra Jesús nu mesa. Tan nyaá ndíhi tucu ra Lázaro tsihin ra. ³ Tacan tan quihín ña María tumaa sava litru ndutya tami tsa tsinu tsihin maa ñi maa yucu tsa nañí nardo, iñ tsa yahvi xaan nyaá. Tan tyisó ña ndutya tami can tsaha ra Jesús. Yahá can tan jana ityi ña tsaha ra tsihin ixi jiñi ña. Naníi cahnu maa tsitsi vehe can tsitu xico ndutya tami can. ⁴ Tan ican nyíí tucu ra Judas Iscariote, sehe ra Simón. Cuví ra iin ra tsicá tsihin ra Jesús. Tan juvin ñi maa ra cuví ra tsa cua xico tsi ra Jesús tsi nu xaan iñi tsi ra nahnu. Tan quitsahá catyí ra Judas can tsihin ñi can:

⁵ —¿Nacuenda ña xico ndo ndutya tami ilhya tsi nyivi, tan cuhva ñi cuenda mil tsi ndo tsa cuenda can, (uñi centuo denario) tan jatyinnee ndo tsi nyíí ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyíí ndaahvi. Tyin maa ra yiñi ndaha yitin nu yiñi xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tsihin ra:

—Jaña tsi ña, tyin ñaha ihyá javahá ña tyehen tsa cuenda tsa cua quihví cuñu ñuhu yu tsitsi ñuhu. ⁸ Nyíí ndaahvi tacan ñi nyecú maa ñi tsihin ndo, maa tyin yuhu ña cua cunyaa ca yu tsihin ndo tacan —catyí ra Jesús tsihin ra Judas.

Nu nducú cahñi ndíhi ra Israel naha ra tsi ra Lázaro

⁹ Cuaha xaan nyíí Israel ñihí tuhun ñi tyin ra Jesús nyíí ra Betania, tan tsahan ñi

ican. Ñavin intuhun ñi ra Jesús cuñí ñi nyehe ñi tyin cuñí ndíhi tucu ñi nyehe ñi tsi ra Lázaro, ra tsa janandoto ra Jesús. ¹⁰ Tacan tan ra cuví ityi nuu tsihin jitu natuhun tahan ra naha tyin cua cahñi ndíhi ra naha tsi ra Lázaro. ¹¹ Tyin tsa cuenda ra tan cuaha xaan nyíí Israel quitá tsiyo ñi tan quitsahá tsinú iñi ñi tsi ra Jesús.

*Nu quihví ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)*

¹² Cuaha xaan nyíí tsaa ñi ñuu Jerusalén tsa cuví vico pascua. Tan tsaa inga quíví tsito ñi tyin ra Jesús cua tsaa ra ñuu can. ¹³ Tacan tan tsahinyá ñi ndaha ndicaha tan cuahán ñi cu jatahan ñi tsi ra Jesús. Tan caná tsaa ñi, tan catyí ñi:

—¡Cahnu xaan cuví Nyoo! ¡Nasoco xaan Nyoo tsi ra vatsí ihyá tsihin tunyee iñi Nyoo! ¡Nasoco xaan Nyoo tsi Rey cuenda yo nyíí Israel! —catyí ñi, caná tsaa ñi.

¹⁴ Tacan ñihí ra Jesús iñ burru tan tsicoso ra tsi ti tumaa catyí maa nu tutu Nyoo tyehen:

¹⁵ Ña nayuhví ndo nyíí ñuu Sión

Nyehé ndo, vatsí Rey ndo.

Yosó ra iñ burru —catyí tsi nu tutu Nyoo.

¹⁶ Quíví can ra tsicá tsihin ra Jesús, ña cutuñi iñi ra naha tsa nyaá nu tutu Nyoo. Maa tyin tsa yaha cuanuhu ra Jesús nda gloria, nducuhun iñi ra naha tyin tandihí yacan nyaá can nu tutu Nyoo tyin tacan cua tahan ra. Tan tacan tsa cuii tahan ra.

¹⁷ Nyíí tsa nyehé quíví tsa cana ra Jesús tsi ra Lázaro tsitsi ñaña, quíví janandoto ra tsi ra, nacatýi tuhun ñi tsa nyehé ñi.

¹⁸ Yacan cuenda cuaha xaan nyíí tsijatahan tsi ra Jesús, tyin tsito ñi tsa iyo tsa javahá ra. ¹⁹ Tacan tan ra cuví fariseo catyí ra naha natuhun tahan ra naha:

—Tsa nyehé maa ndo tyin nduve maa náa cuví javahá yo, tyin tandihí nyíí tan cuahán ñi cuanyicún ñi tsi ra —catyí ra naha.

Nu nanducú juhva ra tsa quee Grecia tsi ra Jesús

²⁰ Yucú tucu juhva ra Grecia mahñu nyivi tsa tsahan tsijacahn vico ñuu Jerusalén.

²¹ Tacan tan natuhvá ra Grecia can naha ra nu nyaá ra Felipe, ra quee ñuu Betsaida tsa canyí Galilea, tan cahán ndaahvi ra naha tsihin ra tan catyí ra naha:

—Taa, cuñí ndi cahan ndi tsihin ra Jesús —catyí ra naha.

²² Tan tsahan ra Felipe tsicahān ra tsi-hin ra Andrés. Tan tsahan nduvi ra naha tsicatyi tuhun ra naha tsihin ra Jesús tyín ra Grecia can cuñí ra naha cahan ra naha tsihin ra. ²³ Tan nacahān ra Jesús, tan catyí ra:

—Vityin tsa tsaq hora tsa cunuhu nyico yu nda nu quee yu, tan cua jacobnu jutu yu tsi yu, tsa cuví yu Rayii tsa quee nda gloria. ²⁴ Tsa nditsa catyí yu tsihin ndo tyín tatum iin tsiti tan ña cua quíhví tsi ñuhu tan ña tyahyu tsi, intuhun ñi tsiti cua cuvi tsi. Maa tyin tatum tyahyu tsi, ndutsaa tsi inga tsaha tan cua coo cuaha ca tsiti tsi. ²⁵ Nyívi tsa cuñí xaan ñayíví iyó ñi, cua cunaa ñi. Maa tyin nyívi ña cuñí ñayíví iyó ñi nu ñuhu ñayíví ihya, cua ñihí ñi ñayíví nyító tsa ña cua naa maa coo ñi. ²⁶ Ndáa nyoocho nyívi cuñí jahá tyínu nuu yu, naha ndo quitsi nyicun ndo tsi yu. Tan nu cunyaa yu, cunyaa ndíhi nyoocho tsa jahá tyínu tyínu yu. Tyin nyívi jahá tyínu tyínu yu, cua jacobnu jutu yu tsi ñi.

Nu caahán ra Jesús nácaa cua cíu ra

²⁷ 'Vityin tsicá xaan iñi yu. Tan ñáa cua cahan yu? ¿A catyí yu tsihin Jutu yu na jatsiyo ra tundocho tsa nyaá cua nyehe yu? Ña cua cahan yu tacan tyin tsa cuenda yacan vatsí yu nu ñuhu ñayíví ihya. ²⁸ Vaha ca cahan yu tsihin Jutu yu tan catyí yu: "Jutu Mañi yu, jacobnu sivi un" —catyí ra Jesús.

Tacan tan cahān iin ndusu ityi andívi tan catyí tsi tyehen:

—Tsa yahá jacobnu yu sivi yu, tan cua jacobnu nyico yu inga tsaha —catyí ndusu can.

²⁹ Tan nyívi nyecú ican, tsiñi ñi ndusu can, tan catyí ñi tyin savi cahān. Tan inga ñi catyí tyin iin ángel cahān tsihin ra.

³⁰ Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu cahān ndusu can, tyin tsa cuenda tsa vaha tsi maa ndo cuví can. ³¹ Vityin cuví cuhva tsa cua tatsi tuñi Nyoo tsi nyívi iyó nu ñuhu ñayíví. Tan vityin cuví cuhva cua tava cuii Nyoo tsi nu ndacá ñaha nu ñuhu ñayíví ihya. ³² Tan cuhva tsa cua ticaa nyívi tsi yu nu cruu, yacan cuví cuhva cua ixta yu tandíhi nyívi cuhun ñi tsihin yu —catyí ra Jesús.

³³ Caahán ra tacan tsa cuenda tsa cuñí ra cutuñi iñi ñi tyin tacan cua cíu ra. ³⁴ Tan nacahān nyívi tan catyí ñi tsihin ra:

—Tuhvá ndi tsíi cahví ra naha nu libru ley yo tyin ra cuví Cristo cua coo nyító ra tan ña cua cíu maa ra. ¿Nacaa tsa catyí yooho tyin cua ticaa nyívi tsi Rayii quee nda gloria nu cruu? Tan ¿yoo ra cuví Rayii tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵ Tacan tan catyí ra Jesús tsihin ñi:

—Ñuhu tsa jandunditsín nu nyecú ndo, juhva ña quívi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyívi tsicá nu naa ña tsító ñi nu maa cuahán ñi. ³⁶ Tsinu iñi ndo tsi yuhu ra cuví ñuhu nditsin, tsitsi tsa ndi nyívi yu tsihin ndo. Tacan tan cuví ndo nyívi iyó nu nditsin.

Tsa yahá cahān ra Jesús tacan tan jatsiyo ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyívi Israel naha ra tsi ra Jesús

³⁷ Vasu ndi maa cuaha xaan tsa iyo jahára Jesús nuu nyívi maa tyin ña tsinú maa iñi ñi tsa caahán ra. ³⁸ Tyin taahán tsi tsa cuvi tumaa tsa cahān ra Isaías ra cuví ndus yuhu Nyoo, nu cahān ra tyehen:

Jutu Mañi yu, yoñi cuñí tsinu iñi tsa caahán ndi.

Yoñi cutuñi iñi tunyee iñi tsa iyó tsi un, Jutu Mañi yu, catyí ra Isaías tahān tsanaha.

³⁹ Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

⁴⁰ Nyoo jacuaq ra tsi ñi. Tan jandundavára ra añima ñi, tan ña cua nyehe ñi tsihin tinuu ñi, tan ña cua cutuñi iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cahān ra tyehen tyin nyehe ra tsa cahnu cuví Jutu Mañi yo Jesús, tan cahān ra tuhun ra.

⁴² Cuaha xaan nyívi Israel tsinú iñi tsi ra Jesús. Tan nda cuanda juhva ra cuví ityi nuu naha ra. Maa tyin ña jandunditsín ra naha tsi ra naha nuu nyívi tyin yuuvhí ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu. ⁴³ Tyin

cuñí ra naha nduvaha ra naha nuu nyivi tan ñavin nuu Nyoo.

Tuhun caḥan ra Jesús cua tatsi tuñi tsi nyivi

⁴⁴Ñihi caahán ra Jesús, tan catyí ra:

—Nyivi tsa tsinú iñi tsiyu, ñavin tsi maa ñi maa yu tsinú iñi ñi, tyin tsinú ndihí iñi ñi tsi ra tsa jaquitsi tsiyu. ⁴⁵ Tan nyivi tsa nyehé tsiyu, nyehé ndihí ñi tsi ra tsa jaquitsi tsiyu. ⁴⁶ Yuhu cuví tumaa ñuhu nditsin tan vatsí yu jandunditsín yu nu ñuhu ñayivi ihyá, tyin nyivi tsinú iñi tsiyu ña cua ndoo ñi nu naa. ⁴⁷ Maa tyin tatus yiñi ndo tsiñi ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayivi ihyá tyin tatsi tuñi tsi nyivi. Vatsí yu tyin vatsí jacacú yu tsi ñi. ⁴⁸ Nyivi tsa ña cuñí naquihin vaha tsa caahán yu tan ña cuñí ñi javaha ñi tumaa cuhva cuñí yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihi quivi. ⁴⁹ Tyin ñavin cuenda maa yu caahán yu. Jutu yu, ra tsa jaquitsi tsiyu, tsaha ra tysiñi tsiyu caahán ra náa cua cahan yu tan náa cua jacuahá yu. ⁵⁰ Tan tsító yu tyin tysiñi tsa tsaha ra, tsaha tsi ñayivi nyitó tsa ña cua naa maa coo nyivi. Yacan cuenda, tandíhi tsa caahán yu, caahán yu cuhva catyí maa Jutu yu tsa cahan yu.

13

Nu nacatya ra Jesús tsaha ra tsicá tsihin ra

¹ Tsa ndi cumaní ca iin quivi tan tahan tsi vico pascua, tsa tsító maa ra Jesús tyin tsa cua tsaa hora tsa cua quita ra nu ñuhu ñayivi ihyá tan cunuhu ra nu nyaá Jutu ra. Tacan ñi maa cuñí xaan ra tsi nyivi cuenda ra tsa iyó nu ñuhu ñayivi ihyá. Tan vityin cua janaha ra tsi ñi tyin cuñí xaan ra tsi ñi tyin cua cíu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quíhví nu ña vaha añima ra Judas Iscariote sehe ra Simón tan natyuhu nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. ³ Maa tyin ra Jesús tsító ra tyan tsaha Jutu ra tandíhi tysiñi tsi ra tyan quíhví ndaha ra. Tan tsító ra tyan nu nyaá Nyoo queē ra tan juvin ñi ndacan cua cunuhu nyico ra. Tan nyaá ra Jesús cuxiñi ra. ⁴ Tacan tan induvita ra tan tava ra jahma tsa nditsí ra ityi tsata, tan tsahñi ra iin toalla tsitsi ra. ⁵ Tacan tan tysiñi

ra ndutyá tsitsi iin tsicohó tan quitsaha nacatya ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñi iñi un tsa javahá yu, maa tyin cutuñi iñi maa un nu cuahán ca tsi quiví.

⁸ Maa tyin ra Pedro catyí ra tsihin ra:

⁹ —Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatus ña cua nacatya yu tsaha un, ñavin ca cuenda yu cua cuvi un.

¹⁰ Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹¹ Maa tyin catyí ra Jesús tsihin ra:

—Nyivi tsa ndi tsityi, ña cuñí tsi tsa ndoo naníi cahnu cuñu ñuhu ñi. Tsaha ña ñi cuñí tsi ndoo, tyin tsa ndoo maa naníi ñi. Nyoho tsa ndoo maa ndo, vasu ña tandíhi ndo ndoo —catyí ra Jesús.

¹² Cahan ra tsa ña tandíhi ra naha ndoo tyin tsító ra yóo cua xico tsi ra tsi nu xaan iñi tsi ra nahnu.

¹³ Tsa yaha nacatya ra Jesús tsaha ra tsicá tsihin ra, tan tsinditsi nyico ra jahma ra, tan tsinyaa nyico ra inga tsaha nu mesa tan catyí ra tsihin ra naha:

—¿A cutuñi iñi nyoho tsa javahá yu tsihin ndo? ¹⁴ Nyoho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu. ¹⁵ Yuhu tsa cuví yu Ra Jacuahá tan Jutu Mañi ndo, nacatya yu tsaha ndo, tan tacan cuñí tsi tsa nacatya tahan maa ndo tsaha ndo. ¹⁶ Yuhu tsaha yu iin cuhva tsi ndo tyin javahá ndo tumaa cuhva javahá maa yu. ¹⁷ Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitohó ra. Tan ndi iin ra tsa cuahán tysiñi, tan ña cahnu ca cuví ra tan ñavin ca ra tsa tava tysiñi tsi ra. ¹⁸ Tatun cutuñi iñi ndo yacan, tan javahá ndo can, sii xaan cua coo ndo.

¹⁸ Ñavin tsa cuenda tandíhi ndo caahán yu. Yuhu tsító maa yu yóo nacatsi yu. Maa tyin cuñí tsi tsa cuvi tumaa caahán tushun Nyoo tyehen: “Ra tsa tsatsi paan

tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. ¹⁹ Caahán yu tyehen tsihin ndo tsa ndi cumañi ca cuvi can tyin quíví cua cuvi yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihí tsa iyó. ²⁰ Tsa nditsa catyí yu tsihin ndo tyin nyiví naquihin vaha tsi nyiví tsa jacuhún yu tsi ñi, maa yu naquihin vaha ñi cuví can. Tan nyiví tsa naquihín vaha tsi yuhu, naquihín vaha ndihí ñi tsi ra tsa jaquitsí tsi yu —catyí ra Jesús.

Nu jacobó ra Jesús tyin cua xico ra Judas tsi ra tsi nu xaan iñi tsi ra nahnu
(Mt. 26.20-25; Mr. 14.17-21; Lc. 22.21-23)

²¹ Tsa yahá tsa cahan ra Jesús yacan, tan quitsaha nducuuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyoocho cua xico ndo tsi yu tsi nu xaan iñi tsi yu —catyí ra Jesús.

²² Tacan tan ra tsicá tsihin ra, quitsaha nyehé nuu tahan ra naha, tan ña tsító ra naha yóo tuhun caahán ra Jesús. ²³ Lin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuví ra tsa cuñi xaan ra Jesús. ²⁴ Tan ra Simón Pedro javahára seña tsi ra can, na ndaca tuhun ra yoó tuhun caahán ra Jesús. ²⁵ Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoó ra cuví ra tsa caahán un tuhun?

²⁶ Tan nacahan ra Jesús tan catyí ra:

—Cua jatyí yu luxu paan, tan ra tsa cua cuhva itsi, ra ican cuví ra —catyí ra.

Tacan tan quihin ra luxu paan tan jatyíi ra, tan tsaha ra tsi ra Judas Iscariote, sehe ra Simón. ²⁷ Tsa quihin ra Judas paan can tan quíví nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

²⁸ Maa tyin ndi intuhun ra tsa nyecú nu mesa can, ña cutuñi iñi ra naha nacuenda cahan ra tacan tsihin ra can. ²⁹ Ra Judas cuví ra yiñi ndaha yítin nu yiñi xuhun, yacan cuenda yiñi ra naha cuñi maa ra naha tyin cuñi ra Jesús tsa cujata ra tsa tsinu ñuhu tsi ra naha tsa cuenda vico can, a cuhva ra juhva xuhun can tsi nyiví ndaahvi, cuñi maa ra naha. ³⁰ Tsa yahá quihin ra Judas

paan can, tacan tan quita ra. Tan tsacuua cuví can.

Tyiñu tsaa tsa tava ra Jesús tsi yo: tsa cuñi tahan yo tsi yo

³¹ Tsa yahá tsa cuahán ra Judas, tan catyí ra Jesús:

—Vityin cua nyehé nyiví tsa cahnu cuví yuhu Rayíi tsa queé nda gloria. Tan cua nyehé ñi tsa cahnu cuví Nyoo tsa cuenda yu. ³² Tatun Rayíi tsa queé nda gloria jacaahnú ra tsi Nyoo, tacan tucu Nyoo cua jacaahnú ra tsi ra. Tsa tsaa quíví cua jacaahnú ra tsi ra. ³³ Sehe yu, ña naha ca cua cunyii yu tsihin ndo. Nyoocho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyiví Israel can naha ra, caahán yu tsihin ndo vityin, tyin ña cua cuvi cuhun ndo nu cua cuhun yu. ³⁴ Tsahá yu iin tyiñu tsaa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. ³⁵ Tatun cuñi tahan ndo tsi ndo, tandihí nyiví tan cua coto ñi tyin nyiví nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhun un? —catyí ra.

Tan nacahan ra Jesús tan catyí ra:

—Nu cuhun yuhu, ña cua cuvi cunyicún un tsi yu vityin. Maa tyin nu cuahán ca tsi quíví, tan cunyicún un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicún yu tsi un vityin? Tan tsa iyó vaha iñi yu tsa cuhva yu ñayiví yu tsa cuenda un —catyí ra.

³⁸ Tacan tan catyí ra Jesús tan catyí ra:

—¿A nditsa tsa cuhva un ñayiví un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsaa tsitooho, yooho cua cahan un uñi tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityi cuhun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Tsínu iñi ndo tsi Nyoo, tan tsínu ndíhi iñi ndo tsi yu.
² Vehe Jutu yu cuaha xaan nu coo ndo iyó. Tun tsatayin ñavin tacan, tsa naha catyí tuhun yu tsihin ndo. Tan cua cuhun yu cua janduvaha yu iin nu coo ndo.³ Tsa yahá tsa cuhun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyaa yu.⁴ Nyoocho tsa tsító maa ndo nu maa cuhun yu, tan tsa tsító ndo ityi.

⁵Tan catyí ra Tomás tsihin ra:

—Jutu Mañi yu, ña tsító ndi nu maa cua cuhun un. Tan ñácaa coto ndi ityi? —catyí ra.

⁶Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tsahá ñayíví coo ndo. Tan tsa cuenda yuhu ñi, tan cuví tsaa ndo nu nyaá Jutu yu.⁷ Tan tsa nacotó ndo tsi yu, tan tsa cuenda yacan nacotó ndíhi ndo tsi Jutu yu. Nda vityin tan nu cuahán ca tsi ityi nuu, cua nacoto ndíhi ndo tsi ra, tyin tsa nyehé ndo tsi ra —catyí ra Jesús.

⁸Tacan tan catyí ra Felipe tsihin ra:

—Jutu Mañi yu, cuhvajihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

⁹Tan nacahan̄ ra Jesús, tan catyí ra:

—Yoho Felipe, tsa naha xaan nyí yu tsihin ndo, tan ñácaa tsa caahán un tsa ña nacotó un tsi yu? Nyíví tsa nyehé tsi yu, nyehé ndíhi ñi tsi Nyoo Jutu yu. Tan ñácaa tsa caahán un tsihin yu: “Cuhva jihna nyehe ndi tsi Nyoo Jutu yo”? ¹⁰¿A ña tsínú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tysiñu ra tsihin yu.¹¹ Tsínu iñi ndo tsi yu tysiñu ra cuví yu tsihin Nyoo Jutu yu. Tan Nyoo Jutu yu iin ñi cuví ra tsihin yu. Tatun ña tsínú iñi ndo yacan, cuví tsínú iñi ndo tsi yu tsia cuenda tysiñu Nyoo Jutu yu tsa javahá yu.¹² Tsa nditsa caahán yu tsihin ndo tyin nyíví tsínú iñi tsi yu, cua javaha ndíhi ñi tsa javahá yu. Tan cahnu ca tsa cua javaha ñi, tyin yuhu cuhun yu nu nyaá Nyoo Jutu yu.¹³ Tan tandíhi tsa cua ndacan ndo tsi jutu yu tsihin siví yu, cua ñihi ndo can tyin tacan tan jacahnu cuaha ca nyíví

tsi Nyoo Jutu yu tsa cuenda yuhu tsa cuví yu Sehe ra.¹⁴ Yuhu cua javaha yu náá ndíhi tsa ndacan ndo tsa cuenda yu.

Nu caahán ra Jesús tyin cuhva ra Tatyi Ii ra tsi yo

¹⁵*Tatun cuní ndo tsi yu, tyaa yahvi ndo tsa caahán yu.¹⁶⁻¹⁷ Tan ndacan tahví maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyi Ii Nyoo, ra tsa caahán tsa nditsa. Tan iin nyita ñi maa cua cunyaa ra tsihin ndo. Maa tyin nyivi tsa taahán ca iñi tsa iyó nu ñuhu ñayíví ihya, ña cua cuvi naquihin ñi Tatyi Ii Nyoo tyin ña nyehe ñi tsi ra. Tan ndi ña tsító ñi tsi ra. Maa tyin nyoho tsító ndo tsi ra tyin nyaá ra tsihin ndo tan tacan ñi cua ndoo ra tsihin ndo.¹⁸ Ña cua nacoo cuui yu tsi ndo. Cua quitsi nyico yu nu yucú ndo.¹⁹ Juhva cuui ña quíví, tan nyíví cuenda nu ñuhu ñayíví ña cua nyehe ca ñi tsi yu. Maa tyin nyoho cua nyehe ndo tsi yu. Tyin yuhu nyito yu, yacan cuenda nyoho cua coo ndíhi ndo.²⁰ Quíví can cua coto ndo tyin yuhu iin ñi cuví yu tsihin Jutu yu. Tan nyoho iin ñi cuví ndo tsihin yu. Tan yuhu iin ñi cuví yu tsihin ndo.²¹ Nyíví tsa tyaá yahvi tsa caahán yu, tan javahá ñi cuhva caahán yu, ñi ican cuví ñi tsa cuní tsi yu. Tan ñi tsa cuní tsi yu, Jutu yu cua cuñi ra tsi ñi. Tan cuñi ndíhi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

²²Tan catyí ra Judas, ñavin ra Judas Iscariote, inga ra.

—Jutu Mañi yu, ñácaa tsa nyuhu ñi cua janaha un tsi un, tan ñavin tsi tandíhi nyíví iyó nu ñuhu ñayíví?

²³Nacahan̄ ra Jesús tan catyí ra:

—Nyíví cuñi tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi.²⁴ Nyíví ña cuñi tsi yu, ña javahá ñi tsa caahán yu. Tan tuhun tsa caahán yu tsa tyaá soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

²⁵*Caahán yu tandíhi tuhun ihya tsihin ndo tsitsi tsa ndi nyí yu tsihin ndo.²⁶ Maa tyin nu cuahán ca tsi ityi nuu cua jaquitsi Jutu yu Tatyi Ii ra tsihin siví yu. Tan cua jatyinyee ra ican tsi ndo, tan cua cuhva ra tunyee iñi tsi ndo, tan cua janaha ra tandíhi

tsi ndo. Tan cua janducuhun iñi ra tsi ndo tsa tsa yahá cahán yu tsihin ndo.

²⁷ Jandoó yu iin tsa taxin coo añima ndo, tumaa tsa taxin cuñí añima maa yu. Yacan tsahá yu tsi ndo. Ñavin tumaa tsa taxin tsa ñihí ndo nu ñuhu ñayiví ihya. Ña caca xaan iñi ndo tan ña nayuhvi ndo. ²⁸ Tsiñi ndo tsa cahán yu nu catyí yu tyin cua cuhun yu tan cua quitsi nyico yu nu yucú ndo. Tatun cuñí ndo tsi yu, cua cusí iñi ndo tyin catyí yu tyin cuahan yu nu nyaá Jutu yu. Tyin cahnu ca cuví Jutu yu tan ñavin ca maa yu. ²⁹ Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

³⁰ Ña cuaha ca cua cahan yu tsihin ndo. Tyin vatsí nu ndacá ñaha nu ñuhu ñayiví ihya. Maa tyin ña ndacá ñaha nu tsi yu. ³¹ Tyin tacan tan coto nyiví iyó nu ñuhu ñayiví, tyin yuhu cuñí yu tsi Nyoo Jutu yu, tan javahá yu tyiñu tavá ra tsi yu.

'Ndývita ndo, tan cohon ndo, na cua tsiyo yo ihya.

15

Nu cahán ra Jesucristo tyin cuví ra tumaa yoho tsa cuví uvas

¹ Yuhu cuví yoho tsa cuví uvas tsa nditsa. [Tsa cuví uvas cuví tsi tumaa yoho ndit-saahan ndivi maa tyin yuco vixi cuví tsi.] Tan Jutu yu cuví ra jahá cuenda yoho can. ² Tsahnyá ra soco tsa ña tsahá tsiti. Tan nacahnya ra nuu yoho yuco tsa tsahá tsiti, tan janduvahá ra can, tyin tacan tan cuhva cuaha ca tsi tsiti. ³ Tsa yahá janduvahá Jutu yu tsi nyoho tsihin tsa jacuahá yu tsi ndo. ⁴ Jañihi ca ndo ndu iin ndo tsihin yu, tumaa tsa iin ñi cuví yu tsihin ndo. Tumaa iin soco yoho can ña cuvi cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyoho, ña cua cuvi javaha ndo tsa vaha tatuń ña iin ñi cuvi ndo tsihin yu.

⁵ Yuhu cuví yoho cahnu. Tan nyoho cuví soco yoho can. Nyiví tsa nyanaá tsi yu, tan nyanaá yu tsi ñi, cahua tsa vaha javahá ñi. Tyin nduve náa cuví javaha ñi tatuń ña nyanaá ñi tsi yu. ⁶ Nyiví tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tsahá tsiti. Na ity i can tan jatacá yo can, tsahan tsahmí yo.

⁷ Tatan tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo,

tacan tan cuví ndacan ndo náa cuñí maa ndo tsi yu, tan yuhu cua cuhva yu tsa cua ndacan ndo. ⁸ Tatun cuaha tsa vaha javahá ndo, jacañu xaan ndo tsi Jutu yu cuví can. Tan tsihin yacan janahá ndo tyin cuví ndo nyiví tsa nditsa nyicún tsi yu. ⁹ Yuhu cuñí yu tsi ndo, tumaa tsa cuñí Jutu yu tsi yu. Ña naa iñi ndo cuhva cuñí yu tsi ndo. ¹⁰ Tatun tyáa yahvi ndo tsa caahán yu, ña cua naa iñi ndo tyin cuñí yu tsi ndo. Tumaa tsa javahá maa yu, tyáa yahvi yu tsa caahán Jutu yu. Ña naa iñi yu tsa cuñí xaan ra tsi yu.

¹¹ Caahán yu tyehen tsihin ndo tyin na cusí iñi ndo tsihin yu. Tan cusí ca iñi ndo. ¹² Tuhun tsa caahán yu tsihin ndo, yacan cuví tsehe: cuñí tahan ndo tsi ndo, tumaa tsa cuñí maa yu tsi ndo. ¹³ Tatun yaha xaan cuñí tahan yo tsi yo, cana maa iñi yo cuhva yo ñayiví iyó yo tsa cuenda inga yo. ¹⁴ Nyoho cuví ra vaha iñi tsi yu tatun javahá ndo tsa caahán yu tsihin ndo.

¹⁵ Ña caahán ca yu tyin musu yu cuví tsi ndo, tyin iin musu ña tsító ra náa javahá tsitohora. Caahán yu tyin ra vaha iñi tsi yu cuví ndo, tyin tandihí tsa caahán Jutu yu tsihin yu tan jactó yu itsi tsi ndo. ¹⁶ Ñavin nyoho nacatsí tsi yuhu tyin maa yu nacatsí tsi ndo. Tan tavá tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuhaha. Tan cuaha xaan niñi cua coo, tan ña cua tiví maa tsi. Tacan tan cua cuhva Jutu yu tandihí tsa ndacan ndo tsi ra tsihin sivi yu. ¹⁷ Tyehen caahán yu tsihin ndo. Cuñí tahan ndo tsi ndo.

Nyiví taahán iñi tsa iyó nu ñuhu ñayiví, ndasí cuñí ñi nyehé ñi tsi ra Jesús tan tsi nyiví nyicún tsi ra

¹⁸ Tatun ndasí cuñí nyiví taahán iñi tsa iyó nu ñuhu ñayiví ihya nyehe ñi tsi ndo, coto ndo tyin jihna ca maa yu ndasí cuñí ñi nyehé ñi. ¹⁹ Tun tsatiny nyiví cuenda nu ñuhu ñayiví ihya cuví ndo, cua cuñí nyiví tsi ndo tumaa tsa cuñí tahan maa ñi tsi ñi. Maa tyin nyoho tsa nacatsí yu tsi ndo mahñu ñi. Yacan cuenda ndasí cuñí ñi nyehé ñi tsi ndo, tyin ñavín ca nyiví cuenda nu ñuhu ñayiví ihya cuví ndo. ²⁰ Ndýcuhun iñi ndo tsa cahán yu tsihin ndo, tyin ndi iin musu tan ña cahnu ca cuví ra tan ñavín ca tsitohora. Tatun tyáa yahvi nyiví tsa caahán yu tsihin ñi, tacan cua tyáa yahvi

ndihí ñi tsa jacuahá ndo tsi ñi. Tan tatum ndasí icá ñi tsihin yu, ndasi cua ica ndihí ñi tsihin ndo.²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsí tsi yu.

²² Tun tsatyin ña quitsi yu cahan yu tsihin ñi, nduve cuatyí ñi. Maa tyin vityin nduve náa siqui cua tyaa ñi cuatyí ñi, tyin tsa yahá cahan yu tsihin ñi.²³ Nyivi tsa ndasí cuñi nyehé tsi yu, ndasí cuñi ndihí ñi nyehé ñi tsi Jutu yu.²⁴ Nduve cuatyí ñi, tun tsatyin ña javahá yu tsa ña cuví javaha inga nyivi. Maa tyin tsa nyehe ñi tandihí yacan. Vasu ndi maa tsa nyehe ñi can maa tyin ndasí cuñi ñi nyehé ñi tsi yu, tan tsi Jutu yu.²⁵ Maa tyin tandihí yacan cuví, tyin cuñi tsi cundaum cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasí cuñi ñi nyehe ñi tsi yu”, catyí tsi.

²⁶ Maa tyin cua quitsi Tatyi li, ra tsa caahán tsa nditsa. Ra ican cuví ra tsa cua cuhva tunyee iñi tsi ndo. Quíví cua tsaa yu nu nyaá Jutu yu tan cua jaquitsi ndi Tatyi li nu yucú ndo. Tan cua cahan ra tumañi iñi tsa cuenda yu.²⁷ Tan nyoocho tucu cua cahan ndo tumañi iñi tsa cuenda yu, tyin yucú ndo tsihin yu nda quíví quitsahá jahá tysiñu yu.

16

¹ Caahán yu tyehen tsihin ndo tyin tacan tan ña jandihi ndo tsa tsinú iñi ndo tsi yu.² Cua tava cuii nyiví tsi ndo vehe ñuhu. Tan coo quíví cua cahñi ñi tsi ndo, tan cua cuñi ñi tyin tysiñu Nyoo javahá ñi.³ Tacan cua ica ñi tyin ña nacoto ñi tsi Jutu yu tan ndi tsi maa yu.⁴ Caahán yu tsehe tsihin ndo tyin quíví tsa cua cuvi tumaa cuhva caahán yu tsihin ndo, cua nducuhun iñi ndo tyin tsa yahá cahan yu tuhun ihyá tsihin ndo.

‘Na cahan yu tyehen tsihin ndo nda jihna tyin ndi nyiví maa yu tsihin ndo.

Tysiñu jahá Tatyi li Nyoo

⁵ Maa tyin vityin cua cuhun yu tyin cunyaa yu tsihin ra tsa jaquitsí tsi yu. Ndi intuhun ndo tan ña tsicá tuhun ndo tsi yu nu maa cua cuhun yu.⁶ Tyin tsa nducuihya cuñi ndo tsa caahán yu tyehen tsihin ndo.⁷ Caahán yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatum ña cuhun yu, ña cua quitsi Tatyi li tsa cua cuhva tunyee iñi tsi ndo.

Maa tyin tatum cuhun yu, cua jaquitsi yu tsi ra.⁸ Tan quíví quitsi ra, cua jacoto ra tsi nyiví iyó nu ñuhu ñayiví ihyá tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo.⁹ Cua jacoto ra tsi ñi tyin iyó cuatyí ñi tyin ña tsinú iñi ñi tsi yu.¹⁰ Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu.¹¹ Tan cua coto ñi tyin cua janda Nyoo cuatyí ñi tyin tsa yahá cundaq cuatyí nu cuví cuihna, nu ndacá ñaha nu ñuhu ñayiví ihyá.

¹² Tan cuaha ca tsa nyaá cahan yu tsihin ndo, maa tyin ña cua cutuñi iñi ndo can vityin.¹³ Quíví quitsi Tatyi li tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiní ra. Tan cua jacoto ra náa cua cuvi nu cuahán ca tsi itiy nuu.¹⁴ Cua jacobnu ra tsi yu, tyin cua naquihin ra tuhun yu tan cua janaha ra can tsi ndo.¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyi li cua naquihin ra tuhun yu, tan cua janaha ra tsi nyoocho.

Ra tsicá tsihin ra Jesús cuiihyá xaan cuñíra naha, maa tyin nu cuahán ca tsi quíví cua cusí iñi ra naha, catyí ra Jesús

¹⁶ Na naha cuui ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuui ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra.¹⁸ ¿Náa cuñi tsi catyí tsa “ña naha cuui ca” can? Na cutuñi iñi yo náa tuhun caahán ra —catyí ra naha.

¹⁹ Tan tuví iñi ra Jesús tyin cuñi ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuui ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo?²⁰ Tsa nditsa caahán yu tsihin ndo tyin nyoocho cua nducuihya iñi ndo tan cua vacu ndo, maa tyin nyiví cuenda nu ñuhu

ñayiví cua cusii iñi ñi. Vasu cuiihya cuñíndo vityin, tucuihyla iñi can cua nanduvi tsi tsa sií.²¹ Cuhva tsa cua cacu sehe iñi ñaha, nyehé ña tundoho. Maa tyin tsa yaha cacu lee can, ndi ña ñuhu ca iñi ña tsa uhvi can tsa cuenda tsa sií cuñí ña tyin cacu iñi lee sehe ña.²² Tacan tucu nyoooho vityin, cuiihya xaan cuñíndo. Maa tyin cua nyehenyico yu tsi ndo inga tsaha. Tacan tan cua cusii nyico iñi añimando. Tan yoñi cuviquihin nyaa tsa sií can tsi ndo.

²³ Quiví can nduve ca tsa cua ndaca tuhundo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandíhi tsa ndacan ndo tsi ra tsihin sivi yu.²⁴ Nda vityin tan ñaha ca ndacan ndo tsa ndacan ndo tsihin sivi yu. Ndacan ndo tan cua ñihido tan cusii xaan iñi ndo.

Ra Jesucristo cuvíjaha canaa ra tsa ña vaha iyó nu ñuhu ñayiví

²⁵ Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuaha yu tsi ndo, maa tyin cua catyituhun catsi yu tuhun Jutu yu tsihin ndo.²⁶ Quiví can tsihin sivi yu cua ndacan ndo tsa ndacan ndo tsi ra. Tan ña tsíñi ñuhu ca tsa cahan ndaahiyu tsihin Jutu yu tsa cuenda ndo.²⁷ Tyin maa Nyoo Jutu yu cuñíra tsi ndo. Cuñíra tsi ndo tyin nyoooho cuñíndo tsi yu, tan tsinú iñi ndo tyin nu nyaá Nyoo quee yu.²⁸ Nu nyaá Jutu yu quee yu tyin quitsí yu nu ñuhu ñayiví ihya. Maa tyin vityin cua nacoo yu ñuhu ñayiví ihya tyin cua cunuhu nyico yu nu nyaára —catyíra Jesús.

²⁹ Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.³⁰ Vityin nyehé ndi tyin tsító un tandíhi cuii maa, tan ña tsíñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyíra naha tsihin ra Jesús.

³¹ Tan catyí ra Jesús:

—Tan vityin ja tsinú iñi ndo tsi yu?

³² Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo siín siín ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaára tsihin yu.

³³ Caahán yu tandíhi tsehe tsihin ndo na coo

tsa taxin añima ndo tsa cuenda tsa iñi cuvíndo tsihin yu. Nu ñuhu ñayiví ihya cua nyehé ndo tundoho, maa tyin janyee ndo iñi ndo, tyin yuhu tsa jahá canaa yu tsa ñavaha tsa iyó nu ñuhu ñayiví ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

¹ Tsa yaha cahan ra Jesús yacan, nanyehe ndaa ra ityi andiví tan catyíra:

—Jutu Mañi yu, tsa tsaa hora vityin. Jacahnu tsi yu tsa cuví yu sehe un, tyin tacan tan jacobnu tucu maa yu tsi un.² Tyin tava tyiñu un tsi yu tsa quíhi ndaha yu tandíhi nyiví, tan cuhva yu ñayiví nyító tsa ña cua naa maa tsi tandíhi nyiví tsa tsahá un tsi yu.

³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsí un, tacan tan cuví coo ñi ñayiví nyító tsa ña cua naa maa.

⁴ *Tsa jacobnu yu tsi un nu ñuhu ñayiví ihya tan tyiñu tsa tava tyiñu un tsi yu tsa ndihí tsi javahá yu.*⁵ Tan vityin, Jutu Mañi yu, cua quitsi nahu nyico yu nu nyaá un, tan cuñí yu tyin nacuhva un tsa cahnu cuví yu tsihin un tsi yu, tumaa tsa tsicó maa tsi yu nda ndi cumañi ca tsinu ñuhu ñayiví.

⁶ *Tandíhi ra tsa tsahá un tsi yu naha ra, ra tsa natava vaha un mahñu nyiví iyó nu ñuhu ñayiví ihya, jacotó yu tsi ra naha yóo ra cuví yooho.* Tsii maa un cuví tsi ra naha tan tsahá un tsi ra naha tsi yu. Tan tyáyahvi ra naha tsa caahán un.⁷ Vityin tsítóra naha tyin tandíhi tsa tsahá un tsi yu, nu nyaá un quee tsi.⁸ Tyin catyí tihun yu tsihin ra naha tsa cahan un tsihin yu, tan naquihin vaha ra naha itsi. Tan tsítóra naha tyin nditsa tsa quee yu nu nyaá un, tan tsinú iñi ra naha tyin maa un jaquitsí tsi yu.

⁹ *Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandíhi nyiví, maa tyin tsicán tahvi yu tsa cuenda ra tsa tsahá un tsi yu naha ra, tyin tsi maa un cuví ra naha.*¹⁰ *Tandíhi nyiví tsa cuví tsii un, tsahá tucu un tsi ñi tsi yu.* Tan maa ñi janahá tsa cahnu cuví yu.

¹¹ *Yuhu ña cua ndoo ca yu nu ñuhu ñayiví ihya, maa tyin maa ra naha cua ndoo ra naha nu ñuhu ñayiví ihya.* Tan yuhu cua cunyaa nyico yu tsihin un. *Jahá cuenda tsi*

ra tsa tsahā un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuvi ra naha, tumaa tsa iin ñi cuví maa yo.
¹² Quivi tsinyij yu nu ñuhu ñayiví ihyá tsihin ra naha, jahá cuenda yu tsi ra tsa tsahā un tsi yu naha ra tsihin tunyee iñi tsa iyó tsi un. Tan jahá cuenda yu tsi ra naha. Tan ndi intuhun ra naha tan ña tsinaq̄ ra naha. Maa tyin ra tsa tsa nyaá maa tsa cunaa, ra ican ñi cuví ra cuanaq̄ tan quítä cuhva tumaa tsa catyí nu tutu maa un.

¹³ 'Vityin tsa cua quitsí yu nu nyaá un, maa tyin tsitsi tsa ndi nyí yu nu ñuhu ñayiví ihyá, caahán yu tsehe, tyin na cusii iñi ra naha tumaa tsa sii cuñí maa yu.
¹⁴ Yuhu cahan yu tsihin ra naha tsa caahán un, maa tyin nyiví cuenda nu ñuhu ñayiví ndasi cuñí ñi nyehe ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayiví cuví ra naha. Tumaa yuhu, ñavin ra cuenda nu ñuhu ñayiví cuví yu.
¹⁵ Ña tsicán yu tsi un tsa tava un tsi ra nyicún tsi yo naha ra nu ñuhu ñayiví ihyá, maa tyin jahá cuenda tsi ra naha coto náá jahá nu ña vaha tsi ra naha. ¹⁶ Tumaa yuhu ñavin ra cuenda nu ñuhu ñayiví cuví yu, tacan tucu ra ihyá naha ra, ñavin ra cuenda nu ñuhu ñayiví cuví ra naha. ¹⁷ Jacu ii tsi ra naha tsihin tsa nditsa, na javaha ra naha maa ñi maa cuhva cuñí maa un. Tyin tsa caahán un, yacan cuví tsa nditsa. ¹⁸ Tumaa tsa jaquitsí un tsi yuhu nu yucú nyiví iyó nu ñuhu ñayiví, tacan cua jacuhun ndíhi tucu yuhu tsi ra tsa nyicún tsi yo, nacahan ra naha tuhun yo tsihin nyiví tsa fiáha ca coto tuhun yo. ¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ 'Ñavin tsa cuenda ra ihyá ñi naha ra tsicán tahvi yu tsi un. Tsicán tahvi ndíhi tucu yu tsi un tsa cuenda nyiví tsa cua tsinu iñi tsi yu, tsa cuenda tsa cua cahan ra ihyá naha ra ityi nuu ca. ²¹ Tsicán yu tsi un na iin ñi cuvi ñi tsihin inga ñi. Tan na iin ñi cuvi ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandíhi nyiví iyó nu ñuhu ñayiví cua tsinu iñi ñi tyin maa un jaquitsí tsi yu. ²² Yuhu tsahā yu tsa cahnu cuví un tsi ñi nyicún tsi yo. Juvin ñi maa tsa cahnu cuví un tsa tsahā

un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo.
²³ Yuhu nyí yu tsihin ñi. Tan yooho nyaá un tsihin yu tyin tacan tan iin ña nyiví cua cuvi ñi. Tan coto tandíhi nyiví iyó nu ñuhu ñayiví tyin maa un jaquitsí tsi yu, tan cuñí xaan un tsi ñi nyicún tsi yo, tumaa tsa cuñí maa un tsi yu.

²⁴ Jutu Mañi yu, maa un tsahā tsi ñi tsi yu. Tan cuñí yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsahā un tsi yu, tyin cuñí un tsi yu nda ndi cumañi ca tsinu ñuhu ñayiví. ²⁵ Jutu Mañi yu, ra vaha cuví un, tan nyiví cuenda nu ñuhu ñayiví ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihyá tsitó ra naha tyin maa un jaquitsí tsi yu. ²⁶ Tsa cahan yu tsihin ra naha yóo ra cuví un, tan cua cahan nyico tucu yu inga tsaha, tyin tumaa cuhva cuñí un tsi yu, tacan cua cuñí tahan ra naha tsi ra naha. Tan yuhu cunyaa yu añima ra naha.

18

Nu cua tyihi ra Israel naha ra tsi ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Tsa yahá tsa cahan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihví ra Jesús tsihin ra tsicá tsihin ra. ² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsahán tsihin ra tsicá tsihin ra. ³ Tan ican tsaa ra Judas tsihin andaru cuaha tan cuaha ra vítya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaa ra naha ican, nyisó ra naha mityi, tan nyisó ra naha lámpara tan ñuhu yiti. ⁴ Tan ra Jesús tsa tsitó maa ra tandíhi tsa cua tahan ra. Quita ra tan tsicá tuhun ra tsi ra naha:

—¿Yóo nanducú ndo? —catyí ra.

⁵ Tan catyí ra naha tsihin ra:

—Ra Jesús ra ñuu Nazaret.

Tan catyí ra Jesús:

—Yuhu cuví —catyí ra.

Tan ra Judas, ra tsa xico tsi ra Jesús tsi nu xaan iñi tsi ra nahmu, nyí ndíhi ra tsihin ra naha. "Cuhva tsa cahan ra Jesús: "Yuhu cuví", tandíhi ra naha nacaca tsata ra naha tan nduvá ra naha nu ñuhu. ⁷ Tacan tan tsica tuhun nyico ra Jesús tsi ra naha inga tsaha, tan catyí ra:

—¿Yóo nanducú ndo?

Tan catyí ra naha:

—Ra Jesús ra ñuu Nazaret.

* Tan catyí ra Jesús:

—Tsa cahān yu tsihin ndo tyin yuhu cuví. Tatun yuhu nanducú ndo, jaña ndo tsi tsicá tsihin yu naha ra na cunuhun ra naha —catyí ra Jesús tsihin ra naha.

⁹ Yacan cahān ra Jesús tyin na cundaa tsa cahān ra nda ityi tsata ca nu catyí ra: “Ra tsa tsahá Jutu yu tsí yu, ndi intuhun ra naha tan ña tsinaá ra naha.” ¹⁰ Tacan tan taya ra Simón Pedro mityi tsa ndahá ra tan tsahnya ra soho cuaha iin ra tsa nañí Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. ¹¹ Maa tyin ra Jesús catyí ra tsihin ra Pedro:

—Natyihí mityi un tsitsi vena un. Tatun Nyoo Jutu yu tan cuñí ra tsa nyehe yu tun-doho, taahán tsi tsa nyehe yu can —catyí ra Jesús tsihin ra.

Nu tsindaca ra naha tsi ra Jesús nuu ra cuví ityi nuu tsihin jutu naha ra

(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tiiñ ra naha tsi ra Jesús, tan tsahñi ra naha tsi ra, ¹³ tacan tan tsindaca ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. ¹⁴ Ra Caifás can cuví ra tsa cahān tsihin ra cuví ityi nuu tsihin nyíví Israel naha ra tyin vaha ca tsa cúu intuhun ñi rayíi tsa cuenda tandihí nyíví ñuu.

Nu caahán ra Pedro tyin ña nacotó ra tsi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsica tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quíhví ra can tsihin ra Jesús nuquehe ra jutu can. ¹⁶ Maa tyin ra Pedro ndoo ra ityi tsata vehe. Yacan cuenda quita ra tsa nacotó ra jutu can, tan cahān ra tsihin ñaha tsa nyaá yuvehe can. Tan jayahá ra tsi ra Pedro ityi tsitsi nuquehe can. ¹⁷ Tacan tan ñaha tsa nyaá yuvehe can tsicá tuhun ña tsi ra Pedro, tan catyí ñaa:

—¿A ñavin yooho cuví iin ra tsicá tsihin ra can?

Tan catyí ra Pedro:

—Ñavin. Ñavin yu cuví —catyí ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jatahān ra naha ñuhu tyin vitsin xaan. Tan nyecú nyityi ra naha tuñu ra naha ñuhu. Tan nyíi ndihí tucu ra Pedro tuñu ra ñuhu tsihin ra naha ican.

Nu janahma ra jutu tsaahnu tsi ra Jesús
(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi. ²⁰ Tan catyí ra Jesús tsihin ra:

—Yuhu nuu tandihí nyíví cahan yu. Tan jacuahá yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihyá nu tuhvá tandihí nyíví Israel ndu iin. Tan nduve nu cahān xeehe yu. ²¹ ¿Nacuenda tsicá tuhun un tsi yuhu? Vaha ca ndaca tuhun un tsi nyíví tsa tsifí tsa cahān yu, tan maa ñi cua catyí tuhun náa cahān yu tsihin ñi tyin maa ñi tsitó náa cahān yu —catyí ra Jesús tsihin ra.

²² Cuhva tsa caahán ra Jesús yacan, tan iin vitya vehe ñuhu tsa yucu ican, cañí ra iin tsyo nuu ra Jesús tan catyí ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyí ra tsihin ra Jesús.

²³ Tan catyí ra Jesús:

—Tatun cahān yu iin tsa ña vaha, cahān tsihin yu nda tsa ña vaha cahān yu. Maa tyin tatun cahān yu tsa vaha, ¿nacuvi tyin cañí un tsi yu? —catyí ra Jesús tsihin ra can.

²⁴ Yaha can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26.71-75; Mr. 14.66-72; Lc. 22.58-62)

²⁵ Tan nyaá nyityi ra Pedro tuñu ra ñuhu. Tan catyí ra naha tsihin ra:

—¿A ñavin yooho cuví iin ra tsicá tsihin ra can? —catyí ra naha tsihin ra.

Tan ra Pedro tyihí xeehe ra, tan catyí ra:

—Ñavin. Ñavin yu cuví —catyí ra.

²⁶ Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa

cuví nyíví ra tsa tsahnya ra Pedro soho, quitsahá tsicá tuhun ra tsi ra tan catyí ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyí ra tsihin ra Pedro.

²⁷ Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitooho.

*Nu cutuñi ra Jesús nuu ra Pilato
(Mt. 27.1-2, 11-14; Mr. 15.1-5; Lc. 23.1-5)*

²⁸ Yähä can tan quita ra naha tsihin ra Jesús yuvehe ra Caifás tan tsindacá ra naha tsi ra vehe tyiñu ra ndacá ñaha. Tsa cua cunditsin tan ra Israel ña quihví ra naha tsitsi vehe tyiñu can tyin ñavin vehe nyíví Israel cuví can. Tyin ica tsa quihví ñi Israel vehe ndavaha ñi tyin coto ña cua cuvi cuxiñi ñi quiví vico pascua. ²⁹ Yacan cuenda quita ra Pilato tyin cahan ra tsihin ra naha, tan catyí ra:

—¿Náa cuatyí tyaá ndo siquí ra ihyá? —catyí ra Pilato tsihin ra cuví ityi nuu tsihin nyíví Israel naha ra.

³⁰ Tan nacahan ra Israel naha ra tan catyí ra naha:

—Tun tsatayin ñavin iin ra iyó cuatyí cuví ra, ña cua cuhva cuenda ndi tsi ra tsi un —catyí ra naha tsihin ra Pilato.

³¹ Tacan tan catyí ra Pilato tsihin ra naha:

—Quihin ndo tsi ra, tan tañsi tuñi ndo tsi ra tumaa catyí maa ley ndo.

Tan nacahan ra Israel can naha ra tan catyí ra naha:

—Maa tyin nyuhu nyíví Israel nduve ndatu iyó tsi ndi tsa cahñi ndi tsi nyíví —catyí ra naha.

³² Tacan cundaq tsa cahan ra Jesús náaca cua cíu ra. ³³ Yähä can tan quihví nyico ra Pilato tsitsi vehe tyiñu can inga tsaha. Tan cana ra tsi ra Jesús tan tsicá tuhun ra tsi ra:

—¿A yooho cuví rey cuenda nyíví Israel? —catyí ra tsihin ra.

³⁴ Tan catyí ra Jesús:

—¿A tsa cuñí ñi maa un tsicá tuhun un tsehe tsi yu o iyó inga nyíví natyuhu tsi un cuhva cahan un tsihin yu? —catyí ra Jesús tsihin ra Pilato.

³⁵ Tan catyí ra Pilato:

—Ñavín ra ñuu Israel cuví yuhu. Juvín ñi maa ra ñuu maa un naha ra tan ra cuví ityi nuu tsihin jutu ñuu maa un cuví ra tsaha cuenda tsi un tsi yu. ¿Náa javahá un? —catyí ra tsihin ra Jesús.

³⁶ Tacan tan nacahan ra Jesús tan catyí ra:

—Nu ndacá ñaha yu ñavin cuenda nu ñuhu ñayiví ihyá cuví tsi. Tun tsatayin ndacá ñaha yu nu ñuhu ñayiví ihyá, ra nyicún tsi yu cañí tahan ra naha tyin tacan tan yoñi cua cuhva cuenda tsi yu ndaha ra Israel naha ra. Maa tyin nu ndacá ñaha yu, ñavin cuenda ihyá cuví tsi —catyí ra Jesús tsihin ra Pilato.

³⁷ Tacan tan catyí ra Pilato tsihin ra:

—¿Tun tacan, rey cuví maa un? —catyí ra Pilato tsihin ra Jesús.

Tan nacahan ra Jesús tan catyí ra:

—Rey cuví yu tumaa tsa cahán maa un. Yacan cuenda cacu yu tan vatsí yu nu ñuhu ñayiví ihyá, tyin cahan yu tsa nditsa. Tandihi nyíví tsa tyaá yahvi tsa nditsa, tyaá soho ñi tsa cahán yu —catyí ra Jesús.

³⁸ Tan catyí ra Pilato tsihin ra:

—¿Tan náa cuví tsa nditsa? —catyí ra.

Tsa yähä tsa tsicá tuhun ra Pilato yacan, quita ra tsicahan nyico ra tsihin ra Israel naha ra inga tsaha tan catyí ra:

—Yuhu ña nañihi maa yu ndi intuhun cuatyí ra ihyá.

*Nu cua cahñi ra naha tsi ra Jesús
(Mt. 27.15-31; Mr. 15.6-20; Lc. 23.13-25)*

³⁹ Maa tyin nyoocho iyó ndo tuhun tsa tsicán ndo na tava yu tsi iin ra nyíl vehe caa tsa iyó vico pascua ihyá. ¿A cuñí ndo tava yu tsi ra tsa cuví rey cuenda ndo tsa cuví ndo nyíví Israel? —catyí ra Pilato tsihin ra naha.

⁴⁰ Tacan tan quitsahá caná tsaa tandihi ra naha tan catyí ra naha:

—¡Ña tava un tsi ra can! ¡Táva tsi ra Barrabás! —catyí ra naha.

Tan ra Barrabás can cuví ra iin ñasuhu.

19

¹ Tacan tan quihín ra Pilato tsi ra Jesús tan tava tyiñu ra na cañí andaru tsi ra.

² Tan andaru can javahá ra naha iin corona iñu tan tyihí ra naha jiñi ra Jesús. Tan jacunditsí ra naha iin jahma tunduuhva tsi ra, tahan tsa tuhvá ra cuví rey tsinditsí.

³ Tacan tan natuhvá ra naha nu nyáá ra tan cahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyíví Israel! —catyí ra naha, tan cañí ra naha nuu ra.

⁴ Tacañ tan quita nyico ra Pilato inga tsaha tan catyí ra tsihin ra naha:

—Nyéhe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵ Tan quita ra Jesús yihi corona iñu jiñi ra, tan nditsí ra jahma tunduuuhva can. Tacañ tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quitsaha caná tsaa ra naha tan catyí ra naha:

—¡Tyaa tsi ra nu cruu na cíu ra! —catyí ra naha.

Maa tyin catyí ra Pilato tsihin ra naha:

—Quihin ndo tsi ra tan cañni maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan̄ ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñi tsi tsa cíu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsíñi ra Pilato yacan, tan nayuhví xaan ca ra. ⁹Tan quihví nyico ra inga tsaha tsitsi vehe tyiñu, tan tsicá tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacañ tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsító un tyin ra cumí tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan̄ ra Jesús tan catyí ra:

—Tun tsatiny ña tsaha Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavín ca yooho —catyí ra Jesús tsihin ra Pilato.

¹² Tsa ndíhi cahán ra Jesús yacan, tan quitsaha nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavín amigo ra César, ra cuví rey cahnu, cuví tsi un! Tyin tandíhi ra tsa caahán tyin rey cuví ra naha,

ra xaan iñi tsi rey cahnu cuví ra naha —catyí ra naha.

¹³ Tacañ tan tsa tsíñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñi tsi catyí: “Nu canyí yuu”.

¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacañ tan catyí ra Pilato tsihin ra Israel can naha ra:

—¡Ihya nyaá rey ndo!

¹⁵ Maa tyin cana tsaas ra Israel naha ra tan catyí ra naha:

—¡Na cíu ra! ¡Na cíu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yoñi ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacañ tan tsaha cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihín andaru tsi ra, cuahán ra tsihin ra naha.

Nu tsíñi ra Jesucristo nu cruu

(Mt. 27.32-44; Mr. 15.21-32; Lc. 23.26-43)

¹⁷ Tan nyisó ra Jesús cruu ra, cuahán ra iin nu nañi: “Yiquí Jiñi Ndíyi”. Tan tsihin yuhu hebreo nañi tsi Gólgota. ¹⁸ Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaq̄ ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaq̄ ra naha tsi ra Jesús mahñu.

¹⁹ Tan tavá tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.” ²⁰ Tan cuaha nyivi Israel cahví ñi tsa caahán can, tyin yatiñin ñi ñuu ñi cuví nu tsaquinya ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latín. ²¹ Yacan cuenda ra cuví ityi nuu tsihin jutu cahán ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

²² Maa tyin catyí ra Pilato:

—Tsa tsa yaha tyaa yu, nandoo maa tsi tacan —catyí ra tsihin ra naha.

²³ Tsa yah_a tya_a ra andaru can naha ra tsi ra Jes_{us} nu cruu, naquihin ra naha jahma ra. Tsa cumi taahan ra naha quihin luxu luxu jahma ra. Tan ndoo jahma ra tsa quicu cañi ñi tsa tsindasi_a ra. ²⁴ Tan andaru can natuh_un tahan ra naha:

—Na cua cahnya yo itsi. Jasiq_u suuhva jihna yo na nyehe yo yóo cua jaha canaa jahma can —caty_i ra naha.

Tacan cuvi_i tumaa caahán nu tutu Nyoo nu caty_i tsi tyehen: “Tsats_a tahan ra naha luxu luxu jahma yu tan jasiq_u suuhva ra naha tsihin tsi, nyehe ra naha yóo ra jaha canaa itsi.” Tan yacan cuvi_i tsa javah_a ra andaru can naha ra.

²⁵ Tan nyáá sihi ra Jes_{us} yatin ñi nu nyaá cruu ra. Tan nyáá tucu tahan ña, tan ña Marí_a ñasiihi_a ra Cleofas, tan ña Marí_a quee ñuu Magdala. ²⁶ Tan nanyehe ra Jes_{us} tsi sihi_a ra, nyáá ña yatin ñi. Tan nanyehe tucu ra tsi ra tsa tsica_a tsihin ra, ra tsa cuñi_a xaan ra. Tan caty_i ra tsihin sihi_a ra:

—Miya, va ra sehe un nyáá tsihin un juvin —caty_i ra.

²⁷ Tacan tan caty_i ra tsihin ra tsa cuñi_a xaan ra:

—Tsaa, va sihi un nyáá tsihin un juvin —caty_i ra tsihin ra.

Nda quivi_i can tan quihin_a ra tsi ña, cua- han tsihin ra yuvehe ra. Tan jah_a cuenda ra tsi ña.

Nu tsih_i ra Jes_{us}

(Mt. 27.45-56; Mr. 15.33-41; Lc. 23.44-49)

²⁸ Tsa yah_a yacan, tsa nyehe_a ra Jes_{us} tyn tsa ndih_i tyiñu jah_a ra. Tacan tan caty_i ra:

—Na ityi ñini yu —caty_i ra.

Tan tsihin yacan cunda_a tsa nyaá nu tutu Nyoo nu caahán tsi nácaa cua cuú_a ra.

²⁹ Tan ican nyaá iin quiy_i nu yihi_i vinu iya. Tacan tan jatyij_i ra naha tsa cuvi_i yahma tumaa caa caty_i tsihin vinu iya can. Tan tyaa_a ra naha yacan nu iin yutun hisopo. Tan janda_a ra naha tan tyana_a ra naha can yuhu_a ra. ³⁰ Tsihi_i ra Jes_{us} vinu can tan caty_i ra:

—Tsa iyó vaha tandih_i vityin —caty_i ra.

Tacan tan nacañi_a nuu ra jiñi_a ra tan tsihin ra.

Nu tutsi_i ra andaru yoco xaan yiqui_i naha ra Jes_{us}

³¹ Tsa ndi cumañi_a intuhun ña quivi_i tan tahan tsi quivi_i vico cahnu pascua, tan ra cuvi_i ityi nuu tsihin nyiv_i Israel ña cuñi_a ra naha tsa ndoo cuñu ñuhu_i ra tsa tsihin_i can

naha ra nu cruu quivi_i quitatú, tyn quivi_i quitatú, quivi_i ii cuvi_i tsi tsa cuenda ra naha. Yacan cuenda tsican_a ra naha tumañi iñi tsi ra Pilato na tava tyiñu_i ra na cahnu andaru sihin_i ra tsa ticaa nu cruu can naha ra, tyn tacan tan numi ñi cuú_i ra naha, tan jatsiyo_i ra naha cuñu ñuhu_i ra naha. ³² Tacan tan cuahán andaru nu nyecu_i cruu can. Tan tsahn_i ra naha sihin iin ra ticaá iin tsioxiñi_i ra Jes_{us}. Tan tsahn_i nyico_i ra naha sihin_i inga_i ra tsa ticaa inga_i tsioxiñi_i ra.

³³ Maa tyn cuhva tsa natuhv_a ra naha nu ticaá_i ra Jes_{us}, nyehe_i ra naha tyn tsa tsihin maa_i ra. Yacan cuenda ña tsahn_i ca_i ra naha sihin_i ra.

³⁴ Maa tyn iin andaru can tutsi_i ra yoco_i xaan yiqui_i naha ra Jes_{us}. Tan quita_i niñi_i tan nduty_i. ³⁵ Ra tsa nacaty_i tuhun yacan, ra tsa nyehe_i vaha cuvi_i ra. Tan tsa nditsa caahán_i ra, tyn maa_i ra tsitó_i tyn tsa nditsa caahán_i ra, tacan tan tsinu ndih_i tucu iñi_i nyooho. ³⁶ Tacan cuvi_i tyn tacan tan cunda_i tsa caty_i tuhun Nyoo nu caty_i tsi: “Ndi intuhun yiqui_i ra tan ña tahnu.” ³⁷ Tan iyó_i inga_i nyico_i nu caty_i tsi nu tutu Nyoo tyehen: “Cua nyehe_i nyiv_i tsi ra tsa tutsi_i ra naha yoco_i xaan.”

Nu quihvi_i ñuhu_i ra Jes_{us}

(Mt. 27.57-61; Mr. 15.42-47; Lc. 23.50-56)

³⁸ Tsa yah_a yacan, ra José_i ra ñuu Arimatea_i tsican_i ndatu_i ra tsi_i ra Pilato_i na cuhva_i tsa naquihin_i ra cuñu ñuhu_i ra Jes_{us}. Tan ra José_i can cuvi_i ra iin_i ra yihi_i cuenda_i ra Jes_{us} vasu_i tsa xeehe_i ñi_i tsa cuenda_i tsa yuuhví_i ra tsi_i ra cuvi_i ityi_i nuu tsihin_i nyiv_i Israel. Tacan tan tsah_i ra Pilato_i ndatu_i tsi_i ra, tan tsahan_i ra José_i tsinaquihin_i ra cuñu ñuhu_i ra Jes_{us}.

³⁹ Tsahan_i ndih_i tucu_i ra Nicodemo, ra tsa tsahan_i tsicahen_i tsihin_i ra Jes_{us} tsa tsa cuua. Tsa_i ra tsihin_i nduty_i tami. Tan iin_i nduty_i tami_i tsa nañi_i mirra nasaca_i nuu tsihin_i inga_i tsa nañi_i áloe. Tan quita_i tsi_i tumaa oco utsi_i kilu_i tsa tandih_i tsi_i. ⁴⁰ Tacan tan ra José_i tsihin_i ra Nicodemo quihin_i ra naha cuñu ñuhu_i ra Jes_{us} tan cav_a nuu_i ra naha tsi_i ra tsihin_i jahma cuiñi_i tsa tyihi_i ra naha nduty_i tami_i can, tumaa iyó_i maa_i nyiv_i Israel tun_i cua cutsi_i ñi_i ndiy_i tsitsi_i ñuhu_i. ⁴¹ Yatayin_i nu tsahn_i ra naha tsi_i ra Jes_{us} nu cruu iyó_i iin_i cora yutun tata. Tan tsitsi_i cora can nyaá_i iin_i ñaña_i tsa_i nu ñaha_i ca_i cuyucu_i ndi_i intuhun_i ndiy_i.

⁴² Ican_i ñi_i tinyi_i ra naha cuñu ñuhu_i ra Jes_{us} tyn yatin_i ñi_i nyaá_i ñaña_i can tan tsa_i cua tahan_i tsi_i quivi_i quitatú_i nyiv_i Israel.

*Nu nandoto ra Jesús
(Mt. 28.1-10; Mr. 16.1-8; Lc. 24.1-12)*

¹Tsa naa ca tsa cuvi tumingu, ña Maríá queeñuu Magdala tsahan ña nu ñañaia ra Jesús. Tan nyehé ña tyin nduve ca yuu ndasí yuhu ñañaia can. ²Tacan tan tsinú xaan ña cuahán ña nu nyíi ra Simón Pedro tan inga ra tsica tsihin ra Jesús, ra tsa cuñí xaan ra Jesús. Tan catyí ña tsihin ra naha:

—Quihín nyíví cuñú ñuhu Jutu Mañí yo tsitsi ñaña, tan ña tsító yo nu maa tsindaca ñi itsi —catyí ña María tsihin ra Pedro tan tsihin inga ra can.

³Tacan tan ra Pedro tan inga ra can cuahán ra naha nu ñaña. ⁴Tan cuahán nduvi taahan ra naha iincaa ñí, tsinú ra naha. Maa tyin ñihí ca tsinú inga ra can tan ñavin ca ra Pedro, jihna ca ra can tsaa nu ñaña. ⁵Quitsaha nyehé ihñí ra tsitsi ñaña, tan nyehé ra jahma cuñí tsa cavañuu cuñú ñuhu ra Jesús, cavyí can. Maa tyin ña quihví ra tsitsi ñaña. ⁶Yahá can tan tsaa ndihí ra Simón Pedro tsata ra, tan ra ican quihví ra tsitsi ñaña can. Juvín ñi nyehé ndihí ra can jahma can cavyí tsi. ⁷Tan juvín ñi nyehé ndihí ra tyin jahma tsa tsindasí jiñí ra Jesús, ña iin ñi nu cavyí can tsihin inga jahma can, yiñí tahnu can tan cayucú siin can. ⁸Tacan tan quihví ndihí inga ra tsica tsihin ra Jesús can, ra tsa tsaa tsa jihna nu ñaña can. Tan nyehé ra tsa cuví can, tan tsinú iñi ra. ⁹Tyin tsa jihna, ña cutuñí iñi ra naha tsa caahán nu tutu Nyoo, tyin ra Jesús cuñí tsi tsa nandoto ra tsa yaha cíu ra. ¹⁰Tacan tan cuanuhu ra tsica tsihin ra Jesús nda yuvehe ra naha.

Nu quituví ra Jesús nuu ña María queeñuu Magdala

(Mr. 16.9-11)

¹¹Maa tyin tsa tsaa nyico ña María, ndoog ña nyaá ña tsacú xaan ñia ityi tsata ñañaia can. Tan tsitsi tsa tsacú ñia, nyehé ihñí ña tsitsi ñañaia can. ¹²Tan nyehé ña uvi taahan ángel nditsí ra naha jahma cuitsin, nyecu ra naha nu tsicavá cuñú ñuhu ra Jesús. Iin ra nyaá ityi nu tsicavá jiñí ra, tan inga ra nyaá ityi nu tsicavá tsaha ra. ¹³Tan tsica tuhun ra ángel can naha ra tsi ña tan catyí ra naha:

—¿Nacuví tsacú xaan un?

Tan catyí ña:

—Tsacú maa yu tyin quihín nyíví tsi Jutu Mañí yu, tan ña tsító yu nu maa tinyí ñi tsi ra —catyí ña tsihin ángel can.

¹⁴Ndi caahán ca ña yacan, tan nanyico coo ña tan nyehé ña tsi ra Jesús ican. Maa tyin ña tsító ña tatuń ra Jesús cuví ra.

¹⁵Tacan tan tsica tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñí maa ña tyin ra jahá cuenda cora yutun tata can cuví ra. Tan catyí ña:

—Tatta, tatuń yooho quihín tsi ra Jesús, cahan tsihin yu nu maa tsindaca un tsi ra, tyin cunaquihin yu tsi ra —catyí ña tsihin ra.

¹⁶Tacan tan catyí ra Jesús tsihin ña:

—¡María! —catyí ra tsihin ña.

Tan nanyehé ña tan cahan ña tsihin ra tsihin yuhu hebreo, tan catyí ña:

—¡Raboni! —Tan cuñí tsi catyí can: “Maestro”.

¹⁷Tan catyí ra Jesús tsihin ña:

—Ña tijí un tsi yu, tyin ñaha ca cuhun yu nu nyaá Jutu yu. Maa tyin cuaahan tan cahan un tsihin tandihí yañi yu tyin cuahan yu nu nyaá Jutu yu, tan juvin ñi Jutu ndihíndo cuví tsi ra. Cuahan yu nu nyaá Nyoo yu, tan juvin ñi Nyoo ndo cuví tsi ra —catyí ra Jesús tsihin ña.

¹⁸Tacan tan tsahan ña María ñuu Magdala can tsjacoto ña tsi ra tsica tsihin ra Jesús tyin nyehé ña tsi ra tan cahan ra yacan tsihin ña.

*Nu quituví ra Jesús nuu ra tsica tsihin ra
(Mt. 28.16-20; Mr. 16.14-18; Lc. 24.36-49)*

¹⁹Juvín ñi maa quívi can nu quitsahavitya, tsa cua cuaa tan ndu iñi ra tsica tsihin ra Jesús. Tan ndasí vaha yuvehe nu yucúra naha tsa cuenda tsa yuuuhví ra naha tsi ra cuví ityi nuu tsihin nyiví Israel. Tan ra Jesús quituví ra tan tsinyaa nyityi ra mahñúra naha. Tan tsaha ra nacumi tsi ra naha, tan catyí ra:

—Na coo tsa taxin añima ndo —catyí ra.

²⁰Tsa yaha tsa cahan ra yacan tan janahara ndaha ra tan xiin ra tsi ra naha. Tan ra ican naha ra siíxaan cuñí ra naha tsa nyehéra naha tsi Jutu Mañí yo. ²¹Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumasa ttava Jutu yu tyiñu tsi yu, tacan tavá nyico tucu yuhu tyiñu tsi nyoooho —catyí ra tsihin ra naha.

²²Tacan tan tiví ra tsíra naha tan catyí ra tsihin ra naha:

—Naquihin ndo Tatyí li Nyoo. ²³Nyíví tsa jahá ndo tucahnu iñi, iyó tucahnu iñi tsi ñi. Tan nyíví tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yahq nandotó ra

²⁴Maa tyin ra Tomás, iin rq tsicá tsihin ra Jesús, ra tsa catyí ñi: “ra tinihi”, yoñi ra nyíi tsihin ra naha tsa tsahan ra Jesús.

²⁵Yahá can tan nacatyí tuhun ra tsicá tsihin ra Jesús tsihin ra:

—Nyéhe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihi nduyu can, tan ña cuaxin yu ndaha yu yiquí naha ra, ña cua tsinu iñi yu —catyí ra Tomás.

²⁶Tsa yahá una quihví yucú nyico ra tsicá tsihin ra Jesús tsitsi iin vehe. Tan nyíi ra Tomás tsihin ra naha. Tacan tan vasu ndi maa ndasí vaha yuvehe, maa tyin ra Jesús quihví ra tan tsinyaa nyityi ra mahñu ra naha. Tan tsahá ra nacumi tsi ra naha tan catyí ra:

—Na coo tsa taxin añima ndo.

²⁷Tacan tan quitsahá catyí ra tsihin ra Tomás:

—Cuaxin nundaha un nu caahví ndaha yu ihyá. Tan cuaxin ndaha un yiquí naha yu. Tan ña cuvi un ra ndava iñi. Tsínu iñi —catyí ra Jesús tsihin ra Tomás.

²⁸Tacan tan nacahan ra Tomás tan catyí ra:

—¡Jutu Mañi yu! ¡Tan Nyoo yu! —catyí ra Tomás.

²⁹Tan catyí ra Jesús tsihin ra:

—Yoho Tomás, vityin tsinu iñi un tyin nyehé un tsi yu. Sií ca cuñi nyíví tsa nduve tsa nyehe tan tsinu iñi ñi —catyí ra Jesús tsihin ra Tomás.

Nu jacoto ra Juan nacuenda tsinu libru ihyá

³⁰Cuaha ca tsa iyo javaha ra Jesús nuu ra tsicá tsihin ra, maa tyin ña tandihí tsi nyaá nu libru ihyá. ³¹Tsinyaa tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayíví nyító tsa ña cua naa maa.

Nu quituví ra Jesús nuu utsa taahan ra tsicá tsihin ra

¹Tsa yahá can tan quituví ra Jesús nuu ra tsicá tsihin ra inga tsaha. Tyehen quituví ra yatayin ñi yuhu miñi Tiberias: ²lin ñi nu yucú ra Simón Pedro tan ra Tomás tsa nañí: “ra tinihi”, tan ra Natanael, ra ñuu Caná nu cuví Galilea. Tan yucú ndihí sehe ra Zebedeo naha ra tan uvi taahan ca ra tsicá tsihin ra Jesús. ³Tan catyí ra Simón Pedro tsihin ra naha:

—Cuahan yu cua tiñi yu tyaca —catyí ra.

Tan catyí ra naha tsihin ra:

—Cuhun ndihí ndi tsihin un —catyí ra naha.

Cuhán ra naha tan quihví ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴Tsa cuñi cunditsin tan quituví ra Jesús nu nyití yuhu miñi can. Maa tyin ra tsicá tsihin ra, ña nacoto ra naha tsi ra. ⁵Tacan tan catyí ra tsihin ra naha:

—Nyooho ra cuatyí, ¿a ñaha ca ñihí ndo tyaca?

Tan nacahan ra naha tan catyí ra naha:

—Ñaha ca ñihí ndi.

⁶Tacan tan nacahan ra Jesús tan catyí ra:

—Cuaxin ndo traya ndo tsivo cuaha yutun ndoo juvin, tan cua ñihí ndo tyaca —catyí ra Jesús tsihin ra naha.

Tacan icá ra naha. Yaha can tan ndacua ña cuví ca tava ra naha traya can nu ndutyá, tsa cuenda tsa cuaha tyaca yihi tsitsi can. ⁷Tan ra tsa cuñi xaan ra Jesús catyí ra tsihin ra Pedro:

—¡Jutu Mañi yo cuví ra! —catyí ra tsihin ra Pedro.

Tsa tsiní ra Simón Pedro tyin Jutu Mañi yo cuví ra, tsinditsí ra jahma ra, tyin tava ra can tsa cua tiñi ra tyaca, tan quihví ra cuahán ra tsitsi ndutyá can. ⁸Tan inga ra tsa tsica tsihin ra Jesús tsaq ra naha nda yuhu miñi can tsihin yutun ndoo, ixtá ra naha traya can tyin tsitu cuii can tsihin tyaca, tyin yatayin ñi yuhu miñi can yucu ra naha tumaa iin ciuent metru ñi. ⁹Tsa nuu ra naha nu ñuhu, nyehe ra naha iin nu cayú tuun ñuhu. Tan canyif iin tyaca tsihin paan nuu tuun ñuhu can. ¹⁰Tan catyí ra Jesús tsihin ra naha:

—Ndaca ndo taahan tyaca tsa ndi tiñi ndo —catyí ra Jesús tsihin ra naha.

¹¹ Tan ndaa_g ra Simón Pedro nu yutun ndoo tan quitsaha ixtá caa ra traya tyn tsitu cui can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can.

¹² Tacan tan catyí ra Jesús tsihin ra naha:

—Naha ndo tyin curumusa ndo —catyí ra Jesús tsihin ra naha.

Tan ndi intuhun ra tsicá tsihin ra, ña cana iñi ra naha ndaca tuhun ra naha yóo ra cuví ra tyin tsító ra naha tyin Jutu Mañi yo cuví ra. ¹³ Tacan tan natuhvá ra Jesús tan quihín ra paan can, tan tsaha ra tsi ra naha. Tan juvin iñi tacan icá ra tsihin tyaca.

¹⁴ Yacan cuví nu tsinu uñi tsaha quituvi ra Jesús nuu ra tsicá tsihin ra tsa yahá nandoto ra.

Nu caahán ra Jesús tsihin ra Simón Pedro

¹⁵ Tsa yahá tsa curumusa ra Jesús, tan tsicá tuhun ra tsi ra Simón Pedro:

—Simón, sehe ra Jonás, ¿a cuñí ca un tsi yu tan ñavin ca ra ihya naha ra?

Nacahan̄ ra Pedro tan catyí ra:

—Tacan Jutu Mañi yu, maa un tsító tyn cuñí yu tsi un —catyí ra Pedro.

Tan catyí ra Jesús tsihin ra:

—Cuhva tsa catsi mbee nyihi jana yu —catyí ra Jesús tsihin ra Pedro.

¹⁶ Tsicá tuhun nyico ra Jesús tsi ra inga tsaha:

—Simón sehe ra Jonás, ¿a cuñí un tsi yu? —catyí ra Jesús tsihin ra.

Nacahan̄ ra Pedro tan catyí ra:

—Jutu Mañi yu, maa un tsító tyn cuñí yu tsi un —catyí ra Pedro tsihin ra.

Tan catyí ra tsihin ra:

—Jaha cuenda mbee jana yu —catyí ra Jesús tsihin ra.

¹⁷ Tan tsinu uñi tsaha tsicá tuhun nyico ra tsi ra:

—Simón, sehe ra Jonás, ¿a cuñí un tsi yu? —catyí ra Jesús tsihin ra.

Cuhva tsa tsicá tuhun ra tsi ra tsa tsinu uñi tsaha tatuñ cuñí ra tsi ra, ra Pedro nducuihya xaan cuñí ra, tan catyí ra tsihin ra:

—Jutu Mañi yu, maa un tsító nácaa añima yu tan maa un tsító tyn cuñí yu tsi un —catyí ra.

Tan catyí ra Jesús tsihin ra:

—Jaha cuenda mbee jana yu. ¹⁸ Tsa nditsa caahán yu tsihin un tyin tsa ndi tyuvuua un tsinditsí maa un jahma un tan cuahán maa

un nu cuñí un cuhun un. Maa tyin tatuñ tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñí un cuhun un —catyí ra Jesús tsihin ra Pedro.

¹⁹ Tsa cahán̄ ra Jesús yacan, cuñí ra cahan̄ ra nácaa cua cíú ra Pedro tan cua jacahnu ra tsi Nyoo tacan. Yahá can tan catyí ra Jesús tsihin ra Pedro:

—Jaha quitsi nyicun un tsi yu! —catyí ra tsihin ra.

Nu caahán̄ ra Juan tuhun maa ra

²⁰ Tacan tan natsico coo ra Pedro tan nyehé ra tyin nyicún inga ra tsa tsicá tsihin ra Jesús tsi ra naha, ra tsa cuñí xaan ra Jesús. Juvin ra tsinyanaa tsi ra Jesús tsa cuxiñi_ ra quivi can. Tan tsicá tuhun ra tsi ra tan catyí ra: “Jutu Mañi yu, *Uyóo* ra cua xico tsi un?” catyí ra, tsicá tuhun ra quivi tsa ndi cumañi ca cíú ra Jesús. ²¹ Cuhva tsa nyehé ra Pedro tsi ra, tsicá tuhun ra tsi ra Jesús:

—Jutu Mañi yu, tan ra ihya, *Uná* cua tahanra? —catyí ra tsihin ra.

²² Nacahan̄ ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, *Uná* cuenda yooho? Cuhva yooho tsihin yu —catyí ra Jesús tsihin ra Pedro.

²³ Tacan tan iin yaha ñi tsinu tuhun ihya nu nyecu yañi yo tyin ra icán, ña cua cíú ra. Maa tyin ña catyí ra Jesús tsa ña cua cíú ra can. Tyin catyí ra: “Tatun cuñí yuhu tsa coo ra nda cuanda quitsi yu inga tsaha, *Uná* cuenda yooho?”

²⁴ Yuhu cuví ra can, ra tsa cahán̄ ra Jesús tuhun. Tan nyehé yu tandihí cuii maa tsa cuví tan tyaa yu nu libru ihya. Yuhu tsító yu tyin tandihí tsa tyaa yu, tsa nditsa caahán̄ tsi.

²⁵ Iyó cuaha ca tsa javaha ra Jesús. Tun tsatiny tsicunyaq tandihí can nu libru, tsicá iñi yu tyin ndi ña cua cutahan can naníi cahnu nu ñuhu ñayiví.

Tan na cuvi tsi tacan ñi.

Tyiñu Tsa Javahá Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyi Ii Nyoo

¹Yoho Teófilo, quivi tsa jacuhun yu tutu tsa jihna ñi can tsi un, tyaa yu tandihí tsa quitsahá javahá ra Jesús tan tandihí tsa jacuahá ra nda quiví jihna ñi, ²tan nda quiví nandaa ra andivi. Tan tsa ndi cumañi ca nandaa ra andivi, nacatsi ra tsi ra apóstol cuenda ra. Tan tsihin tunyee iñi Tatyi li Nyoo tava tyiñu ra tsi ra naha tyin caca ra naha tyiñu ra. ³Tan cuaha xaan tundoho nyehe ra Jesús tan tsihí ra. Tan tsa yahá tsa tsihí ra, nandoto ra tan quituví ra nu yucú ra tsa tava tyiñu ra. Tan tsitsi tsa uvi xico quiví, cuaha xaan tsaha quituví ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

⁴Tsa ndi nyíví ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihyá, nda cuanda naquihin ndo tsa catyí Jutu yu tyín cuhva ra tsi ndo, tumaa tsa cahán yu tsihin ndo quiví can. ⁵Nditsa tyin tsihin ndutyá jacoondutyá ra Juan tsi nyivi. Maa tyin nyoho ñia cuaha ca quiví tan coondutyá ndo tsihin Tatyi li Nyoo —catyí ra Jesús tsihin ra naha.

Nu nandaq ra Jesús andivi

⁶Tsa ndu iñi ra tava tyiñu ra Jesús, tan tsicá tuhun ra naha tsi ra tan catyí ra naha:

—Jutu Mañi yu, ¿a vityin ñi cua jacacu un tsi ñuu Israel ihyá tsa ñia cua cundaca ñaha ca ra ñuu Roma tsi yo? —catyí ra naha.

⁷Tan nacahaná ra Jesús tan catyí ra tsihin ra naha:

—Ña taahán tsi coto nyoho ndáa quiví cua cuvi tsa cua javaha Nyoo Jutu yo. In-tuhun ñi maa ra cua cahan ama cua cuvi tsi. ⁸Tyin quiví tsa cua quitsi Tatyi li Nyoo siquí ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihyá tan tandihí ñuu tsa cayucú Judea tan Samaria, tan nda cuanda nanií cahnu ñuhu ñayiví —catyí ra Jesús tsihin ra naha.

⁹Tan tsa yahá tsa cahán ra Jesús tuhun ihyá, tan tsitsi tsa nyehé ra naha tsi ra, nandaa ra andivi, tan quihví ra tsitsi vico. Tacan tan ña nyehe ca ra naha tsi ra. ¹⁰Tan cuhva tsa nyehé ndaaá ra naha andivi, quituví uvi taahan ángel Nyoo tsa nditsi jahma cuitsin yatiny ñi nu nyecú ra naha. ¹¹Tan catyí ángel can naha ra tsihin ra tava tyiñu ra Jesús:

—Nyoho ra Galilea, ¿nacuenda nyehé ndaa xaan ndo andivi? Ra Jesús tsa nyehe ndo nandaa ihyá, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javahá ra Judas

¹²Tacan tan quitá ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhú ra naha ñuu Jerusalén. Tan yatiny ñi canyí ñuu can, tumaa sava hora ñi tan tsaa yo. Tyin sava hora ñi cuví caca nyíví quiví quitatú ñi, tyin tacan catyí maa ley tsa tyaa ra Moisés. ¹³Tsa tsaq ra naha ñuu Jerusalén can, ndaaq ra naha nu tsinu uvi pisu vehe nu iyó ra naha. Tan ra tsa yucú can, cuví ra ihyá naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñí tsa nasama ra ndacá ñaha, tan tsihin ra Judas yañi ra Jacobo. ¹⁴Tan tandihí ra ican naha ra ndu iñi ra naha tandihí quiví tan tsicán tahvi ra naha tsi Nyoo. Tan yucú ndihí tucu yañi ra Jesús tsihin ra naha, tan tsihin ñia María sihi ra, tan cuaha ca maa ñiñaha.

¹⁵Tan tsa tandihí nyíví tsa ndu iñi quiví can quitá maa cientu oco ñi. Tacan tan nduvitá ra Pedro. Tan catyí ra tsihin ñi:

¹⁶—Nyoho yañi, tsa nyaá tucu maa tsatahan ra Jesús cuhva ihyá tan vityin tsa cundaña tsa cahán ra David jahá Tatyi li Nyoo nu catyí ra tyin ra Judas cua cuhva cuenda ra tsi ra Jesús tsi ra xaán iñi tsi ra. ¹⁷Tan ra Judas cuví ra iñi ra tsa tsinyíi tsihin yo. Tan iñi caa ñi jaha tyiñu ra tsihin yo. ¹⁸Maa tyin tsahan ra, tan jata ra ñuhu tsihin xuhun tsa ñihí ra tsa xico ra tsi ra Jesús. Yaha can tan canacava ra tsihin jini ra, tan ndata tsitsi ra tan quita tandihí tsiti ra. ¹⁹Tan quiví tsa tsito nyíví iyó Jerusalén ihyá tsa tsihí ra, jacunañi ñi ñuhu can Acéldama. Tan tsa tsihin yuhu maa ñi cuñí tsi catyí Ñuhu

cuenda tsa Tsati Niñi Nyivi. ²⁰Tyin nu libru Salmo catý tsi cuenda ra Judas tyehen: Na ndoo maa vehe ra. Tan ña coo nyivi tsitsi vehe can. Tan catý tucu tsi:

Inga ra cua jaha tyiñu tyiñu tsa javahá ra.

²¹⁻²²Tan vityin yucú ra tsa cutahan tsihin yo quivi tsinyij Jutu Mañi yo Jesucristo tsihin yo; nda quivi jacoondutyá ra Juan tsi ra, tan nda quivi nandaa ra cuahán ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandoto ra Cristo —catý ra Pedro.

²³Tacan tan cana ra naha tsi uvi taahan ra naha. Cana ra naha tsi ra José tsa nañi Barsabás, tan juvin ñi nañi tucu ra Justo; tan cana tucu ra naha tsi ra Matías. ²⁴Tan tsicán tahvi ra naha tsi Nyoo tan catý ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihyá naha ra, ndáa ra tsa nacatsí maa un, ²⁵tyin cuiso ra tyiñu tsa jacunaa ra Judas tsa cuenda cuatyí ra, tan cuahán ra nu taahán maa tsi cuhun ra —catý ra naha, tsicán tahvi ra naha tsi Nyoo.

²⁶Tacan tan tava cuenda ra naha ndáa ra cuá tahan tsi cuiso tysiñu can. Tan tahan tsi tsi ra Matías. Ra ican cuví ra tahan tsi cutahan tsihin tsa utsi iin ra tsa tava tysiñu ra Jesús.

2

Nu nuu Tatyi Ii Nyoo

¹Tsaa quivi vico Pentecostés, tan ndu iin tandíhi nyivi tsa tsinú iñi tsi ra Jesús. ²Tan sana iñi ñi tan tsiní ñi cucayu ityí andivi. Tumaa cucayu tsa vatsí tatyí xaan. Tan iyo xaan cuvi tsitsi vehe nu yucú ñi. ³Tacan tan quituvi tumaa iin ñuhu tan tsaa tsi siquí intuhun intuhun ñi. ⁴Tan tandíhi ñi tsitu ñi tsihin Tatyi li Nyoo. Tan quitsaha caahán ñi inga yuhu cuhva tsa jacañan maa Tatyi li Nyoo tsi ñi.

⁵Tan quivi can cuaha xaan ra ñuu Israel tsaa ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandíhi ñuu tsa cayucú nu ñuhu ñayivi.

⁶Tan tsa tsiní ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iñi ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiní

ra yuhu ra naha tsa caahán ñi jahá Tatyi li Nyoo. ⁷Iyo xaan cuñi ra naha tan quitsaha natuhún tahan ra naha tan catý ra naha:

—¿A ñavin nyivi ñuhu Galilea cuví tandíhi ñi tsa caahán ihyá? ⁸¿Nacuenda tyin tsiní yo caahán ñi cuhva caahán intuhun intuhun yo? ⁹Ihyá yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia, ¹⁰Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihyá. Tan juhva yo cuví yo nyivi Israel nda quivi cacu yo. Tan inga yo cuví yo nyivi nanduví cuenda nyivi Israel tan nyicún yo ley tsa tyaa ra Moisés. ¹¹Iyó tucu yo tsa cuví yo nyivi quee Creta tan Arabia. Maa tyin tandíhi yo tan tsiní yo tyin tsihin yuhu tsa caahán maa yo caahán ñi. Tan nacatý tuhun ñi tsa cahnu tsa javahá Nyoo —catý ra naha.

¹²Tandíhi ra naha, iyo xaan cuñi ra naha, tan tsicá tuhun tahan ra naha tan catý ra naha:

—¿Náa cuñi tsi catyí tandíhi tsa cuví ihyá? —catý ra naha.

¹³Maa tyin inga ra jacuñí nyaa ra naha tsi ñi, tan catý ra naha tyin tsiní ñi.

Nu caahán ra Pedro tsihin nyivi

¹⁴Tacan tan nduvita ra Pedro tsihin tsa utsi iin ca ra tava tysiñu ra Jesús. Tan ñihu cahán ra tan catý ra:

—Nyoooho yañi, tsa cuví ndo ra ñuu Israel, tan tandíhi nyoooho tsa iyó ñuu Jerusalén ihyá. Cuñi tsi tsa coto ndo tuhun ihyá. Tan tyaa soho vaha ndo tsa cua cahan yu tsihin ndo. ¹⁵Tyin cuñi maa ndo tyin tsiní ndi. Maa tyin ñavin nyixi tsihí ndi, tyin ña tuhvá nyivi coho nyixi hora ihyá, tyin ndi jatyaan. ¹⁶Maa tyin tsa cuví ihyá cuví tsa cahan ra Joel, ra cuví ndusu yuhu Nyoo tahan tsanaha. Tyin catý ra:

¹⁷Nu cua ndihí quivi, catý Nyoo, cua jaquitsi yu Tatyi li yu siquí tandíhi nyivi.

Tan cua cahan sehe ndo tsa cuenda yu. Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnu cua nyehe ñi ñumaahna jaha yu.

¹⁸Cua jacuhun yu Tatyi li yu siquí ñi tsa jaha tysiñu tsa cuenda yu.

Tan cua cahan ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua
nyehe nyivi ityi andív.

Tan ityi nu ñuhu ñayivi cua javaha ra tsa
iyo, seña niñi, seña ñuhu, tan vico
yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaaha
niñi.

Tandihi tuhun caahán ra ihya cua cuvi tsi
tsa ndi cumaño ca tahan tsi quívi
quitsi Jutu Mañi yo.

Tan quívi cua quitsi ra, iyo xaan cua cuvi.

²¹ Tan tandíhi nyivi tsa tsicán tahvi tsi ra cua
cacu ñi, catyí ra Joel jahá Nyoo.

²² Tsa yaha nacatyí tuhun ra Pedro yacan,
tacan tan catyí ra tsihin ra naha:

—Nyoho ro Israel, tyaa soho ndo tsa cua
cahan yu ihya. Ra Jesús, ra ñuu Nazaret,
maa Nyoo nacatsi tsi ra, tan tsajanaha Nyoo
tsi yo tyin nditsa tsa nacatsi ra tsi ra, tsaha
ra tunyee iñi tsi ra tan cuaha xaan tsa iyo
tan tsa nyiti tan seña javaha ra. Tan tsa
tsító maa ndo tandíhi tsa caahán yu ihya.

²³ Maa tyin quívi nacuhvá cuenda ndo tsi
ra, javaha ndo tumaa cuhva tyaa maa Nyoo
cuhva nda quívi jihna ñi. Tyin tsahá cuenda
ndo tsi ra tsi ra caquiñi. Tan ticaa ra naha
tsi ra nu cruu. Tsahñi ra naha tsi ra jahá
ndo. ²⁴ Maa tyin Nyoo janadoto ra tsi ra.
Jacacu ra tsi ra tyin ña cuvi cundaca ñaha
tuhun tsihí tsi ra. ²⁵ Tyin ra David cahan
ra tuhun cahan ra Cristo tahán tsanaha, tan
catyí ra:

Tacan ñi nyehé yu tsi Nyoo Jutu yu ityi nuu
yu.

Maa ra nyaá ra ityi xiin cuaha yu tan nduve
náa cuví jayuhvi tsi yu.

²⁶ Yacan cuenda sií xaan cuñi yu. Tan jac-
ahnú yu tsi Nyoo tsihin tsa sií cuñi
yu.

Tan cuñu ñuhu yu cua quitatu tsi tyin tsító
yu tyin cua nandoto yu inga tsaha.

²⁷ Tyin yooho, Nyoo Jutu yu, ña cua naco
ihñi un añima yu nu yucú añima
nyivi tsa tsihí,

tan ndi ña cua cuhva un tsa tyahyu cuñu
ñuhu yu.

Tyin sehe ii maa un cuví tsi yu.

²⁸ Tan janaha un tsi yu ityi nu coo yu ñayivi
ñá cua naa maa.

Tan cua jacutu un tsi yu tsihin tusii ñi
tyin maa un nyaá tsihin yu, catyí ra

David cahan ra tsa cahan ra Cristo
tahán tsanaha.

²⁹ 'Nyoho yañi, tsító vaha yo tyin ra
David tsii tsaañhu yo tsihí ra tan quíhví
ra tsitsi ñuhu. Tan ñaña ra ndi nyaá tsi
ihya vityin. ³⁰ Maa tyin ra David cuví ra
iin ndus yuhu Nyoo. Tan tsító ra tyin
Nyoo catyí ra tyin juvin ñi tata maa ra cua
cuvi ra Cristo. Tan ra Cristo, cuví ra cua
cundaca ñaha tumaa tsa tsindacá ñaha ra
David. ³¹ Tan ra David tumaa tsa tyin nyehe
ra tsa cua cuvi nu cuahán ca tsi ityi nuu.
Tan cahan ra tuhun tsa cahan ra Cristo. Tan
catyí ra tyin ña cua ndoo añima ra nu yucú
añima nyivi tsa tsihí. Tan ndi ña cua tyahyu
cuñu ñuhu ra, catyí ra. ³² Tan ra Jesús can
janadoto Nyoo tsi ra. Tan tandíhi maa ndi
cuví ndi tsandaas tsa cuenda tsa nandoto
ra. ³³ Jutu Nyoo jacalnu ra tsi ra Jesús, tan
tsihin ndaha cuaha ra cañihí ra tsi ra nda
gloria. Tan ra Jesús naquihín cuenda ra
Tatyí li tsa catyí Jutu yo Nyoo tahán tsanaha
tyin cuhva ra tsi yo. Tan yacan cuví tsa
tsahá ra tsi ndi vityin. Juvin tsi cuví tsa
nyehé ndo tan tsiní ndo. ³⁴ Tyin ñavin ra
David nandaq ityi andív. Maa tyin maa ra
David cahan ra tuhun ra Jesús, tan catyí ra:
Jutu Mañi yo Nyoo catyí ra tsihin Jutu Mañi
yu ra Cristo: "Cunyaa xiin cuaha yu
³⁵ tsitsi tsa cua caquin yu tsi ra xaan iñi tsi un
tsaha un", catyí ra David jahá Nyoo.

³⁶ Tacan cahan ra Pedro tsihin ra naha,
tan catyí tucu ra:

—Nyoho tan tandíhi ca nyivi Israel,
coto vaha ndo tyin tuhun ra Jesús, yacan
cuví tsa caahán yu tsihin ndo ihya. Ticaa
ndo tsi ra nu cruu. Maa tyin cuví ra Jutu
Mañi yo, tan cuví tucu ra Cristo ra ndacá
ñaha tsi yo jahá Nyoo —catyí ra Pedro.

³⁷ Cuhva tsa tsiní ra naha tsa cahan
ra Pedro tuhun ihya, cuiiihya xaan cuñi
ra naha cuví. Tan tsicá tuhun ra naha tsi ra
Pedro tan tsi tandíhi ca ra tavá tyiñu ra
Jesús, tan catyí ra naha:

—Yañi, ¿nácaa javaha ndi vityin?
—catyí ra naha tsihin ra tavá tyiñu ra Jesús.

³⁸ Tacan tan catyí ra Pedro tsihin ra naha:

—Intuhun intuhun ndo ndu uvi iñi ndo
cuatyí ndo tan násama ndo cuhva iyó ndo.
Tan coondutya ndo tsihin siví ra Jesucristo.
Tan cua jaha ra tucahnu iñi cuatyí ndo.
Tacan tan cua cuhva Nyoo Tatyí li ra tsi ndo.

³⁹ Tyin tahán tsanaha catyí Nyoo tyin cuhva

ra Tatyi li ra tsi yo, tan tsi sehe yo, tan tsi nyiví tsa cañi iyó. Tyin tandíhi nyiví tsa cuacana Jutu Nyoo cua cuhva ra Tatyi li ra tsi ni —catyí ra Pedro.

⁴⁰ Tsihin tuhun ihyá tan tsihin inga ca tuhun, ra Pedro tsahá cuenda ra tsi ra naha tan catyí ra tsihin ra naha:

—Ndycu ndo cuhva na jacacu Nyoo si ndo, coto cunaa ndo tsihin nyiví caquíni iyó nu ñuhu ñayiví ihyá —catyí ra tsihin ra naha.

⁴¹ Tacan tan tandíhi ra tsa tyáa yahvi tuhun cahan ra Pedro tsicoadutya ra naha. Tan quitá tumaa uñi mil nyiví tsa tandíhi ni, tan ndu iñi ni tsihin nyiví yihi cuenda ra Jesucristo. ⁴² Tan tandíhi quivi ndu iñi tandíhi ni, tan niñi ni tyaá soho ni tsa jacuahá tandíhi ra tava tyiñu ra Jesucristo tsi ni. Tan iñi ni cuví ni tsihin tahan ni, tan tsicán tahvi ni tan tsatsí ni paan tan tsihi ni vinu tyin tacan tan ña cua naa iñi ni tyin tsihi ra Cristo tsa cuenda cuatyí ni.

Cuhva iyó nyiví yihi cuenda Jutu Mañi yo Jesucristo quivi can

⁴³ Tan cuaha tsa iyo javahá tandíhi ra tsa tava tyiñu ra Jesucristo jahá Nyoo. Tan tandíhi ni iyo cuñi ni. ⁴⁴ Tandíhi ni yihi cuenda ra Cristo iñi caa ni iyó ni tsihin tsa iyó tsi ni. ⁴⁵ Xicó ni tsa iyó tsi ni. Tan tsatsá ni xuhun ni tsi nyiví tahan ni cuhva tsa tsiñi ñuhu tsi intuhun intuhun ni. ⁴⁶ Tandíhi quivi tan ndu iñi ni nda vehe ñuhu cahnu. Tan nda yuvehe ni iñi caa ni tsatsí ni paan tan tsihi ni vinu. Tan siñi cuñi ni tsatsí ni tyin iñi ni cuví ni. ⁴⁷ Tan jacobñu ni tsi Nyoo. Tan vaha caahán tandíhi nyiví tuhun ni. Tan iñi tan iñi quivi tan nducuahá ca nyiví quihví cuenda Jutu Mañi yo Jesús tyin jacacú ra tsi ni.

3

Nu nduvahá iñi ra coxo

¹ Iñi quivi cuahán ra Pedro tsihin ra Juan vehe ñuhu cahnu. Cuví tsi cuhva caa uñi tsa tseñi, cuhva tsa tuhvá nyiví Israel cuahán cuandacán tahvi tsi Nyoo. ² Tan iñi ra ndaahví, coxo ra nda quivi cacu ra, nyaá ra yuhu cora vehe ñuhu cahnu can tandíhi maa quivi. Tyin tsindacá ni tsi ra na ndacan ra xuhun tsi nyiví quihví yuhu cora can, tan nañi tsi Yuhu Cora Sii Caá. ³ Tacan tan nyehe ra coxo can tsi ra Pedro tsihin ra Juan

tsa cua quihví ra naha yuhu cora can. Tan tsicán ra xuhun tsi ra naha. ⁴ Tan nyehe ra Pedro tan ra Juan tsi ra. Tan ra Pedro catyí ra tsihin ra:

—Nyehe tsi ndi —catyí ra.

⁵ Tacan tan quitsahá nyehe ra coxo can tsi ra naha. Cuñi maa ra tyin iyó tsa cua cuhva ra naha tsi ra. ⁶ Maa tyin ra Pedro catyí ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin siví ra Jesucristo ra ñuu Nazaret, nduvitá tan caca —catyí ra Pedro tsihin ra.

⁷ Tacan tan tiñi ra Pedro ndaha cuaha ra tan cañihí ra tsi ra. Tan juvin ni cuhva can nacog tunyee niñi nduvitá taahan tsaha ra tan jucun tsaha ra. ⁸ Tacan tan ra coxo can ndavá ra, tan nduvitá ra tsinyaá nyityi ra. Tan quitsahá tsicá ra. Tan quihví ra tsihin ra naha tsitsi cora vehe ñuhu can, tsicá ra, tan ndavá ra, jacobñu ra tsi Nyoo. ⁹ Tandíhi nyiví nyehe ni tsi ra tyin tsicá ra tan jacobñu ra tsi Nyoo. ¹⁰ Tan iyo xaan cuñi ni tan yuuhví ni tsa cuenda tsa nduvahá ra can. Tyin nacotó ni tsi ra. Tyin juvin ra cuví ra tsa tuhvá tsinyaá Yuhu Cora Sii Caá can tsicán ra xuhun tsi nyiví.

Nu caahán ra Pedro tuhun ra Cristo tsihi nyiví ni cuví corredor cuenda ra Salomón

¹¹ Ra coxo tsa nduvahá can, ña jañá maa ra tsi ra Pedro tan ra Juan. Tan tandíhi nyiví iyo cuñi ni, tan tsinú xaan ni tsaa ni nu cuví corredor cuenda ra Salomón tyin cua nyehe ni tsi ra coxo can tyin tsa nduvahá ra. ¹² Tsa nyehe ra Pedro yacan, tan catyí ra tsihin ni nyiví can:

—Nyoooho ra Israel, ¿nacuenda iyo xaan cuñi ndo? Tan ¿nacuenda nyehe xaan ndo tsi nyuhu? ¿A cuñi maa ndo tsihi tunyee iñi maa ndi, a tsa cuenda tsa catsi iyó ndi nuu Nyoo, tan cuví janduvahá ndi tsi ra coxo ihyá? ¹³ Ñavin maa nyuhu janduvahá tsi ra. Nyoo ra cuví Nyoo tsii tsaahnu yo, ra Abraham, ra Isaac tan ra Jacob, ra ican jacobñu tsi Sehe ra tan tsaha ra tunyee iñi tsi ra, ra tsa tsahá cuenda ndo tsi ra Pilato, ra cumí tyiñu. Tan ra Pilato cuñi ra jaña ra tsi ra. Maa tyin nyoooho ña tsahá ndo. ¹⁴ Tahan tsi tsa ndacan ndo tsa jaña ra tsi ra vaha, tan ra ii can, maa tyin nyoooho tsicán ndo tsa jaña ra tsi iñi ra tsahñi ndiyi. ¹⁵ Tan nyoooho tsahñi ndo

tsi ra tsa tsahá ñayiví nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndoq ra nu yucú añima nyiví tsa tsihí. Tan nyuhu cuví ndi tsandaa tsa cuenda tsa nandoto ra.¹⁶ Tan juvin ra Jesús cuví ra tsa tsahá tunyee iñi tsi ra coxo ihyá tan nduvahá tsaha ra, tyin tsinú iñi ndi tyin iyó tunyee iñi tsi ra Jesús. Yacan cuenda nduvahá tsaha ra ihyá, tan nacotó vaha ndo tsi ra. Tan tandíhi nyoho nyehe ndo tyin nduvahá ra tsa cuenda tsa tsinú iñi ndi.

¹⁷ "Tsitó yu, —catyí ra Pedro— tyin quíví tsa tsahíñ ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuví ityi nuu tsihin ndo, ña tsitó ra naha.¹⁸ Maa tyin tacan jacuví ndo tan cundaq tsa cahán ra cuvi ndusu yuhu Nyoo tahan tsanaha, tyin catyí ra naha tyin ra Cristo cua nyehe ra tundoho.¹⁹ Yacan cuenda ndu uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñí añima ndo jaha tunyee iñi Jutu Mañi yo,²⁰ Tacan tan cua jaquitsí ra tsi ra Jesús ra cuví Cristo, na quitsi ra inga tsaha. Tyin nda quíví jihna ñi tyaa Nyoo cuhva tyin quitsi ra tsa cuenda yo.²¹ Taahán tsi tsa ndoóra Jesucristo gloria tsa vityin nda cuanda quíví cua jandutsaa Nyoo tandíhi maa tsa iyó. Tumaa cuhva catyí ra cuví ndusu yuhu Nyoo tahan tsanaha.²² Tyin tacan catyí ra Moisés tsihin tsii tsahnu yo: "Cua jaquitsí Jutu yo Nyoo tsi ra tsa cua cahan tuhun ra. Tan juvin ñi nyiví yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandíhi tsa cua cahan ra tsihin ndo.²³ Tyin tandíhi nyiví tsa ña cua tyaa soho tsa cua cahan ra, cua cunaa ñi, tyin ñia cua cutahan ñi tsihin nyiví tsa nacatsi Nyoo", catyí ra Moisés.

²⁴ "Tan tacan tucu tandíhi ra cuví ndusu yuhu Nyoo nda quíví tsicoor a Samuel tan nda cuanda vityin, jacotí ra naha tsa cuví vityin.²⁵ Tandíhi tsa catyí Nyoo tyin cuhva ra tsi yo, cahán ra cuví ndusu yuhu Nyoo tahan tsanaha. Tandíhi can tsii maa ndo cuví can. Tan tyiñ tsa ndoq Nyoo tsihin ra Abraham tsii tsahnu yo, juvin ñi tsa cuenda maa ndo cuví yacan. Tyin catyí Nyoo tsihin ra Abraham: "Tandíhi nyiví tsa iyó nu ñuhu ñayiví cua nasoco yu tsi ñi tsa cuenda nyiví tata un."²⁶ Tan yacan cuenda

quíví janandoto Nyoo tsi Sehe ra, jihna ca nu yucú ndo jacuhún ra tsi ra, tyin nasoco ra tsi ndo, tan intuhun intuhun ndo nacoo ndo tsa caquiñi iyó ndo —catyí ra Pedro tsihin ñi.

4

Nu tiñ ra cuví ityi nuu vehe ñuhu cahnu naha ra tsi ra Pedro tan ra Juan

¹ Ndi caahán ca ra Pedro tan ra Juan tsihin nyiví, tan tsaq ra cuví jutu naha ra tsihin ra cuví ityi nuu tsihin ra jahá cuenda vehe ñuhu, tan tsihin ra cuví saduceo naha ra.² Nduxaan xaan ra naha tyin ra Pedro tan ra Juan jacuahá ra naha tsi nyiví tan catyí ra naha tyin nditsa tsa cua nandoto nyiví tsa tsa tsihí, tyin ra Jesús nandoto ra.³ Tacan tan tiñ ra naha tsi nduvi taahan ra tava tyiñ ra Jesús can naha ra. Tan tyiñ ra naha tsi ra naha vehe caa. Tan ndoq ra naha nda cuanda inga quíví tyin tsa cueñi cuví cuhva can.⁴ Maa tyin cuaha ñi tsa tsihíñ tuhun caahán ra Pedro quitsahá tsinú iñi ñi. Tan ndu iñ ñi tsihin nyiví yihí cuenda ra Jesús. Tan tsa tandíhi ñi quitá maa uhun mil cuví tsa maa ñi maa rayíñ naha ra.

⁵ Tsa tuvi inga quíví, nda ñuu Jerusalén ndu iñ tandíhi ra cumí tyiñ cuenda nyiví Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés.⁶ Tan nyíñ tucu ra Anás ra jutu tsahnu cuví ityi nuu. Tan nyíñ tucu ra Caifás, tan ra Juan, tan ra Alejandro. Tan yucú ndihi tucu tandíhi rayíñ tsa cuví nyiví ra jutu tsahnu cuví ityi nuu.⁷ Tacan tan tava tyiñ ra naha na cuquihin ra naha tsi ra Pedro tan ra Juan. Tan tsindacá ra naha tsi ra naha nda mahñu nu yucú ra naha. Tan tsicá tuhun ra naha tsi ra naha, tan catyí ra naha:

—¿Yóo tsahá ndatu tsi ndo tsa janduvahá ndo tsi ra can? ¿Yóo tsahá tunyee iñi tsi ndo tsa javaha ndo tyehen? —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyi li Nyoo. Tan nacahan ra tsihin ra naha:

—Nyoho ra ndacá ñaha Israel ñuu yo ihyá, tan nyoho ra tsahnu.⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihyá, tyin cuñí ndo coto ndo nácaa nduvahá ra.¹⁰ Yacan cuenda cua catyí tuhun ndi tsihin ndo na coto tandíhi nyiví Israel. Tyin ra ihyá nyaá ra nuu tandíhi ndo, tyin nduvahá ra tsihin tunyee iñi tsi

ra Jesucristo, ra ñuu Nazaret, ra tsa tsaha cuenda ndo na cíu ra nu cruu. Maa tyin Nyoo janandoto ra tsi ra.¹¹ Tan juvin ra Jesús cuví yuu tsa tsíñi ñuhu ca tsa ña cuñí ra jahá vehe cuatyíñu ra, tumaa culva catyí nuu tutu Nyoo. Tan nyoho cuví ra jahá vehe tan ña cuñí ndo yuu tsa tsíñi ñuhu ca can.¹² Yoñi inga ra cuví jacacú tsi yo. Tyin intuhun ñi maa ra tsaha Nyoo tyin jacacu ra tsi yo —catyí ra Pedro tsihin ra can naha ra.

¹³ Tan ra cumí tyiñu can naha ra iyo xaan cuñí ra naha tsiñí ra naha tsa caahán ra Pedro tan ra Juan tyin nii xaan iñi ra naha caahán ra naha, tan ñavin ra cahví scuela cuví ra naha. Tacan tan nacoto ra naha tsi ra naha tyin ra ican naha ra cuví ra tsa tsica tsihin ra Jesús quívi can.¹⁴ Tan ra tsa nduvahá can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siquí ra Pedro tan ra Juan.¹⁵ Tacan tan catyí ra cumi tyiñu naha ra tsihin ra naha:

—Quita nduñi taahan nyoho tsata vehe.

Tan quitá ra naha. Tan ndooq ra cumi tyiñu can naha ra natuhún tahan ra naha.

¹⁶ Tan catyí ra naha:

—¿Náa jahava yo tsihin ra ihyá naha ra? Tyin tandíhi maa nyívi Jerusalén tsító ñi tsa iyo tsa jahára naha. Tan ña cua cuvi catyí yo tyin ña cuñí yo tsa cuaha ca nyívi coto tuhun ihyá, yacan cuenda vaha ca tsa casí yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyívi —catyí ra cumi tyiñu naha ra.

¹⁸ Tacan tan canq̄ ra cumí tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyívi.¹⁹ Maa tyin ra Pedro tan ra Juan nacahan ra naha tan catyí ra naha:

—Tyíhi tuñi ndo iñi ndo tan nyehe ndo tatuñ vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo.²⁰ Tyin nyuhu ña cuví tsa jandíhi ndi tsa nacatyí tuhun ndi tsa nyehe ndi tan tsa tsíñi ndi —catyí ra naha.

²¹ Tacan tan tyasi nyico ra cumi tyiñu naha ra tsi ra Pedro tan ra Juan. Tan jaña ra naha tsi ra naha tyin ña ñihí ra naha nácaa tatsi tuñi ra naha tsi ra naha.

Tyin tandíhi nyívi tan jacañu ñi tsi Nyoo tsa cuenda tsa cuví can.²² Tyin rayí tsa nduvahá can, tsa yahá uvi xico cuiya ra, tan tacan cuiya tahan ra tundoho tan nduvahá ra jahá Nyoo.

Nu tsicán nyívi yihí cuenda ra Cristo tunyee iñi Nyoo

²³ Tan tsa quitá ra Pedro tan ra Juan, cuahán ra naha nu yucú nyívi yihí cuenda ra Jesús. Tan nacatyí tuhun ra naha tandíhi tsa cahan ra tsahnu naha ra tan ra jutu tsa cuví ityi nuu naha ra tsihin ra naha.²⁴ Cuhva tsa tsíñi tandíhi ñi, tan iin caa ñi quitsaha tsicán tahvi ñi tsi Nyoo. Tan catyí ñi:

—Jutu Mañi yu, yooho jahá un andivi tan ñuhu ñayívi. Jähá un ndutyá ñuhu. Tan tandíhi ca tsa iyó, maa un jahá. ²⁵ Tan yooho tsihin Tatyí li un jacañan un tsi ra David tahan tsanaha. Tan catyí ra:
¿Nacuenda tsa nduxaán nyívi ña tsító tsi Nyoo?

¿Nacuenda tsicá iñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayívi ihyá nduvitá ra naha siquí un, Jutu Mañi yu, tan siquí ra Cristo, ra nyisó tyiñu maa un, catyí ra David.

²⁷ *Jutu Mañi yu, nditsa tyin ra Herodes, tan ra Poncio Pilato ndu iin ra naha ñuu Jerusalén ihyá tsihin ra ñuu Roma naha ra tan tsihin ra ñuu Israel naha ra tyin cahñí ra naha tsi ra Jesús Sehe ii un, tsa nacatsí vaha maa un.*²⁸ Tan tacan jahára naha, tumaa culva tsa catyí maa un tahan tsanaha tyin cua cuvi.²⁹ Tan vityin, Jutu Mañi yu, nyehe tyin cuñí ra naha casí ra naha tsi ndi. Tan cuhva tsa nii coo iñi ndi tyin tyiñu maa un jahá ndi, Jutu Mañi yu. Tan na ña nayuhví ndi cahan ndi tuhun maa un.³⁰ Tan tsihin tunyee iñi maa un tan cua nduvahá nyívi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

³¹ Tan cuhva tsa ndihí tsicán tahvi ñi tsi Nyoo tan taan nu yucú ñi. Tan tandíhi ñi tsitu ñi tsihin Tatyí li Nyoo tan cahan ñi tuhun Nyoo tsihin tsa ña yuuhví ñi.

Nduve tsa cumaní tsi nyívi yihí cuenda ra Cristo

³² Tandíhi ñi tsa tsínú iñi, iin ñi cuví ñi, tan iin ñi cuhva tsicá iñi ñi. Ndi intuhun

ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandíhi ñi cuví can.

³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandíhi ra naha. ³⁴ Tan ndi intuhun ñi tan nduve tsa cumañi tsi ñi tyin tandíhi ñi tsa iyó vehe o ñuhu ñi, xicó ñi can. Tan cua ndaca ñi xuhun can ³⁵ tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyívi cuhva tsa tsíñi ñuhu tsi ñi. ³⁶ Tacan jayahá iin ra tsa nañi José. Ra ican cuví ra tata ra Leví. Tan cacu ra ñuhu Chipre tsa canyí mahñu ndutyu ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñí tsi catyí: ra jandu íñi iñi nyivi. ³⁷ Tan ra Bernabé can xico ra ñuhu ra. Tan tsahá ra xuhun can tsi ra tava tyiñu ra Jesús.

5

Cuatyí ra Ananías tsihin ña Safira

¹ Maa tyin iin ra tsa nañi Ananías tsihin ña Safira, ñasiñihi ra, xico ñi iin ñuhu. ² Tan tyiñi xeehe ñi juhva xuhun. Tacan tan ra Ananías tsindacá ra xuhun tsa ndoq ña tsi ra tava tyiñu ra Jesús. Tan catyí ra tyin tandíhi xuhun tsa cuyahví ñuhu cuví can. ³ Tacan tan catyí ra Pedro tsihin ra:

—Yoho Ananías, ¿nacuenda tsa tsaha un tsa quihví nu ña vaha añima un? Tyin cuñí un jandavi ñaha un tsi Tatyi li Nyoo, tan catyí un tyin tandíhi xuhun tsa cuyahví ñuhu can cuví tsehe, tan ña nditsa un tyin ndoq juhva xuhun can tsi un. ⁴ Tsii un cuví ñuhu can, tan tsii un cuví xuhun tsa ñihi un cuenda ñuhu can. ⁵ Nacuenda tsa cuñí un jandavi ñaha un tsi Nyoo tan catyí un tyin tandíhi xuhun can tsaha un? Maa tyin ñavin tsi nyuhu jandaví ñaha un, tyin tsi maa Nyoo jandaví ñaha un —catyí ra Pedro tsihin ra Ananías.

⁵ Tsa tsíñi ra Ananías tuhun tsa cahan ra Pedro, nduvá ra tan tsihí ra. Tan tsa tsito nyívi tuhun ihyá tan nayuhví xaan ñi. ⁶ Tacan tan tsaaq̄ ra cuatyí naha ra tan cavañuu ra naha jahma cuñú ñuhu ra Ananías. Tan tsahán ra naha tsindacá ra naha tsi ra nu ndaa cumi santu. ⁷ Yaha uñi hora tan tsaaq̄ ñasiñihi ra Ananías tan quihví ña nu yucí ra tava tyiñu ra Jesús, tyin ña tsító ña tsa cuví. ⁸ Tan quitsahá tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahví ñuhu ndo? —catyí ra Pedro tsihin ña.

Tacan tan nacahán ña tan catyí ña tsihin ra:

—Tacan ñi cuví xuhun tsa cuyahví tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñí ndo jandavi ñaha ndo tsi Tatyi li Jutu Mañi yo Nyoo? Ican vatsí ra tsa tsahan tsindacá tsi yíi un nu ndaa cumi santu. Tan vityin cua cundaca ndíhi ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduvá ña tsaha ra Pedro, tan cueta tsihí ña. Tan quihví ra cuatyí can naha ra, tan nyehé ra naha tyin canyí ña tsihí ña. Tan cañihí ra naha tsi ña, tan tsindacá ra naha tsi ña nu ndaa cumi sandu. Tan tinyíi ra naha tsi ña xiin yíi ña. ¹¹ Tan tandíhi nyívi yihí cuenda ra Cristo, tan tandíhi nyívi tsa tsito tuhun can, nayuhví xaan ñi.

Cuaha xaan tsa iyo tan seña jayahá ra tava tyiñu ra Jesús

¹² Cuaha seña tan tsa iyo jayahá ra tava tyiñu ra Jesús nu yucú nyivi. Tan tandíhi ñi yihí cuenda ra Cristo ndu iín ñi nu cuví corredor cuenda ra Salomón. ¹³ Tan nyívi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siquí ñi yihí cuenda ra Cristo. ¹⁴ Tan cuaha xaan nyívi quitsahá tsinú iñi tsi Jutu Mañi yo Jesús, tahan ñi rayíi tan ñaha. ¹⁵ Tan nda cuanda tavá ñi tsi nyívi cuuhví ityá cahnu, tsaqún ñi tsi ñi nu tsito. Tyin tatum cua yaha ra Pedro tan yaha tixahñu ra siquí ñi cua nduvaha ñi. ¹⁶ Tacan tucu nyívi iyó yatayin ñi ñuu Jerusalén can, cuandacá ñi tsi nyívi cuuhví tan nyívi tsa yihí tatyí ña vaha. Tan nduvaha tandíhi ñi.

Nu nyehé ra Pedro tan ra Juan tundoho

¹⁷ Tacan tan ra jutu tsahnu tsa cuví ityí nuu, tan ra yihí cuenda ra cuví saduceo naha ra, ndasí cuñí ra naha nyehé ra naha tsi ra tava tyiñu ra Jesús tsa cuenda tsa vaha tsa jayahá ra naha tsihin tunyee iñi tsa tsahá Nyoo tsi ra naha. ¹⁸ Tacan tan tiñi ra naha tsi ra naha. Tan tyiñi ra naha tsi ra naha vehe caa. ¹⁹ Maa tyin tsa cuua can quitsí iin ángel tsa jaquitsí Jutu Mañi yo, tan

nuñā ra yuvehe caa can. Tan tava^a ra tsi ra naha. Tan catyí ra tsihin ra naha:

²⁰—Cuaahan ndo tan cunyacu nyityi ndo vehe ñuhu cahnu. Tan nacatyi tuhun ndo tsihin nyíví nácaa coo ñi ñayíví nyito tsa iyó ndo —catyí ángel can tsihin ra naha.

²¹ Tsa tsiñi^b ra naha tsa cahán ra ángel can, tan cuahán ra naha. Tan tsa tuvi inga quíví can nañihí nyíví tsi ra naha vehe ñuhu cahnu. Tan quitsahá jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iñi^c ra jutu tsaaahnu tsa cuví ityi nuu tan ra tsa yucú tsihin ra. Tan cana^d ra naha tsi ra cumi tyíñu cuenda nyíví Israel tyin coo ra naha junta. Tacan tan tava^e tyíñu ra naha na cuquihin ra naha tsi ra tava^f tyíñu ra Jesús nu yucú ra naha vehe caa can. ²² Maa tyin cuhva tsa^g tsaa^h ra vitya naha ra tsitsi vehe caa can, ña nañihí ra naha tsi ra naha. Tan cuanuhuⁱ ra naha cua^j nacatyi tuhun ra naha tsihin ra jutu tsaaahnu tsa cuví ityi nuu. ²³ Tan catyí ra naha tsihin ra:

—Ndásí yuvehe caa can tan tsaa^k ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñá ndi yuvehe can, yoñi maa nañihí ndi —catyí ra naha tsihin ra jutu tsaaahnu tsa cuví ityi nuu.

²⁴ Tacan tan ra jutu tsaaahnu tsa cuví ityi nuu can tsihin ra yiñí ndaha tsi tandíhi ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi^l ra naha tsa cahán ra vitya naha ra tsihin ra naha tan iyo xaan cuñí ra naha. Tan natuhún tahan ra naha nácaa javaha ra naha tan cundihi tuhun can. ²⁵ Tacan tan tsaa^m iñiⁿ ra tan catyí ra:

—Ra tsa tyihi^o ndo vehe caa can naha ra, yucú ra naha vehe ñuhu jacuahá ra naha tsi nyíví —catyí ra.

²⁶ Tacan tan ra yiñí ndaha tsi ra jahá cuenda vehe ñuhu can, tsahan ra tsihin ra vitya naha ra, tan tsiquihín^p ra naha tsi ra tava^q tyíñu ra Jesús tsihin tsa vii ñi tan ña cañi^r ra naha tsi ra naha, tyin yuuhví^s ra naha tsi nyíví coto cañi ñi yuu tsi ra naha. ²⁷ Tsindacá^t ra naha tsi ra tava^u tyíñu ra Jesús nuu ra cumi tyíñu vehe ñuhu cahnu. Tan ra jutu tsaaahnu tsa cuví ityi nuu catyí ra tsihin ra tava^v tyíñu ra Jesús:

²⁸—Nyuhu tsa cahán vaha xaan ndi tsihin ndo tyin ña cahan ca ndo tuhun ra Jesús.

Maa tyin nyoho ña tyaa soho ndo tsa cahán ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñí ndo tyaa ndo cuatyi can siqui ndi tyin tsihí ra —catyí ra jutu tsaaahnu tsa cuví ityi nuu tsihin ra naha.

²⁹ Tacan tan nacahan^w ra Pedro tan inga ra tava^x tysiú ra Jesús, tan catyí ra naha:

—Taahán tsi tyaa yahvi jihna ndi tsi Nyoo tan ñavin ca tsi nyoho. ³⁰ Nyoo cuenda tsii tsaaahnu yo juvin ra janandoto tsi ra Jesús, ra tsa tica^y ndo nu cruu tan tsahñí ndo. ³¹ Tan ra Jesús cuví^z ra tsa jacahnu xaan Nyoo, tan tyaa^{aa} tsi ra xiin cuaha ra, tyin cua cundaca ñaha ra tandíhi maa. Tan intuhun ñi maa ra cuví^{bb} ra jacacú tsi yo. Tyin tacan tsahá^{cc} ra cuhva tsi yo tsa cuví^{dd} yo nyíví Israel na ndu uvi iñi yo cuatyi^{ee} yo tan jaha ra tucanhnu iñi cuatyi^{ff} yo. ³² Tan nyuhu cuví^{gg} ndi tsandaa tsa cuenda tandíhi yacan. Tan tacan cuví^{hh} tucu Tatyi li Nyoo tsa tsaháⁱⁱ Nyoo cunyaa añima nyíví tyá^{jj} yahvi tsi ra —catyí ra Pedro tsihin ra naha.

³³ Tan tsa tsiñi^{kk} ra naha tsa cahán ra Pedro, nduxaan^{ll} xaan^{mm} ra naha. Tan cuñiⁿⁿ ra naha cahñí^{oo} ra naha tsi ra naha. ³⁴ Maa tyin tsihin^{pp} ra cumi tyíñu can naha ra nyíví iñi^{qq} ra cuví fariseo tsa nañí Gamaliel. Tan cuví^{rr} ra maestru^{ss} cuenda ley Nyoo tsa tyaa^{tt} ra Moisés. Tan nyíví tyá^{uu} yahvi xaan^{vv} ñi tsi ra. Tan ra Gamaliel can, nduvita^{ww} nyityi^{xx} ra. Tan caahán^{yy} ra na quita^{zz} ra tava^{aa} tyíñu ra Jesús tañi ñi. Tacan tan quita^{cc} ra naha. ³⁵ Tan quitsahá caahán^{ff} ra Gamaliel can tsihin tandíhi ca ra cumí tyíñu naha ra, tan catyí^{gg} ra:

—Yoo, ra tsa ndacá ñaha tsi nyíví Israel, jaha yo cuenda tsi yo tsihin tsa cua javaha yo tsi ra icán naha ra. ³⁶ Ndycuhun iñi ndo tyin tsa iyó juhva quivi^{kk} nduvita^{ll} iñi^{mm} ra tsa tsinañí Teudas. Tan catyíⁿⁿ ra tyin cuví^{rr} ra iñi^{ss} ra vaha. Tan quita^{zz} maa tumaa cumicientu rayí^{tt} tsinyicun tsi ra. Maa tyin yaha can tsahñí^{uu} nyíví tsi ra. Tan tandíhi^{yy} ra tsa tsinyicun tsi ra cuanuhu^{yy} ra naha ñuu^{yy} ra naha. Tan tsindihí^{zz} tuhun can. ³⁷ Yaha can tan nu cuahán^{ff} ca tsi ityi nuu, quivi^{gg} nacahví^{gg} ra gobernú tsi nyíví, tan nduvita^{gg} ra Judas^{gg} ra ityi Galilea. Tan cuaha xaan^{gg} nyíví tsinyicun tucu tsi ra can. Maa tyin juvin ñi tsahñí^{gg} nyíví tsi ra. Tan tandíhi^{gg} ñi tsa tsinyicun tsi ra cuanuhu^{gg} ñi ñuu^{gg} ñi. ³⁸ Yacan cuenda jaña^{gg} yo tsi ra ihyá naha ra. Tan ña cua tyihi^{gg} yo tsi yo tsihin ra naha

tyin tatum tuhun iin rayii ñi cuví tsa jacuahára naha, cua cundihí tuhun can.³⁹ Maa tyin tatum nditsa tyin tuhun Nyoo cuví tsa jacuahára naha, ña cua cuvi casi yo. Jaha yo cuenda tsi yo tyin ña vaha cañí tahan yo tsihin Nyoo —catyí ra Gamaliel tsihin ra naha.

⁴⁰ Tandihi ra naha ndoq ra naha vaha tsa ña cua cahñi ra naha tsi ra naha. Tacan tan cana ra naha tsi ra tavä tyiñu ra Jesús. Tan catyí ra cumí tyiñu naha ra tsihin ra vitya naha ra na cañi ra naha tsi ra naha. Tan tyasi ra naha nu cahan ra naha tuhun ra Jesús. Tacan tan jañä ra naha tsi ra naha.

⁴¹ Tan quitä ra naha nuu ra cumí tyiñu. Tan sii xaan cuñi ra naha tyin tsahá Nyoo ndatu tyin nyehé ra naha tundoho tsa cuenda ra Jesús. ⁴² Tan ña jandihí ra naha tsa caahán ra naha. Tacan tandihi quivi jacuahára naha tuhun ra Jesucristo vehe ñuhu tan vehe nyivi.

6

Nu nacatsí nyivi yihí cuenda ra Jesús utsa taahan ra naha tyin jaha cuenda ra naha náa tsa tsiñi ñuhu tsi ñi

¹ Tan nu cuahán ca tsi quivi cuaha xaan nyivi yihí cuenda ra Cristo cuvi. Tacan tan nyivi tsa caahán yuhu griego quitsahá caahán ñi siqui nyivi tsa caahán yuhu hebreo tan catyí ñi tyin cuhva tsa tsatsára naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsihiyii. ² Tacan tan tandihí tsa utsi uvi taahan ra tavä tyiñu ra Jesús jandu iin ra naha tsi tandihí nyivi yihí cuenda ra Cristo. Tacan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyoooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyi li Nyoo. Tacan cuhva yo tyiñu ihya tsi ra naha. ⁴ Tan nyuhu cua jañihi ndi ndacan tahvi ndi tsi Nyoo, tan cua jacuaha ca ndi tuhun Nyoo —catyí ra naha.

⁵ Tandihi ñi tan ndoq ñi vaha. Tacan nacatsí ñi tsi ra Esteban. Tyin tsinú xaan iñi ra tsi Nyoo. Tacan tsitú ra tsihin Tatyi li Nyoo. Tacan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra

ñuu Antioquía, tan nanduví ra iin ra Israel. ⁶ Tacan tan tsindacä ñi tsi ra naha nu nyecú ra tavä tyiñu ra Jesús. Tacan tyiso ndaha ra naha jiñi intuhun intuhun ra naha tan tsicán tahvi ra naha tsi Nyoo tsa cuenda ra can naha ra.

⁷ Tacan tsityá ca tuhun Nyoo. Tacan nducuaha ca ñi yiñi cuenda ra Cristo ñuu Jerusalén. Tacan cuaha xaan ra cuví jutu cuenda nyivi Israel natsinu ndihí iñi ra naha tuhun ra Cristo.

Nu tyihí ra naha tsi ra Esteban vehe caa

⁸ Ra Esteban cuví ra iin ra tsa tsitú tsihin tunyee iñi Nyoo. Tacan vaha xaan nyivi cuví ra tyin tsitú añima ra tsihin tsa vaha tsi Nyoo. Tacan cuaha xaan tsa iyo tan seña javahára nu yucú nyivi. ⁹ Tacan tan juhva ra tsa tsicá vehe ñuhu ñuu Israel tsa nañí Vehe Ñuhu Cuenta Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tacan quitsahá caahán yuhu tahan ra naha tsihin ra Esteban. ¹⁰ Maa tyin ña cuví jahä canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsahá Tatyi li Nyoo tsi ra. ¹¹ Tacan tan tyahví ra can naha ra tsi juhva ra na cahan ra naha cuendu siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo. ¹² Yacan cuenda tandihí nyivi can quitsahá cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tiiñi ra naha tsi ra Esteban. Tacan tsahan ra naha tsindacä ra naha tsi ra nu ndu iin ra cumí tyiñu cuenda vehe ñuhu nyivi Israel. ¹³ Tacan nducu ra naha tsi ra cahan cuendu siqui ra Esteban. Tacan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaq ra Moisés. ¹⁴ Tacan tsiñi ndi tsa caahán ra tyn ra Jesús, ra Nazaret can, cua cani ra vehe ñuhu cahnui ihya. Tacan cua nasama ra cuhva iyó yo tsa jacuaha ra Moisés tsi yo —catyí ra tsa caahán cuendu siqui ra Esteban.

¹⁵ Tacan tan ra cumí tyiñu naha ra tan ra nyecú icán nyehé ra naha tsi ra Esteban tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹Tacan tan ra jutu tsahnu tsa cuví ity nnu tsicá tuhun ra tsi ra Esteban, tan catyf ra:

—¿A nditsa tsa caahán ra ihyá naha ra siquí un?

²Tacan tan nacahan̄ ra Esteban tan catyf ra:

—Nyoho yañi, tan nyooho ra tsahnu, tyaa soho ndo tuhun tsa cua cahan̄ yu. Jutu yo Nyoo, ra cahnu ca, quituví ra nnu tsii tsahnu yo, ra Abraham, quíví nyír ity Mesopotamia tsa ndi cumañi ca cuhun ra coo rā nda ñuu Harán. ³Tan catyf̄ ra tsihin

ra: “Nacoo ñuu un, tan tsi tandíhi nyív un. Tan cuhun cun inga ñuu tsa cua janahá yu tsi un” catyf Nyoo tsihin ra Abraham.

⁴Tacan tan ra Abraham quita ra nu iyó nyív Caldea ity Mesopotamia, tan cuahán ra nda ñuu Harán. Tan ndacan cuví nu tsihí jutu ra. Yaha can jaquitsi Nyoo tsi ra ñuhu nu iyó yo ihyá vityin. ⁵Maa tyin nduve ñuhu tsahá Nyoo tsi ra quíví can. Ndi luxu maa nu cuañi ra tan ña tsahá Nyoo. Maa tyin catyf̄ ra tsihin ra Abraham tyin cua cuhva ra. Tan tsa cua cíu ra tan Nyoo cua cuhva ra ñuhu tsi sehe ra. Tacan cahan̄ Nyoo tsihin ra Abraham, vasu tsa ñaha ca coo sehe ra quíví can. ⁶Tan inga tucu tuhun cahan̄ Nyoo tsihin ra tyin nyívata ra cua coo ñi inga ñuu. Tan cua cuvi ñi musu nyíví ñuu can. Tan maa nyíví ñuu can cua quihi ndaha ñi tsi ñi. Tan cua nyehe ñi tundoho cumi cienu tuiya. ⁷Maa tyin cahan̄ tucu Nyoo tsihin ra tyehen: “Nyíví tata un cua nyehe ñi tundoho jaha nyíví ñuu can. Yacan cuenda yuhu cua tatsi tuñi yu tsi nyíví ñuu can. Tan tsa cua yaha yacan tan cua quita nyíví cuvi tata un ñuu can tan cua quitsi ñi ihyá. Tan cua jacahnu ñi tsi yu” catyf Nyoo tsihin ra Abraham.

⁸Tacan natuhun Nyoo tsihin ra. Tan ndoo ra tuhun tsihin ra. Tan Nyoo tsaha ra iin cuhva tsa cua javaha ñi coto naa iñi ñi tsa cahan̄ ra. Tsahá cuenda ra tyin tandíhi ñi sehe yíñi tsa cua coo tan cuñí tsi cunyaa tuñi ra itsi naha tsi. Tan tsa yaha una quíví tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndíhi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra,

tyaa ra tuñi can tsi intuhun intuhun sehe yíñi ra. Tan ra ican naha ra cuví tsii tsahnu yo.

⁹Tan tsa utsi iin taahan ca sehe ra Jacob ndasí cuñí ra naha nyehé ra naha tsi ra José yañi ra naha, tsa cuenda tyin cuñí ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipio. Maa tyin ra José, ña nacoo Nyoo tsi ra. ¹⁰Tan jacacu ra tsi ra nu nyehé ra tundoho. Tan tsahá ra tsa nyityi jiñi ra tsi ra José. Tan tsahá ra tsa vaha coo ra nuu ra Faraón, ra cuvi rey Egipio. Tan rey can tsahá ra tsa cuví ra José ra cumí tyiñu ñuu tsa cayucú Egipio can. Tan tsindaca ñaha ndíhi tucu ra vehe maa rey.

¹¹Tacan tan tsicoo tama nanií cahnu ity Egipio tan ity Canaán. Tan nyehé xaan nyív tundoho. Tan tandíhi tsii tsahnu yo ña ñihí ra naha tsa catsi ra naha. ¹²Maa tyin quíví tsito ra Jacob tyin iyó tsa catsi ra naha nda Egipio, tan jacuhun ra tsi sehe ra na cunducu ra naha tsa catsi ra naha. Tan tsahan̄ ra naha iin tsaha. ¹³Tan tsa tsinu uvi tsahá tsa tsahan̄ ra naha, ra José jacoto ra tsi ra naha tyin yañi ra naha cuví tsi ra. Tacan tan tsito ra Faraón yóo tata cuví ra José. ¹⁴Tacan tan tavá tyiñu ra José na quitsi ra Jacob jutu ra, tsihin tandíhi nyíví ra. Tan cuví ñi uñi xico tsahun taahan nyivi. ¹⁵Tan tacan cuví tsa cuahán ra Jacob cua coo ra ñuhu Egipio can. Yaha can tan tsihí ra ndacan. Tan tsihí ndíhi tucu tandíhi sehe ra, ra cuví tsii tsahnu yo naha ra. ¹⁶Tacan tan tsaa quíví tsa tsindaca ñi yíquí ra Jacob tan yíquí sehe ra nda Siquem. Tan ican quíhví yíquí tandíhi ra naha tsitsi ñuhu nu jatā ra Abraham iin ñaña tsi sehe ra Hamor tahan̄ tsanaha.

¹⁷Maa tyin tsa ndi cumañi ca quita nyíví Egipio, nyíví ra Abraham tsa iyó Egipio can cuaha xaan ñi cuví. Tan tsa nyanaa yatyin quíví tsa cua cuhva Nyoo ñuhu tsi ñi tumaa tsa cahan̄ catsi ra tsihin ra Abraham.

¹⁸Tacan tan quitsaha ndacá ñaha iin rey tsa ña nacoto tsi ra José. ¹⁹Rey can jandaví ñaha ra nyíví yo. Tan janyehe xaan ra tundoho tsi ñi, tan jañiní ra tsi ñi na nacoo ñi tsi sehe ñi tsa ndi cacú tyin na cíu tsi. ²⁰Tan juvin ñi quíví can cacu ra Moisés. Tan tahan̄ xaan iñi Nyoo tsi ra. Tan uñi yoo jacahnu sihī ra tsi ra nda yuvehe ña. ²¹Yaha can ña cuví ca tyiñi xeehe sihī ra tsi ra. Tan nacoo

ñā tsi ra tsitsi iin tyica yuhu yutya. Tacan tan sehe siihí ra rey Egipto can nañihí ñā tsi ra. Tan naquihín ñā tsi ra. Tan jacuahnu ñā tsi ra, tumaa tsa sehe maa ñā cuví tsi ra.²² Yacan cutulhvá ra Moisés tandihí tsa tsitó ñí Egipto. Tan vaha xaan cahán ra tan vaha jahára jahá tunyee iñí tsa tsahá Nyoo tsai.

²³ Tan tsa quitá uvi xico cuiya ra Moisés cuñí ra cuhun ra cunyehe ra nu iyó nyíví Israel, nyíví ra.²⁴ Tacan tan iin quíví nyehéra nu cañí iin ra Egipto can tsi iin ra Israel. Tacan tan tsahñí ra Moisés tsi ra Egipto can tyin cañí xaan ra tsi ra Israel, ra ñuu ra.²⁵ Cuñí maa ra Moisés can tyin nyíví Israel can cutuñí iñí ñí tyin Nyoo jaquitsí tsi ra tyin jacacu ra tsi ñí. Maa tyin ñā tuví iñí ñí tsa tacan cua cuvi.²⁶ Tacan tan tsa inga quíví can nyehé ra Moisés tsi uvi taahan ra Israel, cañí tahan ra naha. Tan ra Moisés, cuñí ra tsa ñā cañí tahan ca ra naha, tan quitsaha catyí ra: “Ñā vaha tsa cañí un tsi ra yañí un” catyí ra tsihin ra naha.²⁷ Tacan tan ra tsa cañí tsi inga ra can tindahñí ra tsi ra Moisés, tan catyí ra tsihin ra: “¿Yóo tavátyiñú tsi un tyin cundaca ñaha un tan cuvi un juez tsa cuenda ndi?”²⁸ ¿A cuñí un cahñí un tsi yu tumaa tsa tsahñí un tsi ra Egipto icu?” catyí ra tsihin ra Moisés.²⁹ Cuhva tsa tsahñí ra Moisés tsa cahán ra can, tsinu ra. Tan cuahán ra nda ñuu Madián. Ndakan ñihí ra ñasíhi ra. Tan ndakan tsicoo uvi taahan sehe ra.

³⁰ “Yahá uvi xico cuiya. Tacan tan iin quíví tsicá nuu ra Moisés nu tsiquí yatyin yucu tsa nañí Sinaí. Tan nyehé ra cayú iin yutun iñú. Tacan tan quituví iin ángel tsitsi ñuhu tsa cayú can.³¹ Iyo xaan cuñí ra Moisés tsa nyehéra yacan. Tan natuhvára nu cayú iñú can tyin nyehé vaha ra, tan tsiní ra ndusu Jutu Mañí yo. Tan catyí ndusu can tyehen:³² “Yuhu cuví Nyoo cuenda tsii tsaaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsaha nihí ra tsihin tsa yuuhví ra. Tan ñā cana iñí ra nanyehe ra.³³ Tan quitsaha catyí tucu Jutu Mañí yo tsihin ra: “Tava nditsan tsaha un tyin ñuhu nu tsañí un, ñuhu ii cuví tsi.”³⁴ Yuhu nyehé yu tandihí tundoho tsa nyehé nyíví cuenda yu ñuhu Egipto can. Tan tsiní yu ndusu ñí tsa tsacú tsaa ñí. Yacan vatsí nuú yu tyin jacacu yu tsi ñí. Naha, tyin jacuhun yu tsi

un nda Egipto” catyí Nyoo tsihin ra Moisés.

³⁵ ’Quivi can ñā cuñí nyíví Israel tsi ra Moisés tsa cundaca ñaha ra tsi ñí, tan catyí ñí tsihin ra: “¿Yóo tavátyiñú tsi un tyin cundaca ñaha un tan cuvi un juez tsa cuenda ndi?”, catyí ñí tsihin ra. Vasu ñā cuñí ñí tsa cundaca ñaha ra tsi ñí, maa tyin Nyoo tavátyiñú ra tsi ra tyin cuvi ra nuu tsihin ñí, tan jacacu ra tsi ñí. Tyin tacan catyí ángel tsa quituví nuu ra nu iñú tsa cayú can.³⁶ Tan ra Moisés can tavátsi nyíví Israel ñuhu Egipto can tsihin tsa jahára ra tsa iyo tan seña ñuu can, tan nu yahá ñí nda nu Ndutyá Ñuhu Cuaaha, tan nu tsicá nuu ñí nu tsiquí tsitsi tsa uvi xico cuiya.

³⁷ Tan juvin ñí maa ra Moisés can cuvíra tsa cahán tsihin nyíví Israel tan catyí ra tyehen: “Nyoo cua jaquitsí ra tsi iin ra cuvíndusu yuhu ra tumaa jaquitsí ra tsi maa yu. Tan cua cuvi ra iin ra Israel tumaa maa yo. Tan taahán tsi tyaa yahvi yo tsi ra” catyí ra Moisés.³⁸ Tan maa ra Moisés can cuahán ra tsihin nyíví tsii tsaaahnu yo nu tsicá nuu ñí nu tsiquí can. Tan ra ican cuvíra tsa cahán ángel tsihin nda yucu Sinaí. Tan ra ican naquihín cuenda ra tuhun Nyoo nácaa coo nyíví, tan tyaqára tuhun can nu tutu tyin tacan tan coto yo.

³⁹ Maa tyin nyíví tsii tsaaahnu yo ñā tyaa yahvi ñí tsi ra. Tavátsiyo ñí tsi ra. Tan cuñí ñí cunuhu ñí nda Egipto.⁴⁰ Yacan cuenda cuhva tsa nyíví ra Moisés yucu Sinaí, tan cahán nyíví tsihin ra Aarón tan catyí ñí: “Jaháha taahan nyoo cuhun ityi nuu ndi. Tyin ñā tsitó yo náa tahan ra Moisés, ra tsa tavátsi yo Egipto” catyí ñí.⁴¹ Tacan tan jahára ñí iin indiquí xuhun cuaan. Tan tsahñí ñí quiti tyin cuhva cuenda ñí tsi tsitoho can. Tan sii xaan cuñí ñí tsicoo ñí vico cuenda tsitoho tsa jahára ñí tsihin ndaha ñí.⁴² Tacan tan Nyoo jatsiyo ra tsi ñí. Tan jaña ndaha ra tsi ñí tyin cua jahahnu ñí ñicanyii, tan yoo, tan tandihí tiñuu tsa iyó ityi andivi. Tyin tyehen tyaa ra cuvíndusu yuhu Nyoo nu libru tahan tsanaha:

Nyooho nyíví Israel, ¿A tsahñí ndo quiti tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiquí? Ñavin.

⁴³ Tyin jahahnu ndo tsi nyoo tsa nañí Moloc, tan jahahnu ndihí tucu ndo tsi nyoo tsa nañí Renfán tsa caá tumaa caá iin tiñuu tsa iyó andivi.

Juvín ñí maa ndo javahá tsitoho can, tan jacahnú tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyí Nyoo tsihin ñí.

⁴⁴ Nu tsicá nuu tsii tsaaahnu yo nu tsiquí can, tsicumí ra naha iin vehe ñuhu tsa tsinu tsihin ñí quiti. Tan tsitsi vehe can tsicumí ra naha tabla yuu tsa nyaá ley Nyoo nuu. Tan ra Moisés tava tysiñu ra na jahava ñí vehe ñuhu can ityi tsata, tumaa cuhva janahá maa Nyoo tsi ra. ⁴⁵ Yaha can tan ra Josué cuví ra ityi nuu tsihin ñí. Tacan tan quihiñ ñí vehe ñuhu can tan vatsí ñí tsihin tsi nu iyó yo ihyá vityin. Tyin Nyoo tava ra tsi nyivi tsicoq ñuhu ihyá tam nacuhvá cuenda ra ñuhu ihyá tsi ñí Israel, nyivi yo. Tan tsatyinu ñí vehe ñuhu can nda cuanda quiví tsicoq ra rey David. ⁴⁶ Tan ra rey David ñihí ra tumañi iñi nuu Nyoo. Tan cuñí ra jahava ra iin vehe vaha nu coo Nyoo. Juvín ñí Nyoo jacahnú ra Jacob tahán tsanaha.

⁴⁷ Maa tyin ra Salomón jahavá ra vehe Nyoo.

⁴⁸ Vasu ña iyó Nyoo tsitsi vehe ñuhu tsa jahavá nyivi. Tumaa cahan ra cuví ndusu yuhu Nyoo tahán tsanaha tyehen:

⁴⁹ Andíví cuví tyayu nu nyaá yu ndacá ñaha yu.

Tan ñuhu ñayivi, yacan cuví nu tsafí tsaha yu.

Tatun jahava nyoho iin vehe ña cuñí maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñí maa ndo?

⁵⁰ ¿A ña tsító ndo tyin maa yu jahavá andíví tan ñuhu ñayivi? catyí ra cuví ndusu yuhu Nyoo jahá Nyoo.

⁵¹ Maa tyin nyoho —catyí ra Esteban— tacan ñí tuhvá maa ndo jandavá ndo iñi ndo. Tan ña cuñí ndo naquihin ndo tuhun caahán Nyoo. Tacan ñí ña tyaá yahvi ndo tsi Tatyí li Nyoo. Inducu ñí caá ndo tsihin tsii tsaaahnu yo. ⁵² Tsii tsaaahnu yo cuxañan ra naha tan tsahñí ra naha tsi tandihí ra cuví ndusu yuhu Nyoo tahán tsanaha. Tan ra ican naha ra catyí tyin cua quitsi iin ra vaha. Tan tsa quitsí ra vityin, nyoho xicó ñaha ndo tsi ra tsi ra xaan iñi tsi ra, tan tsahñí ndo tsi ra. ⁵³ Nyoho naquihin cuenda ndo ley Nyoo tsa tsaha ángel tsi ndo, maa tyin ña cuñí ndo tyaa yahvi ndo tsa caahán ley can —catyí ra Esteban.

Nu tsihí ra Esteban

⁵⁴ Tsa tsiní ra cumí tysiñu vehe ñuhu cahnu naha ra tuhun ihyá, xaan xaan cuñí ra naha, ndacua jacahyu ñuhu ra naha nyehé ra naha tsi ra Esteban. ⁵⁵ Maa tyin ra Esteban tsitú ra tsihin Tatyí li Nyoo tan nanyehé ra ityi andíví. Tan nyehé ra tsa cahnu cuví Nyoo. Tan nyehé tucu ra tsi ra Jesúus nyaá nyityi ra xiin cuaha Nyoo. ⁵⁶ Tacan tan catyí ra Esteban:

—Jihna ndo! Nyehé yu andíví tan ticohó tsi. Tan nyehé yu tsi ra Jesúus, Rayíi tsa quee nda gloria, nyaá nyityi ra xiin cuaha Nyoo —catyí ra Esteban.

⁵⁷ Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñí cana tsaa ra naha. Tan tandihí ra naha cuahán ra naha siquí ra Esteban. ⁵⁸ Tacan tan tava ra naha tsi ra yuhu ñuu. Tan tsahñí ra naha tsi ra tsihin yuu. Tan ra tsa jahavá tsa ña vaha can naha ra, nacoq ra naha jahma tsa nyaá tsata ra naha tyin jaha cuenda iin ra tuyuva tsa nañí Saulo. ⁵⁹ Tan tsitsi tsa cañí ra naha yuu tsi ra Esteban, quitsahá tsicán tahví ra Esteban tsi Nyoo, tuyin tuví iñi ra tyin tsa cua cíu ra. Tan catyí ra tyehen:

—Jutu Mañi yu Jesúus, naquihin añima yu —catyí ra.

⁶⁰ Yaha can, tan tsicuiñi tsiti ra, tan tsaa cana tsaa ra tan catyí ra:

—Jutu Mañi yu, ña tjiñ cuenda un cuatyí tsa jahavá ra naha —catyí ra.

Tsa yahá cahan ra tacan, tan tsihí ra.

8

Nu tsinyaq ndaha ra Saulo tsi nyivi yihi cuenda ra Cristo

¹ Tan ra Saulo ña tsinú iñi ra tsi ra Jesúus, tan ndoq ra vaha tsa tsahñí ra naha tsi ra Esteban.

Tan juvin ñí quivi can quitsahá nducú xaan nyivi tsi ñí yihi cuenda ra Cristo ñuu Jerusalén tyin cahñí ñí tsi ñí. Tan tandihí ñí yihi cuenda ra Cristo tsinu ñí, cuahán ñí cua coo ñí tandihí ñuu tsa cayucú Samaria, tan tandihí ñuu tsa cayucú Judea. Maa tyin ra tava tysiñu ra Jesúus ña quita ra naha. Ndoor ra naha Jerusalén. ² Tan juhva ra tsa nyicún vaha tsi Nyoo ñuu Jerusalén can, tsahan ra naha tsicutsí ra naha cuñú ñuhu ra Esteban nda nu ndaa cumi santu. Tan tsacu xaan

ra naha tsa cuenda tsa tsihí ra. ³Tan ra Saulo can quitsahá nyaá ndaha ra tsi nyiví yihí cuenda ra Cristo. Tan tsahan̄ ra tan iin tan iin vehe ñi. Tan ixta caa ra tsi ñi, tan tsahá cuenda ra tsi ñi tyin cuhun ñi vehe caa, tahan̄ ñi rayii tan ñaha.

Nu caahán ra Felipe tuhun ra Cristo nu cuví Samaria

⁴Tan tandihi ñi tsa quita ñuu Jerusalén can, caahán ñi tuhun Nyoo nácaa jacacú ra Cristo tsi yo, tandihi ñi ity nu cuahán ñi. ⁵Iin ra tsa nañí Felipe tsaa ra iin ñuu canyí Samaria. Tan quitsahá caahán ra tuhun ra Cristo tsihin nyiví iyó ican. ⁶Tan tandihi ñi nii cuñí ñi tan tyá soho ñi tsa caahán ra. Tyin nyehé ñi tsa iyo tsa javahá ra. ⁷Tyin cuaha xaan nyiví tsa yihí tatyí ña vaha tan nduvahá ñi; tatyí ña vaha tsa yihí tsi ñi, quita nahnu tan canqá tsaa nahnu cuahán nahnu. Tan cuaha xaan nyiví coxo tan nyiví tsa ña cuví canda tan ña cuví caca, nduvahá ñi. ⁸Yacan cuenda nyivi ñuu can, sií xaan cuñí ñi.

⁹Tan Samaria can iyó iin ra tasi nañí Simón. Tuhvá ra jandaví ñaha tsi nyivi. Catyí ra tyn cahnu xaan cuví ra. ¹⁰Tandihi maa nyivi, ñi cuca tan ñi ndaahvi, tyá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihyá —catyí ñi.

¹¹Tyaá yahví xaan ñi tsa caahán ra tyn tsa naha xaan jandaví ñaha ra tsi ñi tsihin tsa tasi. ¹²Tacan tan quitsi ra Felipe. Tan jacoto ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsahá tsinú iñi ñi tsi ra Cristo, rayii tan ñaha. Tan tsicoondutya ñi. ¹³Nda cuanda ra Simón can, tan natsinu ñi ra tsi ra Cristo, tan tsicoondutya ra. Tan quitsahá tsicá nuu ra tsihin ra Felipe. Tan iyo xaan cuñí ra nyehé ra tsa iyo tan seña tsa javahá ra Felipe.

¹⁴Tacan tan ra tava tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyiví Samaria tuhun Nyoo. Tacan tan jacuhún ra naha tsi ra Pedro tan ra Juan nda Samaria. ¹⁵Tan tsa tsaa ra naha, quitsaha tsicán yahví ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na naquihin ñi Tatyí li Nyoo. ¹⁶Tyin ñi can, ñaha ca nuu Tatyí li Nyoo siquí ñi. Maa tsa tsicoondutya ñi ñi tsihin siví Jutu Mañi yo Jesús. ¹⁷Tacan tan ra

Pedro tan ra Juan tyiso ndaha ra naha jiñi ñi, tan naquihin ñi Tatyí li Nyoo. ¹⁸Tan ra Simón can nyehé ra nu tyiso ndaha ra tava tyiñu ra Jesús jiñi ñi, tan naquihín ñi Tatyí li Nyoo. ¹⁹Tan quitsahá caahán ra Simón tan catyí ra:

—¿Najava xuhun cuñí ndo tan cuhva ndo tunyee iñi tsi yu, cuvi tyiso ndaha yu jiñi nyivi, tan naquihin ñi Tatyí li Nyoo? —catyí ra Simón tsihin ra naha.

²⁰Tacan tan nacahan̄ ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsahá Nyoo tsi yo? Ña cuví. ²¹Yooho, ña taahán tsi tyihi un tsi un tsihin tyiñu ihyá. Tyin añima un ña vaha nuu Nyoo. ²²Ndu uvi iñi cuhva tsicá iñi un, tyin cahnu xaan tsa caquini tsicá iñi un. Tan ndacan tahvi tsi Nyoo na jaha ra tucahuñi iñi tsi un tsa cuenda tsa tsicá iñi un tsitsi añima un. ²³Tyin nyehé yu tyin tsitsi añima un iyó cuaha tsa caquini tan nyivo iñi un. Tan tsa caquini can ña tsahá coto un tsa vaha —catyí ra Pedro tsihin ra Simón.

²⁴Tacan tan nacahan̄ ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandihi tsa caahán un tsihin yu siquí yu —catyí ra Simón tsihin ra Pedro.

²⁵Tsa yahá can tan ra tava tyiñu ra Jesús tsahá cuenda ra naha tandihi tsa nyehé ra naha tsa javahá ra Cristo nu tsicá ra nu ñuhu ñayivi. Tan cahán̄ ra naha tuhun Nyoo. Tacan tan cuanuhú ra naha nda ñuu Jerusalén. Tan tandihi ñuu tsa cayucú Samaria nu yahá ra naha jacoto ra naha nácaa javahá yo tan cacu yo.

Nu caahán ra Felipe tuhun Nyoo tsihin iñi ra ñuu Etiopía

²⁶Tsa yahá yacan tan cahan̄ iin ángel Nyoo tsihin ra Felipe, tan catyí ra:

—Nduvita tan cuhun cun ityi sur, ityi queé nda Jerusalén tan cuahán nda Gaza —catyí ángel can tsihin ra.

Yacan cuví ityi tsa yahá nu tsiquí. ²⁷Tacan tan ra Felipe nduvita ra tan cuahán ra. Tan ityi cuahán ra ñihí tahan̄ ra tsihin iin ra ñuu Etiopía. Tan cuví ra can eunuco [tyin ña cuví coo ñasiihí ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina

ñuu Etiopía can. Tan tsahan̄ ra Etiopía can tsijacahn̄ ra tsi Nyoo nda ñuu Jerusalén.

²⁸Tan ityi cuanuhú ra nda ñuu ra nyaá ra
síqui carreta ra. Tan cahví ra nu libru tsa
tyaa ra Isaías, ra cuví ndusu yuhu Nyoo
tahan tsanaha. ²⁹Tacan tan Tatyi li Nyoo
cahan tsihin ra Felipe:

—Natuhva nu carreta can.

³⁰ Tan cuhva tsa natuhvá ra Felipe nu
carreta can, tsiñi ra tyin cahví ra Etiópia
can nu libru tsa tyaa ra Isaías. Tan tsica
tuhun ra Felipe tsi ra tan catyí ra:

—¿A cutuñí iñi un tsa caahán tsí?
—catyí ra.

³¹ Tacan tan nacahan ra Etiopía can tan catyí ra:

—¿Nacaa cutuñi iñi yu tan yoñi jacuahá tsi yu? —catví ra tsihin ra Felipe.

³² Tan nu cuahán cahví ra, catyí tsi tye-

Tsahñi ra naha tsi ra tumaa tuhyá ra naha

Tyin tumaa ña tsacú mbee tatuń cua xatya
ra naha ixi tí, tan tumaa tsa ña tsacú
tí tun cua cahñí ra naha tsi tí,
tacan cuví ra can tyin nyehé ra tundoho tan
nduve náá cahan ra.

³³Janduluhlu ra tsi ra nuu ra naha tan yoñi cuñí jayaha iin tsa yaha tsihin ra.

Tan tsa cuenda nyiví cuví tata ra, yoñi
caahán tsa cuenda ñi.

Tvin ña tsicoo sehe ra tan tsihí ra

Tacan catví tsi nu tutu tsa cahví ra can

³⁴ Tacan tan ra Etiopía quitsahá tsicá tubun ra tsi ra Felipe, tan catví ra:

—Jaha tumañi iñi tsí yu, tan catyi tuhun un luxu tsihin yu, ¿yóo tuhun caahán ra ndusyo yuhu Nyoo ihyá? ¿A tuhun maa ra, o yóo tuhun caahán ra? —catyí ra tsihin ra Feline

³⁵Tacan tan ra Felipe quitsahá caahán ra síqui tuhun tsa tsa yahá cahví ra can, tan tsaha cuenda ra tsi ra tyin tuhun ra Jesús caahán ra ndusu yuhu Nyoo can. Tan tsaha cuenda ra tyin ra Jesús cuví ra jacacú tsi yo. ³⁶Tacan tan tsa cua yaha ra naha nu yihi ndutya. Tan ra Etiopía can quitsahá caahán ra tsihín ra Felipe tan catví rá:

—Ihya yihí ndutya. ¿A ña cuvi coondutya yu ihya? satví ra

³⁷ Tacan tan nacahān ra Felipe tsihin ra
Etiopía, tan catyí ra:

—Tatun tsinú iñi un tsihin tsa niñ añima
un, cuví coondutya un —catyí ra tsihin ra.

Tacan tan nacahan ra can, tan catví ra;

—Tsinú iñi yu tyin Sehe Nyoo cuví tsi ra
Jesucristo —catyí ra.

³⁸ Tacan tan ra can caahán ra tsihin musu
ra na jacuiñi ra carreta can. Tan nduvia
taahan ra naha nuu ra naha. Tan quíhyi ra
naha tsitsi ndutya. Tacan tan jacoindutya
ra Felipe tsi ra Etiopia. ³⁹ Tan cuhva tsaa
quita ra naha tsitsi ndutya can, tan Tatyi
li Jutu Mañi yo naquihin ra tsi ra Felipe.
Tan ra Etiopía can ñña nyehre ra numaa ityi
cuahán ra Felipe. Maa tyin sii xaan cuñíi
ra, cuanuhú ra. ⁴⁰ Tan ra Felipe tsaa ra ñuu
Azoto. Tan cuahán ra tan iin tan iin ñuu,
tan caahán ra tuhun ra Cristo tsihin nyiyí
nda cuanda tsa tsaa ra ñuu Cesarea.

9

*Nu natsinu iñi ra Saulo tsi ra Cristo
(Hechos 22.6-16; 26.12-18)*

¹Tan tsicá ra Felipe caahán ra tuhun ra
Cristo tsihin nyíví, tan ra Saulo ña jandihí
maa ra tsa nducú cahñí ra tsi nyivi yihí
cuenda Jutu Mañi yo. Tan tsahan ra nu nyaá
ra jutu tsahnu cuví ityi nuu, ²tsindacan ra
iin tutu tsi ra jutu, tyin nacuhva ra ndatu
tsa cuhun ra vehe ñuhu ñuu Damasco, tan
tiin ra tsi ñi nyicún tsi ra Cristo, tan quitsi
ndaca ra tsi ñi vehe caa ñuu Jerusalén,
tahan ñi rayii tan ñaha. Níhi ra Saulo tutu
can tan cuahán ra. ³Tan tsa cua tsaa ra ñuu
Damasco, sana iñi ra, tan quitsi ñuhu ityi
andiví, jandandisín tsi tanií cahnu maa nu
cuahán ra. ⁴Tacan tan ra Saulo nduvá ra
nu ñuhu. Tan tsiñi ra iin ndusus tsa catyí
tvehen:

—Saulo, Saulo, ¿nacuvi tyin nyaá ndaha un tsi vu? —catví ndusu can tsibin ra

⁵Tacan tan pacahan ra Saulo;

—¿Yóo cuví yooho, taa? —catyí ra, tsicá
tukus ra.

Tacan tan nacahan ndusu can tsihin ra,
tan catvy tsi:

—Yuhu cuví ra Jesús, ra tsa nyaá ndaha un. Juvin ñi tsi maa un jañicuehé un, tiumaa jañicuehé indíquí tsi tì tsa tsafí ihñi tì nu tsa tutsi ra naha tsi tì —catyí ra Jesús tsikin ra.

⁶Tacan tan quitsaha nihí ra Saulo tsihin tsa yuuuhví ra. Tan catyí ra:

—Jutu Mañi yu, ¿náa cuñí un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduyvita tan cuhun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesú斯 tsihin ra Saulo.

⁷Tan ra tsa cuahán tsihin ra Saulo, nayuhví xaan ra naha. Tan ña ñihí ra naha náa tuhun cahan ra naha tyin tsiní ra naha ndusu can maa tyin yoñi nyehe ra naha.

⁸Tacan tan ra Saulo nduvitá ra. Tan tsa nuñä ra tinuu ra, ña cuví maa nanyehé ra tyin cuaa ra jaha Nyoo. Yacan cuenda, ra tsa cuahán tsihin ra tiñ ra naha ndaha ra tan tsindaca ra naha tsi ra ñuu Damasco.

⁹Ican tsinyijí ra uñi quívi. Tan ña cuví maa nanyehé ra. Tan ña tsatsí ra, tan nduve maa náa tsihí ra.

¹⁰Ñuu Damasco can iyó iin ra tsinú iñi tsi Nyoo, nañí ra Ananías. Tan nyehe ra iin tsa nyehe ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

¹¹Tacan tan Jutu Mañi yo catyí ra:

—Nduyvita, tan cuhun cun ityi cahnu tsa nañí Ndoo ñi. Tan nanducu un vehe ra tsa nañí Judas. Tan ndaca tuhun un nu maa tahan iyó ra tsa nañí Saulo, ra ñuu Tarso. Tyin tsicán tahvi ra tsi yu. ¹²Tan nyehe ra iin tsa nyehe ra, tan nyehe ra tsi yooho, Ananías, tyin tsaa un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

¹³Tacan tan nacahan ra Ananías tan catyí ra:

—Jutu Mañi yu, cuaha xaan nyiví caahán ñi tsihin yu tyin nyiví yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi. ¹⁴Tan vityin vatsí ra ihya tyin tsaha ra jutu tsaaahnú tsa cuví ityi nuu ndatu tsi ra tsa tyihi ra tsi nyiví tsicán tahvi tsi un vehe caa —catyí ra Ananías tsihin Jutu Mañi yo.

¹⁵Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsí vaha yu tsi ra Saulo can, tyin cua cahan ra tuhun yu tsihin nyiví inga ñuu, tan tsihin rey nyiví can, tan juvin ñi cahan ndihí ra tuhun yu tsihin nyiví Israel. ¹⁶Yuhu cua jacuaha yu tsi ra nácaa tsa cuaha tundoho cua nyehe ra tsa cuenda yu —catyí Jutu Mañi yo tsihin ra Ananías.

¹⁷Tacan tan cuahán ra Ananías vehe nu nyiví ra Saulo. Tsaq ra yuvehe can tan quíhví ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañí Saulo, Jutu Mañi yo ra Jesú斯, ra tsa quituví nuu un ityi vatsí un, ra ican jaquitsí tsi yu tyin nanyehe un inga tsaha. Tan cua jacutu ra tsi un tsihin Tatyí li ra —catyí ra Ananías tsihin ra Saulo.

¹⁸Tan juvin ñi cuhva can tan coyo tsa caá tumaa caa yaa tyaca tsa tyasi tinuu ra Saulo. Tacan tan cuví nanyehe ra. Yahá can tan tsicoondutýa ra. ¹⁹Yahá can tan nacatsí ra, tan ndunyee cuñu ñihu ra inga tsaha. Tan ndoo ra juhva quívi tsihin nyiví tsa yiñí cuenda ra Cristo ñuu Damasco.

Nu quitsaha caahán ra Saulo tuhun ra Cristo tsihin nyiví ñuu Damasco

²⁰Tacan tan numi ñi quitsaha caahán ra Saulo tuhun ra Cristo tsihin nyiví tandihí vehe ñihu nyiví Israel ñuu Damasco. Tan catyí ra tyin ra Jesú斯, Sehe Nyoo cuví tsi ra.

²¹Tandihí maa nyiví tsa tsiní tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihyá cuví ra tsa tsinyaä ndaha tsi nyiví tsicán tahvi sivi ra Jesú斯 ityi ñuu Jerusalén? ¿A ñavin juvin ra cuví ra tsa vatsí tiñ tsi nyiví iyó ihyá tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²²Maa tyin ra Saulo ñihi ca caahán ra tuhun ra Cristo tsihin tsa ñiñ iñi ra. Tan janahá ra tsi nyiví Israel tsa iyó ñuu Damasco tyin ra Jesú斯 cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinú xeehe ra Saulo nuu ra Israel naha ra

²³Tsa yahá juhva quívi, tan ra Israel tsa ña tsinú iñi tsi ra Cristo natuhún tahan ra naha tyin cua cahñí ra naha tsi ra Saulo.

²⁴ Ñiñu tan nduví ndatú ra naha tsi ra yuvehe cahnu ñuu can. Maa tyin ra Saulo tsito ra tuhun can. ²⁵ Tacan tan nyiví tsa tsinú iñi tsi ra Cristo ñuu can tyihí ñi tsi ra tsitsi iin tyica cahnu. Tan tsacuaa januu ñi tsi ra ity ventana iin vehe tsa nyaá yuhu cora ñuu can. Tacan tan tsinú ra cuahán ra.

Nu nyíi ra Saulo ñuu Jerusalén

²⁶ Quíví tsa tsaā ra Saulo ñuu Jerusalén, cuñí ra ndu iin ra tsihin nyiví tsa yihí cuenda ra Cristo. Maa tyin tandíhi maa ñi tan yuuhví ñi nyehé ñi tsi ra. Tyin ña tsinú iñi ñi tsa yihí ra cuenda ra Jesús. ²⁷ Maa tyin iin ra tsa nañí Bernabé, quihín ra tsi ra. Tan tsahá cuenda ra tsi ra tsi ra tava tyiñu ra Jesús. Tan nacatyí tuhun ra tsihin ra naha nácaa nyehé ra Saulo tsi Jutu Mañi yo ra Cristo ity ñuu Damasco; tan nacatyí tuhun ra nácaa cahan Jutu Mañi yo tsihin ra. Tan nácaa cahan ra tuhun ra Cristo tsihin tsa ña yuuhví ra nda ñuu Damasco. ²⁸ Tacan tan ndog ra Saulo ñuu Jerusalén tsihin nyiví tsa yihí cuenda ra Cristo. ²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. ³⁰ Maa tyin tsito ra hermano can naha ra tyin tacan tsicá iñi ra can naha ra. Yacan cuenda tsindacá ra hermano naha ra tsi ra Saulo nda ñuu Cesarea. Tacan tan jacuhún ra naha tsi ra nda Tarso, ñuu ra.

³¹ Tacan tan nyiví yihí cuenda ra Cristo tsa iyó tandíhi ñuu tsa cayucú Judea, tan Galilea, tan Samaria, sii xaan cuñí ñi tyin ña cuxaán ca nyiví tsi ñi. Tan ndunyeé ca iñi ñi tsihin tunyee iñi tsi Nyoo tyin tyaá yahvi vaha ñi cuhva cahan ra, tyin yuuhví ñi coto ña cua javaha ñi cuhva cuñí ra. Iyó ñi tsihin tsa jatyinyé Tatyi li Nyoo tsi ñi. Tan nducuahá ca ñi tan iin tan iin quíví.

Nu nduvahá ra Eneas

³² Tacan cuví tan ra Pedro tuhvá ra cuahán cua nyehé nácaa yucú ra hermano naha ra tan iin tan iin ñuu. Tan tsahan tucu ra tsinyehé ra nu iyó nyiví yihí cuenda ra Jesucristo ñuu Lida. ³³ Ican nañihí ra tsi iin ra cuuhví, nañi ra Eneas. Tan tsa una cuiya canyií ra tan ña cuvi maa nacandá ra tyin naxii cuñu ñuhu ra. ³⁴ Tan ra Pedro catyí ra tsihin ra:

—Yooho Eneas, ra Jesucristo janduvahá ra tsi un. Ndúvita tan natuvi yuvi un —catyí ra tsihin ra.

Tan juvin ñi cuhva can tan nduvitá ra Eneas. ³⁵ Tan nyehe tandíhi nyiví ñuu Lida can tyin tsa nduvahá ra. Tan nyehe tucu nyiví ñuu Sarón. Tacan tan ñi can, natsinu iñi ñi tsi Jutu Mañi yo. Tan nacoq ñi tuhun tsahnu tsa tsinú iñi ñi nda ndi cumañi ca coto ñi tuhun ra Cristo.

Nu nandotq ña Dorcas

³⁶ Quíví can tsicoq iin ñaha tsinú iñi tsi ra Cristo ñuu Jope. Tan nañí ña Tabita, tan tsihin yuhu griego, nañí ña Dorcas. Tan tuhvá ña javahá tsa vaha tsihin nyiví, jatyinyéé ña tsi nyiví ndaahvi. ³⁷ Tan quíví can ña Dorcas quihín cuehe tsi ña tan tsihin ña. Tan tsa yahá jacutí ñi tsi ña, tsicaquín ñi tsi ña tsitsi cuartu nu tsinu uvi pisu. ³⁸ Yatiny ñi canyí ñuu Jope tsihin ñuu Lida, nu nyíi ra Pedro. Tan nyiví tsa yihí cuenda ra Cristo ñuu Jope can tsito ñi tyin nyíi ra Pedro ñuu Lida. Tacan tan jacuhún ñi tsi uvi taahan ra na cucana ra naha tsi ra Pedro tyin na cuhun ra ñuu Jope tsa numi ñi. Tan tsaā ra naha nu nyíi ra tan catyí ra naha tsihin ra:

—Janumi ñi tan cuhun un tsihin ndi nda ñuu Jope —catyí ra naha tsihin ra.

³⁹ Tacan tan ra Pedro nduvitá ra tan cuahán ra tsihin ra naha. Tan cuhva tsa tsaā ra naha, tsindacá ra naha tsi ra nda cuartu nu canyí ndiyí can. Tan tandíhi maa ñiñaha tsa tsihí yii natuhvá ñi tsata ra, tan tsacú tsaa ñi. Tan janahá ñi jahma tsa quicu ña Dorcas tsa tsicoq ña. ⁴⁰ Tacan tan ra Pedro tavá ra tsi tandíhi nyiví cuartu can. Tan tsicuiñi tsiti ra tan quitsahá tsicán tahvi ra tsi Nyoo. Tacan tan nanyehe ra tsi ñaha tsa tsihí can canyí ña. Tan quitsahá catyí ra tsihin ña:

—Hermana Tabita, ndúvita —catyí ra tsihin ña.

Tacan tan nanyehe ña. Tan tsa nyehé ña tsi ra Pedro, tsinyaa ña. ⁴¹ Tacan tan ra Pedro tiñīn̄ ra ndaha ña tan janduvitá ra tsi ña. Tacan tan canā ra tsi ra hermano naha ra, tan tsihin ñiñaha tsa tsihí yii. Tan nacuhva cuenda ra tsi ña tsi ñi tyin tsa nandotq ña. ⁴² Yahá can tan tandíhi maa nyiví ñuu Jope tsito ñi tyin nandotq ña can. Tan cuaha xaan ñi natsinu iñi tsi Jutu Mañi yo. ⁴³ Tan ra Pedro ndoq ra juhva quíví ñuu

can, nyíí ra yuvehe iin ra tsa janduvitá ñii quiti, nañí ra Simón.

10

Ra Pedro tsihin ra Cornelio

¹Nuu Cesarea iyó iin ra tsa nañí Cornelio. Tan cuví ra ra yihi ndaha iin cientu andaru. Tan tsa tandíhi andaru tsa yihi ndaha ra can nañí tsi Italiano. ²Tan ra Cornelio can yuuhví ra tsi Nyoo. Maa ra tan tsihin tandíhi nyiví ra vaha xaan jachahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyiví ndaa hví ñuu Israel, tan tandíhi quíví tsicán tahvi ra tsi Nyoo. ³Tan iin quíví cuhva caa uñi tsa tseñi, nyehe ra iin tsa nyehé ra. Tan ican cuví nu catisi xaan nyehe ra iin ángel tsa jacuhun Nyoo nu nyíí ra, tan catyí tsi tsihin ra:

—¡Yoho Cornelio! —catyí ángel can tsihin ra.

“Tacan tan nanyehe ra Cornelio tsi ángel can. Tan nayuhví xaan ra. Tan quitsaha tsicá tuhun ra tan catyí ra:

—¿Náa tsa cuví ihyá, taa? —catyí ra tsihin ángel can.

Tacan tan ángel can quitsaha caahán ra tsihin ra:

—Nyoo tsiñi ra tsa caahán un tan tsa tsicán un tsi ra. Tan taahán iñi ra tyin jatyinyéé xaan un tsi nyiví ndaa hví. ⁵Tan vityin cuñí tsi tsa tava tyiñu un na cuquihin tyiñu tsi iin ra tsa nañí Simón Pedro nda ñuu Jope. ⁶Ra ican cua cahan tsihin un náa taahán tsi javaha un. Iyó ra vehe ra tsa nañí tucu Simón, cuví ra ra janduvitá ñii quiti. Tan iyó vehe ra yuhu ndutya ñuhu —catyí ángel can tsihin ra Cornelio, tan cuahán ángel can.

⁷Tsa yahá cuahán ángel can, ra Cornelio cana ra tsi uvi taahan musu ra, tan tsihin iin andaru tsa jahá cuenda tsi ra. Tan yihi andaru can cuenda Nyoo. ⁸Tandihi maa tsa cahan ángel can tsihin ra Cornelio tan nacatyí tuhun ra tsihin nduñi taahan ra can naha ra. Tan jacuhun ra tsi ra naha ñuu Jope.

⁹Tuví inga quíví tan cuahán ra can naha ra. Tan tsa ndi cumañi ca tsaa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. ¹⁰Tan tsaa soco tsi ra tan tsisocó xaan ra. Maa tyin tsitsi tsa tsinú

tsa catsi ra, quitsaha nyehé ra iin tsa janahá Nyoo tsi ra. ¹¹Tan nyehé ra tyin ticohó andivi. Tan nyehé ra andivi tyin vatsí nuú iin jahma cahnu xaan ityi nu ñuhu. Tan tandíhi tsa cumí tutun tsi nuuhñi nuuhñi ñi. ¹²Tan tsitsi jahma can yihi tandíhi maa nuu quiti tsa cumi taahan tsaha, tan tandíhi nuu coo, tan saa. ¹³Tacan tan tsiñi ra iin ndusu tsa caahán tsihin ra:

—Pedro, nduvita tan cahñi quiti ihyá, tan catsi un —catyí ndusu can tsihin ra.

¹⁴Maa tyin ra Pedro nacahán ra tan catyí ra:

—Ña cua catsi yu, Jutu Mañi yu. Yuhu ña tuhvá yu catsi quiti tsa catyí ley tyin ña vaha catsi ndi —catyí ra Pedro.

¹⁵Tacan tan quitsaha caahán nyico ndusu can tsihin ra inga tsaha:

—Ña catyí un tyin ña catsi un tsa tsa janduvaha yu —catyí ndusu can tsihin ra.

¹⁶Uñi taahan tsaha nyehé ra yacan jaha Nyoo. Tacan tan jahma cahnu can nanda nyico can ityi andívi. ¹⁷Tan tsitsi tsa tsicá iñi ra Pedro náa cuñí tsi catyí tsa nyehé ra can, tsaa musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañí Simón. ¹⁸Tan tsa tsaa ra naha ityi yuvehe tsicá tuhun ra naha tatuń ican iyó iin ra tsa nañí Simón Pedro. ¹⁹Tan ra Pedro tsicá xaan iñi ra náa cuñí tsi catyí tsa nyehé ra. Tacan tan Tatyí Ii Nyoo quitsaha caahán tsihin ra, tan catyí tsi:

—Nyehe Pedro, uñi taahan ra vatsí nanducú tsi un. ²⁰Nduvita tan cuhun cun tsihin ra naha, tan ña caca iñi un tyin maa yu jaquitsi tsi ra ihyá naha ra —catyí Tatyí Ii Nyoo tsihin ra Pedro.

²¹Tacan tan ra Pedro nuu ra nu yucú ra tsa jacuhun ra Cornelio, tan catyí ra tsihin ra naha:

—Yuhu cuví ra tsa nanducú ndo. ¿Náa tyiñu vatsí ndo?

²²Tacan tan nacahán musu ra Cornelio tan catyí ra naha:

—Ra Cornelio, ra yihi ndaha tsi ndi, ra ican jaquitsi tsi ndi. Vaha xaan nyiví cuví ra. Tan tyáyahvi xaan ra tsi Nyoo. Tan tandíhi maa ra ñuu Israel tsa iyó ityi Judea ihyá cuñí ra naha tsi ra tsa cuenda tsa vaha nyiví cuví ra. Tan iin ángel Nyoo cahan tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra

tuhun tsa cua cahan un tsihin ra —catyí musu ra Cornelio tsihin ra Pedro.

²³ Tacan tan tsahá ra Pedro quíhvi ra naha tsitsi vehe. Tan ndoo ra naha tsihin ra tsacuua can. Tan tsa tuvi inga quívi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

²⁴ Tsa inga quívi tsaa ra naha nda ñuu Cesarea nu ndatú ra Cornelio tsi ra naha tsihin tandíhi nyívi ra, tan tsihin tandíhi ra vaha iñi tsi ra. ²⁵ Cuhva tsa tsaa ra Pedro yuvehe ra Cornelio, quita ra Cornelio tan caahán ra tsihin ra. Tan tsicuiñi tsiti ra nuu ra Pedro tan quitsahá jachahnú ra tsi ra. ²⁶ Maa tyin ra Pedro cañihí ra tsi ra, tan catyí ra tsihin ra:

—Nduyvita tyin tahan ñi cuví yooho cuví tucu yuhu; ñavin Nyoo cuví yu —catyí ra tsihin ra.

²⁷ Tan tsitsi tsa caahán ra Pedro tsihin ra, tan quíhvi ra tsitsi vehe tan nanyehe ra tyin cuaha xaan nyívi ndu iñi tsitsi vehe can. ²⁸ Tacan tan catyí ra Pedro tsihin ñi:

—Nyoocho tsító ndo tyin ley nyuhu tsa cuví ndi nyívi Israel, catyí tsi tyin ña taahán tsi tsa ndu iñi ndi tsihin nyívi tsa ñavin nyívi Israel cuví. Tan ndi tsitsi vehe ñi ña cuví quíhvi ndi. Maa tyin Nyoo janahá ra tsi yu, tan catyí ra: “Yooho, ña catyí un tsihin nyívi tyin ndi intuhun ñi tan ña vaha ñi” catyí Nyoo tsihin yu. ²⁹ Yacan cuenda quívi tsa cana ndo tsi yu, numi ñi vatsí yu. Tan vityin cuví yu coto yu nacuenda cana ndo tsi yu —catyí ra Pedro.

³⁰ Tacan tan nacahan ra Cornelio, tan catyí ra:

—Tsa iyó cumi quívi vityin, tumaa cuhva ihyá tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituví iñi rayíi nuu yu. Nditsí ra jahma xiñu. ³¹ Tan catyí ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyéé xaan un tsi nyívi ndaahvi. ³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihyá. Nyíi ra yuvehe ra tsa nañi Simón, iñi ra tsa janduvitá ñiiquití. Tan vehe ra can nyaá tsi yatyiñi ñi yuhu ndutyá ñuhu. Tan na quitsi ra Simón Pedro tan cahan ra tsihin un” catyí ángel can tsihin yu. ³³ Tacan tan numi ñi tava

tyiñu yu tyin na cuquihin tyiñu tsi un. Tan vaha tyin vatsí un. Tan vityin tandíhi yo ndu iñi yo nuu Nyoo. Tan cuñí ndi tyaa soho ndi tandíhi tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

Nu caahán ra Pedro tuhun ra Cristo yuvehe ra Cornelio

³⁴ Tacan tan quitsahá caahán ra Pedro tan catyí ra:

—Vityin cutuñi iñi yu tyin Nyoo cuñí ra tsi tandíhi nyívi, tahán ñi nyívi Israel, tan nyívi tsa ñavin nyívi Israel cuví. Ña tavá tsiyo ra tsi ndi intuhun maa yo. ³⁵ Tyin naquihín ra tsi yo tatum tyáyahvi yo tsi ra, tan javahá yo tsa vaha. ³⁶ Nyoo cahan ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandíhi maa yo. ³⁷ Nyoocho tsító vaha ndo tandíhi tsa cuví ñuu nyívi Israel ñuu yu, nácaa quitsahá tsi nu cuví Galilea tsa yahá tsa cahan ra Juan tuhun Nyoo tsihin nyívi, tan jacoondutyá ra tsi ñi. ³⁸ Tsító ndo nácaa tsahá Nyoo tunyee iñi Tatyí Li ra tsi ra Jesús, ra ñuu Nazaret. Tan tsica ra javahá ra tsa vaha, janduvahá ra tsi tandíhi nyívi tsa nyehé tundoho jahá nu ña vaha. Tyehen javahá ra Jesús tyin Nyoo nyaá ra tsihin ra. ³⁹ Nyuhu cuví ndi tsandaas tsa cuenda tandíhi tsa javahá ra Jesús ñuu Jerusalén tsihin tandíhi ca ñuu tsa cayucú Judea. Yahá can tan ticaa ra naha tsi ra nu cruu tan tsahñi ra naha tsi ra. ⁴⁰ Maa tyin tsa tsinu uñi quívi janandoto Nyoo tsi ra. Tan quituví ra nuu ndi. ⁴¹ Ña quituví ra nuu tandíhi nyívi. Maa tyin quituví ra nuu nyuhu tyin nacatsi ra tsi ndi nda tsanaha tyin cuvi ndi tsandaas cuenda ra. Nyuhu tsatsi ndi tan tsihí ndi tsihin ra tsa yahá tsa nandoto ra. ⁴² Tan tavá tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaas tyin Nyoo tavá tyiñu ra tsi ra Jesús tyin cuvi ra juez tsi nyívi tsa nyito tan nyívi tsa tsihí. ⁴³ Tan tacan tucu nda tsanaha, cahan tandíhi ra cuví ndusu yuhu Nyoo tuhun ra Jesús. Tan catyí ra naha tyin tandíhi nyívi tsa tsinu iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyívi Tatyí Li Nyoo tan ñavin nyívi Israel cuví ñi

⁴⁴ Ndi caahán ca ra Pedro tan nuu Tatyi li Nyoo siquí tandihi ñi tsa tyaá soho tsa caahán ra. ⁴⁵ Tan ra Israel tsa yihi cuenda ra Jesús tsa tsaa tsihin ra Pedro iyo xaan cuví ra naha tyin tsahá ndihí tucu Nyoo Tatyi li ra tsi nyiví tsa ñavin nyiví Israel cuví. ⁴⁶ Tyin tsíni ra naha caahán ñi inga yuhu tan jachahnú ñi tsi Nyoo. ⁴⁷ Tacan tan quitsahá caahán ra Pedro tsihin ra tsa tsaa tsihin ra:

—Na cuvi casí yo nu coondutya nyiví ihya. Tyin tsa naquihín ñi Tatyi li Nyoo tumaa tsa naquihín tucu maa yo —catyí ra tsihin ra naha.

⁴⁸ Tacan tan tava tyiñu ra Pedro tsi ñi tsa ndi ñihí Tatyi li Nyoo na coondutya ñi tsihin siví ra Jesucristo. Tacan tan caahán ndaahví ñi tsihin ra Pedro na ndoo ra taahan quiví tsihin ñi.

11

Nu nacatyí tuhun ra Pedro tsihin ra yihi ndaha vehe ñuhu ñuu Jerusalén nácaa nducahá tuhun ra Jesucristo inga ñuu

¹ Ra tava tyiñu ra Jesús tan inga ra yihi cuenda ra Jesús tsa iyó Judea, ñihí tuhun ra naha tyin nda cuanda nyiví tsa ñavin nyiví Israel cuví tan naquihín ñi tuhun Nyoo. ² Tacan tan tsaa nyico ra Pedro ñuu Jerusalén. Tan ra tsa catyí tyin tsíni ñuhu tsa cunyaas tuñi Nyoo tsi tandihi rayii, xaan xaan cuñí ra naha nyehé ra naha tsi ra Pedro. ³ Tan catyí ra naha tsihin ra:

—¿Nacuenda tsahan un yuvehe nyivi tsa ñavin nyiví Israel cuví tan tsatsí un tsihin ñi? —catyí ra naha.

“Tacan tan ra Pedro nacatyí tuhun ra nda nu quitsahá tandihi tsa cuví tsi ra, tan catyí ra:

⁵ —Yuhu nyíyu ñuu Jope. Tan tsa tsicán tahvi yu tsi Nyoo tan nyehé yu iin tsa janahá Nyoo tsi yu tyin iin jahma cahnu quee ityi andivi. Tan tandihi tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyíyu. ⁶ Tan nyehé vaha yu tsa yihi tsitsi jahma can. Tan nyehé yu quiti tsa cumi tsaha, quiti cuuhu, coo, tan saa. ⁷ Tan tsíni yu iin ndusu tsa caahán tsihin yu: “Ndývita Pedro. Cähñi quiti ihya tan cätsi un” catyí ndusu can tsihin yu. ⁸ Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha

catsi ndi.” ⁹ Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yahá janduvahá yu” catyí ndusu can tsihin yu. ¹⁰ Uñi tsaha cuvi yacan. Yaha can tan nandaña yico tandihi quiti can tsihin jahma can ityi andivi. ¹¹ Tan juvin ñi cuhva can tsaa uñi taahan ra naha yuvehe nu nyíyu yu, quee ra naha ñuu Cesarea tan nanducúra naha tsíyu. ¹² Tan Tatyi li Nyoo caahán tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihí iñu taahan ra yañi yo ihya naha ra tsihin yu. Tan tsa tsaa ndi nda ñuu Cesarea, quihví ndi tsitsi vehe iin ra tsa nañi Cornelio. ¹³ Tan nacatyí tuhun ra can tsihin ndi nácaa nyehé ra tsi iin ángel tsitsi vehe ra. Nyaá nyityi ángel can tan catyí ra tsihin ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuvi cacu ra tsihin tandihi nyiví ra, catyí ángel can tsihin ra, catyí ra tsihin ndi. ¹⁵ Tan javahá ra can tumaa cuhva catyí ángel can tsihin ra. Tan tsa tsaa yu yuvehe ra quitsahá caahán yu tsihin nyiví tsa ndu iñi yuvehe ra. Tan quitsi Tatyi li Nyoo siquí ñi tumaa tsa nuu tsi siquí yo tsa jihna ñi. ¹⁶ Tacan tan nducuhún iñi yu tsa catyí Jutu Mañi yo quiví can. Tan catyí ra tyehen: “Nditsa tyin ra Juan jacoondutya ra tsi nyivi tsihin ndutya. Maa tyin nyoho cua coondutya ndo tsihin Tatyi li Nyoo”, catyí ra. ¹⁷ Nyoo tsahá ndihí tucu ra Tatyi li ra tsi ñi can tumaa tsa tsahá ra Tatyi li ra tsi yo quiví tsa natsing iñi yo tsi Jutu Mañi yo Jesucristo. Tan tsa tacan ¿yóo ra cuví yuhu tan casí yu tsa javahá Nyoo? —catyí ra Pedro tsihin ra hermano can naha ra.

¹⁸ Tacan tan tsa tsíni ra ñuu Jerusalén tuhun can, ña cahan ca ra naha. Tan jachahnú ra naha tsi Nyoo, tan catyí ra naha:

—Tun tacan cuvi, cuñí tsi catyí tyin Nyoo tsahá ndihí tucu ra ndatu tsi nyiví tsa ñavin nyiví Israel cuví tyin na ndu uvi iñi ñi cuatyi ñi, tan coo ñi ñayiví nyito tsa ña cua naa maa —catyí ra naha.

Nyivi yihi cuenda ra Cristo ñuu Antioquia

¹⁹ Quiví tsa tsahñi ra naha tsi ra Esteban, quitsahá nyaá ndaha ra naha tsi inga ca nyiví yihi cuenda ra Cristo. Tan yihi ñi

tsinú ñi tan cuahán ñi ityi Fenicia. Tan yihi ñi cuahán ñi iin ñuhu tsa nañí Chipre tsaa canyí mahñu ndutya ñuhu. Tan yihi ñi tsaa ñi ñuu Antioquía. Tan tandihí ñi caahán ñi tuhun ra Cristo tsihin nyivi, maa tyin iin ñi maa tsihin nyivi Israel. ²⁰Tan tsihin ñi tsaa cuahán can, yihi nyivi ñuhu Chipre, tan yihi tucu juhva nyivi ñuu Cirene. Tan tsa tsaa ñi ñuu Antioquía, tan quitsahá caahán ñi can tuhun ra Cristo tsihin nyivi tsa ñavín nyivi Israel cuví. Tan jacoto ñi tuhun vaha Jutu Mañi yo ra Jesús. ²¹Tan tunyee iñi Jutu Mañi yo iyó tsihin ñi. Tan yacan cuenda cuaha nyivi nacog ñi tuhun tsahnu. Tan quitsaha tsinú iñi ñi tsi Jutu Mañi yo. ²²Tacan tan tsaa tuhun can nda ñuu Jerusalén. Tan nyivi yihi cuenda ra Cristo jacuhun ñi tsi ra Bernabé na cuhun ra nda ñuu Antioquía. ²³Tan tsa tsaa ra Bernabé Antioquía can, nyehe ra nácaa nasocó Nyoo tsi ñi. Tan sii xaan cuñi ra. Tan catyí ra tsihin ñi na cunyicun ñi tsi Jutu Mañi yo tsihin tsa nii iñi ñi. ²⁴Tacan jayahá ra Bernabé tyin cuví ra iin ra vaha. Tsitú ra tsihin Tatyí li Nyoo, tan tsinú xaan iñi ra tsi Nyoo. Yacan cuenda cuaha xaan nyivi quihví cuenda Jutu Mañi yo. ²⁵Tsa yahá can tan cuahán ra Bernabé cua nanducu ra tsi ra Saulo nda ñuu Tarso. Tan tsa nañihí ra tsi ra, tsindacá ra tsi ra nda ñuu Antioquía. ²⁶Tan tsiyucu ra naha tsihin nyivi yihi cuenda ra Cristo ñuu can iin cuiya tan cuaha xaan nyivi jacuahá ra naha tuhun Nyoo. Tan juvin ñi ñuu Antioquía can cuví nu quitsahá catyí nyivi tyin nyivi Cristiano cuví ñi, o ñi yihi cuenda ra Cristo.

²⁷Tan quívi can tsaa taahan ra cuví ndusu yuhu Nyoo. Quee ra naha ñuu Jerusalén tan tsaa ra naha ñuu Antioquía. ²⁸Tan iin ra can nañí ra Agabo tsicunyaá nyityi ra tyañu nyivi yihi cuenda ra Cristo tan cahan ra tsa tsahá Tatyí li Nyoo tsi ra. Tan catyí ra tyin cua quitsi iin tama nii cahnu nu ñuhu ñayivi. Tan tacan cuví quívi tsa cuví ra Claudio rey cahnu. ²⁹Tacan tan nyivi yihi cuenda ra Cristo nda ñuu Antioquía natuhún tahan ñi tyin cua cuhva ñi nácaa iyó iñi intuhun intuhun ñi, tyin cua jatyinyee ñi tsi nyivi yihi cuenda ra Cristo tsa iyó ñuu tsa cayucú Judea. ³⁰Tacan jayahá ñi tan jacuhun ñi juhva xuhun tsi ra tsa cuví ityi nuu tsihin nyivi yihi cuenda ra Cristo nda ñuu Jerusalén. Tan ra Bernabé tsihin

ra Saulo tsindacá ra naha xuhun can.

12

Nu tsihí ra Jacobo tan nu quihví ra Pedro vehe caa

¹Tan quívi can quitsahá nyaá ndaha ra cuví rey Herodes tsj juhva nyivi yihi cuenda ra Cristo. ²Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi. ³Tan nyehe ra Herodes tyin tahan xaan iñi nyivi Israel tsa jayahá ra tacan, tan tava tyiñu ra tyin tiñi ndihí ra naha tsi ra Pedro. Tan cuví tsi quívi vico pascua nu tuhvá nyivi tsatsí paan tsa nduve yutsan iya yihi. ⁴Tsa yahá tsa tiñi ra naha tsi ra Pedro, tyihi ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñi hora tan nasamá ra naha, quihví tucu inga cumi taahan andaru. Tan tyaq ra Herodes cuhva tyin cua cuhva cuenda ra tsi ra Pedro tsi nyivi tsa yahá vico Pascua. ⁵Tan tacan nyíi ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyíi ra ican, nyivi yihi cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa nii iñi ñi.

Nu jacacu Nyoo tsi ra Pedro vehe caa

⁶Tan tyaq ra Herodes cuhva tyin inga quívi can cua tava ra tsi ra Pedro nuu nyivi. Tan juvin ñi tsacuaa can, tan ra Pedro quixí xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. ⁷Tan sana iñi ra tan quituvi iin ángel tsa jacuhun Jutu Mañi yo. Tan ndunditsin tsitsi vehe caa can. Tan ángel can tiñi ra xiin ra Pedro, jandoto ra tsi ra. Tan catyí ra tsihin ra:

—Janumi. Ndývita —catyí ángel can tsihin ra.

Tacan tan ndatsi cadena tsa nuuhñi ndaha ra. ⁸Tan ángel can catyí ra tsihin ra:

—Nacuhñi vaha tsitsi un tan tyihi nditsan un tsaha un —catyí ángel can tsihin ra.

Tacan jayahá ra Pedro. Tan catyí ángel tsihin ra:

—Quihin jahma un cunditsi un tan quitsi nyicun un tsi yu —catyí ángel can tsihin ra.

⁹Tan ra Pedro cuahán ra cuanyicún ra tsi ángel can. Maa tyin ña tsító ra tatum tsa nditsa o tsa ña nditsa cuví can, tan cuñi maa ra tyin iyó iin tsa janahá Nyoo tsi ra.

¹⁰ Maa tyin cuahán ra tsata ángel can tan yahá ra naha iin nu jahá cuenda ra andaru. Tacan tan yahá tucu ra naha inga nu jahá cuenda ra naha. Yahá can tacan tan tsaa ra naha yuvehe caa cahnu nu quitá nyivi. Tan yuvehe can nuñā maa tsi. Tan quitá ra naha. Tan tsa yahá yahá ra naha iin ityi, tan nacoó ángel can tsi ra. ¹¹ Tacan tan nacoto ra Pedro tyin nditsa, tan quitsahá tsicá iñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquitsi iin ángel tyin jacacu ra tsi yu ndaha ra Herodes tan ndaha ra ñuu Israel naha ra —cuñí ra Pedro.

¹² Tsicá iñi ra yacan ityi cuahán ra, tan tsaa ra yuvehe ña María sihi ra Juan Marcos. Tan cuaha xaan nyivi yucú ican tsicán tahvi ñi tsi Nyoo. ¹³ Tan tsa cañí ndaha ra Pedro yuvehe nuquehe, tan quitá iin ñaha tuyuvaas tsa nañí Rode, tsinyehé ña yóo cañí ndaha yuvehe can. ¹⁴ Maa tyin cuhva tsa tsiní ña ndusu ra Pedro, sií xaan cuñí ña, tan nañí ña nuñá ña yuvehe can, tyin tsinú ña cuahán ña cua cahan ña tsihin nyivi tsa yucú tsitsi vehe can. Tan catyí ña tyin ra Pedro nyáa ra yuvehe. ¹⁵ Tacan tan quitsahá catyí ñi tsihin ña:

—Iñi yooho ña vaha cuñí —catyí ñi tsi-hin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavín ra Pedro cuví ra, iin ángel cuenda ra cuví, catyí ñi tsihin ña.

¹⁶ Tan ra Pedro jañihí ca ra cañí ndaha ra yuvehe. Tan cuhva tsa nuñá ñi yuvehe tan nyehe ñi tsi ra, iyo xaan cuñí ñi tan nayuhví ñi. ¹⁷ Maa tyin javaha ra seña tsihin ndaha ra na cutaxin ñi. Tan nacatyi tuhan ra tsihin ñi nácaa tava Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihyá tsihin ra Jacobo tan tsihin inga ra yañi yo naha ra —catyí ra Pedro.

Tan quitá ra tan cuahán ra.

¹⁸ Cuhva tsa cunditsin, iyo xaan cuñí ra andaru tsa jahá cuenda tsitsi vehe caa can naha ra, tyin ña tsitó ra naha nácaa quita ra Pedro. ¹⁹ Tacan tan tava tyiñu ra Herodes na cunanducu ra naha tsi ra, tan ña nañihí ra naha tsi ra. Tacan tan tava tyiñu ra tsi ra naha na cahñí ra naha tsi ra jahá cuenda vehe caa can naha ra. Yahá can tan quitá ra

Herodes Judea can tan cuahán ra cua coo ra ñuu Cesarea.

Nu tsihí ra Herodes

²⁰ Tan ra Herodes cuxaán xaan ra tsihin nyivi ñuu Tiro tan nyivi ñuu Sidón. Maa tyin cuñí ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsí ñi. Tacan tan ndu iñi ñi tan cuahán ñi cua cutahan ñi tsihin iñi ra tsa nañí Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. ²¹ Tacan tan catyí ra Herodes tyin cuhun ñi nu nyaá ra iin quivi. Tan tsaa quivi can tan tsicunditsi ra jahma sií caá ra tsa jahá tyiñu ra. Tan tsicunyaa ra nu tyayu ra. Tan cahan ra tsihin ñi. ²² Tacan tan quitsahá caná tsaa ñi, tan catyí ñi:

—Ra tsa caahán ihyá ñavin rayii cuví ra, tyin Nyoo cuví ra —catyí ñi.

²³ Tan juvin ñi cuhva can tan tiñi cuehe tsi ra Herodes jahá ángel Jutu Mañi yo tyin tsahá ra tsa catyí nyivi tyin Nyoo cuví ra. Tan quivi tindacu tsi ra, tan tsihí ñi.

²⁴ Maa tyin tuhun Nyoo nducuahá ca tsi. Tan jañihí ca nyivi caahán ñi tuhun Nyoo tandihí ñi ityi. ²⁵ Quivi tsa ndihí tyiñu jahá ra Bernabé tsihin ra Saulo nda ñuu Jerusalén, cuanuhu ra naha ñuu Antioquía. Tan cuahán ndihí tucu ra Juan Marcos tsihin ra naha.

13

Nu quitsahá tsicá ra Saulo tan ra Bernabé tyiñu Nyoo

¹ Tsihin nyivi tsa yihí cuenda ra Cristo ñuu Antioquía yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyivi. Tan ra ican naha ra cuví ra ihyá naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahní iin nducu ñi tsihin ra Herodes tsa cuví rey ityi Galilea, tan ra Saulo. ² Tan iin quivi yucú tandihí ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cahan Tatyi li Nyoo tsihin ra naha:

—Tava siín ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyi li Nyoo can tsihin ra naha.

³ Tacan tan tsa ndihí tsicoo nyitya ra naha, tan tyiso ndaha ra naha jiñi ra Bernabé tsihin ra Saulo, tan tsicán tahvi ra naha tsi Nyoo tsa cuenda ra naha. Tan caahán tsihin tahan ra naha, tsahan cuahán ra naha.

Nu caahán ra tavá tyiñu ra Jesús tuhun Nyoo ñuhu Chipre

⁴ Yaha can tan jacuhun Tatyi li Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihví ra naha tsitsi iin yutun ndoo tan cuahán ra naha nda ñuhu Chipre tsa canyí mahñu ndutya ñuhu. ⁵ Tacan tan tsaa ra naha ñuu Salamina tsa canyí yuhu ndutya ñuhu. Tan quitsahá caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatinyee ra tsi ra naha. ⁶ Tacan tan cuahán ra naha caahán ra naha tuhun Nyoo tan iin tan iin ñuu tsa cayucú Chipre can nda cuanda tsa tsaa ra naha ñuu tsa nañí Pafos. Tan ican nañihí ra naha tsi iin ra ñuu Israel tsa nañí Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. ⁷ Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. ⁸ Tan ra tasi can nañí tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. ⁹ Tacan tan ra Saulo tsa nañí tucu Pablo, tsitú ra tsihin Tatyi li Nyoo. Tan ñihi xaan nanyehe ra tsi ra Elimas can. ¹⁰ Tan catyí ra tsihin ra:

—Yoho ra jandaví ñaha, ra vatya. Sehe cuihna cuví tsi un. Tan cuñí un jativí un tandíhi tsa vaha. Tan tacan ñi tyasí un ity vaha Jutu Mañi yo. ¹¹ Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuvi nyehe un ñuhu ñicanyii juhva quivi —catyí ra Pablo tsihin ra Elimas.

Tacan tan juvin ñi cuhva can cuaq ra. Tan ndoo ro nua. Tan nducy ra iin ra tiñi ndaha ra tyin ña nditsin nyehé ra. ¹² Tsa nyehe ra cumí tyiñu can tsa cuvi tsi ra Elimas, tan natsinu iñi ra tsi ra Jesucristo. Tyin iyo cuñí ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquía tsa canyí Pisidia

¹³ Ra Pablo tan ra vaha iñi tsi ra quihví ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyí Panfilia. Maa tyin ra Juan Marcos nacoo ihñi ra tsi ra naha tan cuanuhu ra nda ñuu Jerusalén. ¹⁴ Yaha can tan quee ra naha Perge can, tan cuahán ra naha ñuu Antioquía tsa canyí Pisidia. Ican quihví ra naha tsitsi vehe ñuhu nyiví Israel tan cuví tsi iin quivi quitatú ñi. Tan tsinyecu ra naha.

¹⁵ Tacan tan quitsahá cahví nyiví nu libru ley Nyoo tsa tyaa ra Moisés. Tan cahví tucu ñi libru tsa tyaa ra cuví ndusu yuhu Nyoo tahan tsanaha. Yaha can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatum cuñí ra naha cahan ra naha tsihin nyivi, cuví cahan ra naha. ¹⁶ Tacan tan nduvita ra Pablo tan javahá ra iin seña tsihin ndáha ra tyin na cutaxin ñi. Tan catyí ra:

—Tyaa soho nyoho, ra ñuu Israel, tan nyoho nyivi tsa tyaa yahvi tsi Nyoo.

¹⁷ Nyoo cuenda yo, tsa cuví yo nyiví Israel, nacatsi vaha ra tsi tsii tsaahnu yo. Tan quivi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyiví ñuu can cuví ra naha, maa tyin janducuahá ra tsi ra naha. Yaha can tan tava ra tsi ra naha ityi can tsihin tunyee iñi tsa iyó tsi ra. ¹⁸ Tan cunyee iñi Nyoo tandíhi cuhva tsicoo ra naha nu tsicá nuu ra naha nu tsiqui tsitsi tsa uvi xico cuya. ¹⁹ Tan janaq ra utsa taahan ñuu nahnu tsa cayucú niñi cahnu Canaán, tyin tsahá ra ñuhu can tsi tsii tsaaahnu yo.

²⁰ Yaha can tan quitsahá ndacá ñaha juez tsi nyivi can jaha Nyoo. Tumaa cumí cientu sasava cuiya tsindacá ñaha juez tsi ñi, nda cuanda quivi tsindacá ñaha ra Samuel ra cuví ndusu yuhu Nyoo tsi ñi. ²¹ Tacan tan maa ñi tsicán ñi iin rey tsa cundaca ñaha tsi ñi. Tan Nyoo tsahá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. ²² Yaha can tan Nyoo tavá ra tsi ra Saúl tsa cuví ra rey. Tan tsahá ra tyiñu can tsi ra David. Tan catyí ra: "Nyehé yu tyin ra David, sehe ra Isaí, cuví ra iin rayii tsa taahán iñi yu cuhva iyó. Tan cua javaha ra tandíhi tsa cuñí yu" catyí Nyoo tuhun ra David. ²³ Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsi tsi ra tyin jacacu ra tsi yo tsa cuví yo nyivi

Israel, tumaa catyí ra tsihin tsii tsaahnu yo tahān tsanaha.²⁴ Tan ndi cumañi ca quitsi ra Jesú, ra Juan, ra jacoondutya tsi nyivi, cahān ra tsihin tandihí nyivi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutya ñi.²⁵ Tan tsa cua ndihi tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Navin yuhu cuví ra cahnu can. Tyin tsata tsa yaha yuhu tan vatsí inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

²⁶ Tan caahán ca ra Pablo tan catyí ra:

—Yañi, nyoho nyivi tata ra Abraham tan tandihí inga ndotsa tyaá yahvi tsi Nyoo. Tsa cuenda nyoho cuví tuhun ihyá tyin jacuahá Nyoo tsi yo nácaa cacu yo.²⁷ Nyivi ñuu Jerusalén tan ra cuví ityi nuu tsihin ñi ña tsitó ñi tyin ra Jesú jacacú ra tsi yo. Tan ndi ña cutuñi iñi ñi tuhun tsa tyaá ra cuví ndusu yuhu Nyoo tahān tsanaha, vasu jacuahá xaan ñi tuhun can tandihí quivi tsa quitatu ñi, maa tyin ña cutuñi iñi ñi. Tan quivi tsahñi ñi tsi ra Jesú cuví tsi tumaa cuhva catyí ra cuví ndusu yuhu Nyoo.²⁸ Tyin vasu nduve cuatyí ra Jesú nañihí ñi, maa tyin tsicán ñi tsi ra Pilato na tyihi ra tyiñu tyin cahñi ra naha tsi ra Jesú.²⁹ Tan tsa yaha janyehe ñi tundoho tsi ra tumaa catyí maa tuhun ra nu libru, tan tsihí ra. Tacan tan januñ ñi tsi ra nu cruu. Tan tsicutsi ñi tsi ra.³⁰ Maa tyin Nyoo janandoto ra tsi ra inga tsaha.³¹ Tan tsitsi tsa cuaha quivi tan quituvi ra nuu ra tsa cuahán tsihin ra quivi quita ra ityi Galilea, tan tsaa ra Jerusalén. Tan ra ican naha ra cuví ra tsa caahán tuhun ra tsihin nyivi vityin.³² Tan yacan cuenda nyuhu caahán ndi tuhun vañá tsa catyí Nyoo tsihin tsii tsaahnu yo tyin cuhva ra tsi yo.³³ Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandoto ra tsi ra Jesú tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra.³⁴ Nyoo tyaá ra cuhva tyin janandoto ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyoho cua cuhva yu tsa vaha tsa cahan yu tsihin ra David tyin cua cuhva yu tsi ndo.”³⁵ Yacan cuenda catyí tucu nu inga salmo tyehen.

“Ña cua cuhva un tsa tyahyu cuñu ñuhu Sehe ii un” catyí tsi.³⁶ Ra David jahá tyiñu ra tsa cuenda nyivi tsa tsicoó quivi tsicoó ra, tandihí tsa catyí Nyoo tsihin ra tyin jahava ra, jahava ra. Yahá can tan tsihí ra tan tsicutsi ñi tsi ra tumaa tsicutsi ñi tsi jutu ra. Tan tyahyu cuñu ñuhu ra.³⁷ Maa tyin ra tsa janandoto Nyoo, ña tyahyu cuñu ñuhu ra.³⁸ Yañi, cuñi tsi tsa coto ndo tyin tsa cuenda cuatyí yo tan quitsi ra Jesú tan tsihí ra tyin jahá ra tucahuñ iñi cuatyí yo.³⁹ Tan tsa cuenda ra Jesú jahá Nyoo tucahuñ iñi tsi tandihí ñi tsa tsinu iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo.⁴⁰ Jaha ndo cuenda coto ndoo tsa tyaá ra cuví ndusu yuhu Nyoo siquí ndo. Tyin catyí ra naha tyehen:

⁴¹ Nyehe nyoho, ra tsa tsacú nducu, taahán tsi tsa nayuhvi ndo tan taahán tsi cunaa ndo.

Tyin yuhu cuví Nyoo, tan jahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihí tsa jahá yuhu vasu nacatyí tuhun nyivi tsihin ndo, catyí Nyoo.

⁴² Ndihí cahán ra Pablo tan quita ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsaha catyí ñi tsihin ra, tyin na cahan nyico ra tuhun can tsihin ñi inga vitya quivi tsa quitatu ñi.⁴³ Cuhva tsa ndihí ndu iñi ñi, cuaha xaan nyivi Israel tan nyivi tsa yiñí cuenda ñi Israel, tsinyicún ñi tsi ra Pablo tan tsi ra Bernabé. Tan catyí ra naha tsihin ñi tyin na cuhun ca ñi ityi nuu tsihin Nyoo. Tan na naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quivi quitatu ñi, ndu iñi nyico ñi. Tan tsa yatin tandihí ña maa nyivi ñuu can ndu iñi tsihin ñi tan tyaá soho ñi tuhun Nyoo.⁴⁵ Maa tyin cuhva tsa nyehe ra Israel naha ra, cuxaán ra naha tyin nyehe ra naha tyin cuaha nyivi nyicún tsi ra hermano can naha ra. Tan quitsaha caahán ra naha tsi ra Pablo, tan cahán ra naha ndavaha ñi siquí ra.⁴⁶ Maa tyin ra Pablo tan tsihin ra Bernabé ña yuuhví maa ra naha tan quitsaha caahán ñihí ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyoho tsa cuví ndo nyivi Israel. Maa tyin ña cuñí ndo naquihin ndo

tsa caahán ndi. Tan nyooho ñia cuñí ndo tsa coo ñayiví nyito tsa ñia cua naa maa tsndo. Yacan cuenda cua cuhun ndi cucahan ndi tsihin nyiví tsa ñavín nyiví Israel cuví.

⁴⁷ Tyin tacan catyí Jutu Mañi yo tsihin ndi tan catyí ra tyehén:

Tyaq yu tsi un tumaa iin ñuhu tsa jandunditsín nu iyó nyiví naníi cahnu nu ñuhu ñayiví.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiní ra tsa ñavin ra Israel cuví naha ra, sii xaan cuñí ra naha. Tan quitsahá catyí ra naha tyin tuhun Nyoo vaha xaan tsi. Tan natsinu iñi tandíhi nyiví tsa nacatsí maa Nyoo, tyin coo ñi ñayiví nyito tsa ñia cua naa maa. ⁴⁹ Tacan tan nducuahá ca tuhun Nyoo tandíhi ityí ñuu can. ⁵⁰ Maa tyin ra Israel cahán ra naha tsihin juhva ñaha cuca tsa nyicún ley Nyoo tsa tyaq ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyin ñuu can. Tan ican cuví nu quitsaha nyaá ndaha nyiví tsi ra Pablo tan ra Bernabé, nda cuanda tsa tavá ñi tsi ra naha ñuu can. ⁵¹ Tacan tan naquísí ra naha nyaca tsaha ra naha tumaa iin seña tyin ndoo cuatyí nyiví can siquí maa ñi. Tan cuahán ra naha ñuu Iconio. ⁵² Maa tyin ñi yihí cuenda ra Cristo ñuu Antioquia can sii xaan cuñí ñi. Tan tsitú ñi tsihin Tatyi Ii Nyoo.

14

Nu nyíí ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quíhví ra naha tsitsi vehe ñuhu nyiví Israel. Tan vaha xaan cahán ra naha tuhun Nyoo tsihin nyiví can. Tan cuaha xaan ñi natsinu iñi ñi tsi ra Cristo, nyiví Israel tan nyiví tsa ñavin nyiví Israel cuví. ² Maa tyin ra Israel tsa ña tsinú iñi tsi ra Cristo natuyhu ra naha tsi nyiví tsa ñavin nyiví Israel cuví tyin na caca ña vaha iñi ñi nyehe ñi tsi ra yihí cuenda ra Cristo. ³ Yacan cuenda ra Pablo tan ra Bernabé ndoo ra naha ican cuaha quívi. Tan tsihin tsa nii iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee iñi tsi ra naha tyin javaha ra naha seña tan tsa iyo

na coto nyiví tyin nditsa tsa caahán ra naha.

⁴ Maa tyin nyiví ñuu ñia iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tavá tyinú ra Jesús.

⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyinú, tyin cua cahán ra naha ndavaha ñi siquí ra tavá tyinú ra Jesús, tan cua cañí ra naha yuu tsi ra naha. ⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Listra, tan nda ñuu Derbe ity Licaonia. Tan tsicá nuu ra naha ityí ñuu can. ⁷ Tan cahán nyico tucu ra naha tuhun Nyoo nácaa jacacú ra tsi yo.

Nu cañí nyiví yuu tsi ra Pablo nda ñuu Listra

⁸ Nda Listra iyó iin rayíi tsa coxo tyin nda quívi cacu ra tan ña cuví caca ra, tyin pehe nduví taahan tsaha ra. ⁹ Tan ra pehe tsaha can tyaq soho ra tsa caahán ra Pablo. Tan ra Pablo, tuví iñi ra tyin tsinú iñi ra can tyin cuví nduvaha ra. ¹⁰ Tacan tan ra Pablo caahán ra tsihin tsa ñihí ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsaha tsicá ra.

¹¹ Tsa nyehé nyiví tyin javaha ra Pablo tacan, quitsahá caná tsaa ñi tsihin yuhu Licaonia, tan catyí ñi:

—Ra tsa tsaa nu yucú yo ihyá, nyoo cuví ra naha, maa tyin tumaa caá rayíi, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañí Júpiter, tan ra Pablo cuví nyoo tsa nañí Mercurio, tyin ra ican cuví ra tsa caahán.

¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyiví tsitohó Júpiter. Tan quitsahá ndaca ra indiquí tan ita tyin maa ra tan nyiví cuñí ñi jacahnú ñi tsi ra Pablo tsihin ra Bernabé. Tan cua cahñí ñi indiquí can tyin cua cuhva cuenda ñi tsi ra naha, tyin cuñí ñi tyin nyoo cuví ra naha. ¹⁴ Maa tyin cuhva tsa tuyí iñi ra naha tsa tsicá iñi ñi, quitsahá tsahnyá ra naha jahma ra naha. Tan javaha ra naha tacan tumaa iin seña tyin ña ndoo ra naha vaha. Tan quíhví ra naha tyañu nu tuví nyivi, tan caná tsaa ra naha, ¹⁵ Tan catyí ra naha:

—Nyoho tata, qñácaa tsa javahá ndo tyehen? Nyuhu juvin ñí rayii ñuu ñayiví ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyehen tyin ña tsíñi ñuhu yacan tsi ndo, tan na cunyicun ndo tsi Nyoo nyito. Juvin ra tsa javahá andiví tan ñuhu ñayiví. Tan javahá ra ndutya ñuhu tan tandíhi maa tsa iyó tsitsi ndutya ñuhu can.¹⁶ Tan tahan tsanaha nda cuanda vityin, Nyoo jaña ndaha ra tsi nyiví na javahá maa ñí cuhva cuñí ñí,¹⁷ vasu tandíhi quiví jacuahá ra tsi ñí tyin ra vaha cuví ra tan javahá ra tsa vaha. Maa ra jazuún ra savi nu yucú yo. Tsahá ra tsa coo vaha tsa tatsí yo quiví taahán tsi. Tan tsahá ra tsa catci yo. Tan tsahá ra tsa cusíi cuñí yo —catyí ra naha tsihin nyiví can.

¹⁸ Maa tyin vasu catyí ra naha tacan, yíi xaan tan tyasí ra naha tsa cahñí ñí indiquí can, tyin cuñí ñí jacahnu ñí tsi ra naha tsihin can.

¹⁹ Tacan tan tsaa juhva ra Israel, ra tsa ña tsinú iñí tsi ra Cristo, ra ñuu Antioquía, tan ra ñuu Iconio. Tan natyuhu ra naha tsi nyiví, na cañí ñí yuu tsi ra Pablo. Tan tacan javahá ñí, tan cuñí maa ñí tyin tsa tsihí ra. Tacan tan ixtä caa ñí tsi ra tan tsindacá ñí tsi ra nda yuhu ñuu. ²⁰ Maa tyin ndu iñí ra yiñí cuenda ra Cristo nu canyí ra Pablo. Tan nduvita nyico ra. Tan quihví nyico ra inga tsaha tsitsi ñuu can. Tan tsa inga quiví can cuahán ra ñuu tsa nañí Derbe tan cuahán ra Bernabé tsihin ra.

²¹ Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyiví nacuhvá ñí tsi ñí tsi Nyoo. Yaha can tan cuanuhu ra naha ityi quitsí ra naha. Tan yaha nyico ra naha ñuu Listra tan ñuu Iconio inga tsaha, tan tsaa nyico ra naha nda ñuu Antioquía. ²² Tan tandíhi ñuu can jandu iñí ra naha iñí nyiví tsa yiñí cuenda ra Cristo. Tan catyí ra naha tsihin ñí na cuhun ñí ityi nuu ca tsihin tsa tsinú iñí ñí tsi Nyoo. Tan catyí tucu ra naha tsihin ñí tyin tatuń cuñí yo tsa cundaca ñaha Nyoo tsi yo, cuñí tsi tsa nyehe yo tundoho. ²³ Tan natyiso ra naha tsi ra cua cuvi ityi nuu tsihin nyiví tsa yiñí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuvi ityi nuu tsihin nyiví vehe ñuhu can

naha ra. Yaha can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsíñu iñí ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhu nyico ra Pablo tan ra Bernabé ñuu Antioquía ityi Siria

²⁴ Yaha can tan yaha ra Pablo tsihin ra Bernabé ñuu tsa cayucú Pisidia, tan tsaa ra naha nda cuanda Panfilia. ²⁵ Cahan ra naha tuhun Nyoo ñuu Perge. Yaha can tan tsahan ra naha ñuu Atalia. ²⁶ Ican quihví ra naha tsitsi iñí yutun ndoo tan cuanuhu ra naha nda ñuu Antioquía. Ican cuví ñuu nu natyiso ñí tsi ra naha tyin cua javahá ra naha tyiñú Nyoo, tan vityin tsa tsaa nuhu ra naha. ²⁷ Tsa tsaa nyico ra naha ñuu Antioquía jandu iñí ra naha tsi nyiví yiñí cuenda ra Cristo. Tan natyati tuhun ra naha tsihin ñí tandíhi tsa javahá Nyoo tsihin ra naha, tan nácaa nuñá Jutu Mañi yo ityi tsiñu tucu iñí ñí tsa ñavin nyiví Israel cuví. ²⁸ Tan naha xaan ndoo ra Pablo tan ra Bernabé tsihin ñí yiñí cuenda ra Cristo ñuu can.

15

Nu jandaq ra tava tyiñu ra Jesús tyiñu nda ñuu Jerusalén

¹ Ndi nyíi ca ra Pablo tan ra Bernabé ñuu Antioquía, tan tsaa taahan ra naha quee ra naha nda Judea. Tan quitsahá jacuahá ra naha tsi ra yiñí cuenda ra Cristo. Tan catyí ra naha tyin cuñí tsi tsa cunyaa tuñí Nyoo tsi ra naha, tumaa cuhva catyí ra Moisés, tyin tacan tan cua cacu ra naha.

² ³ Tan ñihí xaan cahan yuhu tahan ra Pablo tan ra Bernabé tsihin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tsihin taahan ca ra naha tyin cuhun ra naha ñuu Jerusalén, cujanda ra tyiñu can tsihin ra tava tyiñu ra Jesús tan tsihin ra cuví ityi nuu tsihin nyiví vehe ñuhu ñuu Jerusalén can naha ra. Tacan tan cuahán ra naha. Tan ityi cuahán ra naha, yaha ra naha ityi Fenicia tan Samaria. Tan natyati tuhun ra naha tsihin nyiví yiñí cuenda ra Cristo nácaa jañá nyiví tsa ñavin nyiví Israel cuví tuhun tsahnu tsa tsinú iñí ñí, tyin nacuhvá cuenda ñí tsi ñí tsi Nyoo.

Tan tandihí ra hermano sií xaan cuñí ra naha tsa tsito ra naha yacan.

⁴ Quívi tsaq̄ ra Pablo tan ra Bernabé ñuu Jerusalén, cuahán ra naha nu ndu ífn nyív̄ iyihi cuenda ra Cristo. Tan tandihí ñi tan ra cuví ityi nuu tsihin ñi, tan tsihin ra tava tyiñu ra Jesús, tsahá ñi yaha ra naha tyin nacatyi tuhun ra naha tsa javahá Nyoo tsihin ra naha. ⁵ Maa tyin juhva ra fariseo tsa tsinú iñi tsi ra Cristo, nduvitá ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javahá ra naha cuhva catyí ley Nyoo tsa tyaa ra Moisés —catyí ra naha.

⁶ Tacan tan ndu iñi ra cuví ityi nuu tsihin ñi yihi cuenda ra Cristo tan ra tava tyiñu ra Jesús tyin natuhun tahan ra naha tuhun can. ⁷ Tsa yahá tsa cahan yuhu xaan ra naha, tan nduvitá ra Pedro, tan catyí ra:

—Yañi, tsító ndo tyin tsitsi tsa tandihí yo, nacatsi Nyoo tsi yuhu ra ndaahvi quívi can, tyin cahan yu tuhun ra tsa jacacú tsi yo tsihin nyív̄ tsa ñavin nyív̄ Israel cuví, tan na tsinu iñi ñi tsi Jutu Mañi yo. ⁸ Tan Nyoo, ra tsító ánimā tandihí nyív̄, janahá ra tsi yo tyin cuñí ra tsi ñi ican. Yacan cuenda tsahá ra Tatyi li ra tsi ñi, tumaa tsa naquihín tucu maa yo Tatyi li ra tahan̄ tsanaha. ⁹ Nyoo induci ñi cuñí ra tsi nyív̄. Yacan cuenda ña tyá tsyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo. ¹⁰ Vityin žnacuenda ña tsinú iñi ndo tsa javahá Nyoo tsihin ñi can? Tyin ña vaha tsa tyisó yo ley Nyoo tsa tyaa ra Moisés siquí ñi. Tyin ndi maa tsii tsaaahn̄ yo tan ndi maa yo tan ña cuví naquihín vaha yo ley can. ¹¹ Ñavin tacan cacú yo. Yoo tsító yo tyin cacú yo tsihin tumañi iñi tsa javahá Jutu Mañi yo ra Jesús tsihin yo. Tan tacan tucu ñi can —catyí ra Pedro tsihin tandihí ra can naha ra.

¹² Tacan tan taxin ñi cuví tandihí ra naha. Tan tyaa soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javahá Nyoo nu cahan ra naha tuhun ra nu yucú nyív̄ tsa ñavin nyív̄ Israel cuví. ¹³ Tsa ndihí cahan ra naha, quitsahá caahán ra Jacobo, tan catyí ra:

—Nyoooh yañi, tyaa soho ndo tsa cua cahan yu tsihin ndo. ¹⁴ Tsa catyí tuhun ra

Simón Pedro tsihin yo nácaa quitsahá tsahá Nyoo tumañi iñi tsí ñi tsa ñavin nyív̄ Israel cuví. Tyin nacatsi tucu ra tsi juhva ñi tyin cuví ñi nyív̄ cuenda ra. ¹⁵ Tan ndu iñi tuhun ihyá tsihin tuhun tsa cahan̄ ra cuví ndusu yuhu Nyoo tahan̄ tsanaha, tumaa cuhva nyaá maa nu tutu Nyoo nu catyí ra:

¹⁶ Yahá tandihí tuhun ihyá tan cua quitsi nyico yu nu yucú ndo.

Quívi tsa tsico ra David, vaha xaan jacaahnú nyív̄ tsi yu.

Maa tyin yahá can jandihí nyív̄ tsa jacaahnú ñi tsi yu.

Maa tyin cua quitsi nyico yu inga tsaha tan cua cañihi yu vehe ñuhu ra David.

Tyin cua jacaahnú nyico nyív̄ tsi yu.

¹⁷ Tyin tacan tan cuví nanducu tandihí inga ca nyív̄ tsi yu,
tandihí ñi tsa ñavin nyív̄ Israel cuví tan tsinú iñi tsi yu.

¹⁸ Tacan catyí Jutu Mañi yo, tan jacuaha ra tuhun ihyá tsi nyív̄ tsico tahan̄ tsanaha tan tsihin nyív̄ tsa iyó vi tyin.

¹⁹ Yacan cuenda catyí yu tyin ña vaha tsa jatyañu yo tsi nyív̄ tsa ñavin nyív̄ Israel cuví, ñi tsa nacoo tuhun tsahn̄ ñi tan quíhví ñi cuenda ra Cristo. Na vaha catyí yo tyin cuñí tsi tsa tyaa yahvi ñi ley tsahn̄ yo.

²⁰ Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsahá cuenda nyív̄ tsi tsitoho. Tan ña cuvi coo rayíi tsihin ñaha tun ña tindaha ra. Tan ndi ñiñaha ña cuví coo ñi tsihin rayíi tun ña tindaha ñi. Rayíi tsia iyó ñasiihi ña cuví coo ra tsihin inga ñaha, tacan tucu ñiñaha tsa iyó yíi, ña cuví coo ñi tsihin inga rayíi. Tan catyí tucu yo tsihin ñi quíhví cuenda ra Cristo tan ñavin nyív̄ Israel cuví ñi tyin ña cua catsi ñi cuñu quíti tsa tsihí tsa cava ñi jucun tatuñ ña tsatiñ niñi ti. Tan ña cua catsi ñi niñi quíti. ²¹ Tyin nda tyembu tsahn̄ tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyív̄ Israel. Tan jacuahá ra naha tuhun can tan iin tan iin ñuu, tan tahan̄ tahan̄ una quívi, quívi tsa quitatú ñi —catyí ra Jacobo tsihin ra naha.

²² Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihi cuenda ra Cristo, nacatsi ñi tsi taahan̄ ra naha. Tan yahá can tan jacuhun ñi tsi ra naha tyin cuhun ra naha

ñuu Antioquía tsihin ra Pablo tan ra Bernabé. Tan ra tsa natyiso ñi cuví ra: Judas tsa nañí Barsabás, tan ra Silas. Ra ican cuví iin ra tsa nyisó tyiñu vehe ñuhu nda ñuu Jerusalén.²³ Tan tsihin ra naha jacuhun ñi iin carta. Tan catyí carta can tyeñen:

"Nyuhu ra tava tyiñu ra Jesús, tan tsihin ra cuví ity nuu tsihin ñi vehe ñuhu tan tsihin ra yañi ndo cuenda ra Cristo, tandíhi ndi tsahá ndi nacumi tsi nyoooho tsa ñávin ra Israel cuví ndo. Tyin yañi ndi cuví tsi ndo vasu ñávin nyiví Israel cuví ndo. Tandíhi nyoooho tsa iyó ndo ñuu Antioquía, tan nyoooho nyiví Siria, tan tsihin nyoooho nyiví Cilicia, jaquitsí ndi carta ihyá tsi tandíhi ñi ndo.²⁴ Tsító ndi tyin quita taahan ra ity nu yucú ndi ihyá. Tan vatsí ra naha nu yucú ndo. Maa tyín ña catyí nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñávin nyuhu cahán tsihin ra naha tyin quitsi cahán ra naha yacan tsihin ndo.²⁵ Yacan cuenda ndu iñi ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsí ndi tsi ra hermano ihyá naha ra tsihin ra Pablo tan ra Bernabé nu yucú ndo.²⁶ Nduvi taahan ra ihyá nyehé xaan ra naha tundoho tsa cuenda Jutu Mañi yo. Tan vasu cuñí nyiví cahñi ñi tsi ra naha, maa tyin ña jandihi ra naha tsa jacotó ra naha tuhun Jutu Mañi yo ra Jesucristo.²⁷ Yacan cuenda jaquitsí ndi tsi ra Judas tan ra Silas. Tan maa ra naha cua cahán ra naha tsihin yuhu ra naha tsihin ndo, tyin cua cuhva cuenda ra naha tandíhi tsa tyaa ndi nu tutu ihyá.²⁸ Tyin ndi Tatyi li Nyoo tan ndi nyuhu ña cuñí ndi tyiso ndi tundoho siquí ndo. Maa tyin ñiñi ca cuñí tsi tsa naquihin vaha ndo tuhun ihyá:²⁹ Ña cua catsi ndo cuñú tsa tsahá cuenda nyiví tsi tsitoho. Tan ña cua catsi ndo niñi quiti, ndi cuñú quiti tsa tsihí tsa cavá ñi jucun tan ña tsati niñi tí. Ña caca nuu ndo tsihin ñaha. Tan nyoooho ñiñaha ña caca nuu ndo tsihin rayii. Tatun na quihin vaha ndo tuhun ihyá, vaha xaan cua coo ndo. Tan Nyoo na ndoo ra tsihin ndo" catyí ra naha nu carta can.

³⁰Tan cuahán ra tsa jacuhun ra naha, tan tsaa ra naha ñuu Antioquía. Tan jandu iñi

ra naha tsi tandíhi nyiví yihí cuenda ra Cristo tan nacuhvá cuenda ra naha carta can.³¹ Tsa cahví ñi carta can, sií xaan cuñí ñi tyin vaha xaan caahán tsi.³² Tan ra Judas tsihin ra Silas cuví tucu ra naha ndusu yuhu Nyoo. Tan jandu iñi ra naha iñi nyiví can tsihin tsa cahán ra naha.³³ Tan tsa yahá tsiyucu ra naha juhva quivi tan cuanuhu nyico ra naha nda nu yucú nyiví tsa jacuhun tsi ra naha. Tan tandíhi nyiví yihí cuenda ra Cristo ñuu Antioquía can catyí ñi tyin na cuhun vaha ra naha.³⁴ Maa tyin ra Silas catyí ra tyin cua ndoo ra.³⁵ Tan ra Pablo tsihin ra Bernabé ndoo tucu ra naha ñuu Antioquía can. Tan maa ra naha tsihin inga ca ra jañihí ca ra naha cahán ra naha tuhun Jutu Mañi yo tsihin nyiví can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quita tsyo ra nuu ra Bernabé

³⁶Tan tsa yahá juhva quivi, tan cahán ra Pablo tsihin ra Bernabé:

—Cohon inga tsaha cunyehe yo nu yucú nyiví yihí cuenda Jutu Mañi yo ra Cristo tandíhi ñuu nu cahán yo tuhun ra, tyin nyehe yo nácaa yucú ñi —catyí ra Pablo tsihin ra.

³⁷Tan ra Bernabé cuñí ra tsa cuhun nyico ra Juan Marcos tsihin ra naha.³⁸ Maa tyin ra Pablo ña taahán iñi ra tsa cuhun ra Juan tsihin ra naha, tyin nacoq ihfí ra tsi ra naha nda Panfilia quivi tsa tsahán ra tsihin ra naha. Tan ña tsahán ca ra tsijahá tyiñu ra tsihin ra naha.³⁹ Tan cahán yuhu tahan ra naha, tan ndusíñi ra naha. Ra Bernabé cuahán ra tsihin ra Juan Marcos. Tan quíhví ra naha tsitsi iin yutun ndoo tan cuahán ra naha ñuhu Chipre.⁴⁰ Tan ra Pablo nacatsí ra tsi ra Silas. Tan tsa yahá tsicán tahví ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha.⁴¹ Tan yahá ra naha ñuu tsa cayucú Siria tan Cilicia, tan jandu iñi ra naha iñi nyiví tsa yihí cuenda ra Cristo tan iin tan iñu.

16

Nu cuahán ra Timoteo tsihin ra Pablo tan ra Silas

¹Ra Pablo tsihin ra Silas tsaa ra naha ñuu Derbe, tan ñuu Listra. Tan ican nañihí ra naha tsi iin ra yihí cuenda ra Cristo. Nañí ra Timoteo. Tan sihi ra cuví ña iin ñaha Israel.

Tan yihí ndihí ña cuenda ra Cristo. Maa tyin jutu ra, ra Grecia cuví ra. ²Tan ra Timoteo vaha xaan tsicá ra tuhun Nyoo, catyí nyiví yihí cuenda ra Cristo ñuu Listra tan ñuu Iconio. ³Tan ra Pablo cuñí ra tsa cuhun ra Timoteo tsihin ra. Tan tyaá ra naha tuñi Nyoo tsi ra Timoteo jahá ra Pablo. Tyin coto ndasí cuñí nyiví Israel nyehe ñi tsi ra. Tyin tandihí ñi tsító ñi tyin jutu ra cuví ra ra Grecia. ⁴Tacan tan cuahán ra naha tan iin tan iin ñuu. Tan caahán ra naha tsihin nyiví yihí cuenda ra Cristo tsahá cuenda ra naha tuhun tsa tsaha ra tavá tyínu ra Jesús tan tsihin ra cuví ityí nuu tsihin nyiví vehe ñuhu Jerusalén tsi ra naha. ⁵Tacan tan ndu iin iñi nyiví yihí cuenda ra Cristo tan ñihí ca tsinú iñi ñi tsi ra Cristo. Tan iin tan iin quíví tan cuahán nducuahá ca ñi.

Nu janahá Nyoo iin tsa janahá ra tsi ra Pablo cuenda iin ra Macedonia

⁶Ña tsahá Tatyí li Nyoo tsa cahan ra naha tuhun Nyoo ñuu tsa cayucú Asia. Yacan cuenda yaha sava ra naha ñuhu cuenda Frigia tan Galacia. ⁷Tan tsaa ra naha Misia. Tan cuñí ra naha cuhun ra naha Bitinia, maa tyin Tatyí li ra Jesucristo ña tsahá cuhun ra naha. ⁸Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyí yuhu ndutyá ñuhu. ⁹Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayí tsa iyó iin ñuu tsa canyí Macedonia. Nyaá nyityí ra nuu ra tan caahán ndaahvi ra tsihin ra, tan catyí ra: “Naha ihyá, tyin jatinyee un tsi ndí” catyí ra. ¹⁰Tan tsa nyehe ra Pablo can, yuhu ra Lucas tsihin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsító vaha ndi tyin Nyoo caná ra tsi ndí, tyin cahan ndi tuhun ra nácaa jacacú ra tsi yo tsihin nyiví ityí can.

Nu nyíi ra Pablo tsihin ra Silas ñuu Filipos

¹¹Quiví ndi iin yutun ndoo ñuu Troas. Tan cuahán ndoo ityí ñi ndi nda Samotracia, iin ñuhu luhlu tsa canyí mahñu ndutyá ñuhu. Tan tsa inga quíví tsaa ndi ñuu Neápolis. ¹²Tan icán quee ndi tan cuahán ndi ñuu Filipos tsa cuví iin ñuu cuenda nyiví Roma. Tan cuví tsi iin ñuu cahun ca tsa nuu tandihí ñuu tsa cayucú Macedonia. Tan icán tsiyucu ndi taahan quíví. ¹³Iin quíví tsa quitatú nyivi, tan quitá ndi ityí

tsata ñuu, yatyin iin yutya nu tuhvá nyiví tsicán tahvi tsi Nyoo. Tsinyecu ndi, tacan tan cahan ndi tuhun Nyoo tsihin ñiñaha tsa ndu iin icán. ¹⁴Iin ñaha nañí ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduuuhva. Yacan cuví tyínu jahá ña. Tan jacahnú ña tsi Nyoo tumaa jacahnú nyiví Israel. Tan tsiní ña tsa caahán ra Pablo. Tan Nyoo nuñá ra añima ña na tyaa yahví ña tsa caahán ra. ¹⁵Tan tsicoondutyá ña tsihin nyiví ña. Tan yahá can tan cahan ndaahvi ña tsihin ndi, tan catyí ña:

—Tatun nyehé ndo tyin nditsa tsa tsinú iñi yu tsi Jutu Mañí yo, cohon ndo, ndoo ndo yuvehe yu —catyí ña tsihin ndi.

Tan jañiñí xaan ña tsi ndi na ndoo ndi yuvehe ña.

¹⁶Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahán ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihí tsa cua cuví ityí nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. ¹⁷Tan ñaha tyuvaa can quitsaha nyicún ña tsi ndi, nyuhu tsihin ra Pablo. Tan cana tsaa ña tan catyí ña:

—Rayí ihyá ra jahá tyínu tyínu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

¹⁸Cuaha quíví javahá ñaha tyuvaa can tacan. Tacan tan ra Pablo ña cunyee ca iñi ra, tan nanyicó coo ra tan catyí ra tsihin tatyí ña vaha tsa yihí tsi ña:

—Tsihin siví ra Jesucristo, catyí yu tsihin un tyin quita un tsi ñaha tyuvaa ihyá —catyí ra.

Tan nu tatyí ña vaha can quita nu tsi ña juvin ñi cuhva can.

¹⁹Maa tyin tsa nyehe ra cuví tsitoho ña tyin ña cua cuví ca jaha canaa ra naha xuhun tsihin ña, tiñi ra naha tsi ra Pablo tsihin ra Silas tan tsindaca ra naha tsi ra naha nda vehe tyínu. ²⁰Tan tsicán ra naha cuatiyí tsaha ra naha nuu ra cumí tyínu naha ra. Tan catyí ra naha:

—Ra Israel ihyá cuaha xaan tsa caahán ra naha tsihin nyiví ñuu yo tan jatíví ra naha ñuu yo. ²¹Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyiví cuenda ñuu Roma cuví yo —catyí ra naha.

²² Tacan tan nduxaan nyivi tsi ra Pablo tan ra Silas. Tan ra cumí tyiñu can tsahnya ra naha jahma ra Pablo naha ra tan tava tyiñu ra cumí tyiñu na cañi ra vitya tsi ra Pablo naha ra tsihin yutun. ²³ Tsa yahä tsa cañi xaan ra naha tsi ra Pablo tan ra Silas, tan tsindaca rta vitya can tsi ra naha vehe caa. Tan tava tyiñu ra vitya tsi ra jaha cuenda tsi ra naha na jaha vaha ra cuenda tsi ra naha. ²⁴ Quihin ra cu jaha cuenda can tyiñu tan tyihi ra tsi ra naha nda tsitsi cuij vehe caa. Tan tyihi vaha ra tsaha ra naha tyañu vitu. ²⁵ Yahä can tan maa ñuu ra Pablo tan ra Silas quitsaha tsicán tahvi ra naha tsi Nyoo. Tan quitsaha tsitá xaan ra naha cantu Nyoo. Tan ra yucú vehe caa can naha ra tyaá soho ra naha. ²⁶ Tan saná iñi ra naha tan quitsi tsa taán ñihi xaan. Tan naquisi tsi tsaha vehe caa can, tan juvin ñi cuhva can tan nuñi tandihi yuvehe, tan ndatsi cadena tsa yihí tsi tandihi ra tsa yucú vehe caa can naha ra. ²⁷ Tan tsa ndoto ra tsa jahá cuenda vehe caa can, nyehé ra tyin ticoñó tandihi maa yuvehe can. Tacan tan tava ra mityi ra tyin cua cahñi ra tsi ra. Tyin tsicá iñi maa ra tyin tandihi ra tsa yucú vehe caa can quita. ²⁸ Maa tyin ra Pablo cana tsaa ra tsi ra, tan catyí ra:

—Na cahñi un tsi un, tyin tandihi ndi tan yucú ndi ihyá —catyí ra tsihin ra.

²⁹ Tacan tan ra jahá cuenda vehe caa can tsican ra ñihu. Tan tsinu ra quihví ra nu yucú ra naha. Tan niñi ra tsihin tsa yuuuhví ra. Tan tsicuiñi tsiti ra nuu ra Pablo tan ra Silas. ³⁰ Numi xaan tava ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyohojo tata, qnácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahan ra naha tan catyí ra naha:

—Tsinu iñi tsi Jutu Mañi yo ra Jesucristo tan cacu un, maa un tan tsihin tandihi nyivi un —catyí ra naha tsihin ra jahá cuenda vehe caa can.

³² Tan cahñan ra naha tuhun Jutu Mañi yo tsihin ra tan tsihin tandihi nyivi tsa yucú yuvehe ra. ³³ Tan juvin ñi maa tsacuua can ra jahá cuenda vehe caa can nacatya ra nu uhvi nu cañi ra vitya tsi ra naha. Yahä can tan juvin ñi tsacuua can tsicoondutya ra tsihin tandihi nyivi ra. ³⁴ Tacan tan tsindaca

ra tsi ra naha nda vehe ra. Tan tsaha ra tsa catsi ra naha. Tan maa ra tsihin nyivi ra sii xaan cuñi ñi tyin tsinu iñi ñi tsi Nyoo. Tacan tan cuanuhu ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuví inga quivi tan tava tyiñu ra cumí tyiñu tsi ra vitya na cunyehe ra naha nu nyií ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas. ³⁶ Tacan tan ra jahá cuenda vehe caa can catyí ra tsihin ra Pablo:

—Tsaq tyiñu tsi yu jahä ra cumí tyiñu, tsajaña yu tsi ndo. Yacan cuenda vityin tsa cuví quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsi tuñi ra naha tsi ndi tumaa cuhva taahán tsi. Tan tyihi ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyí tuhun ra tsihin ra cumí tyiñu naha ra. Tan ra ican naha ra nayuhví xaan ra naha tsa tsito ra naha tyin ra cuenda ñuu Roma cuví ra Pablo. ³⁹ Tan tsahan ra cumí tyiñu naha ra tsindacan ra naha tucanhui ñuu nuu ra Pablo tan ra Silas. Tacan tan ra cumí tyiñu tava ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. ⁴⁰ Tan tsa quita ra naha vehe caa can, tsahan ra naha vehe ña Lidia. Tan yahä can tan tsinyehé ra naha tsi ra hermano naha ra tan jandu iñi ra naha iñi ra naha tan cuahán ra naha.

17

Nu quitsaha caahán yuhu tahan nyivi ñuu Tesalónica

¹ Nu cuahán ra Pablo tsihin ra Silas, yahä ra naha ñuu Anfípolis, tan ñuu Apolonia. Yahä can tan tsaq ra naha ñuu Tesalónica nu nyaá iñi vehe ñuhu nyivi Israel. ² Tan tsahan ra Pablo vehe ñuhu can, tumaa cuhva tuhvá maa ra tsahán tan iñi tan iñi ñuu. Tan cahñan ra tuhun Nyoo tsihin nyivi tsicá vehe ñuhu can uñi taahan quivi quitatú ñi. ³ Tan cahví ra nu libru Nyoo tan tsaha cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cíu ra.

Yahá can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

⁴ Tan juhva nyíví Israel can tsinu iñi ñi tsa caahán ra. Tan ndu iñi ñi tsihin ra naha. Tan cuaha xaan nyíví Grecia tsa tuhvá jacahnú tsi Nyoo tan natsinu ndíhi iñi ñi. Tan cuaha ñiñaha cuca tsa iyó ñuu can natsinu ndíhi iñi ñi tsa caahán ra tuhun ra Cristo. ⁵ Maa tyin ra ñuu Israel tsa ña tsinu iñi, ndasí cuví ra naha nyehé ra naha tyin cuaha xaan nyíví nyicún tsi ra Pablo. Tan jandu iñi ra naha tsi taahan ra caquiñi tsa tsicá nuu jutsan ñi maa. Tan quitsaha caahán yuhu tahan nyíví ñuu can jahá ra naha. Tan quíhví ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñí ra naha tsa quita ra Pablo naha ra. Tyin ra caquiñi can cuñí ra naha nacuhva cuenda ra naha tsi ra Pablo naha ra tsi nyíví. ⁶ Maa tyin tsa ña nañihí ra naha tsi ra Pablo tan ra Silas ican, quíhín ra naha tsi ra Jasón. Tan ixtá caa ra naha tsi ra. Tan quíhín ndíhi ra naha tsi taahan ca ra hermano tan cuahán ra naha nuu ra cumí tyiñu ñuu can. Tan cana tsaa ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandíhi nyíví naníi cahnu ñuhu ñayivi. Tan vityin tsaa ndíhi tucu ra naha ihya.

⁷ Tan ra Jasón can tsahá ra yuvehe ra na cuyucu ra naha. Tan tandíhi maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañí Jesús —catyí ra naha.

⁸ Tsa tsiní nyíví tan ra cumí tyiñu tsa caahán ra caquiñi can naha ra quitsaha caahán yuhu tahan ñi. ⁹ Maa tyin ra Jasón tan inga ra naha tsahá ra naha xuhun tan jañá ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuua can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaa ra naha, tsahan ra naha vehe ñuhu nyíví Israel. ¹¹ Tan nyíví Israel tsa iyó ñuu Berea can vaha ca nyíví cuví ñi tan ñavin ca nyíví ñuu Tesalónica tyin tsihin tsa ñii iñi ñi tan naquihín ñi tuhun Nyoo. Tan tandíhi quíví nanducú ñi nuu tutu Nyoo, nyehé ñi tatuñu nditsa

tsa caahán ra Pablo. ¹² Yacan cuenda cuaha xaan ñi natsingi iñi ñi tsi ra Cristo tsihin tucu nyíví Grecia tahan ñi ñiñaha cuca tan rayíi naha ra. ¹³ Maa tyin tsa tsito ra Israel tsa iyó ñuu Tesalónica tyin ra Pablo nyíví ra Berea caahán ra tuhun Nyoo, tan cuahán ra naha tan natyuuhu ra naha tsi nyíví Berea can. ¹⁴ Maa tyin ra hermano numi ñi jacuhun ra naha tsi ra Pablo nda itiy yuhu ndutuya ñuhu. Maa tyin ra Silas tsihin ra Timoteo ndoo ra naha ñuu Berea. ¹⁵ Tan ra tsa cuahán tsihin ra Pablo tsindacá ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahán ra Pablo tsihin ra naha, tyin na janumi ra naha tan cuhun ra naha nu nyíví ra.

Nu nyíví ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasí cuñí añima ra tsa nyehé ra tyin cuaha xaan tsitoho iyó ñuu can. ¹⁷ Yacan cuenda cahán ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandíhi quíví caahán ra tsihin nyíví tsa cuahán nyayvi. ¹⁸ Tan ñihí tahan ra tsihin nyíví tsa cahví tuhun tsa jacuahá nyíví tsa nañí epicúreo. Tan ñihí tahan tucu ra tsihin nyíví tsa cahví tuhun tsa jacuahá nyíví tsa nañí estoico. Tan cahán ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahán ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahán ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyíví tatuñu cua cíu ñi. ¹⁹ Tacan tan tsindacá ra naha tsi ra Pablo iñi nu nañí Areópago, nu tuhvá ra cumí tyiñu naha ra ndu iñi. Tan catyí ra naha tsihin ra:

—Cuñí ndi coto ndi tuhun tsaa tsa jacuahá un. ²⁰ Tyin jacotó un tuhun tsa ña tsitó ndi. Tan cuñí tucu ndi coto ndi náa cuñí tsi catyí tandíhi tuhun ihya —catyí ra naha tsihin ra.

²¹ Tyin tandíhi nyíví Atenas tan nyíví inga ñuu tsa iyó ican taahán xaan iñi ñi tyaá soho ñi tan nacatyí tuhun ñi náa ndihi tuhun tsaa.

²² Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyoho ro ñuu Atenas, yuhu nyehé yu tyin cuaha xaan nyoo jacaahnú ndo. ²³ Tyin tsahan yu tsinyehe yu nu tuhvá ndo ndu iín. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyoho jacaahnú ndo tsi Nyoo tsa ña nacotó ndo. Juvín Nyoo can cuví tsa caahán yu tuhun tsihin ndo. ²⁴ Nyoo tsa javahá ñuhu ñayivi tan tandíhi tsa iyó nu ñuhu ñayivi ihya, tsii maa ra cuví andiví tan ñuhu ñayivi. Tan ña iyó ra tsitsi vehe ñuhu tsa javahá nyivi.

²⁵ Tan ña nyitá iín ra tsa jatyinéé nyivi tsi ra. Tyin maa ra tsahá ñayivi coo tandíhi yo. Tan tsahá ra tatyí tsa ixtá tatyí yo. Tan maa ra tsahá tandíhi tsa tsiní ñuhu tsi yo.

²⁶ Javahá Nyoo tsi intuhun rayii. Tan tsa yahá can tsicoq cuaha nyivi tata ra. Tan maa ra naha cuví tsii tsaahnu tandíhi yo. Yacan cuenda intuhun ñi niñi nyisó tandíhi yo. Tan tsahá Nyoo tsa coo yo nanií cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo. ²⁷ Tacan javahá ra tyin na quitsaha nanducu yo tsi ra. Tumaa iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihí yo tsi ra tyaa ra cuhva. Vasu ndi maa ña cañí nyaá ra tsihin intuhun intuhun yo. ²⁸ Tyin iyó yo tan candá yo jahá maa ra. Tumaa catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra. ²⁹ Tatun tata Nyoo cuví tsi yo, ña taahán tsi caca iín yo tyin Nyoo cuví ra iin tsitoho tsa tsinu tsihin xuhun cuaan, a xuhun cuitsin, a tsihin yuu vaha. Tan ndi ñavin Nyoo tsa tsinu tsihin tsa tsíñituñi iín nyivi cuví ra.

³⁰ Tahan tsanaha Nyoo ña cuxaan ra tsi nyivi tsa tsicá iín tacan tyin ña tsító ñi náa tsa javahá ñi. Maa tyin vityin catyí ra tsihin nyivi tandíhi ñi ityi tyin na ndu uvi iín ñi cuatyí ñi tan na nasama ñi cuhva iyó ñi. ³¹ Tyin tsa tyaa ra cuhva tyin cua coo iin quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsaa quivi can, ra tsa nacatsi vaha maa ra cua tatsi tuñi tsi ñi jaha ra. Tan tsa janahá ra tsi yo tyin nditsa tsa ra ihya cua tatsi tuñi tsi nyivi, tyin janandoto ra tsi ra can nu tsihin

ra —catyí ra Pablo.

³² Tsa tsiní nyivi tuhun tsa nandotó nyivi tsa tsihí, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

³³ Tacan tan cuahán ra Pablo. ³⁴ Maa tyin yihí ñi ndu iin ñi tsihin ra, tan natsinu iin ñi tsi ra Cristo. Tan iin ra tsa natsinu iin, nañí ra Dionisio, tan cuví ra iin ra cumí tyinu tsu tuhvá ndu iin nda Areópago can. Tan iin ñaha tsa nañí Dámaris natsinu ndihi tucu iin ña, tan tsihin inga ca ñi.

18

Nu nyíi ra Pablo ñuu Corinto

¹ Yahá can tan quita ra Pablo ñuu Atenas tan cuahán ra ñuu Corinto. ² Tan ican nañihí ra tsi iin ra Israel tsa nañí Aquila. Tan ñuu Ponto cacu ra. Tan maa ra tsihin ñasiihi ra, ña Priscila, quita ñi Italia nu tsicoq ñi, tyin ra Claudio, ra cuví rey cahnu ñuhu can, tavá ra tsi tandíhi nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto.

³ Tan iin ñi tyinu javahá ra tsihin ñi. Javahá ñi vehe jahma. Tan ndog ra tsihin ñi tyin jahá tyinu ra iin caa ñi tsihin ñi. ⁴ Tan quivi quityi ñyivi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyivi Israel tan tsihin nyivi tsa ñavin nyivi Israel cuví. Tyin nducú ra cuhva tsa tsinu iin ñi tsi ra Jesucristo.

⁵ Tan quivi tsaa ra Silas tan ra Timoteo tsa quee ra naha Macedonia, ra Pablo nacoq ra tyinu jahá ra tan intuhun ña tyinu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús. ⁶ Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisí ra jahma ra tumaa iin seña tyin cua ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatum cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsinu iin. Vityin tan ityi nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

⁷ Tan quita ra vehe ñuhu can. Tan cuahán ra vehe ra tsa nañí Justo, iin ra tsa jacaahnú tsi Nyoo. Tan yatyin ñi vehe ñuhu can nyaá

vehe ra.⁸ Tan iin ra tsa nañí Crispo, ra cuví ityí nu vehe ñuhu can, natsinu iñí ra tsi Jutu Mañí yo tan tacan tucu tandíhi nyíví ra. Tan cuaha ca nyíví iyó ñuu Corinto can, tsa yaha tsa tsíñi ñí tsa caahán ra Pablo, natsinu iñí ñí tsi ra Jesú, tan tsicoondutyá ñí.⁹ Tacan tan iin tsacuña nyehe ra Pablo iin tsa janahá Nyoo tsi ra. Tan cahan Jutu Mañí yo tsihin ra, tan catyí ra:

—Ña nayuhví un. Jañíhi ca cahan un tuhun yu tan ña jandíhi un tsa cahan un.¹⁰ Tyin yuhu nyaá yu tsihin un, tan yoñí cuví javahá tsa caquíni tsi un. Tyin cuaha xaan nyíví yu iyó ñuu ihyá tan nyaá cua jacacu yu tsi ñí —catyí Jutu Mañí yo tsihin ra Pablo.

¹¹ Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyíví.

¹² Maa tyin quíví tsa ndacá ñaha ra Galión tsi nyíví ñuu tsa cayucú Acaya, ndu iñí ra Israel naha ra síquí ra Pablo. Tan tsicán ra naha cuatyí tsaha ra nuu ra Galión.¹³ Tan catyí ra naha tsihin ra Galión can:

—Ra ihyá natuyuhví ra tsi nyíví na jacobahnu ñí tsi Nyoo iin cuhva tsa ñavin cuhva catyí ley —catyí ra naha.

¹⁴ Tacan tan cuhva tsa cua nacahan ra Pablo, tan nacahan ñí ra Galión, tan catyí ra tsihin ra Israel can naha ra:

—Nyoocho ra Israel, cuví jandaa yu cuatyí ra tatuń cuatyí cahnu o cuatyí ndiyí cuví.

¹⁵ Maa tyin maa ñí maa tuhun caahán cuví tuhun ihyá. Tan yuhu ña cuñí yu jandaa yu tyiñu ihyá, tan inga tucu tuhun tyin cuenda ley maa ndo cuví. Nyehé maa ndo. Jandaa maa ndo tyiñu tyin yuhu ña cuñí yu cuví yu juez tsa cuenda tuhun ihyá —catyí ra Galión can tsihin ra naha.

¹⁶ Tan tava ra tsi ra Israel naha ra nu cuví vehe tyiñu ra.¹⁷ Tacan tan tandíhi ra Grecia tijíñi ra naha tsi ra Sóstenes, ra cuví ityí nu vehe ñuhu nyíví Israel. Tan cañí ra naha tsi ra juvin ñí maa nuu ra Galión, ra yihí ndaha tsi nyíví Acaya. Tan ra Galión can ña cahan maa ra.

Nu cuanuhví ra Pablo ñuu Antioquía tan cuahán ra tsa tsinu uní tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cuaha quíví. Yaha can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaa ñí ñuu Cencrea. Tan ra Pablo

xyatya ndíi ra jiñí ra tumaa iin seña tyin tsa yaha javahá ra tsa catyí ra tyin cua javahá ra nuu Nyoo. Tacan tan quíhví ñí tsitsi iin yutun ndoo tsa cuahán nda Siria.¹⁹ Tan tsa tsaa yutun ndoo can nda ñuu Éfeso, quita ñí. Tan ra Aquila tsihin ña Priscila ndoo ñí ican. Tan ra Pablo cuahán ra vehe ñuhu nyíví Israel, tan cahan ra tsihin nyíví tsa ndu íñ ican.²⁰ Tan cahan ndaaahví ñí tsihin ra tyin na ndoo ra taahan ca quíví tsihin ñí. Maa tyin ña cuñí ra.²¹ Tan catyí ra tsihin ñí tyin tsa cuahán ra, tan catyí tucu ra yeheen:

—Cuñí tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatum Nyoo cuñí, cua quitsi yu inga tsaha nu yucú ndo —catyí ra tsihin ñí.

Tacan tan cuahán ra, quíhví ra tsitsi iin yutun ndoo tsa cuahán nda Siria.²² Quíví tsa tsaa nyico ra ñuu Cesarea cuenda Siria, tsahán ra ñuu Jerusalén tsicuhvá ra nacumi tsi nyíví yihí cuenda ra Cristo tsa iyó ican. Yaha can tan cuahán nyico ra ñuu Antioquía.²³ Tan tsa yaha tsinyijí ra juhva quíví ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iñí ra iñí tandíhi nyíví yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quíví can tsaa iin ra Israel ñuu Éfeso. Nañí ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru.²⁵ Tan vaha xaan cutuhvá ra tuhun Jutu Mañí yo. Tan caahán ra tsihin tsa níi iñí ra. Tan catsi xaan jacuahá ra tuhun ra Jesú. Vasu cuhva tsa jacoondutyá ra Juan ñí tsitó ra.²⁶ Tan quitsahá caahán ra tsitsi vehe ñuhu tsihin tsa níi iñí ra. Tan cuhva tsa tsíñi ra Aquila tan ña Priscila, tava siín ñí tsi ra tan tsahá cuenda vaha ca ñí tuhun Nyoo tsi ra.²⁷ Tacan tan quitsahá cuñí ra Apolos cuhun ra ityí Acaya. Tan ra hermano jatyinyee ra naha tsi ra. Tan jacuhún ra naha iin carta tsi nyíví yihí cuenda ra Cristo ityí can, tan catyí ra naha tsihin ñí tyin na vaha cahan ñí tsihin ra Apolos nu cua tsaa ra. Tacan tan cuahán ra. Tan cuhva tsa tsaa ra Acaya can, jatyinyee xaan ra tsi nyíví yihí cuenda ra Cristo, ñí tsa natsinu iñí tsa cuenda tumañí iñí tsa javahá Nyoo tsi ñí.²⁸ Tyin nu tuvi nyíví ñíhi xaan cahan yuhu ra Apolos tsihin ra Israel

naha ra tyin cuhva tsinú iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juvin ra cuví ra Jesús.

19

Nu cuahán nyico ra Pablo ñuu Éfeso

¹Tsitsi tsa nyíi ra Apolos ñuu Corinto, ra Pablo jahá ra ityi yucu tan tsaq ra nda ñuu Éfeso. Tan ican nañihí ra tsi taahan ra yihí cuenda ra Cristo. ²Tan tsicá tuhun ra tsi ra naha:

—¿A naquihín ndo Tatyí Ii Nyoo quiví tsa natsinú iñi ndo? —catyí ra Pablo tsihin ra naha.

Tan nacahán ra naha tan catyí ra naha:

—Ndi luxu ña tsitó ndi tsa iyó Tatyí Ii Nyoo.

³Tacan tan ra Pablo tsicá tuhun ra tsi ra naha:

—¿Nacaa tsicoondutýa ndo? —catyí ra.

Tan nacahán ra naha tan catyí ra naha:

—Cuhva tsa jacoondutýa ra Juan, tacan tsicoondutýa ndi —catyí ra naha.

⁴Tacan tan catyí ra Pablo tsihin ra naha:

—Ra Juan jacoondutýa ra tsi nyivi tsa ndu uví iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵Tsa tsíñi ra naha tsa cahán ra Pablo tuhun ihyá, tacan tan tsicoondutýa ra naha inga tsaha tsihin sivi Jutu Mañi yo Jesús. ⁶Tan tsa tyiso ndahá ra Pablo jiñi ra naha, tacan tan naquihín ra naha Tatyí Ii Nyoo. Tan quitsahá caahán ra naha inga yuhu. Tan tsahá cuenda ra naha tuhun tsa tsaha Tatyí Ii Nyoo tsi ra naha tsi nyivi. ⁷Tan tsa tandíhi ra naha quitá maa utsi uvi taahan ra naha.

⁸Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñii iñi ra. Tan jacuahá ra tsi ñi na nacuhva ñi tsi ñi tsi Nyoo na cundaca ñaha ra tsi ñi. ⁹Maa tyin yihí ñi jandavá ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyo nyaha ra nu yucú ñi. Tan tsindacá ra tsi ñi tsinú iñi tsi ra Cristo nda iñi escuela ra tsa nañí Tiranno. Tan ican caahán ra tuhun ra Cristo tsihin nyivi tandíhi quivi. ¹⁰Tan

tacan ñi tsicá ra tsitsi tsa uvi cuiya. Tan tandíhi nyivi tsa iyó ñuu tsa cayucú Asia, tsiní ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví. ¹¹Tan nahnu tsa iyo jahára Pablo jahára Nyoo. ¹²Tyin nda cuanda jahma tsa tiñi ra Pablo tan tsindacá ñi tsi nyivi tan quitá cuehe tsi ñi, tan quitá ndihí tucu tatyí ña vaha tsi ñi.

¹³Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñí ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

¹⁴Tacan jahára tsa utsa taahan sehe iin ra Israel tsa nañí Esceva. Tan ra Esceva can cuví ra iin ra cuví ityi nuu tsihin ra jutu.

¹⁵Tan tsa cahán ra can naha ra tsihin nu tatyí ña vaha, nacahán nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyoho? —catyí nu tatyí ña vaha can tsihin sehe ra Esceva naha ra.

¹⁶Tacan tan ra tsa yihí tatyí ña vaha can ndaya ra siquí ra can naha ra. Tan tsihin tsa cuaha tunyee iñi nu tatyí ña vaha can tan cuví cunyee ra tiñi tahan ra tsihin tandíhi ra can naha ra. Tan tsahnya cuatyí ra jahma ra naha. Tan jañicuehē ra tsi ra naha. Tan jacuhún tandíhi ra tsi ra naha jahá nu tatyí can. ¹⁷Tacan tan tandíhi nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsitó ñi tuhun can. Tan yuuuhví xaan ñi cuví. Tan jacahnú ñi sivi Jutu Mañi yo Jesús.

¹⁸Tan cuaha xaan nyivi tsa natsinu iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandíhi maa tsa ña vaha tsa icá ñi tahan tsanaha. ¹⁹Tan cuaha ñi tsa cahví tuhun tasi, tsindacá ñi libru ñi. Tan tsahmi ñi libru can nuu tandíhi nyivi. Tan taya cuenda ñi nacaa yahvi libru can. Tan yahvi tsa tandíhi libru can quita tsi uvi xico utsi mil xuhun cuitsin. ²⁰Tan tacan ñi tan cuahán nducuahá ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

²¹ Tan tsa yah_a tuhun ihyá, ra Pablo tyaa_a ra cuhva tsa cuhun ra ñuu tsa cayucú Macedonia tan Acaya. Yah_a can tan cua cunuha_a ra nda ñuu Jerusalén, tyaa_a ra cuhva. Tan catyí_a ra tyin yah_a can tan cuñi_a tsi_a tsa cuhun ra nda ñuu Roma. ²² Tacan tan jacuhun_a ra tsi_a uvi taahan_a ra jatyinyéé tsi_a ra nda Macedonia, ra Timoteo tan ra Erasto. Maa_a tyin tsitsi_a tsa cuahán_a ra can naha_a ra, ndo_a maa_a ra Pablo juhva ca quíví Asia can.

Nu quitsah_a cuvaá nyiví Éfeso

²³ Tan juvin ñi quíví can quitsah_a cuvaá nyiví ñuu Éfeso tsa cuenda tuhun Nyoo, ²⁴ tyin iin_a ra tsa nañí Demetrio natyu_a ra tsi_a ñi. Tyin maa_a ra tuhvá_a ra jahá tyiñu_a tsihin xuhun cuitsin. Javahá_a ra tsa cuví_a vehe ñuhu nyihi tsitoho Diana tsihin xuhun cuitsin can. Tan cuaha_a xuhun jahá canaa_a ra tan tsihin_a ra jatyinyéé tsi_a ra. ²⁵ Tan cana_a ra Demetrio can tsi_a ra tsa jahá tyiñu_a tsihin_a ra. Tan cana_a tucu_a ra tsi_a ra tsa jahá tyiñu_a iin_a tyiñu_a can naha_a ra. Tan catyí_a ra tsihin_a naha:

—Nyoooho tata, tsitó_a ndo tyin tsihin tyiñu_a ihyá tan iyó vaha_a xaan_a yo. ²⁶ Maa_a tyin nyoooho nyehé_a ndo tan tsíñi_a ndo nácaa_a javahá_a nu Pablo can ñuu yo ihyá, tan tandíñi_a ñuu tsa cayucú Asia ihyá. Tyin catyí_a nu tyin tsitoho tsa javahá_a yo tan tsa javahá_a inga_a ca nyiví_a ñavin Nyoo cuví_a can. Tan cuaha_a xaan_a nyiví_a tsinú_a iñi_a tsa caahán_a nu. ²⁷ Tan ña vaha_a tsa javahá_a nu tyin ña_a cua cuyahvi_a ca tsitoho tsa javahá_a yo. Tan inga_a tucu_a tuhun, ña_a cua jacahn_a ca nyiví_a tsi_a nyoo Diana tan ña_a cua jacahn_a ñi_a vehe ñuhu_a ña_a, tan ña_a vaha_a tacan, tyin ñaha_a can cahnu_a xaan_a cuví_a ña_a. Tan tandíñi_a nyiví_a ñi_a cahnu_a Asia tsihin nyiví_a naníi_a cahnu_a ñuhu_a ñayiví_a jacahn_a ñi_a tsi_a ña_a. Tan nu cuahán_a ca tsi_a quíví_a ña_a cua jacahn_a ca ñi_a tsi_a ña_a tatu_a tsinú_a iñi_a tsa caahán_a nu Pablo —catyí_a ra Demetrio.

²⁸ Tan cuhva_a tsa tsíñi_a ra naha_a tsa cahán_a ra, xaan_a xaan_a cuñi_a ra naha_a. Tan quitsah_a caná_a tsaa_a ra naha_a tan catyí_a ra naha:

—Cahnu_a xaan_a cuví_a ña_a Diana tsa cuví_a ña_a nyoo cuenda_a yo tsa cuví_a yo nyiví_a Éfeso ihyá —catyí_a ra naha:

²⁹ Tan cuvaá_a tandíñi_a nyiví_a ñuu can. Tan tijñi_a ñi_a tsi_a ra Gayo, tan tsihin_a ra Aristarco, uvi taahan_a ra tsa quee Macedonia tan tsicá_a ra naha_a tsihin_a ra Pablo. Tan tandíñi_a ñi_a can

ixta_a caa ñi_a tsi_a ra naha_a nda cuanda_a nu tuhvá_a ñi_a ndu iñi. ³⁰ Tan ra Pablo cuñi_a ra quihví_a ra nu yucú_a ñi_a tyin cahan_a ra tsihin_a ñi. Maa_a tyin_a ra hermano_a ña_a tsahá_a ra naha_a tsa cuhun_a ra. ³¹ Tan tacan tucu_a taahan_a ra cumí tyiñu_a cuenda_a Asia. Ra vaha_a iñi_a tsi_a ra Pablo cuví_a ra naha_a, tan tava_a tyiñu_a ra naha_a tsi_a ra tyin_a ña_a taahán_a tsi_a ihyá_a ra tsi_a ra ican. ³² Tan nu ndu iñi_a nyiví_a ican, juhva_a ñi_a caná_a tsaa_a iñi_a tuhun, tan inga_a ñi_a caná_a tsaa_a iñi_a tuhun, tyin cuvaá_a ñi. Tan cuaha_a xaan_a ñi_a ndi_a ña_a tsitó_a ñi_a nacuenda_a yucú_a ñi_a ican. ³³ Tacan tan nyiví_a Israel tava_a tyiñu_a ñi_a tsi_a iñi_a ra tsa nañí_a Alejandro na yaha_a ra ityi_a nuu. Tan juhva_a ñi_a tsa yucú_a ican, tsahá_a cuenda_a ñi_a tsi_a ra nácaa_a cua cahan_a ra. Tacan tan javahá_a ra seña_a tsihin_a ndaha_a ra tyin_a na cutaxin_a ñi_a tyin cuñi_a ra cahan_a ra tyin_a nduve_a cuatyí_a nyiví_a Israel. ³⁴ Maa_a tyin_a cuhva_a tsa tsitó_a nyiví_a tyin_a ra Israel cuví_a ra, tandíñi_a maa_a ñi_a caná_a tsaa_a ñi. Tan tsitsi_a tsa uvi hora caná_a tsaa_a ñi, tan catyí_a ñi:

—Cahnu_a xaan_a cuví_a ña_a Diana, tsa cuví_a ña_a nyoo cuenda_a yo tsa cuví_a yo nyiví_a Éfeso —catyí_a ñi, caná_a tsaa_a ñi.

³⁵ Tacan tan ra secretario_a ñuu can cuví_a jacutaxin_a ra nyiví_a, tan caahán_a ra tsihin_a ñi, tan catyí_a ra:

—Nyoooho nyiví_a ñuu Éfeso ihyá, tandíñi_a nyiví_a tsitó_a ñi_a tyin nyaá_a tsi_a siquí_a yo tsa jahá_a cuenda_a yo vehe ñuhu_a ña_a Diana, tyin cahnu_a xaan_a cuví_a ña_a. Tan jahá_a cuenda_a yo tsitoho_a ña_a tsa quee andíñi_a tan nacavá_a nu ñuhu_a ihyá. ³⁶ Tan yoñi_a cuví_a catyí_a tyin_a ña_a nditsa. Taxin_a ñi_a ndo, tan ña_a ica_a ndo tatun_a ña_a tsitó_a ñi_a ndo_a tsa cua javaha_a ndo. ³⁷ Tyin_a ra tsa tsindaca_a ndo ihyá_a nduve_a náaa_a tsa suhu_a ra naha_a vehe ñuhu_a yo. Tan ndi_a ña_a caahán_a ra naha_a ndavaha_a ñi_a siquí_a nyoo_a yo. ³⁸ Tatum_a ra Demetrio tan ra tsa jahá_a tyiñu_a tsihin_a ra, tsicán_a ra naha_a cuatyí_a tsaha_a iñi_a ra, na cuhun_a ra naha_a nu nyaá_a ra juez. Cuví_a ndacan_a ra naha_a cuatyí_a nuu_a ra can, tan maa_a ra cuví_a jandaa_a ra cuatyí_a can. ³⁹ Tan tatun_a inga_a tuhun_a tsicán_a ndo, cuñi_a tsi_a tsa ndaca_a ndo_a can_a tsi_a ra cumí tyiñu_a, tumaa_a cuhva_a catyí_a ley. ⁴⁰ Tyin_a tatum_a coto_a ra ndacá_a ñaha_a tan cana_a ra tsi_a yo tsa cuenda_a tsa cuví_a ihyá, tan ña_a cua ñihi_a yo tuhun_a cahan_a yo tatum_a ndaca_a tuhun_a ra tsi_a yo nacuenda_a cuvaá_a yo —catyí_a ra cuví_a secretario_a can.

⁴¹ Tan tsa yah_a cahan_a ra, tacan tan catyí_a ra tyin_a na cunuha_a ñi_a nda yuvehe_a ñi.

Nu yahá ra Pablo Macedonia tan cuahán nyico ra nda Grecia

¹Tsa yahá tsa cuvaq nyivi ñuu Éfeso can, cana ra Pablo tsi tandihí nyivi tsa yihi cuenda ra Cristo, tyin cahan ra juhva tsihin ñi tan cuhva ra tuynee iñi tsi ñi, tyin tsa tsaa quivi tsa cua cuhun ra inga ñuu. Tan cahan ra tsihin ñi. Tacan tan cuahán ra Macedonia. ²Tan tsahan ra tandihí ityi can tan tsihin tuhun caahán ra jandu íñi ra iñi tandihí nyivi yihi cuenda ra Cristo tsa iyó ityi can. Tacan tan tsaa ra ityi Grecia. ³Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaa iñi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. ⁴Tan cuahán ra Sópater, ra ñuu Berea tsihin ra. Tan cuahán ndihí ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihí ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Trófimo. ⁵Ra hermano ihya yahá ra naha ityi nuu tan ndatú ra naha tsi ndi nda ñuu Troas. ⁶Tan nyuhu ndatú ndi nda tsa yahá vico pascua nu tuhvá nyivi Israel tsatsí paan tsa nduve yutsan iya yihi. Tacan tan quee ndi ñuu Filipos tsihin yutun ndoo. Tan nu tsinu uhun quivi tan titahán ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

⁷Tan tsa cuví tumingu can ndu iñi ndi tsihin nyivi yihi cuenda ra Cristo ñuu Troas can. Tan quivi can cua catisi ndi paan tan coho ndi vinu tyin nducuhyn iñi ndi tyin tsihí ra Cristo tsa cuenda cuatyí yo. Tan ra Pablo caahán ra tsihin ñi, tan tahán ñuu, tyin tsa nyaá tsa cuhun ndi inga quivi can. ⁸Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú. ⁹Tan iin ra tyuva tsa nañí Eutico nyaá ra ventana tyaa soho ra, maa tyin ña cunyee iñi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihí

ra. ¹⁰Tacan tan ra Pablo nuu ra tan tsaa ra nu caniyí ra tyuva can. Tan tyihí jucun ndaha ra tsi ra tyuva can, tan catyí ra tsihin tandihí ra hermano naha ra:

—Ña nayuhvi ndo, tyin ra ihya nyito ra —catyí ra.

¹¹Tacan tan ndaa nyico ra Pablo tan tsatsí ndi paan tan tsihí ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra. ¹²Tan ra tyuva can nandoto ra tan cuanuhu ra nda yuvehe ra. Tan sií xaan cuñí ñi cuvi.

Nu quita ra Pablo ñuu Troas tan cuahán ra nda ñuu Miletó

¹³Nyuhu yahá ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihí tahan ndi tsihin ra Pablo, tyin tacan jandaq maa ndi tyiñu tsihin ra, tyin maa ra cuñí ra cuhun ra ityi nu ñuhu tsihin tsaha ra. ¹⁴Tan tsa ñihí tahan nyico ndi tsihin ra nda ñuu Asón, quihví ra tsitsi yutun ndoo tsihin ndi tan cuahán ndi nda ñuu Mitilene. ¹⁵Tsa quita ndi ñuu can tacan tan yahá ndi ityi nuu iin ñuhu luhlu tsa nañí Quío, canyí tsi mahñu ndutuya ñuhu. Tan tsa inga quivi can tsaa ndi inga ñuhu luhlu tsa nañí Samos. Yahá ndi ican tan tsaa ndi ñuu Trogilio nu quitatu ndi. Tan tsa inga quivi tsaa ndi nda ñuu Miletó. ¹⁶Tacan cuví tyin ra Pablo ña cuñí ra tsa cunyii naha ra ityi Asia. Tan ña cuñí ra cuhun ra ñuu Éfeso tyin numi ñi cuñí ra tsaa ra ñuu Jerusalén, tyin tatus cuhva tsi cuhva, ican nyii ra tan coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

¹⁷Tan tsa yucú ndi ñuu Miletó, cana ra Pablo tsi ra cuví ityi nuu tsihin nyivi yihi cuenda Nyoo ñuu Éfeso. ¹⁸Tan tsa tsaa ra naha, tan caahán ra Pablo tsihin ra naha tan catyí ra:

—Maa ndo tsító ndo nácaa cuhva tsicá yu nda quivi jihna ñi tsa tsaa nuu yu Asia ihya. ¹⁹Tandihí quivi tsa tsinyí yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuihya iñi nyehe yu. Tan cuaha tundoho quitsi siquí yu jahá nyivi Israel. ²⁰Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiní ñuhu tsi ndo tan coo vaha ndo tsihin Nyoo. Tan

jacuahá yu tuhun Nyoo tsi ndo nu ndu íín ndo tan nda yuvehe ndo.²¹ Tan jacuahá yu tuhun ihyá tsi nyíví Israel tan tsi nyíví tsa ñavin nyíví Israel cuví, na nasama ñí cuhva iyó ñí nuu Nyoo tan na tsinu iñí ñí tsi Jutu Mañí yo, ra Jesucristo.²² Tan vityin cua cuhun yu nda ñuu Jerusalén týin maa Tatyi Ii Nyoo catyí. Tan ñá tsító yu náá cua cuvi tsi yu ndacan.²³ Maa týin intuhun ñí tsa tsító yu týin tandíhi ñí nu cuahán yu, Tatyi Ii Nyoo caahán tsihin yu týin ndatú vehe cua tsi yu, tan cuaha tundoho cua nyehe yu.²⁴ Maa týin ndi intuhun yacan tan ñá tsicá iñí yu. Tan ndi ñayiví yu nduve yahvi nyaá can tsa cuenda yu, týin tacan tan tsihin tsa sii cuñí yu tan cuví jañíhi ca yu jaha týinu yu tsa cuenda Jutu Mañí yo Jesús, tumaa tava týinu ra tsi yu. Tan jañíhi ca yu jacuahá yu tuhun vaha nácaa cuñí maa Nyoo tsi yo.

²⁵ Tan vityin tsító vaha yu týin tandíhi nyoho tsa cahan yu tuhun Nyoo tsihin ndo, ñá cua nyehe ca ndo tsi yu.²⁶ Yacan cuenda cuñí yu cahan yu tsihin ndo vityin týin nduve ca cuatyi yuhu tsa cuenda ndi intuhun ndo.²⁷ Týin ñiñí cuñí yu tan cahan yu tandíhi tuhun Nyoo tsihin ndo tan nduve náá tsa týihí xeehe yu.²⁸ Yacan cuenda jañáha cuenda ndo tsi ndo. Tan jañáha cuenda ndihi ndo tsi tandíhi nyíví yihí cuenda Nyoo. Týin maa Tatyi Ii Nyoo tava týinu tsi ndo na jaha cuenda ndo tsi nyíví tsicá vehe ñuhu Jutu Mañí yo. Maa ra jata ra tsi ñí tsihin ñiñí ra.²⁹ Tan tsító yu týin quíví cuhun yu, cua quitsi inga ra naha. Tan cua cuñí ra naha jativí ra naha tsi nyíví yihí cuenda Jutu Mañí yo. Tumaa lobo xaan tsa tsahñí tsi mbee, tacan cua quitsi ra can naha ra.³⁰ Tan juvin ñí nu yucú ndo, cua nduvita taahan ra. Tan cua jacuahá ra naha tsi ndo tuhun tsa ñá nditsa týin cunyicun ndo tsi ra naha.³¹ Yacan cuenda jaha vaha ndo cuenda. Ndúcuhun iñí ndo týin tsitsi tsa uñí cuiya ñá jandíhi yu tsa caahán yu tuhun Nyoo tsihin ndo. Týin ñiñí tan nduvi caahán yu tsihin intuhun intuhun ndo, tan tsihin tsa cuihya cuñí yu, coto nacoo ihñí ndo tuhun Nyoo.

³² Tan vityin nyoho yañí, tyaá yu tsi ndo ndaha Nyoo. Naquihin vaha ndo tandíhi tuhun caahán ra tsihin yo. Týin jacotó ra tsi yo týin cuñí xaan ra tsi yo. Tan tuhun ra jandunyeé xaan tsi iñí yo tan tsahá tsi tsa

cuví yo nyíví vaha tsihin tandíhi inga nyíví tsa nacuhva cuenda tsi ñí tsi ra.³³ Yuhu ñá nyiyó iñí yu tsa iyó tsi ndi intuhun ndo. Ndi xuhun ndo, ndi jahma ndo.³⁴ Nyooho tsító vaha ndo týin jañáha týinu xaan yu tsihin ndaha yu tan ñihí yu tsa tsiní ñuhu tsi yu tsihin ra tsicá tsihin yu naha ra.³⁵ Tacan ñí janahá yu tsi ndo týin cuñí tsi tsa jaha týinu ndo tan jatyinyee ndo tsi nyíví iyó náá tsa tsiní ñuhu tsi ñí. Tan ndúcuhun iñí ndo tsa caahán Jutu Mañí yo Jesús, nu catyí ra tyehen: "Síí ca cuñí nyíví tsa tsahá, tan ñavin ca nyíví tsa ñihí ndaahví" catyí Jutu Mañí yo.

³⁶ Tsa yahá tsa cahan ra Pablo tuhun ihyá, tsicuiñí tsiti ra. Tan tsicán tahvi ra tsihin tandíhi ra naha.³⁷ Tan tandíhi ra naha nducuihyáxaan iñí ra naha tan tsacu xaan ra naha. Tan tsinumi nyaá ra naha tsi ra. ³⁸ Týin ra Pablo catyí ra týin cua cuhun ra inga ñuu tan ñá cua cuhun ca ra nu yucú ra naha. Tacan tan tsindacá ra naha tsi ra nda nu quíhví ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoo ndi tsi ra hermano naha ra tan quíhví ndi tsitsi yutun ndoo. Tan cuahán ndi ndoo ityi ñí nda Cos, iin ñuu luuhu tsa canyí mahñú ndutya ñuhu. Tan tsa inga quíví tsaq ndi nda Rodas tsa cuví inga ñuhu luuhu ñí. Tacan tan cuahán ndi nda ñuu Pátara.² Tan ñuu Pátara, nyehe ndi inga yutun ndoo tsa cuahán nda Fenicia. Tan quíhví ndi tsitsi can, tacan tan cuahán ndi.³ Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yahá ñí ndi cuahán ndi ityi nuu ca, nda ityi Siria. Tan tsaq ndi nda ñuu Tiro týin ican cua tava ra naha ndaha týin tsa yihí tsitsi yutun ndoo can.⁴ Tan tsa nañíhi ndi tsi nyíví yihí cuenda Nyoo ñuu can, ndoo ndi tsihin ñí utsa quíhví. Tan catyí ñí tsihin ra Pablo týin ñá taahán tsi tsa cuhun ra ñuu Jerusalén týin tacan cahan Tatyi Ii Nyoo tsihin ñí.⁵ Maa týin tsa quita utsa quíhví can, quita ndi ñuu can. Tan nu cua quita ndi tandíhi ra hermano naha ra tsihin ñasihi sehe ra naha tan tsihin sehe ra naha tsindacá ñí tsi ndi nda cuenda yuhu ñuu. Tan nu nyítí yuhu ndutya ñuhu can tsicuiñí tsiti ndi, tan tsicán tahvi ndi tsi Nyoo.⁶ Tacan tan tsinumi nyaá tahan ndi

tsi ndi. Tsahan quíhví ndi tsitsi yutun ndoo. Tan ra hermano can naha ra cuanuhú ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsahá ndi nacumi tsi nyíví yíhí cuenda ra Cristo. Tan ndoo ndi tsihin ñi iin quivi. ⁸ Tan tsa inga quíví quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyíví nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. ¹⁰ Tan tsa cuaha ñi quíví tsa yucú ndi ican, tan tsaa iin ndusu yuhu nyoo tsa quee nda Judea. Nañí ra Agabo. ¹¹ Quitsí nyelhe ra nu yucú ndi. Tan quihín ra cinturón ra Pablo, tsáhní ra tsaha ra tan ndaha ra, tan catyí ra:

—Tatyí li Nyoo catyí tsihin yu tyin tye-hen cua cunuhñi tsitoho cinturón ihyá nda ñuu Jerusalén. Tan cua cuhva cuenda nyíví Israel tsi ra tsi ra inga ñuu naha ra —catyí ra Agabo.

¹² Tsa tsíñi ndi tsa caahán ra, nyuhu tan ra ñuu Cesarea naha ra caahán ndaalhvi ndi tsihin ra Pablo na ña cuhun ra ñuu Jerusalén. ¹³ Maa tyin ra Pablo catyí ra:

—¿Nacuenda tsacú ndo tan janducui-ihýa ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cañíi ra naha tsi yu, maa tyin cuhun yu tyiñu tsa cuenda Jutu Mañí yo Jesús —catyí ra tsihin ndi.

¹⁴ Tan tsa nyehe ndi tyin ña cuví tsa jaha ndi tsi ra, jañá ndi. Tan catyí ndi:

—Na cuvi maa cuhva cuñí Jutu Mañí yo.

¹⁵ Tsa yahá yacan na ica vahá ndi tsi ndi tan cuahán ndi nda ñuu Jerusalén.

¹⁶ Tan cuahán taahan ra ñuu Cesarea ra yíhí cuenda ra Cristo, tsihin ndi. Tan cuahán tucu iin ra ñuhu Chipre. Nañí ra Mnasón. Cuaha xaan cuiya tsinú iñi ra tsi ra Cristo. Tan tsindacá ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyíí ra Jacobo

¹⁷ Tsa tsaa ndi ñuu Jerusalén, nyíví yíhí cuenda ra Cristo sií xaan cuñí ñi caahán ñi tsihin ndi. ¹⁸ Tan inga quíví can cuahán ndi tsihin ra Pablo cua nyehe ndi nu nyíí ra Jacobo. Tan ican yucú tucu tandihí ra cuví

ityi nuu tsihin nyíví vehe ñuhu. ¹⁹ Tsaha ra Pablo nacumi tsi ra naha. Yahá can tan nacatyí tuhun ra tandihí nácaa tsatyiñu Nyoo tsi ra nu cahán ra tuhun Nyoo tsihin nyíví tsa ñavin nyíví Israel cuví. ²⁰ Tsa tsíñi ra naha tuhun ihyá, jacobuñu ra naha tsi Nyoo, tan catyí ra naha tsihin ra Pablo:

—Vaha yañí, nyehé un tyin cuaha xaan nyíví Israel tsinú iñi tsi ra Cristo. Tan tandihí ñi catyí ñi tyin taahán tsa javaha yo cuhva catyí ley tsa tyaa ra Moisés. ²¹ Tan ñihí tuhun ñi tyin yooho jacuahá un tsi tandihí nyíví Israel tsa iyó inga ñuu tyin na ña cuita ca iñí ñi ley tsa jacuahá ra Moisés, tan catyí tucu un tsihin ñi tyin ña cuñí ca tsi tsa cunyaa tuñí Nyoo tsi sehe yíí ñi, tan ndi ña cua javaha ca ñi tuhun tsahnu cuhva tsa iyó maa yo tahan tsanaha. ²² ¿Nacaa javaha yo vityin? Tyin nyíví cua ñihí tuhun ñi tyin tsaa un ihyá. ²³ Vaha taxin ca tsa javaha un tsa cua cahan ndi tsihin un. Ihyá iyó cumi taahan rayíi tsa nyaá javaha tsa catyí ra tsihin Nyoo tyin cua javaha ra naha.

²⁴ Cuaahan tsihin ra naha na nduvaha un nuu Nyoo tsihin ra naha. Tan tyahví un tsa taahán tsi tyahví ra naha. Tacan tan maa ra naha cua xatya ndii ra naha jiñi ra naha cuhva catyí ley. Tan tsa javaha un tacan, tan coto tandihí nyíví tyin ña nditsa tsa caahán ñi siquí un, tyin cua nyehe ñi tyin ña nacoq un ley tsa tyaa ra Moisés. ²⁵ Tan tsa cuenda nyíví tsa ñavin nyíví Israel cuví, tan tsinú iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañí nyíví tsi tsitoho. Ndi ña cua catsi ñi ñiñí quiti, tan ndi cuñu quiti tsa cava ñi jucun tan ña tsati ñiñí ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayíi —catyí ra tsahnu vehe ñuhu can naha ra tsihin ra Pablo.

Nu quitsahá caahán yuhu tahan nyíví Israel siquí ra Pablo

²⁶ Tacan tan tsa tuví inga quíví tan cuahán ra Pablo tsihin tandihí tsa cumi taahan ra can naha ra. Tan janduvahá ra tsi ra nuu Nyoo iin caa ñi tsihin ra can naha ra. Tacan tan quihví ra tsitsi vehe ñuhu cahnu tyin jacoto ra cuví jutu ama cundihi tsa utsa quíví tsa nduvaha tsa cumi taahan ra can

naha ra, tan cua jamañi ra tsa jamañi ra nuu Nyoo.²⁷ Tacan tan tsa cuñí ndihí tsa utsa quivi can, tan taahan ra Israel tsa quee nda Asia nyehé ra naha tsi ra Pablo tsitsi vehe ñuhu. Tan cuvaq̄ xaan tandíhi nyiví jahá ra naha, tan tiñi ra naha tsi ra Pablo.²⁸ Tan caná tsaa ra naha tan catyí ra naha:

—Nyooho nyiví Israel, jatyinyee ndo tsi ndi. Juvin ra ihyá cuví ra tsa tsicá nuu tandíhi ñi ityi. Tan jacuahá ra tsi tandíhi nyiví. Catyí ra tyin ña vaha cuhva iyó yo. Tan catyí ra tyin ña vaha ley tsa tyaa ra Moisés, tan ña vaha vehe ñuhu ihyá. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihyá nu ii cuví tsi tan vatsí jativí ra naha —catyí ra naha caná tsaa ra naha.

²⁹ Tacan catyí ra naha tyin nda nu quitsi tsi nyehé ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañí Trófimo. Tan cuñí maa ra naha tyin ra Pablo tsindacá tsi ra tsitsi vehe ñuhu.³⁰ Tan tandíhi nyiví ñuu quitsaha cuvaá ñi. Tan tsinú xaan ñi tsaa ñi. Tacan tan tiñi ñi tsi ra Pablo. Tan ixta caa ñi tsi ra cua ndaca ñi ityi tsata vehe ñuhu, tan numi ñi nacaseñi yuvehe ñuhu can.³¹ Tsa cuñí cahñí ñi tsi ra, tan ñihí tuhun ra comandante cuenda andaru tyin tandíhi nyiví ñuu Jerusalén iyo xaan caahán yuhu tahan ñi.³² Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyiví. Cuhva tsa nyehé ñi tsi ra comandante can tsihin andaru can naha ra, jañá ñi tsa cañí ñi tsi ra Pablo.³³ Tacan tan natuhvá ra comandante can nu nyíi ra Pablo. Tan tavaq̄ tyiñu ra tsi andaru naha ra tyin na tiñi ra naha tsi ra, tan na cuhñí ra naha tsi ra tsihin uví taahan cadena. Yaha can tan tsica tuhun ra comandante can tsi ra yóo ra cuví ra, tan náa javahá ra.³⁴ Maa tyin nyiví siin siin tuhun caná tsaa ñi. Tan ra comandante can ña cutuñí maa iñi ra tsa cuenda tsatyiñ ñihí xaan cuvaá jahá ñi. Tan tavaq̄ tyiñu ra tsi andaru tyin cundaca ra naha tsi ra Pablo nda vehe nu yucú andaru.³⁵ Cuhva tsa tsaa ra naha nu cuayí vehe can, tan quitsaha nducañá nyiví tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra.³⁶ Tyin tandíhi ñi nyicún ñi tsi ra naha, tan caná tsaa ñi tan catyí ñi:

—Na cúa ral —catyí ñi.

Nu juvin ñi maa ra Pablo jacacú tsi ra nuu nyiví

³⁷ Cuhva tsa cua tyihi ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego?³⁸ Tun tacan caa, ñavín yooho cuví ra ñuu Egípto tsa quitsi quivi can tan jacañí tahan ra tsi nyiví siquí ra ndacá ñaha tan tavaq̄ ra cumi mil ra tsahñí ndiyí tsindacá ra tsi ra naha ityi ñuhu ityi —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacu yu ñuu Tarso tsa cuví iin ñuu cahnu ityi Cilicia. Maa tyin jaha tumañi iñi cuhva un ndatu cahan yu luxu tsihin nyiví —catyí ra Pablo tsihin ra comandante.

⁴⁰ Tacan tan tsa tsahá ra comandante can ndatu tsi ra, nduvita nyityi ra nu cuayí can tan javaha ra iin seña tyin na cutaxin ñi. Tan tsa cutaxin nyiví quitsaha caahán ra tsihin yuhu hebreo, tan catyí ra:

22

¹ —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñí yu tsa coto ndo tyin yuhu nduve cuatyí yu iyó —catyí ra Pablo tsihin nyiví can.

² Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacu yu ñuu Tarso tsa canyí Cilicia. Maa tyin Jerusalén ihyá tsahnu yu. Tan ra Gamaliel jacuahá ra tsi yu nácaaa tyaa yahví yu ley tsii tsaaahnú yo. Tan tacan ñi nducú yu cuhva javahá yu tyiñu nuu Nyoo tsihin tsa ñii iñi yu, tumaa tsa javahá ndo vityin ihyá. ⁴ Yuhu, nu quitsi tsi tsinyaq̄ ndaha yu tsi nyiví yihí cuenda ra Cristo. Tan tsindacá yu tsi ñi tsa cúa ñi. Tan cuaha ñi rayii tan ñaha tiñi yu tsa cuhun ñi tsitsi vehe caa. ⁵ Ra jutu tsaaahnú tsa cuví ityi nuu tsihin ra cuví mandoñi naha ra, cuví ra naha tsandaa tyin ra icán naha ra tsaha tutu tsi yu tyin cuví tiñi yu tsi ra yañi yo, ra yihí cuenda ra Cristo ñuu Damasco. Tsahan yu icán tsinanducu yu tsi nyiví tsinú ñi tsi ra Cristo, tyin cua cunuhñí ñi tsihin

cadena, tan cua quitsi ndaca yu tsi ñi nda ñuu Jerusalén ihyá tyin tatsi tuñi ra tsahnu naha ra tsi ñi.

*Nu nacatyí tuhun ra Pablo nácaa natsinu iñi ra tsi ra Cristo
(Hechos 9.1-19; 26.12-18)*

⁶ "Maa tyin cuhva tsa cuahán yu ityi tsa cua tsaa yu ñuu Damasco, maa ora cuví tsi. Tan sana iñi yu tan ndunditsín taníi cahnu nu cuahán yu jahá iin ñuhu tsa quitsi ityi andivi. ⁷Tacan tan nduva yu nu ñuhu. Yaha can tan tsíñi yu iin ndusu tsa caahán tsihin yu tan catyí tsi: "Saulo, Saulo, ¿nacuenda nyaá ndaha un tsi yu?" catyí ndusu can tsihin yu. ⁸Tacan tan tsíca tuhun yu tsi ra tan catyí yu: "¿Yóo yooho cuví un, taa?" Tan catyí ra tsihin yu: "Yuhu cuví ra Jesús, ra ñuu Nazaret, ra tsa nyaá ndaha un" catyí ra. ⁹Tandihi ra tsa cuahán tsihin yu nyehe ra naha ñuhu can, tan nayuhví xaan ra naha. Maa tyin ña tsíñi ra naha ndusu tsa cahan tsihin yu. ¹⁰Tacan tan quitsaha caahán yu tsihin ra tan catyí yu: "Jutu Mañi yu, ¿náa taahán tsi javaha yu?" Tan catyí ra tsihin yu: "Nduvita tan cuhun un nda ñuu Damasco. Tan ican cua cahan iin ra tsihin un tandihi tsa taahán tsi javaha un" catyí Jutu Mañi yo tsihin yu. ¹¹Tan cuaa yu jahá ñuhu can, yacan cuenda ra tsa cuahán tsihin yu tiñi ra naha ndaha yu tan cuahán ndi nda ñuu Damasco.

¹² "Tan ican iyó iin ra tsa nañí Ananías. Tan jacahnú xaan ra tsi Nyoo cuhva catyí ley tsa tyaa ra Moisés. Tan tandihi nyívi Israel tsa iyó ñuu Damasco catyí ñi tyin vaha xaan iñi ra. ¹³Tsahen ra can tsinyehe ra tsi yu. Tan cuhva tsa tsaa ra, catyí ra tsihin yu: "Yañi Saulo, nanyehe inga tsaha" catyí ra tsihin yu. Tan juvin ñi cuhva can tan nanyehe yu. Tan cuví nyehe yu tsi ra. ¹⁴Tan catyí ra tsihin yu: "Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. ¹⁵Tyin yooho cua cahan un tuhun ra nuu tandihi nyivi. Cua nacatyí tuhun un tsa nyehe un tan tsa tsíñi un. ¹⁶Tan vityin, ña cuatu ca un. Nduvita tan coondutuya un. Tan ndacan tahvi un tsi Jutu Mañi yo tyin na jaha ra tucahnu iñi cuatyí un" catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsaha Nyoo tyiñi tsí ra tyin cuhun ra inga ñuu cucahan ra tuhun ra Cristo

¹⁷ "Yaha can tan vatsí nuhu yu ñuu Jerusalén ihyá tan cuhva tsa tsaa yu, tsahan yu vehe ñuhu cahnu tsindacan tahvi yu tsi Jutu Mañi yo. Tan janañá ra iin tsa nyehe yu. ¹⁸Nyehe yu tsi ra. Tan catyí ra tsihin yu: "Janumi. Quita ñi ñuu Jerusalén ihyá tyin ña cua tsinu iñi nyívi tuhun yu tsa cahan un" catyí ra tsihin yu. ¹⁹Tacan tan quitsaha caahán yu tsihin ra tan catyí yu: "Jutu Mañi yu, maa ñi tsitó ñi tyin yuhu tsahan yu tandihi vehe ñuhu. Tan tiñi yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. ²⁰Tan quivi tsa tsihí ra Esteban ra tsa cahan cuenda un, yuhu nyívi ndihi yu ican. Tan ndoo yu vaha tsa tsahñi ra naha tsi ra. Tan jaha cuenda yu jahma ra can naha ra" catyí yu tsihin Jutu Mañi yo. ²¹Tacan tan catyí ra tsihin yu: "Cuaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyívi tsa ñavín nyívi Israel cuví" catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²² Tyaq soho ñi yacan ña tan quitsaha caná tsaá ñi tan catyí ñi:

—¡Cahñi ndo tsi ra! Tyin ña taahán ca tsi tsa coo ra ñayivi —catyí ñi.

²³ Tan caná tsaa ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñi ñi. ²⁴ Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahan ra tsa nditsa nacuenda tsa caná tsaa nyívi tsata ra. ²⁵ Maa tyin tsa yahá tsahñi ra naha tsi ra tan cua cañi ra naha tsi ra, tacan tan ra Pablo cahan ra tsihin ra capitán tsa nyaá nyiti ican tan catyí ra:

—¿A iyó ndatu tsi nyoho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

²⁶ Tsa tsíñi ra capitán tsa caahán ra Pablo, tsahan ra tsijacoto ra tsi ra cuví comandante. Tan catyí ra tsihin ra:

—Jáha cuenda tsi un tsihin tsa jayahá un. Tyin ra can, ra ñuu Roma cuví ra —catyí ra tsihin ra.

²⁷Tacan tan ra comandante can cuahán ra nu nyíi ra Pablo. Tan tsicá tuhun ra tsi ra tatuń nditsa tyin ra ñuu Roma cuví ra. Tan ra Pablo catyí ra:

—Juvín.

²⁸Tacan tan catyí ra comandante can tsihin ra:

—Yuhu cuaha xaan xuhun tyahví yu tan cuví cuú yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹Tacan tan andaru tsa cua cañi tsi ra jatsiyo nyaha ra naha tsi ra naha nu nyíi ra Pablo. Tan nda cuanda ra comandante tan nayuhví ra tsa cuenda tsa tsahñi ra tsi ra tsihin cadena. Tyin tsa jayahá ra tsa tacan tsihin iin ra ñuu Roma cuatyí cuví can.

Nu tsahan ra Pablo nu ndu iin ra ñuu Israel naha ra

³⁰Tan tsa tuví inga quíví can tan ra comandante can cuñi ra coto ra náa cuatyí tyáa nyíi Israel tsi ra Pablo. Tan jaña ra tsi ra Pablo. Tan tava tyínu ra na ndu iin tandíhi ra jutu tsa cuví ityi nuu naha ra, tan tsihin tandíhi ra cumí tyínu cuenda nyíi Israel. Tacan tan tava tyínu ra na quita ra Pablo vehe caa tan cuhun ra nu iyó junta can.

23

¹Tan ra Pablo nyehé ra tsi tandíhi ra tsa ndu iin can naha ra, tan catyí ra tsihin ra naha:

—Nyoho yañi, tandíhi quíví nda cuanda vityin nducú yu cuhva jayahá yu cuhva cuví Nyoo. Yacan cuenda vaha cuñi yu —catyí ra Pablo.

²Tacan tan ra Ananías, ra jutu tsahnu tsa yíhí ndaha tsi inga ca ra naha, tava tyínu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. ³Tan ra Pablo nacahan ra tan catyí ra:

—Jihna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyínu un na cañi ra naha tsi yu? Tan ñavin tacan catyí ley —catyí ra Pablo.

⁴Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsahnu tyin cahnu cuví ra nuu Nyoo —catyí ra naha tsihin ra Pablo.

⁵Tacan tan ra Pablo catyí ra:

—Yañi, ña tsító yu tatuń ra ihyá cuví ra jutu tsahnu. Tyin catyí tuhun Nyoo tyin ña cahan nyaa yo tsi ra yíhí ndaha ñuu yu —catyí ra.

⁶Tacan tan tuví iñi ra Pablo tyin juhva ra cuenda junta can naha ra, yíhí ra cuenda ityi ra cuví saduceo naha ra. Tan juhva ra naha yíhí cuenda ra cuví fariseo naha ra. Tacan tan cahán ra tsihin tsa ñihí ndusu ra tan catyí ra:

—Nyoho yañi, yuhu ra fariseo cuví yu tumaa jutu yu. Tan tatsí tuñi ndo tsi yu tsatayin tsinú iñi yu tyin nyíi tsa tsihí nan-doto ñi —catyí ra Pablo.

⁷Cuhva tsa cahán ra tuhun ihyá, ra tsa cuví fariseo naha, ra tan ra saduceo naha ra, quitsahá caahán yuhu tahan ra naha tan natahví sava ra naha. ⁸Tyin ra saduceo catyí ra naha tyin ña cua nandoto nyíi tsa tsihí. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandíhi tuhun ihyá. ⁹Tandíhi ra naha quitsahá caná tsaa ra naha. Tan nduvitá juhva ra cuví maestro cuenda ley tsa tyáa ra Moisés tsa cutahán tsihin ra fariseo naha ra, tan catyí ra naha:

—Nyehe ndo, nduve tsa ña vaha jayahá ra ihyá, tyin tatum ángel cahán tsihin ra, jaha yo cuenda tyin ña vaha cahan yo siquí Nyoo —catyí ra naha.

¹⁰Tsa tsihí tandíhi ra naha yacan, quitsahá nduvañyico ra naha. Nda cua nayuhví ra comandante can coto cahnya cuatyí ra naha tsi ra Pablo. Yacan cuenda tava tyínu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. ¹¹Tan tsacuua can quituvi Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihyá, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndog ra Israel naha ra tyínu tyin cua cahñi ra naha tsi ra Pablo

¹²Tsa inga quivi, juhva ra Israel natuhun tahan ra naha tan ndooq ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua jahaha tacan, na janaa Nyoo tsi ra naha, catyí ra naha. ¹³Yaha uvi xico ra naha ndoq ra naha tyiñu ihyá. ¹⁴Tsahan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyiví Israel naha ra. Tan catyí ra naha tsihin ra naha:

—Nyuhu natuhun tahan ndi tan cahañi ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatuñ ña cua jahaha ndi tumaa cuhva catyí ndi. ¹⁵Tan vityin nyoooho jácoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsaa ra ihyá, cua cahñi ndi tsi ra —catyí ra naha tsihin ra jutu naha ra.

¹⁶Maa tyin sehe cuhva ra Pablo tsiñi ra tsa natuhún tahan ra naha. Tan tsahan ra vehe andaru nu nyí ra Pablo tsicatyí tuluñ ra tsihin ra. ¹⁷Tacan tan ra Pablo cana ra tsi iin ra capitán. Tan catyí ra tsihin ra:

—Cuandaca tsi ra luhlu ihyá nuu ra comandante tyin iyó tsa cuñí ra cahan ra tsihin ra —catyí ra Pablo tsihin ra capitán.

¹⁸Tacan tan tsindacá ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyí vehe caa cana ra tsi yu tan catyí ra tsihin yu tyin quitsi ndaca yu tsi ra luhlu ihyá tyin cuñí ra cahan ra tsihin un.

¹⁹Tacan tan ra comandante tijín ra ndaha ra luhlu can tan tava siñ ra tsi ra tan catyí ra tsihin ra:

—¿Náa cuñí un cahan un tsihin yu?

²⁰Tan ra luhlu can catyí ra tsihin ra:

—Ra Israel ndooq ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñí maa un tyin cua jandaa ra naha tyiñu tsa cuenda ra Pablo. ²¹Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahañi ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha.

Tan tatuñ ña cuvi cahñi ra naha tsi ra, vaha taxín ca na cíu tandíhi maa ra naha, catyí ra naha. Tan vityin ndatú ra naha nácaa cua cahan un —catyí ra luhlu can.

²²Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyiví. Yaha can tan jacunuñu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndacá ñaha tsa nañi Félix

²³Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cuhun ndo ñuu Cesarea cuhva caa iñ tsa tsacuaa. Cua cuhun uvi ciente andaru tsihin tsaha ra naha, tan uñi xico utsi ra naha tsihin cuayu, tan uvi ciente ra naha cua cuiso lanza. ²⁴Janduvaha ndo cuayu coso ra Pablo. Tan jaha cuenda vaha ndo tsi ra ityi cuhun ndo na tsaa vaha ra nu nyaá ra Félix, ra ndacá ñaha —catyí ra comandante tsihin ra capitán can naha ra.

²⁵⁻²⁶Tacan tan jahaha ra iin carta cundaha ra naha nacuhiva ra naha tsi ra Félix. Tan tuhun tsa tyaq ra nu carta, cuví tuhun ihyá:

“Yuhu ra Claudio Lisias jaquitsí yu carta ihyá tsi un, tyin vaha xaan nyiví cuví un. Ihya vatsí namuci tsi un.

²⁷’Ra Pablo ihyá, tijín ra Israel naha ra tsi ra. Tan cuñí ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsahan yu tsihin andaru tan jacacu yu tsi ra. ²⁸Tan cuñí yu coto yu náa cuatyí tyá nyiví tsi ra, tsindacá yu tsi ra nu iyó junta tandíhi ra cuví mandoñi nyiví Israel. ²⁹Tan nyehé yu tyin xaan xaan cuñí nyiví Israel nyehé ñi tsi ra tyin ña tyá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa. ³⁰Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihi ra naha nu nyaá un na cahan ra naha cuatyí ra nuu maa un”, catyí ra Claudio tsihin ra Félix nu carta tsa jahaha ra.

³¹Tacan tan quihiñ ra naha tsi ra Pablo tamaa cuhva catyí ra Claudio tsihin ra naha, tan juvin ñi tsacuaa can tsindacá ra naha tsi ra nda ñuu Antípatris. ³²⁻³³Tsa inga quivi, ra tsa cuahán tsihin tsaha, sava ityi ñi tsahan

ra naha, tan tsaq̄ nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan culva tsa tsaq̄ ra naha, nacuhva ra naha carta can tsi ra Félix, tan tsahā cuenda ndihí ra naha tsi ra Pablo tsi ra.³⁴ Tsa yahā tsa cahv̄i ra Félix carta can, quitsahā tsicá tuhun ra tsi ra Pablo nu maa cuví ñuu ra. Tan tsa tsitó ra tyin ra Cilicia cuví ra.³⁵ Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyi un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahā ra Herodes tahan̄ tsanaha.

24

Nu cutuñí ra Pablo nuu ra Félix

¹Yahā uhun quív̄i tan ra Ananías, ra jutu tsaahnu tsa yihí ndaha inga ca ra jutu, tsaq̄ ra ñuu Cesarea can tsihin taahan̄ ra cuví mandoñi naha ra, tan tsihin iñi ra tsa nañí Tértulo. Ra tsa caahán ndaahvi tsaha nyiv̄i cuví ra. Tsaq̄ ra can naha ra nuu ra Félix tyin cua ndacan ra naha cuatyi tsaha ra Pablo. ²Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahā tsicán ra Tértulo cuatyi tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyiv̄i ñuu ndi. ³Nacuhvá xaan ndi tyahvi nyoo tsi yooho tata Félix, tyin vaha xaan iñi un. ⁴Tan ña cuñí yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. ⁵Tyin tsitó ndi tyin rayii ihyá ñavin ra vaha cuví ra. Tandihí ñi ityi jacuvaá ra tsi nyiv̄i Israel. Tan juvin ra cuví ityi nuu tsihin nyiv̄i tsa nyicún tsi ra Jesús ra ñuu Nazaret. ⁶Tan cuñí ra javaha ra tsa ndavaha ñi tsitsi vehe ñihu cahnu. Tan yacan cuenda tijin ndi tsi ra, tyin tatsi tuñi ndi tsi ra tumaa cuhva catyí ley maa ndi. ⁷Maa tyin ra Licias, ra cuví comandante ñihi xaan tyasí ra tan quihin nyaa ra tsi ra tsi ndi. ⁸Tan catyí ra tyin tun cuñí ndi ndacan ndi cuatyi tsaha ra, cuñí tsi tsa cahan jihna ndi tsihin un. Yacan nyehe maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa. ¹⁰Tacan tan ra Félix janahā ndaha ra nu nyaá ra Pablo tyin nacahan ra. Tan ra Pablo quitsahā caahán ra tan catyí ra:

—Sií xaan cuñí yu tyin nuu maa un cua cutuñí yu vityin tyin tsitó yu tyin tsa cuaha xaan cuiya ndacá ñaha un tsi nyiv̄i iyó ñuu ihyá. ¹¹Tatun cua nducu tuhun un, cua coto un tyin tsa iyó ñi utsi uví quív̄i tsa tsahen̄ yu ñuu Jerusalén tsijacahn̄ yu tsi Nyoo. ¹²Tan ña cahan yuhu tahan̄ yu tsihin ndi intuhun nyiv̄i. Tan ndi ña jacuvaá yu tsi ñi tsitsi vehe ñihu cahnu. Nduve maa náa javahā yu tandihí ca vehe ñihu, tan ndi inga ca ityi tsitsi ñuu. ¹³Tan cuatyi tsa tyáa ra ihyá naha ra siquí yu, ña nditsa. Tyin tandihí maa tsa caahán ra tan ñavin tsa nditsa cuví tsi. ¹⁴Maa tyin tsa cua catyí yu tsihin un cuví tsehe: tyin yuhu jacahn̄ yu tsi Nyoo. Juvin ra tsa jacahn̄ tsii tsahnu yu. Tan jacahn̄ yu tsi ra tumaa cuhva jacuahá ra Jesucristo. Tan ra ihyá naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyáa ra Moisés, tan tsinú iñi yu. Tan tandihí tsa tyáa ra cuvi ndusu yuhu Nyoo tan tsinú iñi yu. ¹⁵Tan tsinú iñi yu tumaa tsa tsinú iñi ra ihyá naha ra tyin nyiv̄i tsa tsihí cua nandoto ñi inga tsaha, tahan̄ ñi nyiv̄i vaha tan nyiv̄i caquíñi. ¹⁶Tan yacan tacan ñi nducu yu cuhva tsa javaha yu tsa vaha nuu Nyoo, tan nuu nyiv̄i.

¹⁷Tan tsa yahā juhva cuiya tsa tsicá yu tandihí ñi ityi, tsahan̄ tsaq̄ nuhu yu nda Israel ñuu yu tyin nacuhva cuenda yu xuhun tsa tsahā nyiv̄i tsi yu tsi nyiv̄i ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸Yacan javahā yu tsitsi vehe ñihu cahnu. Tan tsa yahā tsa janduvahā yu tsi yu tumaa catyí ley ndi, tan juhva ra Israel ra tsa quee ityi Asia, nyehe ra naha tsi yu ndacan. Maa tyin nduve nyiv̄i cuaha yucú, tan nduve náa javahā ñi. ¹⁹Tan ra tsa nyehe tsi yu ndacan naha ra, taahán tsi tsa quitsa maa ra naha cahan ra naha náa cuvi tsa javahā yu o náa cuatyi tyáa ra naha siquí yu. ²⁰Tatun ña tacan, na catyí tuhun ra tsa nyecú ihyá naha ra tatuñ náa iin cuatyi yu nañihí ra naha quív̄i janahma ra cuví ityi nuu tsihin

nyíví Israel na ha ra tsí yu. ²¹ ¿A ñavin cuenda tsatayin cahán yu iin tuhun tsihin ra tsa yucú junta can? Tan catyí yu: “¿A tatsí tuñi ndo tsi yu tsa cuenda tyin tsinú iñi yu tsa nandoto nyíví tsa tsihí?” —catyí ra Pablo.

²²Tan tsa tsíñi ra Félix tsa cahán ra tacan, tan catyí ra tsihin ra tsa nyecú can:

—Ña cua jandaa na ha yu tyíñu ndo vi-tyin. Ndaha fií nda quitsi ra comandante Lisiás tan cua jandaa yu tuhun ihyá —catyí ra.

Cahán ra tacan tyin tsító ra nácaa cuahán tuhun nyíví nyicún tsi ra Cristo.

²³Tacan tan tava tyíñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihí xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyíí ra, tan cahan ra na ha tsihin ra.

²⁴Tsa yaha juhva quivi tan tsaaq nyico ra Félix inga tsaha tsihin ña Drusila ñasííhi ra. Tan ñaha Israel cuví ña. Tan tava tyíñu ra na quitsi ra Pablo tyin cuñí ñi tyaa soho fií nácaa tuhun tsa tsinú iñi ra tsi ra Jesucristo. ²⁵Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñí Nyoo, tan ña cuví javaha yo tsa ña vaha tsa cuñí cuñú ñuhu yo. Tan coo quivi cua tatsi tuñi Nyoo tsi tandihi nyíví. Tan ra Félix nayuhví xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

²⁶Tan ra Félix cuñí maa ra tyin ra Pablo cuha cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra. ²⁷Tan tsa yaha uvi cuiya, tacan tan nacoso tyíñu tsi ra Porcio Festo tyin cundaca ñaha ra. Tyin tsa quitá ra Félix. Tan ra Félix ña cuñí ra tsa cahan nyíví Israel tsi ra, yacan cuenda naco ra tsi ra Pablo vehe caa.

25

Nu jandaá ra Festo cuatyí ra Pablo

¹Tan tsa quihví ra Festo tsa cua jaha tyíñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén. ²Tan tsa tsaa ra ñuu Jerusalén, tacan tan tsaa ra jutu tsa cuví ityi nuu, tan ra cumí tyíñu tsa yiñí ndaha tsi nyíví Israel.

Tan tsicán ra na ha cuatyí tsaha ra Pablo.

³Tan tsicán ra na ha tumañi iñi cahnu tsi ra Festo. Tan catyí ra na ha tyin na tava tyíñu ra Festo na quitsi nyico ra Pablo nda ñuu Jerusalén. Tyin ra ícan na ha ra cua tava tyíñu ra na ha na cucahñi ra na ha tsi ra Pablo ityí cua quitsi ra. ⁴Maa tyin ra Festo nacahan ra, tan catyí ra:

—Ra Pablo nyíí ra vehe caa nda ñuu Cesarea. Tan yuhu tyáa yu cuhva tsa yatyí ñi cua cunuhu nyico yu. ⁵Yacan cuenda, nyoho tsa cuví ndo ra cumí tyíñu ñuu ihyá, cuví cuhun ndo tsihin yu, tan ndacan ndo cuatyí tsaha ra tatuń iyó tsa ña vaha javaha ra —catyí ra Festo tsihin ra na ha.

⁶Tacan tan ra Festo ndoog ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaaq ra tsitsi vehe tyíñu ra tan tsinyaq ra tsa cua tatsi tuñi ra tsi ra iyó cuatyí na ha ra. Tacan tan tava tyíñu ra na quitsi ra Pablo. ⁷Cuhva tsa quihví ra Pablo, nu yucú ra na ha natuhvá ra Israel tsa quee nda ñuu Jerusalén, tan quitsahá tyáa ra na ha cuatyí cahnu siquí ra. Maa tyin nduve tsandaa tava ra na ha. ⁸Tacan tan cahán ra Pablo tan catyí ra:

—Yuhu ndi intuhun cuatyí ñaha ca javaha yu, ndi siquí ley nyíví Israel, ndi siquí vehe ñuhu cahnu ñuu Jerusalén, ndi siquí ra cuví rey cahnu tsa nyaá ñuu Roma —catyí ra.

⁹Maa tyin ra Festo cuñí ra coo vaha ra tsihin ra Israel na ha ra, yacan cuenda tsica tuhun ra tsi ra Pablo:

—¿A cuñí un cuhun un ñuu Jerusalén tyin jandaa yu tyíñu un ndacan? —catyí ra tsihin ra.

¹⁰Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyíñu cuenda rey cahnu tsa nyaá ñuu Roma. Ihyá cuví nu taahán tsi tsa cutuñi yu tyin ra ñuu Roma cuví yu. Tan tsító vaha un tyin nduve náa javaha yu tsi nyíví Israel. ¹¹Tun tsatayin javaha yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihyá na ha ra. Ndi nyoho tan ndi intuhun nyíví nduve ndatu tsi ndo tsa nacuhva cuenda ndo tsi yu tsi ra ihyá na ha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

¹²Tacan tan ra Festo, tsa yaha tsa natuhun tahan ra tsihin ra jatyinyéé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

¹³Tsa yaha juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyií ra Festo tyin cua cuhva ñi nacumi tsi ra. ¹⁴Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoo ra tsi iin ra vehe caa ihya. ¹⁵Tan tsa tsahān yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicán ra naha cuatyí tsaha ra can nuu yu tyin na cuhva yu ndatu tsa cíu ra. ¹⁶Tan yuhu catyí yu tsihin tandihí ra naha tyin ña tuhvá ra cumí tyiñu cuenda ñuu Roma cahñi tsi ndi intuhun nyivi tatum ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. ¹⁷Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatú yu. Tan juvin ñi inga quivi can tan tsahān yu vehe tyiñu. Tan tsa yaha tsicunyaay yu tan cana yu tsi ra can.

¹⁸Maa tyin ra tyaa cuatyí siqui ra, nduve náa tuhun ñiñi cahān ra naha. Tsa cuñi maa yu tyin cahnu cuatyí cua tyaa ra naha siqui ra.

¹⁹Maa tyin tuhun tsa cahān ra naha cuví tsa cuenda cuhva iyó maa ra naha cuhva tsinú iñi ra naha. Tan cahān ra naha tuhun ra tsa nañi Jesús. Tan catyí ra naha tyin tsa tsihí ra. Maa tyin ra Pablo catyí ra tyin nyito ra.

²⁰Tan tsa ña ñihí yu nácaa tatsi tuñi yu tsi ra tsa cuenda tuhun can, tsicá tuhun yu tsi ra tan catyí yu tsihin ra tatum cuñi ra cuhun ra cutuñi ra nda ñuu Jerusalén. ²¹Maa tyin catyí ra tyin vaha ca tatum cutuñi ra nuu ra Augusto nda ñuu Roma. Yacan cuenda tava tyiñu yu na cunyii ra juhva ca quivi tsitsi vehe caa, nda cuanda cuvi jacuhun yu tsi ra nuu ra Augusto —catyí ra Festo tsihin ra Agripa.

²²Tacan tan ra Agripa catyí ra tsihin ra Festo:

—Cuñi tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³Tsa inga quivi can tan tsaa ra Agripa tsihin ña Berenice. Iyo xaan caá ñi quivi ñi tsitsi vehe, tyin rey cuví ñi. Tan quivi ndihí tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo.

²⁴Tacan tan quitsaha catyí ra Festo:

—Yooho Rey Agripa, tan nyoho tata, tsa yucú ndo ihya. Nyéhe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cíu ra. ²⁵Maa

tyin tsa cuenda yuhu, nduve cuatyí ra tsa taahán tsi cíu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. ²⁶Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. ²⁷Tyin ña vaha tsa jacuhún yu tsi ra tatum nduve náa tuhun caahán yu náa cuatyí javahá ra.

26

Nu quitsaha caahán ra Pablo nuu ra rey Agripa

—Tacan tan ra Agripa catyí ra tsihin ra Pablo:

—Cuví cahān un vityin —catyí ra tsihin ra.

Tan ra Pablo jandaá ra ndaha ra tan catyí ra tyehen:

²—Sii xaan cuñi yu tyin cuví cahān yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaa ra Israel naha ra siqui yu. ³Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahān yu.

Nu catyí tuhun ra Pablo tsihin ra Agripa nácaa ñayivi tsicoq ra tsa ndi cumañi ca quivi ra cuenda ra Cristo

⁴Tandihí nyivi Israel tsitó ñi nácaa tsicoq yu nda ñuu yu quivi tsa ndi luhlu yu.

Tan tsitó tucu ñi nácaa tsicoo yu nda ñuu Jerusalén.⁵ Cuaha xaan cuiya nacotó ñi tsi yu. Tatum cuahva cuenda ñi cua catyi ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandíhi nyivi.⁶ Tan vityin cuñi nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsihí, tumaa catyi ra tsihin tsii tsaaahnu yo naha ra tahan tsanaha.⁷ Tandíhi nyivi tsa cuví tata tsa utsi uvi taahan sehe ra Israel ndatú tucu ñi nyehe ñi nu cua janandoto Nyoo tsi nyivi tsa tsihí. Tan yacan cuenda ñia jandíhi ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihyá, tyaá ra Israel naha ra cuatyí siquí yu vityin, yoocho rey Agripa.⁸ ¿A ña tsinú iñi nyoocho tyin Nyoo cua janandoto ra tsi nyivi tsa tsa tsihí?

Nu tsahg cuenda ra Pablo tsi ra Agripa cuhva tsinyaa ndaha ra tsi nyivi yihí cuenda ra Cristo

⁹ "Tahan tsanaha juvin ñi maa yu tsica iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret.¹⁰ Tan tacan javahá yu nda ñuu Jerusalén tsihin ndatu tsa tsahá ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyihi yu vehe caa. Tan tatum tsahñi ra naha tsi ñi, vaha xaan cuñi yu.¹¹ Tan cuaha xaan tundoho nyehe ñi jahá yu. Tan nducu yu cuhva jañiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javahá yu tandíhi maa vehe ñuhu nyivi Israel. Javahá yu tacan tsa cuenda tsa xaan cuñi yu nyehé yu tsi ñi. Tan tandíhi inga ñuu tsahen yu tsinyaa ndaha yu tsi ñi.

*Nu nacatyí tuhun nyico ra Pablo nácaa nanduví ra, ra yihí cuenda ra Cristo
(Hechos 9.1-19; 22.6-16)*

¹² Tan tsa cuenda yacan cuahán yu nda ñuu Damasco quiví can tyin tsahá ra jutu tsa cuví ityi nuu naha ra ndatu tsi yu.¹³ Maa tyin ityi cuahán yu cuhva ora cuví tsi, yoocho Rey. Tan quitsi ñuhu ityi siqui. Tan jandunditsin tsi nu cuahán yu tsihin tandíhi ra tsa cuahán tsihin yu. Maa tyin yaha ca nditsin tsi tan ñavin ca ñuhu ñi-canyii.¹⁴ Tacan tan tandíhi ndi nduvá ndi nu ñuhu. Tan tsiní yu iin ndusu tsa caahán

tsihin yu, tsihin yuhu yo, tan catyí tsi tsihin yu: "Saulo, Saulo, ¿nacuenda nyaá ndaha un tsi yu? Tumaa iin quít tsañi nyaa ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicueehé un", catyí ndusu can tsihin yu.¹⁵ Tacan tan catyí yu: "¿Yoo yoocho cuví un taaa?" Tan Jutu Mañi yo catyí ra tsihin yu: "Yuhu cuví ra Jesús, juvin ra tsa nyaá ndaha un.¹⁶ Nduvita nyiti. Tyin quituvi yu nuu un ihyá tyin tacan tan cua jaha tyiñu un nuu yu, tan cua cuvi un tsandaa tsa cuenda tsa nyehé un ihyá tan tsa cuenda tsa cua nyehe un ityi nuu ca.¹⁷ Yacan cuenda vityin jacuhún yu tsi un nu iyó nyivi tsa ñavin nyivi Israel cuví tan juvin ñi maa yu cua jacacu yu tsi un ndaha ra Israel naha ra, tan ndaha nyivi tsa ñavin nyivi Israel cuví.¹⁸ Tan yacan jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahnu iñi cuatyí ñi. Tan cua naquihin ndíhi tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu", catyí Jutu Mañi yo tsihin yu.

¹⁹ Yacan cuenda yoocho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu.²⁰ Tacan tan tsa jihna ñi quitsahá caahán yu tuhun ra nda ñuu Damasco. Yahá can tan cahan yu tsihin nyivi ñuu Jerusalén tan tandíhi ca ñuu tsa cayucú Judea. Tan caahán ndíhi yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaah yahvi ñi tsi Nyoo na javahá ñi tsa vaha tumaa javahá nyivi tsa tsinú iñi tsi ra Cristo.²¹ Tan tsa cuenda tuhun ihyá tñen ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu.²² Maa tyin maa Nyoo jatyin yeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandíhi nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuvi nu cuahán ca tsi, yacan caahán yu.²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yahá tsa cíu ra, cua nandoto ra. Tan jihna ca ra can cua nandoto. Tan cua jandunditsin ra añima nyivi tyin cua jacoto ra nácaa cua cacu ñi, tahan ñi nyivi Israel

tan nyíví tsa ñavin nyíví Israel cuví —catyí ra Pablo.

Nu nducú ra Pablo cuhva tsa tsinu iñi ra rey Agripa tsi ra Cristo

²⁴Cuhva tsa catyi ra Pablo tuhun ihyá, ra Festo cuenda tsaa ra, tan catyí ra:

—Jiñi yooho ña vaha cuní, Pablo!, tsaa cuenda tsa cuaha xaan cahví un tan ndusaná iñi un —catyí ra Festo tsihin ra.

²⁵Maa tyin ra Pablo catyí ra tsihin ra:

—Ñavin iñi yu ña vaha cuní, yooho tata Festo. Tyin tsa caahán yu, maa ñi tsa nditsa tan tsa vaha cuví tsi. ²⁶Ihya nyaá rá rey Agripa. Tan tsító vaha ra tuhun ihyá. Yacan cuenda ña yií caahán yu tuhun yu tsihin ndo. Tyin tsító yu tyin tsító tucu maa ra tuhun ihyá, tyin ñavin tuhun xeehe cuví tsi.

²⁷Yooho rey Agripa, *já tsinú iñi un tuhun tsa tyaa ra cuví ndusu yuhu Nyoo tahan tsanaha?* Yuhu tsító yu tyin tsinú iñi un —catyí ra Pablo tsihin ra Agripa.

²⁸Tacan tan ra Agripa catyí ra tsihin ra:

—¿A cuní yooho tsa natsinu iñi yu tsa caahán un tan quihví yu cuenda ra Jesús? —catyí ra rey Agripa tsihin ra Pablo.

²⁹Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndíhi tucu iñi tandíhi nyíví tsa yucú tyá soho tsa caahán yu ihyá. Intuhun ñi tsa ña cuní yu, tsa quihí cadena ndahando tumaa maa yu vityin —catyí ra Pablo.

³⁰Tsa yahá tsa cahan ra Pablo tuhun ihyá, nduvitá rey tan ra ndacá ñaha tan ña Berenice, tan tandíhi ra yucú ican naha ra. ³¹Tan tsa yahá quita ñi, tan quitsaha natuhún tahan ñi:

—Nduve cuatyí ra ihyá tsa ñihi xaan. Ña taahán tsi cíu ra. Tan ndi ña taahán tsi cunyí ca ra vehe caa —catyí ñi.

³²Tan ra Agripa catyí ra tsihin ra Festo:

—Cuví jaña yo tsi ra, tun tsatiny ña tsicán ra tsa cutuñi ra nuu ra cuví rey cahnu —catyí ra.

27

Nu jacuhun ra Festo tsi ra Pablo nda ñuu Roma

¹Quivi tsa tyaa ra Festo tan ra Agripa cuhva tyin jacuhun ra naha tsi ndi nda ñuu Roma tsa canyí Italia, nacuhvá cuenda ra naha tsi ra Pablo tan tsi juhva ra tsa iyó

cuatyí naha ra tsi iin ra capitán tsa nañí Julio. Yíhi ra batallón andaru, tsa nañí Cuenda Ra Augusto. ²Tan cuahán ndihi tucu ra Aristarco tsihin ndi. Ra tsa quee ñuu Tesalónica tsa canyí ityi Macedonia cuví ra. Tacan tan quihví ndi tsitsi iin yutun ndoo tsa quee ñuu Adramitio tyin tsa yatyin cuii cuhun nyico tsi ñuu tsa cayucú Asia yatiny ñi yuhu ndutya ñuhu. ³Tsa inga quivi tsaa ndi puerto Sidón. Tan ra Julio vaha nyíví cuví ra tsihin ra Pablo. Tan tsahá ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra. ⁴Yaha can tan quita ndi ñuu Sidón tan jandaqá ra naha jahma tsa nyisó yutun ndoo can tan tsihin tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yahá tsiyó ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵Tacan tan yahá sava ndi nu ndutya ñuhu ityi nuu Cilicia tan Panfilia, tan tsaa ndi iin ñuu tsa nañí Mira tsa canyí Licia. Tan quita ndi tsitsi yutun ndoo can.

⁶Tan ican nañihí ra capitán cuenda andaru inga yutun ndoo tsa quee nda ñuu Alejandría tan cua cuhun tsi nda Italia. Tan catyí ra capitán can na quihví ndi tsitsi yutun ndoo can tyin tsa cua cuhun ndi nda nu cuahán ndi. ⁷Cuaha quivi tsicá ndi tyin cuee ñi cuahán ndi. Tsihin tundoho tan tsaa ndi yatying ñi ñuu Gnido. Tan tsa cuenda tsa ñihi xaan yihí tatyí tsa watsí ityi tyisó ñicanyii, ña tsaha tsi tsa cuhun ca ndi ityi nuu, tan yahá ndi yatying ñi ñuu Salmón tsa canyí ñuhu Creta. Tan navico ndi ityi yuhu ñuhu Creta. ⁸Nducy ndi cuhva tsa cuhun ndi yuhu ndutya ñuhu, maa tyin tsihin tundoho tan tsaa ndi nu nañí Buenos Puertos yatying ñi ñuu Lasea.

⁹Tsa cuaha xaan quivi yahá tyin cuee xaan tsicá ndi tsa cuenda tatyí tan ica xaan nanduví tsa yahá ndi nu ndutya ñuhu. Tyin tsa yahá quivi vico nu iyó nyitya nyíví Israel. Tan tsa cua cuyatiny yoo vitsin. Yacan cuenda ra Pablo tsahá cuenda ra tsi ra jacacá yutun ndoo can naha ra, ¹⁰tan catyí ra:

—Tandíhi nyoho ra yucú ihyá, tyaa soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuví iñi yu tyin cua cunaa yutun ndoo tsihin

tandíhi tsa nyisó tsí, tan nda cuanda maa yo cuví cunaa yo. Vaha ca tatum ndoo yo ihyá —catyí ra tsihin ra naha.

¹¹ Maa tyin ra capitán cuenda andaru can tyaa yahvi ca ra tsi ra jacacá yutun ndoo tan ra cuví tsitoho yutun ndoo tan ñavin ca tsi ra Pablo. ¹² Ña cuví yaha ndi yoo vitsin ican tyin ñihi xaan tuhvá tatyí yihi, tan ica xaan cuenda yutun ndoo. Yacan cuenda catyí tandíhi ra naha:

—Vaha ca tsa quita yo ihyá tan nducu yo cuhva cuhun yo nda ñuu Fenice tsa canyí juvin ñi ñuhu Creta ihyá. Yacan cuví iin nu vaha cunyaa yutun ndoo tyin ña ñihi xaan yihi tatyí tyin ñuu can canyí tsi tsyo cana ñicanyii —catyí ra naha.

Nu ñihi xaan yihi tatyí nu ndutya ñuhu

¹³ Tacan tan quitsáha yihi luxu tatyí tsa quitsí ityi sur. Tan cuñí maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatayin ñi yuhu ñuhu Creta can. ¹⁴ Ña cuaha ñi tsica ndi tan quitsáha yihi tatyí xaan tsa quitsí ityi norte. Tan tandahá tsi yutun ndoo inga ityi. ¹⁵ Tan ña cuví ca cuhun ndi ityi nuu ca tsa cuenda tatyí can. Tan jañá ndaha ndi na cuhun maa yutun ndoo tsihin tatyí ndáa ityi cuñí maa tsi. ¹⁶ Tan yaha ndi ityi tsata iin ñuhu luhlu tsa nañí Claudia tyin ña ñihi xaan yihi tatyí ityi can. Tan tsihin tundoho naquihín ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya. ¹⁷ Tan tsa yahá natyihí ra naha yutun ndoo luhlu can, tacan tan sutyá ra naha xuu yutun ndoo cahnu tan tsahñí ra naha yutun ndoo can tsihin taahan yoho tyin coo tunyee iñi itsi. Tan yuuhví ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañí tsi Sirte. Yacan cuenda januu ra naha jahma yutun ndoo can tan tsahá ra naha tsa cuhun tsi cuhva tandahá tatyí. ¹⁸ Tan tsa inga quivi juvin ñi ñihi xaan yihi tatyí. Yacan cuenda quitsáha tyihí ra naha carga tsa yihi tsitsi yutun ndoo can nuu ndutya ñuhu. ¹⁹ Tan tsa tsinu uñi quivi quihin ndi ndaha tyiñu yutun ndoo can tan tyihí ndi nu ndutya ñuhu.

²⁰ Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaa ca ndi cuhva tsa caca ndi.

²¹ Cuaha quivi yahá tan ña tsatsí ndi. Tacan tan catyí ra Pablo tsihin tandíhi ra naha:

—Nyehe ndo, vaha ca tun tsatiny tyaa yahvi ndo tuhun tsa cahan yu quivi can, tan ndoq yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaá yo. ²² Tan cua cunaa ndihí yutun ndoo ihyá, maa tyin ña caca iñi ndo tyin ndi intuhun yo tan ña cua cíu yo. ²³ Tyin Nyoo cuví ra yihi ndaha tsi yu, tan jahatiñú yu tyiñu ra, juvin ra janaha ra iin tsa janaha tsi yu cuñí. Tan quituví iin ángel nuu yu. ²⁴ Tan catyí ángel can tsihin yu: “Ña nayuhvi un, Pablo. Tyin cuñí tsi tsa cahan un tuhun Nyoo nuu ra rey cahnu Augusto nda ñuu Roma. Tan tsa cuenda un cua jacacu Nyoo tandíhi ra yucú tsihin un tsitsi yutun ndoo”, catyí ángel can tsihin yu. ²⁵ Yacan cuenda nyoho tsa yucú tsitsi yutun ndoo ihyajandu iin ndo iñi ndo. Tyin yuhu tsinu iñi yu tsi Nyoo. Tan tsító vaha yu tyin cua cuvi tumaa cuhva catyí ángel can tsihin yu. ²⁶ Vasu cua nyee yutun ndoo ihyá, maa tyin cua tsaa yo iin ñuhu luhlu —catyí ra Pablo tsihin tandíhi ndi.

²⁷ Tan tsa ndihí tsahun quivi tsa tsica ityi ndi. Iin tsacuaa yucú ndi nu ndutya ñuhu Adria. Tan tsata can tsata ihyá tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuví iñi ra jacacá yutun ndoo can naha ra tyin cua tsaa ndi iin ñuhu. ²⁸ Tacan tan tyihí cuhva ra naha cuhva cunu yihi ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihí cuhva ra naha inga tsaha. Tan iyó oco utsa metru. ²⁹ Tan yuuhví ra naha coto nañí yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cuhun ca tsi ityi nuu. Tan tsa cuñí ra naha tsa cunditsin. ³⁰ Tan ra jacacá yutun ndoo can naha ra tyaq ra naha cuhva cunu xeehe ra naha. Tan yacan cuenda quitsáha januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. ³¹ Maa

tyin ra Pablo jacoto ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyoho ña cua cuvi cacu ndo —catyí ra tsihin ra naha.

³²Tacan tan andaru tsahnya ra naha yoho yutun ndoo luhlu can. Tan jacañacavá ra naha can nu ndutya. ³³Tan tsa naa ca ra Pablo catyí ra tsihin tandíhi ra naha:

—Tsa iyó utsi cumi quivi tsa ña tsatsí ndo tan ña quixí ndo. ³⁴Catyí yu tsihin ndo, cätsi ndo vityin. Ñiñi xaan cuñi tsi tsa catsi yo tyin tacan tan ndunyee cuñu ñuhu yo. Tyin cua cacu yo tan ndi intuhun ixi jiñi yo tan ña cunaas.

³⁵Tan tsa catyí ra Pablo tuhun ihyá, qui-hin ra iin paan tan nacuhva ra tyahvi nyoo tsi Nyoo nuu tandíhi ra naha. Tacan tan tayhi ra tan quitsaha tsatsí ra. ³⁶Tacan tan tandíhi ra naha ndu iin ca iñi ra naha tan tsatsí ndíhi ra naha. ³⁷Tan tsa tandíhi ndi tsa yucú ndi tsitsi yutun ndoo can, quita uví ciente uñi xico tsahun iin ndi. ³⁸Cuhva tsa ndíhi tsatsí ra naha cuhva cuñi ra naha tan jacuhun ra naha yitín tsa yihi trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsaa tsi yatiny ñi yuhu ndutya.

Nu nyee yutun ndoo

³⁹Yahá can tan cunditsjn. Tan nyehe ra tsa jacaçá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaa ra naha cuhva nyehe ra naha tatum cuví jacuhun ra naha yutun ndoo ican. ⁴⁰Tsahnya ra naha yoho tsa nuuhñi caa vee can. Tan nacoq ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaq ra naha jahma tsa tuhvá ticaá ityi nuu tsi. Tan quitsaha quihín tatiy jahma can, tan jacuhun tsi yutun ndoo nda nu iyó nyiti can. ⁴¹Tan tsaa tsi nu tatahán ndutya. Tan nyee jiñi tsi tsitsi nyiti. Tan ña cuví ca tava ra naha itsi. Tan ityí xuu tsi quitsaha tahví cuatyí can tsa cuenda tsa ñiñi xaan cañi ndutya ñuhu can. ⁴²Tacan tan andaru cuñi ra naha cañi ra naha tsi ra cuahán cua cutuñi naha ra tyin coto cunu ra naha. ⁴³Maa tyin capitán andaru cuñi ra jacacu ra tsi ra Pablo. Yacan cuenda ña tsahá ra tsa cañi ra naha tsi ra can naha ra. Tan catyí ra tyin ndáa ra tsitó sutyá, na

cuhun cuee ñi ra naha nu ndutya tan quita ra naha nda ñuhu ityi. ⁴⁴Tan tandíhi ca ra tsa ña cuví sutyá, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahví cuatyí jahá ndutya ñuhu. Tan tacan cacu tandíhi ndi tan quita ndi ñuhu ityi.

28

Nu nyíi ra Pablo ñuhu Malta

¹Cuhva tsa tsa yahá cacu ndi tan catyí nyiví iyó ñuhu can tyin nu yucú ndi can nañi tsi Malta, o Melita. ²Tan vaha xaan natuhún ñi tsihin ndi. Tan jatahan ñi ñuhu tyin cuún savi tan vitsin xaan. Tan catyí ñi tsihin tandíhi ndi, na natuhva ndi yuhu ñuhu can tyin quita tsa vitsin tsi ndi. ³Tacan tan ra Pablo naquihin ra juhva nducu ityi. Tan tsitsi tsa tyihí ra can nu ñuhu, quita iin coo tsitsi nducu can, tsa cuenda tsa ihñi. Tan tsatsi yihi ti ndaha ra, tan ticaá tsico ti ndaha ra. ⁴Cuhva tsa nyehe nyiví ñuhu can tyin ticaá coo can ndaha ra, quitsaha natuhún tahan ñi tan catyí ñi:

—Ra ihyá nyiví tsahñi ra, tun cuvi, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

⁵Maa tyin ra Pablo naquisí ra tsi coo can, tan canacavá ti nu ñuhu, tan nduve náa tahan ra. ⁶Tandíhi ñi ndatú ñi náa cuhva ndaa nu tyaa ti, a náa cuhva cua cíu ra. Maa tyin tsa yahá ndatú xaan ñi, tan nyehe ñi tyin nduve maa náa tahan ra. Tacan tan nasama ñi cuhva tsicá iñi ñi, tan quitsaha catyí ñi:

—Ra ihyá cuví iin nyoo —catyí ñi.

⁷Yatiny ñi can canyí ñuhu ra yihi ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuú ra tsi ndi, tsa uñi quivi tsa yucú ndi vehe ra. ⁸Tan jutu ra ñiñi xaan cuuhví ra tsihin cañi tan tsa tsiyó ra. Tan tsahan ra Pablo tsinyehé ra nu canyí ra. Tan tsicán tahví ra tsa cuenda ra, tan tyiso ndaha ra jiñi ra. Tacan tan nduvahá ra. ⁹Yahá can tan quitsaha tsaa cuaha nyiví cuuhví tsa iyó ñuu can. Tan nduvahá ndihi ñi. ¹⁰Tan tandíhi ñi vaha xaan tyanuú ñi tsi ndi. Tan quivi quihví ndi tsitsi iin yutun ndoo tsa cua cuhun ndi, tsahá ñi tandíhi tsa cua cutyiñu ndi ityi cuhun ndi.

Nu tsaa ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quíhyí ndi tsitsi iin yutun ndoo tsa quee nda ñuu Alejandría tsa canyií nu cuví Egipcio. Tan ndoo tsi Malta nda yaha yoo vitsin. Tan jiñi yutun ndoo can nyecú tsa caá tumaa caá nyoo Cástor tan nyoo Pólux. ¹² Tan tsaa ndi ñuu Siracusa. Tan ican ndoo ndi uñi quivi. ¹³ Tacan tan quita ndi tan cuahán ndi ityi yuhu ndutya ñuhu nda cuanda tsaa ndi ñuu Regio. Tan tsa inga quivi can ñihi xaan yiñi tatyi tsa quitsí ityi sur tan tsicá ndi uvi quivi tan tsaa ndi ñuu Puteoli. ¹⁴ Ican ñihi tahan ndi tsihin juhuva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma. ¹⁵ Tan nyivi yiñi cuenda ra Cristo ñuu Roma can ñihi tuhun ñi tyin cua tsaa ndi. Tan tsahán ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihi tahan ñi tsihin ndi nda nu nañi Tres Tabernas. Tan tsa nyehé ra Pablo tsi ñi, nacuhva ra tyahví nyoo tsi Nyoo. Tan ndu iñi ca iñi ra. ¹⁶ Cuhva tsa tsaa ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yiñi ndaha vehe caa. Tan tsahá ra can tsa coo siñi ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quivi tsa tsaa ndi ican, tacan tan tava ra Pablo tysiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iñi ra naha, quitsahá catyí ra tsihin ra naha:

—Nyoho yañi, vasu nduve náa javahá yu tsi nyivi Israel tahan yo, tan ndi nduve náa javahá yu siquí tuhun tsahnú cuhva iyó yo, maa tyin tsahá cuenda ra Israel naha ra tsi yu tsi ra ñuu Roma naha ra. Tan tsinyí yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cíu yu tyin nduve cuatyí javahá yu. ¹⁹ Maa tyin ra Israel tsa iyó nda ñuu Jerusalén naha ra nduxaañ xaan ra naha tan yacan cuenda tsicán yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siquí ra naha. ²⁰ Yacan cuenda caná yu tsi nyoho tyin nacoto yu tsi ndo, tan catyí tuhun yu tsihin

ndo tyin nuuhñí yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

²¹ Tacan tan catyí ra Israel naha ra tsihin ra Pablo:

—Na tsító ndi tuhun yooho. Tan yoñi jacotó tsi ndi, ndi tsihin carta, tan ndi ra ñuu yo tsa quee nda Judea ña cahán ra naha tuhun yooho, tan nduve náa cahán ra naha siquí un. ²² Maa tyin cuñi ndi tyaa soho ndi tuhun tsicá iñi un. Tyin tsító ndi tyin tandihí ñi ityi tan caahán nyivi siquí tuhun tsaa ihyá —catyí ra Israel naha ra tsihin ra Pablo.

²³ Tacan tan natuhún tahan ra naha ndaa quivi cua cuhun ra naha inga tsaha. Tsa tsaa quivi can, tsaa cuaha nyivi nu iyó ra Pablo. Tan quitsahá caahán ra nda tsa tuvi tan nda cuanda tsacuaa nácaa ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahan tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javahá ra Pablo tyin cuñi ra tsa tsinu iñi ñi tsi ra Jesús. ²⁴ Yiñi ñi tsinú iñi ñi tsa caahán ra. Tan inga ñi ña tsinú iñi ñi. ²⁵ Tan ña iin tsicá iñi ñi, siñi siñi tuhun caahán ñi. Tan quitsahá tsinuhú ñi. Tan ra Pablo catyí ra tsihin ñi:

—Nditsa tsa cahan Tatyí Ii Nyoo tsihin ra Isaías ra cuví ndusu yuhu ra tahan tsanaha, tyin na cahan ra tsihin tsii tsaaahnu yo. Tan catyí ra:

²⁶ Cuaahan tan cahan un tyehen tsihin nyivi ihyá:
Nyoho cua cuñi ndo tuhun Nyoo, maa tyin ña cua cutuñi iñi ndo.

Cua nyehé ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehé ndo.

²⁷ Tyin añima ñi tsa ndundava xaan tsi. Tsíñi ñi, maa tyin ña tyaá yahvi ñi.
Tan ndasí tinuu ñi, tyin tacan tan ña cua cuví nyehé ñi.

Tan ña cua cuñi ñi tsihin soho ñi.
Tan ña cua cutuñi iñi ñi tsihin añima ñi.
Yacan cuenda ña cuñi ñi quíhyí ñi tsitsi ndaha yu na janduvaha yu tsi ñi.
Tacan catyí ra Isaías jahá Tatyí Ii Nyoo tahan tsanaha.

²⁸ 'Coto vaha nyoho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi

ñi. Tan maa ñi cua tyaa soho ñi —catyí ra
Pablo tsihin ñi.

²⁹ Cuhva tsa catyi_i ra Pablo tyehen, ra
Israel cuahán ra naha juvin ñi caahán yuhu
tahan ra naha tsa cuenda tuhun tsa cahña
ra Pablo tsihin ra naha.

³⁰ Uvi cuiya ndoq ra Pablo vehe nu nyif
ra cuenda yoo ñuu Roma can. Tan vaha
caahán ra tsihin tandihí nyiví cuahán vehe
ra. ³¹Tan tsihin tsa nii iñi ra tan caahán ra
tuhun nácaa ndacá ñaha Nyoo tsí yo. Tan
jacuahá ra tuhun Jutu Mañi yo ra Jesucristo.
Tan yoñi tyasi_i nu caahán ra.

Carta Tsa Jacuhun Ra Pablo Tsi Nyívi Yihí Cuenda Nyoo Ñuu Roma

Nu quitsahq tyaá ra Pablo carta

¹Yuhu ra Pablo cuví yu iin ra jahá tyiñu tyiñu ra Jesucristo. Cañá Nyoo tsi yu, tan nacatsí ra tsi yu tyín caca yu jacoto yu tuhun tsa jacacú ra tsi yo tsi nyívi. ²Tan tuhun ihyá cuví tsa cahan Nyoo tsihin ra cuví ndusu yuhu ra tahan tsanaha tyin tyaa ra naha nu tutu ra. ³Juvín tuhun ihyá caahán tyin Jutu Mañi yo Jesucristo, Sehe Nyoo, quitsí ra nu ñuhu ñayívi tan nanduví ra tumaa maa yo. Tan cuví ra tata ra rey David. ⁴Tan Nyoo jacotó ra tsi yo tsihin Tatyi Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsai iyó tsi ra. ⁵Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyívi iyó nanii cahnu nu ñuhu ñayívi tsi ra tan na tyaa yahvi ñi tsi ra. ⁶Tan juhva ñi ican cuví tucu nyoocho tyin tsa nacatsí ra Jesucristo tsi ndo tyin cuví ndo nyívi cuenda ra.

⁷Jaquitsí yu carta ihyá tsi tandíhi nyoocho tsa iyó ñuu Roma. Nyoo cuñí xaan ra tsi ndo tan canára tsi ndo tyin cuví ndo nyívi ra tan jacobnu ndo tsi ra. Naquihin ndo tsa vaha tan na coo tsa taxin añima ndo jahá Jutu yo Nyoo tan Jutu Mañi yo Jesucristo.

Nu catyíra Pablo tyin cuñí ra cuhnur ñuu Roma

⁸Tsa jihna ñi, tsahá yu tyahvi nyoo tsi Nyoo tsihin siví ra Jesucristo tsa cuenda tandíhi nyoocho tyin tandíhi ñi ityi caahán nyívi tyin tsinú xaan iñi ndo tsi ra Jesucristo. ⁹Jahá tyiñu yu tyiñu Nyoo tsihin tsa niñi iñi añima yu. Tan caahán yu tsihin nyívi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰Tan tsicán yu tsi ra na cuvi cuhva cuñí ra, tan quitsí yu nu yucú ndo, tyin tsanaha xaan cuñí yu quitsí yu. ¹¹Tyin cuñí yu jatinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra. ¹²Tsa cuñí yu cahan yu tsihin ndo cuví tuhun ihyá: tsa jandu iin tahan yo iñi yo tsihin tsa tsinú iñi yo tsi ra.

¹³Yañi, cuñí yu tsa coto ndo tyin cuahua xaan tsaha cuñí yu quitsí yu quitsí nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñí yu quitsí yu ñuu ndo tyin cuñí yu cahan ca yu tuhun Nyoo tsihin nyívi tyin tacan tan nducuahua ca ñi tsinu iñi tsi ra, tumaa javaha yu tsihin nyívi inga ca ñuu. ¹⁴Tyin tsa ñiñi cuñí tsi cahan yu tuhun tsa jacacú ra Cristo tsi yo tsihin nyívi Grecia tan nyívi inga ñuu; tahan ñi nyívi tsa tsító xaan tan nyívi soho. ¹⁵Yacan cuenda, cuñí yu cahan yu tuhun ra Cristo tsihin nyoocho tsa iyó ndo Roma ihyá.

Tuhun Nyoo iyó xaan tunyee iñi itsi

¹⁶Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandíhi nyívi tsa tsinú iñi tsi ra Cristo. Tsa jihna ñi maa ñi maa tsihin nyívi Israel cahan ndi tuhun ra Cristo, maa tyin vityin caahán ndíhi tucu ndi tsihin nyívi tsa ñavin nyívi Israel cuví. ¹⁷Tyin tuhun Nyoo ihyá, janahá tsi tsi yo nácaa janduvahá Nyoo tsi yo. Tan juvin ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyívi tsa janduvahá Nyoo añima, iyó ñi nyívi tsaa tsihin tsa tsinú iñi ñi tsi ra.”

Tandíhi nyívi tan iyó cuatyí ñi

¹⁸Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyívi tsa nditsa.

¹⁹Tsító ñi tsa iyó Nyoo tyin juvin ñi maa ra janahá can tsi ñi. ²⁰Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandíhi tsa javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee iñi tsi ra. Nyívi tsa ña cuñí coto tsi Nyoo ña cua coo tucanhui iñi tsi ñi. ²¹Vasu ndi maa tsító ñi tsa iyó Nyoo tsihin tsa nyehé ñi tandíhi tsa javahá ra, ña cuñí ñi jacabnu ñi tsi ra tumaa taahán maa tsi jacabnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayívi tyaá jiñi ñi. Tan tsa cuenda yacan ndusoho ñi. ²²Vasu ndi maa catyí ñi tyin tsító xaan ñi, maa tyin ña nditsa tyin nduve náa tsító ñi. ²³Ña jacabnu ñi tsi Nyoo nyito, ra vaha tsa

ñá cua cúu; maa tyin jacahnú ñí tsitoho tsa caá tumaa caá nyíví tuhvá tsiihí, tan nda cuanda tsitoho tsa caá tumaa caá saa, tan coo, tan quiti iyó cumi tsaha.

²⁴ Yacan cuenda naco Nyoo tsi ñí nu tsa caquiñi tsa jahá ñí. Tan jahá ndihí tucu ñí tsa caquiñi tsihin cuñu ñuhu iin ñí tan inga ñí tan cuví can ticanuu. ²⁵ Ña cuñi ñí tsinú iñi ñí tuhun Nyoo tsa nditsa, maa tyin tsinú iñi ñí tsa ña nditsa. Tyaá yahvi ñí tsa jahá Nyoo tan jacahnú ñí can, tan ña jacahnú ñí tsi maa ra. Tan intuhun ñí maa ra cuñi tsi jacahnu yo tacan ñí maa. Na cuvi tsi tacan.

²⁶ Yacan cuenda jaña ndaha Nyoo tsi ñí na jahá ñí tsa tsahá ticanuu tsi ñí. Tyin nda cuanda ñiñaha tan tsico ñí tsihin ñí nduyíi, tan ña vaha tacan. ²⁷ Tan juvin ñí tacan jahá tucu rayíi, nacoó ra naha tsa iyó ra naha tsihin ñasihí ra naha, tan iyó ra naha tsihin ra ndusihí naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa jahá ra naha.

²⁸ Tan tsa cuenda tsa ña cuñi ca ra can naha ra tan ñí ican naha ñí nacoto ñí tsi Nyoo, nacoó ra tsi ñí naha ñí na caca iñi ñí tsa cuñi maa ñí. ²⁹ Tyin tandihí nuu tsa ña vaha jahá ñí. Ñiñaha tsico ñí tsihin rayíi tan ña tindahá ñí. Rayíi tsico ra naha tsihin ñaha tan ña tindahá ra naha. Maa ñí tsa caquiñi jahá ñí. Cuñi ñí coo cuaha ndaha tuyñi ñí. Jovahá ñí tsa ndavaha ñí. Nyijo iñi ñí tsa iyó tsi inga nyíví. Tsahñi ñí nyíví. Cañi tahan ñí tsihin nyíví ñí. Jandaví ñaha ñí. Quiñi iyó ñí tan caahán ñí cuendu.

³⁰ Caahán ñí ndavaha ñí siqui inga nyíví. Ndasi cuñi ñí nyehe ñí tsi Nyoo. Caahán nyaa ñí tsi nyíví. Tan cahnu jahá ñí tsi ñí tan yaa xaan ñí. Janducuahá ca ñí tsa caquiñi. Ña tyaá yahvi ñí tsi jutu ñí, tan ndi tsi sihi ñí. ³¹ Ña cuñi ñí cutuñi iñi ñí. Ña jahá ñí tsa catyí ñí tyin cua jahá ñí. Ña cuñi maa ñí tsi ndi intuhun nyíví. Ña tsító ñí jahá ñí tucahnu iñi tan ña cundaahví iñi ñí nyehe ñí tsi nyíví. ³² Tsító vaha ñí tyin Nyoo ña cuñi ra tsa jahá ñí tacan. Tan tsító tucu ñí tyin nyíví tsa jahá tsa caquiñi can, taahán tsi cíu ñí. Maa tyin ña jandihí ñí tsa jahá ñí can, tan tatuñ inga nyíví jahá tacan, siíxaan cuñi ñí.

2

Tatsí tuñi Nyoo tsi nyíví maa tyin tsihin tsa nditsa

¹ Nyoho tsa nyehé cuatyi tsa jahá inga nyíví, iyó cuatyi ndo tyin jacutuñi ndo tsi ñí tsa cuenda cuatyi jahá ñí. Yoñi jaha ndáa nyoho cuví ndo. Tyin tsa jacutuñi ndo tsi ñí, juvin ñí tsi maa ndo jacunaá ndo. Tyin nda maa ndo tan jahá ndihí ndo cuatyi tsa jahá ñí. ² Tsító yo tyin Nyoo tatsi tuñi ra tsi nyíví tsa jahá tacan, maa tyin tsihin tsa ndaa tan tsa nditsa cua tatsi tuñi ra. ³ Nyoho tsa jacutuñi tsi nyíví tan jahá ndo juvin ñí tsa jahá ñí, cua tatsi tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo. ⁵ Maa tyin nyoho jandavá xaan ndo añima ndo. Tan ña cuñi ndo nasama ndo cuhva iyó ndo. Tan tsa jahá ndo tacan, Nyoo cuxaán ra tan ñiñi ca cua tatsi tuñi ra tsi ndo tsa cuenda can quiví cua tatsi tuñi ra tsi nyíví tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa jahá yo. ⁷ Nyoo cua cuhva ra ñayiví tsa ña cua naa maa coo nyíví tsa jahá tsa vaha tan nducú ñí tsa cahnu cuví ra tan nducú ñí jacahnu ñí tsi ra, tan cuñi ñí coo cuñi ñí tsihin ra. Cua ñiñi ñí tandihí yacan tyin nanducú ñí can. ⁸ Maa tyin cuahá ca tsa uhvi cua janyehe ra tsi nyíví tsa jahá tsa cuñi maa ñí, ñí tsa ña tyaá yahvi tuhun nditsa, tan jahá ñí tsa ña vaha. ⁹ Cuahá xaan tundoho tan tsa uhvi cua nyehe tandihí nyíví tsa jahá tsa ña vaha. Tsa jihna ñí cua tatsi tuñi ra tsi nyíví Israel, nyíví cuenda ra. Tan tsa tsinu uvi cua tatsi tuñi ndihí ra tsi nyíví tsa ñavin ñí Israel cuví. ¹⁰ Maa tyin tandihí nyíví tsa jahá tsa vaha, cua cuhva Nyoo tsa cahnu cuví ra tsi ñí. Cua jacahnu ra tsi ñí tan cua cuhva ra tsa taxin coo añima ñí. Jihna ca nyíví Israel cua ñiñi tandihí tsa caahán ra tuhun. Tan tsa tsinu uvi, ñí tsa ñavin ñí Israel cuví, cua ñiñi ndihí ñí tandihí can.

¹¹ Tyin Nyoo inducu ñí cuñi ra nyehe ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyíví tsa ñavin ñí Israel cuví, ñí tsa ña tsító ley Nyoo tsa tyaá ra Moisés, tan jahá ñí tsa ña vaha, cua cunaa ñí, maa tyin ñavin tsa cuenda tsa ña

tyáá yahvi ñi ley can. Tan nyíví Israel tsa tsító ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can.¹³ Tyin nyíví tsa javahá cuhva catyí ley Nyoo, ñi ican cuví nyíví vaha nuu ra. Maa tyin nyíví tsa tsító ñi maa ley tan ña javahá ñi tsa catyí ley can, ña cua cacu ñi.¹⁴ Nyíví tsa ñavin ñi Israel cuví ña tsító ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi.¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsíñi tuñi tsa iyó tsi ñi cuví tsandaa tsa cuenda ñi, tyin tuyí iñi ñi tatan vaha o ña vaha javahá ñi.¹⁶ Tacan cua cuvi quíví cua jacutuñi ra Jesucristo cuatyi tandíhi nyíví jaha Nyoo. Cua cutuñi tandíhi maa nyíví tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyíví Israel nyicún ñi ley Nyoo tsa tyaa ra Moisés

¹⁷ Maa tyin nyoho nyíví Israel cuví ndo, catyí ndo. Tan nyítá iñi ndo ley Nyoo tsa tyaa ra Moisés. Tan nduyáá ñi maa ndo tyin catyí ndo tyin nyíví Nyoo cuví ndo.¹⁸ Tan tsító ndo cuhva cuñí Nyoo tan ley can janahá tsi tsi ndo tsa nacatsí ndo tsa vaha.¹⁹ Tan cuñí tucu ndo tyin vaha jaquihín ityi ndo tsi nyíví cuua, ñi tsa ña tsító ley. Jandunditsín ndo nu yucú nyíví nu naa, cuñí maa ndo.²⁰ Tan cuñí tucu ndo tyin tsító ndo tandíhi ley Nyoo tan jaquihín ityi ndo tsi nyíví tsa ña tsító, ñi tsa ñaha ca caca vaha tsihin Nyoo.²¹ Tatun tsító ndo jacuahá ndo tsi inga nyíví, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo?²² Juvín ñi catyí ndo tyin ña vaha coo inga ñaha tsi iin rayii, o inga rayii tsi iin ñaha, ¿nacuenda tyin maa ndo javahá ndo tacan? Ndasí cuñí ndo nyehe ndo tsitohó, ¿nacuenda tyin suhú ndo ndaha tyiñu tsa iyó tsitsi vehe ñuhu can?²³ Nduyaa ndo tsihin tsa tsító ndo ley Nyoo, tan tsahá ndo ticanuu tsi ra tyin ña tyáá yahvi ndo ley ra.²⁴ Yacan cuenda catyí tuhun Nyoo tyehen: “Nyíví tsa ñavin nyíví Israel cuví, caahán ñi ndavaha ñi siquí Nyoo tsacatyí nyoho.”

²⁵ Nditsa tyin circuncisión tsa cuví tuñi Nyoo, tsa janahá tyin cuví yo nyíví ra, cuví jatyinyee tsi tsi ndo. Jatyinyee tsi tsi ndo tun tyáá yahvi ndo ley Nyoo tsa tyaa ra

Moisés. Tun ña tyáá yahvi ndo tsa catyí ley can, nduve náa catyí nyisó ndo tuñi can.²⁶ Maa tyin rayii tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatayin nyisó ra tuñi can.²⁷ Ra tsa ña nyisó tuñi can, tan tyáá yahvi ra ley Nyoo, cua jacutuñi ra tsi nyoho tsa tsító ley tan ña tyáá yahvi ndo tsa catyí tsi, vasu ndi maa nyisó ndo tuñi Nyoo.²⁸ Vasu ndi maa cuví ndo nyíví Israel tan nyisó ndo tuñi ra, ña cuvi cuvi ndo nyíví Nyoo tun nduve ley ra iyó añima ndo.²⁹ Tyin nyíví iyó ley Nyoo añima, ñi ican cuví nyíví Nyoo. Tyin maa Tatyi li Nyoo tyaa tuni ra añima ñi, tan ñavin cuñu ñuhu ñi. Tatyi li Nyoo javahá can, ñavin ley tsa tyaa ra Moisés. Nyíví ihya cua cuvi nyíví vaha nuu Nyoo, tan ñavin nuu nyíví.

3

¹ ¿Nacaa jatyinyee tsa cuví yo nyíví Israel tsi yo? ¿O nácaa jatyinyee tuñi Nyoo tsi yo?

² Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyíví Israel.³ ¿Náa cua cuvi? ¿A cua jandihi Nyoo tsa javaha ra tsa catyí ra tyin javaha ra tun juhva yoo tan ña tsinu iñi yo tsi ra?⁴ ¡Ña cua jandihi ra! Na cutuñi iñi yo tyin Nyoo ña vatya ra. Vasu ndi maa tandíhi nyíví vatya ñi, ra ican javahá ra tandíhi tsa caahán ra. Tyin catyí nu tutu ra tyehen:

Jutu Mañi yu, cua nyehe nyíví tyin ña vatya un.

Tan cua coto ñi tyin nditsa tsa caahán un.

⁵ Tsa caquiñi tsa javahá tandíhi yoo, tsa iyó nu ñuhu ñayivi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyí yo tumaa catyí nyíví tyin ña vaha tsa tatsi tuñi Nyoo tsi yo tyin janahá yo tyin vaha ra?⁶ Nyíví catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandíhi yo.

⁷ Tatun javahá nyíví tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa.⁸ Tun tsatayin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyíví tyin Nyoo vaha ra. Yihí ñi catyí ñi tyin tacan

jacuahá ndi. Tan ñi tsa caahán tyehen cuatyi
tatsi tuñi Nyoo tsi ñi tsacatyi tsa caahán ñi
cuendu siquí ndi.

Tandihi yo tan iyó cuatyi yo

⁹ Tan nácaa ja vaha ca yoo tsa cuví yo
nyiví Israel tan ñavin ca inga nyiví? Ña
vaha ca yo. Tyin tsa yaha janahá yu tsi indo
tyin tandihí yo tan iyó cuatyi yo. An cuví yo
nyiví Israel, o ña cuví yo nyiví Israel, maa
tyin ndacá ñaha cuatyi tsi yo. ¹⁰ Tacañ catyí
nu tutu Nyoo, nu catyí tsi tyehen:
Ndi intuhun nyiví vaha nduve iyó.

¹¹ Nduve nyiví cuñi cutuñi iñi tuhun Nyoo.
Yoñi cuñi nanducu tsi ra.

¹² *Tandihi ñi nacoñ ñi tsi Nyoo, tan tandihí
ñi tan cuanañ ñi.*

Ndi intuhun ñi tan ña javahá ñi tsa vaha.

¹³ *Jucun ñi cuví tsi tumaa iñi ñaña ndiyí tsa
ticoñ.*

Tan tsihin yaa ñi caahán ñi cuendu.

Yihí venenor coo yuhu ñi tyin caahán ñi tsi
tahan ñi.

¹⁴ Maa ñi tsa ndvalha ñi caahán ñi.

¹⁵ Yatyí xaan tsahñí ñi tsi tahan ñi.

¹⁶ Janyehé ñi tundoho tan tucuihyá iñi tsi
nyiví tsihin culhva iyó ñi.

¹⁷ Tan ña tsitó ñi nácaa coo taxin ñi tsihin
Nyoo, tan ndi tsihin nyiví.

¹⁸ Ndi ña tsicá iñi ñi tatuñ coo iñi quiví cuá
tatsi tuñi Nyoo tsi ñi, catyí tuhun
Nyoo nu tutu ra.

¹⁹ *Tsitó yo tyin tandihí tsa caahán ley*
Nyoo tsa tyaa ra Moisés, cuví tsi tsa cuenda
nyiví tsa yihí ndaha ley can, tyin tacan
tan ña cuvi catyí ñi tyin nduve cuatyí ñi
iyó. Maa tyin coto tandihí nyiví iyó nu
ñuhu ñayiví tyin cuá tatsi tuñi Nyoo tsi ñi
tsa cuenda cuatyí ñi. ²⁰ Ley can ña cuví
janduvaha tsi tsi ndi intuhun yo nuu Nyoo.
Iyó tsi tyin tacan tan coto yo tyin iyó cuatyí
yo.

*Tsa cuenda tsa tsinú iñi yo tsi Nyoo tan
nduvaha yo nuu ra*

²¹ Maa tyin vityin Nyoo janahá ra tsi yo
nácaa janduvahá ra tsi yo nuu ra. Tan
janahá ra tsi yo tyin ñavin tsa cuenda ley
tan nduvahá yo. Ley ihyá tan ra cuví ndusvo
yuhu Nyoo janahá nácaa coo vaha yo tsihin
Nyoo. ²² Tyin tsa cuenda tsa tsinú iñi yo
tsi ra Jesucristo tan naquihín Nyoo tsi yo
tumaa tsatiny vaha yo. Tan ña nacatsí ra tsi
yo an cuví yo nyiví Israel o ñavin. ²³ *Tandihi*

yo tan iyó cuatyi yo, tan tsa cuenda yacan
ña cuvi quihví yo nu ndacá ñaha Nyoo.

²⁴ Maa tyin tsahá maa ra tsa vaha ra tsi yo,
tan yacan jahá tsa naquihín cuenda ra tsi
yo tumaa tsatiny vaha yo, tyin tsa yaha
tyahví ra Cristo Jesús tsa cuenda cuatyí yo.
Tan yacan cuenda ña tsicán ca ra yahví tsi
yo. ²⁵ Nyoo jaquitsí ra tsi ra Cristo tyin cíu
ra nu cruu tan catí ra niñi ra tsa cuenda
cuatyí yo. Tan vityin jaha Nyoo tucahnú
iñi tsi yo tatuñ tsinú iñi yo tsi ra Cristo.
Tacañ cuví, tyin nyehe nyiví tyin Nyoo
javahá ra tsa vaha. Tahán tsanahá, Nyoo ña
tiñ cuenda ra cuatyí nyiví tsa cuenda tyin
cua quitsí ra Cristo tan janaa ra cuatyí ñi.

²⁶ Tan tacan cuví tyin vityin nyehé nyiví tyin
Nyoo tacan ñi maa vaha ra, tan naquihín ra

tsi tandihí yo tsa tsinú iñi tsi ra Jesús tumaa

tsatiny vaha yo.

²⁷ ¿A cuví nduyaa yo vityin? Ña cuvi.
¿Nacuenda? Tsa cuenda tyin ña cuví catyí
yo tyin javahá yo tandihí tsa catyí ley tan
yacan cuenda vaha yo nuu Nyoo. Tyin
nduvahá yo nuu ra tsa cuenda tsa tsinú iñi
yo tsi ra. ²⁸ Tsa tsitó yo vityin tyin Nyoo
naquihín cuenda ra tsi yo tumaa tsatiny
vaha yo tsa cuenda tsa tsinú iñi yo tsi ra
Cristo, tan ñavin tsa cuenda tsa javahá yo
tsa catyí ley o ña javahá yo itsi.

²⁹ ¿A Nyoo cuenda nyiví Israel ñi cuví
Nyoo? ¿A ñavin juvin ñi cuví tucu ra Nyoo
nyiví tsa ñavin ñi Israel cuví? Juvin ñi cuví
tucu ra Nyoo ñi can. ³⁰ Tyin intuhun ñi maa
ra iyó. Tan naquihín cuenda ra tsi yo tumaa
tsatiny vaha yo tsa cuenda tsa tsinú iñi yo
tsi ra, a iyó tuñi ra cuñu ñuhu yo tumaa
tsa iyó tsi tsi nyiví Israel, o nduve. ³¹ Tatuñ
tacan, ¿a cuñi tsi catyí tyin nduve ca yahví
nyaá ley tsahnu can? ¡Ñavin tsa nduve
yahví nyaá tsi! Cahnu cuví tsi, tan vityin
tsihin tunyee iñi maa ra Cristo janahá yo
tyin nditsa tsa cahnu cuví tsi.

4

*Cuhva tsicoq ra Abraham janahá tsi tsi yo
nácaa nduvahá yo nuu Nyoo*

¹ ¿Náaa catyí yo tsa cuenda ra Abraham,
tsii tsahnu yo? ¿Nacuenda naquihín
cuenda Nyoo tsi ra tumaa tsatiny vaha ra?

² Tun tsatiny naquihín cuenda Nyoo tsi ra
tsa cuenda tsa javahá ra tsa vaha, cuví
nduyaa ra tsihin can, maa tyin ñavin nuu

Nyoo.³ ¿Náa catyí nu tutu Nyoo? Catyí tsi tyin ra Ábraham tsinú iñi ra tsi Nyoo, tan tsa cuenda yacan, Nyoo naquihín ra tsi ra tumaa tsatayin vaha ra.⁴ Vaha, vityin cua cuhva yu iin cuhva tsi ndo: Ra jahá týiñu, quihín ra yahvi tsa cuenda týiñu jahá ra tan ña tuhvá nyíví cuhva maa xuhun tsi ra tun ña jahá týiñu ra.⁵ Maa tyin iin ra tsa ña jahá týiñu tan ñihi ra tsa ñihi ra, ñihi ndaahví ra itsi cuví can. Tacan cuví nyíví iyó cuatyí tsa ña nducú cacu tsihin tsa javahá ñi cuhva catyí ley, tan tsinú iñi ñi tyin Nyoo naquihín cuenda ra tsi yo tumaa tsatayin vaha yo tun tsinú iñi yo tsi ra.⁶ Ra David cahan ra síqu tsa sii cuví tsi nyíví tsa naquihín cuenda Nyoo tumaa tsatayin vaha ñi tan ña tiín cuenda ra cuatyí tsa javahá ñi.

⁷Tyehen catyí ra David:

Sii xaan cuví tsi nyíví tsa jahá Nyoo tucahnú iñi tsi

tan ña jahá ra cuenda cuatyí ñi.

⁸Sii xaan cuví tsi ñi tsa ña tiín cuenda Nyoo cuatyí.

⁹ ¿A cuñí maa ndo tyin tsa cuenda nyíví nyisó tuñi Nyoo ñi cuví tusiñ iñi ihya, o cuví tucu tsi tsa cuenda nyíví ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra.¹⁰ ¿Ama javahá Nyoo yacan tsihin ra Abraham? ¿A tsa ndi cumaní ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumaní ca.¹¹ Yaha tsa naquihín Nyoo tsi ra Abraham tumaa tsatayin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.¹² Nditsa tyin ra Abraham cuví tucu ra jutu nyíví Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnú yo, quivi tsa ñaha ca cunyaa tuñi can tsi ra.

Tsihin tsa tsinú iñi yo ñihíyo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayíví tsihin ra. Maa tyin tsa cahan Nyoo can tsihin ra, ñavin tsa cuenda tyin javahá ra tsa catyí ley, maa

tyin tsa cuenda tyin tsinú iñi ra tsi Nyoo, tan Nyoo naquihín ra tsi ra tumaa tsatayin vaha ra.¹⁴ Tun tsatayin maa ñi maa nyíví tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra.¹⁵ Tyin ley can janahá tsi tyan taahán tsi tatsi tuñi Nyoo tsi yo tatuñ ña javahá yo cuhva catyí tsi. Maa tyin tun tsatayin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyíví tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihí tucu nyíví tsa ña nyitá iñi ley, tatuñ tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihí nyíví tsa tsinú iñi tsi Nyoo.¹⁷ Tyin catyí ra nu tutu ra tyehen: “Yoho cua cuvi tumaa jutu nyíví cuaha tsa cua coo nu ñuhu ñayíví”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú iñi ra tsi Nyoo, tyin Nyoo janandotó ra ndiyí tan caahán ra tuhun tsa ñaha ca coo tumaa tsatayin tsa iyó tsi.

¹⁸ Ra Abraham tsa tsahnú xaan ra quivi tsa catyí Nyoo tyin cua coo sehe ñasihí ra, tan tsitó ra tyin ña cuví ca coo sehe ñi. Maa tyin tsinú iñi ra tan ñihí ra tsa cahan Nyoo tsihin ra. Tan cuví ra jutu nyíví cuaha, tumaa cahan maa Nyoo tsihin ra: “Tyehen cua nducuaha nyíví tata un”.¹⁹ Vasu ndi maa tsa yatin ña iin ciente cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasihí ra, ña cuví ca coo sehe ñi, tyin tsa cuyatayin cuii cíu ñi tyin tsahnú xaan ñi.²⁰ Maa tyin ña ndu uví iñi ra tsa cua ñihi ra tsa catyí Nyoo tyin cuhva ra tsi ra. Tsinú iñi ra tsihin tsa nñi iñi añaíma ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo,²¹ tsa cuenda tyin tsitó vaha ra tyin Nyoo iyó tunyee iñi tsi ra tsa javahá ra tsa catyí ra tsihin ra.²² Yacan cuenda Nyoo naquihín ra tsi ra tsa cuenda tsa tsinú iñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú iñi ra tsi ra, ñavin tsa

cuenda ra Abraham ñi cuví tsi, ²⁴ tyin tsinyaq tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandotq tsi ra Jesús, Jutu Mañi yo. ²⁵ Ra Jesús quitsi ra quitsi cíu ra tsa cuenda cuatyi yo, tan nandotq ra tyin tacan tan cuvi nduvaha yo nuu Nyoo.

5

Tsa cua ñihí yo tsa cuenda tsa nacoq vaha yo tsihin Nyoo

¹ Tsa yahá nduvaha yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jahá Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñí yo tyin tsa naquihín yo can. Tan sii cuñí yo tyin cua cuhva ra tsa cahnu cuvi yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusí iñi yo, tyin taahán tucu tsi cusí iñi yo tun nyehé yo tundoho. Tyin tsító yo tyin tun cunyee iñi yo nyehé yo tundoho, tacan cua cunyee iñi yo cuatu yo nda cuanda ñihí yo tsa cua cuhva Nyoo tsi yo. ⁴ Tatun cunyéé iñi yo yahá yo tandihí tundoho, sii cuñí Nyoo tsihin yo. Tan tsa cuenda yacan tsító vaha yo tyin cua quita vaha yo nuu ra. ⁵ Tatun tsító yo tyin cua quita vaha yo nuu ra, ñi taahán tsi nducahan nuu yo nyehé yo tsi ra, tyin Tatyi li ra tsa tsahá ra coo añima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacu maa yo tsi yo. Tacan tan quiví tahan maa tsi quitsi ra Cristo, quitsi cíu ra tsa cuenda cuatyi yo. ⁷ Tsító yo tyin ndi intuhun yo tan ña cana iñi yo cíu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasíqui cahnya iñi iin yo cíu yo tsa cuenda fií. ⁸ Maa tyin Nyoo jaquitsi ra tsi ra Cristo, tan yacan janahá tsi yo tyin cuñí xaan ra tsi yo. Quitsi ra quitsi cíu ra tsa cuenda yo vasu ndi maa iyó xaan cuatyi yo. ⁹ Tan tsa cuenda tsa tsihí ra Cristo, nacoq vaha yo tsihin Nyoo. Tan vityin tsító vaha yo tyin cua cacu yo tan ña cua cuhun yo anyaya quiví cua tatsi tuñi Nyoo tsi nyivi ña tsinú iñi tsi ra. ¹⁰ Tahan tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihí ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo

tsa cuenda tsa iyó yo ñayivi Sehe ra, tyin tsa iyó vaha yo tsihin ra. ¹¹ Tan ñavin yacan ñi, taahán tucu tsi cusí iñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoq cuatyi, tan tsa cuenda intuhun ñi ra can tsaa cuatyi naníi ñuhu ñayivi tan tsicoq tuhun tsiihí. Tan tuhun tsiihí can nacuña can tyin tandihí nyivi tan tsicoq cuatyi ñi.

¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyi nyivi, maa tyin ña tiín cuenda Nyoo cuatyi ñi tsa cuenda tyin nduve ley iyó. ¹⁴ Maa tyin nda cuanda quiví tsicoq ra Moisés, tsindaca ñaha tuhun tsiihí tsi tandihí nyivi tyin iyó cuatyi tandihí ñi, vasu ndi maa ña javahá ñi tumaa javaha ra Adán tsa ña tyaa yahvi ra tsa cahán Nyoo tsihin ra. Ra Adán quitsi ra tsihin cuatyi, maa tyin ra Cristo quitsi ra jacacu ra tsi yo.

¹⁵ Maa tyin cuatyi ra Adán ña cuví jandu inducú yo can tsihin tsa tsahá Nyoo tsi yo. Tyin tsa cuenda cuatyi intuhun ra can, tan tsihí cuaha nyivi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihí nyivi cuví tsi. ¹⁶ Cuatyi ra Adán ña cuví jandu inducú yo can tsihin tsa jacacú Nyoo tsi yo. Tyin tsa cuenda intuhun ñi cuatyi can, Nyoo tatsí tuñi ra tsi tandihí nyivi. Maa tyin vityin Nyoo ña cuñí ra yahvi tan jacacú ra tsi yo. Naquihín ra tsi yo tumaa tsatiny vaha yo, vasu ndi maa cuaha cuatyi yo tsicoq. ¹⁷ Nditsa tyin quitsaha ndacá ñaha tuhun tsiihí tsi tandihí nyivi jahá cuatyi tsa javahá ra can, maa tyin vityin ña cuví ca quihi ndaha can tsi ñi tsa tsa nduvaha nuu Nyoo, ñi tsa iin nyita ñi naquihín tsa vaha ra. Ñi icán iyó ñi ñayivi tsaa tan yiñi ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihí nyivi iyó nu ñuhu ñayivi tsa cuenda cuatyi ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo. ¹⁹ Cuñí tsi catyí tyehen: Tsa cuenda tsa ña tyaa yahvi iin rayii tsa cahán Nyoo, cuaha xaan nyivi

tsicoq cuatyi. Ra ican cuví ra Adán. Tan vityin cuaha xaan nyívi cua nduvaha nuu Nyoo tsa cuenda tsa tyaa yahvi inga ra tsa cahan Nyoo. Tan ra ican cuví ra Cristo.

²⁰ Nyoo tsahá ra ley tsi ra Moisés tyin tacan tan coto nyívi tyin iyó cuatyi ñi. Tan vasu ndi maa nducuahá ca cuatyi tsa cuenda ley can, tsa vaha Nyoo nducuahá tucu tsi tyin cahnu ca tucahuu iñi iyó tsi ra tsihin yo. ²¹Tahan tsanaha, cuatyi yo quitsi ndaca tughun tsiihí, tan yacan yiñi ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yiñi ndaha tsi tsi yo. Tan tsa tacan yiñi ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Náa cua javaha yo vityin? ¿A cua javaha ca yo cuatyi tyin tacan tan janaha Nyoo tyin iyó xaan tucahuu iñi tsi ra tsihin yo? ² Ña vaha. Tyin yoo tsa tsa ndu uví iñi cuatyi tumaa tsa tsihí cuatyi yo cuví can. Tan yacan cuenda, ña cuví ca javaha yo tsa caquiñi vityin. ³ ¿A ña tsító ndo tyin tsa tsicoondutyá yo janahá tsi tyin ndu iñi yo tsihin ra Cristo Jesús? Yacan cuñi tsi catyi tyin tsa yahá tsihí yo tsihin ra. ⁴Tsa quíhví yo tsitsi ndutya tsa tsicoo ndutya yo cuví tsi tumaa tsa tsihí yo tan quíhví ñuhu yo tsihin ra Cristo tsa tsihí ra. Tan tumaa tsa nandoto ra Cristo jahá Nyoo tsihin tunyee iñi ra, tacan nandotó tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsaa tsihin ra.

⁵ Tumaa tsa tsihí ra Cristo, tacan tsihí tucu cuatyi yo, tyin tacan tan ña javahá ca yo tsa caquiñi. Tan tumaa tsa tsihí yo tsihin ra, tacan cuu nandoto tucu yo tumaa nandoto ra. ⁶Tan tsító yo tyin tandihí cuhva tsicoq yo tahán tsanaha, tsa yahá tsihí can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyi yo tsi yo, tan ña javaha ca yo cuatyi. ⁷Tyin nyívi tsa tsa yahá tsihí, ña cuví ca javaha ñi tsa caquiñi. ⁸Tan yoo tsa tsa tsihí tsihin ra Cristo, nyitá iñi yo tyin cua coo yo tsihin ra. ⁹Tsító yo tyin ra Cristo nandoto ra tsa yahá tsihí ra, tan vityin ña cúa ca ra tyin nduve ca tunyee iñi iyó tsi tughun tsiihí tsa

cahñi can tsi ra. ¹⁰Ra Cristo iin tsaha ñi tsihí ra, tan tsihí ra tsa cuenda cuatyi yo, tan ña cua cúa ca ra. Vityin iyó ra, tan iyó ra tsa cuenda maa Nyoo. ¹¹Tan tacan tucu nyoho, ña javaha ca ndo tsa caquiñi. Ña naa iñi ndo tyin tsa yahá tsihí ndo tan tsa tsindihí cuatyi ndo. Tan coo ndo cuhva cuñi Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyi ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñi tsi. ¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yahá tsihí yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha. ¹⁴Tyin nduve ca tunyee iñi iyó tsi cuñu ñuhu cuatyi yo tsa cundaca ñaha can tsi yo. Tyin ñavin ca ley tsa tyaa ra Moisés yiñi ndaha tsi yo; tyin vityin tsa vaha tsa tsahá Nyoo tsi yo, yacan yiñi ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyi tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. ¹⁶Nyoho tsító vaha ndo tyin iñi musu, taahán tsi javaha ra tsa caahán tsitohu ra. Tan tacan cuví yo musu tsa tuhvá yo tyáyahvi. Tun tyáyahvi yo tsa caquiñi, musu tsa caquiñi can cuvi yo, tan cua cunaa yo jahá tsa caquiñi can tyin tyáyahvi yo tsi can. Maa tyin tun tyáyahvi yo tsi Nyoo, cua cuvi yo nyívi vaha nuu ra. ¹⁷Tyahvi nyoo tsi Nyoo, tyin vasu ndi maa nu quitsi tsi cuví ndo musu tsa caquiñi maa tyin vityin tyáyahvi ndo tughun Nyoo tsa cutuhvá ndo tsihin tsa ñi iñi añima ndo. ¹⁸Tsa yahá ndatsi cuatyi ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. ¹⁹(Caahán yu tsihin ndo cuhva tsa ña yíi ñi cutuñi iñi ndo tyin nyoho ñaha ca cuuñi vaha iñi ndo tughun Nyoo.) Tumaa tsa tsaha cuenda ndo cuñu ñuhu ndo tsi tsa caquiñi tahán tsanaha tan javahá ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuíti, tan javaha ndo maa ñi maa tsa vaha nuu ra.

²⁰Quíví tsiquíhí ndaha cuñu ñuhu cuatyíndo tsi ndo, musu can cuví ndo, tan ña yihíndaha tsa vaha Nyoo tsi ndo. ²¹Maa tyin nduve náa ñihí ndo tsihin can, tan vityincahán nuu ndo tsa cuenda tsa javahá ndotsanaha, tyin maa ñi tuhun tsiihí tsahá can. ²²Maa tyin vityin ña ndacá ñaha ca cuatyitsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñi Nyoo javahá ndo. Tan nu cua ndíhi tuhuncua coo cuui ndo tsihin Nyoo. ²³Nyivi tsa javahá tsa caquíñi, cua cùu ñi. Maa tyin Nyoo tsahá maa ra ñayiví tsa ña cua naamaa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹Yañi, nyoho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³Tumaa iin ñaha tsa iyó yií, catyí ley tyin coo ña tsihin yií ña nda cuanda cùura. Maa tyin juvin ñi catyí tucu ley tun cùuyií ña tan nandoo ndahvi ña, ña cua quihi ndaha ca ley can tsi ña. Tan cuvi tindaha ña tsihin inga rayii tan ña cua coo cuatyí ña. Maa tyin tsitsi tsa ndi iyó yií ña, ña cuvi coo ña tsihin inga rayii, tyin tun cua javahá ña tacan, cua coo cuatyí ña nuu Nyoo.

⁴Tan tacan tucu nyoho yañi. Tsanaha ley Nyoo tsa tyaa ra Moisés yihí ndaha tsi tsi ndo tumaa yihí ndaha iin rayii tsi ñasíhi ra. Maa tyin vityin tsa yahá tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayii tsi ndo tan juvin rauví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo. ⁵Tahan tsanaha tsicoo yo cuhva cuñi cuñu ñuhu yo tan ley tsahnu tsa tyaa ra Moisés catyí tsi tyin ña vaha javahá yo tsa caquíñi. Tan tsa caahán tsi tacan, yoo quitsahá cuñi ca yo javahá yo tsa caquíñi tsa cuñi cuñu ñuhu yo. Tan yacan tsahá tuhun tsiihí tsi yo. ⁶Maa tyin vityin ña ndacá ñaha ca ley tsahnu can tsi yo, tyin tsa yahá tsihí cuñu ñuhu cuatyí yo tsihin ra Cristo. Tan vityin tsa iyó yo ñayiví nyito tsa tsahá Tatyí Ii Nyoo tsi yo, na jaha tyiñu yo tyiñu Nyoo tan ña javahá ca yo tumaa javahá yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷¿Náa cua catyi yo? ¿A catyi yo tyin ñavahaley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yu náa cuví cuatyí. Tan ndi ña cua coto yu tyin ña vaha nyiyo ifí yu tsa tsinga nyiví, tun tsatiny ña catyí ley can tyin ña vaha nyiyo ifí yo. ⁸Tun tsatiny nduveley can iyó, ña cua coto yu náa cuví cuatyí, tan ña cua cuñi yu javahá yu tsa ña vaha. Maa tyin quivi tsa tsitó yu ley Nyoo, quivi can quitsahá tsicá iñi yu javahá yu tsa ña vaha. Nu nduveley iyó, ña tsitó nyiví náa cuví tsa ña vaha. ⁹Quivi tsa ña tsitó yu náa cuñi tsi catyí ley Nyoo tsa tyaa ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihí yu jahá cuatyí yu. ¹⁰Catyí ley can tyin tatushá yahvi nyivi itsi, cua coo cuui ñi ñayiví nyito. Maa tyin yuhu tsihí yu nuu Nyoo jahá ley can tyin ña tyaa yahvi yu itsi. Tyin catyí tsi tyin nyiví tsa ña tyaa yahvi itsi, taahán tsi cunaa ñi nuu Nyoo. ¹¹Cuatyi yu tsatiny can ley can, tan jandaví ñaha can tsi yu, tyin catyí ley tyin tatushá yahvi yo itsi, taahán tsi cunaa yo nuu Nyoo.

¹²Ley can ii xaan tsi tyin tuhun tsahá maa Nyoo cuví tsi, tan tandihí tsa catyí ra tyin javahá yu, vaha tsi, tan cuiti xaan tsi. ¹³Tan ñavin ley vaha ihya jacunaa tsi yu. Tyin tsa ña vaha tsa javahá yu, yacan jacunaa tsi yu. Yacan cuenda cunaq yu nuu Nyoo tyin ley vaha can janahá tsi yu tyin cuatyí cuví tsa javahá yu tsa ña vaha. Tacan tucu vityin ley can janahá tsi tsi yo tyin yaha xaan ña vaha cuvi cuatyí javahá yu.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴Tan tsitó yo tyin maa Tatyí Ii Nyoo tsahá ley can, yacan cuenda vaha tsi. Maa tyin yuhu iyó cuatyí yu tyin ra ñayiví cuví yu. Javahá yu tsa caquíñi tyin maa cuatyí can ndacá ñaha tsi yu. ¹⁵Ña cutuñi iñi yu náa taahán yu, tyin tsa vaha tsa cuñi yu javahá yu, ña javahá yu can. Maa tyin javahá yu tsa ña vaha tsa ña cuñi yu javahá yu. ¹⁶Tan tsa javahá yu tsa ña cuñi yu javahá yu, tsihin yacan nacotó yu tyin ley Nyoo vaha tsi. ¹⁷Yacan cuñi tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha. ¹⁸Yuhu tsitó

yu tyin cuñu ñuhu yu nduve tsa vaha iyó. Vasú ndi maa cuñí yu javaha yu tsa vaha, ña cuví javaha yu can.¹⁹ Na javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu.²⁰ Tan tatum javahá yu tsa ña cuñí yu javaha yu, ñavin ca maa yu javahá can, tyin cuatyi tsyi yihí ndaha tsi yu, yacan javahá can.

²¹ Nacotó yu tsa taahán yu: tun cuñí yu javaha yu tsa vaha, yatyi xaan ca javahá yu tsa ña vaha. ²² Tsitsi añima yu taahán xaan iñi yu ley Nyoo. ²³ Maa tyin iyó inga ley tan yacan yiñi ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yiñi ndaha can tsi yu tumaa yiñi ndaha ra vityi tsi iin ra nyiñi vehe caa.²⁴ ¹Ndahvi yuhu ra ndaahvi! ¿Yóo cua jacacu tsi yu ndaha tsa ña vahá tsa cuñí cuñu ñuhu yu tan ña cuhun yu anyaya?²⁵ Tsaahá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandíhi tsa ña vaha tsa cuñí cuñu ñuhu yu javaha yu, yacan cua quíñi ndaha tsi yu.

8

Tatyi li Nyoo jatinyeé tsi tsi yo tan cuví coo yo ñayivi tsaa

¹ Maa tyin vityin, Nyoo ña tatsi tuñi ca ra tsi nyivi tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyi li ra. ² Tacan tucu yoo, ña ndacá ñaha ca cuatyi tan tuhum tsiihi tsi yo tyin vityin ndacá ñaha Tatyi li Nyoo tsi yo. Tan juvin tsi tsahá ñayivi tsaa coo yo tsa cuenda tsa iin ñi cuví yo tsihin ra Cristo Jesús. ³ Nyoo javaha ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandíhi tsi cuhva iyó nyivi. Yacan cuenda Nyoo jaquitsi ra tsi Sehe ra. Cuví ra tumaa rayii ñuu ñayivi tan tyahvi ra tsa cuenda cuatyi yo tyin tacan tan cundíhi tsa javahá yo cuhva cuñí cuñu ñuhu yo. ⁴ Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyi li Nyoo.

⁵ Nyivi tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa

tyin nyivi tsa iyó cuhva cuñí Tatyi li Nyoo tsicá iñi ñi cuhva cuñí Tatyi li Nyoo. ⁶ Nyivi tsa tsicá iñi maa ñi maa tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyi li ra, cua coo yo ñayivi tsaa, tan cua coo tsa taxin añima yo. ⁷ Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can. ⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

⁹ Maa tyin nyoho ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyi li Nyoo, tun nditsa tsa iyó Tatyi li Nyoo añima ndo. Nyivi tsa nduve Tatyi li ra Cristo iyó añima, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo añima ndo, nyitó añima ndo tyin janduvaha Nyoo tsi ndo nuu ra. Maa tyin cuñu ñuhu ndo tumaa tsa tsihí tsi jahá cuatyi. ¹¹ Nyoo janandoto ra tsi ra Jesús tsa yahá tsihí ra. Tan tacan tucu nyoho, tatum iyó Tatyi li ra añima ndo, cua janandoto ra cuñu ñuhu ndo tsihin Tatyi li ra tsa iyó añima ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo. ¹³ Tyin tatum maa ñi maa cuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatum tsihin Tatyi li Nyoo tan cuahán jandíhi ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

¹⁴ Tyin tandíhi yoo tsa javahá cuhva jaquihín ityi Tatyi li Nyoo, sehe Nyoo cuví tsi yo. ¹⁵ Nyoho ña naquihín cuenda ndo Tatyi li Nyoo tsa cundaca ñaha tsi ndo tan cuvi ndo tumaa musu. Tyin naquihín ndo Tatyi li Nyoo tsa tsahá tsa cuvi ndo sehe Nyoo. Tan juvin ñi Tatyi li Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. ¹⁶ Tan Tatyi li ra tsa naquihín yo ndu iin tsi tsihin tsa nyito yo tan jacotó tsi naha tsi tsyi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quíñi cua tahan tsi, Nyoo cua jacobina ra tsi yo iin caa ñi tsihin ra Cristo.

¹⁸ Tsító yu tyin tundoho tsa nyehé yo vityin, luhlu cuii ñii cuví tsi tan ña cuví jandu inducu yo itsi tsihin tsa sii caá tsa cua nyehe yo quívi tahan tsi. ¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñi tsi naha tsi nyehe tsi naha tsi tsi nyiví cuví sehe ra. ²⁰ Tandihí tsa javahá ra, tsa iyó nu ñuhu ñayíví tan andivi, tsa tíví tsi. Vasu ña cuñi tsi tíví tsi, maa tyin Nyoo tsahá ra tsa tíví tsi tsa cuenda cuatyí tsa javahá nyiví. Maa tyin catyi ra tyin coo quívi cua ndutsaa nyico tsi. ²¹ Tandihí tsa javahá Nyoo tan cua ndutsaa tsi inga tsaha, cua quita nuñá tsi tan ña cua tíví ca tsi, tyin cua nasama Nyoo cuhva caá tsi vityin. Tan sii xaan cua cuñi tsi iin caa ñi tsihin tandihí sehe Nyoo tyin ña cua tíví ca tsi.

²² Tsító yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoó tsa naquihín cuenda Tatyi li tsa tsaha jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñi yo tsa tahan ñi tsi quívi tsa nasama Nyoo cuhva iyó cuñi ñuhu yo tan nyehé tandihí tsa javahá ra tyin cuví yo sehe ra.

²⁴ Vasu ndi maa ñaha ca ñihí yo tandihí can maa tyin tsító yo tyin cua ñihí yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatum tsa nyehé yo tsa ndatú yo, nduve yahvi nyáa cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihí yo tsa ña nyehé yo, cuñi tsi tsa cunyee iñi yo cuatu yo can.

²⁶ Tan juvin ñi tacan jatyineé Tatyi li Nyoo tsi yo tun nduve tunyee iñi iyó tsi yo tan ña tsító yo nácaa ndacan tahvi yo tsi Nyoo cuhva taahán maa tsi. Tatyi li tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñi iñi yo. ²⁷ Tsító maa Nyoo náa iyó añima yo, tan tsító ra náa tsicán Tatyi li ra, tsa cuenda yoo tsa cuví yo nyiví ra tyin tsicán tsi cuhva cuñi maa ra ndacan yo tsi ra.

Tsa cuenda ra Cristo tan cuví jaha canaa yo siquí tundoho

²⁸ Tsító yo tyin tandihí tundoho tsa nyehé nyiví tsa cuñi tsi Nyoo jatyineé can tsi ñi, tyin maa Nyoo cuví ra nacatsí tsi ñi, tumaa cuhva tyaa maa ra cuhva. ²⁹ Tyin nda quívi jihna ñi, tan tsa tsító Nyoo yóo nyiví cua cunyicun tsi ra. Tan tyaa ra cuhva tyin cuví ñi sehe ra tan coo ñi cuhva cuñi ra. Maa

tyin ra Jesucristo cuví ra cua cuvi ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo. ³⁰ Tan ñi tsa tyaa Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihín cuenda ra tsi ñi tumaa tsatayin vaha ñi. Tan ñi tsa naquihín cuenda ra tsahá ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatum Nyoo tan nyaá ra tumañi iñi tsihin yo, ¿yóo cuví jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsahá cuenda ra tsi ra tyin cíu ra tsa cuenda tandihí yo. Tun tacan tsahá ra Sehe ra tsa cuenda yo, ¿a ña cua cuhva ra tandihí ca tsa tsiní ñuhu tsi yo? Cuhva ra. ³³ ¿Yóo cuví xico ñaha tsi yo tsa cuví yo nyiví nacatsí Nyoo? Yoñi. Tyin Nyoo tsa naquihín cuenda ra tsi yo tumaa tsatayin vaha yo. ³⁴ ¿Yóo cuví catyi tyin cuhun yo anyaya? Yoñi. Tyin ra Cristo tsa tsihí ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuví quihin nyaa tsa cuñi xaan ra Cristo tsi yo. ¿A cuví quihin nyaa tundoho itsi, a tsisihi, a tsa caahán nyiví tsi yo tsa cuenda tuhun Nyoo, a tama, a tun nduve jahma yo, a tsa yuhví, a tuhun tsiihi? Ndi intuhun tsehe tan ña cuvi quihin nyaa can tsa cuñi ra Cristo tsi yo. ³⁶ Tumaa catyí nu tutu Nyoo tyehen:

Jutu Mañi yu, tandihí ñi quívi tan cuñi nyiví cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyí tsi.

³⁷ Vasu ndi maa cuaha tundoho yahá yo, maa tyin tandihí ñi tsaha tsa nyehé yo tundoho tan jahá canaa yo, tyin ra tsa cuñi xaan tsi yo jatyineé tsi yo. ³⁸ Yacan cuenda tsító vaha yo tyin nduve maa náa cuví quihin nyaa tsa cuñi xaan Nyoo tsi yo. Ndi tuhun tsiihi, ndi ñayíví iyó yo, ndi ángel, ndi tatyi ña vaha, ndi tsa cuví vityin, ndi tsa cua cuvi ityi nuu ca, ndi intuhun can tan ña cuvi jandusiín can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cumu, ndi inga tsa javaha Nyoo, ña cuví jandusiín can tsi yo tsihin Nyoo, ra tsa cuñi xaan tsi yo tsa cuenda ra Cristo Jesús Jutu Mañi yo.

9

Nyoo nacatsí ra tsi nyíví Israel

¹Yuhu tsinú iñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá iñi yu. Yacan cuenda tsító vaha yu tyin tsa nditsa caahán yu tun catyí yu ²cuihyá xaan cuñí yu tan uhvi xaan cuñí añima yu ³tsa cuenda nyíví ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatayin cuví cacu ñi tsihin can. ⁴Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuví ra tsi ñi, tyin tsinyaq ra tsihin ñi. Tan ndog ra tuhun tsihin ñi, tan tsahá ra ley ra tsi ra Moisés na cuhva ra tsi ñi. Tan janahá ra tsi ñi nácaa cuví ra tsa jacobnu ñi tsi ra. Tan catyí ra tsihin ñi nácaa cuu javaha ra tsa vaha tsihin ñi nu cuahán ca tsi. ⁵Tata tsii tsahnu yo cuví tsi ñi, tan tacan tucu ra Cristo cuenda cuñú ñuhu ra. Ra ican cuví Nyoo. Tan juvin ra ndacá ñaha tandíhi tsa iyó. ¡Na jacobnu yo tsi ra tacan ñi maa! ¡Tan na cuvi tsi tacan ñi!

⁶¿A catyí yu tyin ña javahá Nyoo tumaa cuhva catyí ra tsihin nyíví Israel tahán tsanaha? Ñavin. Cuñí tsi coto yo tyin ña tandíhi nyivi Israel tan cuví ñi nyíví Israel tsa nditsa. ⁷Tan tacan tucu ña tandíhi tata ra Abraham tan cuví ñi tata ra tsa nditsa. Tyin tsa cahñu Nyoo tsihin ra, cahñan tsi tuhun intuhun ñi sehe ra. Tyin catyí Nyoo tsihin ra tyehen: “Tsa cuenda ra Isaac sehe un tan cua coo nyíví tata un.” ⁸Tsehe janahá tsi yo tyin ñavin tsa cuenda tsa cuví ñi nyivi tata ra Israel tan cuví ñi nyíví Nyoo. Tyin nyivi tsa tsinú iñi tsa cahñu Nyoo tyin cua javaha ra, ñi ican cuví sehe ra. Tumaa ra Abraham, tyin ra Abraham tsinú iñi ra tsa cahñu Nyoo tsihin ra ⁹Tan tyehen cahñan Nyoo tsihin ra: “Tyembu vityin inga cuiya, cua quisí nyico yu nu yucú ndo tan ña Sara tsa iyó iñi sehe ña tacan”, catyí Nyoo tsihin ra.

¹⁰Tan ñavin yacan ñi. Tyin cahñan ndihi tucu ra tuhun ra Esaú tan ra Jacob, sehe ña Rebeca, iñi ñi jutu ra naha, ra cuví tsii tsahnu yo, ra Isaac. ¹¹⁻¹²Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyí Nyoo tsihin ña Rebeca tyin ra Esaú,

sehe nuu ñia, cua cuvi ra musu ra tsa tsinu uvi. Javahá Nyoo tacan tyin nacatsí ra tsi nyíví tsa cuñí maa ra nacatsi ra, tan ñavin tsa cuenda tsa javahá ñi. ¹³Tumaa catyí ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

¹⁴¿Tun tacan náa cua catyí yo? ¿A catyí yo tyin ña vaha tsa javahá Nyoo? ¡Ña cuvi! ¹⁵Tyin catyí ra tsihin ra Moisés: “Cua cundaahví iñi yu yóo nyíví cuñí maa yu cundaahví iñi yu.” ¹⁶Tacan javahá ra; cundaahví iñi ra tsi nyíví tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahví iñi yóo cuñí maa ra. ¹⁷Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaha yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandíhi nyíví yóo ra cuví yuhu”, catyí Nyoo. ¹⁸Tan tsihin tsehe tsító yo tyin Nyoo cundaahví iñi ra tsi nyíví cuñí maa ra. Tan jandundavá tucu ra añima nyíví cuñí maa ra jandundavá ra añima.

¹⁹Tan vasiquí yootho cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaa Nyoo cuatyí siquí ñi? ²⁰Maa tyin ña vaha tun tsicá iñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yootho tan nacahan un nu caahán Nyoo? ¿A cuví catyí iñi quisí tsihin ra javaha itsi: “Ña taahán iñi yu cuhva javahá un tsi yu”? Ña cuví. ²¹Tyin nyíví tsa javahá ndaha tysiñu, iyó ndatu tsi ñi tsa javahá ñi náa cuñí maa ñi tsihin ñuhu quisí can. Tan iñi ñi ñuhu quisí can tsatyiñu ñi juvin ñi tsihin can javaha ñi quisí vaha tan quisí peehe.

²²Ña cuví catyí yo tyin ña vaha Nyoo tsa cuenda tsa tsatyiñu ra tsi nyíví tsa cuahun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuni ra tsi nyíví caquiñi. ²³Javahá ra tacan tyin tacan tan coto yoo tsa cuví yo nyíví tsa cundaahví iñi ra tyin nda tsanaha tan tsa nacatsí maa ra tsi yo tyin cuhva ra tsa cahñu cuví ra tsi yo. ²⁴Yacan cuenda nacatsí ra tsi yo. Tan yiñí yo cuví yo nyíví Israel, tan nyíví tsa ñavin ñi Israel cuví. ²⁵Tumaa catyí

Nyoo nu tutu tsa tyaa ra Oseas:
 Nyiví tsa ñavin nyiví ñuu yu cuví cua catyi
 yu tyin nyiví yu cuví ñi.
 Ñi tsa ña cuñi yu, cua cuñi yu tsi ñi, catyi
 Nyoo.

²⁶ Tan nu catyi¹ Nyoo: “Nyoooho ñavin nyiví yu cuví ndo.” Juvín ñi ican cua catyi ra tsihin ñi: “Yuhu cuví Nyoo nyito, tan nyoooho cuví sehe yu.” ²⁷ Maa tyin ra Isaías catyí ra tyehen tsa cuenda nyiví Israel: “Vasu ndi maa cuaha xaan nyiví tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu.” ²⁸ Tan tsa yatinyin cuii cua jandaa Jutu Mañi yo tandíhi tsa cahan ra tan cua tatsi tuñi ra tsi tandíhi nyiví iyó nu ñuhu ñayivi.” ²⁹ Tumaa catyí tucu ra Isaías tahan tsanaha:
 Tun tsatinyin Jutu Mañi yo, ra ndacá ñaha
 tandíhi tsa iyó andívi, tan ña jacacu
 ra tsi juhva yo, tsa naq tandíhi yo,
 Tumaa naq nyiví ñuu Sodoma tan ñuu Go-
 morra tahan tsanaha.

Nyiví Israel ña ñihí ñi cuhva nduvaha ñi
 nuu Nyoo,

³⁰ ¿Náa cua catyi yo? Nyiví tsa ñavin ñi Israel cuví, ña nducu ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatinyin vaha ñi tsa cuenda tsa tsinú iñi ñi tsi ra. ³¹ Tan nyiví Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñi ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduvá ñi cuví can. ³³ Yuu can caahán Nyoo tuhun nu tutu ra tan catyí ra: Tsaquín nyaa yu iin yuu nda ñuu Sión, tan
 janduvá tsi tsi nyivi.

Tan yuu can cuví ra Jesucristo.

Tan nyiví tsa tsinú iñi tsi ra tsa cuví yuu can,
 ñi cua nduva ñi, catyí Nyoo nu tutu

ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quitsi² ra tan javahá ra tandíhi tsa catyí ley, tyin tacan tan tandíhi nyiví tsa cua tsinú iñi tsi ra, naquihin cuenda Nyoo tsi ñi tumaa tsatinyin vaha ñi.

⁵ Catyí ra Moisés tyin cuví nduvaha nyiví nuu Nyoo, tatuñ tyaa yahvi ñi tandíhi tsa catyí ley, tyin tyaa ra tyehen: “Nyiví tsa tyaa yahvi tandíhi tsa catyí ley, cua coo ñi ñayivi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyi un: ¿Yóo cundaa andívi? tyin tun cahan un tacan cuñi tsi catyi tyin januu un tsi ra Cristo nda nu ñuhu ñayivi tan jacacu ra tsi yo.” Ña cahan un tacan tyin ra Cristo tsa yahá quitsi ra. ⁷ Tan ndi ña catyi un: “Cuñi tsi tsa nuu iin ra nda nu yucú ndiyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyi un tacan tyin tyehen catyí nu tutu Nyoo: “Tuhun Nyoo yatinyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihyah taahán tsi tsinú iñi ndo tyin juvin ñi tsi jacuahá tucu nyuhu. ⁹ Tatuñ catyi un tsihin yuhu un tyin ra Jesús cuví Jutu Mañi yo, tan tsinú iñi un tsihin añima un tyin Nyoo janandoto tsi ra tsa yahá tsihí ra, cua cacu un. ¹⁰ Tyin tsihin añima yo cuñi tsi tsinú iñi yo tsi ra Cristo tan cuvi nduvaha yo nuu Nyoo, tan tsihin yuhu yo cuñi tsi catyi yo tyin tsinú iñi yo, tyin tacan tan cacu yo. ¹¹ Tuhun Nyoo catyí tsi tyehen: “Ndi intuhun nyiví tsa tsinú iñi tsi ra tan ña cua tahan ñi ticanuu.” ¹² Tyin Nyoo inducú ñi cuñi ra nyehé ra tsi nyiví Israel tan nyiví inga ñuu. Tyin intuhun ñi maa ra ndacá ñaha tsi tandíhi yo. Tan nasocó ra tsi tandíhi nyiví tsa tsicán tahvi tsi ra. ¹³ Tyin tyehen catyí tuhun Nyoo: “Tandíhi nyiví tsa tsicán tahvi tsi Jutu Mañi yo cua cacu ñi.” ¹⁴ Maa tyin ȝnácaa cua ndacan tahvi ñi tsi ra tatuñ ñaha ca tsinú iñi ñi tsi ra? Tan ȝnácaa cua tsinú iñi ñi tsi ra tatuñ ñaha ca cuñi ñi tuhun ra? Tan ȝnácaa cua cuñi ñi tuhun ra tatuñ yoñi cahan tuhun ra tsihin ñi? ¹⁵ Tan ȝnácaa cuhun nyiví cahan ñi nácaa coo taxin nyiví, tatuñ yoñi jacuhun tsi ñi? Tumaa catyí nu tutu Nyoo: “Sii
 xaan cuví nu tsaa ñi caahán tuhun vaha.”

10

¹ Yañi, tsihin tsa niñ iñi añima yu tan tsicán tahvi yu tsa cuenda nyiví Israel tyin cuñi yu tsa cacu ñi. ² Tsanda cuví yu tyin cuñi ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyiví nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi

¹⁶Maa tyin ña tandihí nyivi tan tyaa yahvi ñi tuhun tsa jacacú Nyoo tsi yo. Tumaa catyí ra Isaías: “Jutu Mañi yu, yoñi cuñi tsinu iñi tuhun caahán ndi”, catyí ra. ¹⁷Yacan cuenda cuñi tsa tyaa soho jihna yo tuhun ra Cristo, tacan tan tsinu iñi yo tsi ra.

¹⁸Maa tyin tsicá tucu iñi yu: ¿A ña tsiní nyivi Israel tuhun Nyoo? ¡Tsiní ñi! Tumaa catyí nu tutu Nyoo:

Jutu Mañi yu, nyivi tsa jacotó tuhun un tsa jacotó ñi tuhun un naniñ cahnu nu ñuhu ñayivi,

tan ña nacoq ihñi ñi ndi intuhun ñuu luhlu, catyí tsi nu tutu Nyoo.

¹⁹Tan tsicá nyico tucu iñi yu: ¿A ña cutuñi iñi nyivi Israel tyin cua cacu nyivi tsa ñavin ñi Israel cuví? ¡Cutuñi iñi ñi! Tyin tsa jihna ñi ra Moisés tyaa ra tuhun cahan Nyoo tsihin ñi Israel nu tutu tyehen:

Nyooho, ndasi cua cuñi ndo tyin cua cuhva yu tsa vaha tsi nyivi tsa ñavin nyivi ñuu yu cuví.

Tan cua cùu ndo tisihi nyehé ndo tsi ñi, catyí Nyoo.

²⁰Tan ra Isaías cana iñi ra cahan ra: “Nyivi tsa ña nanducu tsi Nyoo, nañihí ñi tsi ra.

Tan janahá ra tsi ra tsi ñi tsa ña tsicá tuhun tuhun ra.”

²¹Tan tyaa tucu ra Isaías tuhun cahan Nyoo tsihin ñi Israel tyehen: “Tandihí ñi quivi cana yu tsi nyivi yu, na nacuhva cuenda ñi tsi ñi tsi yu, maa tyin ña tyaa yahvi ñi. Tan jandava xaan ñi iñi ñi”, catyí Nyoo.

11

Nyivi Israel tsa ñihí cuhva cacu

¹¿A ña cuñi ca Nyoo tsi nyivi Israel? Ñavin tsa ña cuñi ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu. ²Tahan tsanaha nacatsí Nyoo tsi ñi Israel tyin cuvi ñi nyivi ra. Tan vityin ñavin tsa jatsiyó cuii ra tsi ñi. ¿A ña ñuhú iñi ndo tyn catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyivi Israel tan tsicán tahvi ra tsi Nyoo tyehen? ³“Jutu Mañi yu, nyivi Israel tsahñi ñi tsi ra cuví ndusu yuhu maa un naha ra, tan tsaní ñi nu jahahnú nyivi tsi un. Tan intuhun ña maa yu ndoo, tan cuñi ndihí ñi cahñi ñi tsi yu”, catyí ra. ⁴Maa tyin nacahan Nyoo tan catyí ra tsihin ra Elías: “Ñavin maa ñi maa un

ndooy. Tyin utsa mil ca nyivi naquihín vaha yu, ñi tsa ña jahahnú maa tsitoh Baal”, catyí Nyoo tsihin ra. ⁵Tan juvin ñi tacan vityin, ndoo juhva nyivi jahahnú tsi Nyoo. Tan tsa cuenda tsa vaha Nyoo nacatsí ra tsi ñi tyin jaha ra tucahnú iñi tsi ñi. ⁶Tan ña jahá ra tucahnú iñi tsi yo tsa cuenda tsa javahá yo tsa vaha. Tyin tun tsatinyahá Nyoo tucahnú iñi tsi yo tsa cuenda tsa javahá yo tsa vaha, cuñi tsi catyí tyin ña jacacú ra tsi yo tsihin tsa vaha ra.

⁷Tan ȝnácaa? Nyivi Israel nducu ñi cuhva nduvaha ñi nuu Nyoo, maa tyin ña ñihí ñi cuhva. Juhva ñi ñihí ñi cuhva. Tan ñi tsa ñihí cuhva can cuví ñi tsa nacatsí maa Nyoo. Tan ñi tsa ña ñihí cuhva cacu, ndundava añima ñi. ⁸Tumaa catyí nu tutu Nyoo tyehen: “Nyoo tsahá ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiní ñi. Tacan iyó ñi nda cuanda vityin.” ⁹Tan juvin ñi catyí tucu ra David tyehen:

Javahá ñi vico tan cusii iñi ñi, maa tyin yacan cua jativí tsi ñi.

Tan cua tatsi tuñi Nyoo tsi ñi tyin cuví can tumaa iñi trampa tsa cuenda ñi.

¹⁰Tan cua cuaa ñi na ña nyehe ca ñi tsa nditsa.

Tan nacoso tsa vee siquí ñi, catyí ra David tuhun nyivi Israel tsa ña tsinú iñi tsi Nyoo.

Nacaa nduvahá nyivi tsa ñavin ñi Israel cuví nuu Nyoo

¹¹Tan vityin tsicá tuhun yu: ¿A tsa cuenda tsa ña tyaa yahvi nyivi Israel tsa cahan Nyoo, tan ndoo cuui ñi tsa ña cua cacu ñi? Ñavin tsa ndoo cuui ñi. Ndog nuu ñi maa ñi, tyin jacacú jihna Nyoo tsi nyivi tsa ñavin ñi Israel cuví. Tyin tacan tan tsa cua nyehé ñi yacan, ndasi cuñi ñi tan natsinu ndihí iñi ñi tsi Nyoo. ¹²Tatun cuaha nyivi tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuvi nyico tandihí nyivi Israel nyivi Nyoo.

¹³Cuñi yu cahan yu juhva tsihin nyoooho tsa ñavin ñi Israel cuví. Ra Jesús tavá tyiñu ra tsi yu tsa quitsi yu nu iyó ndo. Tan tsitó yu tyin cuñi tsi tsa javahá yu tyiñu ihyá tyin cahnu xaan cuví tsi. Cahnu jahá yu itsi ¹⁴tan caahán yu tuhun Nyoo tsihin ndo

tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiquí tacan tan natsinu ndíhi iñi ñi tan cacu ñi. ¹⁵ Tyin tun tsa cuenda tsa ña natíñ cuenda Nyoo tsi nyivi Israel tan nduvahä iyó nyivi inga ñuu tsihin Nyoo, quíví cua naquihín cuenda ra tsi ñi cua cuvi tsi tumaa tsa cua nandoto ñi, tyin cuaha ca ñi cua tsinu iñi tan ñávin ca tsa jihna ñi. ¹⁶ Lin cuhuh tatuñ vaha quitá paan tsa javahä yo tsa jihna ñi tsihin yutsan paan, vaha tandíhi ca yutsan can. Tan tatuñ iñi yutoñ tan vaha tun, vaha tandíhi ca soco tun. Tacan tucu nyivi Israel nyaá yahvi ñi nuu Nyoo tyin tsii tsahnu ñi yiñi ra naha cuenda ra.

¹⁷ Tan nyivi Israel cuví ñi tumaa soco yutun olivo. Tan nyoho cuví ndo tumaa soco yutun olivo cuuhu. Tumaa tuhvá nyivi tsahnya iñi soco yutun tan natyáa ñi inga soco yutun, tacan javahä Nyoo tyin jatsiyo ra tsi nyivi Israel tan tyaq̄ ra tsi nyoho tsa cuví ndo nyivi inga ñuu. Tacan cuvi tan tsaa ndo cuví ndo nyivi cuenda Nyoo tan naquihín ndo tandíhi tsa vaha tsa iyó tsi ra. ¹⁸ Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatuñ tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiqúi cua catyí ndo: “Juvín, maa tyin Nyoo tsahnyá ra soco yutun can tan natyaa ra tsi nyuhu.” ²⁰ Nditsa. Maa tyin jatsiyo nuu ñi ra tsi nyivi Israel tsa cuenda tsa ña tsinu iñi ñi tsi ra. Tan tyacu ra tsi nyoho tsa cuenda tsa tsinu iñi ndo tsi ra. Yacan jahá ndo cuenda tsa ña nduyaa ndo tsihin can. ²¹ Tyin tatuñ ña jahá Nyoo tucahnú iñi tsi ñi tsa cuví soco vaha can, ndi nyoho tan ña cua jahá ra tucahnú iñi tatuñ ña tsinu vaha iñi ndo tsi ra. ²² Nyehé ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihín cuenda tumañi iñi tsa tsahá ra tsi ñi. Vaha iñi ra tsihin nyoho yacan tyaa yahvi ndo tsa vaha tsa tsahá ra tsi yo. Tyin tatuñ ña tyáa yahvi ndo itsi, cua jatsiyo nyico ra tsi ndo tsaha yutun olivo ra. ²³ Tyin tatuñ natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyo ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyoho tsa ñavin Israel cuví,

cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quíví cua cuñi ra iñi yaha ñi cua tyaa tahan nyico ra soco yutun vaha nu tsyaa jihna maa tsi.

Nyivi Israel cua cacu nda nu ndíhi

²⁵ Yañi, cuñi yu tsa coto ndo iñi tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundavá añima ñi, nda cuanda cacu tandíhi nyivi inga ñuu tsa nyaa tyin cacu. ²⁶ Tsa yaha cua cacu ñi, tacan tan cua cacu tandíhi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra. Tan cua quihin nyaa ra cuatyí nyivi ra

Jacob.

²⁷ Tuhun ihyá cuví tsa cua ndoo yu tsihin ñi quíví cua quihin nyaa yu cuatyí ñi, catyí Nyoo nu tutu ra.

²⁸ Cuxáán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyoho. Tahan tsanaha nacatí Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndíhi ra tsi nyivi Israel tyin tata ra naha cuví tsi ñi. ²⁹ Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyoho ña tyaa yahvi ndo tsi Nyoo. Maa tyin vityin tyáa yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyáa yahvi nyivi Israel tsi ra. ³¹ Nyivi Israel ña tyáa yahvi ñi tsi Nyoo vityin tumaa tsa ña tyaq̄ yahvi nyoho tsi ra tahán tsanaha. Maa tyin cua cundaahví iñi ra nyehé ra tsi ñi tumaa tsa cundaahví iñi ra nyehé ra tsi nyoho. ³² Yíhi tsaha tandíhi nyivi tan nacoó ñi tsa tyáa yahvi ñi tsi Nyoo. Tsahá ra ndatuñ tsi ñi tsa javahá ñi tacan, tyin tacan tan iñi caa ñi cua cuvi cundaahví iñi ra tsi tandíhi yo.

³³ ¡Cahnu xaan cuví tsa cuca tan tsa tsitó Nyoo tan tsa tsiní tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iñi sava quíví ña cua cutuñi iñi yo tandíhi cuhva javahá ra. ³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. ³⁵ Tyin yoñi cuví cuhva jihna iñi tsa vaha tsi ra, tan tsa cuenda can

tan cuita iñi ñi tyin cua naquihin ñi yahvi cuenda can.³⁶ Tyin tandíhi maa tsa iyó, maa Nyoo jahava itsi, tan iyó tsi tsa cuenda ra. ¡Na jacobnu yo tsi Nyoo tacan ñi maa! Tan na cuvi tsi tacan.

12

Najahava yo cuhva cuñi Nyoo tsihin ñayivi iyó yo

¹ Yacan cuenda yañi, tsító ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahví yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa jahava yo tacan janahá tsi tyin nditsa tsa jacobnu yo tsi ra. Yacan cuví tsa taahán iñi ra. ² Na coo ca ndo cuhva iyó nyivi ñuu ñayivi ihyá. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo jahava ndo tsa taahán iñi maa ra: náa ndihí tsa vaha tan tsuítí.

³ Nyoo, tsa cuenda tsa vaha iñi ra, tan tava tyiñu ra tsi yu tyin cuvi yu iin ra caca tyiñu ra Jesucristo. Yacan cuenda catyú yu tsihin tandíhi yoooho tyin ndi intuhun ndo tan ña caca iñi ndo tyin vaha xaan ndo. Maa tyin caca iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra. ‘Tumaa soho yo tan tinuu yo iin ñi cuví tsi tsihin tandíhi ca tahan tsi tsa iyó iin cuñu ñuhu. Tan tsa intuhun intuhun tsi siñ siñ tyiñu jahava tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siñ siñ ndatu tsahá Nyoo tsa intuhun intuhun yo, tsahá ra tsi yo ndáa tsa cuñi maa ra cuhva ra tsi yo, tan na cuatyíñu yo itsi. Tatum tsahá ra tsa cuvi yo ndusu yuhu ra, na tsinu iñi yo tyin tyiñu can tsahá ra tsi yo, tan na jahava yo itsi. ⁷ Tatum tsahá ra ndatu tsi iin yo tsa jatyinyee yo tsi nyivi, na jahava yo itsi tsihin tsa nii iñi añima yo. Tatum tsi inga yo tsahá ra tsa jacuahá yo tsi nyivi, na jacuahá yo tsi ñi tsihin tsa nii iñi yo. ⁸ Tatum tsahá ra tsi inga yo tsa cuví jandu iin yo iñi nyivi, na jandu iin yo iñi ñi tsihin tsa nii iñi añima yo. Tatum inga yo ñihí tsa jatyinyee yo tsi nyivi tsihin xuhun, na jatyinyee yo tsi ñi, maa tyin ña cuita iñi

yo tyin natyahvi ñi tsi yo. Tatum inga yo ñihí tsa jaquihín ityi yo tsi nyivi yihí cuenda Nyoo tsihin yo, na jahá yo cuenda cuhva jaquihin ityi yo tsi ñi. Tatum inga yo ñihí tsa jatyinyee yo tsi nyivi tsa iyó tsa tsiní ñuhu, na jatyinyee yo tsi ñi tsihin tsa sii cuñi yo.

Náa taahán tsi jahava nyivi yihí cuenda ra Cristo

⁹ Cuñi tahan ndo tsi ndo tsihin tsa nii iñi añima ndo. Ndasi cuñi ndo nyehé ndo tsa ña vaha. Tan cuanyicun ndo tsa vaha. ¹⁰ Cuñi tsi tsa cuñi tahan yo tsi yo tumaa tsa cuñi yo tsi nyivi yo. Tan tyaa yahvi tahan ndo tsi ndo tan jaña tahan ndo tsa ñayivi tsi ndo.

¹¹ Ndácu ndo tunyee iñi tsa iyó tsi Nyoo. Ña utsan jahá ndo tsi ndo. Tan jaña tyiñu ndo tyiñu Jutu Mañi yo tsihin tsa nii iñi añima ndo.

¹² Coo ndo ñayivi ihyá tsihin tsa sii, tyin tsító ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndácan tahvi ndo tsi Nyoo in nyita ñi.

¹³ Cuhva ndo tsa tsiní ñuhu tsi nyivi yihí cuenda Nyoo tsihin ndo. Vaha tyanuu ndo tsi nyivi tsaa vehe ndo.

¹⁴ Tatum caahán nyivi ndavaha ñi tsi ndo, vaha cahan ndo tsihin ñi, tan ña cahan ndasi ndo tsi ñi. Ndácan tahvi ndo tsi Nyoo tsa cuenda ñi, na nasoco ra tsi ñi.

¹⁵ Siñ cuñi ndo tsihin nyivi sii cuñi. Vacu ndo tsihin nyivi tsa tsacú jahá tucuihyá iñi.

¹⁶ Na cañi tahan ndo. Iin ñi cuvi ndo tsihin tahan ndo. Ña cahnu jaña ndo tsi Nyoo ndo; jandundaahvi ndo tsi ndo tumaa iyó nyivi ndaahvi; ña jaña ndo tsa tsító xaan ndo.

¹⁷ Na jahava ndo tsa ña vaha tsihin nyivi tsa jahava tsa ña vaha tsihin ndo. Jañiñi ndo tsi ndo tan jahava ndo tsa vaha tsihin tandíhi nyivi. ¹⁸ Ndácu ndo cuhva coo taxin ndo tsihin tandíhi nyivi. ¹⁹ Yañi, cuñi yu tsi ndo. Tatum jahava nyivi tsa ña vaha tsihin ndo, ña tañsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo. ²⁰ Tan juvin ñi catyí tucu ra: “Tatum nyivi xaan iñi tsi ndo tan tsisocó ñi, cuhva ndo tsa catsi ñi, tan tatum na ityi iñi ñi, cuhva ndo ndutyá

coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.”²¹ Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan caşı ndo nu vatsí tsa ña vaha tsihin can.

13

¹ Tandihi nyiví cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihi maa ra cumí tyiñu tan Nyoo tsaha tyiñu can tsi ra naha. Ra cumí tyiñu tsa iyó, maa Nyoo tsaha tsi ra naha tsa cuví ra naha tyiñu.² Yacan cuenda, nyiví tsa ña tyaa yahvi tsi ra naha, cuñí tsi catyí tyin ña tyaa yahvi ñi tsa caahán Nyoo. Ñi tsa javahá tacan, tsicoq cuatyí ñi tsa cuenda can, tan cua cutuñi ñi.³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyiví tsa javahá tsa vaha. Nyisó tyiñu ra naha tsa tatsi tuñi ra naha tsi nyiví tsa javahá tsa ña vaha. Tun ña cuñí un tsa jayuhvi ra cumi tyiñu naha ra tsi un, coo vaha, tyin tacan tan cua nyehe ra naha tyin vaha iyó un tan vaha nyiví cuví un.⁴ Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatuñi ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyiví javahá tsa ña vaha, tyin tyiñu can tyaa Nyoo tsi ra naha.⁵ Yacan cuenda ñiñi cuñí tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo.⁶ Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷ Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyiví tsa taahán tsi tyaa yahvi ndo. Jaha ndo tsa ñayiví tsi nyiví tsa taahán tsi jaha ndo tsa ñayiví tsi.⁸ Ña cunyaa cuenda ndo tsi ndi intuhun nyivi. Maa tyin cuñí tahan ndo tsi ndo, tyin tsa cuñí tahan yo tsi yo, javahá yo tandihi tsa catyí ley Nyoo tsa tyaa ra Moisés tyin javaha yo.⁹ Catyí ley Nyoo tyehen: “Tun iyó ñasiñhi

ndo o yíi ndo ña coo inga ñaha o rayii tsi ndo. Ña cahñi ndo. Ña súhu ndo. Ña cahan ndo cuendu siquí ndi intuhun nyivi.” Tandihi tsehe tan inga ca ley javahá ndo itsi tatan cuñí ndo tsi tahan ndo tumaa tsa cuñí ndo tsi maa ndo.¹⁰ Tatun cuñí ndo tsi tahan ndo, ña javaha ndo tsa ña vaha tsihin ñi. Tsihin tsa cuñí tahan yo tsi yo, javahá yo tandihi tsa catyí ley Nyoo tsa tyaa ra Moisés.

¹¹ Tsihin tuhun ihyá jaha ndo cuenda tsi ndo quivi iyó ndo vityin. Tyin tsa tahan tsi cuhva tsa taahán tsi ndoto yo. Tyin vityin tsa yatiny cuii ca cua cunuhu añima yo nu nyaá Nyoo tan ñavin ca quivi tsa quihví yo tuhun ra.¹² Tsa yahá tsa tsacuua, tan tsa cua tuvi. Yacan cuenda cuñí tsi jandihí ndo tsa javahá ndo tsa javahá nyiví iyó nu naa. Tan jaha tyiñu ndo tsihin tsa vaha tsa tsaha Nyoo tsi ndo; javaha ndo cuhva javahá nyiví iyó nu nditsin.¹³ Cuñí tsi cuití coo yo tyin nu nditsin Nyoo iyó yo. Tan ña coho ndo nyixi, ña javaha ndo vico tan coho ndo nyixi. Nyoho rayii, ña caca nuu ndo tsihin ñaha. Tan nyoho ñaha ña caca nuu ndo tsihin rayii. Ña coo viciu tsi ndo. Tan ña ndasí cuñí ndo nyehe ndo tsi nyiví. Tan ña nyivo iñi ndo tsa iyó tsi ñi.¹⁴ Maa tyin coo ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña caca iñi ndo javaha ndo cuhva cuñí cuñu ñuhu ndo.

14

Na ña cahan nyaa yo tsi nyivi

¹ Tatun iin nyiví yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahán ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi.² Cua cuhva yu iin cuhva tsi ndo: Tsa cuendajuhva nyiví cuví catsi maa ñi tandihi maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñí ñi. Ñi ihyá cuví ñi tsa ña ñihí vaha nyaá tsihin Nyoo.³ Maa tyin ñi tsa tsatsí tandihi can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihín cuenda ra tsi ñi can.⁴ Tan ñyó nyivi cuví yooho tan cahan nyaa un tsi musu inga ra? Tyin

tun vaha o ña vaha jayahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyiví jachahnú ñi iin quíví tan ñavin ca inga quíví. Tan tsa cuenda inga nyiví nduve quíví cahnu cuví tan quíví ña cahnu cuví. Inducu ñi quíví cuñí ñi, yacan cuenda intuhun intuhun maa yo tan cuñí tsi tyili tuñi vaha iñi yo. ⁶ Ñi tsa naquihín vaha quíví, naquihín vaha ñi can tsa cuenda tsa jachahnú ñi tsi Jutu Mañi yo. Ñi tsa ña naquihín vaha can, juvin ñi jachahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandíhi can, juvin ñi tsatsí tucu ñi tsa cuenda tsa jachahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsaha ra tsa catsi ñi. Tan ñi tsa ña tsatsí tandíhi, ña tsatsí ñi tsa cuenda tsa jachahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihí yo. ⁸ Tyin tatum iyó yo, iyó yo tsa jaha tyiñu yo tyiñu Nyoo. Tan tatum tsihí yo, tsihí yo tsa cuenda Jutu Mañi yo tan naquihín ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsihí yo. ⁹ Tyin ra Cristo tsihí ra tan nandoto ra tyin cundaca ñaha ra tsi nyiví nyito tan nyiví ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihín cuenda un tsi ra?, tan tsító vaha un tyin tandíhi yo tan cua tahan tsi quíví cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñí tsi cuiñi tsiti tandíhi nyiví nuu yu.

Tandíhi ñi tan cua nacoto ñi tsi yu tsa cuví yu Nyoo.

Tan nuu tandíhi nyiví cua jachahnú ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu jayahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyiví. Maa tyin nducu ndo

cuhva tsa ña janacava ndo tsi ñi nu cuatyí coto jandíhi ñi tsa tsinú iñi ñi tsi ra Cristo.

¹⁴ Yuhu tsító yu tyin cuvi catsi yo tandíhi tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandíhi, tsa cuenda maa ñi ña cuví catsi ñi can. ¹⁵ Maa tyin tatum tsa cuenda tsa tsatsí ndo tan ndasí cuñí yañi yo, ña nditsa tsa cuñí ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihí ra tsa cuenda ra. ¹⁶ Ña cuhva ndo tsa cahan nyiví ndavaha ñi siquí tsa tsaha Nyoo ndatu tyin catsi yo. ¹⁷ Tatum ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tsihin tsa sii cuñí yo, tan taxin iyó añima yo jahá Tatyi li ra. ¹⁸ Nyiví jahá tyiñu tyiñu ra Cristo tacan, sii cuñí Nyoo nyehé ra tsi ñi, tan tacan tucu nyiví sii cuñí ñi nyehé ñi tsi ñi.

¹⁹ Yacan cuenda cuñí tsi jañiñi yo tsi yo tan coo vaha yo tsihin nyiví. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo. ²⁰ Ndi intuhun ndo tan ña jatívi ndo tyiñu jahá Nyoo tsitsi añima inga nyiví tsihin tsa tsatsí ndo. Nditsa tyin tandíhi tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatum tsihin can janacava yo tsi nyiví nu cuatyí. ²¹ Yacan cuenda, vaha tsa ña catsi yo cuñú, ndi ña coho yo vinu tatum ndasí cuñí yañi yo nyehe ra tyin jayahá yo can. Na ña janacava yo tsi ra yañi yo nu cuatyí. Na ña casí yo nu tsinú iñi ra tsi Nyoo tsihin iin tsa jayahá yo. ²² Cuhva tsa tsinú iñi yo tsa cuenda tandíhi yacan ña cahan yo tuhun can tsihin inga nyivi. Na coto intuhun ñi maa yo can tsihin Nyoo. Sii xaan cuñí yo tatum ña uvi tsicá iñi yo jayahá yo tsa tsahá Nyoo ndatu tyin jayahá yo. ²³ Maa tyin nyiví tsa tsatsí ñáa tsatsí, tan uvi tsicá iñi ñi, tsico cuatyí ñi tyin ña tsinú vaha iñi ñi tyin cuví catsi ñi can. Tan tandíhi tsa jayahá yo tsihin tsa ña tsinú iñi yo tyin tsahá Nyoo ndatu jayahá yo can, cuatyí cuví.

15

Na jayahá yo tsa taahán iñi nyiví yiñí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñí tsi tsa jatyinyee yo tsi nyiví tsa ñaha ca tsinú

vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñi tsi tsa javaha yo cuhva taahán iñi inga nyivi tatuñ cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. ³ Tyin ndi ra Cristo tan ña javaha ra cuhva taahán iñi maa ra, maa tyin tahan ra tumaa catyí nu tutu Nyoo tyehen: "Tandihi tsa ndavaha ñi tsa cahan nyivi siquí Nyoo, siquí ra Cristo ndoo can", catyí tsi. ⁴ Tyin tandíhi tsa tsinyaa nu tutu Nyoo tahan tsanaha, tsinyaa tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyee iñi yo cuatu yo tsa cua cuhva Nyoo tsi yo. Tyin tun cahvi yo itsi jandu iñi tsi iñi yo. ⁵ Tan juvin ñi maa ra tsahá tsa cunyé iñi yo cuatu yo, tan tsahá ra tsa vaha cuñi añima yo. Na jatyinyee ca ra tsi yo coo vaha yo tan iñi cuvi yo tumaa taahán iñi ra Cristo Jesús. ⁶ Tacan tan tandíhi yo iñi caa ñi jacobnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacobnu yo tsi Nyoo. ⁸ Tan catyí yu tsihin ndo: ra Cristo quitsí ra quitsí jatyinyee ra tsi nyuhu tsa cuví nyivi Israel, tyin tacan catyí Nyoo tsihin tsii tsahnu ndi tyin cua javaha ra. Tan tacan janahá ra Cristo tyin tandíhi tsa catyí Nyoo tyin cua javaha ra, javahá ra itsi. ⁹ Quitsí ra Cristo tyin tacan tan jacobnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacobnu yu tsi un tan
cua nyehe tandíhi nyivi tsa ñavin ñi
Israel cuví.

Cua jacobnu yu tsi un tan cata yu yaa tsa
cuenda un, catyí tsi.

¹⁰ Tan inga tucu nu catyí tsi tyehen:
Nyoho tsa ñavin ñi Israel cuví, sií cuñi ndo
tsihin ñi Israel, nyivi Nyoo.

¹¹ Tan inga tucu nu catyí tsi tyehen:
Jacobnu ndo tsi Jutu Mañi yo, nyoho nyivi
tsa ñavin ñi Israel cuví.

Cata tandíhi ndo yaa tan jacobnu ndo tsi ra.

¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuvi tata ra Isaí.
Cua quitsí ra cua cundaca ñaha ra tsi nyivi
tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.
¹³ Juvin ñi maa Nyoo tsahá tunyee iñi tsi
yo tan tsító yo tyin cua cuhva ra tsa cuhva
ra tsi yo. Na jacutu ra tsi ndo tsihin tusiñ iñi
ra. Tan na coo taxin añima ndo tsa cuenda
tsa tsinú iñi ndo tsi ra, tyin tacan tan tsihin
tunyee iñi Tatyí Ii ra tan cuita vaha iñi ndo
tyin cua ñihi ndo tsa cua cuhva ra tsi ndo.

¹⁴ Yañi, tsító vaha yu tyin nyoho vaha iñi
ndo tan cutuñi vaha iñi ndo, tan tsító vaha
ndo cuhva cuhva cuenda tahan ndo tsi ndo.

¹⁵ Maa tyin nu carta ihyá ñihi xaan caahán
yu siquí juhva tsa tyaa yu tyin tacan tan
ña naa iñi ndo can. Tyehen javahá yu tsa

¹⁶ cuenda tyin Nyoo tsahá ra tsa vaha ra tsi yu
tsa jaha tyiñi yu tyiñi ra Jesucristo nu iyó
nyivi tsa ñavin ñi Israel cuví. Tan tyiñi tsa
javahá yu cuví tsa caahán yu tuhun Nyoo
nácaa jacacú ra tsi nyivi. Tyehen javahá yu
tyin tacan tan cuví cuhva cuenda yu tsi ñi
tsi Nyoo tan cuvi ñi iñi ofrenda tsa taahán
iñi ra, tyin tsa nduvahá ñi nuu ra jahá Tatyí
Ii ra.

¹⁷ Yahu tsa tsinú iñi yu tsi ra Cristo Jesús,
sií cuñi yu jahá tyiñi yu tyiñi Nyoo tyin
tsító yu tyin tyiñi vaha javahá yu. ¹⁸ Yahu
ña caná iñi yu cahan yu tsa ña javahá ra
Cristo tsihin yu. Maa tyin tsahá cuenda yu
tsi ndo tyin nyivi tsa ñavin ñi Israel cuví,
tsinú iñi ñi tsi Nyoo tyin Nyoo tsatiyñi ra
tsi yu tan vityin tyaa yahvi ñi tsi ra tsa
cuenda tsa tsinú iñi ñi tuhun cahan yu tan
nyehé ñi tsa javahá yu ¹⁹ tsihin tunyee iñi
seña tan tsa iyo tsa javahá yu jahá Tatyí Ii
Nyoo. Tsihin tandíhi yacan cunyee cahan
yu tuhun ra Cristo tan nácaa jacacú ra tsi
yo tsihin nyivi. Quitsahá yu nda Jerusalén
tan inga ca ñuu nda cuenda tsaa yu ñuu
tsa cayucú Ilírico. ²⁰ Tacan nducu yu cuhva
caahán yu tsa jacacú ra Cristo tsi yo nu ñaha
ca coto nyivi tuhun ra, tyin ña cuñi yu jahá
tyiñi yu nu tsa yaha cahan inga ra tuhun ra
Cristo. ²¹ Tumaa catyí nu tutu Nyoo tyehen:
Nu nduve maa tuhun Nyoo iyó, cua tsaa
tuhun Nyoo
tan cua cutuñi iñi nyivi iyó can itsi, catyí tsi.

*Nu tyaa ra Pablo cuhva tyin cuhun ra ñuu
Roma*

²² Yacan cuenda ña cuvi quitsí yu quitsí
nyehé yu nu yucú ndo, vasu ndi maa cuaha

xaan tsaha cuñi yu quitsi yu. ²³ Maa tyin vityin tsa ndihí jahá tyiñu yu ityi ñuu ihyá. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quívi tsihinndo. ²⁴ Nyehe jihna yo tatum cuvi yaha yu nu yucú ndo quívi cua cuhun yu España. Tsa yaha tsa cunyii yu juhva quívi tsihinndo, nyehe yo tatum cuvi jatyinyee ndo tsi yu tan tsaa yu nu cuhun yu. ²⁵ Maa tyin vityin cuahán yu ñuu Jerusalén tan nyiso yu ofrenda tsa cuenda nyivi yihí cuenda ra Cristo tsa iyó ndacan. ²⁶ Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tavá ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. ²⁷ Tyehen cuñi ñi javahá ñi. Tan nditsa tyin taahán tsi javahá ñi tacan. Tyin nyivi Israel, ñi tsinú iñi tsi ra Cristo, tsaha ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi. ²⁸ Yacan cuenda, tatum tsa yaha jandaa yu tysiñu ihyá, tan tsa yaha nacuhva cuenda yu xuhun ihyá tsi nyivi Jerusalén, tacan tan cuhun yu nda España tan cua yaha yu nu yucú ndo. ²⁹ Tsitó vaha yu tyin quívi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyi li Nyoo tsaha tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tysiñu jahá yu. ³¹ Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tiin cuenda vaha ñi ofrenda tsa ndahá yu. ³² Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa sii cuñi yu tan cuví quitatu vaha yu. ³³ Tan Nyoo, ra tsahá tsa taxin coo aíma yo, na cunyaa ra tsihin tandihí ndo. Tan na cuvi tsi tacan.

16

Nu tsaha ra Pablo nacumi tsi nyivi vaha iñi tsi ra

¹Jacotó yu tsi ndo tyin ña hermana Febe jatyinyéé xaan ña tsi nyivi yihí cuenda Nyoo ñuu Cencrea. ² Náquihin vaha ndo

tsi ña tumaa naquihín Jutu Mañi yo tsi yu, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihí tsa tsiní ñuhu tsi ña, tyin maa ña cuaha xaan nyivi jatyinyéé ña, tan nda cuanda maa yu.

³Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tysiñu yu cuenda ra Cristo Jesús. ⁴Tsahnya iñi ñi ñayivi ñi quívi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi. ⁵Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinu jihna iñi tsi ra Cristo ityi Acaya. ⁶Cuhva ndo nacumi tsi ña María. Jahá tysiñu xaan ña nu yucú ndo. ⁷Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tysiñu jahá tysiñu ra naha cuenda Jutu Mañi yo tsihin tandihí ca ra jahá tysiñu cuenda Nyoo. Tan jihna ca ra naha natsing iñi tsi ra Cristo tan ñavin ca yuhu.

⁸Cuhva ndo nacumi tsi ra Amplias ra vaha iñi tsi yu cuenda Jutu Mañi yo. ⁹Cuhva ndo nacumi tsi ra Urbano, ra yañi yo cuenda tysiñu ra Cristo Jesús, tan tacan tucu ra Estaquis, ra yañi yu. ¹⁰Cuhva ndo nacumi tsi ra Apelles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyivi ra Aristóbulo. ¹¹Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo. ¹²Vatsí nacumi tsi ña Trifena tan tsi ña Trifosa, ñi tsa jahá tysiñu tysiñu Jutu Mañi yo. Tan ña hermana Pésida, ñaha tsa jahá tysiñu xaan tysiñu Jutu Mañi yo. ¹³Cuhva ndo nacumi tsi ra Rufo, iñi ra cahnu cuví ñuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. ¹⁴Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. ¹⁵Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihí ñi yihí cuenda Nyoo tsa yucú tsihin ñi.

¹⁶Cuhva tahan ndo nacumi tsi ndo.

Tandihi nyiví yihí cuenda ra Cristo tsa iyó ity ihyá jaquitsí ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñí jasiín tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhvá ndo tuhun ra Cristo. Ña cutahan ndo tsihin ñi can. ¹⁸Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñí maa ñi javahá ñi. Tan jandahví ñaha ñi añima nyiví ndaahvi tsihin tsa vita caahán ñi. ¹⁹Tandihi nyiví tsító ñi tyin tyaá yahvi ndo tsi Nyoo. Yacan cuenda sii xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha. ²⁰Nyoo ra iyó tandihi tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siquí nu. Na nasoco Jutu Mañi yo Jesucristo tsi ndo.

²¹Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihi ra ñuu yu can jaquitsí ra naha nacumi tsi ndo.

²²Yuhu ra Tercio javahá yu tutu ihyá tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³Jaquitsí tucu ra Gayo nacumi tsi ndo. Vehe ra iyó yu. Juvin ñi ihyá ndú iin tandihi ñi yihí cuenda Nyoo. Ra Erasto ra cuví tesorero ñuu ihyá, jaquitsí ra nacumi tsi ndo, tan yañi yo ra Cuartu tucu.

²⁴Na ndoo Jutu Mañi yo Jesucristo tsihin tandihi ndo. Tan na cuvi tsi tacan ñi.

Nu ndihí caahán ra Pablo tan jacahnú ra tsi Nyoo

²⁵Tan vityin na jacobino yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandahví ndo tsa tsinú iñi ndo tuhun ra tsa jacobino yo. Tsehe cuví tuhun caahán yu tan tuhun tsa jacahá yu tsa cuenda ra Jesucristo. Iin ñi cuví tsi tsihin tuhun tsa ñuhu xeehe tahan tsanaha nda ndi cumañi ca tsinú ñuhu ñayiví. ²⁶Maa tyin vityin jacahá Nyoo tsi yo tsa cuenda tutu tsa nacoq ra cuví ndusu yuhu ra, ra tsahá cuenda tuhun ra tahan tsanaha. Catyí Nyoo, ra tsa ña cua cundihí maa, tyin vityin taahán tsi coto tandihi nyiví tyin tacan tan tsinú iñi ñi tsi

ra tan tyaá yahvi ñi tsa caahán ra. ²⁷Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandahví yo tsa jacahnú yo tsi ra tsa cuenda ra Jesucristo.

Tan na cuvi tsi tacan ñi.

Carta Tsa Jihna Ñi Jacuhún Ra Pablo Tsi Nyívi Yihí Cuenda Nyoo Ñuu Corinto

*Nu tyáá ra Pablo iin carta tsa cuenda nyívi
yihí cuenda Nyoo ñuu Corinto*

¹ Yuhu ra Pablo, cana Nyoo tsi Yu tyin caca yu tyiñu ra Jesucristo. Yuhu tsihin ra Sóstenes, re yañi yo, ² jaquitsí ndi carta ilhya tsi ndo tsa yucú ndo vehe ñuhu cuenda Nyoo ñuu Corinto. Nyívi Nyoo cuví ndo vityin, tyin tsa ndu ^{iñ} ndo tsihin ra Cristo Jesús. Nyoo cana ra tsi ndo tyin nanduvi ndo nyívi vaha cuenda ra, tsihin tandíhi nyívi tsa jachahnú tsi Jutu Mañi yo Jesucristo tandíhi ñi ity. Tyin cuví ra Nyoo cuenda ñi tan cuenda tucu maa yo. ³Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añima ndo.

*Nacaa nasocó Nyoo tsi nyívi yihí cuenda
ra*

⁴Tandíhi ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu ^{iñ} ndo tsihin ra Cristo Jesús. ⁵Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndíhi tucu ra tsa coto xaan ndo. ⁶Tan tandíhi tuhun ra Cristo tsa cahan ndi tsihin ndo tsa ndunditsín tsi tyin tsa nasama ndo cuhva iyó ndo. ⁷Tan yacan cuenda nduve tsa cumañi tsi ndo tyin iyó tandíhi tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. ⁸Nyoo cua jaha cuenda ra tsi ndo nda cuanda naa ñuhu ñayívi tyin tacan tan yoñi cuví tyaacuati tsi ndo quivi cua quitsi Jutu Mañi yo Jesucristo. ⁹Nyoo tacan ñi maa javahá ra cuhva catyí ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

*Nyívi yihí cuenda Jutu Mañi yo, ña vaha
quita siín ñi*

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusíin ndo. Tan iin ñi cuhva caca iñi ndo, tan iin ñi tuhun quíhi iñi ndo. ¹¹ Caahán yu tacan tsihin ndo, yañi, tyin catyí nyívi ra Cloé tsihin yu tyin iyó tsihi nu yucú

ndo. ¹²Tyin nyoho siín siín cuhva caahán ndo. Yihí ndo catyí ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyí ndo: “Cuenda ra Cristo yihí yu”. ¹³ ¿A cuñi ra Cristo tsa quita siín yo?

¿A maa yu tsihí nu cruu tsa cuenda ndo? ¿A tsicoondutyá ndo tsihin sivi yu? Ñavin.

¹⁴Tyahví nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyoho, ¹⁵ yacan ña cuvi cahan ndo tyin tsicoondutyá ndo tsihin sivi yu. ¹⁶Aan, jacoondutyá tucu yu tsi nyívi ra Estéfanas, maa tyin ña nducuhún iñi yu tun jacoondutyá yu tsi inga ndo. ¹⁷Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsíni tuñi tsa iyó nu ñuhu ñayívi ihyah caahán yu, tyin coto catyí nyívi tyin nduve yahvi nyaá tsa tsihí ra Cristo cuenda cuatyí yo.

*Vaha ca tsa tsíni tuñi Nyoo tan ñavin ca tsa
tsíni tuñi nyívi iyó nu ñuhu ñayívi*

¹⁸ Nyívi tsa cua cuhun anyaya tsíni ñi tuhun tsa tsihí ra Cristo nu cruu, tan ña tsiní iñi ñi tsi ra, yacan cuenda cuñí maa ñi tyin nduve yahvi nyaá tsa tsihí ra. Tan tsa cuenda yoo tsa cua cacu, tunyee iñi Nyoo cuví tsa tsihí ra. ¹⁹Tyin tacan catyí maa tuhun Nyoo:

Cua janaa yu tsa nyityi jiñi ra tsitó xaan. Tan ña cua cahan yu tsa caahán ra, catyí Nyoo.

²⁰Nduve yahvi nyaá ra tsa tsitó xaan, tan ra maestro, tan ra caahán náa ndíhi tuhun tsa iyó nu ñuhu ñayívi ihyah. Tyin tsa tsíni tuñi tsa iyó nu ñuhu ñayívi ihyah, tuhun nduve yahvi nyaá nanduví can jahá Nyoo. ²¹Nyoo tsihin tsa tsíni tuñi tsa iyó tsi ra tyaa ra cuhva tyin ña cuvi nacoto nyívi tsi ra tsihin tsa tsíni tuñi tsa iyó nu ñuhu ñayívi ihyah. Maa tyin tyaa tucu ra cuhva tsa jacacu ra tsi nyívi tsa tsinú iñi tuhun ra vasu ndi maa inga ca nyívi cuñí ñi tyin nduve yahvi nyaá tsi.

²²Nyívi Israel cuñí ñi nyehe ñi tsa iyo. Tan nyívi Grecia maa ñi maa tsa tsíni tuñi tsa iyó nu ñuhu ñayívi ihyah nanducú ñi. ²³Maa tyin nyuhu jacotó ndi tuhun ra Cristo, ra tsa tsihí nu cruu. Tan tsa tsíni nyívi Israel tuhun ra ndasi xaan cuñí ñi. Tan ñi tsa

ñavin ñi Israel cuví, cuñí ñi tyin nduve yahvi nyaá tsi.²⁴ Maa tyin tsa cuenda nyíví tsa nacatsí Nyoo, cuví ñi nyíví Israel, a nyíví Grecia, ñi ican cutuñí iñi tyin ra Cristo iyó tandihí tunyee iñi Nyoo tsi ra, tan tsahá ra tsa cutuñí iñi ñi tsa tsíni tuñi Nyoo.²⁵ Vasu ndi maa inga nyíví cuñí tyin nduve yahvi nyaá tsa tsíni tuñi Nyoo, maa tyin nyaá yahvi ca tsi tan ñavin ca tsa tsíni tuñi tsa iyó nu ñuhu ñayíví ihya. Tan cuñí tucu ñi tyin ña ñihí tunyee iñi Nyoo. Maa tyin ñihí ca tsi tan ñavin ca tunyee iñi tsa iyó nu ñuhu ñayíví ihya.²⁶ Yañi, cuñí tsi tsa cutuñí iñi ndo tyin Nyoo nacatsí ra tsi ndo vasu ndi maa ña cuaha ndo cuví nyíví tsító, tan nyíví cahnu cuví o nyíví ndacá ñaha nu ñuhu ñayíví ihya.²⁷ Nacatsí ra tsi nyíví tsa catyí nyíví tyin soho xaan ñi, tyin cuhva ra ticanuu tsi nyíví tsító xaan. Tan nacatsí ra tsi nyíví nduve tunyee iñi iyó tsi tyin cuhva ra ticanuu tsi nyíví cuñí tyin iyó xaan tunyee iñi tsi ñi.²⁸ Tan nacatsí ra tsi nyíví ndaahví tsa cuñí nyíví tyin ña tsíni ñuhu ñi, tan nyíví tsa ña cuñí nyíví nyehé ñi, tan janduluhlú ra tsi nyíví jahá tyin cahnu cuví ñi.²⁹ Javahá ra tacan tyin tacan tan yoñí cuví nduyaa nuu ra.³⁰ Tan juvin ñi maa ra jandu iñi tsi yo tsihin ra Cristo Jesús. Tan tsahá ra Cristo tsa tsíni tuñi tsi yo, tan tsa cuenda tsa jatá ra tsi yo tsihin ñiñi ra, quihín nyaa ra tsi yo ndaha nu ña vaha tan cacu yo tan nduvalha yo jahá ra tan jacu íra tsi yo.³¹ Yacan cuenda na javahá yo cuhva catyí tihun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatus cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihí nu cruu

¹ Maa tyin yañi, quivi tsa quitsí yu cahan̄ yu tihun Nyoo tsihin ndo, ña cahan̄ yu tihun tsa tsíni tuñi tsa iyó nu ñuhu ñayíví ihya tumaa caahán ra tsító xaan naha ra.² Tyin maa ñi maa tihun ra Jesucristo, náca tsihí ra nu cruu tsa cuenda cuatyí yo tyaa iñi yu tan cahan̄ yu tsihin ndo.³ Tan tsa tsaa yu nu yucú ndo ñihí ñihí yu jahá tsa yuuuhví yu. ⁴Tan tsa cahan̄ yu tsihin ndo, ña cahan̄ yu tsihin tihun sii caa tumaa caahán ra tsító xaan naha ra. Maa tyin tsihin tunyee iñi Tatyí Ii Nyoo cahan̄ yu tsihin ndo.⁵ Tyin

tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsíni tuñi tsa iyó nu ñuhu ñayíví ihya.

Juvín ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tihun tsa tsíni tuñi tsihin nyíví tsa ñihí nyaá tsihin tihun Nyoo. Maa tyin ñavin tsa tsíni tuñi tsa iyó nu ñuhu ñayíví ihya, tan ndi ñavin tsa tsíni tuñi ra ndacá ñaha naha ra tsa cua cundihí ñi maa, tyin caahán ndi tsa tsíni tuñi Nyoo⁷ tsa tsicumí xeehe ra tsa ndi cumañí ca javaha ra ñuhu ñayíví ihya. Tyaa ra cuhva tsa jacacu ra tsi yo tan cunyecu cuui yo tsihin ra nda gloria.⁸ Tan ndi intuhun ra ndacá ñaha nu ñuhu ñayíví ihya tan ña cutuñí iñi ra naha can, ña cua tyaa ra naha tsi Jutu Mañi yo, ra ndacá ñaha gloria, nu cruu.⁹ Maa tyin cuví tsi tumaa catyí maa tihun Nyoo:

*Yoñi nyehé tan yoñi tsíni tan tsica iñi tihun vaha
tsa javahá Nyoo tsa cuenda nyíví cuñí tsi ra,
catyí tsi.*

¹⁰ Maa tyin Nyoo tsahá ra Tatyí Ii ra tsi yo tan jactotó Tatyí Ii ra tihun ihya tsi yo, tan juvin ra jactotó tandihí ca tihun xeehe tsa tsicá iñi Nyoo tsi yo.

¹¹ Intuhun intuhun yo tsító yo nácaa tsicá iñi yo, maa tyin inga nyíví ña tsító ñi tsa tsicá iñi yo. Tan tacan tucu intuhun ñi Tatyí Ii Nyoo tsító ra tsa tsicá iñi maa Nyoo.¹² Yoo ñavin tsa tsíni tuñi tsa iyó nu ñuhu ñayíví naquihín yo, tyin naquihín yo Tatyí Ii Nyoo, tan juvin ra jactotó tandihí tsa ñihí yo jahá Nyoo.¹³ Tan tsa caahán ndi tsihin ndo ihya, tihun tsa jacuahá maa Tatyí Ii Nyoo tsi ndi cuví. Ñavin tsa cutuhvá maa ndi tsihin tsa tsíni tuñi jiñi ndi. Nacatyí tihun ndi tsa jacuahá Tatyí Ii Nyoo tsi ndi tsi nyíví tsa yihi Tatyí Ii Nyoo.

¹⁴ Maa tyin nyíví tsa nduve Tatyí Ii Nyoo iyó tsihin, ña naquihin vaha ñi tan ndi ña cutuñí iñi ñi tsa jacuahá Tatyí Ii Nyoo tsi ñi. Tan cuñí maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi.¹⁵ Maa tyin nyíví yihi Tatyí Ii Nyoo cuví cutuñí iñi ñi. Tan tsító ñi tatus vaha a ña vaha náa iin tihun. Maa tyin ña cuví catyí inga nyíví tatus vaha a ña vaha tsa iyó añima ñi.¹⁶ Tyin tihun Nyoo catyí tsi: “Yoñi tsító

tsa tsicá iñi Jutu Mañi yo Nyoo. Yoñi cuví jacuahá tsi ra”, catý tuhun Nyoo. Maa tyin yoó tsító yo tsa tsicá iñi ra tyin iyó tsa tsíñi tuñi ra Cristo tsi yo.

3

Ná taahán tsi cunyicun yo tsi iin ra yiñi tuhun Nyoo tsihin yo, na cunyicun yo tsi Nyoo

¹ Yañi, quíví tsa quitsí yu nu yucú ndo ña cuví cahan yu tsihin ndo tumaa caahán yu tsihin nyiví jaquihín ityi Tatyi li Nyoo. Ca-han yu tsihin ndo tumaa caahán yu tsihin nyiví ña tsító tsi Nyoo, tyin ndi lee xaan ndo tsihin ra Cristo. ² Ca-han yu tsihin ndo tsihin tuhun tsa ña yiñi ñi cutuñi iñi ndo. Tumaa tsahá yo letsí coho lee tsa ñaha ca cuvi catsi nyayu, tacan javahá yu tsihin ndo, tyin nyoho ñaha ca cuvi cutuñi vaha iñi ndo. ³ Tan ndi vityin tan ñia cutuñi iñi ndo! ⁴ Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tisihí nu yucú ndo, tan ndusíñi ndo. Ndi tsicá iñi ndo tuhun tsicá iñi nyiví cuenda nu ñuhu ñayiví ihya, tan javahá ndo tumaa cuñi cuñu ñuhu ndo. ⁵ Tyin yiñi ndo catý ndo: “Cuenda ra Pablo yiñi yu.” Tan inga ndo catý ndo: “Cuenda ra Apolos yiñi yu.” Yacan cuñi tsi catý tyin javahá ndo tumaa javahá nyiví iyó ityi tsata.

⁶ Tyin ¿yóo ra cuví yuhu, ra Pablo? Tan ¿yóo ra cuví ra Apolos? tyin cañí tahan ndo tsaha ndi. ⁷ A ñavin musu Nyoo ñi cuví ndi? Juvin. Tan cahan ndi tuhun Nyoo tsihin ndo tan natsinú iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catý maa Nyoo tyin javahá ndi. ⁸ Yuhu tatsí tuhun Nyoo añima ndo, tan ra Apolos tyosó. Maa tyin Nyoo jacuahnu ra tuhun ra añima ndo. ⁹ Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandíhi tyin maa ra jacuahnú tuhun ra añima yo. ¹⁰ Ra tsa tatsí tan ra tsa tyosó, iñi ñi ra cuví ra naha. Tan Nyoo cua tyahvi tsi intuhun intuhun ra naha cuhva tyiñu jahá ra naha. ¹¹ Tan nyuhu, cuví ndi musu tan jahá tyiñu ndi tyiñu Nyoo. Tan nyoho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. ¹² Tsaha Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquín yu cuhva

vehe can tan tyihi yu tsaha tsi tsitsi ñuhu. Tan inga ra tsá cua sama ityi siquí cuví jacuahá, tan cuñi tsi jahá ra cuenda nácaa jacuahá ra tuhun Nyoo. ¹³ Tan yoñi cuví caquin inga cuhva tyin tsa canyí cuhva can. Tan yacan cuví ra Jesucristo. ¹⁴ Tan siqui cuhva can cuví sama ra jacuahá tsihin xuhun cuaan, tsihin xuhun cuitzin, tsihin yuu vaha. Tan cuví tucu javahá ra vehe tsihin yutun, tsihin vitsin, a tsihin tiyama. ¹⁵ Maa tyin quíví nauchva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha. ¹⁶ Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahvi tsa taahán tsi tsi ra. ¹⁷ Maa tyin tun ndihí tyiñu javahá ra naha cayu, nduve náa cua ñihí ra naha. Vasu cua cacu maa ra naha tumaa cacu iñi ra tsa cuñi cayu tan tsinú ra nu cayú ñuhu.

¹⁸ ¿A ña tsító ndo tyin vehe ñuhu Nyoo cuví ndo, tan iyó Tatyi li Nyoo tsitsi añima ndo? ¹⁹ Tatun iin nyiví jatívi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

²⁰ Ndi intuhun ndo tan ña jandavi ñaha ndo tsi ndo. Tyin tatum cuñi ndo tyin tsító xaan ndo tsihin tsa tsíñi tuñi tsa iyó nu ñuhu ñayiví ihya, cuñi tsi tsa jandusoho ndo tsi ndo tumaa ra tsa ña tsító maa. Tacan tan Nyoo cua cuhva ca ra tsa tsíñi tuñi vaha tsi ndo. ²¹ Tyin tsa tsíñi tuñi tsa iyó nu ñuhu ñayiví ihya nduve yahvi nyaá can nu Nyoo. Tyin catý tuhun Nyoo: “Janacavá ra tsi ra tsító, juvin ñi maa nu tsa nyityi javahá ra.” ²² Tan catý tucu tsi: “Jutu Mañi yo tsító ra tyin tsa tsicá iñi ra tsító, nduve yahvi nyaá can.” ²³ Yacan cuenda ndi intuhun ndo tan ña taahán tsi cu iyo iñi ndo nyehe ndo tsi iin ra jacuahá tsi ndo tyin maa Nyoo tsaha tsi ra naha tsa jacuahá ra naha tuhun vaha tsi ndo tan tsaha ndihí ra tandíhi tsa iyó tsi ndo. ²⁴ Yuhu ra Pablo, ra Apolos, ra Pedro, maa Nyoo tsaha tsi ndi tsa cahan ndi tuhun ra tsihin ndo. Tan ñuhu ñayiví ihya, tan ñayiví iyó yo, tan tuhun tsihí, tan tsa cuví vityin, tan tsa cua cuví nu cuahán ca tsi, tandíhi maa tuhun ihya tsaha Nyoo tsi ndo. ²⁵ Tan inga tucu tuhun tyin cuví ndo tsa tsii ra Cristo, tan ra Cristo, tsii Nyoo cuví ra.

4

Nā jacobnu yo tsi yo tan ndi tsi yañi yo

¹ Yacan cuenda ña taahán tsi nyehe ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuaha ndi tuhun xeehe ra. ²Tan ra tsa tava tyiñu Nyoo cuñi tsi tsa tyáa yahvi ra tandihí tsa caahán ra tsihin ra. ³Yacan ña ndihí iñi yu tsa caahán ndo tsi yu, o tatuń cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu. ⁴Vasu ndi maa tuví iñi yu tyin nduve cuatyí yu, maa tyin ña cuñi tsi catyi tyin nduve cuatyí yu nuu Nyoo. Tyin maa Jutu Mañi yo cua catyi tun iyó cuatyí yu o nduve. ⁵Yacan cuenda, ña cahan ndo tsi yu. Cuatu ndo nda tahan maa tsi quitsi ra Cristo, tyin maa ra cua tava tsa yiñi xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacobnu Nyoo tsi intuhun intuhun yo cuhva tsa taahán tsi.

⁶ Yañi, caahán yu tuhun ihyá tsihin ndo tsa cuenda tsa vaha tsi maa ndo. Nyehé ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñi ndo tsi intuhun ñi nyivi. Inducu ñi cuñi ndo tsi tandihí nyivi. ⁷Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacobnu ndo tsi ndo, tyin maa Nyoo tsaha can tsi ndo.

⁸ Tan cuñi ndo tyin tsa tsitó maa ndo tandihí tuhun Nyoo, yacan nduve ca tsa cumañi tsi ndo. Tan cuñi tucu ndo tyin cuví ndo rey, tan ña tsíñi ñuhu ca nyuhu tsi ndo. Vaha xaan tun tsatyrin nditsa tsa cuví ndo rey, tyin tacan tan rey cuví tucu nyuhu. ⁹Nyuhu tsa cuví ndi ra tsicá tyiñu ra Cristo, tumaa tsia nacoq Nyoo tsi ndi nda tsata ca, tan cuví ndi tumaa nyíví tsa taahán tsi cíú. Tan cuaha xaan nyíví tan ángel nyehé tsa taahán ndi. ¹⁰Nyíví tsicá iñi maa ñi tyin tsa cuenda ra Cristo tan ndusohg ndi. Tan nyoho iyo xaan cuñi ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyoho iyo xaan cuñi ndo tyin iyó tunyee iñi tsi ndo. Tun ndasi cuñi

nyíví nyehé ñi tsi nyuhu, jaha xaan ca ñi tsa ñayiví tsi nyoho. ¹¹Nda cuanda vityin nyehé ndi tundoho; tsisocó ndi, tan na itiy iñi ndi, cumañi jahma ndi, nduve vehe ndi iyó, tan nyíví jacuu ñi tsa uhvi tsi ndi. ¹²Tan tsitatú ndi tsa jahá tyiñu ndi tsihin ndaha ndi. Caahán nyíví tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi. ¹³Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsíñi ñuhu ca jahá ñi nda cuanda vityin ihya.

¹⁴ Tyáa yu tuhun ihyá tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. ¹⁵Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahan tuhun ra Cristo Jesús tsihin ndo nda jihna ñi tan natsinu ñi ndo tsi ra. ¹⁶Tan tsa cuenda tsehe tsicán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nií xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu. ¹⁸Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. ¹⁹Maa tyin tun Jutu Mañi yo tan cuñi ra, yatyí cua quitsi nyehe yu nu yucú ndo. Tacan tan cua nyehe yu tatan nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatuń caahán ñi maa ra naha. ²⁰Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahan ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha. ²¹¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tava tyiñu ra Pablo tyin cutuñi iin ra tsicó tsihin sihi quiin

¹ Ñihí tuhun yu tyin iin ra nyíví tsihin ndo iyó ra tsihin sihi quiin ra. Tan yacan cuví

cuatyi cahnu xaan, tyin ndi nyivi iyó ityi tsata tan ña jayahá ñi tacan tyin tsitó ñi tyin ña vaha. ²Taahán tsi cuuihyá cuñí ndo tsa cuenda cuatyi can tan ña nduyaa ndo. Táva ndo tsi ra tsa jayahá tacan nu yucú ndo. Tan ña cutahan ca ra tsihin ndo. ³⁻⁴Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú iñi yu tsi ndo, tan tsihin sivi Jutu Mañi yo Jesucristo jandaa yu tyiñu ra tsa jahava cuatyi can. Yacan cuñí tsi tsa ndu iñi ndo. Tan jaha ndo tuhun tyin nyii yu tsihin ndo. Tan cunyaa tunyee iñi Jutu Mañi yo Jesús tsihin ndo. ⁵Tacan tan cuhva ndo tsa jahava nu ña vaha tsa cuñí maa nu tsihin cuñu ñuhu ra tsa jayahá tsa caquiñi ihya, tyin vasiquí tacan tan cua jandíhi ra tsa jayahá ra can. Tacan tan quiví quitsi Jutu Mañi yo Jesucristo cacu anima ra.

⁶Ña vaha tsa jacahnu xaan ndo tsi ndo tyin ña jahá ndo cuenda tsa jayahá ra yucú vehe ñuhu ndo. ⁷A ña tsitó ndo tyin vasu luxu ñi yutsan iya, jandaá tsi tandíhi yutsan paan? Tan tacan ñi cuñí yo cuví tucu yacan. ⁸Tava ndo yutsan iya tsahnu tsa jativí tsi ndo. Tacan tan cuvi ndo tumaa paan tsa tuhvá nyivi jayahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuvi tucu nyoho tyin maa ra Cristo cuví mbee ticatyi luhlu tsa tsihí tsa cuenda cuatyi yo. ⁹Yacan cuenda taahán tsi catsi coo yo tyin tsihí ra Cristo tsa cuenda yo. Tan jandoó yo tsa caquiñi tsa jayahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa nii iñi yo tyin cuví tsi tumaa paan tsa nduve yutsan iya yihí.

¹⁰Nu inga carta tsa jaquitsi yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha. ¹¹Tan tsa caahán yu tyehem tsihin ndo, ñavin tsa cunu ndo nu nyivi tsa iyó ityi tsata, ñi tsa iyó tsihin rayii a ñaha, ñi tsa nyiyó iñi, ñi suhú, tan ñi jachahnú tsitoho, tyin tun cunu ndo nu iyó ñi ihya, cuñí tsi tsa quita ndihí ndo nu ñuhu ñayivi ihya. ¹²Maa tyin tsa cuñí yu catyi yu tsihin ndo ña cunyaa naa ndo tsi nyivi tsa catyi: "Hermano cuví yu", tan tsicá nuu ra tsihin ñaha, o ñaha tsicá nuu ña tsihin rayii, o nyiyó iñi ñi, o jachahnú ñi tsitoho, o caahán ñi cuendu, o tsihí ñi nyixi, o suhú

ñi. Ñi tsa jayahá iin tsa ña vaha ihya, ndi ña cunyecu ndo catsi ndo tsihin ñi. ¹²⁻¹³Tyin yoo ña taahán tsi tatsi tuñi yo tsi nyivi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyoho cuñí tsi tatsi tuñi ndo tsi nyivi yihí cuenda Nyoo. Yacan cuenda tavá ndo tsi ra iyó cuatyi nu yucú ndo.

6

Ña cua ndacan yo cuatyi tsaha iin yañi yo cuenda Nyoo nuu ra cumí tyiñu

¹¿Nacuenda tyin tsicán ndo cuatyi tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndáa ra iyó cuatyi? ²¿A ña tsitó ndo tyin juvin ñi maa yo cua jandaa cuatyi tandíhi nyivi iyó nu ñuhu ñayivi ihya nu cuahán ca tsi? Tan tatum maa yo cua jandaa cuatyi can, ¿nacuvi tyin ña cuví jandaa ndo cuatyi nyihí ihya? ³¿A ña tsitó ndo tyin cua jandaa yo cuatyi nda cuanda ángel? Tun tacan, ¿a yiñ jandaa yo cuatyi nyihí tsa iyó nu ñuhu ñayivi? ¡Ña yiñ jandaa yo can!

⁴Yacan cuenda tatum iyó tisihí nu yucú ndo, ¿nacuenda tyin cuahán ndo nuu ra cumí tyiñu tsa ña yihí tuhun Nyoo? ⁵Caahán yu tyehem tsihin ndo na nducahan nuu ndo. ¿A nduve cuui vasu intuhun ra jandaa cuatyi yañi ndo nu yucú ndo? ⁶Tyin cuahán ndo cua ndacan ndo cuatyi tsaha yañi ndo cuenda Nyoo nuu iin ra cumí tyiñu tsa ña tsinú iñi tsi Nyoo.

⁷Ña vaha tsa iyó tisihí nu yucú ndo. Vaha taxin ca cunyee iñi ndo tatum jahava nyivi tsa ña vaha tsi ndo. Tan jaña ndo na suhu maa ñi tsa tsii ndo. ⁸¡Maa tyin nyoho jayahá ndo tsa ña vaha tan suhú ndo nda cuanda tsa tsii yañi ndo!

⁹⁻¹⁰¿A ña tsitó ndo tyin nyivi quiñi iyó ña cua quihví ñi nu ndacá ñaha Nyoo? Ña jandaví ñaha ndo tsi ndo. Ña cua quihví ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jachahnú tsitoho, ndi ra iyó ñasihí tan iyó inga ñaha tsi ra, tacan tucu ñiñaha tsa iyó yiñ tan iyó inga rayii tsi ñi, ndi ra ndusihí, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihí nyixi, tan ndi ñi tsit; o jandaví ñaha. Tandíhi maa nyivi ihya

ñna cua ñihí ñi nu ndacá ñaha Nyoo cuhun ñi. ¹¹Tyin tacan javahá juhva nyoho. Maa tyin tsa ndatsi cuatyíndo tan ndu iij ño tan nduvahá ño nuu Nyoo jahá Jutu Mañi yo Jesucristo tan Tatyi li Nyoo.

Cuñu ñuhu yo cuví vehe ñuhu Nyoo

¹²Catyí tsi tyin nuña maa javaha yo tandíhi náa cuñi maa yo. Tan nditsa tucu maa, maa tyin ñia tandíhi tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ñia vaha, tan ñia cuhva yo tsa cundaca ñaha can tsi yo.

¹³Catyí nyíví tyin Nyoo javahá ra tsa tsatsí yo tsa cuenda tsatsí yo. Tan javahá ra tsatsí yo tsa cuenda tsa tsatsí yo. Tan nditsa. Maa tyin Nyoo cua janaa ra nduvi tsehe quíví cua naa ñayíví. Tan tsa cuenda cuñu ñuhu yo ñia nditsa tsa javahá ra itsi tyin coo yo tsihin ñaha a tsihin rayíi, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. ¹⁴Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

¹⁵¿A ñia tsitó ndo tyin tandíhi yoo tsa yihí cuenda ra Cristo cuví yo intuhun ñia cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuvi quihin yu luxu cuñu ñuhu ra Cristo tan jativí yu tsihin iñi ñaha tsicá nuu? Ñia taahán tsi javaha yu tacan. ¹⁶¿A ñia tsitó ndo tyin tun iñi rayíi tan iyó ra tsihin iñi ñaha tsicá nuu intuhun ñia cuñu ñuhu naduví ra tsihin ña? Tyin nu tutu Nyoo catyí tsi tyehen: “Tsa nduvi ñi, iñi ñia nyíví cuví ñi.”

¹⁷Maa tyin tatum iñi nyíví tan nacuhva ñia añima ñi tsi Jutu Mañi yo, iñi ñi cuvi ñi tsihin ra tyin quihví Tatyi li ra añima ñi.

¹⁸Jandíhi ndo tsa iyó ndo tsihin ñaha a tsihin rayíi tun ñavin ñasííhi ndo a ñavin yíi ndo cuví. Tyin tandíhi inga nu cuatyí tsa javahá nyíví ñia jativí can cuñu ñuhu ñi. Maa tyin tsa tsicá nuu ñi tsihin ñaha a tsihin rayíi, jativí can cuñu ñuhu ñi. ¹⁹¿A ñia tsitó ndo tyin cuñu ñuhu yo cuví vehe ñuhu Tatyi li tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. ²⁰Tyin Nyoo yahvi xaan jata ra tsi yo. Yacan cuenda taahán tsi jachahnú yo tsi ra tsihin cuñu ñuhu yo, tan tacan tucu ñi tsihin tsa tsíni tuñi iñi yo

tyin nduvi taahan tuhun ihyá tsii maa Nyoo cuví.

7

Nu tsahá cuenda ra Pablo nácaa taahán tsi coo nyíví tindahá

¹Tan vityin cua cahan yu tsa tsica tuhun ndo tsi yu nu carta tsa jaquitsí ndo tsi yu. Nditsa tyin vaha tsa ñia tindaha yo.

²Maa tyin cuhua xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayíi. Yacan cuenda cuñi tsi tsa coo ñasííhi tsa intuhun intuhun ra naha, tacan tucu ñiñaha taahán tsi coo yíi tsa intuhun intuhun ñi. ³Na javaha rayíi cuhva taahán tsi tsihin ñasííhi ra. Tan tacan tucu maa ñaha, na javaha ñia cuhva taahán tsi tsihin yíi ña. ⁴Ñiñaha ñia cuvi cundaca ñaha ñi maa ñia cuñu ñuhu ña, tyin tsii yíi ñia cuví cuñu ñuhu ña. Tacan tucu maa yíi ña, ñia cuvi cundaca ñaha ñi maa ra cuñu ñuhu ra tyin tsii ñasííhi ra cuví cuñu ñuhu ra. ⁵Ña vaha tun ñia cuhva iñi ndo tsi ndo tsi inga ndo. Tatum cuñi ndo coo ndo oración, vaha ca natuhun tahan jihna ndo tyin ñia cuo tsihin tahan ndo quíví tsa cua handucu ndo tsi Nyoo. Yaha can tan coo tsihin tahan nyico ndo tyin coto nducu rayíi inga ñaha o ñaha nducu ñia inga rayíi tan javaha ndo tsa ñia vaha jaha nu ñia vaha.

⁶Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñí yu tsi ndo tsa tindaha ndo. Maa tyin cuví tindaha ndo tatum cuñi ndo. ⁷Tsa cuenda yuhu, vaha ca coo ndo tumaa iyó maa yu. Maa tyin siñ siñ tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ñia coo ñasííhi yo. Tan yihí yo tsahá ra tunyee iñi tsa coo ñasííhi yo.

⁸Tsahá cuenda yu tuhun ihyá tsi tandíhi nyoho tsa ñaha ca tindaha tan nyoho ñi tsihí yíi tyin vaha ca cuvi tsi ndo tun ña tindaha ndo tumaa maa yu. ⁹Maa tyin tatum ñia cunyee iñi ndo coo tacan ñi ndo, vaha ca tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰Maa tyin caahán yu tsehe tsihin nyoho ñiñaha tsa tsa tindaha: ña nacoo ndo yíi ndo tyin tuhun caahán yu ihyá, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo.

¹¹Maa tyin tatum iñi ñaha tan nacoo ñia yíi ña, cuñi tsi tsa ndoo ñia cunyaa ñia tsa ña

cua tindaha ca ña, o cunuhi nyico ña tsihin yií ña. Tan tacan tucu rayii, ña taahán tsi nacoo ra ñasiihi ra.

¹² Tan cuñi yu cahan yu inga tuhun ihyá tsihin inga ndo, maa tyin ñavin Nyoo tsahá itsi. Tatum iin ra hermano tan ña tsinú iñi ñasiihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa nacoo ra tsi ña. ¹³Tan tatum iin ña hermana, tan ña tsinú iñi yií ña tsi Nyoo, ndoo ña vaha tsa cunyaa ra tsihin ña, nduve ndatu tsa nacoo ña tsi ra. ¹⁴Tyin tsa yaha nasoco Nyoo tsi rayii tsa ña tsinú iñi can tsa cuenda tsa iin ñi cuví ra tsihin ñaha tsa tsinú iñi. Tan tsa yaha nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuvi tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndihí Nyoo itsi naha tsi. ¹⁵Maa tyin tatum rayii an ñaha tsa ña tsinú iñi tsi Nyoo, tan cuñi ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yo tsihin tsa nduve tisihí. ¹⁶Tyin ña tsitó iin ñaha tatum cacu yií ña. Tan ndi rayii ña tsitó ra tatum cacu ñasiihi ra.

¹⁷ Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quivi cana ra tsi ndo. Tan tsehe cuví tsa jacuahá yu tandihí vehe ñuhu tan iin tan iin ñuu. ¹⁸Tatum tsa yaha tsinyaa tuñi Nyoo cuñi ñuhu ndo tan cana Nyoo tsi ndo ña caca iñi ndo tsa cuenda yacan. Maa tyin tun ña tyaa ñi tuñi can tsi ndo, tan cana Nyoo tsi ndo, nduve cuenda; ña javaha ca ndo can. ¹⁹Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaa yahvi yo tuhun caahán Nyoo. ²⁰Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quivi tsa cana Nyoo tsi ndo. ²¹Tyin tatum musu cuví ndo quivi tsa cana Nyoo tsi ndo, ña caca iñi ndo. Maa tyin tatum tsahá tsi cuhva tsa ndoo nuña ndo, nducu ndo cuhva. ²²Lin ra tsa cuví musu tan quihví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihví ra cuenda Jutu Mañi yo, vityin cuví ra musu tsa cuenda ra. ²³Nyoo yahvi xaan jata ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi

naha ra tsi yo. ²⁴Tan catyí yu tsihin ndo, yañi, jaha tyiñu ndo tyiñu tsa tuhvá ndo javahá quivi cana Nyoo tsi ndo.

²⁵Tan tsa cuenda nyivi tsa ñaha ca tindaha, nduve tuhun tsahá Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsahá ra tucahu iñi tsi yu tan maa ra yihí ndaha tsi yu. ²⁶Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. ²⁷Maa tyin tatum tsa iyó ñasiihi ndo, ña nducu ndo cuhva tsa nacoo ndo tsi ñi. O tatum nduve ñasiihi ndo iyó, vaha ca ña tindaha ndo. ²⁸Maa tyin tatum tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehé ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehé ndo tundoho.

²⁹ Yañi, cuñi yu cahan yu tuhun ihyá tsihin ndo: Juhva cuiñi ña quivi iyó yo. Yacan vityin tan ityi nuu tandihí ra tsa iyó ñasiihi cuñi tsi tsa jaha tyiñu ra naha tyiñu Nyoo tumaa tsa nduve ñi ñasiihi ra naha iyó.

³⁰Tan nyoho tsa iyó tucuihya iñi, ña tyaa yahvi ndo tucuihya iñi can. Tan nyoho tsa sií cuñi, ña tyaa yahvi ndo tusií iñi can. Tan nyoho tsa jata ndaha tyiñu taahán tsi coo ndo tumaa tsa nduve ndaha tyiñu ndo.

³¹Tan nyoho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndihí ñuhu ñayivi ihya.

³²Cuñi yu tyin nyoho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Lin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo. ³³Maa tyin tatum tsa tindahá ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasiihi ra. ³⁴Tan tacan tucu ñiñaha, siín cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducu ña cuhva jacahnu ña tsi Nyoo tsihin cuñi ñuhu ña, tan tsihin tsa niñ iñi añima ña. Maa tyin ñaha tsa iyó yií, maa ñi cuhva coo vaha ña tsihin yií ña nducu ña.

³⁵ Caahán yu tuhun ihyá tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin

ñayiví cuítí tsihin tsa nduve tsa jatyañú tsindo. Tan javaha ndo iin ñi tyiñu Nyoo.

³⁶ Maa tyin ndáa nyoho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñí tsi; ñavin cuatyí cuví can. ³⁷ Maa tyin ndáa nyoho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. ³⁸ Ñi tsa cuñí tindaha sehe ñi, vaha javahá ñi. Tan ñi tsa ña cuñí tindaha sehe ñi, vaha ca javahá ñi.

³⁹ Maa tyin ley Nyoo catyí tsi na cundacá ñaha rayii tsi ñasíhi ra tsitsi tsa ndi iyó ra. Tatun tsa tsihí ra, tacan tan cuví ndoo nuña ña tan tindaha ña yóo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo. ⁴⁰ Maa tyin sií xaan ca cua cuvi tsi ña tun ña tindaha ña inga tsaha. Tsehe cuví tsa tsicá iñi maa yu. Tan cuñí yu tyin maa Tatyí li Nyoo, tsaha tuhun ihyá tsi yu, tan tsahá cuenda yu tsi ndo.

8

Nu jacuahá ra Pablo tyin ña vaha janacava yo tsi nyívi nu cuatyí

¹ Tan vityin cua cahan yu tsihin ndo cuenda nyayu tsa jamañí nyívi nu tsitoho. Tandihi yo tan cuñí yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñí yo tan nduyaá yo tsihin can. Tan ndi nduve nu jatyinyee can tsi yo. Maa tyin tsa cuñí tahan yo tsi yo jacuahnú tsi tsi yo tsihin Nyoo. ² Ra tsa cuñí tyin tsitó xaan ra, nduve náa tsitó ra. ³ Maa tyin Nyoo tsitó ra ndáa nyívi cuñí tsi ra tsihin tsa nii iñi añima ñi.

⁴ Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñii maa Nyoo iyó. ⁵ Vasu ndi maa juhva nyívi catyí ñi tyin iyó cuaha nyoo tsa ndacá ñaha nu ñuhu ñayiví ihyá tan andivi, ⁶ maa tyin tsa cuenda yoo, intuhun ñi Nyoo Juto yo iyó. Tan juvin ra javahá tandíhi cuii maa tsa iyó. Tan yoo iyó yo tsa cuenda ra. Tan iyó tucu intuhun ñi Juto Mañí yo Jesucristo. Tan maa ra javahá tandíhi maa tsa iyó, nda cuenda tsi maa yo.

⁷ Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá iñi ñi tyin nyito tsitoho can. Tan cuñí ñi tyin nyayu, tsa jamañí nyívi tsi

tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo. ⁸ Maa tyin Nyoo nduve cuenda ra tatuñun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. ⁹ Maa tyin nyoho tsa tsitó tyin nduve cuatyí tsa catsi yo nyayu tsa jamañí nyívi nuu tsitoho, jaha ndo cuenda coto janacava ndo tsi ñi tsa ndi quihví tuhun Nyoo nu cuatyí, tyin ñi ican tsicá iñi ñi tyin tun catsi ñi tsa jamañí nyívi nu tsitoho, cua coo cuatyí ñi nuu Nyoo. ¹⁰ Tyin tatuñun yoho tsa tsitó un tuhun ihyá, tan cunyaa un catsi un tsa iyó vehe tsitoho, tan iin ra yañi yo tsa ndi quihví cuenda Nyoo tan nyehe ra tyin tsatsí un tsa jamañí nyívi nu tsitoho, cua cuñí ndihí ra catsi ra. ¹¹ Tan cua tivi añima ra tyin cuñí maa ra tyin tsicoo cuatyí ra. Tan ra ican tsihí ra Cristo tsa cuenda ra. Tan yoho tsa tsitó un, siqui un cua cuhun cuatyí can. ¹² Tyin tun janacava yo tsi yañi yo tsa ndi quihví cuenda Nyoo, tsicoo cuatyí yo nuu ra Cristo. ¹³ Yacan cuenda tatuñun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quíví, tyín ña cuñí yu tsa janacava yu tsi yañi yo nuu cuatyí.

9

Tsa taahán tsi javahá iin ra tava tyiñu ra Jesucristo

¹ Nditsa tsa cuví yu iin ra tava tyiñu ra Jesucristo. Tan yoñi nyívi ndacá ñaha tsi yu tyin nyehe yu tsi ra Jesús Jutu Mañí yo. Tan juvin ñi maa ndo cuví tsandaa tsa cuenda tysiú javahá yu, tyin tsinú iñi ndo tuhun ra tsa jacoto yu tsi ndo. ² Vasu yihí nyívi ña tsinú iñi ñi tyin ra Jesucristo tava tyiñu tsi yu, maa tyin nyoho taahán tsi tsinú iñi ndo, tyin juvin yu cahán tuhun ra tsihin ndo tan natsinú iñi ndo tsi ra. Yacan cuenda juvin ndo cuví tsandaa.

³ Tyehen cuví tsa cua cahan yu tsihin nyívi tsa caahán nyaas tsi yu. ⁴ Iyó ndatuñun tsa quihín yu tandíhi tsa tsahá ñi catsi yu tan tsa tsahá ñi coho yu. ⁵ Tan iyó tucu ndatuñun tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandíhi ca ra tava tyiñu ra Jesucristo. ⁶ ¿O tsicá iñi ndo tyin yuhu ñi tan ra Bernabé ñi taahán tsi jaha tyiñu ndi

tsihin ndaha ndi tan jata ndi tsa tsíñi ñuhu tsi ndi? ⁷A ña taahán tsi nacoo ndi tyíñu can tan cahan ndi maa ñi tuhun Nyoo? ⁸Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuuaa tsa queé nu nducuaa ra. Tan ra tsa jahá cuenda indíqu tsihí ra letsí tí. ⁹Tan ña cuñi ndo tyn tuhun ihyá tsa tsíñi tuñi jíñi maa yu cuví, tyn nu ley Nyoo tsa tyáa ra Moisés catyí tsi tyehen: ¹⁰“Ra tsa tatsí trigu ña taahán tsi tyihi ra yoho yuhu indíqu tsa janduvahá trigu can, tyin taahán maa tsi catsí tí juhva trigu nu jahá tyíñu tí.” Nditsa tyin Nyoo ña cahan ra tyehen tsa cuenda indíqu ñi. ¹¹Maa tyn na cutuñi iñi yo tyn tumaa ra tahví ñuhu tan ra tatsí, nyita iñi ra naha tyn cua naquihin ra naha tsa cua quee nuu tsa tatsí ra naha. ¹²Tan tacan cuví tucu nyuhu, quitsí cahan ndi tuhun Nyoo tsihin ndo, tumaa tsa quitsí tatsí ndi tsíñi tsitsi añima ndo cuví can. Tan taahán tsi tsa jatyinyéé ndo tsi ndi tsa cuenda tsa jacotó ndi tuhun Nyoo tsi ndo. ¹³Tatun jatyinyéé ndo tsi inga ra tsa ña quitsí tyihi tuhun Nyoo nu yucú ndo, taahán tsi tsa cuaha ca jatyinyee ndo tsi nyuhu, tyn nyuhu tyihi tuhun Nyoo nu yucú ndo.

Maa tyn ña caahán ndi, tan cunyeé iñi ndi tandihí. Ña tsicán ndi tsa tsíñi ñuhu tsi ndi tsi ndo tyn coto jandihí ndo tsa tyáa yahví ndo tuhun ra Cristo tsa jacuahá ndi. ¹⁴Tsitó ndo tyn ra jahá tyíñu vehe ñuhu nyiví Israel, iyó ra naha tsihin tsa iyó vehe ñuhu can. Tyin taahán tsi tavá siñi ra naha juhva cuñi quítí tyn catsí ra naha. Tan tandihí ca cuñi can cua cahimí ra naha tumaa catyí maa Nyoo tsihin ra naha. ¹⁵Tan juvin ñi tacan caahán Jutu Mañi yo, tyn taahán tsi jatyinyee ñi yíñi cuenda Nyoo tsi ra caahán tuhun Nyoo tsihin ñi. ¹⁶Maa tyn yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihyá tyn cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndíhi tsa sii cuñi yu caahán yu tuhun ra Cristo tsihin ndo vasu ndi maa nduve náa jatyinyéé ndo tsi yu.

¹⁷Ña cuví nduyaa yu tsihin tsa caahán yu tuhun Nyoo tyn maa ra Cristo tava tyíñu tsi yu tsa cahan yu tuhun ra. Maa tyn ndahvi yu tun ña cahan yu tuhun Nyoo

ihya. ¹⁸Yacan cuenda tatuun cahan yu tsihin tsa nii iñi yu, cua ñihí yu yahví yu. Vasu ña cuñi yu cahan yu, tsa ñiñi cuñi tsi cahan yu, tyin tyíñu tsaha maa Nyoo tsi yu cuví tsi. ¹⁹Tan tsa sii cuñi yu caahán yu tuhun ra Cristo yacan cuví yahví yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

²⁰Vasu ñavin musu cuví yu, maa tyn naduví yu musu tandihí nyiví tyn tacan tan cuví jaha canaa yu cuaha ca nyiví cuenda ra Cristo. ²¹Tatun nyíí yu nu yucú ra Israel naha ra, nanduví yu tumaa maa ra naha tyn ra can naha ra iyó ra naha cuhva catyí ley Nyoo tsa tyáa ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. ²²Maa tyn tatuun cuñi yu jaha canaa yu tsi nyiví tsa ña nyitá iñi ley ra Moisés, javahá yu tumaa javahá ñi, tyn tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyn ña tyaá yahví yu ley Nyoo tyn tyaá yahví yu ley ra Cristo. ²³Tatun nyíí yu tsihín ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyn tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyiví, tyn tacan tan tyáa soho ñi tuhun Nyoo tsa caahán yu tsihin ñi tan cacu ñi. ²⁴Jovahá yu tacan tyn tacan tan cacu nyiví tan nasoco ndihí tucu maa Nyoo tsi yu.

²⁵Tsitó ndo tyn tatuun cua cunu suuhva nyiví, tandihí ñi tsinú, maa tyn intuhun ñi ñi jaha canaa. Tacan tucu maa yo, cuñi tsi tsa ñihí cunyicun yo tsi Nyoo tyn tacan tan cuví jaha canaa yo tsa vaha ca tsa tsahá ra tsi yo. ²⁶Tandihí nyiví tsa tsinú suuhva, nacoó ñi tandihí tsa jatyañú tsi ñi tyn cuñi ñi jahá canaa ñi. Tan nyiví can cua jaha canaa ñi intuhun corona ndaha yutun tsa iin yaha ñi na ityí. Maa tyn yoo nducú yu cuhva jaha canaa yo tsa ña cua tiví maa.

²⁷Tsa cuenda yuhu ña tsinú soho ñi yu, tan ndi ña cañí tahan soho ñi yu. ²⁸Maa tyn ñiñi ndacá ñaha yu tsi cuñi ñuhu yu. Tan jañiñi yu tyaá yahví yu tsi Nyoo, coto juvin ñi maa yu tsa yaha jacuahá yu tsi inga nyiví, tan ndoo yu.

10

Nu jacuahá ra Pablo tyin ña vaha jacaahnú yo tsitoho

¹⁻² Yañi, ña cuní yu tsa naa iñi ndo tsa cuví tsi tsii tsaaahnuy o tahan tsanaha. Nyoo jacuhun ra iin vico ityí nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityí nuu tsihin ñi. Tan tsa tacan, tumaa tsa tsicoondutyá ñi tsihin vico tan tsihin ndutya ñuhu tan ndu iin ñi tsihin ra Moisés. ³ Tan Nyoo tsahá ra iin ñi tsa tsatsí tandihí ñi. ⁴ Tan tsihí ñi ndutya tsa quita tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihí ñi. ⁵ Maa tyin vasu cuaha tsa iyo javaha Nyoo nyehe ñi, cuaha ñi ña tyaa yahvi ñi tuhun cahán ra tsihin ñi. Tan tsihí ñi nu tsiqui can.

⁶ Tandihí tuhun ihyá tsahá tsi iin cuhva tsi yo tyin tacan tan ña cuñi yo javaha yo tsa caquíi tumaa tsa javahá ñi can. ⁷ Yacan cuenda ña jacaahnú ndo tsitoho, tumaa java-há juhva ñi can, tyin catyí nu tutu Nyoo tyehén: “Tsinyecu ñi, tsatsí ñi, tan tsihí ñi. Yaha can tan nduvitá ñi, tsahan quitsaha tsaní ñi [jacaahnú ñi indíqui xuhun cuuan tsa javahá ñi].” ⁸ Ña coo ndo tsihin iin ñaha tun ñavin ñasíhi ndo cuví. Tacan tucu ñiñaha ña taahán tsi coo ñi tsihin rayii tumaa javahá nyiví can. Tan tsihí oco uñi mil ñi tsa iin quivi. ⁹ Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihí ñi tsa caañ coo tsi ñi. ¹⁰ Tan ña cahán ndo ndavaha ñi siqui Nyoo, tumaa tsa cahán juhva ñi can. Tan jaquitsí ra ángel ra tsahñi tsi ñi.

¹¹ Tandihí yacan tahan tsii tsaaahnuy o tsa tsicoq tahan tsanaha. Tan tsinyaa tsi nu libru Nyoo tyin tacan tan yoo tsa iyó yo nu cuu ndíhi ñuu ñayiví ihyá vityin coto yo tyin ña taahán tsi javaha yo tandihí tsa javahá ñi can. ¹² Tan nyoho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. ¹³ Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducú ñi nyehé tandihí ca nyivi. Cuíta iñi ndo tsi Nyoo, tyin ña tuhvára cuhva tsa nyehé ndo tundoho tsa ña cuví cunyee iñi ndo. Tyin tun nyehé ndo tundoho, nducú

ra cuhva tsa quita ndo tsitsi tundoho can tan cunyee iñi ndo.

¹⁴ Yacan cuenda yañi, ña jacaahnú ndo tsitoho. ¹⁵ Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehe ndo tun nditsa a ña nditsa tsa caahán yu. ¹⁶ Quivi tsa nducuhún iñi yo tyin tsihí ra Cristo nu cruu, tsihí yo vinu tan tsatsí yo paan. Tan vinu can cuñi tsi catyí tyin iin ñi cuví yo tsihin ra Cristo tsa cuenda niñi ra. Tan paan can cuñi tsi catyí tyin iin ñi cuví yo tsihin ra tsa cuenda cuñu ñuhu ra. ¹⁷ Tyin vasu cuaha yo, maa tyin tandihí yo tan tsatsí yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyihí tuñi iñi ndo cuhva iyó nyivi Israel. Tsatsí ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. ¹⁹ Ñavin caahán yu tyin iyó yahvi nyaá tsitoho tsa jacaahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. ²⁰ Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. ²¹ Tyin ña cuvi coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuvi catsi yo nu mesa Nyoo tan juvin ñi cuhva can catsi yo nu mesa nu ña vaha. ²² Ña cuhva yo tisihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cuájavaha yo náájavaha yo, nájavaha yo tsa cuenda tsa vaha tsi ingá ca nyivi

²³ Nditsa tsa caahán nyivi: “Cuví javaha yo náá cuñi maa yo.” maa tyin ña tandihí can tan jacuahnú can tsi yo tsihin Nyoo tan ndi ña cuví can tsa vaha tsi yo. ²⁴ Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Cätsi nyoho tandihí cuñu tsa cuyahví nu tuyahví. Tan ña nducu tuhun ndo náa cuñu cuví can tyin tacan tan ña cuu jatyañu tsa tsicá iñi ndo tsi ndo. ²⁶ Tyin ñuhu ñayiví tan tandihí tsa iyó nuu tsi, tsii maa Nyoo cuví.

²⁷ Tan tatuñ iin nyivi tsa ña tsinú iñi tsi Nyoo, tan cana ñi tsi ndo tsa cuciatsi ndo yuvehe ñi, tun cuñi ndo cuhun ndo, vaha maa

cuhun ndo, cätsi nyoho tandihí tsa cuahva ñi catsi ndo. Tan ña nducu tuhun ndo tun jamañi ñi cuñu can nuu tsitoho.²⁸⁻²⁹ Maa tyin tatum ndáa nyiví caahán tyehen tsihin ndo: "Nyayu ihya, nyayu tsa jamañi nyiví nuu tsitoho cuví tsi"; ña cätsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yiñi ndo cua catyi ndo: "¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyivi?³⁰ ¿Tan nacuenda ña cuví catsi yu can?", tan maa ñi tsahá yu tyahvi nyoo tsa Nyoo tan tsatsí yu", catyí ndo.³¹ Vaha maa, tun tsatsí ndo, tan tsihí ndo, o javahá ndo inga ca tsa javahá ndo; javaha nyoho maa tyin cuhva taahán iñi Nyoo.³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yiñi cuenda Nyoo.³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu añima ñi.

11

¹ Nyehé ndo tumaa javahá yu cuhva javahá ra Cristo, tacan taahán tucu tsi javaha nyoho cuhva javahá yuhu.

Nacaa taahán tsi javaha ñiñaha nu iyó culto

² Yañi, sii xaan cuñi yu tyin tacan ñi nducuhún iñi ndo tsi yu. Tan tyaa yahvi ndo tsa jacuahá yu tsi ndo.³ Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayii tyin juvin ra cuví ityi nuu tsihin ra, tan rayii cuví jiñi tsihin ñasííhi ra, tumaa cuví Nyoo jiñi tsihin ra Cristo.⁴ Tatum iin rayii tyasí ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra.⁵ Maa tyin tun iin ñaha tan ña tyasí ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndii jiñi ña cuví can. Tan tsahá ña ticanuu tsi yiñi ña tyin juvin ra cuví jiñi tsihin ña.⁶ Tatum iin ñaha tan ña tyasí ña jiñi ña, vaha taxin ca xatya ña tandihí ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña.⁷ Ña taahán tsi tsa casí rayii jiñi ra. Tyin cuhva caá Nyoo caá ra, tyin ndacá ñaha ra tsi ñasííhi ra, tumaa tsa ndacá ñaha maa

Nyoo tsi ra. Maa tyin iin ñaha jacobhnu ña tsi yiñi ña tsihin tsa tsahá ña tsa cundaca ñaha ra tsi ña.⁸ Tyin quivi javahá Nyoo tsi rayii, ña javahá ra tsi ra tsihin yiqui naha ñaha. Tyin tsihin yiqui naha rayii javahá ra tsi ña.⁹ Tan tsacatyi rayii, tan tsinu ñaha, tan ñavin tsacatyi ñaha tan tsinu rayii.¹⁰ Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yiñi ñi tsi ñi. Tan cuví tsi tsa vaha tsi ra ángel naha ra.¹¹ Maa tyin tyaa Nyoo cuhva tyin tsinu ñihu rayii tsi ñaha. Tan tsinu ñihu ñaha tsi rayii.¹² Nditsa tyin ñaha tsinu ña tsihin yiqui naha rayii jahá Nyoo. Maa tyin nda cuanda quivi can tan quitsahá tsahá Nyoo tsa coo sehe yiñi ña. Tan nda cuanda vityin juvin ñi maa Nyoo tsahá tsa coo nduvi taahan ñi, rayii tan ñaha.

¹³ Tyihi tuñi jihna iñi ndo tsa cuenda tuhun ihyá. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñihu?¹⁴ Tsitó yo tyin ticanuu cuví tsi tsa cuenda rayii tatum nañi jiñi ra.¹⁵ Maa tyin ñiñaha, vaha tsa nañi jiñi ñi tyin Nyoo tsahá ra tsa ndunañi tsi tan casi tsi jiñi ñi.¹⁶ Maa tyin tatum yoo cuñi cañi tahan tsa catyi tuhun ihyá, cuñi tsi coto ndo tyin ndi nyuhu tan ndi vehe ñihu Nyoo, nduve inga ca tuhun iyó.

Nu caahán ra Pablo tsihin nyivi Corinto tyin ña vaha cuhva tsatsí ñi Santa Cena

¹⁷ Yañi, inga tuhun cua cahan yu tsihin ndo tyin ña sii cuñi yu tsihin ndo; tyin tsa javahá ndo nu ndu iñi ndo, ña tsahá tsi tsa vaha tsi ndo, tan jativi tsi tsi ndo.¹⁸ Tyin catyí nyivi tsihin yu tyin cuhva tsa ndu iñi ndo tsa cua coo ndo culto, tan natahví sava ndo. Tan tsicán tucu iñi yu tyin vasiqui nditsa tsa caahán ñi.¹⁹ Vasiqui cuñi maa ndo tyin tsihin tsa natahví sava ndo tan quitivi ndáa nyoho tsinu vaha iñi tsi Nyoo!²⁰ Maa tyin tatum tacan ñi iyó tisihi nu yucú ndo, ñavin Santa Cena cuví can.²¹ Tyin cuhva tsa cua catsi ndo, tsatsí ñi ndo tsa ndahá ndo. Tan ña ndatú ndo nda cuanda ndu iñi tandihí nyivi. Tan yiñi ndo cuaha tsatsí ndo, tan nda cuanda tsisí ndo tsihin vinu. Tan yiñi nyivi ña ñihí ñi tsa catsi ñi jahá ndo.²² ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñihu Nyoo cuví can. Tan tsahá ndo ticanuu tsi nyivi

nduve tsa iyó tsi. ¿A taahán tsi catyi yu tsihin ndo tyin vaha cuhva jayahá ndo, cuñi maa ndo? Ña taahán tsi, tyin ña vaha tsa jayahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

²³ Tyin Jutu Mañi yo jacuahá tuhun ihyá tsi yu. Tan juvin yacan tsa yahá jacuahá yu tsi ndo. Tyin tsacuua tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihín ra iin paan,

²⁴ Tan tsa yahá nacuhvá ra tyahví nyoo tsi Nyoo tan tsahñu ra paan can. Tan catyí ra: “Catsí ndo paan ihyá tyin cuví tsi tumaa cuñu ñihu yu tyin tsa cuenda ndo tan cua cúu yu. Jayahá ndo tyehen tan nducuhun iñi ndo tsi yu”, catyí ra Jesús. ²⁵Tan tsa yahá tsa cuxiñi ra naha tan quihín ra Jesús vasu vinu tan catyí ra: “Tsihin vinu ihyá ndo Nyoo tyiñu tsihin ndo vityin, tyin vinu tsa yihí tsitsi vasu ihyá, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyí ra Jesús tsacuua can. ²⁶Tan tahan ñi tsa ndu iín yo tan tsatsí yo paan tan tsihí yo vinu jacotó yo tsi nyíví tyin tsacatyi cuatyí yo tsihi Jutu Mañi yo. Tan tacan jacotó yo tsi nyíví nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Tatan tsatsí yo paan tan tsihí yo vinu cuhva tsa ña taahán iñi Nyoo, tsicóo cuatyí yo. Tyin ña tyáyahvi yo tsa tsihí ra Cristo nu cruu tan tsa tsatí niñi ra. ²⁸ Yacan cuenda cuñi tsi jaha yo cuénda tatan vaha cuahán yo tsihi Nyoo tsa ndi cumañi ca catsí yo paan tan coho yo vinu. ²⁹ Tyin Nyoo tatsí tuní ra tsi yo tun tsatsí yo tan tsihí yo tan ña tsicá iñi yo tsa cuenda tsa tsihí ra Cristo. ³⁰ Tan tsa cuenda yacan cuaha xaan ndo cuuhví ndo tan nduve tunyee iñi iyó tsi ndo, tan juhva nyíví tahan ndo tsa yahá tsihí ñi. ³¹ Maa tyin tatan jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. ³² Maa tyin tatan tatsi tuñi Jutu Mañi yo tsi yo tacan, jayahá ra tacan tyin tacan tan ña cunaa yo tsihin nyíví iyó cuenda nu ñihu ñayíví ihyá.

³³ Tan tacan nyoho yañi, tatan cua ndu iin ndo tsa cua catsí ndo Santa Cena, cuatu tahan ndo tsi ndo tan catsí ndo tan coho

ndo iin caa ñi. ³⁴ Maa tyin tatan ndáa nyoho tsisocó ndo, catsí jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehe yu nu yucú ndo tan jandaa yu inga ca tuhun.

12

Ndatu tsa tsahá Tatyi li Nyoo tsi yo

¹ Yañi, cuñi yu tsa coto ndo náa ndihi ndatu tsahá Tatyi li Nyoo tsi tsa intuhun intuhun yo.

² Tsitó ndo tyin quivi tsa ñaha ca nacoto ndo tsi Nyoo, tsahá ndo tsa cundaca ñaha tsitoho tsa ña cuví cahan tsi ndo. ³ Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyi li Nyoo jacháñi tsi ra. Maa tyin ra tsa jacháñi Tatyi li Nyoo catyí ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyi li Nyoo tsahá itsi yo. ⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo jayahá yo. ⁶ Siin siin tyiñu jayahá tsa intuhun intuhun yo. Maa tyin intuhun ñi maa Nyoo cuví ra jatyinyee tsi tandihí yo tan jayahá yo can. ⁷ Tan tsahá ra tunyee iñi Tatyi li ra tsi intuhun intuhun yo tyin tacan tan jatyinyee yo tsi tandihí ca nyivi yihí cuenda ra. ⁸ Tsi juhva yo tsahá Tatyi li Nyoo tsa cahan yo tsihi tsa tsíñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. ⁹ Tan tsi inga yo tsahá ra tsa tsíñi xaan iñi yo tsi ra. Tan juvin ñi maa Tatyi li ra tsahá tunyee iñi tsi inga yo tsa janduvalha yo tsi nyíví cuuhví. ¹⁰ Tan tsi inga yo tsahá ra tunyee iñi tsa cuví jayahá yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyi li Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyíví. ¹¹ Tan tandihí yacan tsahá intuhun ñi maa Tatyi li Nyoo. Maa tyin siin tsa tsahá ra tsi tsa intuhun intuhun yo, nácaa cuñi maa ra.

Tandihí yo tan cuví yo intuhun ñi cuñu ñihu tsihi ra Cristo

¹² Tumaa cuñu ñuhu yo iyó jiñi tsí, iyó ndaha tsí, iyó tsaha tsí, maa tyin tandíhi tsí tan cuví tsí intuhun ñí cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ñí cuñu ñuhu ra cuví yo. ¹³ Tan tacan tucu tandíhi yo, a cuví yo nyiví Israel, a ñí Grecia, a ñí iyó tsitoho, a ñí nduve tsitoho, maa tyin tsa tsicoondutya yo tan nanduví yo intuhun ñí cuñu ñuhu ra Cristo tyin tsaha ra intuhun ñí maa Tatyi li ra coo tsihin tandíhi yo.

¹⁴ Tyin cuñu ñuhu yo ña cuvi cuvi tsí intuhun ñí maa tinuu tyin cuñi tsí tsa cunyecu tandíhi ca tsa cutahan tsihin tsí tan cuvi tsí cuñu ñuhu nii. ¹⁵ Tun tsatyin cuví cahan tsaha yo tan catyí tsí: “Yuhu nduve yahvi nyaá yu tyin ñavín ndaha cuví yu.” Ñavin tsa cua cahan tsí tacan tan ña cua cutahan ca tsí tsihin cuñu ñuhu can. ¹⁶ O tun tsatyin cuví cahan soho yo tan catyí tsí: “Yuhu nduve yahvi nyaá yu tyin ñavín tinuu cuví yu.” Ñavin tsa cua cahan tsí tacan tan ña cutahan ca tsí tsihin cuñu ñuhu can. ¹⁷ Tun tsatyin nanií cuñu ñuhu yo cuví tsí tinuu tan nduve soho yo, ¿nácaa cua cuñi yo? O tun tsatyin nanií cuñu ñuhu yo cuví tsí soho, ¿nácaa cua tahñí yo? ¹⁸ Maa tyin Nyoo tyaqá ra tan iin tan iin can nu cuñi maa ra. ¹⁹ Tatun nduve tsa intuhun intuhun tsa cutahan tsihin cuñu ñuhu can, ñavín cuñu ñuhu cuví can. ²⁰ Maa tyin tsa ndu ín soho, tinuu, jiñi, ndaha, tan tandíhi ca maa, tacan tan cuví tsí intuhun cuñu ñuhu.

²¹ Tinuu yo ña cuví catyí tsí tsihin ndaha yo: “Ña tsiñi ñuhu yooho tsí yu.” Tan ndi jiñi yo tan ña cuví catyí tsí tsihin tsaha yo: “Ña tsiñi ñuhu yooho tsí yu.” ²² Ña vaha tsa cahan tsí tacan tyin vasu iin tsa lighli tsá cuñi maa yo tyin ña tsiñi ñuhu tsí yu, yacan cuví tsa tsiñi ñuhu ca. ²³ Tan nu cuñi yo tyin ña sii caá, tyasí yo. Tan nu ña taahán tsi nyehé nyiví, yacan tyasí vaha ca yo. ²⁴ Tan nu sii caá, ña tyasí yo. Tacan javahá Nyoo cuñu ñuhu yo, tyin tacan tan jacaahní ca yo nu cuñi maa yo tyin ña sii caa. ²⁵ Tan tsa intuhun intuhun tsa iyó cuñu ñuhu yo, jahá cuenda tahan maa tsí itsi, yacan cuenda ña cuví cuiñi tsí. ²⁶ Tatun luxu cuñu ñuhu yo nyehé tundoho, nyehé ndíhi taníí ca cuñu ñuhu yo tundoho. Tan tatuñ sii cuñi luxu tsí, sii cuñi taníí tsí.

²⁷ Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. ²⁸ Tan Nyoo natyisó ra tsí intuhun intuhun yo vehe ñuhu tyin tacan tan jatyinyee tahan yo tsí yo. Tsa jihna ñí natyisó ra tsí ra caca tyiñu ra. Tsa tsinu uvi, natyisó ra tsí ra cuví ndusu yuhu ra. Tan tsa tsinu uñi, natyisó ra tsí ra jacuahá. Yahá can, tan natyisó ra tsí ra tsa javaha tsa iyo, tan natyisó tucu ra tsí ra tsa janduvaha nyiví cuuhví, tan ra tsa jatyinyee tsí nyiví, tan ra jaha cuenda vehe ñuhu, tan ra caahán inga yuhu tsa ña tsító ra. ²⁹ Ña tandíhi yo tan tsicá yo tyiñu ra Cristo. Ña tandíhi yo tan cuví yo ndusu yuhu ra. Ña tandíhi yo tan cuví yo ra jacuahá. Ña tandíhi yo tan javahá yo tsí iyo. ³⁰ Ña tandíhi yo tan tsahá Nyoo tunyee iñi tsa janduvahá yo tsí nyiví cuuhví. Ña tandíhi yo tan caahán yo inga yuhu tsa ña tsító yo. Ña tandíhi yo tan cuví nacotó yo tan nacatý tuhun yo náa cuñi tsí catyí tsa caahán inga nyiví. ³¹ Ndugu ndo cuhva naquihin ndo tsa vaha ca tsa tsahá Nyoo. Maa tyin cua janaha yu iin cuhva vaha ca tsí ndo.

13

Nu janahá ra Pablo nácaa taahán tsi cuñi yo tsí nyiví

¹ Tatun yuhu tan cuvi cahan yu cuaha ñí yuhu tsa caahán nyiví iyó nu ñuhu ñayiví ihya, tan cuví cahan tucu yu yuhu tsa caahán ángel, maa tyin tatuñ ña cuñi yu tsa Nyoo tan ndi tsí nyiví, cuví yu tumaa tyombo tsa nañí ñí maa o iin caa tsa tsacú ndaxin ñí maa. ² Tatun cuví cuhva cuenda yu tuhun caahán Nyoo, tan cuví coto yu tandíhi tuhun xeehe, tan tsító yu tandíhi tuhun, maa tyin tatuñ ña cuñi tucu yu tsa Nyoo tan ndi tsí nyiví, nduve náa catyí javaha yu tandíhi yacan. Tatun tsinú xaan iñi yu tsa Nyoo nda cuanda cuví cahan yu tsihin yucu na cuhun tsí inga ityí, tan cuá cuhun tsí, maa tyin tatuñ ña cuñi yu tsa Nyoo tan ndi tsí nyiví, nduve náa ra cuví yu. ³ O tatuñ cuhva yu tandíhi tsa iyó tsí yu tsí nyiví ndaaahvi, tan cuhva yu nda cuanda ñayiví yu tyin cucayu cuñu ñuhu yu, maa tyin tatuñ ña cuñi yu tsa Nyoo tan ndi tsí nyiví, nduve náa cua jatyinyee can tsí yu.

⁴Tatun nditsa tsa cuñí yo tsi Nyoo tan tsi nyivi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. ⁵Tatun nditsa tsa cuñí yo tsi Nyoo tan tsi nyivi, ña siquí iñi yo, tan ña nducú yo maa ñi tsa vaha tsi maa yo, ña cuxaan yo, tan ña ndoo tsihi tsitsi añima yo. ⁶Tatun nditsa tsa cuñí yo tsi Nyoo tan tsi nyivi, ña sií cuñí yo náa ndihí tsa ña vaha javahá ñi, maa tyin cusí iñi yo tsihin tsa vaha tan tsa nditsa. ⁷Tatun nditsa tsa cuñí yo tsi Nyoo tan tsi nyivi, cunyeé iñi yo neyeo yo tundoho jahá ñi, tan tsinú iñi yo tyin cua jahaha ñi tsa vaha tan ndatú yo tsa nasama ñi cuhva iyó ñi, tan ña cundihi iñi yo.

⁸Tsa cuñí yo tsi Nyoo tan tsi nyivi ña cua cundihi maa tsi, maa tyin coo quívi tsa ña cua cuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsíni ñuhu ca can tsi yo. ⁹Nyoo tsahá ra tsa coto yo luxu ñi vityin tan tsahá tucu ra luxu ñi tsa cuhva cuenda yo tsi nyivi, ¹⁰maa tyin quívi quitsi nyico ra Cristo, cua cundihi tsa tsitó yo luxu ñi tyin cua coto yo tandihí maa.

¹¹Quívi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quívi tsahnu yu nacoo yu tsa yu cuhva javahá ra nyihi. ¹²Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quívi cua quitsi ra Cristo, cua coto yo tandihí maa. Luxu ñi tsitó yu vityin, maa tyin quívi quitsi nyico ra, tandihí cui maa tan cua coto yu, tumaa nacotó maa ra tsi yu vityin. ¹³Iyó uñi taahan tsa ña cua ndihí maa: tsa tsinú iñi yo tsi Nyoo, tsa tsitó yo tyin nditsa tsa cua ñihí yo tandihí tsa cahan Nyoo tyin cuhva ra tsi yo, tan tsa cuñí yo tsi Nyoo tan tsi nyivi. Tan tsitsi tsa nduñi taahan tsehe, tsa tsiní ñuhu ca cuví tsa cuñí yo tsi Nyoo tan tsi nyivi.

14

Nu jacuahá ra Pablo nácaa cahan yo inga yuhu tsa ña tsitó yo

¹Jañihí ca ndo cuñí ndo tsi Nyoo tan tsi nyivi. Tan ndrucu ndo cuhva naquihin ndo ndatu tsa tsahá Tatyi li Nyoo tsi yo. Ndrucu jihna ndo tsa cuhva cuenda ndo tuhun Nyoo tsi nyivi. ²Tyin tun caahán yo inga yuhu tsa ña tsitó yo, tsihin Nyoo

caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyi li Nyoo. ³Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihí ca tsahnú ñi tsihin tuhun Nyoo. Tan ndu iñi ca iñi ñi jahá yo tan ndunyeé ca iñi ñi. ⁴Tatun caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun caahán Nyoo tsihin yo tsihin nyivi, tandihí ñi tsahnú.

⁵Yuhu cuñí yu tsa cahan tandihí ndo inga yuhu tsa ña tsitó ndo. Maa tyin vaha xaan ca tun cuvi cuhva cuenda ndo tsa caahán Nyoo, tyin jatyinyéé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatus iñi ndo cuví nacoto ndo nácaa caahán inga ndo tsihin inga yuhu, nacatyi tuhun ndo tsihin ñi. Tacan tan cuví jatyinyee tsi tsi tandihí ñi. ⁶Yacan cuenda yañi, tatus yuhu tan tsaa yu nu yucú ndo, tan cahan yu inga yuhu, ña cua jatyinyee tsi tsi ndo. Maa tyin tun cahan yu tsa janaha Nyoo tsi yu, o tsa jacotora tsi yu, o tsa tsahá ra tyin cuhva cuenda yu tsi ndo, o tsa jacuaha yu tsi ndo, cua jatyinyee tsi tsi tandihí ndo.

⁷Tatun tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. ⁸Tan tatus nu iyó cuatyi tan ña vaha tiví ra cutu, yoñi cua coto náa cuhva cua cañi tahan ra naha. ⁹Tan tacan tucu yoo, tatus caahán yo inga yuhu tsa ña cutuñi iñi nyivi, ña cua coto ñi náa caahán yo. Tan cua catyi ñi tyin jiñi yo ña vaha cuñí, yacan caahán maa yo. ¹⁰Cuaha xaan yuhu caahán nyivi nu ñuhu ñayivi ihyá. Tan intuhun intuhun nuu yuhu tan iyó iyó ñi tsa cuñí tsi catyi. ¹¹Maa tyin tun ña cutuñi iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu. ¹²Yacan cuenda nyoooho tsa cuñí xaan naquihin ndatu tsa tsahá Tatyi li Nyoo, ndrucu ndo cuhva naquihin ndo tunyee iñi tsa cuvi jatyinyee vaha ca tsi nyivi yucú vehe ñuhu.

¹³Tacan tucu nyoooho tsa caahán inga yuhu, ndacan ndo tsi Nyoo na cuhva ra ndatu tsa nacatyi tuhun ndo tsihin nyivi náa cuñí tsi catyi. ¹⁴Tyin tatus tsicán tahvi

yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñi iñi tsi.
¹⁵ Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan cata ndihi tucu yu yaa tsihin yuhu tsa cutuñi iñi yu. ¹⁶ Tyin tatum jacahnú un tsi Nyoo tsihin maa ñi maa yuhu tsa tsahá Tatyí li Nyoo tsi un, ña cua cutuñi iñi nyiví tsa ña tsító náa cuví yacan. Tan ña cua cuvi jacahnú ñi tsi Nyoo tsihin un.
¹⁷ Vasu ndi maa vaha tsa caahán un, cuhva tsa nacuhvá un tyahvi nyoo tsi Nyoo, maa tyin ña jatyinyéé tsi tsi inga nyiví tyin ña cutuñi iñi ñi tsa caahán un. ¹⁸ Tan yuhu nacuhvá yu tyahvi nyoo tsi Nyoo tyin cuaha ca tsaha caahán yu inga yuhu tan ñavin ca tandihí nyoho. ¹⁹ Maa tyin vaha ca cuñi yu cahan yu vasu uhun taahan ñi tuhan tsitsi vehe ñuhu tan ñavin ca tsa cahan yu utsi mil tuhan tsihin inga yuhu, tyin vasu cuaha tuhan cua cahan yu tsihin ndo ña cua jatyinyee can tsi ndo tyin ña cutuñi iñi ndo.

²⁰ Tsahnu caca iñi ndo, yañi. Tan ña lee xaan caca iñi ndo. Maa tyin tatum javaha ndo náa javaha ndo, javaha ndo tumaa javahá lee tyin lee ña javahá tsi tsa caquñi. ²¹ Catyí Nyoo nu libru ley ra tyehen: "Cua cahan yu tsihin nyiví ihyá tsihin yuhu nyiví inga ñuu tan tsihin inga yuhu tsa ña tsító ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu", catyí Jutu Mañi yo. ²² Yacan cuenda tsa caahán yo inga yuhu cuví tsi tumaa iin seña tsa cuenda nyiví tsa ña tsímú iñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyiví tsa tsímú iñi tsi ra. ²³ Tyin tatum tandihí ndo caahán ndo inga yuhu nu ndu iin ndo, tan quihví iin nyiví tsa ña yihí cuenda Nyoo, o ñi tsa ña cutuñi iñi tuhan Nyoo, cua catyí ñi tyin jiñi ndo ña vaha cuñi. ²⁴ Maa tyin tatum tandihí ndo tsahá cuenda ndo tsa caahán Nyoo tan quihví iin nyiví tsa ña yihí cuenda Nyoo, a ñi tsa ña cutuñi iñi tuhan Nyoo, cua coto ñi tyin iyó cuatyí ñi tsa cuenda tsa cutuñi iñi ñi tsa caahán ndo. ²⁵ Tan tandihí tsa iyó tsitsi añima ñi cua nacoto ñi, tan cua cuñi tsító ñi jacahnú ñi tsi Nyoo. Tan cua catyí ñi tyin nditsa nditsa cuiii tsa nyaá Nyoo tsihin

ndo.

Nacaa jayahá yo culto iin cuhva vaha

²⁶ Yacan cuenda yañi, tatum cua ndu inndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuahá ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhan ndo naa cuñi tsi catyí inga yuhu can. Maa tyin tandihí yacan taahán tsi cuvi tsi iin tsa tsahá tunyee iñi maa Nyoo tsi tandihí ndo tsa yihí ndo cuenda ra. ²⁷ Tatum cua cahan ndo inga yuhu nu ndu iín ndo, cuñi tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihí ndo juvin ñi cuhva tsa caahán inga ndo. Tan inga tucu tuhan cuñi tsi tsa nacatyí tuhan inga ndo tsa caahán ndo. ²⁸ Maa tyin tun yoní cuví nacatyí tuhan tsa caahán ndo, vaha taxin ca, ña cahan ndo tsihin inga yuhu nu ndu iín ndo. Cahan ndo tsihin Nyoo tsihin inga yuhu tun cuñi ndo, maa tyin ndihi cuhva tsíñi ñi maa ndo. ²⁹ Tacan tucu tatum tsahá cuenda yo tsa caahán Nyoo. Cahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. ³⁰ Maa tyin tatum jacoto Nyoo náa inga ca tuhan tsi inga nyivi tsa yucú tsíñi tuhan caahán ndo, tacan tan ra tsa nyaá caahán can, cuñi tsi jandihí ra tsa caahán ra tan cahan inga ñi. ³¹ Tan tacan tandihí nyoho tsa naquihín tuhan tsa tsahá Nyoo cuví nacatyí tuhan intuhun intuhun ndo, tyin tacan tan cutuhva tandihí nyoho tsa ndu iín vehe ñuhu tan ndu iin ca iñi ndo. ³² Nyoho tsa tsahá cuenda tsa caahán Nyoo, cuví cuatu nuu ndo nda cuanda ndihi cahan inga nyivi, ³³ tyin Nyoo ña cuñi ra tsa tavi tahan ña cahan ndo, tyin maa ra catsi iyó ra.

Quihin ndo cuhva iyó inga ca vehe ñuhu nu ndu iín nyiví yihí cuenda ra Cristo, ³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yií ñi tumaa catyí ley Nyoo. Tan tacan taahán tucu tsi javaha nyoho. ³⁵ Tatum náa cuñi ñi coto ñi, na ndaca tuhan ñi tsi yií ñi nda yuvehe ñi, tyin ña vaha tsa cahan ñiñaha nu ndu iín ndo.

³⁶ Tatum siñin cuhva tsicá iñi ndo, cuñi tsi nducuhún iñi ndo tyin ñavin nu yucú ndo quitsahá tuhan Nyoo. Tan ñavin nyoho ñi naquihín tuhan Nyoo. ³⁷ Tatum ndáa

nyooho cuñí tyin ndusu yuhu Nyoo cuvíndo, o cuñí ndo tyin Tatyi li Nyoo jaquihín ityi tsi ndo, tun nditsa tsa cuvíndo yacan, cua nacoto ndo tyin tsa caahán yu tsihin ndo ihyá, tsa tsahá maa Jutu Mañi yo tyin culva cuenda yu tsi ndo cuví. ³⁸ Maa tyin tatum ña cuñí ndo naquihín ndo tuhun ihyá, ndi nyuhu tan ña cua naquihin ndi tuhun caahán nyoho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña casí ndo nu cahan nyivi inga yuhu. ⁴⁰ Maa tyin jahava ndo tandihí tsihin tsa vii tan tsa catsi.

15

Nacaa nandoto ra Cristo

¹ Vityin yañi, cuñí yu tsa nducuhun iñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihin ndo itsi tan nii iñi añima ndo tsinú iñi ndo. ² Tan juvin tsa cuenda tuhun ra Cristo cacú añima ndo tun ndi tsinú iñi ndo cuhva jacuahá yu tsi ndo. Maa tyin tun ña tsinú ca iñi ndo cuhva jacuahá yu tsi ndo, nduve yahvi nyaá tsa natsinú iñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyi yu tyin tsihí ra tsacatyi cuatyi yo, tumaa catyi nu libru Nyoo tyin cua cuvi. ⁴ Tan quihví cuñú ñuhu ra tsitsi ñuhu. Maa tyin tsinú uñi quivi nandoto ra tumaa catyi nu libru Nyoo.

⁵ Tan tsa yahá tan quituví ra nuu ra Pedro tan quituví ndihí ra nuu tandihí ra tsicá tyiñu ra. ⁶ Yahá can tan quituví ra nuu yaha ca uhun cientu nyivi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin. ⁷ Yahá can tan quituví ra nuu ra Jacobo. Tacan tan quituví ndihí ra nuu tandihí ra tsicá tyiñu ra.

⁸ Tan nu ndihí ña quituví ndihí ra nuu yuhu, tsa cuví yu tumaa iin lee tsa cacu yutya. ⁹ Tyin tsa nuu tandihí ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaq ndaha xaan yu tsi nyivi yihí cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsahá ra ndatu tsa cuvi yu ra tsicá tyiñu ra tan ña cuata tsahá ra tyiñu tsi yu, tyin cuaha ca tyiñu jahavá yu tsihin tsi tan ñavin ca tandihí ra nahua. Maa tyin ñavin tsihin tunyee iñi maa

yu jahavá yu can tyin maa tunyee iñi Nyoo tsa iyó tsihin yu jahavá can. ¹¹ Maa tyin nduve cuenda tun yuhu, a inga ra caahán tsihin ndo, tyin tuhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyí

¹² Tsa caahán ndi tsihin ndo yacan cuví tsa nandoto ra Cristo tsa yahá tsihí ra tan ¿Nacuenda yihí ndo catyí ndo tyin ña nandoto ndiyí? ¹³ Tyin tatum ña cua nandoto ndiyí, ndi ra Cristo tan ña nandoto ra quivi can. ¹⁴ Tun tsatayin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatayin ña nditsa tsa janandoto Nyoo tsi ra Cristo, cuví ndi iñi ra vatya tyin catyí ndi tyin janandoto Nyoo tsi ra. Tan tatum ña nditsa tsa nandoto ndiyí, ña nditsa tsa janandoto Nyoo tsi ra Cristo. ¹⁶ Tyin tun ña cua nandoto ndiyí, ndi ra Cristo tan ña nandoto ra. ¹⁷ Tan tatum ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jahára tucahuu iñi cuatyí ndo. ¹⁸ Tan ndi nyivi tsa tsihí tsa yihí cuenda ra ña cacu ñi tun ña nditsa tsa nandoto ra. ¹⁹ O tun nu ñuhu ñayivi ihyá ñi jatyinyéé ra tsi yo, tan ña cua quitsi ra inga tsaha, nduve yahvi nyaá tsinú iñi yo tan cuví yo nyivi soho ca tsa nuu tandihí ca nyivi.

²⁰ Maa tyin tsitó vaha yo tyin nditsa tsa nandoto ra Cristo. Tan juvin ra cuví ra tsa nandoto jihna ca tsitsi tsa tandihí ca ndiyí tsa cua nandoto. ²¹ Tyin tsacatyi cuatyí ra Adán tan tsicog tuhun tsiihí. Tan yacan tsiihí nyivi nda cuenda vityin. Maa tyin tsa cuenda tsa nandoto ra Cristo cua nandoto tandihí nyivi yihí cuenda ra. ²² Tyin tumaa tsa tandihí yo tsiihí tyin cuví yo tata ra Adán, tacan tucu cua nandoto tandihí yo tan coo yo ñayivi nyito tyin cuví yo nyivi ra Cristo. ²³ Maa tyin cua nandoto yo quivi taahán tsi tsi yo. Jihna ca ra Cristo nandoto. Tan quivi quitsi ra inga tsaha cua nandoto ñi yihí cuenda ra. ²⁴ Yaha can tan cua naa ñuhu ñayivi ihyá tan ña cua cundaca ñaha ca ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihí nahnu, tan cua nacuhva cuenda ra can tsi Nyoo Jutu ra. ²⁵ Tyin

ra Cristo cua cundaca ñaha ra nda cuanda quíví cuhva Nyoo tsa cuvi jaha canaa ra tsi tandíhi nu xaan iñi tsi ra nahnu.²⁶ Tan nu tsa cua janaa ra nu ndíhi ña, nu ican cuví tuhun tsíihí.²⁷ Tyin tsa tsahá Nyoo tsa quíhi ndaha ra tandíhi maa tsa iyó. Maa tyin nu catyí tyin tandíhi nacuhva cuenda Nyoo tsi ra Cristo, ña cuñí tsi catyí tyin quíhi ndaha ndíhi ra tsi maa Nyoo tyin maa Nyoo cuví ra tsaha tsa quíhi ndaha ra tandíhi maa tsa iyó.²⁸ Maa tyin quíví jaha canaa ra Cristo tandíhi can, tacan tan maa ra, tsa cuví ra Sehe Nyoo, cua nacuhva cuenda nyico ra tandíhi tsa tsahá Nyoo tsi ra. Tyin tacan tan cundaca ñaha Nyoo tandíhi maa tsa iyó.

²⁹ Tun tsatyin ña nandoto ndiyi, ¿nacuenda tyin juhva nyívi tsicoondutýá ñi tsa cuenda ndiyi? ¿Tan nacuenda javahá ñi tyehen tun ña tsinú iñi ñi tyin coo quívi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenda tyin ndoo ndi vaha tsa nyehé ndi tundoho ndíhi quívi ñi?

³¹ Tandíhi ñi quívi nducú nyívi tsi yu cahñi ñi, tan tsa nditsa cuví tsi, yañi, tumaa tsa nditsa tsa sií cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo.

³² Nduve náa catyí tsa nyehé yu tundoho tsa cuñí cahñi nyívi tsi yu ñuu Éfeso tun ña cua nandoto yo. Tatun tacan, nditsa maa tsa caahán nyívi: “Catsi yo, coho yo tyin tyaan isa cua cíu yo”, catyí ñi tsa ña tsító.

³³ Tan catyí tucu ñi tyin: “Tun cutahán yo tsihin nyívi caquiñi jatívi ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyívi tsi ndo.³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsító ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quívi quitsi nyico ra Cristo

³⁵ Maa tyin yihi ndo cua ndaca tuhun ndo: “¿Nacaa cua nandoto ndiyi? ¿Nacaa cuñú ñuhu ñi cua cuvi?”³⁶ ¿Nacaa tsa soho xaan ndo? ¿A ña tsító ndo tyin tatum tatsi yo in tsiti, cuñí tsi tsa tyahyu jihna tsi? Tacan tan cana nuu tsi.³⁷ Tyin tsa tatsi yo nuñi, ñavin tsa cuví maa tsi itu tan tatsí yo. Tyin nuñi cuví tsi tatsí yo tan tacan ñi cuñí tucu

yo tsihin náa inga ca tsiti.³⁸ Nyoo javahá ra nácaa cuñí maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuvi tsi. Tan ña cuvi nanduvi tsi inga ca tsiti.³⁹ Tan tacan tandíhi cuñú ñuhu, ña inducú caá tsi, tyin cuñú ñuhu nyívi, siín caá tsi, tan cuñú ñuhu quíti nahnu, siín caá tucu can, tan cuñú ñuhu saa, siín caá tucu yacan, tan tyaca siín caá tucu can.⁴⁰ Tan tacan tucu tsa iyó andívi, siín caá tsi. Tan siín caá tucu tsa iyó nu ñuhu ñayívi ihyá. Sií xaan caá tsa iyó nda andívi, tan siín tyaquí tucu tsa iyó nu ñuhu ñayívi ihyá.⁴¹ Tsa nditsin ñicanyii, tan tsa nditsin yoo ña inducú tsi. Tan ña inducú tsi tsihin tsa nditsin tiñuu. Tan tsa nditsin tiñuu ña inducú tsi tsihin inga nyico tiñuu.⁴² Tan tacan tucu tuhun tsa cua nandoto ndiyi. Tuhvá yo tsicutsí cuñú ñuhu tan tyaahyú tsi. Maa tyin tsa cua nandoto yo ña cua cíu ca yo.⁴³ Cuñú ñuhu tsa iyó tsi yo vityin nduve tunyee iñi iyó tsi can, nacuhví can, tan tsíihí can. Maa tyin cua nandoto iñi tsa sií caá tan iyó ca tunyee iñi tan ña cua cíu ca can.⁴⁴ Tsa tsíihí yo tsicutsí yo cuñú ñuhu tsa naquihín yo nu ñuhu ñayívi ihyá. Maa tyin tsa cua nandoto yo cua cuhva Nyoo inga cuñú ñuhu tsi yo. Iyó cuñú ñuhu cuenda nu ñuhu ñayívi. Tan iyó tucu cuñú ñuhu cuenda gloria.

⁴⁵ Catyí tutu Nyoo tyin ra Adán ra tsa tsico tsa jihna ñi, tsahá Nyoo ñayívi coo ra. Tan ra Cristo cuví ra tumaa ra Adán maa tyin ñavin cuñú ñuhu tsahá ra tsi yo tyin tsahá ra ñayívi nyito coo yo, tyin juvin ra cuví Tatyí li.⁴⁶ Tsa jihna ñi taahán tsi coo yo tsihin cuñú ñuhu cuatyí yo, yaha can tan coo yo cuenda Tatyí li Nyoo.⁴⁷ Rayíi tsa tsinú tsa jihna ñi, tsihin nyaca ñuhu tsinú ra. Tan cuví ra cuenda ñuhu ñayívi. Maa tyin ra Cristo cuví ra tumaa rayíi tsa tsinú uvi tan cuví ra cuenda gloria.⁴⁸ Tandíhi yo iyó cuñú ñuhu yo tumaa tsico cuñú ñuhu ra Adán tsa tsinú tsihin nyaca ñuhu. Maa tyin tsa cua nandoto yo cuñú ñuhu yo cua nanduvi tsi tumaa cuñú ñuhu ra Cristo ra iyó nda andívi.⁴⁹ Tumaa ndacu yo tsi rayíi, ra tsa tsinú tsihin nyaca ñuhu, tacan tucu cua ndacu yo tsi ra Cristo ra iyó nda gloria.

⁵⁰ Tan cuñí yu cahan yu tsihin ndo, yañi, tyin cuñú ñuhu yo ña cuví quíhví tsi nu ndacá ñaha Nyoo, tyin iñi tsa yatyí tiví ña cuví quíhví can nu yihi tsa ña tuhvá tiví.

⁵¹ Tan cuñí tucu yu tsa coto ndo iin tsa xeehe tsa yoñi maa tsitó. Ña tandihí yo cua cíu, maa tyin tandihí yo tan cua nasama cuhva caá yo. ⁵²Tan nu cua ndihí tiví ángel trompeta, cua nandoto ndiyí iin yaha cuií ñi tumaa tsa ndaahvá tinuu yo. Tyin cua tiví ra trompeta tan cua nandoto nyíví tsihí tsa ña cua cíu ca maa. Tan Nyoo cua nasama ra cuhva caá yo tun ndi iyó ca yo. ⁵³Tyin cuñí tsi tsa nasama Nyoo cíuñ ñuhu yo tsihin iin tsa ña cua naa maa. ⁵⁴Tan quíví cua nasama cuñú ñuhu yo tan cua ñihí yo iin tsa ña cua tiví maa, cua cundaa tsa caahán tuhun Nyoo nu catyí tsi tyehen:

"Nyoo jahá canaa ra tsi tuhun tsiihí."

⁵⁵ Yooho, Tuhun Tsiihí, ¿náa tunyee iñi tsa tsicoq tsi un tyin cahñí un tsi ndi?

¿Náa jahá canaa un, yooho Tuhun Tsiihí?

⁵⁶Tyin cuatyí yo tsahá can tsa cahñí tuhun tsiihí tsi yo, tyin ley tsahnu tsahá tunyee iñi tsi can. ⁵⁷Maa tyin tyahví nyoo tsi Nyoo, yañi, tyin jaquitsí ra tsi Jutu Mañi yo Jesucristo tan tsahá ra tunyee iñi tsi yo tsahá canaa yo tsi nu tuhun tsiihí can.

⁵⁸Yacan cuenda yañi, cunyaa naa vaha ndo tsi Nyoo tsihin tsa níi iñi añima ndo. Tan jañihí ca ndo jaha tysiñu ndo tysiñu Jutu Mañi yo. Tyin tun jahá tysiñu yo tysiñu Jutu Mañi yo, ña jahá tysiñu cuatu yo.

16

Nu tsahá cuenda ra Pablo tsi nyíví nácaa taahán tsi jatyinyee ñi tsi inga ñi yihí cuenda Nyoo

¹Tan tuhun tsa jatyinyéé ndo xuhun tsi nyíví ndaahvi, ñi yihí cuenda Nyoo, javaha ndo tumaa tsahá cuenda yu tsi nyíví tsicá vehe ñuhu ñuu tsa cayucú Galacia. ²Jandu iin ndo xuhun tsa taahán tsi cuhva ndo tsi ñi tahan tahan una quíví nácaa tsahá maa Nyoo tsi ndo. Tan ña cuatu ndo nda tsaas yu. ³Tan nacatsí ndo ndáa ra cuñí maa ndo tyin cundaca xuhun can. Tan tsa tsaas yu, cua javaha yu iin carta tyin cundaca ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. ⁴Tan tatan tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndihí nu cua cahan ra tuhun ra Cristo

⁵Tsa cua quitsí yu nu yucú ndo ñuu Corinto, cua yaha yu ityi Macedonia. ⁶Tatun

cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatyinyéé ndo luxu tsi yu tan cuhun yu inga ñuu. ⁷Ña iin yaha ñi cua yaha yu nu yucú ndo tyin cuñí yu ndoo yu juhva quíví tsihin ndo tatus Jutu Mañi yo tan cuñí ra. ⁸Maa tyin cua cunyii yu ñuu Éfeso ihya nda cuanda yaha quíví vico Pentecostés tsa jacahnú nyíví Israel. Tacan tan cua quitsí yu nu yucú ndo. ⁹Cua ndoo yu juhva quíví ihya tyin tsahá xaan tsi cuhva caahán yu tuhun Nyoo tsihin nyíví vasu ndi maa cuaha ñi ña taahán iñi ñi tuhun ra.

¹⁰Tatun tsaa ra Timoteo nu yucú ndo, na cunyii ra tsihin ndo. Tan vaha tyanuu ndo tsi ra tyin juvin ñi tysiñu Jutu Mañi yo jahá tysiñu ra tumaa maa yu. ¹¹Tan vaha cuñí ndo nyehé ndo tsi ra. Tan jatyinyee ndo tsi ra na quitsí ra nu nyí yu tyin ndatuyu tsi ra tsihin inga ca ra yañi yo naha ra.

¹²Tan ra Apolos yañi yo, cahán ndaahvi xaan yu tsihin ra na quitsí ra nu yucú ndo tsihin inga ca ra yañi yo naha ra. Maa tyin ña cuñí ra quitsí ra. Catyí ra tyin quitsí maa ra nda cuhva tsi cuhva tsi ra.

Nu tsahá ra Pablo nacumi tsi tandihí nyíví yihí cuenda Nyoo ñuu Corinto

¹³Jañihí ca ndo tsinú iñi ndo tsi Nyoo. Tan jañdu iin ca ndo iñi ndo, tan na coo ca tunyee iñi Nyoo tsi ndo. ¹⁴Tandihí tsa javahá ndo, javaha ndo tsa cuenda tsa cuñí ndo tsi Nyoo tan tsi nyíví yihí cuenda ra.

¹⁵Yañi, tsító ndo tyin jihna ca nyíví ra Estéfanas nátsinú iñi tsi ra Cristo ityi Acaya nu yucú ndo. Tan vityin javahá ñi tysiñu nuu ra hermano. ¹⁶Tan cuñí yu tsa jaha ndo tsa ñayíví tsi nyíví tsa iyó tumaa iyó nyíví ra Estéfanas, tan tsi tandihí ca ñi tsa jatyinyéé tan jahá tysiñu cuenda Nyoo. ¹⁷Tan sii xaan cuñí yu tyin quitsí ra Estéfanas, ra Fortunato, tan ra Acaíco. Tan jatyinyéé ra naha tsi yu tyin nyoho ña cuví quitsí ndo tyin cañi xaan ñuu ndo. ¹⁸Maa tyin maa ra naha quitsí ra naha. Tan jandunyee ca ra naha iñi yu tsihin tuhun Nyoo, tumaa tsa jandunyee tucu ra naha iñi nyoho. Tan vaha cuñí ndo nyehé ndo tysiñu jahá ra naha tyin iin ñi tsi maa Nyoo nyicún ra naha.

¹⁹Tan vatsí nacumi tsi ndo jahá tandihí nyíví yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra

Aquila tan ña Priscila, tan ñi yihí cuenda Nyoo tsa ndu iín yuvehe ñi. ²⁰Vatsí nacumi tsi ndo jahá tandihí ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

²¹Tan yuhu ra Pablo tsahá yu nacumi tsi ndo tan tyaq yu itsi tsihin ndaha yu.

²²Tatun ndáa nyiví ña cuñí tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, náhal!

²³Tan na nasoco Jutu Mañi yo Jesucristo tsi tandihí ndo. ²⁴Tan catyí yu tsihin ndo tyin yuhu cuñí yu tsi tandihí ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Nuu Corinto

*Nu tyáá ra Pablo iin carta cuenda nyivi
yihí cuenda Nyoo nuu Corinto*

¹Yuhu ra Pablo, cuví yu iin ra tavá tyiñu ra Cristo Jesús tyin maa Nyoo nacatsi tsi yu. Yuhu tan ra Timoteo, yañi yo, jaquitsí ndi carta ihyá tsi ndo tsa cuví ndo nyivi yihí cuenda Nyoo tsa iyó nuu Corinto tsa canyí Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú naníi cahnu Acaya. ²Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu nyehé xaan ra Pablo tundoho nu tsicá ra
caahán ra tuhun ra Cristo*

³Na jacañnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusíi ra iñi yo tandihí ñi tsaha. ⁴Nyuhu nyehé xaan ndi tundoho maa tyin maa ra jandusíi iñi ndi. Tyin tacan tan cuvi jandusíi ndi iñi nyivi nyehé tundoho tumaa jandusíi maa ra iñi ndi. ⁵Tyin nyehé ndi tundoho tsa cuenda ra Cristo, tan juvin ñi tsa cuenda ra jandusíi Nyoo iñi ndi. ⁶Yacan cuenda tatuñ nyehé ndi tundoho tsa cuenda tsa jacoto ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusíi Nyoo iñi ndo, tan jacacu ra tsi ndo. Tatuñ jandunyee Nyoo iñi ndi, javahá ra tacan tyin tacan tan ndunyee tucu iñi nyoho tan jacacu ra tsi ndo tan cuví cunyee iñi ndo nyehé ndo tahan tundoho nyehé ndi. ⁷Tyin tsitó vaha ndi tyin jandusíi ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸Yañi, cuñí ndi tsa coto ndo tyin cuaha xaan tundoho nyehé ndi tsa tsiyucu ndi ñuhu Asia. Ñihí xaan nducu cuhva nu ña vaha tsi ndi tan tsicá iñi ndi tyin ña cua cunyee maa iñi ndi cuyucu ndi ican. Tan cuñí maa ndi tyin cua cíu ndi tsa ndi cumañi ca quita ndi ican. ⁹Tsa nyehé ndi tyin tsa cuñí cíu ndi tan ña cuví jacacu ndi

tsi ndi tsihin tunyee iñi maa ndi. Tacan tan cutuñi iñi ndi tyin cuñí tsi tsa cuita ca iñi ndi tsi Nyoo, ra janandotó ndiyí, tan ña cuita iñi ndi tsi maa ndi. ¹⁰Nyoo jacacu tsi ndi quiví can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi, ¹¹tun nyoho tan ña jandihí ndo tsa jatyinyé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatum cuaha nyivi tsicán tahvi tsa cuenda ndi, tsa cua ñihí tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

*Nu caahán ra Pablo nacuenda ña tsahan ra
ñuu Corinto*

¹²Iyó iin tuhun tsa tsahá tsa siíi xaan cuñí ndi tan tuhun ihyá cuví tsa cuítí iyó ndi, tan ndaa iyó ndi tsihin tandihí nyoho, tan tsihin tucu inga ca nyivi. Maa tyin ñavin tsihin tsa tsíi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. ¹³⁻¹⁴Nu tutu tsa tsa yaha jaquitsí ndi tsi ndo, tyáá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñí ndi tsa cutuñi vaha ca iñi ndo tandihí tuhun can tyin tacan tan siíi cua cuñí ndo tsihin ndi quiví quitsi Jutu Mañi yo Jesucristo. Tan siíi cua cuñí tucu nyuhu tsihin nyoho.

¹⁵⁻¹⁶Tsa cuenda tsa tsitó vaha yu tyin tacan cua cuvi: tyaa yu cuhva tyin tsa cua cuhun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cuhun yu Macedonia tyin tacan tan cuví cusíi iñi ndo. Tan tsicá tucu iñi yu tyin yaha can tan cuvi jatyinyee ca ndo tsi yu tan cuhun yu Judea. Tyehen tyaa yu cuhva javaha yu, maa tyin ña cuvi. ¹⁷¿A cuñí maa ndo tyin ña tyáá yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyí ñi tyin vaha, maa tyin tsitsi añima ñi catyí ñi tyin ña vaha. Caahán ñi nduvi tuhun can tsa iin ñi cuhva. ¹⁸Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. ¹⁹Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra.

²⁰Tan tsa cuenda ra ñihí yo tandihí tsa vaha tsa catyi Nyoo tyin cuhva ra tsi yo. Yacan cuenda tsa jacaahnú yo tsi Nyoo, catyí yo tyehen: “Na cuvi tsi tacan”. Tyin tsító yo tyin tsahá ra tsa vaha tsi yo tsa cuenda ra Cristo. ²¹Nyoo cuví ra tsahá tunyee iñi tsi nyuhu tsa cuenda ra Cristo, tan tsahá ndihí tucu ra tunyee iñi tsi nyoho. Nacatsi ra tsi yo, ²²tan tsaha ra Tatyi Ií ra coo añima yo, tan cuví tsi tumaa iñi tuiñ tsa tyaa ra tsi yo tan janahá tsi tsi yo tyin cuá níhi yo tsa cuá cuhva ra tsi yo.

²³Ñaha ca maa quitsi nyico yu nu yucú ndo, tyin ña cuñí yu janducuuihya yu iñi ndo. Tsító maa Nyoo tyin nditsa tsa caahán yu. Tan tatuń ña nditsa yu, na nyehe maa Nyoo náa cuñí ra tsihin yu. ²⁴Caahán ndi tandihí tuhun ihyá tsihin ndo tsa cuenda tsa cuñí ndi jatyinyee tahan yo tsi yo tan coo ca tusii iñi Nyoo tsi ndo. Ña cuñí ndi quihi ndaha ndi tsi ndo tyin nyoho tsa tsinú vaha maa iñi ndo tsi Nyoo.

2

¹Yacan cuenda ña cuñí yu quitsi yu tyin tacan tan ña cuhva ca yu tucuuihya iñi tsi ndo. ²Tyin tatuń yuhu tan janducuuihyá yu iñi ndo, yoñi cua jandusii iñi tsi maa yu. Tyin nyoho ña cuvi ca jandusii ndo iñi yu tun tsa yahá janducuuihyá yu iñi ndo. ³Yacan cuenda carta ñi jaquitsi yu tsi ndo. Ña cuñí yu quitsi yu tyin ña cuñí yu janducuuihyá ndo iñi yu tsihin cuhva iyó ndo. Tyin taahán tsi jandusii ndo iñi yu. Tyin tatuń sii cuñí yuhu, tsító yu tyin tandihí yo tan sii cuñí yo. ⁴Quivi tsa tyaa yu carta can tsa cuenda ndo, tsicá xaan iñi yu. Cuiihya xaan cuñí yu tan nda cuando tsacu yu. Jaquitsi yu carta can tsi ndo maa tyin ñavin tsa cuenda tsa janducuuihyá yu iñi ndo. Jaquitsi yu can tsa cuenda tsa cuñí yu tsa coto ndo tyin cuñí xaan yu tsi ndo.

Nu tsahá cuenda ra Pablo tsi nyivi nácaa taahán tsi jaha ñi tucahnu iñi

⁵Ra tsa tsahá tucuuihya iñi, ñavin yuhu ñi janducuuihyá ra iñi. Tyin janducuuihyá tucu ra luxu iñi nyoho. Caahán yu tyehen tyin tacan tan ña cuñí ndo tyin ña cuvi coo tucahnu iñi tsi ra javahá tacan. ⁶Tsa iyó vaha ñi. Ña cahan ca ndo tsi ra can. Ña tatsi tuñi ca ndo tsi ra. ⁷Vityin taahán tsi jaha ndo tucahnu iñi tsi ra tan naquihin ndaahvi

ndo tsi ra, tyin tacan tan ña cuiihya xaan ca cuñí ra. ⁸Yacan cuenda cuñí yu tsa cahan ndo tsihin ra tan janahá ndo tsi ra tyin ndi cuñí ndo tsi ra. ⁹Jaquitsi yu carta can tsi ndo quihi can tyin cuñí yu coto yu tatum cua tyaa yahví ndo tsa tsahá cuenda yu tsi ndo. ¹⁰Tan vityin nyivi tsa jahá nyoho tucahnu iñi, jahá tucu yuhu tucahnu iñi tsi ñi. Tatum iyó ñi tsa taahán tsi jaha yo tucahnu iñi, jahá yu tucahnu iñi tsi ñi tsa cuenda tsa vaha tsi maa ndo. Tacan javahá yu nuu ra Cristo. ¹¹Tyin tacan tan ña cuvi jaha canaa nu ña vaha tsi yo. Tyin tsító vaha yo nácaa cuñí nu jandavi ñaha nu tsi yo.

Ra Pablo ña ndoo ro ñuu Troas tyin ña nañihí ra tsi ra Tito

¹²Quivi tsaa yu ñuu Troas tsa cua cahan yu tuhun tsa jacacú ra Cristo tsi yo, tsaha xaan tsi cuhva tsi yu tsa jahá tyiñ yu tyiñ Jutu Mañi yo. ¹³Maa tyin tuñu xaan cuñí yu, tyin ña nañihí yu tsi ra Tito, yañi yo. Yacan cuenda vatsí yu ityi Macedonia ihyá tan ña ndoo yu ndacan cahan yu tsihin nyivi.

Nu caahán ra Pablo tuhun ra Cristo tsihin tsa nii iñi añaima ra

¹⁴Maa tyin tyahví nyoo tsi Nyoo tyin tacan ñi jahá canaa yo tsihin tunyee iñi ra Cristo Jesús tan tsahá ra tsa caahán ndi tuhun ra tsihin nyivi. Tan tuhun ra tsa caahán ndi, cuví tsi tumaa iñi xico tami tsa caná tandihí ñi ityi nu cuahán ndi. ¹⁵Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyivi xico tami can, tahan ñi nyivi tsa cua cacu tan ñi tsa ña cua cacu.

¹⁶Maa tyin tsa cuenda nyivi tsa ña cua cacu, ndasi caná tsi, tan cuñí maa ñi tyin tuhun tsajacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú iñi ñi tsi ra Cristo. Maa tyin tsa cuenda nyivi tsa cua cacu, tami xaan tsi, tyin jacotó ndi nácaa cua coo ñi ñayiví tsa ña cua naa maa. Maa tyin gyóo cuví jaha tyiñ tyiñ ihya? ¹⁷Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa nii iñi añaima ndi tyin iñi ñi cuví ndi tsihin ra tan maa Nyoo tavá tyiñ tsi ndi tsa cahan ndi tyin cuenda ra Cristo yihi ndi.

3

Tuhun tsaa tsa ndoo ra Cristo tsihin yo

¹Tsa caahán ndi tuhun ihyá, ²¿a cuñí maa ndo tyin caahán ndi tacan tsa cuñí ndi nduyaa ndi? ³Ñavin. ⁴¿A cuñí tsi cuhva ndi iin carta tsa catyí tyin vaha nyíví cuví ndi? ⁵¿O cuñí tsi ndacan ndi carta tsi ndo tumaa jayahá juhva nyíví? ⁶Ña cuñí tsi. Tyin tsa tyaa Nyoo tsi ndo añima ndi, tan maa ndo cuví carta tsa cuenda ndi. Yacan cuenda ña tsiñí ñuhu ca carta tsi ndi. Tyin tsihin tsa nyehé nyíví nácaa nasama Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ⁷Tan catis nyehé ñi tyin cuví ndo carta tsa *tyaɑ̄* ra Cristo tsa cuenda ñi, tan nyuhu nacuhvá cuenda ndi carta can tsi ñi. Tan ña *tyaɑ̄* ra Cristo itsi tsihin tyinta maa tyin *tyaɑ̄* ra itsi tsitsi añima ndo tsihin Tatyi li Nyoo nyito. Tan ñavin nu yuu tsinyaa tsi.

⁸Caahán ndi tyehen tyin tsitó vaha ndi tyin Nyoo cuahvá ra tsa quita vaha tyiñu jayahá ndi, tyin jatinyeeé ra Cristo tsi ndi. ⁹Ña cana iñi ndi caca iñi ndi tyin jayahá ndi náa jayahá ndi tsihin tunyee iñi maa ndi. Tyin tsitó ndi tyin tandihí tsa jayahá ndi tan maa Nyoo jayahá can. ¹⁰Tan tsahá ra tunyee iñi tsi ndi tsa cahan ndi tuhun ra Cristo, tan tuhun ihyá cuví tuhun tsaa tsa tsahá ñayíví tsaa coo yo tyin iyó Tatyi li ra añima yo. Ley tsa tsahá Nyoo tsi ra Moisés ña tsahá tsi ñayíví tsaa coo yo tyin janahá ñi tsi tsi yo tyin iyó cuatyí yo tan taahán tsi cíu yo.

¹¹Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa *tsaɑ̄* ra Moisés tsihin tsi nu yucú nyíví Israel, nayuhví xaan ñi nyehé ñi nuu ra tyin xiñu xaan nuu ra cuví. Maa tyin *tsindihí* tsa xiñu can. Tatun tacan cuví quíví quitsí ley tsa tsahá tuhun tsiihí, ¹²iyaha ca cahnu cuví tuhun tsa ndoo Nyoo tsihin yo tsa tsahá Tatyi li ra tsi yo! ¹³Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsaa tsa ndoo Nyoo tsihin yo tyin janduvahá tsi tsi yo nuu ra. ¹⁴Nditsa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo. ¹⁵Tyin tatuń cahnu cuví tsa *tsicoo* juhva ñi tyembu, yaha ca cahnu cuví tsa ña cua cundihí maa.

¹²Tsitó vaha ndi tyin ña cua cundihí tsi. Yacan cuenda caahán ndi tsihin tsa nii iñi añima ndi. Ña cahan nuu ndi tan ña yuu hví ndi caahán ndi. ¹³Tan ña jayahá ndi tumaa jayahá ra Moisés. Tyin ra Moisés tyasí ra nuu ra tsihin jahma, tyin tacan tan ña nyehé nyíví Israel nu cua naa tsa xiñu nuu ra. ¹⁴Quiví can ña cutuñi iñi ñi. Nda cuanda vityin tan ña cutuñi iñi ñi. Tyin tatuń cahví ñi ley tsahnu ña cutuñi iñi ñi itsi tyin ndasí tsa tsíñi tuñi jifí ñi tumaa tsindasí nuu ra Moisés quiví can. Yoñi maa cuví jatsiyo yacan tyin intuhun ñi maa ra Cristo cuví jatsiyo can. ¹⁵Nda cuanda vityin tan ña cutuñi iñi ñi ley tsa *tyaɑ̄* ra Moisés tun cahví ñi itsi. Tyin ndasí tsa tsíñi tuñi iñi ñi. ¹⁶Maa tyin tatuń nacuhvá cuenda ñi tsi ñi tsi Jutu Mañi yo, maa ra cua nuña tsa tsíñi tuñi iñi ñi. ¹⁷Tyin Jutu Mañi yo, Tatyi li cuví ra. Tan tatuń iyó Tatyi li Jutu Mañi yo añima yo, tsitó yo tyin ña yihí ndaha ca ley tsahnu tsi yo. ¹⁸Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehé nyíví tsa cahnu cuví Jutu Mañi yo jahá yo. Tan cuahán nduvahá ca yo jahá Tatyi li ra.

4

¹Nyoo nyehé ndaaivi ra tsi ndi, tan tava tyiñu ra tsi ndi tsa cahan ndi tuhun ra tsihin nyíví yacan cuenda ña ndu uvi iñi ndi. ²Tandihi tsa jayahá ndi, ña tuhvá ndi jayahá xeehe itsi, tan ndi ña jayahá ndi tsa tsahá ticanuu. Ña tsicá nuu ndi jandaví ñaha ndi tsi nyíví. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaaivi ndi tsihin tandihí ñi nyíví, na jaha vaha ñi cuenda tyin tandihí tsa caahán ndi, tan nda maa nuu Nyoo jayahá ndi, tan maa ñi maa tsa nditsa cuví tsi. ³Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyíví ndasí tsa tsíñi tuñi iñi, ñi tsa cua cunaa. ⁴Nu ña vaha, nu ndacá ñaha tsi nyíví iyó nu ñuhu ñayíví ihyá, juvin nu tyasí tsa tsíñi tuñi iñi ñi, tyin tacan tan ña tsinu iñi ñi tsi Nyoo, tan ña nyehé ñi tsa nditsa ra, tan ña cutuñi iñi ñi nácaa jacacú ra Cristo tsi yo, ra iin ñi cuví tsihin Nyoo. ⁵Ñavin tuhun maa ndi caahán ndi. Tyin tuhun ra Jesucristo caahán ndi tsihin nyíví tyin juvin ra cuví Jutu Mañi yo. Tan

nyuhu musu ñi ndo cuví ndi tyin cuñi ndi tsi ra. ⁶Nyoo catyi tyin ndunditsin nu naa quivi tsinu ñuhu ñayivi. Tan juvin ñi ra jandunditsín tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñu nuu ra Cristo.

Iyó yo ñayivi tsaa tsihin tsa tsinú iñi yo tsi Nyoo

⁷Tsa cuca Nyoo, tsa cuví tunyee iñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisí ñuhu tan naquihín yo itsi. Juvin tsi janahá tsi nyivi tyin maa Nyoo tsahá tunyee iñi ra tsi yo tan ñavin tunyee iñi maa yo cuví tsi.

⁸Yacan cuenda vasu ndi maa nyehé xaan ndi tundoho tandíhi ñi nu cuahán ndi, ña ndu uví iñi ndi. Yihí tsaha ña tsító ndi nácaa quita ndi nu tundoho nyehé ndi, maa tyin nyitá iñi ndi tyin cua quita vaha ndi.

⁹Vasu ndi maa nyaá ndaha nyivi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyivi, maa tyin ña tsiihí ndi. ¹⁰Tandíhi ñi nu cuahán ndi tan nyicún tuhun tsiihí tsi ndi tsa cuenda tsa caahán ndi tuhun ra Jesús. Tyin tacan tan nyehé nyivi tyin iyó ndi ñayivi ra. ¹¹Tsitsi tsa ndi iyó ndi nu ñuhu ñayivi ihyá tandíhi ñi quivi tan ndatú ndi tuhun tsiihí tyin tandíhi ñi quivi tan nducú nyivi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayivi ra añima ndi. ¹²Yacan cuenda nyuhu tandíhi ñi tsaha nyicún tuhun tsiihí tsi ndi tyin caahán ndi tuhun ra Cristo tsihin nyivi. Maa tyin nyoho, iyó ndo ñayivi ra Cristo tsa cuenda tuhun ra tsa cahán ndi tsihin ndo.

¹³Tsinú iñi ndi tsi Nyoo tumaa tsinu iñi ra David tsi ra. Tumaa catyi ra nu libru Salmos: "Tsinú iñi yu tsi Nyoo, yacan cuenda caahán yu tuhun ra". Tacan tucu nyuhu; tsinú iñi ndi tsi Nyoo, yacan cuenda caahán ndi tuhun ra. ¹⁴Tyin tsító ndi tyin Nyoo, ra janandoto tsi Jutu Mañi yo Jesucristo, cua janandoto ndíhi ra tsi ndi. Tan cua ndu iñi ndo tsihin ndi, tsahan cua cundaca ra tsi yo iin caa ñi nda gloria. ¹⁵Tandíhi tuhun ihyá cuví tsa cuenda tsa vaha tsi nyoho tan tsa vaha tsi cuaha ca nyivi. Tyin tun cuaha ndo naquihin tsa vaha Nyoo, cuaha xaan ndo cua nacuhva

tyahvi nyoo tsi ra, tan cua jaca hnu ndo tsi ra.

¹⁶Yacan cuenda ña ndu uví maa iñi ndi, vasu ndi maa cuahán ndutsahnú cuñu ñuhu ndi, tyin ñayivi tsaa tsa iyó ndi ndutsaá tsi tan im tan iin quivi. ¹⁷Tundoho tsa nyehé ndi nu ñuhu ñayivi ihyá, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. ¹⁸Yacan cuenda ña tyáa iñi ndi tsa cuví nyehé yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihi maa tsa iyó tsi.

5

¹Tsitó yo tyin quivi cíu yo, cua tyahu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayivi ihyá javaha can.

²Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñi yo cuhun yo coo yo tsitsi cuñu ñuhu vaha tsa cua cuhva Nyoo tsi yo.

³Cuhun añima yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandii añima yo.

⁴Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñi yo. Maa tyin ña ndaahvi cuñi yo tsa cuenda tsa cuñi yo quita añima yo tsitsi cuñu ñuhu yo tan cutandii tsi. Ndaahvi cuñi yo tsa cuenda tsa cuñi yo coo añima yo tsitsi tsa ña cua cundihi maa, tyin tacan tan coo cuii yo. Tan cua cundihi tsa tañi ñi tsicoó jaha tsa ña cua cundihi maa. ⁵Tan Nyoo tyaq ra cuhva tyin tacan cua javaha ra tsihin yo. Tan tsahá jihna ñi ra Tatyi li ra tsi yo tyin tacan tan cuita iñi yo tyin cua cuhva ra tandíhi ca tsa cuha cuhva ra tsi yo.

⁶Yacan cuenda nyitá iñi ndi tsi Nyoo tsihin tsa niñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. ⁷Vasu ndi maa ña cuví nyehé yo tsi ra, maa tyin iyó yo nu ñuhu ñayivi ihyá tsihin tsa tsinú iñi yo tsi ra. ⁸Nyitá iñi ndi tsi ra tan cuñi ndi quita ndi tsitsi cuñu ñuhu ihyá tan cuhun ndi coo ndi tsihin Jutu Mañi yo. ⁹Yacan cuenda tsitsi tsa ndi iyó ndi

tsihin cuñu ñuhu ihyá, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria.¹⁰ Tyin tandihí yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quiví tsicoo yo tsitsi cuñu ñuhu yo cuenda nu ñuhu ñayivi ihyá.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsító ndi tyin Jutu Mañi yo cua tatsi tuñi ra tsi ndi tatum ña cua javaha ndi tsa caahán ra. Yacan cuenda nducú ndi cuhva cahan ndi tsihin nyiví na nacuhva cuenda ñi tsi ñi tsi Nyoo. Tan Nyoo tsító vaha ra tyin tacan javahá ndi, tan cuñi ndi tsa coto tucu nyoho.¹² Caahán ndi tyehen, maa tyin ñavin tsa cuñi ndi nduyaá ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusíi ca iñi ndo tan ñihí ndo cuhva cahan ndo tsihin inga ca ra tsa nduyaá naha ra. Catyí ra naha tyin vaha iyó ra naha tsihin Nyoo, maa tyin tsitsi añima ra naha maa ñi tsa ña nditsa iyó.¹³ Tatum caahán ndi tuhun Nyoo, catyí juhva nyiví tyin jiñi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatum vaha cuñi ndi, tsa cuenda nyoho vaha cuñi ndi.¹⁴ Tan tsító ndi tyin intuhun ñi ra Cristo tsihí tsa cuenda tandihí nyiví ñuu ñayivi. Tacan tan tsihí tandihí yo. [Tsa tsihí yo cuñi tsi catyi tyin nacoó yo tsa javahá yo cuhva cuñi maa yo.] Tan tsa tyehen tsító yo tsa tsihí ra Cristo tsa cuenda tsa cuñi xaan ra tsi yo, jañiñi tsi tsi yo tsa cahan yo tuhun ra tsihin nyivi.¹⁵ Ra Cristo tsihí ra tsa cuenda tandihí yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihí ra tan nandoto ra tsa cuenda tandihí yo.¹⁶ Vityin tan ityi nuu, ña caca ca iñi yo nyehe yo cuhva iyó nyiví tumaa tsicá iñi nyiví ña tsító tsi Nyoo. Tsicoo quiví tacan tsicá iñi yo nyehe yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan.¹⁷ Tyin quiví nacuhvá cuenda yo tsi yo tsi ra Cristo, jandutsaq ra añima yo. Tan nanduví yo nyiví tsaa jahá ra. Tan tandihí tuhun tsa tsicá iñi yo nu quitsi ca tsi, ña tsicá ca iñi yo

can vityin ihyá tyin tsahá ra tsa tsíni tuñi tsaa tsi yo.

¹⁸ Maa Nyoo javahá tandihí yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñi tsi jacoto yo tsi nyiví nácaa javahá ñi tan cuví coo vaha ñi tsihin ra.

¹⁹ Tyin maa ra tsa yahá nduvahá iyó ra tsihin ñi tsa cuenda tsa tsihí ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tysiñu ra tsi yo tsa jacoto yo tuhun ihyá tsi ñi.²⁰ Yacan cuenda cuví ndi ra tava tysiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndaahvi ndi tsihin ndo tsihin siví ra Cristo, na nduvahá coo ndo tsihin Nyoo.²¹ Ra Cristo ña javahá ra ndi intuhun cuatyí. Maa tyin Nyoo jaquitsí ra tsi ra nu ñuhu ñayivi ihyá; quitsí cíu ra tsa cuenda tandihí cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6

¹ Yañi, iin caa ñi jahá tysiñu yo tysiñu Nyoo. Yacan cuenda caahán ndaahvi xaan ndi tsihin ndo tyin cuatyíñu ndo tandihí tsa vaha tsa tsahá ra tsi intuhun intuhun ndo.

² Tyin catyí Nyoo nu tutu ra tyehen:
Quiví tahán tsi tsa jacacu yu tsi un, tsíñi yu
tsa cahan un
tan jatyinyye yu tsi un, catyí Nyoo.
Jaha ndo cuenda tyin vityin cuví quiví taahán tsi. Tan vityin cuví quiví jacacú Nyoo tsi yo.

³ Nducú xaan ndi cuhva tsa ña javaha ndi náa javaha ndi tyin tacan tan ña cahan nyaá nyiví tysiñu Nyoo tsa javahá ndi.⁴ Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihí tsa taahán ndi, náa tundoho, tan náa tisihi.⁵ Vasu ndi maa cañí nyiví tsi ndi, tyihí ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihí xaan jahá tysiñu ndi nda cuanda tsicoo nyito ndi, tan tsisocó ndi.⁶ Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsító ndi tsa nditsa tan tsihin tsa cunyeé xaan iñi ndi nyehé ndi tandihí maa nuu tundoho tan ña tsihí ñi tisihi. Vaha iñi ndi, tan cuñi xaan ndi tsi nyiví tyin iyó Tatyi Ii Nyoo añima ndi.⁷ Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyiñu ndi

tandihí tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha.
⁸ Yíhi quívi vaha cuñí nyívi nyehé ñi tsi ndi, tan iyó tucu quívi ndasí cuñí ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siquí ndi. Yíhi tsaha catyí ñi tyin cuendu caahán ndi tan inga tucu tsaha catyí ñi tyin tsai nditsa caahán ndi. ⁹ Iyó tsaha jahá ñi tyin ña nacotó ñi tsi ndi, tan yíhi tsaha jacahnú tucu ñi tsi ndi. Iyó quívi tsa yatayin ña cíu ndi, maa tyin ña tsíihí ndi tan ndi iyó ca ndi. Iyó quívi tatsí tuñi nyívi tsi ndi, maa tyin ña tsahñí tucu ñi tsi ndi. ¹⁰ Vasu ndi maa cuuihya cuñí ndi iyó tsaha, maa tyin ña tsindihí tsa sii cuñí ndi. Iyó tsaha ndaahvi ndi, maa tyin cuaha nyívi janducucá ndi tsihin tuhun Nyoo. Vasu nduve náa iyó tsi ndi, maa tyin tandihí maa tsa iyó tan tsii maa ndi cuví.

¹¹ Nyoho nyívi ñuu Corinto; caahán catsi ndi tsihin ndo tsihin tsa nii iñi añima ndi tyin nditsa tsa cuñí xaan ndi tsi ndo. ¹² Nyuhu, ña ndasi cuñí ndi nyehe ndi tsi ndo. Maa ndo cuví ndo ndasi cuñí nyehe tsi ndi. ¹³ Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñí ndo nyehe ndo tsi ndi, tyin maa ndi ña ndasi cuñí ndi nyehe ndi tsi ndo.

Vehe Nyoo nyito cuví yo tyin iyó ra añima yo

¹⁴ Ña ndu iin ndo tsihin nyívi ña tsinú iñi tsi Nyoo tyin ña nacatsí tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsi tan ña cuví ndu iin tsi tsihin tsa naa.

¹⁵ Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyívi ña tsinú iñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi. ¹⁶ Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jacaahnú ndo tsitoho tyin vehe Nyoo nyito cuví yo, tumaa catyí maa ra tuhun yo tahan tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuvi Nyoo ñi, tan maa ñi cua cuvi nyívi yu, catyí ra.

¹⁷ Yacan cuenda catyí ra:

Quita ndo mahñú nyívi ña tsinú iñi tsi yu. Ña cutahan ndo tsihin ñi. Ña javaha ndo tsa ña vaha. Tacan tan naquihin yu tsi ndo. ¹⁸ Tan cuvi yu jutu ndo. Tan cuvi ndo sehe yu, catyí Jutu Mañi yo, ra iyó tandihí tunyee iñi tsi.

7

¹ Yañi, yacan cuví tsa tsahá Nyoo tsi yo, yacan cuenda cuñí tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cuítí coo yo tyin tyáa yahvi yo tsi Nyoo.

Nu nacatyí tuhun ra Pablo nácaa nasama cuhva iyó nyívi yíhí cuenda Nyoo ñuu Corinto

² Yañi, caahán ndaahvi yu tsihin ndo, vaha cuñí ndo nyehe ndo tsi ndi tyin nduve maa náa javahá ndi tsi ndi intuhun ndo. Tan ndi ña jatíyí ndi tsi ndi intuhun ndo. Tan ña jandaví ñaha ndi tsi ndi intuhun ndo. ³ Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nua quitsí ca tsi, tyin nditsa tsa cuñí yu tsi ndo. Tyin iin caa ñi iyó yo tsihin Nyoo. Tatun iyó yo, iin ñi cuvi yó tsihin ra; o tatum cúa yo, iin ñi cua cuvi tucu yo tsihin ra. ⁴ Tsító vaha yu tyin cua javaha ndo tsa vaha, yacan cuenda sii xaan cuñí yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan sii xaan ca cuñí ndi.

⁵ Nda quívi tsaa ndi Macedonia ihyá, tan ñaha ca maa quitatú ndi. Tyin cuaha xaan tisihi tan tundoho nyehé ndi tandihí ñi ityi cuahán ndi. Cañí tahan nyívi tsihin ndi. Tan tsicá xaan iñi ndi tyin ña tsító ndi tun cua quita vaha tyíñu jahá ndi. ⁶ Maa tyin Nyoo, tacan ñi maa jandu iín ra iñi yo tun cuuihya cuñí yo. Tan jandu iñi xaan ra iñi ndi quívi tsaa ra Tito nu yucú ndi ihyá. ⁷ Tan ñavin tsa cuenda tsa tsaa ñi ra, maa tyin sii cuñí tucu ndi tsa cuenda tsa jandu iñi xaan ndo iñi ra. Nacatyí tuhun ra tsihin ndi tyin cuñí xaan ndo nyehe ndo tsi ndi. Tan catyí tucu ra tyin tsacú xaan ndo tsa cuenda tsa cuuihya cuñí ndo. Tan ñuhú xaan iñi ndo tsi yu. Tsa tsito yu yacan, sii xaan ca cuñí yu cuvi.

⁸Quiíví can tsicá xaan iñi yu tyin tsahá yu tucuiihya iñi tsi ndo tsihin carta tsa jaquitsí yu tsi ndo. Tan ndu uví iñi yu tsa jaquitsí yu carta can tsi ndo. Maa tyin juhva ñí quiíví nducuiihya iñi ndo. Tan vityin ñá tsicá ca iñi yu tsa cuenda tucuiihya iñi tsa tsahá yu tsi ndo. ⁹Tan vityin sii xaan cuñí yu. Ñavin tsa cuenda tsa tsicoo ndo tucuiihya iñi, tsa cuenda tsa ndu uví iñi ndo cuatyí ndo jahá tucuiihya iñi can. Tan cunyee xaan iñi ndo nyehe ndo tucuiihya iñi cuhva taahán maa iñi Nyoo. Yacan cuenda vaha javahá ndi tsa tsahá ndi tucuiihya iñi tsi ndo. ¹⁰Tyin tun cunyee iñi yo nyehe yo tucuiihya iñi cuhva cuñí maa Nyoo, cua nasama cuhva iyó yo tacan tan cua caco yu. Yacan cuenda na sii cuñí yo tun nyehé yo tucuiihya iñi cuhva cuñí maa Nyoo. Tyin tucuiihya iñi tsa iyó tsi nyivi tsa ñá tsító tsi Nyoo maa ñi anyaya ñihí ñi tsihin can. ¹¹Nyooho cunyee iñi ndo nyehe ndo tucuiihya iñi tumaa cuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaä vaha ndo cuatyí ra can. Cuxaan ndo tsi ra. Tan nayuhví tucu ndo tsi Nyoo. Tsahá cuenda vaha ndo nácaa cuahán tyíñu can. Yaha can tan nda cuanda cuñí ndo nyehe ndo tsi yu. Tan tatsí tuñí ndo tsi ra can. Tan tsa cuenda tsa javahá ndo tumaa cuñí maa Nyoo, cuñí tsi catyí tyin nduve cuatyí ndo tsa cuenda yacan. ¹²Yacan cuenda quiíví jaquitsí yu carta can tsi ndo ñá jaquitsí yu itsi tsa cuenda tsa tsicá xaan iñi yu cuenda ra tsa javahá cuatyí can. Tan ndi ñavin tsa cuenda ra tsa tahan ticanuu can. Maa tyin tsa cuenda maa ndo, tyin cuñí yu tsa coto ndo nácaa ñuhú iñi ndo tsi ndi nuu Nyoo tan nácaa cuñí ndo jatyinyéé ndo tsi ndi. ¹³Yacan cuenda nduvahá cuñí añima ndi. Tan sii xaan cuñí ndi tyin tsító ndi tyin cuñí ndo tsi ndi.

Tsa nyehe ndi tyin sii xaan cuñí ra Tito, ndusíí ca iñi ndi tyin tsahá xaan ndo tunyee iñi tsi ra. Tan vaha xaan naquihin cuenda ndo tsi ra. ¹⁴Catyí yu tsihin ra Tito tsa ndi cumañí ca quitsí ra nu yucú ndo tyin cua tyaa soho vaha ndo tuhun tsa jaquitsí yu tsihin ra. Tan vityin sii cuñí yu tyin cundaä tsa cahan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsa tsa cahan yu tsihin ra. ¹⁵Cuñí

xaan ra tsi ndo tsa nducuhún iñi ra tyin javahá ndo tandihí cuii maa tsa cahan ra tsihin ndo. Tan tsa tsaq ra nu yucú ndo, ndaahvi jahá ndo tsi ndo nuu ra. Tan vaha xaan cahan ndo tsihin ra. Tan vaha xaan tyáq yahvi ndo tsi ra. ¹⁶Tan sii xaan cuñí yu tyin tsító yu tyin tacan ñi javahá ndo tsa vaha.

8

Na jatyinyéé yo tsi nyivi yihí cuenda Nyoo tsihin tsa nii iñi añima yo

¹Vityin yañi, cuñí ndi nacatyi tuhun ndi tsihin ndo nácaa jatyinyéé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. ²Vasu ndi maa cuaha xaan tundoho nyehé ñi, maa tyin sii cuñí ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsahá ñi, tumaa tsatayin cuca ñi. ³Tan cuví yu tsandaa tyin nyehé yu tyin tsahá ñi cuaha tsa iyó tsi ñi tsihin tsa nii iñi ñi tan nda cuanda yaha ca tsahá ñi. ⁴Caahán ndaahvi xaan ñi tsihin ndi na cuhva ndí ndatu tsa jatyinyee ndihí ñi tsi nyivi yihí cuenda Nyoo tsa iyó ñuu Jerusalén. ⁵Cuaha ca javahá ñi tan ñavin ca tsa tsicá iñi maa ndi. Tyin tsa jihna ñi, nacuhvá cuenda ñi tsi ñi tsi Nyoo tsihin tsa nii iñi añima ñi. Tacan tan nacuhvá cuenda tucu ñi tsi ñi tsi nyuhu tsa quíñi ndaha ndi tsi ñi tumaa cuñí maa Nyoo. ⁶Tsa nyehé yu tyin tacan javahá nyivi Macedonia, tacan tan catyí yu tsihin ra Tito tyin na quitsí ra nu yucú ndo tan janumi ra tsi ndo jacatsi tahan ndo xuhun tsa quitsahá tavá ndo jahá ra. ⁷Tyin nyooho vaha xaan javahá ndo tandihí tyíñu. Tsinú xaan iñi ndo tsi Nyoo. Vaha cuñí iñi ndo. Tan tsihin tsa nii iñi añima ndo javahá ndo tyíñu ra. Tan cuñí xaan ndo tsi ndi. Tan juvin ñi tacan taahán tucu tsi jatyinyéé ndo tsi nyivi ndaahvi, tsa yihí cuenda Nyoo.

⁸Ña jañiñí yu tsi ndo tsa javaha ndo tsa caahán yu. Caahán yu tyehen tsihin ndo tsa cuenda tsa cuñí yu tsa nyehe ndo tsa vaha javahá nyivi yihí cuenda Nyoo Macedonia. Tyin tacan tan javaha ndihí ndo tsa vaha tumaa javahá maa ñi. Tan tsihin yacan cua janaha ndo tyin nditsa tsa vaha xaan iñi ndo. ⁹Tyin tsa tsító maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsí ra nu ñuhu

ñayiví ihyá tan jandundaahví ra tsi ra tsa cuenda tsa cuñí ra tsi yo tyin tacan tan cuví janducuca ra tsi yo.

¹⁰ Yuhu cuñí yu tsa vaha tsa cuenda ndo, yacan cuenda cua cahan yu tsihin ndo tsa tsicá iñi yu tsa cuenda tuhun ihyá. Nyoooho cuví nyiví tsa quitsaha jandu iñi jihna xuhun cuyava. Navín nyiví tava tyiñu tsi ndo javaha ndo tacan. Javahá ndo tacan tyin tacan tsicá iñi maa ndo. ¹¹ Yacan vityin cuñí yu tsa jañíhi ca ndo javaha ndo tumaa javahá maa ndo ndu nu quitsaha nda cuanda nacatsi tahan xuhun can jaha ndo. Cuhva nyoooho nácaa iyó maa tsi ndo. ¹² Tyin tatum iin nyiví tan cuñí ñi cuhva ñi tandíhi cuhva iyó tsi ñi tan cuhva ñi can tsihin tsa ñii iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañíñi ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tñavin tsa cuenda tsa cuñí yu tsa jatyinyee ndo tsi nyiví tan ndoo ndaahvi ndo tan ñi ican coo tsa coo tsi ñi. ¹⁴ Tyin vityin tsa iyó luxu tsi ndo, taahán tsi jatyinyee ndo tsi nyiví ndaahvi tsihin can. Tyin tacan tan inducú ñi coo tandíhi yo. Tan inga tsaha, maa ñi cua jatyinyee tucu tsi maa ndo tun cumañi tsa cumañi tsi ndo. Tyehen taahán tsi jatyinyee tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. ¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jativí ra itsi. Tan ra tsa iyó luxu ñi tsa iyó tsi, ña cumañi tsa cumañi tsi ra”, catyí tñi nu tutu Nyoo.

Nu tyáa ra Tito naha ra cuhva cuhun ra naha ñuu Corinto

¹⁶ Tyahvi nyoo tsi Nyoo tyin tsahá ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo. ¹⁷ Tsa cahan yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñí tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

¹⁸ Jaquisí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandíhi nyiví yihí cuenda Nyoo. ¹⁹ Tan inga tucu tuhun tyin nacatsi vaha nyiví yihí cuenda Nyoo tsi ra yañi yo ihyá tyin cuhun ndihí ra tsihin ndi cundaca ndi xuhun tsi nyiví ndaahvi

iyó ñuu Jerusalén. Cuñí xaan ndi jacahnú ndi tsi Jutu Mañi yo tsihin tsa javahá ndi tyiñu ihyá. Tan tacan tucu cuñí xaan ndi jatyinyee ndi tsi tandíhi nyiví yihí cuenda Nyoo. ²⁰ Tsihin cuenda xaan javahá ndi tyiñu ihyá, tyin tacan tan ña cahan nyiví tsi ndi tsa cuenda tsa tavá ndi xuhun cuenda nyiví ndaahvi. ²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityí nuu Jutu Mañi yo tan ñavin ityí nuu Jutu Mañi yo ñi tyin ityí nuu tucu nyiví.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñii xaan iñi ra. Tan cuaha ñi tsaha janahá ra tyin cuñí xaan ra tsi Jutu Mañi yo. Tan vityin tsa tsa tsitó ra tuhun ndo, siñ cuñí ra tyin tsitó ra tyin cua javaha ndo tsa vaha nuu Nyoo. ²³ Tatun yóo tsicá tuhun tuhun ra Tito, catyí ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatyinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihyá naha ra, catyí ndo tyehen tsihin ñi:

—Maa nyiví yihí cuenda Nyoo jaquitsí tsi ra naha. Tan vaha xaan jahá tyiñu ra naha tyiñu ra Cristo —catyí ndo.

²⁴ Yacan cuenda janaha ndo tsi ra ihyá naha ra nu tuvi tyin nditsa tsa cuñí ndo tsi ra naha. Tyin tacan tan coto tandíhi nyiví yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaq taahán tsi jatyinyee yo tsi nyiví ndaahvi yihí cuenda Nyoo

¹ Tan cuenda xuhun tsa jandu iín ndo tsa cuenda nyiví ndaahvi yihí cuenda Nyoo, ña ñiñi xaan cuñí tsi cahan yu tuhun can tsihin ndo. ² Tyin tsitó yu tyin cuñí xaan ndo javaha ndo tsa vaha. Yacan cuenda siñ cuñí yu nacatý tuhun yu tuhun ndo tsihin nyiví iyó Macedonia, tyin nyoooho tsa iyó ñuu Corinto tsa canyíí Acaya, nda cuyava tan quitsahá cuñí ndo jatyinyee ndo tsi nyiví ndaahvi. Tan tsa cuenda yacan cuaha xaan nyiví yihí cuenda Nyoo Macedonia ndu iín ca iñi ñi tan cuñí ndihí tucu maa ñi jatyinyee ñi tsi nyiví ndaahvi. ³ Vasu ndi

maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatyinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyi nyívi Macedonia tyin ña nditsa yu tsa caahán yu. ¹Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iñi ndo. Tan tahan yu ticanuu tsa cuenda tsa nduve náa javaha ndo. Tan vihi ca maa ndo. Tyin tsa yaha catyi yu tyin cuñí xaan ndo jatyinyee ndo tsi nyívi ndaahvi. ⁵Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatyinyee ra naha tsi ndo tsa jandu iñi ndo xuhun tsa tyihí ndo cuhva tyín cuhva ndo. Tyin tacan tan quívi quitsi yu tandíhi tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñi tsi ndo.

⁶Ndycuhun iñi ndo tuhun tsa catyí tye-hen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. ⁷Tan intuhun intuhun yo cuñí tsi cuhva yo cuhva iyó iñi maa yo. Ñavin ubi caca iñi yo tan cuhva yo o cuhva yo tsa cuenda tyin jañiñi nyívi tsi yo. Tyin Nyoo cuñí ra tsi nyívi tsahá tsihin tsa sii cuñí ñi. ⁸Nyoo cuví cuhva ra tandíhi nuu tsa vaha tsi ndo, tyin tacan tan ña cumañi náa cumañi tsi ndo. Tan cuvi jatyinyee tucu maa ndo tsi inga ca nyívi. ⁹Tumaa catyí tuhun Nyoo tye-hen:

Iin ra vaha tsahá ra, tsihin tsa nii iñi ra, tsa iyó tsi ra tsi nyívi ndaahvi.

Tan tumañi ifii tsa javahá ra, ña tsinaá tsi nuu Nyoo, catyí tsi.

¹⁰Nyoo, ra tsahá tsiti tatsí yo, tsahá tucu ra tandíhi tsa tsatsí yo. Tan cua cuhva tucu ra cuaha ca tsiti tsa tatsí ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyívi. ¹¹Tan coo ca tandíhi nuu tsa cuca tsi ndo, tyin tacan tan cuvi jatyinyee ca ndo tsi nyívi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jachuhun ndo tsi ñi. ¹²Tyin tsa jatyinyee yu tsi nyívi yihí cuenda Nyoo tsihin tsa tsahá yo tsa tsiñí ñuhu tsi ñi, tsahá tucu yo tsa

nacuhva ñi tyahvi nyoo tsi Nyoo. ¹³Tan cua jachuhnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jachuhnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandíhi ca nyívi. ¹⁴Cua ndacan tahvi ñi tsi Nyoo tsa cuenda ndo. Tan cua cuñí xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. ¹⁵Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsajaha cuenda ra tsi nyívi tsa jacoto ra tuhun Nyoo

¹Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihí xaan caahán yu tsihin ndo, maa tyin tun nyívi yu tsihin ndo, ndaahvi xaan jahá yu tsi yu, catyí ndo. ²Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quívi quitsi yu nu yucú ndo tyin tsitó yu tyin cuñí tsi tsa cuxaan ñihí yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. ³Nditsa tyin ra ñuu ñayívi cuví ndi. Maa tyin ña cañí tahan ndi tumaa cañí tahan nyívi iyó nu ñuhu ñayívi ihya. ⁴Tyin tsa xaan tsa tsatyiñu ndi tsa cañí tahan ndi, ñavin tsa xaan tsa iyó nu ñuhu ñayívi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siquí tandíhi ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. ⁵Tan tacan cuví jaha canaa ndi tsi tandíhi tsa caahán ndasí nyívi siquí tuhun Nyoo, tan tandíhi tsa ña vaha tsa tyasí nu tyaa yahvi nyívi tuhun Nyoo. Tan tsahá ndi tsa cundaca ñaha ra Cristo tandíhi cuhva tsicá iñi ndi tyin tacan tan tyaá yahvi ca ndi tsi ra. ⁶Quiví cutuhva tandíhi nyoooh tsa iyó Corinto tyaa yahvi vaha ndo tsi ra Cristo, tatum ndoo inga ndo tsa ña cuñí tyaa yahvi tsi ra, tyaá ndi cuhva tsa tatsi tuñi ndi tsi ndo.

⁷Nyoooh jahá ndo cuenda cuhva iyó nyívi. Tan ña jahá ndo cuenda nácaa iyó añaima ñi. Tatum tsitó vaha ndo tyin cuenda ra Cristo yihí ndo, taahán tsi coto ndihi

tucu ndo tyin cuenda ra yihí tucu nyuhu.
⁸Ña caahán nuu yu caahán yu tsa tsahá Nyoo
 ndatu tsi yu tsa quihi ndaha yu tsi ndo, vasu
 ndi maa yahá caahán yu juhva tyin tsitó
 yu tyin tsa vaha tsi maa ndo cuví, tan ña
 javahá yu can tsa cuenda tsa cuñi yu jatív
 yu tsi ndo. ⁹Ña cuñi yu tsa catyí ndo tyin
 jayuhví yu tsi ndo tsihin tsa caahán yu nu
 carta tsa jaquitsí yu tsi ndo. ¹⁰Tyin yihí ndo
 catyí ndo tyin nu carta tsa jaquitsí yu tsi
 ndo ñihí xaan caahán yu tsihin ndo. Maa
 tyin tatum maa yu tsá nu yucú ndo, nduve
 yahvi nyaá yu, catyí ndo. Tan catyí tucu
 ndo tyin nduve yahvi nyaá tuhun caahán
 yu. ¹¹Maa tyin nyoho tsa caahán tacan
 cuñi tsi coto ndo tyin tumaa caahán yu nu
 carta, tacan cua jahaha tucu yu tsa tsaa yu
 nu yucú ndo.

¹²Nditsa ña caná iñi ndi jandu inducu ndi
 tsi ndi tsihin ra nduyaá naha ra. Tyin ra
 can naha ra juvin ñi maa ra naha catyí tyin
 vaha ra naha. Tan tsa caahán ra naha tacan,
 nduve yahvi nyaá caahán ra naha can tyin
 javahá ra naha cuhva javahá inga nyíví tan
 ñavin cuhva cuñi Nyoo. Tan cuñi ra naha
 tyin vaha tsa jandu inducú ra naha tsi ra
 naha tsihin inga nyivi. ¹³Nyuhu ña cua
 nduyaa ndi tsihin tsa ña taahán tsi tsi ndi.
 Nyoo cuví ra janahá náa tyiñu taahán tsi
 javahá yo. Tan maa ra jaquitsí tsi ndi ñuu
 Corinto nu yucú ndo. ¹⁴Tun tsatyin ña jihna
 ca maa ndi cahan tuhun Nyoo tsihin ndo,
 ña taahán tsi jahá cuenda ndi tsi ndo. Maa
 tyin taahán tsi jahá cuenda ndi tsi ndo tyin
 jihna ca maa ndi tsindacá tuhun ra Cristo
 nu yucú ndo. ¹⁵Nyuhu ña nduyaá ndi tsihin
 tyiñu javahá inga ca ra naha. Ña catyí ndi
 tyin tyiñu maa ndi cuví tsi. Maa tyin nyítá
 iñi ndi tyin cua natsinu vaha ca iñi ndo tsi
 Nyoo. Tan tatum tsa tsinú vaha ca iñi ndo,
 tacan tan cua cuví jacuahua cuaha ca ndi
 tuhun ra Cristo tsi ndo, maa tyin tandihí ñi
 tsaha tsa cua jacuahua ndi tsi ndo maa ñi tsa
 caahán Nyoo cua cahan ndi. ¹⁶Tan tsicá iñi
 ndi cuhun ndi cuhahn ndi tuhun ra Cristo
 nu ña tsitó nyíví tuhun ra. Tyin tacan tan
 ña cua catyí nyíví tyin nduyaá ndi tsihin
 tyiñu javahá inga ra naha.

¹⁷Nyoho tsa cuñi nduyaa, nduyaa ndo
 tsihin tsa javahá Jutu Mañi yo tan ñavin
 tsihin tsa javahá maa ndo. ¹⁸Tyin ra tsa
 catyí tyin vaha ra, ña quitá vaha ra nuu

Nyoo. Maa tyin ra tsa catyí Nyoo tyin vaha,
 ra ican cua quita vaha nuu Nyoo.

11

*Nu tsahá cuenda ra Pablo tsi nyíví ñuu
 Corinto na jaha cuenda ñi tsi ñi na ña
 jandaví ñaha ra vatya naha ra tsi ñi*

¹Vaha xaan tun ña cundihi iñi ndo tyaa
 soho ndo tsa cua cahan yu tsa tsicá iñi maa
 yu tsihin ndo. Ña cundihi iñi ndo tsihin yu
 vasu ndi maa tuhun maa yu cuví tsi. ²Yuhu
 cuiñu xaan yu tsi ndo. Tan maa Nyoo tsahá
 tsa cuiñu yu tsi ndo, tyin juvin yu cahan
 tuhun ra Cristo tsihin ndo nda jihna. Tan
 cuñi yu tsa cuñi ndo tsi intuhun ñi maa
 ra tumaa cuñi iin ñaha yoco tsi ra tsa cua
 cuví yihí ña. Tyin iin ñaha yoco cuñi ña
 tsi intuhun ñi maa ra tsa cua cuví yihí ña.

³Maa tyin tsicá xaan iñi yu tsa cuenda ndo,
 coto tahan ndo tumaa tahen ña Eva. Tyin
 ña Eva jandaví ñaha nu coo tsi ña tsihin
 maña nu. Tan yuhu ña cuñi yu tsa jandaví
 ñaha nyíví tsi ndo tan nasama ndo cuhva
 tsicá iñi ndo tuhun ra Cristo, tan jandihí
 ndo tsa jacahnú ndo tsi intuhun ñi maa ra.

⁴Tyin nyoho yatiy xaan nasamá ndo cuhva
 tsinú iñi ndo tuhun ra Jesús tun siin cuhva
 caahán nyíví tuhun ra. Tyin ñavin tuhun
 ra Jesús tsa jacotó ndi tsi ndo cuví can. Tan
 taahán xaan iñi ndo caca iñi ndo tuhun
 tsa ña nacatsí tahan tsihin tuhun Tatyí li
 Nyoo tsa naquihín ndo nda jihna. Yatiy
 xaan natsinú iñi ndo tuhun caahán nyíví
 tan ñavin tuhun, tsa jacacú ra Cristo tsi yo,
 tsa cahan ndi tsihin ndo. ⁵Ra tsa catyí,
 "Nyuhu cuví ndi ra vaha caahán tuhun ra
 Cristo", tsicá iñi yu tyin ña cahnu ca cuví
 ra can naha ra tan ñavin ca maa yu. Tan
 nyoho nyicún ndo tsi ra naha. ⁶Vasu ndi
 maa ña ñihí vaha yu cuhva caahán yu, maa
 tyin cutuñi vaha iñi yu tuhun Nyoo. Tan
 yacan cuví tsa jacuahá ndi tsi ndo tsihin
 tandihí cuhva javahá ndi.

⁷¿O cuñi maa ndo tyin ña vaha javahá
 yu tsa ña quihiñ yu yahvi quiví cahan yu
 tuhun tsa jacacú Nyoo tsi yo tsihin ndo?
 Tacan javahá yu tyin tacan tan ña cahan
 xaan jaha ndo tsi yu tan nducahn maa
 ndo nuu Nyoo. ⁸Nyíví tsa tsicá tuhun
 Nyoo vehe ñuhu inga ñuu jatinyee tsi yu
 tsihin xuhun. Tan xuhun tsa tsahá ñi tsi
 yu tsatyinú yu can quiví quitsí yu quitsí

cahan yu tuhun ra Cristo tsihin ndo. ⁹Vasu ndi maa yihi tsaha cumaní tsa cumaní tsiyu tsa tsinyii yu tsihin ndo, maa tyin ña tsaha yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsaha tandíhi tsa cumaní tsiyu. Tacan jahá cuenda yu tsi yu tyin ña cuñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua jahava yu. ¹⁰Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyoocho tan ndi tsi inga nyivi iyó nanii Acaya. ¹¹¿Nacuenda caahán yu tyehen cuñi maa ndo? ¿A tsa cuenda tsa ña cuñi yu tsi ndo? Ñavin. Tyin nda maa Nyoo tan tsitó ra tyin cuñi xaan yu tsi ndo.

¹²Ña cua jandíhi yu javahá yu tsa tuhvá yu javahá. Tyin tacan tan ña coo ndatucan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. ¹³Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandaví ñaha ra naha tan jahá ra naha tyin ra tsicá tyiñu ra Cristo cuví ra naha. ¹⁴Tan tsa javahá ra ican naha ra ñavin tsa iyo cuñi yu cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. ¹⁵Yacan cuenda ña iyo cuñi yu tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

¹⁶Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihí tucu yuhu luxu. ¹⁷Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen. ¹⁸Cuaha xaan ra naha catyí ra naha tyin cahnu cuví ra naha tan nduyaá ra naha tsihin tsa iyó nu ñuhu ñayivi ihya. Yacan cuenda cua jacobnu ndihí tucu yuhu tsi yu. ¹⁹Nyoocho catyí ndo tyin tsitó xaan ndo. Tun nditsa ndo, ¿nacuenda tyin yatyi

xaan tyá soho ndo tsa caahán ra sana iñi can naha ra? ²⁰Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuví ndo musu ra naha. Suhú ra naha tsa tsii ndo. Ndacá ñaha ra naha tsi ndo. Ndasi cuñi ra naha nyehé ra naha tsi ndo. Tan nda cuanda cañi ndaha ra naha nuu ndo. ²¹¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña caahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. ²²Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra naha nyivi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. ²³Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehen caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyivi tsi yu tsihin yoho tan ñavin ca ra can naha ra. Cuaha ca tsaha tsinyii yu vehe caa. Tan cuaha tsaha cuñi cùu yu, maa tyin ña tsihí yu. ²⁴Uhun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu. ²⁵Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutya, iin tsaha ndoo yu nu ndutya ñuhu iin quivi tan iin tsa cuua. ²⁶Tandíhi ñi tsaha tsa cuahán yu tyiñu ra Cristo tan yahá yu tundoho. Cuaha ñi tsaha cuñi tañi yu. Cuaha tsa tahan yu. Quita ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhví ra naha tsi yu. Tan juvin ñi tacan javahá nyivi inga ñuu tsihin yu. Cuaha tsa tahan yu tsitsi ñuu, nu tsiqui, nu ndutya ñuhu. Cuaha tsa tahan yu jahá ra catyí tyin yañi yo cuví tsi ra naha tan ña nditsa ra naha. ²⁷Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutya coho yu. Cuaha

tsaha tsico nyitya yu. Cuaha tsaha yaha yu
tsa vitsin tan cumañi jahma tsi yu.

²⁸ Ñavin tuhun ihyá ñi tyin cuaha inga
ca tuhun. Tsicá tucu iñi yu tuhun tandíhi
nyivi yihí cuenda Nyoo, nyooho tan nyivi
inga ñuu tucu. ²⁹ Tyin tun iin ndo tan vita
cuñi ndo, tacan vita cuñi tucu yuhu. Tatum
javahá iin ndo tsa ña vaha jahá nyivi, cahán
nuu yu tan xaan cuñi yu. ³⁰ Tatum cuñi tsi
nduyaa yu tan coto ndo tyin nditsa tsa cuví
yu musu Nyoo, cua nduyaa yu tsihin tuhun
yu tsa janahá tyin ña cuví javahá yu náa
jawahá yu tsihin tunyee iñi maa yu. ³¹ Nyoo,
Jutu ra Jesucristo Jutu Mañi yo, ra taahán
tsi jacahnú yo tacan ñi maa, tsító ra tyin
tsa nditsa caahán yu tan ñavin jandaví ñaha
yu. ³² Quivi tsinyii yu ñuu Damasco ra cumí
tyiñu tsa jahá tyiñu tyiñu ra rey Aretas,
tyacu ra andaru yuhu cora ñuu can, tyin
jaha cuenda ra naha coto quita yu tan tiñ
ra naha tsi yu tan cundaca ra naha tsi yu
vehe caa. ³³ Maa tyin nyivi iyó vehe tsa cacu
tsihin cora can januu ñi tsi yu ityi ventana
tsihin iin tyica cahnu. Tacan jacacu Nyoo
tsi yu ndaha ra cumí tyiñu ñuu can.

12

*Tsa nyehé ra Pablo nda nu tsinu uñi gloria
jahá Nyoo*

¹ Nduve náa ñihí yo tsihin tsa cahan yo
tuhun maa yo, maa tyin cua nacatyi tuhun
yu tsihin ndo tsa janahá Jutu Mañi yo tsi yu
tan tsa nyehé yu jahá ra. ² Nacotó yu iin
ra yihí cuenda ra Cristo tsa tsahan andivi.
Tsa iyó utsi cumi cuiya tsa quihín Nyoo tsi
ra tsahan ra nda nu tsinu uñi andivi. Maa
tyin ña tsító yu tatum tsahan ra tsihin cuñu
ñuhu ra o ñavin. Intuhun ñi maa Nyoo cuví
ra tsító. ³⁻⁴ Tsító yu tyin tsindacá Nyoo tsi ra
nda paraiso nu iyó nyivi tsihí tsa tsinu iñi
tsi Nyoo. Maa tyin ña tsító yu tatum tsahan
ra tsihin cuñu ñuhu ra o ñavin. Intuhun
ñi maa Nyoo cuví ra tsító. Nu tsahan ra
can tsiní ra tuhun tsa ña cuví nacatyi tuhun
yo, tan ndi ña ñihí ndatu nyivi tsa nacatyí
tuhun ñi tuhun can. ⁵ Cuví nduyaá yu tsihin
tsa janahá Nyoo tsi yu quivi can. Maa
tyin ña nduyaá yu tsihin tsa javahá yu tyin
nduyaá yu maa ñi maa tsihin tsa nduve
tunyee iñi maa yu iyó tsi yu. ⁶ Tatum cua
cahan yu tuhun maa yu, ñavin tsa soho cua
cuví can. Tyin tun cua cahan yu can maa ñi

maa tsa nditsa cua cahan yu. Maa tyin ña
cuñi yu cahan yu can coto cahnu xaan jaha
nyivi tsi yu. Vaha ca nanyehe maa ñi cuhva
iyó yu tan cuhva jacuahá yu, tacan tan coto
ñi tatum vaha yu o ña vaha yu.

⁷ Nyoo ña cuñi ra tsa nduyaa yu tsihin
tsa janahá ra tsi yu. Yacan cuenda tsahá
ra tsa nyehé xaan yu tundoho jahá nu ña
vaha. Tan uhvi xaan yu tumaa uhvi nu
tyisó iñu cuñu ñuhu yo. Tyin tacan tan ña
cuví nduyaa yu tsihin tsa janahá Nyoo tsi
yu. ⁸ Tan tsicán yu uñi tsaha tsi Jutu Mañi
yo na quihin nyaa ra tundoho can siquí yu.
⁹ Maa tyin catyí Jutu Mañi yo tyehen tsihin
yu: “Yuhu cuñi xaan yu tsi un, tan yacan
ñi cuví tsa tsiní ñuhu tsi un. Tyin nyivi tsa
nduve tunyee iñi maa ñi iyó tsihin ñi, nyaá
tunyee iñi maa yu tsihin ñi”, catyí ra. Yacan
cuenda sii xaan cuñi yu tyin nyaá tunyee
iñi ra Cristo tsihin yu tyin nduve tunyee iñi
maa yu iyó tsihin yu. ¹⁰ Yacan cuenda sii
xaan cuñi yu tsa nduve tunyee iñi maa yu
iyó tsi yu. Vasu ndi maa caahán nyivi tsi
yu, tan nyaá ndaha ñi tsi yu, vasu ndi maa
nduve tsa iyó tsi yu, vasu ndi maa cuaha
tsa cuví tsi yu, maa tyin sii xaan cuñi yu
tsa nyehé yu tundoho tsa cuenda ra Cristo.
Tyin tsa nduve tunyee iñi maa yu iyó tsi yu,
nyaá tunyee iñi Nyoo tsihin yu.

*Tsicá iñi ra Pablo tuhun nyivi yihí cuenda
Nyoo ñuu Corinto*

¹¹ Tsa caahán yu tuhun maa yu nanduvi
yu tumaa ra sana iñi. Maa tyin maa ndo
cuñi tsa cahan yu tacan tyin ña jahá ca
ndo tsa ñayivi tsi yu. Maa ndo taahán
tsi vaha cahan tuhun yu, vasu ndi maa ña
cahu xaan cuví yu. Tatum yuhu tan ña
cahu cuví yu, vihi ca ra tsa catyí tyin tyiñu
ra Cristo tsicá ra naha, tan ña nditsa ra
naha. Cuñi maa ra naha tyin vaha xaan
ca ra naha tan ñavin ca inga ra tsicá tyiñu
Nyoo. ¹² Yuhu cunyee xaan iñi yu nyehé yu
tandíhi tundoho quivi tsinyii yu jahá tyiñu
yu tyiñu Nyoo nu yucú ndo. Cuaha xaan
tsa iyo javahá yu jahá Nyoo tyin tacan tan
coto ndo tyin nditsa tsa cuví yu ra tava
tyiñu ra. ¹³ ¿A vaha ca tyaá nuu yu tsi inga
nyivi tsa iyó inga ñuu tan ñavin ca nyooho?
Ñavin. Inducu ñi tyaá nuu yu tsi tandíhi
ndo. Intuhun ñi tsa ña javahá yu tsihin ndo
tsa tsinyii yu tsihin ndo cuvi tsa ña tsicán

yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitóndo tyin vaha jayahá yu.

¹⁴ Vityin tsa iyó vaha tandíhi tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi induc yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiñi ñuhu tsi ra. Tyin maa ra taahán tsi cuhva tsa tsiñi ñuhu tsi sehe ra. Tan tacan yuhu. ¹⁵ Shí xaan cuñí yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayiví yu tsa cuenda ndo. Tan tsicá tucu iñi yu tyin tun jañihí ca yu cuñí yu tsi ndo, nyoocho ña cuñí vaha ndo tsi yu.

¹⁶ Tandíhi ndo tan tsitóndo tyin ña tsaha yu tundoho tsi ndo. Tan vasu ndi maa tsitóndo yacan, vatú ñi tyin catyí juhva ndo tyin jandavi ñaha yu tsi ndo tan ña jahá ndo cuenda. ¹⁷ ¿O cuñí maa ndo tyin cahan yu cuendu tsihin ra jaquitsi yu nu yucú ndo tan jandavi ñaha ra naha tsi ndo jahá yu? ¹⁸ ¿A jandavi ñaha ra Tito tan inga ra naha tsi ndo quíví quitsi ra naha nu yucú ndo jahá yu? Ña jandavi ñaha ra naha tsi ndo tyin nyuhu ña tuhvá ndo jandavi ñaha. ¿A ña tsitóndo tyin ra Tito tan yuhu induc yu tsa tsiñi jayahá ndi, tan iñi ñi Tatyí Ii Nyoo iyó tsi nduvi ndi?

¹⁹ Vasíquí tsicá iñi maa ndo tyin tandíhi tsa caahán ndi, tan caahán ndi can tsa cuñí ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandíhi tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñí xaan ndi tsi ndo. ²⁰ Tsicá iñi yu coto ña cua tahan iñi yu cuhva yucú ndo quíví tsaa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tisihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan induc ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsaa yu nu yucú ndo tan ña cuítí ña ndaa yucú ndo. ²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo.

Tan tsicá tucu iñi yu tyin coto vacu yu jaha ndo. Tyin yiñi ndo ña jandíhi ndo tsa jayahá ndo tsa ña vaha tsa quitsaha jayahá ndo nu quitsi ca tsi tyin rayíi ndi tsicá nuu ra tsihin ñaha tan ñaha ndi tsicá nuu ña tsihin rayíi tan náa ndíhi ca maa tsa ña vaha.

13

Nu tsahá cuenda ra Pablo tsi nyívi Corinto, na jaha vaha ñi cuenda tsi ñi tatum vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihyá. Nda tacan tan cuví cunda tyiñi ñi tsa jayahá tsa ña vaha. Maa tyin cuñí tsi uvi o uñi taahan ra cua cuvi tsandaa. ² Tyin quíví quitsi yu nu yucú ndo, catyí yu tsihin nyívi jayahá tsa ña vaha, tyin jandíhi ñi tsa jayahá ñi tsa ña vaha. Tan vityin catyí tucu yu inga tsaha tsihin ñi, tan tsihin tandíhi ndo, tyin tun cua quitsi yu inga tsaha nu yucú ndo, tan ndi jayahá ca ndo tsa ña vaha, ña cua cundaahvi iñi yu nyehé yu tsi ndo. ³ Tacan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví rai iñi ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo. ⁴ Nditsa tyin tsihí ra nu cruu tumaa iñi ra nduve tunyee iñi iyó tsi. Maa tyin nandotó ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iñi ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyinyee ndi tsi nyoocho.

⁵ Nduvi cuhva ndo tsi ndo tun iñi iñi ndo tsinu iñi ndo tsi ra Cristo. ¿A ña tsitóndo tyin iyó ra Cristo añima ndo tun nditsa tsa tsinu iñi ndo tsi ra? ⁶ Maa tyin cuñí yu tsa coto ndo tyin nyuhu ña vaya ndi.

⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña jayahá ndo tsa ña vaha. Ña caahán ndi tyehén tyin cuñí ndi catyí nyívi tyin vaha ndi. Caahán ndi tyehén tyin cuñí ndi tsa jayahá ndo maa ñi maa tsa vaha. Nduvi cuenda ndi tun catyí nyívi tyin vaha ndi o ña vaha ndi.

⁸ Tyin nyaá tsi siquí ndi tsa jayahá ndi tsa vaha. Ña cuví tyihi xeehe ndi tsa nditsa. Intuhun ñi tsa cuví jayahá ndi, yacan cuví tsa jacuaha ndi tsa nditsa. ⁹ Yacan cuenda sií cuñí ndi tsa nduve tunyee iñi iyó tsi ndi, tan

nyee cuñí nyoho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo na cunyicun vaha ca ndo tsi ra nda cuanda ña cumañi ca tsa cumañi tsi ndo. ¹⁰ Jaquitsí yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin tacan tan ña cua cuñi tsi cuxaan yu tsi ndo quiví tsaa yu nu yucú ndo. Tyin nditsa tsa tsahá Nyoo ndatu tsi yu tsa quíhi ndaha yu tsi ndo. Maa tyin ña tsahá ra ndatu can tsi yu tsa janducuiiya ndíhi ca yu iñi ndo. Níhi yu ndatu can tsa cuenda tsa jatyinyee yu tsi ndo.

¹¹ Yañi, nu ndíhi caahán yu ihya, catyí yu tsihin ndo, ndícu ndo cuhva ña cumañi tsa cumañi tsi ndo nuu Nyoo. Sií cuñi ndo. Jandu iin ndo iñi ndo. Coo mañi tahan ndo. Tan Nyoo, ra cuñí xaan tsi ndo tan tsahá tsa taxin coo añima yo, na cunyaa ra tsihin ndo. ¹² Cuhva tahan ndo nacumi tsi ndo tsihin tsa sií cuñi ndo nyehé ndo tsi ndo. ¹³ Tan jaquitsí tandíhi nyiví yiñí cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añima ndo jaha Jutu Mañi yo Jesucristo. Tan na coto ndo tyin Nyoo cuñí xaan ra tsi ndo. Tan nacoto tucu ndo tyin iyó Tatyi li ra tsihin ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyívi Yihí Cuenda Nyoo Ñuu Cayucú Galacia

*Nu tyáa ra Pablo iin carta tsa cuenda nyívi
yihi cuenda Nyoo ñuu cayucú Galacia*

¹ Yuhu ra Pablo cuví yu iin ra tsa tava
tyiñu ra Jesucristo. Ñavin nyívi jaquitsi tsi
yu tyin maa ra Jesucristo tan maa Nyoo Jutu
yo jaquitsi tsi yu tan tsahá ra tyiñu ihyá tsi
yu. Tan juvin ra cuví ra tsa janandoto tsi
ra Cristo tsa yahá tsihí ra. ² Yuhu tan tsihin
tandíhi ra yañi yo tsa yucú tsihin yu, tyáá
ndi carta ihyá tsa cuenda nyooho nyívi yihi
cuenda Nyoo tandíhi vehe ñuhu iyó ñuu
cayucú Galacia. ³ Náquihin ndo tsa vaha tan
tsa taxin tsa tsahá Nyoo Jutu yo tan Jutu
Mañi yo Jesucristo tsi yo coo añima ndo.
⁴ Maa ra Jesucristo nacuhvá cuenda ra tsi
ra nu cruu tsacatyí cuatyí yo Tan javahá
ra tacan tyin maa Nyoo Jutu yo tsa cahan
tsihin ra. Tyin tacan tan jacacú ra tsi yo nu
yucú yo tsihin nyívi caquiñi iyó nu ñuhu
nyívi ihyá. ⁵ Yacan cuenda na jacahnu yo
tsi maa Nyoo tacan ñi maa. Tan na cuvi tsi
tacan.

Nduve ca inga cuhva cuví cacu yo

⁶ Iyo xaan cuñi yu tyin nyooho numi xaan
nacoq ndo tsi Nyoo. Juvín ra nacaná tsi ndo
tyin coo vaha ndo tsihin ra tsa cuenda tsa
javahá ra Cristo tsa cuenda yo. Tan vityin
siñi tuhun tsinú iñi ndo. Cuñi maa ndo
tyin cua jacacu yacan tsi ndo. ⁷ Maa tyin
nduve ca inga cuhva cuví cacu yo. Vasu ndi
maa yihi ra naha jatyañu ra naha tsi ndo.
Tan cuñi ra naha jativí ra naha tuhun Nyoo
tsa jacacú ra Cristo tsi yo. ⁸ Tun iyó yóo
caahán tuhun ra Cristo tsihin ndo tan ña
nacatsí tahan can tsihin tuhun tsa cahan
ndi tsihin ndo, na cuhun ñi anyaya. Yoñi
jaha, vasu maa ndi cuví, o iin ángel quee
andiví cuví. ⁹ Tsa yahá cahan yu tuhun ihyá
tsihin ndo, maa tyin cuñi yu cahan nyico
yu itsi tsihin ndo inga tsaha. Tatun yóo
nyívi caahán tuhun Nyoo tsihin ndo tan siñi
cuhva caahán ñi, na jacuhun Nyoo tsi ñi
anyaya.

¹⁰ Na caahán yu tacan tsihin ndo tsa
cuenda tsa cuñi yu tsa vaha cahan nyívi
tuhun yu. Tyin yuhu nducú yu tsa coo vaha

yu nuu Nyoo. Tyin tun cuñi yu cuví yu nyívi
vaha nuu nyívi, ñavin ra jahá tysiñu tysiñu ra
Cristo cuví yu.

Nacaa quitsahá tsicá ra Pablo tysiñu Nyoo

¹¹ Cuñi yu tsa coto ndo yañi, tyin tuhun
ra Cristo tsa caahán yu tsihin ndo, ñavin
tuhun nyívi cuví tsi. ¹² Ñavin nyívi tsahá
tuhun ihyá tsi yu. Tyin juvin ñi maa ra
Cristo jacotó itsi tsi yu.

¹³ Nyoho tsinú ndo nácaa javahá yu quívi
can. Tan tsitó ndo tyin tsinyaq ndaha xaan
yu tsi nyívi yihi cuenda Nyoo quívi tsa
tsinyiñ yu cuenda ñii Israel ñuu yu. Tan
nducu yu cuhva jandu uvi yu iñi ñi tsinú iñi
tsi ra Cristo. ¹⁴ Tan tsicoó yu cuhva iyó ñi
Israel, tan yuhu cuví ra cuahán ityí nuu ca
tan ñavin ca juhva ra yihi tahan tsihin yu
tsa iin ñi cuiya ndi. Tyin yuhu cuñi xaan
ca yu javahá yu cuhva javahá tsii tsahahnu
ndi. ¹⁵ Maa tyin tsa ndi cumañi ca cacu
yu tan Nyoo tsa nacatsí maa ra tsi yu tyin
cuñi xaan ra tsi yu. Tan nda tsa tsaq maa
quívi tsa tyaa ra cuhva, tan nacaná ra tsi yu.

¹⁶ Tacan tan janahá ra tsi Sehe ra tsi yu tan
nacoto yu tsi ra, tyin tacan tan cuvi cahan
yu tuhun ra nácaa jacacú ra tsi yo tsihin
nyívi tsa ñavin nyívi Israel cuví. Tan quívi
can ña nducu yu nyívi jacuaha tsi yu nácaa
taahán tsi javaha yu. ¹⁷ Tan ndi ña tsahán
yu ñuu Jerusalén nu yucú ra tsa tava tysiñu
jihna ra Cristo tsa ñaha ca tava tysiñu ra tsi
yu. Maa tyin numi ñi tsahán yu nda Arabia.
Tacan tan cuanuhu nyico yu inga tsaha nda
ñuu Damasco.

¹⁸ Tsa yahá uñi cuiya tan tsahán yu nda
Jerusalén, tan nacoto yu tsi ra Pedro. Tan
ndooyu tsihin ra tsahun quívi. ¹⁹ Maa tyin
ña nyehe yu tsi inga ra tsa tava tysiñu ra
Cristo. Intuhun ñi ra Jacobo yañi Jutu Mañi
yo, nyehe yu. ²⁰ Tan nda nuu Nyoo tan
caahán yu tsihin ndo tyin tuhun tsa tayaá yu
nu tutu ihyá, tsa nditsa cuví tsi.

²¹ Tsa yahá tsa tsahán yu ñuu Jerusalén
tan tsahán yu nda Siria tan nda Cilicia.

²² Tan ra yañi yo tsa yucú vehe ñuhu ra
Cristo tsa iyó ñuu tsa cayucú Judea, ña
nacoto ra naha tsi yu. ²³ Maa tyin ñihí tuhun
ra naha tsa caahán nyívi tuhun yu, tyin
catyí ñi: “Ra tsa tsinyaq ndaha tsi yo quívi
can, vityin caahán ndihi ra tsihin nyívi na
tsinú iñi ñi tsi ra Cristo. Tan quívi can cuñi
ra jativí ra tuhun ra Cristo”, catyí ñi, ñihí

tuhun ra naha. ²⁴ Tan jaca hn̄u ra naha tsi Nyoo tsa cuenda tsa javahá Nyoo tsihin yu.

2

Ra cuví ityi nuu tsihin nyíví vehe ñuhu ñuu Jerusalén, ndoó ra naha vaha cuhva jahá tysiñu ra Pablo

¹Tsa yahá utsi cumi cuiya, tan tsahan yu ñuu Jerusalén inga tsaha tsihin ra Bernabé. Tan tsahan ndihí tucu ra Tito tsihin ndi.

²Tsahan yu ndacan tyin maa Nyoo janahá tsi yu tyin taahán tsi tsa cuhun yu. Tan ndacan quita siñ yu tsihin ra cuví ityi nuu tsihin nyíví vehe ñuhu naha ra. Tan tsahá cuenda yu tsi ra naha nácaa tuhvá

yu caahán tuhun ra Cristo tsihin nyíví tsa ñavin ñí Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tysiñu yu. ³Maa tyin ndoó ra naha vaha. Tan ñia jañiñí ra naha tsa cunyaa tuñí Nyoo tsi ra Tito, tan ñavin ra Israel cuví ra. ⁴Nditsa tyin juhvá ra naha cuñí ra naha tsa cunyaa tuñí can tsi ra Tito. Tan ra ican naha ra quihví xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñí ra naha tyin taahán tsi tsa cundaca ñaha ley tsahnu tsi yo. ⁵Maa tyin ndi luxu tan ñia tsahá ndi tsa cundaca ñaha ra can naha ra tsi ndi. Tyin ña cuñí ndi tsa jaña ndo tuhun nditsa tsa jacacú ra Cristo tsi yo.

⁶Maa tyin ra cuví ityi nuu tsihin nyíví vehe ñuhu, nduve tuhun tsaa tsahá ra naha tsi yu. Tan vasu cahnu tysiñu nyisó ra can naha ra, maa tyin tsa cuenda yuhu, yoñí jaha. Tyin ña cahnu cuví yo nuu Nyoo vasu ndi maa tsa cahnu tysiñu nyisó yo. ⁷Ra cuví ityi nuu vehe ñuhu naha ra, nduve inga tuhun tsahá cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahán yu tuhun ra Cristo tsihin nyíví tsa ñavin nyíví Israel cuví. Tumaa tsa jaquitsi ra tsi ra Pedro tyin cahán ra tsihin nyíví Israel. ⁸Tyin juvin ñí maa Nyoo tava tysiñu tsi ra Pedro tyin cahán ra tuhun ra Cristo tsihin nyivi Israel. Tan tava tysiñu tucu ra tsi yuhu tyin cahán yu tuhun ra tsihin nyíví tsa ñavin nyíví Israel cuví.

⁹Yacan cuenda ra cuví ityi nuu naha ra, ra Jacobo, ra Pedro tan ra Juan, nacotó ra naha tyin Nyoo tsahá ra tunyee iñi tsi yu tsa cahán yu tuhun ra Cristo tsihin nyíví. Tan tsahá ra naha ndaha ra naha tijñ ndi, tsihin ra Bernabé tyin ndoó ra naha vaha tsa cahán ndi tuhun ra Cristo tsihin nyíví tsa ñavin nyíví Israel cuví, tan maa ra naha cahán tucu ra naha tsihin nyíví Israel. ¹⁰Tan cahán ra naha iñi tuhun tsihin ndi, na nducuhun iñi ndi tsi nyíví ndaahvi tan na jatyinyee ndi tsi ñi. Tan yacan cuví tsa nducú xaan yu cuhva javahá yu tandihí ñi quivi.

Nu nduxaqn ra Pablo tsi ra Pedro tyin ña vaha tsa javahá ra

¹¹Maa tyin quivi tsahan ra Pedro ñuu Antioquía, nuu nuu ra tan cuxaan yu tsi ra tyin ña vaha tsa javahá ra. ¹²Tyin tsa jihna ñí vaha javahá ra tyin tsatsi ra tsihin ñí tsa ñavin nyíví Israel cuví. Maa tyin tsa tsaa juhvá ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñí ca ra catsi ra tsihin ñí ican. Javahá ra tacan tyin yuuhví ra coto cuxaan ra tsa tsaa can naha ra tsi ra tyin ndi nyitá iñi ra can naha ra tuñí Nyoo. ¹³Tacan tan inga ra Israel tsa yihí cuenda ra Cristo, ndu iñi ra naha tsihin ra Pedro. Tan javahá ndihí ra naha tsa ña vaha can. Tyin javahá ra naha tumaa javahá ra Pedro vasu tsító ra naha tyin ña vaha can. Tan nda cuanda ra Bernabé tan ndu iñi ra tsihin ra naha. ¹⁴Tan nyehé yu tyin ña vaha javahá ra naha. Ñavin tumaa cuhva catí tuhun ra Cristo. Yacan cuenda cahán yu tsihin ra Pedro nuu tandihí ra yucú ican: “Yooho cuví un iñi ra Israel. Tan iyó un tumaa iyó nyivi tsa ñavin nyíví Israel cuví. ¿Nacaa tsa cuñí un jañiñí un tsi nyivi tsa ñavin nyíví Israel cuví na coo ñí cuhva iyó ñí Israel? [Tan ndi maa un tan ña javahá un tacan]”, catyi yu tsihin ra.

¹⁵Maa yo nda ndi cacu yo tan cuví yo ra ñuu Israel ña javahá xaan yo cuatyí tumaa javahá ñí tsa ñavin nyíví Israel cuví. ¹⁶Maa tyin tsító yo tyin ña cuvi janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñí iñi yo tsi ra Jesucristo. Yacan cuenda tsinú iñi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo

cuhva tyaa yahvi yo tsa catyí ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyí ley tsahnu can.

¹⁷ Maa tyin vityin tatum nducú yo cuhva nduvahá yo nuu Nyoo tsa cuenda ra Cristo, cuñí tsi catyí tyn nacoto yo tyin iyó tucu cuatyí yo tumaa iyó cuatyí ñi tsa ñavin nyiví Israel cuví. Tatum tacan, *¿a cuñí tsi catyí tyn iyó cuatyí yo jahá maa ra Cristo tyin nacoto yo tyin iyó cuatyí yo?* Ñavin tacan. ¹⁸ Maa tyin tun cua cuita nyico iñi yo ley tsa tsa yaha nacoo yo, yacan nditsa cua coo cuatyí yo. ¹⁹ Tyin ley can janahá tsi tsi yu tyin taahán tsi cíu yu tsa catyí cuatyí yu, tan yacan cuenda ña nducu ca yu cuhva cacu yu tsihin ley can, tyin tacan tan cuvi coo yu tsa cuenda Nyoo. ²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añaima yu vityin. Tan cuhva iyó yu vityin, iyó yu tsihin tsa tsinú iñi yu tsi ra tsa cuví ra Sehe Nyoo. Tyin maa ra cuñí ra tsi yu, tan tsihi ra tsacatyí cuatyí yu. ²¹ Ña cuñí yuhu tyaa tsiyo yu tunyee iñi tsa tsaha Nyoo tsi yo. Tyin tun tsatayin cuví cacu yo jaha ley tsahnu, nduve nacatyí tsihi ra Cristo.

3

Naquihín yo Tatyi li Nyoo tsa cuenda tsa tsinú iñi yo tsi ra Cristo

¹ ¡Náa tsa soho iyó nyoho, nyiví Galacia! ² ¿Yóo tsa jatíví tsi ndo tan ña tyaa yahvi ca ndo tsa nditsa? Catsi xaan tsaha cuenda ndi tuhun ra Jesucristo tsi ndo. Tan cutuñí vaha iñi ndo nacuenda tsihi ra nu cruu. ³ Intuhun ñi tsa cuñí yu nducu tuhun yu tsi ndo. ⁴ A naquihín ndo Tatyi li Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra? ⁵ ¿Nacaa tsa soho xaan iyó ndo vityin? Tan quivi jihna ñi vaha xaan tyaa yahvi ndo tsi Nyoo tsihin tunyee iñi Tatyi li ra. Tan vityin, ⁶ nácaa cuñí ndo coo ndo tsihin tunyee iñi maa ndo? ⁷ A tsa cuatu ñi nyehe ndo nácaa jatyinyee Tatyi li Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñí yuhu. ⁸ ¿Nacaa tsaha Nyoo Tatyi li ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin

tsiñi ndo tuhun ra Cristo tan tsinú iñi ndo tsa caahán ra.

⁹ Ra Abraham, tsiñu iñi ra tsa cahan Nyoo tsihin ra, yacan cuenda Nyoo naquihín tsi ra tumaa tsatayin vaha ra. ¹⁰ Yacan cuenda taahán tsi coto ndo tyin nyiví tsa nditsa cuví tata ra Abraham, juvin ñi cuví ñi tsa tsinú iñi tsi Nyoo. ¹¹ Tan tsanaha ndoo tuhun Nyoo nu tutu. Tan catyí tsi tyin nu cuahán ca tsi quivi, cua janduvaha Nyoo tsi nyiví tsa ñavin nyiví Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihi maa nyiví cua nasoco yu tsi ñi tsa cuenda un”, catyí Nyoo tsihin ra. ¹² Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsiñu iñi tucu maa ra.

¹³ Nyiví tsa nyitá iñi ley tsa tyaa ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihi nyiví tsa ña tyaá yahvi tandihi ley tsa nyaá nu libru ley Nyoo, cua tatsi tuñi Nyoo tsi ñi.” ¹⁴ Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juvin ra cua coo ñayiví tsa ña cua naa maa”, catyí tuhun Nyoo. ¹⁵ Tan ley ra Moisés ña catyí tsi tun taahán tsi tsinu iñi yo. Tyin catyí ley can: “Nyiví javahá tsa catyí ley ihya, coo ñi ñayiví nyito tsa cuenda can”, catyí tsi.

¹⁶ Ley can catyí tyin taahán tsi cíu yu tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihín tandihi cuatyí yo. Tyin catyí tuhun Nyoo: “Tandihi maa ra tsa ticaá nu yutun, tatsí tuñi Nyoo tsi ra.” ¹⁷ Tacan cuví tyin tsa cuenda ra Cristo Jesús tan nasocó Nyoo tsi nyiví tsa ñavin nyiví Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihín yo Tatyi li tsa catyí Nyoo tyin cuhva ra tsi yo.

Ley tsahnu janahá tsi tsi yo tyin iyó cuatyí yo, maa tyin ña jacacú tsi tsi yo

¹⁸ Yañi, cua cahan yu iin cuhva tsihin ndo, cuhva iyó yo nu ñuhu ñayiví ihya. Tatum iin ra tan catyí ra tyin cua cuhva ra tsa cuhva ra tsi inga ra, tan tatum tsa yaha tyihi ra firma ra, yoñi ca cuví quihin nyaa can. Tan yoñi ca cuví natyiso juhva ca siquí can.

¹⁶ Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandíhi ra cuví tata ra, tyin intuhun ñi ra cua cuhva ra. Tan juvin ra can cuví ra Cristo. ¹⁷ Tsa caahán yu, cuví tsehe: Nyoo natuhún tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaa ley tsa tyaa ra Moisés. Maa tyin ña cuví caní ley can tuhun tsa ndoo Nyoo tsihin ra Abraham. Tan ña cuví casi tsi nu naquihín yo tsa catyí Nyoo tyin cuhva ra tsi yo. ¹⁸ Tun tsatayin tsa cuenda ley ra Moisés tan naquihín yo tsa taahán tsi tsi yo, cuatu xaan ndoo Nyoo tuhun tsihin yo. Maa tyin tsító yo tyin ñihí ra Abraham tsa ñihí ra tyin tsaha Nyoo tsa catyí ra tyin cuhva ra tsi ra.

¹⁹ Tatan tacan, ¿nacuenda vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsaha ra ley can tsi ra Moisés tan janahá tsi tyin iyó cuatyí yo. Tan ángel Nyoo tsaha cuenda ley can tsi ra Moisés. Tan ra Moisés tsaha cuenda can tsi nyivi. Tan ndoo tsi nda cuanda quíví tsa quitsí ra Cristo, ra cuví tata ra Abraham. Juvin ra cuví ra tsa catyí Nyoo tyin cua cuhva tsa vaha tsi yo. ²⁰ Tan juvin ñi maa Nyoo cahan tsihin ra Abraham quíví can. Tan ña tsiní ñuhu tsa nducu siin ra iin ra nacatyí tuhun tsihin ra Abraham.

²¹ ¿A cuñí tsi catyí tyin ley tsa tyaa ra Moisés ña nacatsí tahan tsi tsihin tsa catyí Nyoo tyin cuhva ra tsi yo? Ñavin. Tun tsatayin cuvi coo yo ñayivi nyito jaha ley can, cuvi nduvaha yo nuu Nyoo tsa cuenda tsi. Maa tyin ña cuvi. ²² Tyin catyí nu tutu Nyoo tyin iyó cuatyí tandíhi nyivi. Tyin tacan tan nyivi tsa tsinú iñi tsi ra Jesucristo cuví ñihí ñi ñayivi nyito tsa catyí Nyoo tyin cuhva ra tsi yo.

²³ Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyiyo vehe caa. Tacan cuví nda cuanda janahá Nyoo tsi yo nácaa tan tsinú iñi yo tsi ra. ²⁴ Tan ley can cuví tsi tumaa iin nyivi jahá cuenda tsa nyihi. Tyin jaha cuenda tsi tsi yo nda cuanda quíví quitsí ra Cristo. Tan cuví tsinú iñi yo tsi ra tan nduvaha yo nuu Nyoo. ²⁵ Tan vityin tsa tsaa quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandíhi yo cuví yo sehe Nyoo tyin tsinú iñi yo tsi ra Cristo Jesús. ²⁷ Tan tandíhi yo tsicoondutyá yo tan ndu ijin yo tsihin ra Cristo, tan nanduví yo tumaa maa ra. ²⁸ Ña ñiñi xaan ca tsa cuví yo nyivi Israel, a cuví yo nyivi Grecia; a cuví yo musu, a ñavin musu cuví yo; a cuví yo rayii, a ñaha. Yoñi ca caahán tuhun yacan, tyin tsa iin ñi cuví yo tsihin ra Cristo, intuhun ña nyivi cuví yo tsihin ra. ²⁹ Tan tatum cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihí jutu ra, tan nacoo jutu ra tandíhi tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandíhi tsa cuca jutu ra. ² Iyó ra jahá cuenda tsi ra nda cuanda tsaa cuiya ra tsa catyí jutu ra tyin cua naquihin ra ndaha tyiñu tsa nacoo ra tsi ra. ³ Tan tacan cuví maa yo. Tsa ndi cumañi ca quitsí ra Cristo, cuví yo musu cuhva iyó nyivi iyó nu ñuhu ñayivi ihyá. ⁴ Maa tyin quíví tahán tsi, Nyoo jaquitsí ra tsi Sehe ra. Tan jacacu iin ñaha tsi ra. Tan tsindaca ñaha ley tsahnu Nyoo tsi ra. ⁵ Jaquitsí Nyoo tsi ra tyin jacacu ra tsi yo tsa ña quihi ndaha ca ley tsi yo. Tyin tacan tan naquihín cuenda Nyoo tsi yo tumaa sehe ra.

⁶ Tan tsa cuenda tsa nanduví yo sehe ra, Nyoo jaquitsí ra Tatyí Li ra Cristo cunyaa añima yo. Tan tsa cuenda Tatyí Li ra caná tsaa yo tsi Nyoo tan catyí yo: “Tyatya”.

⁷ Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyivi yihí cuenda Nyoo

⁸ Tan quíví tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. ⁹ Maa tyin vityin tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¹⁰ Nacaa tsa cuñí ndo quihin nyico ndo tuhun ndaaahi tsa nduve tunyee iñi iyó tsi, tan cuvi nyico ndo musu?

¹⁰ Nyoooho ndi jacahnú ca ndo quíví vico,

quíví nduyutuyá yoo, tan vico tandihi ñi cuiya.¹¹ Yuuhví xaan yu coto iin tsa cuatuñi cuví tyiñu jahá yu tsihin ndo.

¹² Yañi, caahán ndaaahvi yu tsihin ndo cōndo tumaa iyó maa yu. Tyin yuhu ña yiñi ndaha ca ley tsahnu tsi yu. Tumaa tsa ña yiñi ndaha ley tsahnu tsi maa ndo. Tan tsa tacan iyó yu, ña cuñi yu tsa caca iñi ndo tyin jatíví ndo tsi yu.¹³ Tan tsa tsitó ndo tyin quíví quitsi jihna yu ñuu ndo iyó iin cuehe tsi yu, yacan cuenda ndoq yu juhva quíví tsihin ndo, tan cahán yu tuhun ra Cristo tsihin ndo.¹⁴ Tan vasu ndi maa tsa cuuhví yu tsihin cuehe can valha naquihín cuenda ndo tsi yu tan ña tyaa tsyo ndo tsi yu. Naquihín cuenda ndo tsi yu tumaa tun cuví yu iin ángel tan tumaa tun ra Cristo cuví yu.¹⁵ Tan vityin žnumaa cuahán tsa sii xaan cuñi ndo tsihin yu quíví can? Tyin yuhu cuví yu tsandaa tyin quíví can, nda cuanda cuñi ndo tava ndo tinuu ndo tan cuhva ndo tsi yu, tun tsatayin cuví nduvaha yu tsihin yacan.¹⁶ Tan vityin, ¿a nanduvi yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

¹⁷ Nyiví can, cuñi xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñi ñi tsa cunyicun ndo tsi ñi tan ña tsinu ca iñi ndo tuhun caahán yu.¹⁸ Vaha tsa cuví yo tsi nyiví, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíñi yu tsihin ndo.¹⁹ Nyoho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehé yu tundoho nda cua cuhnu ndo tsihin tunyee iñi maa ra Cristo.²⁰ Vaha xaan tun tsatayin cuvi cunyii yu tsihin ndo vityin ihyá. Tyin tacan tan cuvi nasama yu cuhva cahan yu tsihin ndo. Tyin vityin ña tsitó yu náa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

²¹ ¿A ñaha ca cahvi ndo tsa caahán ley tsa tsaha Nyoo tsi ra Moisés? tyin cuñi ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can.²² Catyí tsi tyin ra Abraham tsicoq uvi taahan sehe ra. Tsicoq iin sehe ra tsihin ña Agar tsa cuvi musu ñasihi ra. Tan tsicoq inga sehe ra tsihin ña Sara ñasihi vaha maa ra.²³ Cacu

sehe ñaha tsa cuví musu can tumaa cacú tandihi ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuvi.²⁴ Tan tuhun can iyó tsa cuñi tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndoq Nyoo tuhun tsihin yo. Intuhun tuhun can cuví cuenda yucu Sinaí. Tan nyiví yiñi cuenda ley can cuví ñi tumaa ña Agar, tyin iin musu ñi cuví ña tsihin sehe ña.²⁵ Tumaa ña Agar, tan tumaa yucu Sinaí tsa canyíí Arabia, tacan cuví ñuu Jerusalén nda quíví vityin. Tyin nyiví ñuu can yiñi ndaha ley tsahnu tsi ñi. Tan cuví ñi tumaa musu ley can.²⁶ Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sìhi yo.²⁷ Tan catyí tuhun Nyoo tyehen:

Cusii iñi yooho, ñaha tsa ña cuví coo sehe. Yooho tsa nduve sehe iyó.
Cana tsaa tsihin tsa sii cuñi un, tyin ña tsitó un tsa uhvi cacy sehe un.

Cusii iñi tyin cua cuhva cuaha ca yu sehe un tan ñavin ca ñaha iyó yíi, catyí tuhun Nyoo.

²⁸ Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra.²⁹ Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihyá. Ra tsa cuñi tyin javaha yo tsa catyí ley, xaan iñi ra naha tsi yo tsa cuví yo nyiví cacú tsaa tsihin Tatyi li Nyoo.³⁰ Tan žnáa catyí tuhun Nyoo? Catyí tsi: “Tava tsyo tsi ñaha tsa cuví musu can tsihin sehe ña, tyin ña cuvi naquihín sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo.³¹ Yacan cuenda, yañi, ña cuvi yo tumaa cuví sehe ñaha tsa cuvi musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihín cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaa yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yahá jacacú ra tsi yo ndaha ley tsahnu can. Yacan cuenda jahá ndo cuenda tsi ndo, coto nanduvi ndo musu inga tsaha.

² Tyaa soho ndo, yuhu ra Pablo caahán tsihin ndo. Tatum cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuvi jatyinyee ra Cristo tsi ndo. ³Cuñi yu cahan yu tsihin ndo inga tsaha tuhun ihyá: Tandíhi ra tsa cuñi cacu tsihin tsa cunyaa tuñi Nyoo tsi ra naha, cuñi tsi javaha ra naha tandíhi maa tsa catyí ley ra Moisés. ⁴Tandíhi nyoooh o tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo. ⁵Maa tyin yoo tsihin tsa jatyinyee Tatyi li Nyoo tsi yo tan tsinú iñi yo tsi ra Cristo, tan nyitá iñi yo nduvahá yo nuu Nyoo. ⁶Tyin tatum iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuvi coo yo, tan cuñi tahan ca yo tsi yo.

⁷ Nyoooh vaha xaan cuahán ndo quivi can. ⁸Tan vityin yóo jandu uvi iñi ndo? Tan ña tyaá yahvi ca ndo tsa nditsa. ⁹Tuhan tsa janahá ñi can, ñavin tuhun Nyoo, ra tsa canä tsi yo, cuví can. ¹⁰Tyin tumaa ndaá yutsan paan jahá luxu ñi yutsan iya, tacan cuví iin nyiví caquiñi, cuaha ca nyiví cuvi jativí ñi. ¹¹Nyoo cua tatsi tuñi ra tsi nyiví jandu uvi iñi ndo. Nduve cuenda ra yóo ñi cuví ñi. Maa tyin yuhu tsító vaha yu tyin Jutu Mañi yo cua jatyinyee ra tsi ndo tan ña cua tyaa iñi ndo inga cuhva tsa ña janahá yu tsi ndo.

¹¹Tan tsa cuenda yuhu, yañi, tun tsatiny catyí yu tyin ra tsinú iñi tsi ra Cristo cuñi tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasí cua cuñi ra naha tsa caahán yu tuhun ra Cristo, ra tsa tsihin nu cruu tsacatyí cuatyí yo. ¹²Maa tyin ra tsa cuñi jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuvi ca jandu uvi iñi ra naha tsi ndo.

¹³Nyoooh, yañi, canä Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihí tsa cuñi cuñi ñuhu ndo. Maa tyin taahán tsi tsa jatyinyee tahan ndo tsi ndo tsa cuenda tsa cuñi tahan ndo tsi ndo. ¹⁴Tyin iyó iin ley Nyoo, tan catyí tsi: "Cuñi tahan ndo tsi ndo tumaa cuñi ndo tsi maa ndo", catyí tsi. Tan tatum nditsa tsa cuñi

tahan yo tsi yo, tsa javahá ndihí yo tandihí ca tsa caahán ley tsahnu. ¹⁵Jaha ndo cuenda tyin tatum caahán nyaa tahan ndo tsi ndo tan ndasí cuñi ndo nyehe tahan ndo tsi ndo, cua tíví nu yucú ndo.

Cuhva cuñi cuñi ñuhu yo tan cuhva iyó yo tsihin Tatyi li Nyoo

¹⁶Tsa cuñi yu cahan yu tsihin ndo cuví tuhun ihyá: Coo ndo tsihin tunyee iñi Tatyi li Nyoo. Tacan tan ña cua javaha ca ndo tsa ña vaha tsa cuñi cuñi ñuhu ndo. ¹⁷Tyin tsa javahá yo tsa ña vaha tsa cuñi cuñi ñuhu yo, ñavin cuhva cuñi Tatyi li Nyoo javahá yo. Tyin Tatyi li Nyoo cuñi tsi tsa javahá yo tsa vaha. Tan cuñi ñuhu yo ña cuñi tsi javahá tsi cuhva cuñi Tatyi li Nyoo. Tsa cuñi Tatyi li Nyoo cañí tahan can tsihin tsa cuñi cuñi ñuhu yo. Yacan cuenda yiíjavaha yo tsa cuñi yo javaha yo. ¹⁸Maa tyin tatum tsahá yo tsi yo tsa jaquihin ityi Tatyi li Nyoo tsi yo, ña cua cundaca ñaha ca ley tsahnu tsi yo.

¹⁹Ña yií nacoto yo tsi nyiví javahá cuhva cuñi cuñi ñuhu ñi. Yihí rayii, iyó ñasiñi ra naha tan iyó inga ñaha tsi ra naha. Tan yihí ñiñaha iyó yií ñi tan iyó inga rayii tsi ñi. Tan yihí rayii quixí ra tsihin ñaha tan ña cuñi ra tindaha ra tsihin ña, tan juvin ñi tacan javaha juhva ñiñaha. ²⁰Yihí ñi jacahnú ñi tsitoho. Yihí ñi tasí ñi. Yihí ñi ndasí cuñi ñi nyehe ñi nyiví. Yihí ñi cañí tahan ñi. Yihí ñi cuñi ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahví sava ñi nu yucú ñi tyin cañí tahan ñi. Tan tacan tan quita siñi ñi. ²¹Tan yihí ñi nyiyó iñi ñi tsa iyó tsi inga nyiví. Tan yihí ñi tsahñi tahan ñi. Tan yihí ñi tuhva ñi tsíñi. Tan yihí ñi cuaha xaan tsatsí ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahan yu tsihin ndo quivi can. Tyin tandíhi ñi tsa javahá yacan, ña cua cuvi naquihin cuenda ñi nu ndacá ñaha Nyoo.

²²Maa tyin tsa tsahá Tatyi li Nyoo tsi yo, cuví tsa cuñi yo tsi Nyoo tan tsi nyiví, tsa sií cuñi yo, tsa taxin cuñi añima yo, tsa nyee xaan iñi yo, tsa vaha iñi yo, tsa vaha nyiví cuví yo, tsa ña cundihí iñi yo javahá yo tsa vaha tsihin nyivi, tsa tsinú iñi yo tsi ra Cristo. ²³Tan inga tsa tsahá Tatyi li Nyoo tsi yo, yacan cuví tsa ndaahvi jahá yo tsi yo,

tsa ña javahá yo cuhva cuñí cuñu ñuhu yo. Tatum javahá yo tandihí tsa vaha ihyá, ndi intuhun ley tam ña cua cuvi catyi tsi tyin iyó cuatyí yo. ²⁴Tan yoo tsa yiñí cuenda ra Cristo Jesús, tsa yaha jandihí yo tuhun tsa javahá yo tsa ña vaha tsa cuñí cuñu ñuhu yo. ²⁵Tan tumaa tsa iyó yo ñayivi nyito tsa cuenda Tatyí Ii Nyoo, tacan cuñí ndihí tucu tsi tsa tyáa yahví yo tsa janahá ra tsi yo.

²⁶Na ña cahnu jaha yo tsi yo. Tan ña jacañi tahan yo tsi nyivi. Tan na ña nyiyo iñi yo tsa tsii inga nyivi.

6

Taahán tsi jatyinyee tahan yo tsi yo

¹Yañi, tatum nyehé ndo javahá iin ra yañi yo cuatyí, nyoho tsa ñihi nyaá Tatyí li Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahan vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihí nu ña vaha tsi ndo.

²Na jatyinyee tahan yo tsi yo náa tundoho taahán yo. Tyin tatum javahá yo tacan, cuñí tsi catyi tyin tyáa yahví yo tsi ra Cristo.

³Tatum ndáa yo cuñí maa yo tyin cahnu nyivi cuví yo, tan nduve náa cuví yo, juvin ñi tsi maa yo jandaví ñaha yo. ⁴Na jaha jihna yo cuenda tatum vaha tsa javahá yo. Tacan tan coto yo tatum vaha javahá yo tan cusí iñi yo. Tan ña taahán tsi nyehé yo náa javahá inga nyivi. ⁵Tyin intuhun intuhun maa yo tan taahán tsi cunyee iñi yo cuiyo tsa taahán tsi tsi yo.

⁶Tan cuñí tsi tsa jatyinyee ndo tsi ra jacuahá tuhun Nyoo tsi ndo. Cuhva ndo náa tsiñi ñuhu tsi ra.

⁷Tan ña jandavi ñaha ndo tsi juvin ñi maa ndo. Tyin Nyoo yoñi cuví vacu nducu tsi ra. Tyin tandihí tsa tatsí nyivi, yacan cua naquihin ñi. Tyin tatum javahá ñi tsa vaha, tsa vaha cua naquihin ñi. ⁸Tacan tucu tatum iñi nyivi tan javahá ñi tsa ña vaha tsa cuñí cuñu ñuhu ñi, juvin ñi maa tsa javahá ñi cua jativí tsi ñi. Maa tyin tatum javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayivi nyito tsa ña cua naa maa coo ñi. ⁹Yacan cuenda janyee ndo iñi ndo javaha ndo tsa vaha. Tyin tatum ña jandihí yo tsa javahá yo tacan, cua naquihin yo tsa vaha na tahan tsi quivi. ¹⁰Yacan cuenda tandihí ñi tsaha tsa cuvi javaha yo tsa vaha,

na javaha yo itsi tsihin tandihí ñi nyivi. Tan tsa jihna ñi taahán tsi javaha yo tsa vaha tsihin nyivi yiñí cuenda Nyoo.

Sii xaan cuñí ra Pablo tyin nyehé ra tundoho tsa cuenda ra Cristo

¹¹Nyehé ndo tsa nahnu letra tyáa yu tsihin ndaha yu nu tutu ihyá vityin. ¹²Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyi nyivi tyin vaha xaan ra naha. Tan ña cuñí ra naha nyehé ra naha tundoho tsa cuenda ra Cristo, ra tsa tsihí nu cruu tsa cuenda yo. ¹³Tyin ndi maa ra tsa nyisó tuñi Nyoo tan ña tyáa yahví ra naha tandihí tsa caahán ley. Cuñí ra naha tsa cunyaa tuñi Nyoo tsi nyoho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. ¹⁴Maa tyin yuhu ña cuñí yu cu iyo iñi yu tsi yu tsa cuenda náa ndihí tuhun. Maa tyin cu iyo iñi yu tyin tsihí Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayivi ihyá tyin ña ndaca ñaha ca yacan tsi yu. ¹⁵Tyin tatum nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduví yo iin nyivi tsaa tsa cuenda ra. ¹⁶Tandihí nyoho tsa iyó tacan, naquihin ndo tsa taxin coo añima ndo. Tan na cundaahví iñi Nyoo nyehé ra tsi tandihí ndo, tyin nditsa tsa cuví ndo nyivi cuenda ra.

¹⁷Vityin tan nu cuahán tsi ityi nuu, ndi intuhun ndo tan ña cua cuhva ca ndo tisihi tsi yu. Tyin tandihí paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸Yañi, na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

¹Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyoho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsí yu carta ihyá tsi ndo. ²Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añaima ndo.

Tsa iin ñi cuví yo tsihin ra Cristo, Nyoo nasocó xaan ra tsi yo

³Na jacobnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tsihin tandíhi nuu tsa vaha tsa iyó gloria tsa cuenda tsa iin ñi cuví yo tsihin ra Cristo.

⁴Tsa ndi cumañi ca jahava ra ñihu ñayiví tan nacatsí ra tsi yo tyin ndu iin yo tsihin ra Cristo. Tyin tacan tan cuiti coo yo nuu ra tan ña coo ca cuatyí yo. ⁵Tsa cuenda tsa cuñí ra tsi yo, tyaa ra cuhva tahan tsanaha tyin naduvi yo sehe ra tsa cuenda ra Jesucristo. Tacan jahava ra tyin tacan cacú iñi maa ra. ⁶Yacan cuenda taahán tsi jacobnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iñi ra tsi yo tsihin Sehera, ra tsa cuñí xaan ra. ⁷Nyoo cuñí xaan ra tsi yo. Tan yacan cuenda tyahví ra tsihin niñi Sehera tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸Tan tsa janahá ra tsi yo tyin cuñí xaan ra tsi yo, tsahá ra tsa nyityi ra tan tsa tsinú tuñi ra coo tsi yo. ⁹Tan tsahá ra tsa nacotó yo tuhun tsa tyihí ra cuhva tahan tsanaha tyin jahava ra tsihin ra Cristo. Tan tandíhi tuhun can tsicumi xeehe ra tan ña jacoto ra can tsi nyivi tahan tsanaha. ¹⁰Maa tyin tsa cuu tahan tsi quivi cundaa tuhun tsa tyihí ra cuhva, cuu jandu iin ra tandíhi tsa iyó nu ñihu ñayiví ihyá tan andívi, tan cuu nacuhva cuenda ra tandíhi can tsi ra Cristo tyin quihi ndaha ra.

¹¹Tan tsa cuenda tsa iin ñi cuví yo tsihin ra Cristo, ñihí ndihi yo tsa ñihí ra, tyin maa Nyoo cuñí tacan. Yacan cuenda nacatsí ra tsi yo, tyin tacan tyihí ra cuhva tyin jahava ra tyin maa ra jahava tandíhi cuhva nyehé ra tyin vaha. ¹²Jahava ra tyehen tyin nyuhu

tsa natsinu jihna iñi tsi ra Cristo jacobnu ndi tsi Nyoo tsa cuenda tsa cahnu cuví ra.

¹³Tan tacan tucu nyoho natsinu iñi ndo tsi ra Cristo, tan ndu iñi ndo tsihin ra quivi tsa tsinú ndo tuhun Nyoo tsa cuví tsa nditsa, tan nácaa jacobú ra tsi yo. Tan tsahá ra Tatyi li ra coo añaima ndo, tumaa catyi ra tyin cuu jahava ra tan yacan cuñí tsi catyi tyin cuví ndo nyivi yihí cuenda ra. ¹⁴Nyoo jihna ca Tatyi li ra tsahá ra tsi yo tyin tacan tan cuita iñi yo tandíhi ca tsa cuu cuhva ra tsi yo quivi jandu iin ra tandíhi nyivi tsa cuu cacu. Tyin tacan tan jacobnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsinú tuñi tsi nyivi tsa tsinú iñi

¹⁵⁻¹⁶Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandíhi ñi tsahá tsa tsicán tahvi yu tsi ra tan tsahá yu tyahví nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo.

¹⁷Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa janahá ra tsi yo tsihin Tatyi li ra, tacan tan nacoto vaha ca ndo tsi ra. ¹⁸Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda cana ra tsi ndo, tan náa cuví tsa cuu cuhva ra tsi ndo ityi nuu ca tyin tsa cuu cuhva ra tsi nyivi cuenda ra, sií xaan caá can tan cuu xaan can. ¹⁹Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tsihin yoo tsa tsinú iñi tsi ra. Tan juvin ñi maa tsihin tunyee iñi cahnu can

²⁰janandoto Nyoo tsi ra Cristo. Tan tyaa ra tsi ra xiñ cuahua ra nda gloria. ²¹Tan yacan cuví nu jacobnu xaan ca Nyoo tsi ra Cristo tan ñavín ca tandíhi ca ra ndacá ñaha nu ñihu ñayiví ihyá tan nda andívi. Tyin yoñi yóo ra cahnu ca cuví ñuu ñayiví ihyá tan ndi ñayiví tsa cuu coo, tyin intuhun ñi maa ra Cristo cuví ra cahnu ca cuví. ²²Tan tandíhi cuii maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuvi ra jiñi tsihin nyivi tsa yihí cuenda ra.

²³Tyin yoo, tsa yihí yo cuenda ra, cuví yo cuñu ñihu ra. Tan maa ra tsihin yo cuví tsi intuhun ña cuñu ñihu. Tan juvin maa ra jandunií ra tandíhi tsa iyó.

2

Jacacú Nyoo tsi yo tsa cuenda tsa cuñí ra tsi yo

¹Nyoo tsaha ra ñayivi nyito coo ndo quivi ndu iin ndo tsihin ra Cristo. Maa tyin tsa ndi cumañi ca tsinu iñi ndo tsi ra Cristo ña nyito añaima ndo tyin ndi iyó cuaha cuatyi ndo. ²Tan quivi can ndi jayahá ndo cuhva jayahá nyivi ña tsitó tsi Nyoo. Ndi tyaa yahvi ndo tsi nu ña vaha tsa nadacá ñaha tsi nu tatyi ña vaha tsa natyuuhú tsi nyivi tsa ña tyaa yahvi tsi Nyoo. ³Tan juvin ñi tacan tsicoq tucu yo quivi can, tyin jayahá yo tsa ña vaha tsa cuñí cuñu ñuhu yo tan cuhva tsicá iñi yo. Tan tsa cuenda tsa jayahá yo tacan, taahán tsi tatsi tuñi Nyoo tsi yo iin caa ñi tsihin tandihí ca nyivi tsa jayahá tsa ña vaha. ⁴Maa tyin Nyoo cundaahví xaan iñi ra nyehé ra tsi yo tsa cuenda tsa cuñí xaan ra tsi yo. ⁵Tan vasu tsa tsihin añaima yo jaha cuatyi yo, Nyoo janandoto ra añaima yo tan tsaha ra ñayivi nyito coo yo nu jandu iin ra tsi yo tsihin ra Cristo. Tan cacu yo jaha tsa cuñí xaan Nyoo tsi yo. ⁶Tan tsa janandoto ra tsi yo iin caa ñi tsihin ra Cristo Jesúus tyaa ra tsi yo tsihin ra nda gloria. ⁷Tan jayahá Nyoo tyehen tyin tacan tan nu cuahán ca tsi ityi nuu cua coto tandihí ca tsa cua coo tyin vaha xaan iñi ra tsihin yo tan cahnu xaan tumañi iñi tsaha ra tsi yo tsa cuenda ra Cristo Jesúus. ⁸Tyin tsa cuenda tsa vaha tsa tsaha Nyoo tsi yo tan cacu yo. Tan ñihí yo tumañi iñi ihya jahá tsa tsinu iñi yo tsi ra Cristo. Tan ñavin tsihin tsa jayahá yo tan ñihí yo can, tyin maa Nyoo tsaha can tsi yo. ⁹Ñavin tsihin tsa jayahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo iñi yo tyin cacu yo tsihin tsa jayahá yo tsa vaha. ¹⁰Nyoo janduvahá ra añaima yo tsihin tsa ndu iin yo tsihin ra Cristo Jesúus. Tacan jayahá ra tyin tacan tan jayahá yo tsa vaha, tyin nda tsanaha tan tyaa ra cuhva tyin coo yo tacan.

Cuví yo nyivi Israel, a cuví yo nyivi inga ñuu, maa tyin tsa cuenda ra Cristo iin ñi nyivi cuví tandihí yo

¹¹Catyí ra Israel naha ra tyin ña vaha nyoho tsa ñavin nyivi Israel cuví, tyin ña tsinyaa tuñi Nyoo cuñu ñuhu ndo tumaa maa ra naha. Cuñí maa ra naha tyin vaha ra naha nuu Nyoo tan nyoho ña vaha

ndo. ¹²Tan nducuhun tucu iñi ndo tyin nu quitsi tsi tahan tsanaha, nduve ra Cristo iyó añaima ndo. Tan ndi ña iin ñi cuví ndo tsihin nyivi Israel. Tan ña tsitó ndo tuhun tsa ndo Nyoo tsihin ra Abraham tan tsihin nyivi tata ra. Tyin iyó soho ñi maa ndo quivi can, tan nduve Nyoo nyaás tsihin ndo. Yacan cuenda nduve náa cua ñihí ndo. ¹³Tyin ndi luxu tuhun Nyoo tan ña tsitó ndo tahan tsanaha, maa tyin vityin ndu iin ndo tsihin ra Cristo Jesúus tyin quitsi ra tsatí ra niñi ra tsa cuenda ndo. ¹⁴Tyin juvin ra Cristo tsaha tsa taxin coo yo tan jandu iin ra tsi nyoho tsa ñavin nyivi Israel cuví tsihin nyuhu tsa cuví nyivi Israel. Vityin iin ña nyivi cuví yo, tyin jandihí ra tsa xaan cuñí yo nyehé tahan yo tsi yo. ¹⁵Tan tsa quitsi ra Cristo tsihí ra nu cruu, tsindihí tuhun tsahnu tsa iyó ndi tsa tyasi nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyivi cuví yo nuu ra, tan iyó yo tsihin tsa taxin. ¹⁶Tan tsihin tsa tsihí ra nu cruu tsindihí tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyivi cuví yo vityin.

¹⁷Ra Cristo quitsi ra cahán ra tyin cuvi coo vaha yo tsihin Nyoo tan tsihin tahan yo: Cahan ra tsihin ndi tsa cuví ndi nyivi Israel tsa tsa tsitó maa tuhun Nyoo tan tsihin nyoho tsa ña tsitó ndi luxu maa tuhun Nyoo tahan tsanaha. ¹⁸Tan tsa cuenda tsa quitsi ra Cristo tsihí ra nu cruu, nduyatýin nyecú yo tsihin Nyoo Jutu yo. Tyin iin ñi Tatyí li ra iyó añaima yo: a cuví yo nyivi Israel, o ñavin nyivi Israel cuví yo. ¹⁹Yacan cuenda nyoho ñavin ca nyivi inga ñuu cuví ndo, tyin iin ña nyivi cuví ndo tsihin nyivi yihí cuenda Nyoo. Tan cuví ndo nyivi maa ra. ²⁰Tan cuví ndo tumaa iin vehe. Tan nyecú ndo nu samá ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesúus. ²¹Tan tsata yuu tsa cuví ra Cristo, sií xaan cua quita vehe tsa ndi cuahán tsinú, tyin tandihí maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. ²²Tan tacan tucu nyoho ndu iin ndo tsihin tandihí nyivi yihí cuenda ra Cristo jahá Tatyí li ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyivi tsa ñavin nyivi Israel cuví

¹ Yacan cuenda yuhu ra Pablo nyií yu vehe caa ihyá tyin jacotó yu tuhun ra Cristo JesúS tsi nyoocho tsa ñavin nyivi Israel cuví.

² Taahán tsi coto ndo tyin cahnu xaan tun-
yee iñi tsahá ra tsi yu tsa cuenda tsa vaha tsi
ndo, tyin jacotó yu tuhun ra tsi ndo. ³Tan
Nyoo janahá ra tuhun xeehe tsa tsicumi
ra tsi yu, tan tyá yu juhva tuhun can nu
carta ihyá tyin coto ndo. ⁴Tan tsa cua cahvi
ndo tuhun tsa tyaa yu ihyá cua coto ndo
nácaa tsahá Nyoo tyin cutuñi iñi yu tuhun
ra Cristo tsa tsicumi xeehe ra. ⁵Tyin nu
quitsi tsi tahan tsanaha, ña janahá Nyoo
tuhun xeehe can tsi nyivi, tumaa tsa janahá
Tatyi li ra tuhun can tsi ra tava tyiñu ra
Jesucristo tan ra cuví ndusu yuhu Nyoo.
⁶Tan tuhun xeehe can, cuñi tsi catyi tyehen:
Nyivi tsa ñavin nyivi Israel cuví cua ñihi
ndihi ñi tsa cua ñihi nyivi Israel tyin iin
ña cuñu ñuhu cuví yo vityin tsa cuenda tsa
jacacu ra Cristo tsi yo. Tan cua ñihi yo tsa
catyi Nyoo tyin cuhva ra tsi yo tyin natsinu
iñi yo tsi maa ra Cristo JesúS.

⁷ Nyoo tsahá ra tsa vaha tsi yu tan
jatyinyé ra tsi yu tyin tacan tan jacoto yu
tuhun vaha ihyá tsi nyivi. ⁸Yuhu luuhlu xaan
ra cuví yu tan ñavin ca tandihí nyivi tsa
yihí cuenda Nyoo. Maa tyin Nyoo tsahá
ra tumaní iñi cahnu ihyá tsi yu tyin cahan
yu tuhun ra Cristo tsihin nyivi tsa ñavin ñi
Israel cuví. Tyin na coto ñi tsa cuca tsa cua
cuhva ra Cristo tsi ñi. ⁹Tava tyiñu Nyoo tsi
yu na jacoto yu tsi tandihí nyivi nácaa tyaa
ra cuhva tsa cua jayahá ra tsa ndi cumañi
ca jayahá ra tandihí tsa iyó, tyin tsanaha
ña jacoto ra tuhun tsa tsicumi xeehe ra tsi
nyivi. ¹⁰Tacan cuví tan vityin tandihí ra
ndacá ñaha nda andiví cua nyehé tsa vaha
tsa jayahá Nyoo tsihin yo tsa cuví yo nyivi
yihí cuenda ra. Tan cua coto ra naha tyin
iyó xaan tsa tsiñi tuñi tsi Nyoo. ¹¹Tandihí
tuhun ihyá nacatsí tahan tsi tsihin tsa tyaa
Nyoo cuhva tyin jayahá ra tsihin Jutu Mañi
yo Jesucristo tsa cuenda tsa vaha tsi yo.
¹²Tan tsa cuenda tsa tsinú iñi yo tsi ra Cristo,
tsahá Nyoo ndatu tsi yo tsa cunyanaa ca yo
tsi ra. Yacan cuenda ña yuuuhví yo natuhvá
yo nu nyaá ra. ¹³Tan tsa cuenda tsa tsahá ra

ndatu can tsi yo caahán ndaaahvi yu tsihin
ndo na ña ndu uvi iñi ndo tsa nyehé yu
tundoho tsa cuenda ndo. Tyin tsa tyehen
nyehé yu tundoho tsa cuenda ndo, tsa vaha
tsi maa ndo cuví can.

*Tsicán tahvi ra Pablo tyin na nacoto vaha
ca nyivi tsi ra Cristo*

¹⁴Tan tsa cuenda tsa nducuhun iñi yu tu-
mañi iñi tsa jayahá Nyoo, Jutu ra Jesucristo
Jutu Mañi yo tsihin yo, tsicuiñi tsiti yu nuu
ra. ¹⁵Tyin juvin ra cuví Jutu tandihí nyivi:
ñi tsa cuahán andiví, tan ñi tsa yucú nu
ñuhu ñayivi ihyá. ¹⁶Tan tsicán yu tsi ra
na jandunyee xaan ra iñi ndo tsihin Tatyi
li ra tsa iyó añima ndo. ¹⁷Tan na coo ra
Cristo añima ndo tsihin tsa tsinú iñi ndo
tsi ra. Tacan tan cua cuñi xaan ndo tsi
tandihí nyivi, tyin nyanaá vaha ndo tsi
Nyoo. ¹⁸Tacan tan cua cutuñi vaha iñi ndo
tsihin tandihí ñi yihí cuenda ra nácaa tsa
cahnu xaan tsa cuñi ra Cristo tsi yo. Tan
ndi ña cua ñihi ndo cuhva nacatyí tuhun
ndo tsihin nyivi nácaa tsa cuñi ra tsi ndo.
¹⁹Tsicán yu tsi Nyoo na coto ndo nácaa tsa
cahnu xaan tsa cuñi ra tsi ndo. Nyoo nyaá
maa ra tsihin ndo.

²⁰Tan vityin na jacobnu yo tsi Nyoo, ra
tsa iyó xaan tunyee iñi tsi. Tan cuaha xaan
ca tsa cuví jayahá ra tan ñavin ca cuhva tsa
tsicán yo tsi ra, a cuhva tsa tsicá iñi yo. Tyin
juvin ñi tsihin tunyee iñi maa ra tsa tsahá
ra tsi yo, jayahá ra tandihí. ²¹Yoo tsa cuví
yo nyivi tsinú iñi tsi Nyoo, na jacobnu yo
tsi ra tacan ñi maa, tsa cuenda tsa jayahá ra
Cristo JesúS. Tan na cuvi tsi tacan.

4

*In ñi cuví tandihí yo tsa yihí yo cuenda
ra Cristo jahá Tatyi li Nyoo*

¹ Yacan cuenda yuhu, tsa nyií yu vehe caa
tsa cuenda Jutu Mañi yo, caahán ndaaahvi
yu tsihin ndo na catsi coo ndo tumaa cuhva
taahán tsi coo nyivi tsa nacaná Nyoo. Tyin
nacaná ra tsi ndo na cuvi ndo nyivi ra.

² Yacan cuenda jandundaahvi ndo tsi ndo
nuu nyivi, tan vita cuhun iñi ndo. Tan ña
cutyixin ndo tsihin ñi, tan ña cundaihi iñi
ndo nyehé ndo tsi ñi tyin tacan tan coto
ñi tsi cuñi ndo tsi ñi. ³Tyin tsa taxin tsa
tsahá Nyoo coo añima yo jandu iín tsi tsi
yo tan yacan cuenda nducu vaha ndo cuhva
tan iin ñi cuvi ndo tsihin tsa jatyinyee Tatyi

Li Nyoo tsi ndo. ⁴Tandihi yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihi yo intuhun ñi Tatyi li Nyoo iyó tsihin yo, tan catyí Nyoo tsihin tandihi yo tyin nditsa tsa cua ñihi yo ñayivi nyito coo yo. ⁵Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoendutyá yo. ⁶Iyó intuhun ñi Nyoo tan maa ra cuví ra Jutu tandihi yo. Tan ndacá ñaha ra tsi tandihi yo, tan iyó ra añima tandihi yo, tan tsatyiñú ra tsi tandihi yo, tan jahá tyiñu yo tyiñu ra.

⁷Tan tsahá ra Cristo ndatu tsi tsa intuhun intuhun yo cuhva cuñí maa ra. ⁸Yacan cuenda catyí tsi nu tutu Nyoo tuhun ra Cristo tyejen:

Cunyee ra jahá canaa ra tsi nu xaan iñi tsi ra, tan quihín nyaa ra tsi nyivi tsa yíhi ndaha nu tan nandaä ra andivi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

⁹¿Tan náa cuñí tsi catyi tsa “nandaära”? Cuñí tsi catyi tyin nuu jihna ra nu ñuhu ñayivi. ¹⁰Ra tsa nuu can, juvin ñi ra cuví ra tsa nandaä nda gloria. Tyin tacan tan janduníi ra tandihi maa tan cunyaa ra tsihin yo tandihi ñi ityi. ¹¹Tan juvin ñi maa ra Cristo tsahá ndatu tsi yo. Tsi juhva yo tavá tyiñu ra tsi yo tsa caca yo tyiñu ra. Tan tsi inga yo tsahá ra tsa cuví yo ndusu yuhu ra. Tan tsi inga yo tsahá ra tyaín jacoto yo tsi nyivi nácaa jacacú ra tsi yo. Tan tsi inga yo tsahá ra tsa jaha cuenda yo tsi ñi yíhi cuenda ra, tan tsi inga yo tsahá ra tsa cuví jacuaha yo tuhun ra tsi ñi. ¹²Tacan tsahá Nyoo ndatu can tsi yo tyaín jatyinyee tahan yo tsi yo tan tsi inga ca nyivi tyin tacan tan cuahnu ca yo tsihin ra Cristo. ¹³Nda cuanda ndu iin tandihi yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuvi yo tumaa cuvi maa ra Cristo. ¹⁴Tacan tan ña cua cuvi ca yo tumaa tsa nyihi. Tyin tsa nyihi yatií xaan tsinú iñi tsi náa luxu tsa ñihí tuhun tsi. Tan na ña cuvi yoo tacan tyin coto jandavi ñaha nyivi tsi yo. ¹⁵Maa tyin tyejen cua javaha yo: cua cuñi yo tsi nyivi tan cua cahan yo tsa nditsa tsihin ñi. Tan ndunyee ca añima yo tsihin tandihi tsá vaha tsa iyó tsi Nyoo. Tan cuahnu yo tan cuvi yo tumaa maa ra Cristo, ra cuví ityi

nuu tsihin yo. ¹⁶Tan tsa cuenda ra Cristo tandihi yo tsa cuví yo cuñu ñuhu ra, iin ñi cuvi yo. Tumaa yíhi tahan iin cuñu ñuhu, tan tsa iin tsa iin nu yíhi tahan tsi vaha jahá tyiñu tsi. Tan tacan jatyinyee tsi tsi nanii cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatyinyee tahan yo tsi yo.

Tsahá ra Cristo ñayivi nyito coo yo

¹⁷Tuhun ihyá cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyee tsi ñi tsicá iñi ñi. ¹⁸Tan ña cutumí iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi. ¹⁹Ña cahán ca nuu ñi javahá ñi tsa ña vaha. Tan nacuhvá cuenda ñi tsi ñi tsi tsa caquíni. Maa ñi tsa ña vaha cuñí ñi javaha ñi. ²⁰⁻²¹Maa tyin tatan nditsa tsa tsiní ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiní ndo tan cutuhvá ndo tsa nditsa cuví tuhun maa ra Cristo. ²²Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquíni tsa cuñí cuñu ñuhu ndo, tyin tsanaha, jandaví ñaha xaan can tsi ndo. ²³Nacuhva cuenda ndo tsi ndo tsi Nyoo na nasama ra cuhva tsicá iñi ndo. ²⁴Tan coo ndo ñayivi nyito tyin vityin nyivi tsaa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cuítí iyó ndo.

²⁵Yacan cuenda ña cahan ca ndo cuenda. Cahan ndo maa ñi tsa nditsa tsihin nyivi tyin iin ña cuñu ñuhu cuví tsa tandihi yo.

²⁶Tatan cuxaan ndo, jaha ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tisihí tsi ndo nduví. ²⁷Tan ña cuhva ndo ndatu tsi nu ña vaha tsa nducu cuhva nu tsi ndo.

²⁸Ra tsa tuhva suhu quivi can, na ña suhu ca ra vityin. Na jaha tyiñu ra tsihin ndaha ra. Tacan tan coo tsa tsii ra, tan cuvi jatyinyee ra tsi nyivi tsa iyó tsa tsiní ñuhu tsi ñi.

²⁹Ña cahan ndo tsa ndavaha ñi. Cahan ndo, maa ñi tsa vaha tsa cua jatyinyee tsi nyivi tsa tsiní tsa caahán ndo. ³⁰Tan ña cuhva ndo tucuiihya iñi tsi Tatyi li Nyoo tyin Tatyi li ra cuví tuñi tsa tyaa ra añima yo nda cuanda ndihí jacacu ra tsi yo quivi cua quitsi ra.

³¹Ña cuhun iñi ndo tisihi. Tan ña cuxaanndo. Tan ña cuví ndo nyivi tyixin. Tan ña cahan nyaadndo tsi nyivi, tan ndi ña cahanndo tsa ndavaha ñi. ³²Maa tyin cuví ndo nyivi vaha, tan cundaahvi iñi ndo tsi nyivi. Tan jaha ndo tucahnu iñi tsi ñi, tumaa jaha Nyoo tucahnu iñi tsi maa ndo tsa cuenda ra Cristo.

5

Nacaa taahán tsi coo nyivi yihí cuenda Nyoo

¹Ndalu ndo cuhva coo ndo tumaa iyó maa Nyoo, tyin sehe ra cuví tsi yo, tan cuví xaan ra tsi yo. ²Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañí ra cuví jutu mbee ticiati luhlu nuu Nyoo, tacan jamañí ra Cristo tsi ra tsa cuenda yo. Tan sií xaan cuñi Nyoo tsihiñ ra tsa cuenda tsa jahára tacan.

³Vityin tsa cuví yo nyivi yihí cuenda Nyoo, ña taahán tsi jahá ndo tsa caquiñi tsihiñ cuñi ñuhu ndo, tan ndi ña cuví ndo coo cuaha ndaha tyifii ndo. Tan ña taahán tsi caca iñi ndo ndi intuhun tuhun ihyá. ⁴Ña cahan ndo tuhun tsa tsahá ticanuu tsi yo. Tan ndi ña cahan ndo tsa nduve yahvi nyaá. Tyin ña taahán tsi cahan yo tacan. Vaha ca cuhva ndo tyahvi nyoo tsi Nyoo. ⁵Tyin tsa tsitó ndo tyin tandíhi nyivi tsa jahá tsa caquiñi, ña cua quihvi ñi nu ndacá ñaha ra Cristo tsihiñ Nyoo. Ra tsa iyó tsihiñ ñaha tan ñavin ñasíhiñ ra cuví ña, a ñaha iyó tsihiñ rayii tan ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitohu cuví can, tyin maa ñi yacan tsicá iñi ñi tan ña jacahnú ñi tsi maa Nyoo. ⁶Ña cuhva ndo tsa jandavi ñaha nyivi tsi ndo tsihiñ tuhun tsa nduve yahvi nyaá tsa caahán ñi tyin tsa cuenda tandíhi tsa ña vaha can cua tatsi tuñi Nyoo tsi nyivi tsa ñia tyaá yahvi tsi ra. ⁷Yacan cuenda ña cutahan ndo tsihiñ ñi.

⁸Nyooho tsicoó ndo nu naa quiví can. Tan vityin ña taahán ca tsi coo ndo nu naa tyin Jutu Mañi yo tsa tava ra tsi ndo nu nditsin. Yacan cuenda taahán tsi jahava ndo tumaa cuñi maa Nyoo. ⁹Tyin Nyoo jandunditsin ra añima yo tan janduvaha ra añima yo, yacan cuenda jahava ndo tsa vaha tan cahan ndo maa ñi maa tsa nditsa.

¹⁰Jañiñi ndo cutuhva ndo cuhva taahán ñi Jutu Mañi yo. ¹¹Ña jahava ndo cuhva jahá nyivi iyó nu naa. Tyin nduve náa tsa vaha ñihí ñi tsihiñ can. Vaha ca jácoto ndo tsi ñi tyin ña vaha tsa jahá ñi. ¹²Tyin cahán nuu yo cahan yo tsa jahá xeehe ñi. ¹³Maa tyin quiví quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandíhi tsa yihí xeehe. ¹⁴Yacan cuenda iyó nu catyí tsi: Ndoto yooho tsa quixí un, nduyita mahñu nu yucú ndiyí.

Tan ra Cristo cua jandunditsin ra ñuhu nu cuahán un, catyí tsi.

¹⁵Yacan cuenda jaha ndo cuenda cuhva iyó ndo. Tan ña coo ndo tumaa iyó ra soho. Coo ndo tumaa iyó ra tsitó. ¹⁶Tan ndalu ndo cuhva cahan ndo tuhun Nyoo tsihiñ nyivi tandíhi ñi cuhva tsa nuña ndo, cahan ndo tyin vityin maa ñi maa tsa caquiñi jahá ñi. ¹⁷Yacan cuenda ña soho coo ndo. Ndalu ndo cuhva cutuñi iñi ndo cuhva cuñi maa Jutu Mañi yo. ¹⁸Ña coho ndo nyixi tan cuví ndo ra tsiñi tyin cuví jatív yacan tsi ndo. Maa tyin cuhva ndo tsi ndo cundaca ñaha Tatyí Ii Nyoo. ¹⁹Cahan ndo tsihiñ tahan ndo maa ñi tsa vaha, tan jácahnu ndo tsi Nyoo. Cata ndo salmo cuenda ra; cata ndo yaa Nyoo; cata ndo tsa tsahá Tatyí Ii tsi ndo; jácahnu ndo tsi Jutu Mañi yo tsihiñ tandíhi añima ndo. ²⁰Tacan ñi nacuhva ndo tyahvi nyoo tsi Nyoo Jutu yo tsa cuenda tandíhi maa, a sií cuñi ndo, o nyehé ndo tundoho. Nacuhva ndo tyahvi nyoo tsi ra tsihiñ ndatu tsa tsahá Jutu Mañi yo Jesucristo tsi yo.

Nacaa taahán tsi coo yo tsihiñ nyivi yo

²¹Tyaa yahvi tahan ndo tsi ndo, tyin tun jahá ndo tacan, tsihiñ yacan janahá ndo tyin tyaá yahvi ndo tsi Nyoo

²²Nyooho tsa iyó yii, tyaa yahvi ndo tsa caahán yii ndo tumaa tsa tyaá yahvi ndo tsa caahán Jutu Mañi yo. ²³Tyin rayii cuví ityi nuu tsihiñ ñasíhiñ ra, tumaa cuví ra Cristo ityi nuu tsihiñ nyivi yihí cuenda ra. Juvín ñi maa ra jacacú tsi yo tsa cuví yo cuñi ñuhu ra. ²⁴Yacan cuenda tumaä tsa cuví ra Cristo ityi nuu tsihiñ nyivi yihí cuenda ra, tacan taahán tsi tyaá yahvi ñaha tsi yii ña.

²⁵Tan nyooho rayii, cuñi tsi tsa cuñi ndo tsi ñasíhiñ ndo tumaa cuñi ra Cristo tsi yo tsa yihí yo cuenda ra, tan tsahá ra ñayivi

ra tsa cuenda yo. ²⁶Tacan jayahá ra tan jandundíi ra añima yo tsihin tuhun caahán ra tsa cuví tumaa ndutya, tan nacatyá ra tsi yo quívi tsa natsinu iñi yo tsi ra. ²⁷Ndoq añima yo tumaa ndoo iin jahma, ña nyayu ca tsi, ña tiyí ca tsi. Tyin ra Cristo jandundíi ra tsi yo tsa cuví yo nyiví yihí cuenda ra. Tyin tacan tan cuví nacuhva cuenda ra tsi yo tsi Nyoo, tyin vaha yo, tan nduve ca cuatyí yo. ²⁸Tacan taahán tsi cuñi rayíi tsi ñasiihi ra, tumaa tsa cuñi ra cuñi ñuhu maa ra. Tyin tatum cuñi ra tsi ñasiihi ra, cuñi ra tsi maa ra. ²⁹Tyin ndi intuhun yo tan ña cuví tsa ña cuñi yo cuñi ñuhu yo, tyin jacatsí yo tan jacunditsí yo cuñi ñuhu yo. Tan ra Cristo juvin ñi tacan jayahá ra tsihin nyiví yihí cuenda ra. ³⁰Tyin cuñi ñuhu ra cuví yo. Tan intuhun intuhun yo cuví yo juhva cuñi ñuhu ra tan yiquí ra. ³¹Catyí tuhun Nyoo: "Rayíi taahán tsi nacoo ra tsi jutu ra tan tsi sihi ra, tan ndu iin ra tsihin ñasiihi ra. Tan intuhun ña cuñi ñuhu cua cuvi tsa nduvi ñi." ³²Xeehe xaan tan cahnu xaan tuhun ihyá, tan catyí tyin cuñi tsi catyi tyin ra Cristo ndu iín ra tsihin nyiví yihí cuenda ra tumaa ndu iín iin rayíi tsihin ñasiihi ra. ³³Tan inga tucu tuhun, cuñi tsi catyi tyin intuhun intuhun ndo taahán tsi tsa cuñi ndo ñasiihi ndo, tumaa cuñi ndo tsi maa ndo. Tan nyoho ñiñaha, tyaa yahvi ndo tsi yií ndo.

6

¹ Nyoho tsa nyihi, tyaa soho ndo tsa caahán jutu ndo tan sihi ndo. Tyin tacan taahán tsi jayahá ndo. ²⁻³Tyin nu tutu Nyoo catyí tsi tyehen: "Jaha tsa ñayiví tsi jutu un tan sihi un", tan tuhun ihyá cuví tsa jihna ñi catyí Nyoo tyin jayahá yo tan cua ñihi yo tsa cua cuhva ra tsi yo. Tyin tyaqá ra cuhva tyin tun jayahá yo tacan, sii xaan cua coo yo tan cuhua xaan quívi cua coo yo nu ñuhu ñayiví ihyá.

⁴Tan nyoho tsa iyó sehe, ña jayahá ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi na ha tsi, tan na cutuhva tsi tyaa yahvi tsi tsi ndo tan tsi Nyoo.

⁵Tan nyoho tsa cuví musu, tyaa yahvi ndo tsi ra yihí ndaha tsi ndo nu ñuhu ñayiví ihyá. Jaha ndo tsa ñayiví tsi ra na ha tsi tsi tsa niñi iñi añima ndo. Tan nduceu ndo cuhva

tyaa yahvi ndo tsi ra na ha tumaa tyá yahvi ndo tsi ra Cristo.

⁶Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyi tsitoho ndo tyin vaha xaan ndo. Jaha tyiñu vaha nyoho tumaa tsatinyi tyiñu ra Cristo jayahá ndo. Tacan tan cua jayahá ndo cuhva cuñi Nyoo tsihin tsa niñi iñi añima ndo. ⁷Jaha tyiñu ndo tsihin tsa sii cuñi ndo tumaa tun jahá tyiñu ndo cuenda Jutu Mañi yo tan ñavin tsa cuenda nyiví. ⁸Tyin tsitó ndo tyin Jutu Mañi yo cua tyahvi ra tsi intuhun intuhun ndo tun jayahá ndo tsa vaha, vasu ndi maa musu cuví ndo o ñavin musu cuví ndo.

⁹Tan nyoho tsa iyó musu, jayahá ndo tsa vaha tsihin musu ndo. Tan ña jayuhvi ndo tsi ñi. Tyin tsitó ndo tyin nuu Jutu Mañi yo iin ñi cuví ndo tsihin musu ndo, tyin ña siiñ caá iin nyiví tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

¹⁰Tan vityin coo ndo tsihin tunyee iñi tsa tsahá Jutu Mañi yo tsi ndo tyin iin ñi cuví ndo tsihin ra. Tyin cahnu xaan tunyee iñi iyó tsi ra. ¹¹Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. ¹²Yacan jaha vaha ndo cuenda tsi ndo tsihin tunyee iñi Nyoo tyin cañí tahan yo, maa tyin ñavin tsihin ra ñuu ñayiví, tyin cañí tahan yo tsihin nu ña vaha tsa ña cuví nyehé yo. Tan nu ican yihí ndaha tsi nyiví caquiñi. ¹³Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyee iñi ndo quívi nducu cuhva nu ña vaha tsi ndo. Tan ña cua nduva ndo jaha nu. ¹⁴Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan caca vaha ndo ityi tsa nditsa cuví ityi Nyoo tyin yacan cuví tsa tyasí yiquí nyica ndo tumaa iin andaru iyó tsa tyasí yiquí nyica ra tan nduve náa taahán ra. ¹⁵Tacan tucu nyoho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cuhun ra cuatyí. Tacan taahán tsi janduvaha ndo tsi ndo tsa

cua cahan ndo tuhun Nyoo tsihin nyivi.
¹⁶ Tan casí vaha ndo tsi ndo tumaa tyasi
 ra andaru tsi ra tsihin iin caa tan ña nañi
 ndaha nduva tsa cayú tsi ra. Tacan taahán
 tsi cunyecu ñihí ndo tsihin tsa tsinú iñi ndo,
 tan ña cuhva ndo tsa jaha canaa nu ña vaha
 tsi ndo. ¹⁷ Ra andaru iyó iin caa ndasí jiñi ra
 tan jacacú can tsi ra, tacan cuví tsa jacacú
 Nyoo tsi yo. Cuatyíñu vaha ndo tuhun Nyoo
 tyin yacan cuví tumaa mityi tsahá Tatyi li
 Nyoo tsi ndo. ¹⁸ Tan ña jandíhi ndo tsa tsicán
 tahvi ndo tsi Nyoo tan tsa caahán ndaahvi
 ndo tsihin ra tumaa jaquihín ityi maa Tatyi
 li ra tsi ndo. Yacan cuenda ñia ndu uvi iñi
 ndo tan coo nyito vaha ndo, ndacan tahvi
 ndihí ndo tsi Nyoo tsa cuenda tandíhi nyivi
 yiñi cuenda ra. ¹⁹ Tan ndacan tahvi ndo
 tsi ra tsa cuenda yu, na ñihí ca yu tuhun
 cahan yu, tan na ña nayuhvi yu jacoto yu
 tuhun ra Cristo tsi nyivi. Tyin tsanaha yiñi
 xeehe tuhun ihyá tan vityin cua nacoto ñi
 itsi. ²⁰ Tan tsa cuenda tsa jacotó yu tuhun ra
 Cristo, nyí yu vehe caa ihyá vityin. Ndacan
 tahvi ndo tsa cuenda yu, na ña nayuhví yu,
 tan cahan yu cuhva taahán maa tsi cahan
 yu.

*Nu jacuhún ra Pablo tsi ra Tíquico nu yucú
 nyivi yiñi cuenda ra Cristo*

²¹ Tan ra Tíquico, ra yañi yo, cua nacatyi
 tuhun ra tandíhi tuhun yu tsihin ndo. Nií
 xaan iñi ra jahá tyiñu ra cuenda Jutu Mañi
 yo, tan cuñí xaan yo tsi ra. ²² Jaquitsí yu tsi
 ra nu yucú ndo tyin jacoto ra tsi ndo nácaa
 iyó ndi ihyá, tyin tacan tan ndu iin iñi ndo.

²³ Na cuhva Nyoo Jutu yo tan Jutu Mañi
 yo Jesucristo tsa taxin coo añima tandíhi ra
 yañi yo naha ra tan na tsinu ca iñi ra naha
 tsi ra tan na cuñí ra naha tsi nyivi. ²⁴ Tan
 na nasoco xaan Nyoo tsi tandíhi nyoho tsa
 cuñí tsi Jutu Mañi yo Jesucristo. Ña jandíhi
 ndo tsa cuñí ndo tsi ra.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Nuu Fililos,

*Nyií ra Pablo vehe caa, tan javahá ra iin
carta tan jacuhun ra tsi nyivi yihí cuenda
Nyoo nuu Fililos*

¹Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandíhi ndo tsa yucú ndo nuu Fililos tan cuví ndo nyivi cuenda Nyoo tan iin ñi cuvi ndo tsihin ra Cristo. Tan yacan jaquitsí ndi carta ihya tsi tandíhi ndo tsihin ra cuví ityi nuu tsihin nyivi vehe ñuhu naha ra, tan tsihin ra jahá tyiñu vehe ñuhu naha ra. ²Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima.

*Nu tsicán tahvi ra Pablo tsa cuenda ñi yihí
cuenda Nyoo nuu Fililos*

³Tandíhi ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. ⁴Tan tandíhi tsa tsicán tahvi yu tsi Nyoo tan tsicán tahvi yu tsa cuenda tandíhi ndo tsihin tsa sii cuñí añima yu. ⁵Tyin nda quivi jihna tsa tsíñi ndo tuhun ra Cristo tan nda vityin tan ña jandíhi ndo tsa jatyinyé ndo tsi yu. Tyin iin caa ñi jacotó yo tuhun ra Jesucristo tsi nyivi. ⁶Tsitó vaha yu tyin tumaa tsa quitsa-há javahá Nyoo tsa vaha tsitsi añima ndo, tacan cua javahá ca ra nda cuanda quivi quitsi ra Jesucristo inga tsaha. ⁷Taahán tsi tsa caca iñi yu tacan tsa cuenda ndo, tyin cuñí xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyí yu vehe caa ihya, tan vasu ndi maa cuhun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. ⁸Nyoo tsitó ra tyin cuñí xaan yu tsi tandíhi nyoooho tumaa tsa cuñí maa ra Jesucristo tsi ndo. ⁹Tan tsicán tahvi xaan yu tsi Nyoo na cuñí ca ndo tsi ra tan na cundahví ca iñi ndo tsi nyivi. Tan nacoo ca tsa nyifti Nyoo tsi ndo, tan cutuñi ca iñi ndo, ¹⁰tyin tacan tan cuvi ñihi ndo tsa vaha tsi Nyoo. Tan ña cua coo ca cuatyí ndo tan cuvi coo vaha ndo tsihin tuhun Nyoo nda cuanda quivi quitsi

ra Cristo. ¹¹Maa ra cua jatyinyee tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahnu xaan ra cuví ra.

*Maa ñi maa tyiñu Nyoo javahá ra Pablo
tyin iyó ra Cristo añima ra*

¹²Yañi, cuñí yu tsa coto ndo tyin tandíhi tundoho taahán yu, jatyinyéé xaan tsi tyin nducuahua ca nyivi tsinú iñi tuhun Nyoo.

¹³Tan tandíhi andaru tsa iyó vehe ra cuví rey tan tandíhi nyivi iyó ihya tsitó ñi tyin nyí yu vehe caa tsa cuenda tsa nyicún yu tsi ra Cristo. ¹⁴Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatyinyéé Nyoo tsi yu nu nyí yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

¹⁵Tan nditsa tyin yihí ra naha, caahán ra naha tuhun ra Cristo tsa cuenda tyin cuñí ra cunyicun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa niñi iñi ra naha. ¹⁶⁻¹⁷Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsí tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuñí ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa niñi iñi ra naha tan caahán ra naha tuhun ra Cristo, tyin cuñí ra naha na cunyicun cuaha nyivi tsi ra naha tan cuñí ra naha vacu nducu ra naha tsi yu nu nyí yu vehe caa ihya. ¹⁸Tan ña ndihi iñi yuhu tatus juhva ra naha caahán ra naha tuhun ra Cristo tsihin tsa ña niñi iñi ra naha. Maa tyin yuhu sii xaan cuñí yu tyin tuhun ra Cristo caahán tandíhi ra naha, cuví ñi tsa niñi iñi ra naha caahán ra naha o ñavin.

Tan ndusii ca cuñí yu ¹⁹tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatyinyéé xaan Tatyí li ra Cristo tsi yu. ²⁰Tsitó vaha yu tyin Nyoo cua jatyinyee ra tsi yu tan ña cua nducuhan nuu yu, tan ña cua nayuhvi yu cahan yu tuhun ra Cristo tsihin tsa niñi iñi yu. Tan ña ndihi iñi yu, an coo ca yu ñayivi, o cíu yu, maa tyin cuñí yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin

ra Cristo cahnu xaan ra cuví ra. ²¹Tyin tsa cuenda yuhu ñayiví tsa iyó yu vityin, ñayiví ra Cristo cuví. Maa tyin tatum cíu yu, cua ñihí yu tsa sii caa tsa iyó gloria. ²²Tan tatum coo ca yu, vaha xaan. Tyin tacan tan cuví jañíhi ca yu jahá tyiñu yu tyiñu Jutu Mañí yo. Tan cua cuvi tsi tsa vaha tsa cuenda ra. Yacan cuenda ña tsító yu nda ityí cuhun yu, a cíu yu, a cuhun yu cucahan ca yu tuhun Nyoo tsihin nyíví, ñia tsító yu. ²³Yii xaan cuñí yu tan quihin yu ndáa ityí cuhun yu tyin tsa cuñí yu cuhun yu cunyaa yu tsihin ra Cristo. Tyin vaha ca yacan. ²⁴Maa tyin tsa cuenda nyoho, vaha ca tsa ña cíu naha yu tyin tacan tan cuví cunyaa yu tsihin ndo tan coto ca ndo tuhun Nyoo. ²⁵Yacan cuenda tsító yu tyin cua ndoo yu juhva ca quíví ihya. Tyin cuñí tsi tsa jatyinyee ca yu tsi ndo tan cuvi cuhun ndo ityí nuu ca tan cusíi ca iñí ndo tsihin tsa tsinú iñí ndo tsi Nyoo. ²⁶Tacan tan cua nyehe ndo tsi yu inga tsaha, tan sii xaan ca cua cuñí nda tsa cuenda yu tyin iin caa ñi iyó yu tsihin ra Cristo.

²⁷Cuñí tsi tsa coo yo cuhva taahán tsi coo nyíví yihí cuenda ra Cristo. Vasu nyaá yu tsihin ndo, a cañí nyí yu, maa tyin cuñí yu coto yu tuhun ndo tyin nyoho vaha cuahán ndo tsihin Nyoo. Tan iin caa ñi jahá tyiñu tandíhi ndo tyin tacan tan cua tsinú iñí nyíví tuhun ra Cristo. ²⁸Maa tyin nyíví xaan iñi tsi ndo, cuaha xaan tsa cua jacuu ñi tsi ndo maa tyin ña nayuhví ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyoho jahá Nyoo. ²⁹Tyin tsahá ra ndatu tsa tsinú iñi tandíhi yu tsi tsa ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. ³⁰Iin caa ñi nyehé yo tundoho tan jactó yu tuhun ra Cristo. Tan tsa tsító ndo nácaa nyehe yu tundoho, tan vityin tsító tucu ndo tyin ña jandíhi yu tsa caahán yu tuhun Nyoo.

2

Cuca xaan ra Cristo, maa tyin quitsí cíu ra tumaa iñi ra ndaahvi

¹Nditsa tyin ra Cristo jandu iín xaan ra iñí yu tsa iín ñi cuví yu tsihin ra. Tan vaha cuñí yu tsa cuenda tsa cuñí ra tsi yo. Tan nditsa tucu tyin iyó Tatyi Li Nyoo tsihin yo. Tan nditsa tucu tsa ndaahvi cuñí yu nyehé yu tsi nyíví tahan yo. Tatum nditsa tandíhi

yacan, ²cuhva ndo tsa cusíi ca iñí yu tsihin tsa vaha iyó ndo. Tan cuñí tahan ndo tsi ndo tumaa tsa cuñí ra Cristo tsi yo. Tan iin ñi cuhva caca iñí ndo. Tan iin ñi tsa vaha jayahá ndo. ³Ña jayahá ndo maa ñi tsa jatyinyee tsi maa ndo, jayahá ndo tsa vaha tsi inga nyíví. Tan náa jayahá ndo, ña cahnu jaha ndo tsi ndo. Ndaahvi jaha yo tsi yo. Tan intuhun intuhun yo na jaha yo tyin vaha ca inga nyíví tan ñavín ca maa yo. ⁴Tan intuhun intuhun yo caca iñí yu tsa cuenda tsa vaha tsi inga nyíví, tan ñavín tsa cua jatyinyee tsi maa ñi maa yo.

⁵Caca iñí yu tumaa tsicá iñí maa ra Cristo Jesú. ⁶Tyin nu quitsí tsi tsanaha tsa ndi cumañí ca quitsi ra nu ñuhu ñayíví, cuví ra tahan ñi maa cuví Nyoo. Maa tyin ña tsicá iñí ra tsa nacoo ra yacan. ⁷Tan tyaa tsiyo ra tandíhi tunyee iñí ra tan tandíhi tsa cuca ra. Tan quitsí ra nanduví ra iin nyíví ndaahvi nu ñuhu ñayíví ihya quíví tsa cacu ra. ⁸Tan tsa nanduví ra iin rayíi, tan ndaahvi jaha ra tsi ra tan tyaa yahvi vaha ra tsi Nyoo nda cuanda tsahá ra tsa cahñí nyíví tsi ra nu cruu. Tumaa iin ra caquiñí, tacan jahá ñi tsi ra, tan tahan ra ticanuu tyin tsahñí ñi tsi ra nu cruu. ⁹Yacan cuenda Nyoo jacahñú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuví tan ñavín ca tandíhi sivi. ¹⁰Tyin tatum tsiní yo sivi ra Jesucristo, tandíhi yo tan cua cuñí tsití yo. Tan tandíhi tucu tsa iyó andíví, tan tsa iyó nu ñuhu ñayíví, tan tsitsi ñuhú, tandíhi yacan cua jacahnu tsi ra. ¹¹Tyin tandíhi tsa iyó, cua nacoto tan cua cahan tyin ra Jesucristo cuví ra ndacá ñaha tsi tandíhi maa tsa iyó. Tacan tan cua nyehe tsi tyin cahnu xaan ca cuví maa Nyoo Jutu yo.

Nyíví yihí cuenda Nyoo cuví ñi tumaa iin ñuhu tsa jandunditsín nu ñuhu ñayíví ihya

¹²Yacan cuenda, yañi tsa cuñí xaan yu, tumaa tsa tyaa yahvi ndo tsi yu quíví tsa tsinyíi yu tsihin ndo, tacan ñi taahán tsi tyaa yahvi ndo tsi yu vasu ndi maa tsa cañí nyí yu vityin. Nduyu ndo cuhva na nyehe nyíví tyin nditsa tsa jacacú Nyoo tsi yo. Tan jahá vaha ndo cuenda cuhva coo ndo tsihin ra. ¹³Tyin maa Nyoo tyihí tsa vaha añima ndo. Tan jatyinyee ra tsi ndo tyin tacan tan cuví tyaa yahvi ca ndo tsa caahán ra tan javahá ndo cuhva cuñí ra.

¹⁴Tatun cua javaha ndo náa tsa cua javaha ndo, nducu jihna ndo cuhva tsa ña cahan yuhu tahan ndo. Tan ña cañi tahan ndo. ¹⁵Tacan tan ñia cua coo cuatyi ndo. Taahán tsi cuvi ndo nyiví cuiti iyó, taahán tsi cuvi ndo nyiví nduve cuatyi, tumaa tsa taahán tsi coo nyiví cuenda Nyoo tyáñu nyiví caquiñi ihyá. Cuñi tsi tsa cuví ndo tumaa iin ñuhu tsa jandunditsín nu naa nu ñuhu ñayiví ihyá. ¹⁶Cahan yo tuhun Nyoo tsihin nyiví tyin yacan tsahá ñayiví nyito tsa iyó yo. Javaha ndo tacan, tan quivi cua quitsi ra Cristo, yuhu nii vaha cua cuñi yu tsa cuenda ndo, tyin ñia jacoto cuatu yu tuhun Nyoo tsi ndo. ¹⁷Tan vasu cahñi nyiví tsi yu tsa catyí tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusí iñi yo tsihin ra. ¹⁸Tan yacan cuenda taahán tsi tsa cusí iñi ndo tsihin yu.

Nu jacuhyn ra Pablo tsi ra Timoteo tan ra Epafradito ñuu Filípos

¹⁹Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehera nu yucú ndo. Tan quivi tsaa ra inga tsaha nu nyí yu sií xaan cua cuñi yu. Tyin cua nacatyi tuhun ra tsihin yu nácaa yucú ndo. ²⁰Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan. ²¹Tyin tandíhi ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. ²²Maa tyin tsító ndo tyin ra Timoteo, vaha cuahán ra tsihin Nyoo, tan tsa cuenda yuhu, cuví ra tumaa sehe yu. Tan jatyinyé xaan ra tsi yu tsa caahán ndi tuhun ra Cristo tsihin nyiví. ²³Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyíñu, tatuñ ñia naha ca cunyii yu ihyá. ²⁴Tyin tsító vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

²⁵Tan ra Epafradito, yañi yo tsa jaquitsi ndo tsa jatyinyee tsi yu tsihin tyíñu tsa javahá yu, iin caa ñi cuví ndi andaru ra Cristo tsihin ra. Tan vityin cua jaquitsi nuhu yu tsi ra inga tsaha nu yucú ndo. ²⁶Cuñi xaan ra quitsi nuhu ra nu yucú ndo, tyin tsicá xaan iñi ra tsa tsító ndo tyin nacuhví ra. ²⁷Nditsa ñihi xaan nacuhví ra tan tsa cua cíu maa ra cuví. Maa tyin Nyoo

cundahví iñi tsi ra, tan tsii tucu yuhu tyin na ña nducuihyá xaan ca iñi yu. ²⁸Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihyá iñi, tyin cua nyehe ndo tyin ra Epafradito iyó vaha ra. ²⁹Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayiví tsi ra yañi yo naha ra tsa iyó tumaa cuhva iyó ra. ³⁰Tyin tsa yatinyin maa cíu raa tsa cuenda tsa javahá ra tyíñu ra Cristo. Tyin vasu ndi maa cuuhví xaan ra, maa tyin ña cuñi ra jandihí ra tsa jatyinyee ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

¹Tan vityin yañi, cusí iñi ndo tsihin Jutu Mañi yo. Tsa cuenda yuhu nduve tisíhi cuví tsi tsa cua tyaa yu inga tsaha tuhun ihyá tsi ndo. Tyin tsa vaha tsi maa ndo cuví tsi. ²Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo. ³Maa tyin yoo nyisó yo tuñi tsa nditsa tyin maa Nyoo tyáñu ra tsitsi añima yo quíví nacuhví cuenda yo tsi yo tsi ra. Tan jacahnú yo tsi ra tsihin Tatyi li ra tsa iyó añima yo. Tan cusí iñi yo tyin cuenda maa ra Cristo Jesús yiñi yo. Tan ña nyitá iñi yo tyin cacu yo tsihin náa cunyaa cuñu ñuhu yo. ⁴Tun tsatiny nditsa tsa cuví cacu yo tsihin tsa javahá yo yacan, jihna ca yuhu tsa yahá cacu tan ñávin ca tandihí ra tsa javahá yacan vityin. ⁵Tyin una quíví yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu. Juvin ñi tata nyiví caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quíví can, tyin ra fariseo cuví yu. ⁶Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yiñi cuenda ra Cristo. Tan tyaa yahvi yu tandihí maa ley tsahnu, tyin nducu xaan yu cuhva tyaa

yahvi yu tsa caahán ley can. ⁷ Maa tyin tandíhi tsa cuñi maa yu tyin cahnu xaan cuví quívì can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. ⁸ Tan inga tucu tuhun, tandíhi tsa jayahá yu, tsító maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandíhi tsa jayahá yu quívì quitsi tsi ityí tsata, cuví tsi iin tsa cuatu ña vityin. Yacan cuenda tyaa tsiyo yu tandíhi can. Tyin cuñi yu coto vaha ca yu tsi ra Cristo. ⁹ Tan cuñi yu ndu iin ca yu tsihin ra. Tsín iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyá yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihín cuenda ra tsi yo. ¹⁰ Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandoto ra tsi ra Cristo tsihin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyeé iñi yu tundoho tsa taahán tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuhvá cuenda ra tsi ra tan tsihí ra. ¹¹ Tyin nducú xaan yu cuhva nandoto yu tsa yaha cúa yu.

Nacaa cunyicun ñihi ca yo tsi Nyoo

¹² Ña catýí yu tyin nduve ca tsa cumañí tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahán ra Cristo tyin cuhva ra tsi yu. Tyin jihna ca maa ra cahán tsihin yu. ¹³ Yañi, ña catýí yu tsihin ndo tyin tsa ñihi yu tandíhi tsa vaha can. Maa tyin iyó intuhun ñi tsa jayahá yu; nacoó yu ityi tsata tandíhi tsa jayahá yu, tan jañiñi yu cuhun yu ityi nuu ca. ¹⁴ Tyin tacan tan tsáa yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catýí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

¹⁵ Tacan taahán tsi caca iñi tandíhi nyivi tsa ñihi nyaá tsihin Nyoo. Maa tyin tatum ñavin tacan tsicá iñi ndáa nyoooho, Nyoo cua cuhva ra tsa cutuñi iñi ndo. ¹⁶ Maa tyin iyó iin tsa cuñi tsi tsa tyaa yahvi vaha yu, tuhun tsa tsa yahá jacotó Nyoo tsi yo.

¹⁷ Yañi, jayahá ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandíhi nyivi. ¹⁸ Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihyá cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnu cuví tsa tsihin ra Cristo nu cruu jahá ra naha. ¹⁹ Maa tyin quívì quitsi ra Cristo inga tsaha, ra ican naha ra cua cuhun anyaya. Tyin jayahá ra naha cuhva cuñi cuñu ñuhu ra naha. Tan cahnu jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihyá. ²⁰ Maa tyin yoo nda gloria cuví nu iyó ñuu yo. Tan ndatú yo quívì quitsi nyico Jutu Mañi yo Jesucristo, ra jacacú tsi yo. ²¹ Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua jayahá ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandíhi tsa iyó.

4

Tacan ñi maa na cusii iñi yo tsihin Jutu Mañi yo

¹ Yañi, cuñi yu tsi ndo. Tan cuñi xaan yu nyehe yu tsi ndo. Sií xaan cuñi yu tsihin ndo. Tan tsító yu tyin ña cahán cuatu yu tuhun Nyoo tsihin ndo. Tyin ñí xaan iñi ndo nyicún ndo tsi ra. Tan jañihi ca ndo cunyicun ndo tsi ra.

² Tan vityin tsicán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo. ³ Tan yooho, yañi, tsa iin caa ñi jahá tyiñu tsihin yu, cuñi yu tyin jatyinyee un tsi ñi cuhva yo ihyá. Tyin juvin ñi jatyinyee xaan tsi yu nu cahán yu tuhun Nyoo, maa tyin ñavin intuhun ñi yu jatyinyee ñi, tyin jatyinyee ndíhi ñi tsi ra Clemente tan tsi tandíhi ca ra tsa cutahán tsihin ndi. Tan sivá tandíhi ñi tsa nyaá nuu tutu Nyoo nda gloria.

⁴ Cusii iñi ndo tsihin Jutu Mañi yo tandíhi ñi quivi. Tan caahán yu tsihin ndo inga tsaha, cusii iñi ndo tsihin ra. ⁵ Coo vaha ndo tyin tacan tan nyehe tandíhi nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatin cua quitsi Jutu Mañi yo.

⁶ Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihí tundoho tsa iyó ndo. Tan ndacan ndo tsi ra nacuhva ra tandihí tsa tsíñi ñuhu tsi ndo. Tacan tan ña nacoo ndo tsa tsahá ndo tyahví nyoo tsi ra. ⁷ Tan Nyoo cua cuhva ra tsa taxin coo añima ndo. Tan cahnu xaan tsa vaha cuví yacan. Tan yoñi cuví cutuñi iñi nácaa tsa cahnu tsi. Tan tsa taxin iyó tsi Nyoo cua jaha cuenda añima ndo tan tsihin tsa tsíñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca iñi yo maa ñi maa tsa vaha

⁸ Nu cua ndihí tuhun, yañi, caca iñi ndo maa ñi tsa nditsa, maa ñi tsa ndaa, tsa cuítí iyó, tan tsa ndoo iyó. Ña caca iñi ndo tsi caquíñi. Caca iñi ndo tsa sii caa, maa ñi tsa vaha, tan maa ñi cuhva cuvi jacobhu ndo tsi Nyoo.

⁹ Javaha ndo tsa jacuahá yu tsi ndo. Tuhun tsa cahan yu tsíñi ndo, tan tsa javaha yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

Nu jatyinyéé nyiví ñuu Filipos tsi ra Pablo tsihin tsa iyó tsi ñi

¹⁰ Sii xaan cuñí yu. Tan jacobhu yu tsi Jutu Mañi yo tsa cuenda tsa jatyinyéé xaan ndo tsi yu inga tsaha. Tan tsitó yu tyin ndihí ñi tsaha tan cuñí ndo jatyinyee ndo tsi yu. Maa tyin tsicoo juhva quíví ña tsaha tsi cuhva tsa jatyinyee ndo tsi yu. ¹¹ Ñavin tyin iyó tsa tsíñi ñuhu tsi yu tan caahán yu tsihin ndo, tyin yuhu tsa cutuhvá maa yu tsa cusí iñi yu tsihin náa tsa iyó tsi yu. ¹² Tyin yuhu tsa tsitó maa yu nácaa coo ndaahví yu tan nácaa coo cuca yu. Tyin tsa caañ maa yu tun iyó tsa catsi yu a nduve, tyin tun ndoo ca tsa catsi yu, quíví tsa iyó, o nduve tsa catsi yu, ndoo maa yu vaha. ¹³ Tandihí tan cuví jaha yu tsihin tunyee iñi tsa tsahá ra Cristo tsi yu. ¹⁴ Tan nyooho yañi, vaha xaan tsa javaha ndo tyin jatyinyee ndo tsi yu quíví tsa tsicoo yu tundoho.

¹⁵ Tsa tsitó nyooho nyiví Filipos nácaa cuví quíví quitsaha caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuvi nyiví tsa jatyinyee tsi yu tsihin xuhun, tyin vaha xaan cuñí ndo tsa cahan yu tuhun Nyoo tsihin ndo. ¹⁶ Tan tsitsi tsa nyí yu

ñuu Tesalónica, ñavin intuhun ñi tsaha jatyinyee ndo tsi yu. ¹⁷ Ñavin tsa tsicá iñi yu tsa jatyinyee ndo tsi yu, tyin tsa cuñí yu tsa jatyinyee ndo tsihin tyíñu Nyoo, tacan tan cuaha ca cua nasoco Nyoo tsi ndo. ¹⁸ Tan vityin, nduve tsa cumañí tsi yu. Nda cua ndoo ca tsa jaquitsí ndo tsi yu tsihin ra Epafroditó. Tan tsa tsahá ndo can cuví tsi tumaa xico tami, xico vaha tsa tsá ñuu Nyoo. Yacan cuví tsa taahán iñi ra. ¹⁹ Tan Nyoo cua cuhva ra tandihí tsa tsíñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo. ²⁰ Na jacobhu yo tsi Nyoo Jutu yo tacan ñi maa. Tan na cuví tsi tacan ñi.

Nu jacuhún ra Pablo nacumi tsi nyiví ñuu Filipos

²¹ Tsahá yu nacumi tsi tandihí ndo tsa yihí ndo cuenda ra Cristo ñuu Filipo. Tan jaquitsí tucu ra yañi yo tsa yucú tsihin yu ihyá nacumi tsi ndo. ²² Tan nyiví cuenda Nyoo tsa yucú vehe ra ndacá ñaha ñuu Roma ihyá, tan tandihí ca nyiví yihí cuenda Nyoo ñuu ihyá jaquitsí ñi nacumi tsi ndo.

²³ Na nasoco maa Jutu Mañi yo Jesucristo tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Nuu Colosas

Nu quitsaha jahawahá ra Pablo carta

¹⁻²Yuhu ra Pablo cuví yu iin ra tava tyiñu ra Jesucristo, tyin tacan cuñi maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihyá tsi nyoho nyivi ñuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

³Tandihi ñi tsaha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. ⁴Tyin ñihí tuhun ndi tyin tsinú xaan iñi ndo tsi ra Cristo Jesús, tan cuñi xaan ndo tsi tandihí nyivi tsa yihí cuenda Nyoo. ⁵Tacan jahawahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiní ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo. ⁶Tan juvin ñi maa tuhun ra Cristo tsa cahan ra Epafras tsihin ndo, yacan nacutyá tandihí ñi ityí, tumaa tsa tsityá tucu tsi nu iyó ndo ihyá. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiní ndo tuhun ra Cristo tsitó ndo tyin nditsa tsa cuñi Nyoo tsi ndo. ⁷Yacan janahá ra Epafras tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. ⁸Tan juvin ra catyí tuhun tsihin ndi tyin cuñi xaan ndo tsi nyivi tahan ndo, tyin maa Tatyí Ii Nyoo tsahá tsa vaha can coo añima ndo.

⁹Yacan cuenda nda quivi tsa ñihí tuhun ndi tyin tacan jahawahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiní tuñi tsa iyó tsi ra tsi ndo, tan na cutuñi iñi ndo jahá Tatyí Ii ra tan coto vaha ndo náa ndihí tsa cuñi ra tyin jahawahá ndo. ¹⁰Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan jahawahá ndo tumaa cuñi maa ra, tan jahawahá

ndo tandihí nuu tsa vaha tan nacoto vaha ca ndo tsi ra. ¹¹Tan tsicán tucu ndi tsi ra na jatyinyee ca ra tsi ndo tsihin tunyee iñi cahnu tsa iyó tsi ra tan ña cundihi iñi ndo tsa yaha ndo tandihí tundoho, tan na cusíi iñi ndo. ¹²Tan na cuhva ndo tyahvi nyoo tsi Nyoo Jutu yo, tyin maa ra tsa janduvahá ra tsi yo tyin tacan tan cuvi ñihí yo tsa cua ñihí nyivi tsicá nu nditsin, tan cuñi tsi catyi nyivi tsa cuítí iyó nuu ra. ¹³Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñi xaan ra tyin cundaca ñaha ra tsi yo. ¹⁴Tan jata ra tsi yo tsihin niñi Sehe ra tan jaha ra tucahnu iñi tsi yo.

Tsa cuenda tsa tsihí ra Cristo nu cruu tsacatyí cuatyí yo tan ñduvahá iyó yo tsihin Nyoo

¹⁵Nyoo ña nyehé yo tsi ra. Maa tyin nanduví ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo. ¹⁶Tan maa ra jahawahá tandihí tsa iyó andiví tan nu ñuhu ñayivi jahá Nyoo. Jahawahá ra tsa cuví nyehe yo tan tsa ña cuví nyehe yo. Jahawahá ra tandihí tatyí vaha tan tatyí ña vaha tsa ndacá ñaha andiví tan nu ñuhu ñayivi ihyá. Tan tandihí yacan jahawahá ra tyin cuatyínu ra cuhva cuñi ra. ¹⁷Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra. ¹⁸Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quivi ndaha ra tandihí tsa iyó. ¹⁹Tyin Nyoo cuñi ra tsa cuvi ra Cristo tumaa cuví maa ra. ²⁰Tan tsahá ra tsi ra Cristo tsa cíu ra nu cruu tyin tacan tan cuvi coo vaha tandihí tsa iyó tsihin ra, tahan ñi tsa iyó nu ñuhu ñayivi tan andiví.

²¹⁻²²Tahan tsanaha jahawahá ndo tsa ña vaha tan xaan cuñi ndo nyehé ndo tsi Nyoo. Maa tyin Nyoo jaquitsí ra tsi ra Cristo, Sehe ra tan tsahá cuenda ra cuñu ñuhu ra tan tsihí ra nu cruu. Tan janacoó vaha ra tsi ndo tsihin Nyoo, tan cua na cuhva cuenda ra tsi ndo tsi ra tsihin tsa nduve ca cuatyí ndo tan cuítí vaha cua coo ndo nuu ra. ²³Yacan cuenda jañihi ca ndo tsinú iñi ndo. Tan cuita iñi ndo tyin cua tsaa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiní ndo tyin cua jacacu

ra tsi ndo. Tuhun ihya cuví tsa caahán ra na ha taníi cahnu ñuhu ñayivi. Tan yuhu ra Pablo jatyinyéé yu caahán yu tuhun ihya tsihin nyívi.

Nu catyí ra Pablo tyin nyaá síqui ra tsa janahá ra tuhun ra Cristo tsi tandíhi nyívi tsicá vehe ñuhu

²⁴ Vityin sii cuní yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyívi yihi cuenda ra Cristo tyin maa ra cuaha xaan tundoho nyehé ra tsa cuenda yo tsa cuví yo cuñu ñuhu ra. Tacan tan cua jaquita ndíhi yu tundoho tsa nyehé ra. ²⁵ Yuhu cuví iin ra caahán tuhun ra Cristo tyin tacan jatyinyéé yu tsi tandíhi nyívi yihi cuenda ra. Tyin maa ra Nyoo catyí tsa cahan yu tandíhi tuhun ra tsa cuenda tsa vaha tsi ndo. ²⁶ Jacuahá yu tuhun tsa tsicumí xeehe Nyoo tahan tsanaha, tsa ndi cumañi ca javahá ra ñuhu ñayivi. Tan vityin tsahá ra tsa nacoto nyívi yihi cuenda ra itsi. ²⁷ Tan nyoho tsa ñavin nyívi Israel cuví cuñu ndíhi ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyoho ñi yihi cuenda ra. Tan tsa cuenda maa ra cua ñíhi ndo gloria nu cua coo ndo tsihin Nyoo.

²⁸ Tuhun maa ra Cristo caahán ndi. Tan tsahá cuenda ndi tuhun ihya tsi tandíhi nyívi. Tan jacuahá ndi tsi tandíhi ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. ²⁹ Tan tsa cuenda tsa cuñu yu tsa cuahnu vaha ñi ñíhi xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹ Tan cuñu yu tsa coto ndo tyin tsicá iñi yu tsa cuenda ndo. Tan tsicán tahiya xaan yu tsi Nyoo tsa cuenda tandíhi ndo tan tsa cuenda nyívi tsa ñaha ca nyehe tsi yu. ² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñu tahan ndo tsi ndo. Tan na cuhva ra tsa cutuñi vaha iñi ndo nacuenda jaquitsi ra tsi ra Cristo, tyin tacan tan cua nacoto vaha ca ndo tsi ra. Tyin juvin tuhun ra Cristo cuví tsa tsicumí xeehe Nyoo tahan tsanaha, tan vityin jacotó ra itsi tsi yo. ³ Tyin tsi intuhun ñi maa ra Cristo iyó tsa tsíni tuñi tan tsahá

ra itsi tsi yo na cutuñi iñi yo tsi Nyoo. ⁴ Caahán yu tyehen tsihin ndo tyin tacan tan ña jandavi ñaha nyívi tsi ndo tsihin tuhun tsa sii natuhún ñi. ⁵ Vasu nduve yu nyívi tsihin ndo, maa tyin ñuhú xaan iñi yu tsi ndo. Tan sii xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsiny iñi ndo tsi ra Cristo quívi nañihí ndo tsi ra, tacan cuñi tsi coo ndo tsihin ra. ⁷ Tan cunyaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvá ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ *Jaha ndo cuenda tsi ndo coto jandavi ñaha nyívi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyívi tsitó ñi tan tsinú iñi ñi cuhva tsicá iñi nyívi.*

⁹ Yacan ña tsinú iñi ndo tsa caahán ñi tyin ra Cristo juvin ra cuví Nyoo tan cuví tucu ra nyívi. ¹⁰ Tan tsitu ndo tsihin Nyoo tyin iin ñi cuví ndo tsihin ra Cristo. Tan maa ra nadacá ñaha tandíhi tsa nadacá ñaha nu ñuhu ñayivi tan tandíhi tatyi tsa ña nyehé yo. ¹¹ Tan tsa iin ñi cuví ndo tsihin ra Cristo, nda quívi natsiny iñi ndo tsi ra, tan nanduvi ndo nyívi ra. Maa tyin ña nanduvi ndo nyívi ra tsa cuenda tsa tsinyaa tuñi ra cuñu ñuhu ndo, tyin jacacu ra tsi ndo ndaha tsa caquini tsa javahá ndo jahá cuñu ñuhu ndo. Tsehe cuví tuñi tsa tyaa ra Cristo tsi ndo: ¹² Quívi tsicoondutýa ndo tsitsi ndutya, tumaa tsa tsihí ndo tsihin ra Cristo tan quíhví ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandoto tsi ra tsihin tunyee iñi ra. ¹³ Tahan tsanaha cuví ndo tumaa nyívi tsihí jahá cuatyi ndo, tyin nduve Nyoo nyaá añima ndo tan ña tsinyaa tuñi Nyoo cuñu ñuhu ndo. Maa tyin vityin Nyoo jahá ra tucanhü iñi tandíhi cuatyi ndo. Tan tsahá ra tsa coo ndo ñayivi nyito tsihin ra Cristo. ¹⁴ Tyin ley tsahnu jaquituví tsi cuatyi yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsihí ra nu cruu jahá Nyoo tan tsindihí tsa cuhun yo anyaya. ¹⁵ Tan tsa tsihí ra nu cruu jahá canaa ra tsi nu ña vaha tan tandíhi ca tatyi ña vaha

tsa ndacá ñaha. Tacan tan tsindaca¹ ra tsi nu nuu tandíhi nyivi tan nuu ángel tyin na nyehe ñi tyin cahnu ca cuví maa ra, yacan cuenda jahá canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaa nyivi cuatyi tsi ndo tsa cuenda tsa tsatsí ndo a tsa cuenda tsa tsihí ndo, o tsa cuenda tsa ña naquihín vaha ndo iin quíví víco tsa jacahnú nyivi Israel; cuví ñi quíví tsa nduyutýá yoo, o quíví quitatú ñi. ¹⁷ Tandíhi tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yaha quitsi ra, tan juvin ra jacacú tsi yo. ¹⁸ Ña cuhva ndo tsa casí nyivi naquihin ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. ¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñihu ra, tan maa ra cuví jiñi tsihin yo. Tan jandu iñi ra tsi tandíhi yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsihí cuñu ñihu cuatyi ndo tsihin ra Cristo cuví can. Tan ña ndacá ñaha ca tuhun ñihu ñayivi ihya tsi ndo. ¿Nacuenda tyin iyó ca ndo tumaa iyó nyivi tsa ña nacotó tsi Nyoo? Tan tyáa yahvi ndo tsa caahán ñi tsa javahá tuhun tsahnu.

²¹ Tyin catyí ñi tsihin ndo tyehen: “Ña tiin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. ²² Maa tyin ña taahán tsi casí ñi nu javahá ndo yacan tyin tsa jacuahnú ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jativí can tsi ndo nuu Nyoo. ²³ Ñi tsa javahá tandíhi can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñihu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsahá Nyoo ñayivi nyito coo yo tyin nandoto ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo.

² Caca iñi ndo yacan, tan ña caca xaan iñi

ndo tuhun tsa iyó nu ñuhu ñayivi ihya.

³ Tyin vityin ña javahá ca ndo tsa javahá ndo tahan tsanaha, tyin tsa tsihí ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. ⁴ Tan quíví cua quitsi nyico ra Cristo, ra tsa tsahá ñayivi nyito tsa iyó yo, tacan tan cua nyehe nyivi tyin maa ra cahnu ca cuví ra. Tan cua nyehe tucu ñi tsi nyoho iin caa ñi tsihin ra.

Nacaa tsicoq yo nu quitsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandíhi ndo tandíhi tsa ña vaha tan tsa caquiñi tsa cuñi cuñu ñihu ndo. Tan ña cuñu ndo tsihin iin ñaha tun ñaha ca tindaha ndo, tahan ñi rayii tan ñaha. Tan ña cuñi ndo coo cuaha ndaha tyiñu ndo tyin tun tsicá iñi ndo yacan, tsitoho jacahnú ndo tan tyáa tsyo ndo tsi Nyoo cuví can. Tyin tacan javahá nyivi tsa ña yiñi tuhun Nyoo, maa tyin nyoho ña taahán tsi javahá ndo tacan. ⁶ Tsa cuenda tandíhi tsa caquiñi ihya cuxaan xaan Nyoo tsi nyivi tsa ña tyáa yahvi tsa caahán ra. Tan cua tatsi tuñi ra tsi ñi. ⁷ Tan juvin ñi tacan javahá tucu maa yo quíví tsa ña nacotó yo tsi Nyoo. ⁸ Maa tyin vityin ña javahá ca ndo tandíhi tsa ña vaha can: ña cuxaan ca ndo. Ña xaan cuñi ndo nyehe ndo tsi nyivi tahan ndo, tan ña jacuñi nyaa ndo tsi ñi, tan ña cahán ndo cuendu siquei ñi. Tan ña cahán ca ndo tsa ndavaha ñi. ⁹ Ña cahán tahan ca ndo cuendu siquei iñi ndo tan inga ndo. Tyin tsa nacoq ndo tandíhi tsa ña vaha tsa javahá ndo tahan tsanaha. ¹⁰ Tyin vityin tsa nanduví yo nyivi tsaa tan iyó yo ñayivi nyito. Tan ndutsaa ca yo tumaa caá Nyoo, ra javahá tsi yo, nda cuanda coto vaha ca yo tsi ra. ¹¹ Ña ñiñi tsa cuví yo nyivi Israel, o nyivi Grecia, o nyivi inga ñiu. Tan ña ñiñi tatan tyáa ñi tuñi Nyoo tsi yo, o ña tyáa ñi; a cuví yo iin nyivi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandíhi yo tsihin ra Cristo, tyin maa ra cuví tandíhi tan iyó ra tsihin tandíhi yo.

¹² Nyoo cuñi ra tsi yo tan nacatsi vaha ra tsi yo tyin cuví yo nyivi ra. Yacan cuenda coo ndo ñayivi nyito tumaa taahán tsi coo nyivi yiñi cuenda ra; cundaiyahvi iñi ndo nyehe ndo tsi nyivi tahan ndo; cuví ndo nyivi vaha tan ndaahvi jaha ndo tsi ndo nuu Nyoo; ndumasu ndo; cunyee iñi ndo nyehe

ndo tandihí tisihi tan tundoho tsihin tsa sií cuñí ndo. ¹³ Na cündihí iñi ndo tsihin nyiví tahan ndo. Jaha ndo tucahnu iñi tsi ñi tatan náa jayahá ñi tsi ndo. Tumaa ra Cristo jaha ra tucahnu iñi tsi maa ndo, tacan cuñí tsi jayahá tucu maa ndo tsihin nyiví. ¹⁴Tyin tsa cuñí tahan yo tsi yo, yacan cuví tsa ñiñi ca cuñí tsi. Tyin yacan cuví tsa jandu iín tsi yo. ¹⁵Tan cuhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, cana Nyoo tsi ndo tan jandu iín ra tsi ndo tsihin ra Cristo. Tan cuhva ndo tyahvi nyoo tsi Nyoo.

¹⁶ Tan na cutu añima ndo tsihin tuhun ra Cristo, tan jacuaha tahan ndo tuhun ra tsi ndo. Tan jandu iín tahan ndo iñi ndo tsihin tandihí tsa tsíñi tuñi tsa tsahá Nyoo tsi ndo. Cata ndo yaa tan salmo. Tan cata ndo yaa tsa tsahá Tatyi li Nyoo tsi ndo tsihin tsa ñii iñi añima ndo. Tan tacan ñi nacuhva ndo tyahvi nyoo tsi Nyoo. ¹⁷Tatun náa tysiñi cua jayahá ndo, o náa cua cahan ndo, jayahá ndo can tsihin sivi Jutu Mañi yo Jesús. Tan juvin ñi cuhva can nacuhva ndo tyahvi nyoo tsi Nyoo tsa cuenda maa ra Cristo.

Nu tsahá cuenda ra Pablo nácaa nducú yo cuhva coo vaha yo tsihin nyiví

¹⁸ Nyoooho tsa iyó yií cuhva ndo tsa cundaca ñaha yií ndo tsi ndo. Tacan taahán tsi coo ndo, tyin yihí ndo cuenda Jutu Mañi yo. ¹⁹Tan nyoooho rayií, cuñí ndo tsi ñasiñi ndo. Tan ña cündihí iñi ndo nyehé ndo tsi ñi. ²⁰Nyoooho tsa nyihi tyaa yahvi ndo tsi jutu ndo tan tsi sihi ndo, tyin sií xaan cuñí Jutu Mañi yo tun jayahá ndo tacan. ²¹Nyoooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi. ²²Tan nyoooho tsa cuví musu, tyaa yahvi ndo tsi ra yihí ndaha tsi ndo. Ñavin tsa nyehé ñi ra tsi ndo tan tyaa yahvi ndo tsi ra naha, tan catyi ra naha tyin vaha xaan ndo. Tyaa yahvi nyoooho tsi ra naha tsihin tsa ñii iñi añima ndo vasu ña nyehé ra naha, tyin Nyoo nyehé ra. ²³Tandihí ñi tysiñi jayahá ndo, jayahá ndo can tsihin tsa sií cuñí ndo tumaa tsa jahá tysiñi ndo cuenda Jutu Mañi yo tan ñavin cuenda nyiví. ²⁴Tyin tsító ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa. ²⁵Tan tatum jayahá ndo tsa

ñi vaha, Nyoo cua tatsi tuñi ra tsi ndo tsa cuenda tsa ña vaha tsa jayahá ndo, tyin ña siín caá iin yo tan inga yo nuu Nyoo, tyin tandihí yo tan inducú ñi caá yo.

4

¹ Nyoooho tsa iyó musu, cuñí tsi cuví ndo nyiví vaha tsihin musu ndo. Ndycuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndacan tahvi ndo tsihin tsa ñii iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihí maa. ³ Ndacan tahvi ndo tsa cuenda ndi, tyin na nuña Jutu Mañi yo añima nyiví tan tyaa soho ñi tuhun xeehe ra Cristo tsa caahán ndi tsihin ñi. Tsacatyi tuhun ihyá nyíyu vehe caa. ⁴ Ndacan tahvi ndo tsa cuenda yu na cuvi jacuaha yu tsi nyiví cuhva cuvi cutuñi vaha iñi ñi tuhun ra Cristo, tumaa taahán maa tsi jayahá yu.

⁵ Cuítí coo ndo tsihin nyiví tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi. ⁶Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatum nducu tuhun ñi náa nducu tuhun ñi tsi ndo.

Nu tsahá ra Pablo nacumi tsi nyiví yihí cuenda Nyoo ñuu Colosas

⁷ Ra Tíquico, ra yañi yo, ra jahá tysiñi tysiñi Jutu Mañi yo tsihin yu, cua nacatyi tuhun ra tsihin ndo nácaa iyó yu. ⁸ Yacan cuenda jaquitsí yu tsi ra nu yucú ndo na jandu iín ra iñi ndo tan catyi tuhun ra tsihin ndo nácaa yucú ndi. ⁹Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñí xaan yo tsíra. Cua catyi tuhun maa ra naha tsihin ndo tandihí tsa cuví nu nyíyu ihyá.

¹⁰ Ra Aristarco, ra nyítsihin yu vehe caa ihyá, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacotó yu tsi ndo tyin tun tsaa ra Marcos nu yucú ndo, vaha cahan ndo tsihin ra. ¹¹Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihí ra Israel tsa yihí cuenda Nyoo, uñi taahan ñi ra ihyá naha ra jahá tysiñi tysiñi Nyoo tsihin yu. Tan jandu iín xaan ra naha iñi yu. ¹²Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán

tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandíhi cuhva cuñí ra.¹³ Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyívi tsa yucú ñuu Laodicea tan ñuu Hierápolis.¹⁴ Vatsí tucu nacumi tsi ndo jahá ra Lucas, ra tsa cuví doctor tsa cuñí xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndíhi ndo nacumi tsi ña Ninfas tan tsi tandíhi nyívi yihí cuenda Nyoo tsa ndu íín yuvehe ña.¹⁶ Tatun ndíhi cahvi ndo carta ihyá, tan jacuhun ndo itsi tsi nyívi yihí cuenda Nyoo nda ñuu Laodicea na cahvi ndíhi ñi itsi. Tan na cuhva ñi carta tsa jacuhun yu tsi ñi, cahvi ndo.¹⁷ Cahan ndo tsihin ra Arquipo tan çatyi ndo: “Javaha vaha tyiñu tsa tsahá Jutu Mañi yo tsi un tyin javaha un.”

¹⁸ Yuhu ra Pablo tyáa yu nacumi ihyá tsi ndo. Na ña naa iñi ndo tyin nyívi yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhún Ra Pablo Tsi Nyívi Yihí Cuenda Nyoo Ñuu Tesalónica

*Nu tyaq ra Pablo tan ra cutahán tsihin ra
iin carta cuenda nyívi yihí tuhun Nyoo*

¹Yuhu ra Pablo ra Silvano tan ra Timoteo, jaquitsí ndi carta ihyá tsi ndo tsa cuví ndo nyívi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo añaima ndo.

*Vaha xaan tsinú iñi nyívi Tesalónica tsi
Nyoo*

²Tandihi ñi quivi tsahá ndi tyahvi nyoo tsi Nyoo tsa cuenda tandihi ndo. Tan iin nyita ñi tsicán tahvi ndi tsi ra tsa cuenda ndo. ³Tan nducuhún iñi ndi tuhun ndo nuu Nyoo Jutu yo tyin iñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñí ndo tsi ra. Tan tsihin tsa iñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. ⁴Tyin tsitó ndi tyin Nyoo cuñí xaan ra tsi ndo, nyoho yañi, tan maa ra nacatsí vaha tsi ndo. ⁵Tyin quivi cahán ndi tuhun Nyoo, nácaa jacacú ra tsi yo, tsihin ndo, cahán ndi tuhun tsihin tunyee iñi Tatyi li Nyoo, tan tsitó vaha ndi tyin tuhun nditsa cuví tsi. Tan ñavín tuhun caahán ñi cuví tsi. Tan nyehé ndo nácaa tsicoq ndi quivi tsiyucu ndi tsihin ndo. Tsicoq ndi tacan tsa cuenda tsa vaha tsi maa ndo.

⁶Tan quitsaha iyó ndo cuhva iyó ndi, tan cuhva iyó Jutu Mañi yo. Tyin naquihin cuenda ndo tuhun Nyoo, vasu cuahá tundoho nyehé ndo tsa cuenda tsi. Maa tyin sií xaan cuñí ndo tyin maa Tatyi li tsahá can tsi ndo. ⁷Tan tsa tacan iyó ndo, jatyinyeé xaan ndo tsi tandihi nyívi yihí cuenda Nyoo tanii cahnu Macedonia tan tanii cahnu Acaya ihyá, tyin nyehé ñi cuhva iyó ndo tsihin Nyoo. ⁸Navin Macedonia tan Acaya ñi, maa tyin tandihi ñi itiy nu tsiní nyívi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca

cuñí tsi cahan ndi tuhun Nyoo tsihin ñi.

⁹Tyin juvin ñi maa ñi nacatyí tuhun tsihin ndi nácaa tsa vaha xaan naquihin cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsaha jahá tyiñu ndo tyiñu Nyoo nyito. ¹⁰Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua quee ra andív. Ra ican cuví ra tsa janandoto Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyívi.

2

Tyiñu jahá ra Pablo ñuu Tesalónica

¹Nyoho yañi, tsitó ndo tyin ñavín tsa cuatu quitsi ndi cahán ndi tuhun Nyoo ñuu ndo. ²Tyin tsitó ndo nácaa nyehé ndi tundoho jahá nyívi ñuu Filipo tsa ndi cumañi ca tsaq ñi ñuu ndo. Tan vasu nyehé xaan ndi tundoho ñuu can, maa tyin quivi tsaq ñi ñuu ndo cahán ndi tuhun Nyoo tsihin ndo tsihin tsa ña yuuhví ndi. Tan vasu xaan cuñí nyívi ñuu ndo, maa tyin jatyinyeé xaan Nyoo tsi ndi tan iñi iñi ndi jacoto ndi tsi ndo cuhva jacacú ra tsi yo.

³Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquíñi tsicá iñi ndi. Tan ndi ñavín tsa cuñí ndi jandavi ñaha ndi tsi ndo. ⁴Nduve tsa ña vaha cahán ndi, tyin Nyoo nyehé ra tsi ndi, tan maa ra tava tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tava tyiñu maa ra tsi ndi. Tyin ña cuñí ndi tsa vaha cahan nyívi tuhun ndi, maa tyin cuñí ndi tsa vaha cahan Nyoo tuhun ndi, tyin maa ra nyehé ra cuhva iyó yo. ⁵Tan tsitó ndo tyin ndi iin tsaha tan ña cahán ndi tsihin tuhun tsa tyaquí xaan tsa cuñí ndi jandavi ñaha ndi tsi ndo. Tan ndi ñavín tsa cuñí ndi jaha canaa ndi xuhun tan cahán ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihyá. ⁶Tan ndi iin tsaha ña nducu ndi cuhva jacahnu nyívi tsi ndi, ndi nyoho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tava tyiñu tsi ndi, maa tyin ña cuñí ndi tsa javahá ndo tacan tsihin ndi.

⁷Tan vita cahán ndi tsihin ndo. Tumaa iñi ñaha iyó sehe jahá cuenda vaha ña sehe ña. Tacan cuñí ndi jatyinyeé ndi tsi ndo.

⁸Cuñí xaan ndi tsi ndo, tan yacan cuenda ñavin tuhun Nyoo ñi cuñí ndi cuhva ndi tsi ndo, tyin cuñí ndi cuhva tucu ndi nda cuanda ñayiví iyó ndi tsa cuenda tsa cuñí ndi tsi ndo. ⁹Nyooho yañi, nducuhún iñi ndo nácaa jahá tysiñu ndi tan tsatsi ndi quivi tsiyucu ndi tsihin ndo. Jahá tysiñu ndi tsinu cahñi tan tsacuaa tyin ña cuñí ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucu ndi tsihin ndo tsa cuví ndo nyiví tsinú iñi tsi ra Cristo. Maa tyin maa ñi maa cuhva cuñí Nyoo javahá ndi, tan yacan cuenda ña cuví cahan ndo tsi ndi. ¹¹Tan tsitó tucu ndo nácaa jandu iñi ndi iñi intuhun intuhun ndo tsihin tuhun tsa tsahá cuenda ndi tsi ndo. Tsahá ndi tunyee iñi tsi ndo tumaa iñi rayí tsa iyó sehe tsahára tunyee iñi tsi sehe ra. ¹²Tan catyí ndi tsihin ndo, catsi coo ndo tumaa taahán tsi coo nyiví yihí cuenda Nyoo. Tyin maa Nyoo cana tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahan ndi tsihin ndo, naquihin cuenda ndo tuhun can tyin nacotó ndo tyin tuhun Nyoo cuví tsi tan ñavin tuhun ra ñayiví cuví tsi. Tan nditsa tsa tuhun Nyoo cuví tsi, tyin quitsahá tsinú iñi ndo tsi Nyoo tan nasamá cuhva iyó ndo. ¹⁴Yahá can tan nyehe tucu maa ndo tundoho jaha nyiví ñuu ndo. Tumaa tsa nyehe nyiví yihí cuenda ra Cristo Jesús ñuu tsa cayucú Judea. Tacan nyehe ñi can tundoho jaha nyiví Israel. ¹⁵Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusyu yuhu Nyoo tahan tsanaha. Ñi Israel can tsinyaqá ndaha ñi tsi ndi. Ñavin cuhva cuñí Nyoo iyó ñi. Tan xaan iñi ñi tsi tandihí maa nyiví. ¹⁶Tatun cuñí ndi cahan ndi tuhun Nyoo tsihin nyiví tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuahá ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahan ra Pablo tyin cuñí ra cunyehe ra nu yucú nyiví Tesalónica inga tsaha

¹⁷Nyooho yañi, tsa yahá tsa quita ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa niñi iñi ndi cuñí ndi cunyehe ndi nu yucú ndo inga tsaha.

¹⁸Tan nducu ndi cuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu cuhva quitsi ndi, maa tyin tandihí ñi tsaha tsa cuñí ndi quitsi ndi, ña tsaha nu ña vaha. ¹⁹Maa tyin ñnáa ndatú ndi? Tan ñyóo cuenda cusíi iñi ndi, tan vaha cuñí ndi? ¿A ñavin tsa cuenda maa ndo cua cusíi xaan iñi ndi nuu Jutu Mañi yo Jesucristo quivi quitsi ra inga tsaha? ²⁰Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tysiñu ndi. Tan sii xaan cuñí ndi tsa cuenda yacan.

3

¹Tan ña cunyeé ca iñi ndi tsa cuñí ndi coto ndi nácaa cuahán tsinú iñi ndo tsi Nyoo. Tan tyaa ndi cuhva tsa ndoo intuhun ñi maa yu ñuu Atenas. ²Tan jaquitsí yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin induc uñi jahá tysiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsí ndi tsi ra nu yucú ndo na jandu iñi ca ra iñi ndo tan cuhva ca ra tunyee iñi tsi ndo na tsinú ca iñi ndo tsi Nyoo. ³Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooho tsitó ndo tyin nyaá tsa nyehe yo tundoho. ⁴Tyin nda ndi yucú ca maa ndi tsihin ndo, tan cahñi ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví. ⁵Ña cunyeé ca iñi yu tsa cuñí yu coto yu nácaa yucú ndo. Yacan cuenda jaquitsí yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhyí yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tysiñu ndi nu yucú ndo.

⁶Maa tyin vityin tsa tsaañnuhu ra Timoteo tsa quitsí ra nu yucú ndo. Tan nacatyí tuhun ra tsihin ndi tyin niñi xaan iñi ndo tsinú iñi ndo tsi Nyoo. Tan cuñí tahan xaan ndo tsi ndo. Tan catyí ra tyin ñuhú xaan iñi ndo tsi ndi tan cuñí xaan ndo nyehe ndo tsi ndi; tumaa tsa cuñí tucu maa ndi nyehe ndi tsi ndo. ⁷Yacan cuenda, nyooho yañi, vasu ndi maa cuaha tsa taahán ndi tan

cuaha tundoho nyehé ndi, maa tyin vaha xaan cuñí ndi tsa tsito ndi tyin nyooho vaha tsinú iñi ndo tsi Nyoo tan ña nacoó ndo tsi ra. ⁸Tyin tumaa tsa ndutsaq ñayivi iyó ndi cuñí ndi tsa tsito ndi tyin nyooho vaha tsinú iñi ndo tsi Nyoo. ⁹Ndi ña ñihí ca ndi cuhva cuhva ndi tyahvi nyoo tsi Nyoo tsa cuenda ndo. Tyin sii xaan cuñí ndi nuu Nyoo tsa cuenda tyin vaha cuahán ndo tsihin ra. ¹⁰Tsicán tahví xaan ndi tsi Nyoo tsinu cahñi tan tsacuaa, tyin cuñí xaan ndi quitsi nyehé ndi tsi ndo. Tacan tan cuvi jandu iñi vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin cuhva tsinú iñi ndo tsi ra.

¹¹Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuvi quitsi ndi nu yucú ndo. ¹²Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandíhi ca nyivi tumaa tsa cuñí maa ndi tsi ndo. ¹³Tyin tacan tan cuñi coo ndo tsihin ra tyin tsa yaha janduvahá ra añima ndo. Tan ña cua coo ca cuatyi ndo nuu Nyoo Jutu yo quívi quitsi Jutu Mañi yo Jesucristo tsihin tandíhi nyivi yihí cuenda ra.

4

Nacaa taahán iñi Nyoo coo yo

¹Vityin nyooho yañi, tsihin sivi ra Jesús caahán ndaahví xaan ndi tsihin ndo tan tsicán ndi tsi ndo tsa ña jandihi ndo tsa iyó ndo tumaa tsa janahá ndi tsi ndo. Jañihí ca ndo nducu ndo cuhva coo vaha ndo nuu Nyoo tumaa taahán iñi maa ra.

²Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasíhi ndo cuví ña, tan ñiñaha na ña coo ñi tsihin rayii tun ñavin yii ñi cuvi ra. ⁴Tan nyooho yañi, intuhun intuhun ndo cuñí tsi coto ndo nácaa coo vaha ndo tsihin ñasíhi ndo. Iñi ñi maa ña cuñí ndo tan jaha ndo tsa ñayivi tsi ña tan ña nducu ndo inga ñaha. ⁵Ña caca caquiñi iñi ndo nyehe ndo tsi ñasíhi ndo, ña javaha ndo tumaa javahá

nyivi ña yihí tuhun Nyoo. ⁶Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasíhi ra naha. Tyin tun javaha ndo tacan, ñihí xaan cua tatsi tuñi Jutu Mañi yo tsi ndo, tumaa tsa cahán ndi tsihin ndo. ⁷Tyin Nyoo cana ra tsi yo tsa coo yo cuhva cuñí maa ra, tan ña javaha yo tsa caquiñi. ⁸Yacan cuenda nyivi ña cuñí tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyi li ra tsi yo. ⁹Maa tyin tuhun tsa cuñí tahan yo tsi yo ña tsiñi ñuhu tsa tyaa yu itsi nu carta ihyá. Tyin tsa janahá maa Nyoo tsi yo nácaa taahán tsi cuñí tahan yo tsi yo. ¹⁰Tan nyooho tsa tsitó maa ndo tuhun can tyin cuñí ndo tsi tandíhi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahví yu tsihin ndo, yañi, tyin na jañihí ca ndo cuñí tahan ndo tsi ndo tsa intuhun intuhun quívi. ¹¹Ndycu ndo cuhva coo taxin ndo. Tan ña tyihi ndo tsi ndo nu ña taahán tsi quíhi ndo. Jaha tyiñu ndo iñi ñi tyiñu maa ndo. Tan jaha tyiñu ndo tsihin ndaha ndo tumaa cahán ndi tsihin ndo quívi can. ¹²Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuvi quívi quitsi Jutu Mañi yo Jesús inga tsaha

¹³Nyooho yañi, cuñí ndi tsa coto ndo nácaa taahán nyivi tsa tsa tsihí, tyin tacan tan ña nducuihyá iñi ndo tumaa cuihyá cuñí nyivi ña cua nandoto tsa ña cua coo tsihin Nyoo. ¹⁴Tumaa tsa tsinú iñi yo tyin tsihí ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihí ñi.

¹⁵Yacan cuenda catyí ndi tsihin ndo tumaa jacuahá Jutu Mañi yo tsi ndi, tyin yoo tsa nyito nda quívi quitsi ra, ña jihna ca yo cua cuhun tan nacoo yo tsi nyivi tsa tsihí. ¹⁶Tyin juvin ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta Nyoo. Tacan tan nyivi tsa tsinú iñi tsi ra Cristo tan tsihí ñi, jihna ca ñi cua nandoto.

¹⁷Yahá can tan yoo tsa ndi nyito cua ndaa yo iñi caa ñi tsihin ñi nu vico, nu cua ñi tahan yo tsihin Jutu Mañi yo. Tacan tan cua

coo cuii yo tsihin ra.¹⁸ Yacan cuenda jandu iin tahan ndo iñi ndo tsihin tuhun ihyá.

5

¹ Nyooho yañi, ña ñiñi cuñi tsi jacoto yu tsi ndo ama cua cuvi tandíhi tsa tsa yaha cahan yu tuhun tsihin ndo. ²Tyin tsa tsító maa ndo tyin ña cua coto yo náa cuhva, náa quiví cua quitsi Jutu Mañi yo. Tyin sana iñi yo cua quitsi ra tumaa sana iñi yo quihví ñasuhu yuvehe yo tsa tsacuaa tacan cua cuvi. ³Tyin quiví tsa catýi nyivi tyin taxin ñi caa, tan nduve maa tsa yuuvhí ñi, tacan tan sana iñi ñi tan cua quitsi tundoho síquí ñi. Tumaa iin ñaha ñuhú sehe, sana iñi ña tan quitsahá cuuhví tsitsi ña. Tan tacan cua tahan nyíví quiví quitsi Jutu Mañi yo, tyin ña cua cuvi ca cunu xeehe ñi. ⁴Maa tyin nyooho yañi, quiví quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihví ñasuhu yuvehe ñi tyin nyooho ñavín ca nu naa iyó ndo. ⁵Tyin tandíhi yo tsító yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo. ⁶Yacan cuenda catsi coo ndo coqonyito ndo tan ña cusu ndo tumaa iyó nyivi ña nacotó tsi Nyoo, tyin ñi icán ña tyaá yahvi ñi tsa cua quitsi Jutu Mañi yo inga tsaha. ⁷Tyin nyivi quixí, quixí ñi tsacuaa, tan nyivi tuhva tsihí nyixi, tsiní ñi tsacuaa. ⁸Maa tyin yoo tsa cuví yo nyivi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiquí nyica ra, tacan taahán tsi jahá yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandíhi nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. ⁹Tyin Nyoo ña nacatsí ra tsi yo tsa tatsí tuñi ra tsi yo, nacatsí ra tsi yo tyin jacacu Jutu Mañi yo Jesucristo tsi yo jahá ra. ¹⁰Tyin ra Jesucristo tsihí ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihí yo, a nyito yo, maa tyin tandíhi yo cua coo yo iin caa ñi tsihin ra. ¹¹Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsahá cuenda ra Pablo tsi nyivi yihí cuenda Nyoo

¹² Nyooho yañi, caahán ndaahvi xaan ndi tsihin ndo, jaña ndo tsa ñayivi tsi ra jahá tysiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin tysiñu Jutu Mañi yo javahá ra naha. ¹³Cuñi tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tysiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tysiñu tsi ndo yañi, jaçahan ndo tsi nyivi ña cuñi jaha tysiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundíhi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Ndycu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandíhi ca nyivi.

¹⁶ Cusíi iñi ndo tandíhi ñi quiví. ¹⁷Tan ña jandíhi ndo tsa tsicán tahvi ndo tsi Nyoo.

¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuví yo nyivi tsinú iñi tsi ra Cristo Jesús.

¹⁹ Ña ndahva ndo ñuhu Tatyi Ii Nyoo tsa iyó añima ndo. ²⁰ Ña vacu nducu ndo tsa caahán ra cuví ndusu yuhu Nyoo. ²¹ Nyehé jihna ndo tun tandíhi tsa caahán ra tan vaha tsi tumaa tsa taahán tsi nyehé ndo tandíhi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiní tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuati ndo quiví quitsi Jutu Mañi yo Jesucristo inga tsaha. ²⁴Ra tsa cana tsi yo, cuví cuita iñi yo tsi ra, tyin maa ra cua javaha tandíhi maa tsa caahán yo ihyá.

Nu ndíhi cahan ra Pablo tan tsahá ra nacumi tsi nyivi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandíhi nyivi yihí cuenda Nyoo.

²⁷ Tavá tyiñu yu tsí ndo tsihin sivi Jutu
Mañi yo na cahvi ndo carta ihya nuu
tandíhi nyivi tsa yiñi cuenda Nyoo.

²⁸Tan maa Jutu Mañi yo Jesucristo nasoco
tsi ndo.

Tan na cuvi tsi tacan ñi.

Carta Tsinú Uvi Tsa Jacuhún Ra Pablo Tsi Nyíví Yihí Cuenda

Nyoo ñuu Tesalónica

Nu tyaa ra Pablo, tan ra cutahán tsihin ra, tsa tsinu uvi carta tsa cuenda nyíví yihí tuhun Nyoo ñuu Tesalónica

¹Yuhu ra Pablo, ra Silvano tan ra Timoteo jaquitsí ndi carta ihyá tsi ndo tsa cuví ndo nyíví yihí cuenda Nyoo ñuu Tesalónica. Tyin iin caa ñii iyó ndo tsihin Nyoo Jutu yo tan Jutu Mañi yo Jesucristo. ²Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahqan ra Pablo nácaa cua tatsi tuñi Nyoo tsi nyíví iyó cuatyi quiví quitsi ra Cristo

³ Nyoho yañi, cuñí tsi tsa naculhva ndi tyahvi nyoo tsi Nyoo tsa cuenda ndo tandihí ñi quiví, tyin tacan taahán maa tsi javahá ndi tyin ñihí xaan cuahán tsinú ñii ndo tsi Nyoo tsa iin iin quiví, tan cuñí xaan ndo tsi nyivi yihí tuhun Nyoo tsihin ndo. ⁴Yacan cuenda sii xaan cuñí ndi caahán ndi tuhun ndo tsihin nyíví yihí cuenda Nyoo inga ca vehe ñuhu. Tyin nyoho cunyee xaan ñii ndo nyicún ndo tsi Nyoo tan vaha xaan tsinú ñii ndo tsi ra vasu ndi maa nyehé xaan ndo tundoho jahá nyíví. ⁵Tandihí yacan janahá tyin Nyoo cuítí xaan jacutuñí ra tyin cua catyi ra tyin taahán maa tsi cuhun nyoho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehe ra tundoho tsi nyíví tsa janyehe xaan tundoho tsi ndo. ⁷Tan nyoho tsa nyehé xaan tundoho jahá nyíví, cua cuhva ra quitatu ndo iin caa ñii tsihin ndi quiví cua quitsi nyico Jutu Mañi yo Jesucristo tsa quee ra andívi tsihin ñuhu tan tsihin ángel tsa iyó tunyee iñi maa ra. ⁸Tyin tatsi tuñi ra tsi nyíví tsa ña nacotó tsi Nyoo, ñii tsa ña tyaá yahvi tuhun tsa jacacú ra tsi yo. ⁹Ñi icán cua janyehe Nyoo tundoho tan ña cua cundihi maa tsa nyehé ñi tundoho, ña cua nyehé ñi tsi Jutu Mañi yo Jesucristo tan ña cua nyehé ñi tsa cahnu cuví ra tsihin tunyee iñi tsa iyó tsi ra ¹⁰ quiví cua quitsi ra. Tyin quiví can nyíví yihí cuenda ra, ñi tsinú ñii

tsi ra, cua jacobnu ñi tsi ra. Tan iyo xaan cua cuñí ñi nyehe ñi tsi ra. Tan tyañu nyíví can, cua cuyucu tucu nyoho tyin tsinú ñi ndo tuhun tsa cahán ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihí ñi quiví, na jatyinyee ra tsi ndo. Tacan tan catyi ra tyin taahán tsi tsi ndo tsa cuví ndo nyíví cana maa ra. Tan tsicán tahvi tucu ndi tsi ra na jatyinyee ra tsi ndo tan cuví javaha ndo tsa vaha tsa cuñí ndo javaha ndo. Tan na quita vaha tandihí tñiñu ra tsa javahá ndo tsihin tunyee iñi tsahá ra tsi ndo tyin tsinú ñii ndo tsi ra. ¹²Tacan tan cua jacobnu nyíví sivi Jutu Mañi yo Jesucristo, tyin nyehé ñi cuhva iyó ndo. Tan cua jacobnu tucu maa ra tsi ndo nuu nyíví tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó añima

¹ Nyoho yañi, vityin cuñí yu cahan yu tsihin ndo tsa cuenda quiví quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo, ² ña numi xaan sama ndo cuhva tsicá ñii ndo. Tan ña nayuhví ndo tatush quita tuhun jaha tatyí ña vaha tyin tsa tahán tsi quiví quitsi Jutu Mañi yo; vasu ndi maa nyíví caahán can, a jaquitsí ñi carta tsi ndo tan catyi ñi tyin yuhu jaquitsí carta can tsi ndo. Ña tsinu ñii ndo tandihí yacan. ³Ndi iin tsaha tan ña cuhva ndo jandavi ñaha nyíví tsi ndo. Tyin tsa ndi cumañi ca tahan tsi quiví quitsi Jutu Mañi yo, cuaha xaan nyíví, xaan cua cuñí ñi nyehe ñi tuhun Nyoo, tan cua quituvi rayíí tsa nduve ley Nyoo iyó añima, ra tsa nyaá maa cuhun anyaya. ⁴Ra icán cuví ra xaan iñi tsi Nyoo. Cua cañi tahan ra tsihin tandihí tsa nyisó sivi Nyoo; tan cua cañi tahan ra tsihin tandihí tsa jacobnu tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jaha ra tyin Nyoo cuví ra.

⁵ ¿A ña nducuhún iñi ndo tyin nda ndi nyíí ca yu tsihin ndo tan cahán yu tuhun ihyá tsihin ndo? ⁶Maa tyin nyoho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra. ⁷Vityin tsa iyó tatyí tsa ña tsahá tyaá yahvi nyíví tsi Nyoo, maa tyin ndi

nyíí xeehe nu, tyin iyó iin ra tsa ña tsahá quituvi nu. Maa tyin quívi cua quita ra tan cundihi tsa tyasí ra, tacan tan cua quituvi nu. ⁸Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesú斯 cua cahñi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahnu cuví ra quívi quitsi ra inga tsaha. ⁹Ra ña vaha can, nu ña vaha cua jaquitsi tsi ra. Tan cua cuhva nu tandíhi tsa nyityi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyívi. ¹⁰Cua cuatyíñu ra tandíhi nuu tsa ña vaha tan tsihin yacan cua jandavi ñaha ra tsi nyívi tsa ña cua cacu. Tyin ñi can ña cuñí ñi naquihin cuenda ñi tuhun Nyoo tsa nditsa tan cacu ñi. ¹¹Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa ña nditsa. ¹²Tacan tan cua tatsi tuñi ra tsi tandíhi ñi tyin ña cuñí ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

Nu cahan ra Pablo tuhun nyivi tsa nacatsi Nyoo tyin cacu ñi

¹³Maa tyin tandíhi quívi cuñí tsi cuhva ndi tyahví nyoo tsi Nyoo tsa cuenda nyoho yañi. Tyin cuñí xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayívi], tyin tsihin tsa janduvahá Tatyi li ra añima ndo tan tsihin tsa tsinu iñi ndo tuhun nditsa cuvi cacu ndo. ¹⁴Yacan cuenda cana Nyoo tsi ndo quívi tsa cahan ndi tuhun ra tsihin ndo tyin tacan tan ñihí ndo tsa cahnu cuví Jutu Mañi yo Jesucristo coo tsi ndo.

¹⁵Yacan cuenda nyoho yañi, jandu iin ndo iñi ndo. Tan ña naa iñi ndo tandíhi tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña naa iñi ndo tandíhi tuhun tsa tyaa ndi nu carta tsa jaquitsi ndi tsi ndo. ¹⁶Jutu Mañi yo Jesucristo tan Nyoo Jutu yo, juvin ra cuñí tsi yo; tan tsahá ra tunyee iñi tsi yo tandíhi tyembu, tan tsahá ra naha tsa cuita iñi yo coo yo tsihin ra. Tandíhi yacan tsahá ra tsi yo quívi tsahá ra tsa vaha tsa iyó tsi ra tsi yo. ¹⁷Na cuhva ra tsa sií cuñí añima ndo. Tan jandu iin ra iñi ndo, tacan tan cua cahan ndo tan javaha ndo tandíhi tsa vaha.

Nu tsicán ra Pablo na ndacan tahvi nyivi tsi Nyoo tsa cuenda ra naha

¹Tan inga tuhun, nyoho yañi, ndacan tahvi ndo tsa cuenda ndi tyin tacan tan numi ñi cua tsaa tuhun Jutu Mañi yo tandíhi ñi ityi. Tan na tyaa yahvi nyívi tuhun ra tan naquihin cuenda ñi itsi tumaa tsa naquihin cuenda maa ndo itsi. ²Ndacan tahvi tucu ndo na jacacu Nyoo tsi ndi ndaha nyívi ña vaha. Tyin ña tandíhi ñi tan tsinu iñi ñi tsi Jutu Mañi yo. ³Maa tyin Jutu Mañi yo javahá ra tsa catyí ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tiñ nu ña vaha tsi ndo. ⁴Tan ndítá xaan iñi ndi tsi Jutu Mañi yo tyin tsitó ndi tyin jatyinyee ra tsi ndo tan javahá ndo tsa catyí ndi tyin javaha ndo. Tan tsitó tucu ndi tyin ña cua jandíhi ndo tsa javaha ndo tacan. ⁵Tan na jatyinyee ca Jutu Mañi yo tsi ndo tan cuñi ca ndo tsi nyívi tumaa tsa cuñí maa Nyoo tsi yo tsihin ñi, tan cunyee ca iñi ndo nyehé ndo tundoho, tumaa tsa cunyee iñi maa ra Cristo nyehé ra tundoho.

Taahán tsi tsa jaha tyiñu yo

⁶Tan vityin nyoho yañi caahán ndi tsihin ndo tsihin siví Jutu Mañi yo Jesucristo, ña cunyaa naa ndo tsi ra yañi yo tsa ña cuñí jaha tyiñu, tan ña cuñí ra coo ra tumaa jacuahá ndi tsi ndo. ⁷Tyin tsitó maa ndo nácaa taahán tsi coo ndo tumaa tsico maa ndi tsa tsiyucu ndi tsihin ndo. Tyin nyuhu ña tsicá nuu utsan ndi tyin jaha tyiñu ndi.

⁸Tan tandíhi tsa tsatsi ndi, maa ñi maa tyahví ndi tsi ndo. Tyin jaha tyiñu ndi tsinu cahñi tan tsacuua tyin ña cuñí ndi tsa coso tundoho can siquí ndi intuhun ndo. ⁹Vasu ndi maa iyó ndatu tsi ndi tsa ndacan ndi tsa jatyinyee ndo tsi ndi, maa tyin nyuhu jaha tyiñu ndi tyin cuñí ndi janaha ndi nácaa taahán tsi coo ndo. ¹⁰Tyin quívi tsiyucu ndi tsihin ndo, cahan ndi tsihin ndo tyin nyívi ña cuñí jaha tyiñu, na ña catsi ñi. ¹¹Caahán ndi yacan tyin ñihí tuhun ndi tyin yiñí ndo tsicá nuu ñi maa ndo tan tyihí ndo tsi ndo nu ña taahán tsi quíhví ndo tan ña jahá tyiñu ndo. ¹²Nyoho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jaha tyiñu ndo, tan coo tsa catsi ndo.

¹³ Nyoho yañi, ña cundihi iñi ndo javaha
ndo tsa vaha. ¹⁴ Tatum iyó iin ra ña cuñí
tyaa yahvi tuhun caahán ndi nu carta ihya,
jaha ndo cuenda ndáa ra cuví ra, tan ña
cunyanaa ndo tsi ra na nducahan nuu ra.
¹⁵ Maa tyin ña cuxaan iñi ndo tsi ra. Cuhva
cuenda ndo tsi ra tyin yañi yo tsi ra.

Nu ndihí cahán ra Pablo

¹⁶ Jutu Mañi yo ra iyó tsa vaha tsi, juvin
ñi maa ra cuhva tsa vaha coo añima ndo
tandihi ñi quivi tan tandihí ñi tsaha vasu
ndi maa nyehé ndo tundoho. Tan Nyoo
ndoo tsihin tandihí ndo. ¹⁷ Yuhu ra Pablo
tyáa yu nacumi tsi ndo nu tutu ihya tsihin
ndaha yu, tan tsihin letra yu. Tyehen tyihí
yu firma yu tandihí carta yu. Tan tyehen
tyáa yu. ¹⁸ Tan na nasoco Jutu Mañi yo
Jesucristo tsi tandihí ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

*Nu tyaq ra Pablo iin carta tsa cuenda ra
Timoteo*

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá ñiyo.
² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinu ñi un tuhun ra Cristo tsa jacotó yu tsi un. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añaima un. Tan na nyehe ndaahvi ra tsi un.

*Nu tsahá cuenda ra Pablo tyin jaha cuenda
yo tsi yo tan ña curyicun yo tsa ña nditsa*

³ Quíví quita yu ñuu Éfeso tan vatsi yu Macedonia nu nyí yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyi yu tsihin un tyin catyi un tsihin ñi na ña jacuaha ñi tsa ña nditsa. Tan vityin juvin ñi tacan caahán nyico yu tsihin un. ⁴Cahan tsihin ñi na ña tyaa ñi ñi cuendu, na ña tyaa ñi ñi tuhun nyivi tsicoq tahan tsanaha. Tyin tun, maa ñi yacan tyaá ñi ñi maa cua cahan yuhu tahan ñi ñi. Tan ña cua jatyinyé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu ñiyo tan cuví quita vaha tsi.

⁵ Tatun javahá yu tsa tava tyiñu Nyoo tsi yo tyin javaha yo, cua cuñi tahan yo tsi yo, tsihin tsa ñii iñi añaima yo tsa janduvahá Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinu ñiyo tsi Nyoo. ⁶Maa tyin yiñi nyivi nacoq ihñi ñi yacan, tan tsinaq ñi jahá tsa caahán yuhu tahan ñi. ⁷Cuñi ñi cuvi ñi maestro cuenda ley tsahnu, maa tyin ndi maa ñi tan ña cutuni ñi ñi tuhun caahán ñi tan ñi xaan ñi ñi jacuahá ñi tuhun can.

⁸Tsitó yo tyin ley can, vaha tsi, maa tyin cuñi tsi cuatiyiu vaha yo itsi tumaa taahán maa tsi. ⁹Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá

tsa ña vaha, ñi ña tyaá soho tsa caahán Nyoo, nyivi iyó cuatiy, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihí nyivi tsahñi nyivi. ¹⁰Iyó ley can tsa cuenda nyivi iyó tsihin rayiñ a ñaha tan ñavin yiñ ña a ñasihí ra cuví. Iyó tsi tsa cuenda ra ndusihí, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vatya, tan iyó tsi tsa cuenda nyivi tsa catyí: "Naha Nyoo", tan ña nditsa tsa caahán ñi. Tan juvin ñi iyó tucu ley can tsa cuenda nyivi caahán ndavaha ñi siquí tuhun Nyoo tsa cutuhvá yo. ¹¹Tuhun Nyoo ihya, iin ñi cuví tsi tsihin tuhun cahnu xaan tsa jacacú ra Jesús tsi yo. Nyoo tava tyiñu ra tsi yu tsa jacuaha yu tuhun ihya tsi nyivi. Tan intuhun ñi maa ra taahán tsi jacahnú yo.

*Tsahá ra Pablo tyahvi nyoo tsi Nyoo tyin
nyehé ndaahvi ra tsi ra*

¹²Tsahá xaan yu tyahvi nyoo tsi Jutu Mañi yo Jesucristo tyin tsahá ra tunyee ñi tsi yu, tan nyehe ra tsi yu tan tsitó ra tyin tsinu vaha ñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra.

¹³Tacan javahá ra tsihin yu, vasu ndi maa nu quitsi tsi quíví, yuhu cahen nyaa xaan yu tsi ra. Tan tsinyaq ñadaha yu tsi nyivi yiñi cuenda ra, tan tsacu ndicu yu tsi ra. Maa tyin Nyoo cundaahví xaan iñi ra nyehé ra tsi yu, tyin quíví can ñaha ca tsinu ñi yu tsi ra, tan ña tsitó yu náa javahá yu. ¹⁴Tacan tsahá Jutu Mañi yo Jesucristo tsa vaha ra tsi yu. Tan tsinu xaan iñi yu tsi ra jahá ra. Tan cuñi xaan yu tsi nyivi tyin iin ñi cuví yo tsihin ra Cristo Jesús.

¹⁵Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsi ra nu ñuhu ñayivi ihya tyin jacacú ra tsi nyivi iyó cuatiy. Tan yuhu cuví iin ra caquiñi ca tan ñavin ca tandihí nyivi. ¹⁶Yacan cuenda, tava Nyoo tsi yu nu caquiñi tan cundahví iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé ñi ra ndatú ra nda cuanda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi ryito tsa ña cua naa maa. ¹⁷Yacan cuenda na jacahnu yo tsi ra yiñi ñadaha tsi yo tandihí ñi quíví, ra nduve tuhun tsihí iyó tsi, ra ña cuví nyehé

yo, ra tsa intuhun ñi maa cuví Nyoo tan tsító ra tandíhi. Na cuvi tsi tacan.

¹⁸ Yooho Timoteo sehe yu, tavá tyiñu yu tsi un, cañi tahan vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsító un tyin vaha cuahán un tsihin Nyoo; tumaa tsahá cuenda ra yañi yo naha ra tsi un quíví cahán ra naha tuhun un jahá Nyoo. ¹⁹ Ña jandíhi un tsa tsinú iñi un tsi Nyoo tan ña jandíhi un tsa javahá un tumaa catyí maa Nyoo tyin javaha un, na-coto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandíhi yacan, yacan cuenda ña tsinú ca iñi ra naha tumaa taahán maa tsi. ²⁰ Tacan javahá ra Himeneo tan ra Alejandro. Yacan cuenda tsahá cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siquí tuhun Nyoo.

2

Nu jacuahá ra Pablo nácaa taahán tsi nda-can tahví yo tsi Nyoo

¹ Tsaahá cuenda yu tsi tandíhi nyivi yihí cuenda Nyoo tyin ñiñi xaan cuñí tsi ndacan tahvi yo tsi Nyoo tsa cuenda tandíhi nyivi. Tan nacuhva yo tyahvi nyoo tsi Nyoo tsa cuenda ñi. ² Na ndacan tahvi yo cuenda ra ndacá ñaha naha ra tan cuenda tandíhi ra cumí tyíñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayívi vaha nuu Nyoo tan nuu nyivi. Tacan tan cuja jaha ñi tsa ñayívi tsi yo. ³ Tyin tacan taahán iñi Nyoo, ra tsa jacacú tsi yo. ⁴ Tyin cuñí ra tsa cacu tandíhi nyivi. Tan cuñí ra tsa coto ñi tuhun nditsa. ⁵ Tyin intuhun ñi maa Nyoo iyó. Tan iyó intuhun ñi ra cuví cahan ndahvi tsa cuenda yo nuu Nyoo. Ra ican cuví ra Cristo Jesús. Tan cuví ra iin nyívi tumaa maa yo. ⁶ Juvín ra Jesucristo tsihí tsa cuenda tandíhi nyivi. Tyahví ra tsa cuenda cuatyí tandíhi yo tyin tacan tan cuvi cacu yo. Tan cundaq can quíví tyaa maa Nyoo cuhva. ⁷ Tsa cuenda yacan, tavá tyiñu Nyoo tsi yu, tyin cahan yu tuhun ra, tan caca yu tyiñu ra, tan jacuahua yu tsi nyívi tsa ñavin nyivi Israel cuví nácaa tsinu iñi ñi tsa nditsa. Tan nyoho tsító ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñí yu tsa ndacan tahvi rayíi naha ra tsi Nyoo tandíhi ñi ityi. Tan coo vaha ra naha nuu ra. Tan cañihi ra naha ndaha ra tan jacobnu ra naha tsi Nyoo tsihin tsa vaha caca iñi ra naha. Tan tsihin tsa ña ñuhú tisihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. ⁹ Tacan tucu ñiñaha. Catsu vaha cunditsi ñi jahma ñi, tumaa taahán maa tsi cunditsi nyivi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. ¹⁰ Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyivi nacuhvá cuenda tsi ñi tsi Nyoo.

¹¹ Tan cunyecu taxin ñi tyaa soho ñi tuhun Nyoo. Tan jaha ñi tsa ñayívi tsi ra tsahá cuenda tuhun Nyoo tsi ñi. ¹² Tyin ña tsahá yu jacuahá ñiñaha nuu nyívi cuaha. Ndi ña tsahá yu tsa cundaca ñaha ñi tsi rayíi. Taxin ñi na cunyecu ñi. ¹³ Tyin jihna ca ra Adán javahá Nyoo, yahá can tan javahá ra tsi ña Eva. ¹⁴ Tan ñavin tsi maa ra Adán jandavi ñaha nu ña vaha, tyin tsi ña Eva ñasihihi ra jandavi ñaha nu tan tsicoo cuatyí ña. ¹⁵ Maa tyin ñiñaha nduve tsa cua tahan ñi tsa cua cacu sehe ñi, tatum jacuahnú vaha ñi tsi sehe ñi, tan tsinú vaha iñi ñi tsi Nyoo tan cuñí ñi tsi ra tan tsi nyívi, tan catsi coo ñi nuu Nyoo tan nuu nyívi.

3

Nacaa taahán tsi coo ra cuví ityi nuu tsihin nyívi vehe ñuhu

¹ Tuhun ihyá tuhun nditsa cuví tsi: Tatun iin ndo cuñí ndo cuvi ndo ityi nuu tsihin nyívi vehe ñuhu, vaha xaan tyiñu cuñí ndo javaha ndo. ² Maa tyin ñiñi cuñí tsi tyin ra cuví ityi nuu tsihin nyívi vehe ñuhu cuñí tsi cuvi ra iin ra catsi iyó tyin tacan tan ña cuví tyaa nyívi cuatyí tsata ra. Tan cuñí tsi tsa coo intuhun ñi ñasihihi ra. Tan cuñí tsi tsa cuvi ra iin ra tsító vaha cuhva coo, iin ra vaha nuu nyívi. Tan cuñí tsi vaha cahan ra tsihin nyívi tsaá yuvehe ra, tan cuví ra iin ra tsító vaha jacuahua tsi nyívi. ³ Lin ra cuví ityi nuu tsihin nyívi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tisihi. Tan ña taahán tsi cuví ra iin ra nducú xuhun tsihin tsa ña taahán

tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuvi ra iin ra ña nyiyo iñi xuhun. ⁴Cuñí tsi tsa cuví ra iin ra yihí ndaha vaha tsi ñasíhi ra tan tsi sehe ra, iin ra ndacá ñaha tsi sehe ra tan tyáa yahvi vaha sehe ra tsi ra, tan jahá ñi tsa ñayivi tsi ra. ⁵Tyin tatum ña tsító ra cundaca ñaha ra nyivi vehe ra, ñácaa cua quíhi ndaha ra nyivi tsicá vehe ñuhu Nyoo? ⁶Tan iin ra ndi tsaa xaan tsihin tuhun Nyoo ña taahán tsi cuvi ra ityi nuu tsihin nyivi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsí tuñi Nyoo tsi nu ña vaha tsa cuenda tsa cahnu xaan jahá nu tsi nu. ⁷Tan cuñí tucu tsi tsa cuví ra iin nyivi vaha nuu nyivi tsa ña yihí tuhun Nyoo, tyin tacan tan ña ñihi ñi náa cuatyí tyaa ñi tsata ra tan ña cuvi jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸Tan tacan tucu ra jahá tyiñu vehe ñuhu náha ra. Na catsi coo ra náha. Na ña cumañi ra náha tsihin tuhun caahán ra náha, tan ña cuvi ra náha ra tuhvá tsihí nyixi. Tan ndi ña nyiyo iñi ra náha jaha canaa ra náha xuhun tsihin tsa ña taahán tsi. ⁹Cuñí tsi tsa cutuñi vaha iñi ra náha nácaa taahán tsi tsinu iñi yo tsi Nyoo tan coto vaha ra náha tyin vaha caahán ra náha tsihin Nyoo. ¹⁰Tan cuñí tucu tsi tsa nyehe jihna yo tatum vaha caahán ra náha tsihin Nyoo, tacan tan cuví jaha tyiñi ra náha vehe ñuhu. ¹¹Tan tacan tucu ñiñaha, cuñí tsi cuví ñi nyivi vaha nuu nyivi. Ña cahan ñi cuendu. Catsi coo ñi. Tan tyaa nuu vaha ñi tandíhi tyiñu. ¹²Ra jahá tyiñu vehe ñuhu na coo intuhun ñi ñasíhi ra. Tan cuñí tsi tsa coto vaha ra cundaca ñaha ra tsi sehe ra tan nyivi vehe ra. ¹³Tyin ra jahá tyiñu vehe ñuhu, tan vaha tyanuu ra tyiñu tsa nyisó ra, caahán ca ratiyu nuu tsihin Nyoo. Tan tsihin tsa iñi iñi ra caahán ra tuhun Nyoo tyin tsinú vaha iñi ra tsi ra Cristo Jesús.

Nu caahán ra Pablo siquí tuhun xeehe cuhva tsinú iñi yo

¹⁴⁻¹⁵Vasiquí numi ñi cua quitsi nyehe yu nu nyí un. Maa tyin tun ña cuvi quitsi yu tsa numi ñi, yoñi jaha, vaha tyin tsa tyáa yu tuhun ihyá tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñí tsi tsa jañihi ca yo janaha yo tuhun

Nyoo tsi nyivi. Tan naquihin vaha yo tyin tuhun nditsa cuví tsi. ¹⁶Tsa nditsa tyin yaha xaan cahnu cuví tuhun xeehe tsa jaquituví Nyoo, tyin coo yo tumaa iyó maa ra: Nyoo nanduví ra rayíi tan tsicoo ra, tsicoo cuñú ñuhu ra tumaa tsa iyó cuñú ñuhu maa yo.

Tan catyí Tatyí li Nyoo tyin ra nduve cuatyí cuví ra.

Tan nyehe ra cuví ángel náha ra tsi ra. Tanií cahnu nu ñuhu ñayivi caahán nyivi tuhun ra.

Tan tsinú iñi nyivi tsi ra tanii cahnu nu ñuhu ñayivi.

Tan cuanuhu ra nda gloria.

4

Nu catyí ra Pablo tyin nu cuahán ca tsi quivi yihí nyivi ña cua tsinu ca iñi ñi tsi ra Cristo

¹Maa tyin caahán catsi Tatyí li tan catyí ra tyin nu cua ndihi tyembu yihí nyivi ña cua tsinu ca iñi ñi tsi ra Cristo, tyin cua tyaa soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha. ²Cua tyaa soho ñi tuhun caahán nyivi jandaví ñaha. Tan ñi can ña tuyí iñi ñi náa javahá ñi tyin tsa ndundava xaan añima ñi. Tumaa tsa cayu añima ñi jahá iñi caa ihñi tan ndundava tsi. ³Cua casí ñi nu tindaha nyivi. Tan cua catyí ñi tyin ña vaha catsi yo juhva nuu nyayu. Vasu tsító yo tyin tandíhi nuu tsa tsatsí yo, Nyoo javahá itsi. Tan tandíhi yoo tsa tsinú iñi tsi ra tan tsító yo tsa nditsa, tsatsí yo can tan tsahá yo tyahvi nyoo tsi ra. ⁴Tyin tandíhi tsa javahá Nyoo tan vaha tsi. Tan ña taahán tsi catyí yo tyin ña vaha tsi. Tan cuví catsi yo tandíhi tsi tun tsahá yo tyahvi nyoo tsi Nyoo tsa cuenda tsi. ⁵Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesu-cristo

⁶Tatun jacuahá un tandíhi tsa caahán yu ihyá tsi tandíhi nyivi yihí tuhun Nyoo tsihin yo, cua cuvi un iin musu vaha ra Cristo Jesús. Tan tuhun tsa tsinú iñi yo, tsihin tandíhi tuhun ra Cristo tsa nyicún yo, cua jatyinyee tsi tsi un tan cuahnu ca un tsihin tuhun Nyoo. ⁷Maa tyin ña tyaa yahvi un tsa cuví xembulu, tuhun sana, tan tuhun

tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo. ⁸ Tsa jañiñi yo coo tunyee iñi cuñu ñuhu yo, juhva ñi jatyinyéé tsi tsi yo. Maa tyin tsa jañiñi yo javahá yo tandíhi cuhva cuñi Nyoo, jatyinyéé tsi tsi yo iin cahnu ñi, tyin jatyinyéé tsi tsi yo nu ñuhu ñayivi ihyá. Tan jatyinyéé tucu tsi tsi yo tsaa coo vaha yo nu cua tsaa yo nda gloria. ⁹ Tan nditsa, tyin tsa nditsa cuví tsi tan tandíhi yo taahán tsi tsa tsinú iñi yo itsi. ¹⁰ Tan juvin ñi tsa cuenda yacan jahá tysiño yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandíhi nyivi, tan jihna ca yoo tsa tsinú iñi yo tsi ra jacacú ra.

¹¹ Tuhun ihyá jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi. ¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tuyuva xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñi un tsi Nyoo tan tsi nyivi, tsihin cuhva tsicá iñi un, tsihin cuhva tsinú iñi un, tan tsihin cuhva javahá un maa ñi maa tsa vaha. ¹³ Tan tsitsi tsa ndi cumañi ca tsaa yu nu nyivi un, cahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo. ¹⁴ Jaha cuenda vaha tunyee iñi tsa tsahá Nyoo tsi un quívi tyiso ndaha ra nyisó tysiño vehe ñuhu naha ra jiñi un tan cahen ra naha tsa tsaha cuenda Nyoo tsi ra naha. ¹⁵ Tyaa vaha iñi tuhun can tan javaha cuhva catyi tsi. Tacan tan cua nyehe tandíhi nyivi nácaa cuahán un ityi nuu ca tsihin Nyoo. ¹⁶ Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatun javahá un tacan, cua cacu un, tan cua cacu tucu nyivi tyáa soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Na cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. ² Tan ñi

tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi ñi tumaa tsa cuhva un cuví tsi ñi. Javaha tandíhi tsa caahán yu ihyá tsihin tsa vaha tsicá iñi un.

³ Jatyinyee tsi ñiñaha ndaahvi tsa tsihí yíi tatushun nduve nyivi ñi cuví jatyinyee tsi ñi. ⁴ Maa tyin tatushun iyó iin ñaha tsihí yíi tan iyó sehe ña, a sehe yañi ña, cuñi tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihi ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. ⁵ Tan ñaha tsa tsihí yíi tan ndog ndaahvi intuhun ña maa ña, iin ña Nyoo tyáa iñi ña tan tsicán tahvi ña tsi ra tsinu cahñi tan tsacuaa. ⁶ Maa tyin ñaha tsihí yíi tsa cusii iñi tsihin tsa iyó nu ñuhu ñayivi ihyá, vasu nyito ña maa tyin tsihí ña cuenda Nyoo. ⁷ Jacoto tucu tuhun ihyá tsi ñi cuhva yo tyin tacan tan ña ñihi nyivi cuhva cahan ñi ndavaha ñi tsi ñi. ⁸ Maa tyin tatushun yihí yo iyó nyivi yo tan ña tsicá iñi yo jatyinyee yo tsi ñi, ña vaha tacan. Tyin tatushun ña jatyinyéé yo tsi nyivi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyivi tsa ña tsinú iñi tsi Nyoo.

⁹ Nu tutu tsa nyaá sivi ñi tsihí yíi, na cunyaa sivi ñi tsahnu tsa iyó ndaahvi, tatushun tsa yahá uñi xico cuiya ñi, tan intuhun ñi yíi ñi tsicoo. ¹⁰ Tan tatushun tsitó vaha nyivi tsi ñi tsa cuenda tsa vaha tsa javahá ñi; tan jacuahnu vaha ñi sehe ñi, tan tsahá ñi tsa catsi nyivi tsaa yuvehe ñi, tan jahá tysiño ñi tysiño nyivi yihí cuenda Nyoo tsihin tsa ñiñi iñi añima ñi, tan jatyinyee ñi tsi nyivi nyehé tundoho. Tun tacan javahá ñi tandíhi tsa vaha, cuví cunyaa sivi ñi.

¹¹ Maa tyin ña tyaa ndo sivi ñiñaha tsa ñaha ca quita uñi xico cuiya, coto coo quívi tan cuñi ñi coo nyico yíi ñi tan cuñi ñi tindaha ñi inga tsaha tan jandíhi ñi tsa jahá tysiño ñi tysiño ra Cristo. ¹² Tan coo cuatyí ñi tyn ña javahá ñi cuhva cahan ñi tsa cua javaha ñi. ¹³ Tan inga tucu tysiño tatushun tsicá nuu jutsan ñi maa ñi tan iin tan iin vehe nyivi quíhví ñi. Tan ñavin yacan ñi maa tyin tsicá nuu tucu ñi caahán ñi cuenda. Tan tysiño ñi tsi ñi nu ña taahán tsi quíhví ñi, tan caahán ñi tsa ña taahán tsi cahan ñi. ¹⁴ Vaha taxin ca na tindaha ñi inga tsaha. Na

coo sehe ñii. Na jaha cuenda vaha ñi vehe ñii. Tan ña cuhva ñi cahan nyaa nyiví xaan iñi tsi yo tsi yo.¹⁵ Caahán yu tandíhi tuhun ihya tsihin un tyin yiñí ñi tsa nacoq ñi tsi Nyoo tan nyicún ñi tsi nu ña vaha.¹⁶ Tatun ñi yiñí cuenda Nyoo tan iyó iin nyiví ñi tsa tsihí yii, cuñí tsi tsa jatinyee maa ñi tsi ñi can, tan ña tyiso ñi itsi siquí vehe ñuhu. Tyin tacan tan cuví jatinyee vehe ñuhu tsi inga ñi tsihí yii tsa nduve ca maa nyiví iyó.

¹⁷ Ra tsahnú ra nyisó tyiñu vehe ñuhu, cuñí tsi tsa jaha xaan nyiví vehe ñuhu tsa ñayiví tsi ra, tan tsa jihna ñi na jaha ñi tsa ñayiví tsi ra caahán tuhun Nyoo tan jacuahá ra naha tsi ñi.¹⁸ Tyin tuhun Nyoo catyí tsi tyehen: “Ña tyiñí un yoho yuhu indíqui ni jahá tyiñu tì, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

¹⁹ Tatun tyáá nyiví cuatyí tsi iin ra tsahnú tan ña quita uvi a uñi taahan tsandaa, ña tyaa yahvi un tsa caahán ñi. ²⁰ Maa tyin nyiví tsa jañihí ca javahá tsa ña vaha, cuñí tsi tsa cahan ndo tsihin ñi nuu tandíhi nyiví yucú vehe ñuhu. Tacan tan nayuhvi tandíhi ca ñi tan ña javaha ñi tsa ña vaha.²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsi ra. Tan caahán yu tsihin un tyaa yahvi tsa caahán yu ihya, induc ñi cuñí un nyehe un tsi tandíhi nyiví.²² Ña numi xaan cuhva un tyiñu tsi iin ra cuví ra ityí nuu tsihin nyiví vehe ñuhu. Coto cuhun cuatyí javaha ra siquí un. Jaha cuenda vaha tsi un tsihin tandíhi tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutya, cohó luxu vinu na nduvaha tsitsi un.

²⁴ Yihí nyiví quituví cuatyí ñi tsa ndi cumañi cutuñi ñi. Tan yihí ñi quituví cuatyí ñi tsa yaha cutuñi ñi.²⁵ Tan tacan tucu tatuń javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6

¹ Nyiví yiñí cuenda Nyoo tsa cuví musu, cuñí tsi tyaa yahvi vaha ñi tsi tsitoho ñi. Tyin tacan tan ña ñihí nyiví cuhva cahan ñi ndavaha ñi siquí Nyoo, tan siqui tuhun ra tsa jacuahá yo.² Tan tatuń iin musu tan yiñí tsitoho ra cuenda Nyoo, taahán tsi tsa jaha

ra tsa ñayiví tsi ra ican tyin yañi ra cuenda Nyoo cuví tsi ra. Cuñí tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñí ra tsi ra ican. Jacuahá yacan tsi nyiví yiñí cuenda Nyoo tan cuhva cuenda tsi ñi na jayahá ñi cuhva catyí tsi.

Cuhva iyó yo tsihin Nyoo tan na cusíi iñi yo tsihin tsa tsahá ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo,⁴ cuví ra iin ra nduyaá ñi maa, iin ra ña tsitó. Tan tsa caahán yuhu ra siquí iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tisihí tan nyiyo iñi nyiví tsa iyó tsi inga ñi, tan tsa caahán nyaa tahan ñi tsi ñi, tacan tan ndasí cuñí nyiví nyehe tahan ñi tsi ñi.

⁵ Tan maa ñi cañí tahan nyiví jahá can tyin quiñi tsicá iñi ñi, tyin ña tsitó ñi tsa vaha. Cuñí maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. ⁶ Nditsa tyin tsa javahá yo cuhva catyí Nyoo tan sii cuñí yo tsihin tsa tsahá ra tsi yo, cuví tsi tumaa iin tsa cuca iyó tsi yo.⁷ Tyin nduve náa tsaaq tsihin yo quiñi cacú yo nu ñuhu ñayiví ihya. Tan nduve náa cuhun tsihin yo quiñi cíu yo.⁸ Maa tyin tatuń iyó tsa catsi yo tan iyó jahma cunditsí yo, na cusíi iñi yo, tan na ndoo yo vaha tsihin yacan.⁹ Maa tyin nyivi cuñí nducuca, nducú cuhva nu ña vaha tsi ñi. Tan nacavá ñi tsitsi xayí nu. Jandusohó nu tsi ñi tsihin tsa cuñí ñi coo cuaha tsa coo tsi ñi. Tan jatíví can tsi ñi. Tan nu ndíhi tuhun cua tíví ndíhi ñi tan cua cuhun ñi anyaya.¹⁰ Tyin tsa cuñí xaan yo xuhun, yacan cuví yoho tandíhi ca nuu tsa ña vaha. Tan yihí nyiví tsa cuenda tsa cuñí xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañí tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yoho cuví un iin rayíi cuenda Nyoo. Quita tsiyo nuu tandíhi tsa caquiñi. Coo cuítí vaha nuu Nyoo. Cuyanicum tsi Nyoo tsihin tsa nii iñi un. Cuñí tsi nyivi. Cunyee iñi tsihin tsa vita iñi un nyehe un tandíhi tsa cua tahan un. Tan ña cahnu

jaha un tsi un. ¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsahá Nyoo tsi yo. Tyin tsa cuenda can, cana Nyoo tsi un, tan tacan catyí un quivi cahán catsi un nuu tandihí ra cuví tsanda naha ra, catyí un tyin tsinú iñi un tsi Nyoo. ¹³ Tan vityin nuu Nyoo, ra tsa tsahá ñayivi coo tandihí tsa iyó, tan nuu ra Cristo Jesús ra tsa tsahá cuenda vaha tuhun nditsa nuu ra Poncio Pilato, caahán yu tsihin un, ¹⁴ jayavaha tandihí tsa catyí yu tsihin un tyin javaha un tyin tacan tan ña cuví cahán nyaa nyivi tsi un nda tahan tsi quivi quitsi Jutu Mañi yo Jesucristo. ¹⁵ Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacaahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihí ca ra cuví rey. Tan ra ndacá ñaha cahnu cuví ra nuu tandihí ca ra ndacá ñaha. ¹⁶ Intuhun ñi maa ra cuví ra tsa nduve tuhun tsihí iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacaahnú yo tsi maa ra. Tan na cundaca ñaha ra tsi yo tandihí tyembu. Tan na ña cundihí maa tsa ndacá ñaha ra tsi yo. Na cuvi tsi tacan. ¹⁷ Tan cahán tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihí can. Na cuita iñi ñi tsi Nyoo nyito, tyin maa ra cuví ra tsahá tandihí tsi yo. Tan cuví cusii iñi yo tsihin tsi. ¹⁸ Cahan tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa nii iñi ñi tan ñavin tsihin tsa cuihyá cuñí ñi. ¹⁹ Tacan tan coo tsa cuca tsa ña cuanaa maa tsi ñi, tan jatyinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yoho Timoteo, *jaha* cuenda vaha tysi tsa tsahá Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa.

²¹ Tyin tsa cuenda yacan, *yihí* nyivi tsa na-coo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsahá ra tsi un.
Tan na cuvi tsi tacan ñi.

Carta Tsinu Uvi Tsa Jacuhún Ra Pablo Tsi Ra Timoteo

Nu tyaa ra Pablo inga carta tsa cuenda ra Timoteo

¹Yuhu ra Pablo cuví yu iin ra tavá tyiñu ra Jesucristo, tyin tacan cuñí maa Nyoo. Tyin cuñí ra tsa jacoto yu tsi nyivi tyin tsahá ra ñayivi nyito coo tandihí ñi tsa iin ñi cuví tsihin ra Cristo Jesús. ²Jaquitsí yu carta ihyá tsi yooho Timoteo. Tan cuñí xaan yu tsi un tyin tumaa cuví sehe yu cuví tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na catyi tuhun ra tsihin nyivi tyin cuenda ra Cristo yihi ra

³Tandihí ñi quivi nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsii tsaañmu yu tyiñu Nyoo tsanaha. Tan vaha cuñí añima yu tyin vaha iyó yu nuu ra. ⁴Nducehún xaan iñi yu nácaa tsacu un quivi quita yu nu nyíi un. Tan vityin cuñí xaan yu nyehe yu tsi un inga tsaha tan cusíi iñi yu. ⁵Tan nducuhún xaan iñi yu tyin tsinú nii vaha iñi un tsi Nyoo. Tumaa tsa tsinu iñi ña Loida tsitan un tan ña Eunice sibi un. Ñi ican vaha xaan tsinu iñi ñi tsi Nyoo, tan tsító yu tyin tacan tsinú iñi maa un tsi Nyoo vityin.

⁶Yacan cuenda tsahá cuenda yu tsi un jandu iin ca iñi un tan cuatyinu ndatu tsa tsahá Nyoo tsi un tsa cahan un tuhun ra. Yacan cuví ndatu tsa tsahá ra tsi un quivi tyiso ndaha yu jiñi un. ⁷Nyoo ña tsahá ra tatyi ña vaha tsa jayuhvi tsi yo. Tsahá ra Tatyi li ra tsi yo tyin coo tunyee iñi cahnu tsi yo, tan cuñí tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yu tsi yo. ⁸Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyíi yu vehe caa tsa cuenda ra. Cuatyinu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsí siquí yu tsa cuenda tuhun Nyoo. ⁹Tyin juvin ra

jacacu tsi yo. Tan cana ra tsi yo tyin coo yo ñayivi ii. Ñavin tsa cuenda tsa vaha tsa javahá yo tan cana ra tsi yo. Cana ra tsi yo tyin tacan tyaa maa ra cuhva javaha ra nda ndi cumañi ca tsinu ñuhu ñayivi. Tyin nda quivi can tyaa ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰Tan vityin tsító yu tsa vaha can tyin tsa quitsi ra Jesucristo jacacu ra tsi yo. Tan quihin nyaa ra tandihí tunyee iñi tuhun tsiihí. Cahan ra tuhun vaha, tan tava nditsin ra tuhun tsa coo yo ñayivi nyito tsa ña cua naa maa.

¹¹Nyoo tavá tyiñu ra tsi yu tsa cahan yu tuhun can tsihin nyivi. Tavá tyiñu ra tsi yu tsa caca yu tyiñu ra, tan jacuahua yu tuhun can tsi nyivi tsa ñavin nyivi Israel cuví. ¹²Yacan cuenda nyehé yu tandihí tundoho. Maa tyin ña nducahán nuu yu tsa tacan nyehé yu tundoho, tyin tsító yu yóo tsinú iñi yu. Tyin nacuhvá cuenda yu tsi yu tsi ra, tan tsító vaha yu tyin cuví jaha cuenda ra tsi yu nda cuanda quivi quitsi ra inga tsaha.

¹³Cuanyicun tuhun vaha tsa tsahá cuenda yu tsi un. Tan coo tsihin tsa tsinú vaha iñi un tsi Nyoo. Cuñi tsi ra, tan tsi nyivi. Tyin tacan taahán tsi coo yoo tsa iyó iin caa ñi tsihin ra Cristo Jesús. ¹⁴Tan na jatyinyee maa Tatyi li tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

¹⁵Tsa tsító un tyin nacoq ihñi ra Figelo tan ra Hermogenes tsi yu tan tandihí ca maa ra iyó ityi Asia. ¹⁶Maa tyin ra Onesíforo na cundaahvi iñi Jutu Mañi yo tsi ra tan tsi nyivi ra tyin cuaha xaan tsaha quitsi ra jatyinyee ra tsi yu. Tan ña cahán nuu ra tsa tyehen nyíi yu vehe caa. ¹⁷Tan quivi tsinyíi ra ñuu Roma ihyá, ña jandihí maa ra tsa nanducú ra tsi yu nda cuanda tsa nañihí ra tsi yu. ¹⁸Maa Jutu Mañi yo na cundaahvi iñi ra nyehe ra tsi ra quivi cua jacutuñi ra tsi yo. Tsító maa un nácaa jatyinyee xaan ra Onesíforo tsi yo quivi tsiyucu yu ñuu Éfeso.

2

lin andaru vaha ra Jesucristo

¹Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuví yu tsihin ra. ²Tuhun tsa tsinu un cahan yu nuu nyíi cuaha, jacuahua yacan tsi nyivi tsa ñi iñi

tsinú iñi tsi Nyoo, ñi tsa cuví jacuaha tsi inga nyivi.

³Tan cunyee iñi nyehe tundoho tumaa iin andaru vaha ra Jesucristo. ⁴Ndi intuhun ra cuví andaru tan ña cuví jatyañu xaan ra tsi ra tsihin inga ca tyiñu. Tyin cuñi tsi tsa javaha ra maa ñi maa tsa caahán ra cuví ityi nuu tsihin ra. ⁵Tan tacan tucu ra jasiquí tsihin balón, ña cuví jaha canaa ra tatuñ ña cunyee iñi ra jasiquí ra tumaa taahán maa tsi. ⁶Ilin ra jahá tyiñu tsitsi cuhu, taahán tsi tsa jaha tyiñu jihna ra, tacan tan cuvi catsi jihna ca maa ra tsa quitá nu jahá tyiñu ra. ⁷Tyihu tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandihi tsi.

⁸Nduceuhun iñi tsi ra Jesucristo, ra tsa nandoto tsa yaha nyehe ra tundoho tan tsihí ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsahá cuenda ra tsi yu tyin cahan yu tsihin nyivi. ⁹Tan tsa cuenda tuhun can cunyeé iñi yu nyehé yu tandihi tundoho nda cuanda nuuhñi yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhñi tsi. ¹⁰Yacan cuenda cunyéé iñi yu nyehé yu tandihi tundoho tsa cuenda tsa vaha tsi tandihi ca nyivi tsa nacatsi maa Nyoo, tyin tacan tan cua cacu ñi iin cua ñi tsihin yo tsa cuenda ra Cristo tan cua ñihi yo nu sií caá tsa ña cua ndihi maa coo yo. ¹¹Tuhun ihya tuhun nditsa cuví tsi tan cua cundaa tsi: Tatan tsihí yo cuenda cuñu ñuhu yo, coo nyito tucu yo tsihin ra.

¹²Tatan nyehé yo tundoho tsa cuenda ra, cua cundaca ñaha ndihi yo tsihin ra. Tatan catyí yo tyin ñavin cuenda ra yiñi yo, cua catyí tucu maa ra tyin ñavin nyivi yiñi cuenda ra cuví yo.

¹³Tatan jandihi yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatan jahá tyiñu vaha yo, cua quita vaha yo

¹⁴Janducuhun iñi tuhun ihya tsi ra jacuaha tuhun Nyoo, tan catyí tsihin ra naha nuu Jutu Mañi yo, na jandihi ra naha tsa caahán yuhu tahan xaan ra naha tsihin

tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan jativí ra naha tsi nyivi tyá soho tsa caahán ra naha.

¹⁵Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatuñ tsatyinú vaha un tuhun nditsa cuhva taahán maa tsi, ña cua nducahan nuu un.

¹⁶⁻¹⁷Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyivi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahan ra Himeneo tan ra Fileto, ¹⁸Tyin quita tsyo ra naha ityi vaha tan catyí ra naha tyin tsa yaha nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyivi tsa tsinu iñi tsi Nyoo. ¹⁹Vasu yiñi juhva ñi tacan quita tsyo ñi, maa tyin Nyoo tsaqiñ ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyivi yiñi cuenda ra tsa nditsa.” Tan catyí tucu tsi: “Tandihi ñi nyisó sivi ra Cristo na quita ñi nu iyó tsa ña vaha.”

²⁰Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyinú nyivi. Tyin tsatyinú tucu ñi tsa tsinu tsihin vitu tan tsihin ñuhu quisí. Yiñi can tsatyinú ñi can cuenda tyiñu nahnu, tan yiñi can ndáa tahan ñi maa tsi tsatyinú ñi can. ²¹Tacan tucu maa yo tatuñ jahá vaha yo cuenda tsi yo, cuví yo iin nyivi tsa tsatyinú Nyoo. Tan cuví yo tumaa iin vasu xuhun cuaan tsa ndoo vaha, tacan tan cuví cuatyinú ra tsi yo tsa cuenda tandihi tyiñu vaha.

²²Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyivi. Coo vaha tsihin tandihi nyivi yiñi cuenda Nyoo, tandihi ñi tsa tsicán tahvi tsi Jutu Mañi yo, ñi iyó añima vaha. ²³Tan ña tyaa soho un tsa nduve yahvi nyaá tsa caahán yuhu tahan nyivi. Tyin tsitó un tyin tsihin yacan nducuaha ca tisíhi. ²⁴Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyivi cuvi ra tsihin tandihi nyivi. Tan cuñi tsi tsa ñihi vaha ra cuhva jacuaha ra tuhun Nyoo tsi

nyiví. Tan cuñí tucu tsi tsa cunyee iñi ra tisihi tsahá nyiví. ²⁵ Tan tsihin tsa vita iñi ra cuñí tsi janaha vaha ra cuhva coo nyiví ndava iñi. Tan cuatu ra tatum ndu uvi iñi ñi tan coto ñi tsa nditsa. ²⁶ Tacan tan cua cutuñi iñi ñi tan quita ñi tsitsi xayí nu ñava tyin tsa vityin jayahá maa nu cuhva cuñí nu tsihin ñi.

3

Nacaa cua coo nyiví nu cua ndihí quivi

¹ Tan cuñí tucu tsi coto un tyin nu cua ndihí tyembu cua coo quivi tsa yíi xaan cua coo yo. ²Tyin cua coo nyiví nyivo iñi, maa ñi tsa tsii maa ñi cua cuñí ñi coo. Tan cua cuñí xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihí ñi. Ña cua nacuhva ñi tyahvi nyoo tsi Nyoo, tan ndi tsi nyiví ñi. Ña cua tyaa yahvi ñi tsi Nyoo. ³Ña cua cuñí ñi tsi nyiví ñi. Ña cua cuhva maa ñi coo taxin nyiví. Cua cahan ñi cuendu. Ña cua cuvi cundaca ñaha ñi cuñú ñuhu ñi. Xaan xaan ñi cua cuvi. Tan ña cua cuñí ñi nyehé ñi tsa vaha. ⁴Cua xico ñi tsi nyiví ñi. Tan cua cana iñi ñi jayahá ñi náa ndihí tsa cuñí maa ñi. Tan cahnu cua jaha ñi tsi ñi. Tan maa ñi maa tsa cuñí maa ñi cua nanducu ñi, tan ña cua nanducu ñi tsi Nyoo. ⁵Cua cunyicun ñi tsi Nyoo tumaa tsa tsinú iñi ñi cua jaha ñi tsi ñi, maa tyin ña nditsa. Tyin tyasí ñi nu janahá Nyoo tunyee iñi ra tyin ña tsinú iñi ñi tsi ra.

Ña cutahan un tsihin nyiví jayahá tacan. ⁶Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiiñi tuñi jiñi ñi. Tan cuaha cuatyí ñi can iyó, tan cuaha tsa ñia vaha cuví ñi. ⁷Cuahán ñi cua tyaa soho ñi tuhun tsaa, maa tyin ña cuví maa cutuñi iñi ñi tsa cuví tsa nditsa. ⁸Tan nyiví cua coo, cua cuvi ñi tumaa ra Janes tan ra Jambres, ra tasi tsa tsicoo tsanaha nahá ra. Tyin cuñí ra nahá jaha canaa ra nahá tsi ra Moisés. Tan tacan tucu nyiví cua coo nu cuahán ca tsi ityi nuu. Cua cahan ñi ndavaha ñi siquí tuhun Nyoo. Quiñí xaan cua caca iñi ñi. Tan ña cua quita vaha ñi tsihin cuhva tsinú iñi ñi. ⁹Maa tyin tsa cua janahá ñi, ña cua cuvi inducuaha can tyin ña xeehe caa tyin iin tsa nduve yahvi nyaá cua cuvi can, tumaa tsa jayahá tucu ra Janes tan ra Jambres.

Nu ndihí tava tyiñu ra Pablo tsi ra Timoteo

¹⁰Maa tyin yooho tsitó vaha un tyin yuhu ñavín tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenda iyó yu tacan, tan nácaa tsinú iñi yu tsi Nyoo. Tan tsitó tucu un nácaa cunyéé iñi yu tsa cuxaán nyiví tsi yu, tan nácaa cuñí yu tsi ñi. ¹¹Tan tsitó un nácaa cunyéé iñi yu nyehé yu tundoho tsa tsinyaq ndaha nyiví tsi yu. Tsitó un tsa tahan yu, tandihí tundoho tsa nyehé yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacu ra tsi yu tsitsi tandihí tundoho can. ¹²Tsa nditsa tyin tandihí yoo tsa cuñí coo cuhva cuñí ra Cristo Jesús cua janyehé nyiví tundoho tsi yo. ¹³Maa tyin nyiví caquñí tan nyiví jandaví ñaha, quiñí xaan ca cua coo ñi. Tyin cua jandaví ñaha ñi tsi nyiví tan cua jandaví ñaha tucu maa nyiví tsi ñi.

¹⁴Maa tyin yooho jañiñi tsi un tan coo un tsihin tsa cutuhvá un. Tyin tsitó un yóo jacuaha tsi un tan tsitó un tyin tsa nditsa cuví tsa cutuhvá un. ¹⁵Nda ndi luhlu un tan tsitó un tuhun nyaá nu tutu Nyoo. Tan yacan cuví tsa tsahá tsa cutuñi iñi un tan cacu un tsa cuenda tsa tsinú iñi un tsi ra Cristo Jesús. ¹⁶Tandihí tuhun tsa nyaá nuu tutu Nyoo, maa Nyoo tsaha tsi. Tan jatyinyéé xaan tsi tsi yo tsa nacoto yo nácaa taahán tsi tsinú iñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. ¹⁷Tacan jatyinyéé tuhun Nyoo tsi yo tyin tacan tan ña cumañi tsa cumañi tsi yo tan cuvi yo iin ra cuiti yihí cuenda Nyoo tan jayahá yo tandihí tsa vaha.

4

¹Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua jandaa cuatyí nyiví nyito tan nyiví tsihí quivi cua quitsi ra cundaca ñaha ra tsihin tunyee iñi tsa iyó tsi ra. ²Cahan tuhun Nyoo tsihin nyiví. Tan ña jandihí un tsa jañiñi un jayahá un tacan. Cahan tuhun Nyoo tsihin ñi tatus tsahá tsi cuhva tan vasu ña tsahá tsi cuhva. Cuhva cuenda tsi ñi, cahan tsihin ñi tatus ña vaha jayahá ñi, tyin tacan tan cunyicun vaha ñi tsi ra Cristo. Tan cunyee iñi cuatu nda nasama ñi cuhva iyó ñi. Tan jacuaha tsi ñi nácaa taahán tsi coo

ñi. ³Tyin coo quivi ña cua cunyee ca iñi nyiví tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán iñi maa ñi tyaa soho ñi. ⁴Tan cua tyaa tsiyo ñi tsa nditsa. Tan cua tyaa soho ñi tsa ña nditsa. ⁵Maa tyin yooho jaha cuenda tsi un tsihin tsa vaha tsicá iñi un. Cunyee iñi nyehe tundoho. Cahan tuhun Nyoo tsihin nyiví. Vaha javaha un tyiñu tsa tsahá Nyoo tsi un.

⁶Yuhu tsa yatinyin cua nacuhva cuenda yu ñayiví iyó yu tsa cuenda tuhun Nyoo, tyin tsa cuyatinyin ciú yu. ⁷Tsa yaha cañí tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iñi ra tsinú suuhva, tun tsa tsaq ra nu taahán tsi cucuiñi ra. Tan tacan ñi maa tsinú iñi yu tsi Nyoo. ⁸Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsico yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyiví tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tavára Pablo tsi ra Timoteo

⁹Janumi tan quitsi ñi un, quitsi nyehe un nu nyí yu. ¹⁰Tyin ra Demas nacoq ihñi ra tsi yu tyin cuñí ca ra tsa iyó ñuu ñayiví ihyá. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. ¹¹Intuhun ña ra Lucas nyí tsihin yu. Nanducu tsi ra Marcos tan quíñin tsi ra quitsi tsihin un quivi quitsi un. Tyin cuví jatyinyee ra tsi yu tsihin tyiñu Nyoo. ¹²Jacuhún yu tsi ra Tíquico ñuu éfeso. ¹³Quivi quitsi un yaha un naquihin un jahma vixin yu tsa nacoq yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñini ca cuñí tsi cundaha un, yacan cuví tandihí tutu yu.

¹⁴Ra Alejandro, ra cañí caa, cuaha xaan tsa ña vaha javaha ra tsi yu. Maa Jutu Mañi yo cua natyahvi tsi ra tsa cuenda tandihí tsa javaha ra. ¹⁵Jaha cuenda vaha tsi un coto nája vaha ra tsi un. Tyin xaan xaan cuñí ra cuenda tuhun Nyoo tsa caahán yo.

¹⁶Tsa jihna ñi jacacu yu tsi yu nuu ra cumí tyiñu naha ra, yoñi maa jatyinyee tsi yu. Tandihí ra naha nacoq ihñi ra naha tsi yu. Na jaha Nyoo tucahnu iñi tsi ra naha tsa cuenda yacan. ¹⁷Vasu ndi maa tandihí ra

naha nacoq ihñi tsi yu, maa tyin Jutu Mañi yo jatyinyee xaan ra tsi yu. Tan tsahá ra tunyee iñi tsi yu tan cuví cahan catsi yu tuhun ra nuu nyiví. Tan tsinjí tandihí nyiví tsa ñavin ñi Israel cuví tsa cahan yu. Tan jacacu Nyoo tsi yu tan ña tsatsi ndicaha can tsi yu. ¹⁸Tan maa Nyoo cua jacacu tsi yu ndaha tandihí tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacobhu yo tsi ra tandihí ñi tyembu. Tan na cuví tsi tacan.

Nu ndihí cahán ra Pablo tan tsahá ra nacumi tsi nyiví

¹⁹Cuhva nacumi tsi ña Prisca tan tsi ra Aquila tan tsi nyiví ra Onesíforo. ²⁰Tan jactó ndihí yu tsi un tyiñu ndoo ra Erasto ñuu Corinto. Tan ndoo ra Trófimo ñuu Miletó tyiñu cuuhví ra. ²¹Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lijo tsihin ña Claudia tan tandihí ca nyiví yihí cuenda Nyoo tsihin yo.

²²Na quíñi ndaha Jutu Mañi yo Jesucristo tsi un. Tan Nyoo nasoco tsi tandihí ndo.

Tan na cuví tsi tacan ñi.

Carta Tsa Jacuhun Ra Pablo Tsi Ra Tito

Nu tyaa ra Pablo carta tsa cuenda ra Tito

¹Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatyinyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi nácaa taahán tsi coo yo cuhva cuñi Nyoo. ²Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyí Nyoo tyin cuhva ra ñayivi nyito coo yo. Tan ña jandaví ñaha ra. ³Tan vityin tsa tahan tsi quivi tsa tyaa Nyoo cuhva tyin coto yo tuhun ra. Maa ra cuví ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴Jaquitsí yu carta ihyá tsi un, Tito, tyin nditsa tyin cuví un tumaa sehe yu tsa cuenda tuhun Nyoo, tyin induc ñi tsinu iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

*Tyiñu tsaha ra Pablo tsi ra Tito tyin jaha
tyiñu ra tyiñu Nyoo ñuu tsa cayucú ñuhu Creta*

⁵Nacoo yu tsi un ñuhu Creta tyin jandaan un tyiñu Nyoo tsa nyaá cundaan. Tan na tyiso un tsi ra tsahnu cuvi ityi nuu tsihin nyivi vehe ñuhu intuhun intuhun ñuu, tumaa tsa catyí maa yu tsihin un. ⁶Tyin ra tsahnu cuví ityi nuu tsihin nyivi vehe ñuhu, cuñi tsi cuví ra iñi ra iyó intuhun ñi ñasiihi, tan tsinu iñi tandíhi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaa cuatyi siquí sehe ra. Tun tacan iyó ra, cuví cuvi ra ityi nuu tsihin nyivi vehe ñuhu. ⁷Tyin ra cuví ityi nuu tsihin ñi yiñí cuenda Nyoo, maa Nyoo tsaha tyiñu can tsi ra. Yacan cuenda ñiñi cuñi tsi tsa cuví ra iñi ra cuiti iyó nuu Nyoo. Iin ra cahnu jahá tsi ña cuví cuvi ra ityi nuu tsihin nyivi vehe ñuhu, ndi iñi ra ndihí iñi, ndi iñi ra tuhvá tsihí, ndi iñi ra nducú tsisihi, ndi iñi ra jaha canaa xuhun tsihin iñi cuhva ña vaha. ⁸Maa tyin cuñi tsi cuví ra iñi ra sií cuñi tatum tsaa nyivi yuvehe ra. Tan taahán tsi cuhva ra nu ndoo

ñi cusu ñi. Cuñi tsi cuvi ra iñi ra javahá tsa vaha, iñi ra tsicá iñi tsa vaha, iñi ra nacuhvá cuenda vaha tsi ra tsi Nyoo, iñi ra tsitó cundaca ñaha tsi maa ra. ⁹Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iñi ra iñi nyivi tsihin tuhun vaha ihyá, tan ñihi ra cuhva jacuahá ra tsi nyivi caahán tyin ña nditsa tuhun caahán yo. ¹⁰Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandaví ñaha. Tan vihi ca ra nyicún costumbre tsaaahnu nyivi Israel, yaha ca cuhva caahán ra can naha ra. ¹¹Cuñi tsi tsa casí yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iñi tsa ña taahán tsi tsi ñi tsa cuenda tsa cuñi ra naha xuhun.

¹²Tan juvin ñi maa iñi ra Creta, iñi ra tsitó xaan, cahan ra tuhun nyivi ñuu maa ra catyí ra tyehen: “Nyivi Creta, vatya xaan ñi. Cuví ñi tumaa cuví quiti. Cuaha xaan tsatsí ñi tan jutsan xaan ñi”, catyí ra. ¹³Tan nditsa tsa cahan ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. ¹⁴Tan ña tyaa soho ca ñi cuendu tsa caahán nyivi Israel. Tan ndi ña tyaa soho ca ñi tsa caahán nyivi tsa ña cuñi coto tsa nditsa.

¹⁵Tsa cuenda nyivi tsa vaha tsicá iñi ñi, tandíhi maa náa tsa iyó tan vaha tsi cuñi ñi. Maa tyin tsa cuenda nyivi tsa ña tsinu iñi tan ña vaha tsicá iñi, nduve maa iñi tsa vaha cuñi ñi, tyin nda cuanda cuhva tsicá iñi ñi tan tsa tsinu tuñi iñi ñi tan ña vaha. ¹⁶Catyí ñi tyin tsitó ñi tsi Nyoo, maa tyin tsihin tsa ña vaha javahá ñi, nyehé yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuví javaha ñi tsa vaha.

2

Tuhun vaha tsa tsaha Nyoo tyin jacuahá yo

¹Maa tyin yooho, jacuahá tsa vaha tsa nacatsi tahan tsihin tsa jacuahá Nyoo tsi yo. ²Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinu iñi ra. Cuñi tsi tsa cuñi ra naha tsi Nyoo tan tsi nyivi. Tan cunyee iñi ra naha tandíhi náa tundoho nyehé ra naha. ³Tan tacan tucu ñiñaha tsahnu. Cañan tsihin ñi

na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyiví tsihin cuhva iyó ñi. ⁴Tyin tacan, jacuahá vaha ñi tsi ñiñaha cuatyí tsa ndi tindahá, na cuñi ñi tsi yii ñi tan tsi sehe ñi. ⁵Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuvi ñi nyiví vaha. Na cuhva ñi tsa cundaca ñaha yii ñi tsi ñi, tyin tacan tan ña cuvi cahan nyiví ndavaha ñi siquí tuhun Nyoo tsa cuenda cuhva iyó ñi.

⁶Tacan tucu ra cuatyí na ha ra. Cuhva cuenda tsi ra na ha na catsi coo ra na ha. ⁷Tan maa un cuñi tsi tsa janaha un maa ñi maa tsa vaha tsi ra na ha tsihin cuhva iyó un. Jacuahá tsi ra na ha tsihin tsa vii tan tsihin tsa vaha. ⁸Maa ñi tuhun vaha cahan un tyin tacan tan yoñi cuvi tyaa cuatyí siquí un. Tan ra xaan iñi tsi ndo na ha ra ña cua ñiñi ra na ha cuhva cahan ra na ha ndavaha ñi siquí ndo tan cua nducahan nuu ra na ha.

⁹Cuhva cuenda tsi ra yañi yo, ra cuví musu na ha ra, na tyaa yahvi ra na ha tsi tsitoho ra na ha. Na javaha ra na ha tandihí tsa caahán tsitoho ra na ha. Tan na ña nacahan ra na ha nu caahán tsitoho ra na ha. ¹⁰Tan na ña suhu ra na ha tsa tsii tsitoho ra na ha. Na jaha vaha ra na ha cuenda tandihí ndaha tyiñu tsitoho ra na ha, tyin tacan tan nyehe nyiví tyin vaha xaan tuhun Nyoo, ra jacacú tsi yo.

¹¹Tyin Nyoo janahá ra tsa vaha tsa iyó tsi ra tsi nyiví tan cuñi ra jacacú ra tsi tandihí ñi. ¹²Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyiví tsa ña tsító tsi ra, tan nacoo tucu yo tsa cuñi ñi can. Tan cuití coo yo nu ñuhu ñayiví ihyá, na cundaca ñaha vaha yo tsi yo tumaa cuñi maa Nyoo. ¹³Tan janahá tucu ra tsi yo nácaa cuatu yo tsa vaha tsa cua ñiñi yo quíví quitsi ra Jesucristo inga tsaha. Tyin sií xaan cua cuñi yo nyehe yo tsa sií caá quíví quitsi ra cuví Nyoo yo, ra cahnu cuví, ra jacacú tsi yo. ¹⁴Tsahá ra ñayiví ra tsa cuenda yo tyin tacan tan jacacú ra tsi yo ndaha tandihí tsa caquiñi. Tan nacatya ra tsi yo na cuvi yo nyiví vaha, tan cuvi yo tsii maa ra, tan javaha yo maa ñi maa tsa vaha. ¹⁵Yacan cuñi tsi jacuahá un tsi nyiví. Jandu iin iñi ñi. Tan cahan tsihin ñi tsihin siví Nyoo. Tan ña javaha un tsa ña vaha tyin

tacan tan ña ñihi nyiví nácaa cahan nyaa ñi tsi un.

3

Cuhva taahán tsijavaha nyiví yihí cuenda Nyoo

¹Janducuhun iñi tsi nyiví yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu na ha ra. Tan na javaha ñi tyiñu catyí ra cumí tyiñu tyin javaha ñi tsihin tsa niñi iñi ñi. ²Tan ña cahan ñi ndavaha ñi siquí nyiví. Ña cañi tahan ñi tsihin nyiví. Na cuvi ñi nyiví vaha. Na masu jaha ñi añima ñi tsihin tandihí nyiví.

³Tyin nda cuanda maa yo tan ña vaha javaha yo nu quitsi tsi. Soho xaan tsicooy. Ndava xaan iñi yo. Ña tsicá yo itiy vaha tyin jandaví ñaha xaani nu ña vaha tsi yo. Tan tsindacá ñaha tandihí tsa ña vaha tsa cuñi cuñu ñuhu yo tsi yo. Tan javaha yo tandihí cuhva cuñi maa yo. Tan cuñi yo coo tandihí tsa iyó tsi inga nyiví tsi yo. Ndasi tsicá iñi yo nyehe yo tsi nyiví yo. Tan tacan tucu maa nyiví ndasi cuñi ñi nyehe ñi tsi yo. ⁴Maa tyin Nyoo vaha xaan iñi ra tan jacacú ra tsi yo. Tsihin yacan janahá ra tsi yo tyin cuñi ra tsi tandihí nyiví. ⁵Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahví iñi ra nyehe ra tsi yo. Tan tsihin niñi ra Jesúz nacatya ra cuatyí yo, tan nacacú tsaa yo jahá Tatyí li ra, tan tsahá ra ñayiví nyito coo yo. ⁶Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí li ra añima yo. ⁷Tsihin tsa vaha maa ra tan janduvahá ra tsi yo nuu ra, tyin tacan tan naquihin cuenda yo ñayiví nyito tsa ña cua naa maa tsa ndatú yo. ⁸Tandihí tuhun ihyá tuhun nditsa cuví tsi. Tan cuñi yu tsa jañíñi xaan un cuhva cuenda un tuhun ihyá tsi nyiví tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihyá. Cua jatyinyee tsi tsi tandihí nyiví tattun tyaa yahvi ñi itsi. ⁹Maa tyin ña tyaa soho un nu caahán yuhu tahan nyiví siquí tsa nduve yahvi nyá. Ña tyaa soho un tsa caahán ñi tyin ñi icán cuñi ñi coto ñi nácaa vatsí tata nyiví. Ña tyiñi un tsi un tsihin nyiví cañi tahan tsa cuenda ley tsa tyaa ra Moisés tsanaha. Tyin nduve náa jatyinyéé yacan. Tan nduve tsa tsiñi tuñi tsahá can.

¹⁰ Tatum iyó nyívi cuñí natalhvi sava tsi nyívi tsicá vehe ñuhu, cäna tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatum ña tyaá yahvi ñi tsa caahán un, cäsi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tava ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyí un. Tan quívi tsaa ra, nducu cuhva tan cuhun un nda ñuu Nicópolis tyin ndacan cua ñilihi tahan yo. Tyin tyaá yu cuhva tsa ndoo yu ndacan yoo vitsin.

¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyívi, tan tsi ra Apolos. Tan cuhva tsa tsíñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyívi yihí cuenda Nyoo javaha ñi tsa vaha tan jatyinyee ñi tsi inga nyívi tatum iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihi ra yucú tsihin yu, tsahá ra naha nacumi tsi un. Tan cuhva nacumi tsi tandíhi nyívi cuñí tsi yo tsa cuenda tsa iin ñi cuví yo cuenda Nyoo. Tan Nyoo nasoco tsi tandíhi ndo.

Tan na cuvi tsi tacan ñi.

Carta Tsa Jacuhún Ra Pablo Tsi Ra Filemón

Nu quitsahá tyaá ra Pablo carta cuenda ra Filemón

¹ Yuhu ra Pablo, nyíí yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihí ra nacumi tsi un. Cuñí xaan ndi tsi un tsa cuenda tsa iin ñi tsi un. Cuñí xaan ndi tsi un tsa cuenda tsa iin ñi tsi un.

Nu quitsahá tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyé xaan ñi tsi yo tsihin tsi un. Tan tyaá tucu yu itsi tsa cuenda tandihí nyívi ndu íín yuvehe un. ³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo añima ndo.

Ra Filemón tsinú xaan iñi ra tsi ra Jesús tan cuñí xaan ra tsi nyívi

⁴ Tandihí ñi tsaha tsa tsicán tahvi yu tsi Nyoo tan nducuhún iñi yu tsi un, ⁵ tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyívi yihí cuenda ra. ⁶ Tan tsicán yu tsi Nyoo tsa cuenda tandihí nyívi tsa natsim iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo. ⁷ Tan siíí xaan cuñí yu tan iin xaan cuñí yu tsa cuenda tsa cuñí xaan un tsi nyívi tsa yihí cuenda ra Cristo tan jandu iñi xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. ⁹ Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyífi yu vehe caa ihya tsa cuenda ra Cristo. ¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahán yu

tuhun ra Cristo tsihin ra nu nyíí yu vehe caa ihya.

¹¹ Tahan tsanaha cuví ra musu un tan ñi jahá tsi un. Maa tyin vityin vahá xaan cua jatyinyee ra tsi yo, tahan ñi tsi yooho tan yuhu. ¹² Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra.

¹³ Tsicá tucu iñi yu tsa ndoo ra nu nyíí yu vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. ¹⁴ Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyí ra. Vaha ca jaquitsí nyico maa un tsi ra tun cacu iñi un tsa cuhva un tsi ra tsa jahá tsi un. ¹⁵ Vasiqúi maa Nyoo cuñí tsa cunu ra nuu un juhva quívi tan vityin cua tsaa nyico ra yuvehe un tan coo cuíi ra tsihin un. ¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñí xaan yu tsi ra, yacan yooho taahán tsi tsa cuñí ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

¹⁷ Tun nditsa un tsa cuñí un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatus tsaa yu yuvehe un. ¹⁸ Tatun javahá ra iin tsa ña vaha tsi un o nyaá cuenda ra tsi un, tyahví maa yu can. ¹⁹ Yuhu ra Pablo tyaá yu letra ihya tsihin ndaha yu tyin cua tyahví maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayáví iyó un tsi yu. ²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusíí iñi yu tan na ndu iin iñi añima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaa yahví un tsa caahán yu tan cua javaha un tsa tsicán yu, tan cuaha ca tsa cua javaha un. ²² Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehé yu tsi un, tyin tsicán tahvi ndo tsi ra.

Nu ndihí tyaá ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafras tsa nyíí ndíhi vehe caa ihyá tyin caahán ra tuhun ra Cristo Jesús jaquitsí ra nacumi tsi un. ²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihyá naha ra jatyinyeé xaan tsi yu tsihin tyííu. ²⁵ Na nasoco xaan Jutu Mañí yo Jesucristo tsi ndo.

Tan na cuvi tsi tacan ñí.

Carta Tsa Tsinyaaa Tsa Cuenda Ny^{iví} Israel, Ñi Caahán Yuhu Hebreo

Caahán Nyoo tsihin yahu Sehe ra

¹ Tahan tsanaha cuaha xaan tsaha, tan cuaha xaan cuhva cahán Nyoo tsihin tsii tsaahnu yo. Tsa jihna ñi tsatyinu ra tsi ra cuví ndusu yuhu ra. Juvín ra can naha ra tsahá cuenda tsi nyíví tuhun caahán Nyoo. ² Tan vityin, nu cua ndihí tyembu ihyá tsatyinu ra tsi Sehe ra tsa caahán ra tsihin yo. Iin ñi cuví ra tsihin Sehe ra tan javahá ra tandihí tsai iyó. Tan nacuhvá cuenda ra tandihí can tsi Sehe ra. ³ Tan maa Sehe ra janahá ra tsa sii caá ra, tyin juvin ra Sehe ra cuví tixahñu ra tyin juvin ñi cuhva caá maa ra caá ra Sehe ra. Tan tsihin tuyee iñi tuhun caahán ra, yihí ndaha ra tandihí tsai iyó. Tsa yahá tsa nacatya ra cuatyí yo, tan tsinyaa ra xiin cuaha Nyoo nda gloria.

Cahnu ca cuví Sehe Nyoo tan ñavin ca ángel

⁴ Sehe Nyoo cahnu xaan ca cuví ra tan ñavin ca ángel. Tan cahnu ca tyinu ñihí ra jahá tyinu ra tan ñavin ca ángel. ⁵ Tyin Nyoo ña catyí ra ndi iin tsaha tsihin ndi intuhun ángel tyehen:

Yooho cuví Sehe yu.

Tan tsahá yu ñayíví coo un vityín. Tan ndi ña cahán ra tuhun ndi intuhun ángel tyehen:

Yuhu cua cuvi Jutu ra.

Tan maa ra cua cuvi Sehe yu.

⁶ Maa tyin quíví jaquitsí Nyoo tsi Sehe mañi ra nu ñuhu ñayíví, catyí ra:

Tyin tandihí ángel ra taahán tsi jacahnu ra naha tsi Sehe ra.

⁷ Tan cahán tucu ra tuhun ángel tan catyí ra: Angel yu cuví ra naha tumaa iin tatyí jahá yu,

jahá tyinu ra naha tyinu yu, tan cuví tucu ra naha tumaa ñuhu, catyí Nyoo.

⁸ Maa tyin tuhun Sehe ra catyí ra tyehen:

Nyoo cuví un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyin cuñí un tsa vaha tan ndasí cuñí un nyehé un tsa ña vaha.

Yacan cuenda yuhu, tsa cuví yu Nyoo un, tsahá yu cuaha ca tsa sii cuñí un,

tan ñavin ca tsi ra cutahán tsihin un naha ra.

¹⁰ Tan catyí tucu Nyoo tsihin Sehe ra tyehen: Yooho cuví Jutu Mañi tandihí nyíví. Quíví jihna ñi juvin un javahá ñuhu ñayíví,

tan tsihin ndaha un javahá un andivi.

¹¹ Ñuhu ñayíví tan andivi tan tandihí maa tsa iyó cua cundihí tsi, maa tyin yooho, ñia cua cundihí un, tyin tacan ñi iyó maa un.

Tandihí maa can cua ndutsahnú can tumaa ndutsahnú jahma.

¹² Tan cua quihi tahnu can tumaa tyihí tahnu yo iin jahma.

Tan cua nasama can tumaa nasamá nyíví jahma ñi.

Maa tyin yooho iin ñi maa ra cuví un tan ña cua nasama un.

Tan ña cua cundihí maa ñayíví un tyin tacan ñi iyó maa un, catyí Nyoo tsihin Sehe ra.

¹³ Nyoo ndi iin tsaha ña cahán ra tsihin ndi intuhun ángel tumaa cahán ra tsihin Sehe ra tyehen:

Cunyaaxiin cuaha yu ihyá tsitsi tsa nacuhva cuenda yu tsi nu xaan iñi tsi un nahnu tsi un.

¹⁴ Tandihí ángel, tatyí cuví ra naha. Tava tyinu Nyoo tsi ra naha tsa caca ra naha tyinu ra tan jatyinyee ra naha tsi nyíví tsa cua cacu.

2

Cahnu xaan cuví tsa jacacú Nyoo tsi yo

¹ Yacan cuenda cuñí tsi tyaa yahvi xaan ca yo tuhun nditsa tsa tsinu yo, coto nacoo ihñi yo itsi. ² Tahan tsanaha tsahá cuenda ángel ley Nyoo tsi ra Moisés. Tan janahá Nyoo tyin nditsa tan taahán tsi tyaa yahvi nyíví itsi. Tan nyíví tsa tsicoó cuatyí tan ña tyaa yahvi ley can, tatsí tuñi ra tsi ñi tumaa catyí maa ley can. ³ Tun tacan tahan ñi can quíví can ñacáa cua javahá yoo vityín, tan cuvi cacu yo tatan ña tyaa yahvi yo tsa jacacú Nyoo tsi yo?, tan cahnu xaan ca cuví tuhun ihyá. Juvín ñi maa Jutu Mañi yo Jesucristo cuví ra tsa cahán jihna tyin cuví cacu yo. Yahá can tan cahán nyíví tsa tsinu tsa cahán ra. Nyehe ñi tyin nditsa tan nacatya tuhun ñi itsi tsihin yo. ⁴ Tan siñ tyin Nyoo janahá catsi ra tsi yo tyin nditsa tsa jacacú ra tsi yo. Janahá ra can tsi yo tsihin tsa javahá

ra cuaha tsa iyo. Tan tsaha tucu ra Tatyi li
ra tsi yo tyin jatyinyee tsi tsi yo tsa javaha
yo tyiñu tsa cuñi ra javaha yo. Tan tsihin
tandihi yacan janahá ra tsi yo tyin nditsa
tsa jacacú ra tsi yo.

*Ra Jesucristo quitsi ra cuví ra rayii nu
ñuhu ñayivi ihya*

⁵Nyoo ña tsaha ra tsa cundaca ñaha ángel
ñuhu ñayivi tsaa tsa cua coo tsa caahán yo
tuhan vityin. ⁶Tyin iyó iin nu tyaa iin ra nu
tutu Nyoo tyehen:

Nyoo Juto yu *ÿyóo ra cuví rayii nu ñuhu
ñayivi ihya* tyin ñuhú iñi un tsi ra?

*¿Tan yoo ra cuví ra tyin cutuñu iñi un tsa
cuenda ra?*

⁷Tyin ndaahvi ca jahá un tsi ra juhva
tyembu, tan ñavin ca ra ángel naha
ra.

Maa tyin jacobhu un tsi ra. Tan jahá un tsa
ñayivi tsi ra.

Tan tsaha un tsa quihi ndaha ra tandihi tsa
javaha un.

⁸Tandihi can tyaa cuenda un ndaha ra.

Tan nduve maa náa ña tsaha cuenda Nyoo
quihi ndaha ra. Tan ñaha ca nyehé yo tyaa
yahvi tandihi yacan tsi ra. ⁹Maa tyin nyehé
yo tsi ra Jesúz tyin nduluhly ra jahá Nyoo
juhva tyembu tan ñavin ca ra ángel naha ra.
Tan janduluhly Nyoo tsi ra tsa cuenda tsa
cuñi xaan ra tsi yo. Tan tsaha ra tsi ra Jesúz
quitsi ra quitsi cíu ra tsa cuenda tandihi
yo. Tan vityin jahá xaan Nyoo tsa cahnu
tsi ra tan jacobhu xaan ra tsi ra tsa cuenda
tundoho tsa nyehé ra quihi can.

¹⁰Tandihi maa tsa iyó, tsa cuenda maa
Nyoo cuví tsi. Maa ra javaha itsi. Tan cuñi
ra cuhva ra tandihi tsa sií caá tsa iyó andivi
tsi tandihi sehe ra. Yacan cuenda janyehé
ra tundoho tsi ra Jesucristo, ra tsa jacacú
tsi yo, tan tsihin yacan janduvahá ra tsi ra.
¹¹Ra Cristo tsa jacacú tsi yo, Sehe Nyoo tsi
ra. Tan juvin ñi sehe Nyoo nanduví yoo
tsa tsinú iñi tsi ra. Yacan cuenda ña cahán
nuu ra Cristo tsa caahán ra tyin yañi ra
tan cuhva ra cuví tsi yo, tyin iin ñi Juto yo
tsihin ra. ¹²Tyin catyí ra Cristo nu tutu Nyoo
tyehen:

Cua cahan yu tuhun un tsihin yañi yu.

Tan cua jacobhu yu tsi un tsihin yaa nu ndu
iñi yo.

¹³Catyí tucu ra tyehen:

Yuhu nyitá iñi yu tsi Nyoo.

Tan catyí tucu ra:

Ihya nyaá yu tsihin sehe Nyoo, tsa tsaha ra
tsi yu, catyí ra.

¹⁴Yoo tsa cuví yo nyivi ñuhu ñayivi, iyó
cuñu ñuhu yo tan niñi yo. Tacan cuví ra
Cristo, tyin tun tsa ña tsicog cuñu ñuhu ra
tan niñi ra, ña cua cuví cíu ra tan janaa
ra tsi nu ña vaha, nu tsa tsahñi tsi nyivi.

¹⁵Tacan javaha ra tan jacacú ra tsi nyivi
tsa tsicog yuuhví jahá tuhun tsihí. Cuví
ñi tumaa musu nu ña vaha tyin tandihi ñi
quivi tsicog yuuhví ñi. ¹⁶Tan tsa nditsa vaha
tyin ña quitsi ra quitsi jatyinyee ra tsi ángel.
Tyin quitsi ra quitsi jatyinyee ra tsi nyivi
tata ra Abraham. ¹⁷Yacan cuenda ñiñi cuñi
tsi tsa cuví ra tumaa yoo tsa cuví yo yañi
ra tan cuhva ra tyin tacan tan cuví ra iin
ra cundaahvi iñi tsi yo, tan cuví ra jutu
tsaahnu cuví ityi nuu tsa cuenda yo nuu
Nyoo tyin jandaá ra tandihi maa tan quihiñ
nyaá ra cuatyí yo tsihin tundoho tsa nyehé
ra. ¹⁸Tan tsa cuenda tsa nyehé ra tundoho
quivi nducu cuhva nu ña vaha tsi ra, tsító ra
nácaa cuñi yo tun nyehé yo tundoho. Yacan
vityin nyaá ra tsa jatyinyee ra tsi yo tun
nyehé yo tundoho tsa nducu cuhva nu ña
vaha tsi yo.

3

*Cahnu ca cuví ra Jesúz tan ñavin ca ra
Moisés*

¹Nyoho, yañi, tsa jandu íí Nyoo, tan
tsa nacatsi ra tyin coo ndo tsihin ra nda
gloria, nyehé vaha ndo cuhva iyó ra Cristo
Jesúz, juvin ra jaquitsi Nyoo tyin caca ra
tyiñu ra tan cuví ra jutu tsaaahnu cuví ityi
nuu tsa cuenda yoo tsa tsinú iñi tuhun ra.

²Ra Cristo javaha ra tandihi tsa cahán Nyoo
tyin javaha ra, tumaa javaha tucu ra Moisés
tyiñu tsa tsaha Nyoo tsi ra tsa jaha cuenda
ra vehe Nyoo tsa cuví nyivi Israel. ³Ra
Jesucristo cahnu ca ra cuví ra, tan ñavin ca
ra Moisés, tyin cuví ra tumaa iin ra javahá
vehe. Tyin ra tsa javahá vehe cahnu ca ra
cuví ra tan ñavin ca maa vehe tsa javahá
ra. ⁴Tyin maa ñi iyó ra javahá intuhun
intuhun vehe, maa tyin Nyoo cuví ra tsa
javahá tandihi maa tsa iyó. ⁵Ra Moisés tyaa
yahvi ra tsi Nyoo tan javahá ra tyiñu tsa
tsaha Nyoo tsi ra tyin jahá cuenda vaha ra
vehe Nyoo tsa cuví nyivi Israel, tan juvin

ñi jacotó tucu ra tsi nyivi tsa cua javaha
Nyoo nu cuahán ca tsi. ⁶Maa tyin ra Cristo,
Sehe Nyoo, tyaa yahvi tucu maa ra tsi Nyoo

tan juvin ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuanda nu ndihí, tan tacan ñi siñ cuñí yo ndatú yo tsa cua ñihí yo.

Nyivi tsinú iñi tsi Nyoo, quitatú ñi tsi-hin ra

⁷ Yacan cuenda cuñí tsi jaha cuenda vaha yo tsi yo tumaa catyí Tatyí li Nyoo tyehen: Tatun tsiní ndo tsa caahán Nyoo tsihin ndo vityin,

⁸ ña jandava ndo añima ndo, tumaa javahá nyivi tsa ña tyaa yahvi tsi Nyoo quivi nducu cuhva ñi tsi ra nu tsicá ñi nuu tsiquí.

⁹ Tyehen catyí Nyoo: Tsii tsaahnu ndo nducu cuhva ñi tsi yu, vasu ndi maa nyehé ñi tsa javahá yu tsitsi tsa uvi xico cuiya.

¹⁰ Yacan cuenda cuxaan yu tsihin nyivi can, tan catyi yu tyehen: “Ña iin maa cuñí nyivi ihya

tan ña cuñí ñi cunyicun ñi ityi janahá yu tsi ñi.”

¹¹ Yacan cuenda cuxaan yu tsihin ñi, tan cahán catsi yu tsihin ñi, tyin ña cua quitatu ñi tsihin yu, catyí Nyoo.

¹² Yacan cuenda yañi, jaha ndo cuenda tsi ndo tan ña caca uvi iñi ndo tsitsi añima ndo coto jandihí ndo tsa tsinú iñi ndo tsi Nyoo nyito tan coto nacoo ndo tsi ra. ¹³ Maa tyin jandu iin tahan ndo iñi ndo tandihí ñi quivi, tsitsi tsa tsahá tsi cuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa caquini tsi ndo. ¹⁴ Tyin tun ña jandihí yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsaha yo, cua ñihí yo tsa vaha iin caa ñi tsihin ra Cristo tyin cunyeé iñi yo ndatú yo tsi ra.

¹⁵ Yacan tacan cuñí tsi jaha yo cuenda tsi yo tumaa catyí tutu Nyoo:

Tatun tsiní ndo tsa caahán Nyoo tsihin ndo vityin

Ña jandava ndo añima ndo, tumaa javahá nyivi tsa ña tyaa yahvi tsi Nyoo —catyí tutu Nyoo.

¹⁶ ¿Yóo nyivi cuví ñi tsiní tsa cahán Nyoo tan ña tyaa soho ñi? Nyivi ihya cuví nyivi Israel tsa tavá ra Moisés Egipto tahan tsanaha. Juvín ñi can ña tyaa soho. ¹⁷ Tan yóo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoó cuatyí

ñi. Tan tsihí ñi nu tsiquí, juvin ñi maa nu tsicá ñi. ¹⁸ ¿Tan yóo tsihin cahán catsi Nyoo tyehen?

—Ña cua quitatu ndo tsihin yu.

Juvín ñi tsihin ñi tsa ña tyaa soho can.

¹⁹ Ihyá nyehé yo tyin ña cuví ñihí ñi quitatu ñi tsihin Nyoo tyin ña tsinú iñi ñi tsi ra.

4

¹ Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyan tacan tan ndi intuhun ndo tan ña cua ndoo ihñí ndo. ² Vityin yoo tsiní tucu yo tuhun Nyoo tsa jacacú ra tsi yo, tumaa tsa tsiní tucu maa nyivi Israel can. Tsiní ñi itsi, maa tyin nduve natacyi tsa tsiní ñi itsi tyin ña tsinú iñi ñi itsi. ³ Yoo tsa tsinú iñi tsi Nyoo, quitatú yo tsihin ra. [Maa tyin ña quitatu nyivi tsa ña tsinú iñi tsi ra] tyin catyí ra:

Yuhu cuxaan yu tsihin ñi tan cahán catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan cahán Nyoo tsihin ñi ican], maa tyin [tsa iyó tuhun tsa cuvi quitatu yo tsihin Nyoo nda quivi] ndihí jahá tyiñu ra javahá ra ñuhu ñayivi. ⁴ Tyin yiñi nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jahá tyiñu Nyoo, quitatu ra tsa tsinu utsa quivi.

⁵ Tan catyí tucu tsi tyehen:

Ña cua quitatu ñi tsihin yu, catyí Nyoo.

⁶ Nyivi tsa tsiní jihna tuhun tsa jacacú Nyoo tsi yo ña cuví quitatu ñi tsihin ra, tsa cuenda tsa ña tyaa yahvi ñi tsa cahán ra tsihin ñi. Maa tyin vityin ndi iyó ndatu tsa quitatu inga nyivi tsihin ra. ⁷ Tsa yahá tsa ña tyaa yahvi nyivi Israel tsa cahán Nyoo, tan tyaa ra inga quivi cuví quitatu yo tsihin ra, tan quivi can cuví tyembu vityin. Tacan caahán Nyoo nu tutu ra nu tyaa ra David tyehen:

Vityin tatum nyoho tan tsiní ndo tsa caahán yu,

Ña jandava xaan ndo añima ndo, catyí Nyoo.

⁸ Tun tsatinyin tsahá ra Josué nu quitatu nyivi Israel, ña cua cahán Nyoo tsa cuenda inga quivi. ⁹ Yacan cuenda cuví quitatu nyivi yiñi cuenda ra tsihin ra. ¹⁰ Tyin nyivi quitatú tsihin Nyoo, ña tsicá iñi ñi tsa cuenda tyiñu

jahá ñi tyin quitatú añima ñi tumaa quitatu Nyoo quívi ndihí jahá tyiñu ra. ¹¹ Cuñí tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javahá nyivi tsicoq tsanaha tsa ña cuñí tsinu iñi tsi ra.

¹² Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo yuhu. Tan jasiín tsi tsa tsiní tuní jini yo tan tsa nyito yo, tan nu yihí tahan yiquí yo tan susun yihí tsitsi yiquí yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. ¹³ Nduve maa tsa javahá Nyoo tan cuví cunu xeehe can nuu ra, tyin tandihí maa tan nyehé ra. Tan juvin tsi ra cua cuhva cuenda yo tsa javahá yo.

Ra Jesús cuví jutu tsaaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvin ra cuví jutu tsaaahnu cuví ityi nuu tsa cuenda yo, tyin quíhví ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinú iñi yo tsi ra. ¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatum cuihya cuñí yo, tyin tsitó ra nácaa cuñí yo tun nyehe yo tundoho tyin maa ra nyehé tucu maa ra tandihí nuu tundoho quívi nducu cuhva nu ña vaha tsi ra, maa tyin ña tsicoq cuatyí ra. ¹⁶ Yacan cuenda cuñí tsi nanducu yo tsi Nyoo tan ndacan yo tsi ra tsihin tsa ña yuuuhví yo na cundaahvi iñi ra nyehé ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quívi nyehé yo tundoho.

5

¹ Tandihí ñi jutu tsaaahnu tsa cuví ityi nuu tsa nacatsí Nyoo tsitsi tsa tandihí nyivi Israel, nacatsí ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñí ra quiti tsa cuenda cuatyí ñi. ² Tan vatsí tsaha juvin ñi ndaahvi cuñí ra cuví jutu quívi nducú cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñí vaha iñi tuhun Nyoo tan nyivi ña nyicún vaha tsi Nyoo. ³ Tan yacan cuenda tsahñí ra quiti tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuvi ñi jutu tun ñavin maa Nyoo nacatsí tsi ñi. Tyin maa Nyoo cuví ra nacatsí tsi ra cua cuvi jutu, tan tsahá ra ndatu tsi ra tsa cuvi ra jutu, tumaa javahá ra tsihin ra Aarón tahan tsanaha. ⁵ Tan tacan tucu ra Cristo, ñavin maa ra tyaá tyiñu can tsi ra, tyin maa Nyoo tsahá tsa cuvi ra jutu tsaaahnu tsa cuví ityi nuu, tumaa catyí ra:

Yooho cuví Sehe yu.

Yuhu tsahá yu ñayivi coo un vityin, catyí Nyoo tsihin ra Cristo.

⁶ Tumaa catyí tucu ra tsihin ra nu inga nu caahán tsi tyehen:

Ña cua cundihi maa tsa cuví yooho jutu, tumaa cuví ra Melquisedec.

⁷ Quívi tsicoq ra Cristo nu ñuhu ñayivi ihyá, tsicahí tahiya ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihí tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihí tsa catyí Nyoo tyin javahá ra. ⁸ Yacan cuenda vasu ndi maa Sehe Nyoo tsi ra Cristo, cutuhvá ra tyaá yahvi ra tsi Nyoo tsihin tsa nyehé ra tundoho. ⁹ Tsa yahá tsa javahá ra tandihí cuhva cuñí Nyoo tyin javahá ra, tacan tan tsaha Nyoo tsi ra tsa jacacú ra tsi tandihí nyivi tsa tyaá yahvi tsa caahán ra tyin tacan tan coo cuui ñi tsihin Nyoo. ¹⁰ Tyin maa Nyoo tava tyiñu tsi ra tsa cuví ra jutu tsaaahnu cuví ityi nuu, tumaa cuví ra Melquisedec.

Na ñajandihí yo tsa tsinú iñi yo tsi Nyoo

¹¹ Cuví cahan cuaha yo siqui tuhun ihyá, maa tyin yií xaan nacatyí tuhun yu nácaa cuahán tsi, tyin nyoho ña cuñí ndo cutuñí iñi ndo. ¹² Tsa naha xaan yií ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyoho cuví ndo tumaa cuví lee tsa tyaxín tsa ñaha ca cuvi catsi tyin cuñí tsi tsa tyaa soho nyico ndo tuhun tsa tsiní ndo tsa jihna ñi. ¹³ Tyin nyivi cuñí tyaa soho tuhun tsa ña yií cuví ñi tumaa lee tsa tyaxín tyin ñaha ca cutuñí vaha iñi ñi nácaa coo vaha ñi tsihin Nyoo.

¹⁴ Maa tyin nyivi tsa cutuñí vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhvä yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yaha cutuhvä yo: tsa ña nducu yo cuhva nduvahua yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. ²Tan na ña ndoo yo vaha tsihin tuhun tsa cutuhvä yo cuenda tsa tsicoondutä yo, tan tsa tyisó ndaha yo siquí nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihí nyivi tsa yaha cúní ñi, tan tsa cuenda tucu tsä cua cutuñi tandihí nyivi nuu Nyoo tan yihí ñi cua cuhun cuii ñi anyaya. Na ña ndoo yo vaha tsihin yacan ñi. ³Nacuhun ca yo ityi nuu tatuń Nyoo tsaha ra ndatu.

⁴Tyin nyivi tsa tsa yaha naquihän cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyí li Nyoo añima ñi. ⁵Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuvi tsa cua coo yo nu ñuhu ñayivi tsaa, tyin ñili ñi tunyee iñi tsa iyó tsi Nyoo. ⁶Tatun tsa naquihän cuenda ñi tandihí yacan, yaha can tan jandihi ñi tsa tsinú iñi ñi tsi Nyoo, ña cua cuvi ca ndu uvi iñi ñi inga tsaha. Tyin tumaa tsa tyá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. ⁷Añima nyivi cuví tsi tumaa ñuhu nu jahá tysiñu nyivi, tyin tandihí ñi tsaha tsa cuún savi, nacohó ñuhu can ndutuya savi can. Tatun vaha ñuhu can, vaha tsicó tsa tatsí nyivi, tan nasocó Nyoo ñuhu can. ⁸Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmi ra itsi. Tacan cua tahan nyivi tsa jandihi tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyoho nasocó Nyoo tsi ndo tyin jacacú ra Cristo tsi ndo.

¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuví xaan ndo tsi nyivi yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin.

¹¹ Cuñí ndi tsa jañilhi ca ndo ndu iin iñi ndo nda cuanda quitsi Jutu Mañi yo, tyin tacan tan ñihí ndo tandihí tsa ndatú ndo. ¹² Ña

cuñí ndi tsa jutsan xaan jaha ndo tsi ndo, maa tyin cuñí ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatú ñi, tan ñihí ñi tsa catyí Nyoo tyin cuhva ra tsi yo.

¹³Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyíñu rajuvín ñi siví maa ra, tyin ña cuvi cuatyíñu ra náa inga ca siví tyin nduve nyivi cahnu ca cuví tan ñavin ca maa ra. ¹⁴Tan catyí ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuvi jaha yu”, catyí ra tsihin ra. ¹⁵Ra Abraham ñihí ra tsa catyí Nyoo tsihin ra tyin cuhva ra tsi ra tsa cuenda tsa tsinú iñi ra tan cunyee iñi ra ndatú ra can. ¹⁶Iin nyivi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi siví iin nyivi cahnu ca cuví tan ñavin ca maa ñi. Tsihin yacan ndoo ñi tuhun tsihin yo. ¹⁷Nyoo tsatyíñu ra juvin ñi siví maa ra quivi catyí ra tyin cuhva ra tsa cuhva ra tsi nyivi ra. Javahá ra tacan tyin cuñí ra tsa coto ñi tyin cua jandaa ra tsa cahan ra tsihin ñi tan ña cua nasamá tuhun cahan ra. ¹⁸Tan iyó uvi taahan tsa ñia cuvi nasama. Iin tsi cuví tsa cuhva Nyoo tsa catyí ra tyin cuhva ra tsi yo, tan inga tsi cuví tsa tsatyíñu ra juvin ñi siví maa ra. Nyoo ña vatya ra. Yacan cuenda tandihí yoo tsa nyanaá tsi ra, nií cuñí yo nyitá iñi yo tsi ra, tan ndatú yo tsa ñihí yo tsa catyí ra tyin cuhva ra tsi yo. ¹⁹Tumaa iin yutun ndoo tsa tsicá nuu ndutuya ñuhu nuuhñi tsi tsihin iin caa vee coto cuhun tsi tsihin tatyí, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuví tsi tumaa tsa nuuhñi yo tsihin Nyoo ra nyaá Nu li Xaan inga tsiyo nu natañí sava jahá jahma. ²⁰Ican quihí ra Jesús tyin tacan tan nuñá ra ityi cuhun yo nu nyaá Nyoo. Tan ña cua cundihi maa tsa cuví ra Jesús jutu tsahnu cuví ityi nuu, tumaa cuví ra Melquisedec.

7

Ra Jesús cuví ra jutu tumaa cuví ra Melquisedec

¹ Ra Melquisedec tsa caahán yu tuhun ihya, juvin ra cuví rey ñuu Salem, tan cuví tucu ra jutu cuenda Nyoo, ra cahnu ca cuví tan ñavin ca tandihí tsa iyó. Quivi tsa vatsí nuhu ra Abraham naha ra tsa yaha

tsahan ra naha tsicañi tahan ra naha tsihin ra cuví rey naha ra, tan jahá canaa ra naha, ra Melquisedec jatahan ra tsi ra naha tan nasoco ra tsi ra Abraham. ²Tan cuaha tsa ñihí ra Abraham nu tsahan ra tsicañi tahan ra. Tsitsi tsa utsi utsi nuu tsa ñihí ra, tsaha ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuví tucu ra rey ñuu Salem, tan Salem cuñi tsi catyi “tsa taxin”. Yacan cuenda cuví ra: “Rey tsahá tsa taxin.” ³Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacu ra, tan ama tsihí ra. Yacan cuenda cuví jandu inducu yo tsi ra tsihin Sehe Nyoo, tyin ña tsindihí maa tsa cuví ra jutu.

⁴Nyehé yo ihyá vityin tyin cahnu xaan cuví ra Melquisedec, tyin tsahá ra Abraham juhva tsa ñihí ra nu tsicañi tahan ra tsi ra. ⁵Tun tsatyin tata ra Abraham cuví ra Melquisedec, tan cuví ra jutu, ña iyo cua cuñi yo tsa tsahá ra Abraham juhva tsa ñihí ra tsi ra, tyin tsa yaha cuaha cuiya tan tsaha Nyoo ley tsi nyivi tata ra Abraham. Tan catyí ley can tyin taahán tsi cuhva juhva tsa ñihí ñi tsi ra jutu tsa cuví tata ra Leví naha ra, vasu ndi maa iin ñi nyivi cuví ñi tsihin ra naha tyin juvin ñi tata ra Abraham cuví ra naha. ⁶Ra Melquisedec, vasu ndi maa ñavin tata ra Leví, tan tata ra Abraham cuví ra, maa tyin naquihín cuenda ra juhva tsa ñihí ra Abraham. Tan nasoco ra Melquisedec tsi ra Abraham, ra tsa catyi Nyoo tsihin tyin cua cuhva ra tsa cuhva ra. ⁷Tan tsító catsi yo tyin cahnu ca cuví ra tsa nasocó, tan ñavin ca ra tsa nasoco ra. ⁸Nyehé yo tyin cahnu ca cuví ra Melquisedec tan ñavin ca tandihí ra tsa quihín cuenda intuhun intuhun tsitsi tsa utsi utsi tsa ñihí nyivi, tyin rayii ñuhu ñayivi ihyá ñi cuví ra naha, tan tuhvá ra naha tsihí. Maa tyin caahán tsi nu tutu Nyoo tan catyí tsi tyin ra Melquisedec nyito ra. ⁹Ra Leví tsihin sehe ra, tata ra Abraham cuví ra naha. Juvin ra naha cuví jutu tsa naquihín tsa intuhun intuhun tsitsi tsa utsi utsi tsa ñihí nyivi. Cuví catyi yo tyin tandihí ra can naha ra tyahví ndihí ra naha tsi ra Melquisedec quíví tyahví ra Abraham tsi ra. ¹⁰Cuví catyi yo tyin tyahví ndihí tata ra Leví tsi ra Melquisedec quíví ñihí tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha

quíví can.

¹¹Ra jutu tata ra Leví tsa cuví tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuví janduvalhá ra jutu can naha ra tsi nyivi nyicún ley can, ña ñiñi cuñi tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. ¹²Tyin tun nasamá Nyoo tsi ra cuví jutu, nasamá tucu ra ley ra. ¹³Jutu Mañi yo tsa caahán tucu Nyoo tuhun, tata inga ra sehe ra Israel cuví ra. Tan ndi intuhun tata ra can tan ña cuví ra naha jutu. ¹⁴Tsító vaha yo tyin Jutu Mañi yo tata ra Judá tsi ra, tan ra Moisés ña cahan ra tuhun tata ra Judá quíví cahan ra tuhun ra cuví jutu naha ra.

¹⁵Nditsa tsa nasama Nyoo tsi ra jutu tyin jaquitsi ra iin jutu tumaa ra Melquisedec.

¹⁶Ra jutu ihyá ña quitsi ra tumaa catyí ley tsahnu, tyin ley can catyí tsi tyin maa ñi tata ra Leví taahán tsi cuvi jutu, tan ra can ñavin tata ra Leví cuví ra. Maa tyin iyó tunyee iñi tsi ra tsa coo cuui ra, yacan cuenda juvin ra jaquitsi Nyoo. ¹⁷Tyin tyehen caahán Nyoo tuhun ra:

Yoho ña cua ndihí maa tsa cuví un jutu, tyin cuví un jutu tumaa ra Melquisedec.

¹⁸Yacan cuenda nacoo Nyoo ley tsahnu can tyin ña cuví jatyinyéé tsi tsi nyivi, tan ña cuví cacu nyivi jahá tsi. ¹⁹Ley can ña cuví janduvalha tsi tsi nyivi nu Nyoo. Yacan cuenda tsahá ra inga tsa vaha ca tsi yo. Tan tsa vaha ihyá jatyinyéé tsi tsi yo tsa cuví natuhún yo tsihin Nyoo. Yacan cuenda nyitá iñi yo tuhun can, tan tuhun can cuví ra Cristo.

²⁰Nyoo cahan catsi ra tyin tacan cua cuvi, tan tacan cuví. ²¹Tandihi ca maa ra jutu tsa iyó vityin naha ra nduve náa cahan Nyoo tuhun ra naha. Maa tyin quíví tsahá Nyoo tsi ra Cristo tsa cuví ra jutu, cahan catsi ra tsihin ra tumaa caahán nu tutu ra tyehen: Cahan catsi Jutu Mañi yo, tan ña nasama ra tsa cahan ra nu catyi ra tyehen:

“Yoho ña cua ndihí maa tsa cuví un jutu, tyin cuví un jutu tumaa ra Melquisedec”, catyi Nyoo.

²²Tsa cuenda tsa javaha ra Cristo, tan tsító yo tyin vaha ca tyiñu ndoo Nyoo tsihin yo tan ñavin ca tsa jihna ñi can. ²³Jutu tsa cuví tata ra Leví cuaha xaan ra naha tsa cuenda tyin tun tsiihí iin ra, nacosó inga ra. ²⁴Maa tyin ra Jesús nduve tuhun tsiihí iyó tsi ra,

yacan cuenda ña tsindihí tsa cuví ra jutu.
²⁵ Tan tsa cuenda yacan cuví jacacu ra tsi nyiví tsa nanducú tsi Nyoo. Tan tsahá ra tsa coo cuui ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityí nuu tsa tsíñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quita tsiyo ra nu iyó nyiví iyó cuatyí tan nandaa ra ityí siquí andivi. ²⁷ Ra Jesús ñavin tumaa inga ra jutu tsaahnu can naha ra cuví ra, tyin ra icán naha ra cuñí tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. ²⁸ Ley Nyoo tsa naquihín cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsí ley can, cahán catsi Nyoo tan ndoo ra iin tuhun tsaa tsihin yo. Tan tsaha ra tsi Sehe ra tsa cuví ra jutu tsaahnu cuví ityí nuu ca. juvin ra cuví ra vaha tan ña cua cundihí maa tsa vaha ra.

8

Quivi tsihí ra Jesús tsa cuenda yo tan ndoo Nyoo tuhun tsaa tsihin yo

¹ Yacan tuhun ihyá cuví tsa ñiñi ca caahán yu: Ra jutu tsaahnu tsa iyó tsi yo ndi intuhun cuatyí ra nduve iyó, tan juvin ra tsinyaa nu tyayu tsa nyaá xiin cuaha Nyoo nda gloria. ² Tan ra jutu ihyá jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahá tan ñavin vehe ñuhu tsa javahá nyivi. Tyin vehe ñuhu tsa javahá nyivi cuví tsi tixahñu tsa vaha tsa iyó nda gloria. ³ Tandihí ra jutu naha ra, cuñí tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñí tsi jamañi ra Jesucristo tsa jamañi ra nuu Nyoo. ⁴ Tun tsatinyi nyí ra nu ñuhu ñayivi ihyá, ndi ña cuvi cuvi ra jutu. Tyin nu ñuhu ñayivi ihyá, iyó ra jutu tsa jamañi nuu Nyoo tsa catyí ley tsa tyaqá ra Moisés tyin jamañi ra naha. ⁵ Ra jutu tsa iyó nu ñuhu ñayivi ihyá naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu

ñi cuví tsi, tyin tahán tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyehen: “Jaha cuenda vaha, tan javaha tandihí tumaa janahá yu tsi un quivi tsahan un yucu Sinaf”, catyi Nyoo tsihin ra. ⁶ Maa tyin ra Cristo ra cuví jutu tsaahnu cuví ityí nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoo Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatinyi cuví cacu yo jahá tuhun tsa ndoo jihna Nyoo tsihin yo, ña cuñí tsi tsa ndoo ra inga tuhun tsaa tsihin yo. ⁸ Maa tyin Nyoo nyehe ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyí ra tyehen:

Cua tsaa quivi
cua ndoo yu tuhun tsaa tsihin nyivi Israel
tan nyivi Judá.

⁹ Maa tyin ñavin tumaa tuhun tsa ndoo yu tsihin tsii tsaahnu ñi,
quivi tiñi yu ndaha ñi tan tava yu tsi ñi
ñuhu Egipto.

Ña javahá ñi tuhun ndoo yu tsihin ñi,
yacan nacoq ihñi yu tsi ñi, catyí Nyoo Jutu
yo.

¹⁰ Tuhun tsaa tsa cua ndoo yu tsihin nyivi
Israel nu cuahán ca tsi ityí nuu, cuví
tsehe, catyí Nyoo Jutu yo:

Cua tyihi yu ley yu tsitsi tsa tsíñi tuñi jiñi
ñi,

tan cua tyaa tucu yu itsi añima ñi.

Tacan tan cua cuvi yu Nyoo ñi,

tan maa ñi cua cuvi nyivi yu.

¹¹ Tacan tan ña ñiñi ca tsa jacuahá ñi tsi inga
ñi, na nacoto ñi tsi yuhu tsa cuví yu
Nyoo ñi.

Tyin tandihí ñi tan cua nacoto ñi tsi yu,
ñi nyihi tan nda cuanda ñi tsahnu.

¹² Cua jaha yu tucahnu iñi tsi ñi vasu ndi maa
cuaha tsa caquiñi javahá ñi.

Tan ña cua nducuhun ca maa iñi yu cuatyí
ñi, catyí Nyoo Jutu yo.

¹³ Quivi tsa cahán Nyoo tyin cua ndoo ra
tuhun tsaa tsihin yo, tsa jandutsahnú ra
tuhun tsa jihna ñi can. Tan tuhun tsa
ndutsahnú tsa cua cundihí tsi.

Nu janahá tsi nácaa iyó vehe ñuhu tsa iyó nu ñuhu ñayiví tan vehe ñuhu nu cuví nda gloria

¹ Quiví ndoo Nyoo tuhun tsa jihna ñi tsihin nyíví, tsahá ra cuhva nácaa jacobhnu ñi tsi ra, tsitsi vehe ñuhu tsa tsicoq nu ñuhu ñayiví ihyá tahán tsanaha. ² Tyehen tsicoq vehe ñuhu can: Tsitsi vehe tsa jihna ñi nyaq candileru, tan nyaq mesa nu yucu paan ii. Tan yacan tsinañi Vehé li. ³ Tan vehe tsa tsinu uvi tsinañi Vehé li Xaan. ⁴ Tsitsi vehe can tsinyaqá altar xuhun cuaan nu tsahmí ra jutu cutu. Tan tsinyii tucu tsatun cuenda tsa ndoo Nyoo tuhun tsihin yo, tsa ndasí tsihin xuhun cuaan. Tsitsi tsatun can tsinyii yatsin xuhun cuaan nu yihí maná. Tan tsinyii yutun tsa tsindahá ra Aarón tsa quita ita nuu. Tan tsiyucu tucu yuu nu nyaq tsa utsi ley Nyoo. ⁵ Tan siquí tsatun can tsinyaa tsa cáá tumaa caá ángel, tan cuñí tsi catyí tyin nyaq Nyoo ican. Nditsin ángel can tyasi nu tuhvá Nyoo jahá tucahnu iñi tsi nyíví. Tsa vityin ña cuví nacatayí tuhun ca ndi siquí tuhun ihyá.

⁶ Tacan tsicoq vehe ñuhu can. Tandíhi ñi quíví quihví ra jutu naha ra tsitsi Vehé li, tan jacobhnu ra naha tsi Nyoo. ⁷ Maa tyin Vehé nu li Xaan, intuhun ñi maa ra jutu tsahnu cuví ityí nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñí tsi cundaha ra niñi quítí tyin jamañi ra itsi tsi Nyoo tsa cuenda cuatyí maa ra tan cuenda cuatyí nyíví, ñi tsa jahá soho ñi maa cuatyí. ⁸ Tan tsa tacan tsicoq yacan Tatyí li Nyoo janahá ra tsi yo tyin tsitsi tsa ndi jacobhnu ra jutu naha ra tsi Nyoo tsitsi Vehé li cuñí tsi catyí tyin ñaha ca nuña ityí quihví ndáa nyíví tahan ñi maa tsi tsitsi Vehé nu li Xaan. ⁹ Tandíhi yacan cuví can tumaa tixahñu tuhun tsaa tsa ndoo Nyoo tsihin yo vityin. Tahán tsanaha jamañi nyíví tsa jamañi ñi nu Nyoo maa tyin ña jatyinyee can tsi nyíví tsa jacobhnu tsi Nyoo tsihin can, tsa caca vaha iñi ñi. ¹⁰ Tyin tandíhi tsa jahá nyíví can caahán tsi maa ñi tsa cuenda tsa tsaha Nyoo ndatu catisi ñi, tan coho ñi, tan nácaa nduvaha cuñú ñuhu ñi nuu ra. Tsahá ra tsa jahá ñi tacan tsa numi ñi, nda tahan maa tsi quíví cuhva ra tsa vaha ca.

¹¹ Vityin tsa yahá quitsí ra Cristo tsa cuví jutu tsahnu cuví ityí nuu tsa cuenda tuhun vaha ca tsa ndoo Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa jahá nyíví. Yacan cuñí tsi catyí tyin ñavín vehe ñuhu iyó nu ñuhu ñayiví ihyá cuví nu quihví ra. ¹² Ra Cristo quihví ra tsitsi Vehé li Xaan. Maa tyin ña quihví ra tsihin tsa jamañi ra niñi mbee lee, o niñi indiquí lee. Quihví ra tsihin niñi maa ra, tan iin tsaha ñi quihví ra tan ña cuñí ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuui ra tsi yo. ¹³ Ra jutu naha ra tuhvá ra naha quítí niñi toro, niñi mbee, tan nyaq nu cayú indiquí lee tsi nyíví. Tsihin yacan nduvahá ñi nuu Nyoo, maa tyin maa ñi cuñú ñuhu ñi nduvaha, tan ña nduvahá añima ñi. ¹⁴ Tun tacan jatyinyee niñi quítí can tsi nyíví, cuñí tsi catyí tyin jniñi ra Cristo cahnu ca tunyee iñi iyó itsi! Tyin nduve cuatyí ra tsicoq tan jamañi ra juvin ñi tsi maa ra nuu Nyoo jahá Tatyí li tsa ña cua cíu maa. Tan niñi ra quihín nyaq tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihí tsi yo, tan cuví jahá tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndahavi tsaha yo tsa cuenda tuhun tsaa tsa ndoo Nyoo tsihin yo. Tan tsa cuenda tsa tsihí ra, jahá Nyoo tucahnu iñi tsi yo tsa cuenda cuatyí tsa jahá yo quíví yihí ndaha tuhun jihna ñi can tsi yo. Tyin tacan tan yoo, tsa canq Nyoo cuvi naquihin cuenda yo ñayiví tsa ña cua naa maa coo yo, tsa catyí ra tyin cuhva ra tsi yo. ¹⁶ Tun iin nyíví tsihí tan nacoq ñi iin tutu nu tsahá cuenda ñi yóo nyíví cua naquihin tsa iyó tsi ñi, nyíví tsa cua naquihin ndaha tyiñu can cuví naquihin ñi can, maa tyin cuñí tsi janahá ñi iin tutu cuví tsandaa tyin nditsa tsa tsahí ra tsa jahá tutu can. ¹⁷ Maa tyin tun ndi nyito ra jatsii ndaha tyiñu can, ña cuvi naha naquihin ñi ndaha tyiñu ra. ¹⁸ Yacan cuenda quíví ndoo Nyoo tuhun tsahnu can tsihin nyíví Israel, tsahñi ra jutu naha ra quítí tan tsatí niñi tì naha tì. ¹⁹ Tsa ndihí tsaha cuenda ra Moisés ley Nyoo tsi tandíhi nyíví, tan quihín ra jahma cuaaha tsa tsinu tsihin ixi mbee ticateyi tan iin soco yutun luhlu tsa nañí hisopo, jatyíj ra can tsitsi nu yihí niñi indiquí lee tan niñi mbee luhlu tsa saca nuu tsihin ndutyá. Tacan tan

quití ra niñi can nu libru nu nyaá ley Nyoo tan quití ndíhi tucu ra can tsi nyívi.²⁰ Tacan tan catyí ra tsihin ñi tyehen: “Niñi ihya cuví tsandaa tsa cuenda tsa ndoq Nyoo tuhun tsihin yo”, catyí ra.²¹ Tan juvin ñi quití tucu ra Moisés niñi can vehe ñuhu jahma can tan tandíhi ndaha tyiñu tsa tsatyinuñi ra jutu naha ra tsa jacahnú ra naha tsi Nyoo.²² Tacan javaha ra naha tyin catyí ley Nyoo tyin tsa yatyin tandíhi tsa iyó tan cuñi tsi nduvaha can nuu Nyoo tsihin niñi. Juvín ñi catyí tucu tsi tyin tun ña cati niñi ña cua jaha Nyoo tucahnú iñi tsi nyívi.

Niñi ra Cristo nacatý cuatyí yo

²³ Javaha ra jutu naha ra tacan tyin cuñi tsi tsa nduvaha tandíhi ndaha tyiñu tsa cuví tixahñu tsa iyó nda gloria tsihin niñi quití. Maa tyin tandíhi tsa iyó nda gloria, cuñi tsi nduvaha can tsihin niñi vaha ca, ñavin tsihin niñi quití ñi.²⁴ Ra Cristo ña quihví ra tsitsi vehe ñuhu tsa javaha nyívi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahví ra tsihin Nyoo tsa cuenda yo.²⁵ Ra jutu tsahnu cuví ityi nuu cuenda nyívi Israel quihví ra naha tsitsi Vehe li Xaan iñi tsaha ñi tsa iin iin cuiya tyin jamañi ra naha niñi tsa ñavin niñi maa ra naha cuví. Maa tyin ra Cristo, ña cuñi tsi tsa jamañi ra tsi ra tañi tañi ñi nuu Nyoo.²⁶ Tun tsatyin tacan, cuñi tsi tsa cuenda quitsi ñi ra nyehe ra tundoho tan cíu ra nda tsa tsinu ñuhu ñayivi tan nda cuanda vityin. Maa tyin vityin tsa tsa cuyatín cundíhi ñuhu ñayivi ihya, iin tsaha ñi quitsi ra Cristo, tan jamañi ra tsi ra tyin tacan tan cuví quihin nyaá ra cuatyí yo.²⁷ Tumaa cua tahan yo: iin tsaha ñi cua cíu yo. Yaha can tan cua cutuñi yo.²⁸ Tacan iin tsaha ñi tsihí ra Cristo, tan quihin nyaá ra cuatyí cuaha xaan nyívi. Yaha can tan cua quitsi ra tsinu uvi tsaha, ñavin ca tsa quitsi jamañi ra tsi ra tsa cuenda cuatyí, tyin cua quitsi ra quitsi jacacu ra tsi nyívi ndatú tsi ra.

10

¹ Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quitsi. Tsa catyí ley can, ña cuví janduvaha tsi tsi nyívi nanducú tsi Nyoo tyin maa ñi maa niñi quití jamañi ra jutu tsahnu cuví ityi nuu naha ra tan iin tan cuiya. Tan ña

cuví cacu yo tsihin yacan.² Tun tsatyin cuví janduvaha ley can tsi nyívi, cua cundíhi tsa jamañi ra jutu naha ra niñi quití tandíhi ñi cuiya. Tyin tun tsa nduvahá nyívi tsa tsahá quití can iin tsaha tsa cuenda tandíhi maa, ña cua caca ca iñi ñi tun iyó cuatyí ñi tan ña cuñi ca tsi tsa jamañi ra jutu niñi quití tsa cuenda ñi inga tsaha.³ Maa tyin tsa jamañi ra jutu naha ra niñi quití tan iin tan iin cuiya, janducuhún iñi tsi tsi nyívi tyin iyó cuatyí ñi.⁴ Tyin niñi indíquí tan niñi mbee lee, ña cuví nacatý can cuatyí nyívi.

⁵ Yacan cuenda catyí tutu Nyoo tyin ra Cristo cahán ra tyehen tsihin Nyoo:
Ña cuñi un tsa jamañi nyívi quití nuu un, yacan cuenda tsahá un tsa coo cuñu ñuhu yu.

⁶ Tyin ña taahán iñi un tsa cahmi ñi quití tan jamañi ñi nuu cun tan quihin nyaá un cuatyí ñi.

⁷ Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñi maa un tumaa nyaá tuhun yu nu libru ley maa un”, catyí ra Jesucristo.

⁸ Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyívi quití nuu ra. Ndi tsa cahmi ñi quití tan quihin nyaá ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñi tsi jamañi nyívi quití nuu ra, catyí ra.

⁹ Yaha can tan catyí tucu ra: “Nyoo Jutu yu, va yu ihya, vatsí yu vatsí javahá yu cuhva cuñi maa un.” Tuhun ihya cuñi tsi catyí tyin quitsi ra jatsiyo cuii ra tsa jamañi nyívi tan jamañi ra tsa vaha ca.¹⁰ Tsa cuenda tsa javaha ra Jesucristo cuhva cuñi jutu ra tan janduvahá jutu ra tsi yo. Tsa javaha ra cuvi tsa jamañi ra juvin ñi tsi maa ra. Javaha ra tacan iin tsaha ñi tsa cuenda cuatyí nyívi.

¹¹ Tandíhi ñi quiví tan jamañi ra jutu cuenda nyívi Israel naha ra quití nuu Nyoo, tan cuaha xaan tsaha jamañi ra naha iin ñi maa nuu quití maa tyin ña cuví quihin nyaá can cuatyí nyívi.¹² Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaä ra nuu tyayu nyaá xiin cuaha Nyoo.¹³ Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu.

¹⁴ Tyin tsihin tsa jamañi ra tsi ra iin tsaha ñi tan janduvahá ra tsi nyívi yihí cuenda ra yoso cuahán quivi.¹⁵ Tatyí li Nyoo juvin ñi

janahá tucu ra yacan tsi yo. Tsa jihna ñi catyí ra tsihin yo tyehen:

¹⁶ Tuhun tsaa tsa cua ndoo yu tsihin nyíví quíví can, tyehen cua cuvi tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsiní tuñi iñi ñi, catyí ra.

¹⁷ Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquíñi jayahá ñi, catyí Jutu Mañi yo.

¹⁸ Yacan cuñí tsi catyí tyin tsa yahá jaha Nyoo tucanhnu iñi tsi yo. Yacan cuenda ña cuñí ca tsi cahñi yo quítí, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

¹⁹ Yacan cuenda yañi, vityin cuví quihvi yo tsitsi Vehe li Xaan nu nyaá Nyoo, tsa cuenda niñi ra Jesucristo tsa tsatí. Tsihin niñi can nacatya ra cuatyí yo. ²⁰ Tan nuñá ra ityí tsaa, tan iñi ityí cuhun yo nu coo nyito yo. Tyin cuhva tsa tsihí ra tan ndatajahma tsa tyasí tsa ña cuví quihvi yo nu nyaá Nyoo. Tsa ndatajahma can, cuví tsa tsihí ra Cristo, tyin tacan tan cuví cuhun yo nu nyaá Nyoo.

²¹ Ra Jesús cuví jutu tsaahnu cuví ityí nuu tsa ndacá ñaha tsi nyíví yihí cuenda Nyoo.

²² Yacan cuenda cuñí tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinú iñi yo tsi ra. Tyin maa raja janduvaha añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatya ra cuñú ñuhu yo tsihin ndutyá cuii, tan nduvahá yo nuu Nyoo. ²³ Na ndu iñi ca iñi yo tsinú iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo.

²⁴ Tan cuñí tsi nanducu yo cuhva jatyinkee tahan yo tsi yo, na cuñí tahan ca yo tsi yo tan jayahá yo tsa vaha. ²⁵ Ña taahán tsi jandihí ndo tsa tsicá ndo tuhun Nyoo tumaa jayahá inga nyíví tsa ña tsicá vaha. Tyin cuñí tsi jandu iñi tahan yo iñi yo. Vityin tsa tsa nyehé yo tyin tsa cuyatin quitsi nyico Jutu Mañi yo tan cua jacutuñi ra tandihí nyíví, cuñí tsi tsa jatyinkee tahan ca yo tsi yo.

²⁶ Tyin tun tsa tsitó yo tsa nditsa tan jayahá ca maa yo tsa ña vaha, nduve ca nácaa jayahá yo tan cuvi jaha Nyoo tucanhnu iñi tsi yo. ²⁷ Cua tatsi tuní Nyoo tsi yo. Tan

cua tyihi ra tsi yo nu yucú nyíví xaan iñi tsi ra. Tan ican cua cayu yo iñi caa ñi tsihin ñi. ²⁸ Tatun iñi nyíví tsa nyitá iñi ley Nyoo tsa tyaq ra Moisés tan ña tyá yahvi ñi tsa catyí ley can, tan tatum iyó uvi o uñi ra cuví tsanda tsa cuenda tsa jayahá ñi, cua cùu ñi tsa cuenda cuatyí ñi, tan yoñi maa cua cundaahví iñi tsi ñi. ²⁹ Tan yaha ca cua tatsi tuñi Nyoo tsi nyíví caahán ndavaha ñi siqui Tatiyí li ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvahá añima ñi. Tan tsihin niñi can ndoo Nyoo tuhun tsihin yo. ³⁰ Tsitó yo tyin catyí Jutu Mañi yo tyehen: "Maa yu taahán tsi tatsi tuñi tsi nyíví; tan juvin yu cua cahan náa taahán tsi tahan ñi." Juvin ñi catyí tucu ra tyin maa ra taahán tsi jacutuñi tsi nyíví ra. ³¹ ¡Cahnu xaan tundoho cua neyhe nyíví yosó ica tsi Nyoo nyito tsa cuenda cuatyí ñi!

³² Maa tyin nyoocho nducuhun iñi ndo nácaa cunyeé xaan iñi ndo nyehé ndo tundoho tsa yahá naquihín cuenda ndo tsa nditsin Nyoo tsitsi añima ndo. ³³ Yihí nyoocho cahán nyíví tsi ndo, tan janyehé ñi tundoho tsi ndo nu tuvi nyíví. Tan yihí ndo cundaahví iñi ndo nyehé ndo tsi nyíví vaha iñi tsi ndo tsa tahán juvin ñi tacan.

³⁴ Tan cundaahví iñi ndo nyehé ndo tsi nyíví tsiyucu vehe caa. Cunyeé iñi ndo nyehé ndo tundoho tsihin tsa sií cuñí ndo quíví quihín nyaá nyíví ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihí maa can. ³⁵ Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñuhu ndo tsa vaha ca tyin tsinú iñi ndo tsi ra.

³⁶ Cuñí tsi coo tsa taxin añima ndo tsitsi tsa cunyeé iñi ndo tyin tacan tan cuví jayahá ndo cuhva cuñí Nyoo, tan naquihín ndo tsa catyí ra tyin cuhva ra tsi yo. ³⁷ Tyin nu tutu Nyoo catyí tsi tyehen:

Ña naha ca
tan quitsi ra tsa nyaá quitsi, tan ña cua cucuee ca ra.

³⁸ Tan catyí Jutu Mañi yo tyehen: "Nyíví naquihín cuenda yu tumaa tsatiny vaha ñi, tsihin tsa tsinú iñi ñi tsi yu tan cua coo nyito ñi."

Maa tyin tatum jandihí ñi tsa tsinú iñi ñi, ña sií cua cuñí yu tsihin ñi", catyí Nyoo.

³⁹ Maa tyin yoo ña jayahá yo tumaa jayahá nyiví jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

11

Cuhva cuñi tsi tsa tsinú iñi yo tsi Nyoo

¹ Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo. ² Juhva nyiví yo tsa tsicoo tahan tsanaha quitá vaha ñi nuu Nyoo tyin tsinú iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin jayahá ra ñuhu ñayivi tsihin tuhun caahán ra. Tan tsitó yo tyin tahan tsanaha tsinú tandihi tsa nyehé yo vityin tsihin tsa ña nyehé yo.

⁴ Tsa cuenda tsa tsinú iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Caín, yañi ra. Tsa cuenda yacan naquihín cuenda Nyoo tsi ra tumaa tsatyin vaha ra, tan naquihín cuenda tucu ra tsa jamañi ra. Vasu ndi maa ña nyito ca ra Abel, maa tyin tsiní yo nácaa tsinú iñi ra.

⁵ Tsa cuenda tsa tsinú xaan iñi ra Enoc tsi Nyoo, tan naquihín Nyoo tsi ra tyin tacan tan ña nyehe ra tuhun tsihí. Tan ña nañihí ca nyiví tsi ra, tyin cuanuhu ra tsihin Nyoo. Catyí tsi nu tutu Nyoo tyin tsa ndi cumañi ca naquihín Nyoo tsi ra, maa ñi maa cuhva taahán iñi Nyoo jayahá ra. ⁶ Maa tyin ña cuví jayahá yo tsa taahán iñi Nyoo tatum ña tsinú iñi yo tsi ra. Tyin tatum cuñí yo nanducu yo tsi ra, cuñí tsi tsinú jihna iñi yo tyin iyó ra, tan tsahá ra tsa vaha tsi nyiví nanducu tsi ra.

⁷ Tahan tsanaha jacoto Nyoo tsi ra Noé náa cua cuvi ityi nuu. Vasu ndi maa ñaha ca coo can nyehé ra Noé, tsinú iñi ra tanjavaha ra yutun ndoo tan ican cacu ra tsihin nyiví vehe ra. Nyivi tsa ñia tyaa yahvi tsa cahán Nyoo, tatsi tuñi ra tsi ñi. Maa tyin jacacu ra tsi ra Noé tan nduvahá ra nuu ra tsa cuenda tsa tsinú iñi ra tsi ra.

⁸ Ra Abraham tsinú iñi ra tan tyaa yahvi ra tsi Nyoo quivi cana Nyoo tsi ra. Quita ra nu ñuhu ra tan cuahán ra nu ñuhu tsa cuhua cuui Nyoo tsi ra. Vasu ndi maa ña tsitó ra nu maa cuahán ra, maa tyin quita ra nu ñuhu ra tan cuahán ra. ⁹ Tsa cuenda tsa tsinú iñi ra Abraham tsi Nyoo, tsicoo ra

nu ñuhu tsa ñaha ca nacuhva cuenda Nyoo tsi ra. Tsicoo ra tsitsi vehe jahma ñi. Juvín ñi tacan tsicoo tucu ra Isaac, sehe ra, tan ra Jacob, sehe ra Isaac. Tyin juvin ñi catyí tucu Nyoo tsihin nduví taahan ra can naha ra tyin cua cuhva ra ñuhu can tsi ra naha.

¹⁰ Ra Abraham ndatú ra coo ra iin ñuu tsa ñua cua náa maa; iin ñuu tsa vaha ca tsa cuhua Nyoo tsi ra. Tan ñuu tsa ndatú ra maa Nyoo tsaqñin cuhva tsaha tsi tan samá itsi.

¹¹ Tan juvin ñi tsa cuenda tsa tsinú iñi ña Sara tsa cahán Nyoo tsihin ña, tsicoo iin sehe ña. Vasu ndi maa tsa tsahnu xaan ña, cuví tsicoo sehe ña tyin maa Nyoo tsaha tunyee iñi ra tsi ña. Tacan cuví tyin tsinú iñi ña tyin cua cunda tsa cahán Nyoo tsihin ña. ¹² Yacan cuenda vasu ndi maa tsa cuñí cúu cuui ña ra Abraham, maa tyin tsicoo sehe ñasihi ra. Yaha can tan tsicoo cuaha nyiví tata ra. Tan yoñi maa cuví nacahvi tsi ñi tyin cuaha xaan ñi, tumaa cuaha tiñuu iyó andiví tan tumaa cuaha nyiti iyó yuhu ndutuya ñuhu.

¹³ Tandihi nyiví can tan nyivi tata ñi tsihí ñi tsa ndi cumañi ca naquihín cuenda ñi tsa catyí Nyoo tsihin ñi tyin cuhva ra tsi ñi. Vasu ndi maa ña ñihí ñi can, tsinú iñi ñi tyin cua cuhva Nyoo can. Yacan cuenda sii cuñí ñi tyin tsitó ñi tyin coo quivi cua nyehe ñi can. Tan sii tucu cuñí ñi caahán ñi tyin yahá ñi maa ñi nu ñuhu ñayivi ihyá. ¹⁴ Tan tsa caahán ñi tacan, cuñí tsi catyí tyin ndi tsicá ñi nanducú ñi iin nu vaha ca coo ñi. ¹⁵ Tun tsatayin ñuhu iñi ñi ñuu ñi nu quitá ñi, cuví cunuhu nyico ñi iin yaha ñi. ¹⁶ Maa tyin ña tsinuhu ñi ñuu ñi tyin cuñí ñi coo ñi ñuu vaha ca, tuhun ihyá cuñí tsi catyí tyin cuñí ñi coo ñi nda andiví. Tan tsa tacan nducú ñi coo ñi nda gloria, ña cahán nuu Nyoo tsa cuví ra Nyoo ñi tyin tsa janduvahá ra iin ñuu nu coo ñi.

¹⁷ Tsa cuenda tsa tsinú iñi ra Abraham tsi Nyoo, tyaa yahvi ra tsa cahán Nyoo tsihin ra tan jamañi ra tsi ra Isaac, sehe mañi ra, quivi nducu cuhva Nyoo tsi ra tun nditsa tsa tsinú iñi ra tsi ra. Jovahá ra tacan vasu ndi maa catyí Nyoo tyehen tsihin ra: ¹⁸ “Tsa cuenda ra Isaac tan cua coo nyivi tata un.”

¹⁹ Vasu ndi maa cahán ra tacan tsihin ra Abraham, ra Abraham ña nayuhví ra tsa cuhua cuenda ra sehe ra tsi Nyoo, tyin tsitó ra tyin iyó tunyee iñi tsi Nyoo tsa janandoto ra ndiyi. Quivi can tsa nyaá ra Abraham tsa

cahñi ra tsi ra Isaac, sehe ra. Maa tyin Nyoo nacuhvá cuenda nyico ra tsi ra Isaac tsi ra. Tan cuví can tumaa tsa janandoto Nyoo tsi ra.

²⁰Juvín ñi tsa cuenda tsa tsinu tucu iñi ra Isaac tsi Nyoo, tan catyí ra tyin ra Jacob tan ra Esaú, sehe ra, cua ñihí ra naha tsa vaha nu cuahán ca tsi. ²¹Tsa cuenda tsa tsinu iñi ra Jacob tsi Nyoo, tan catyí ra tyin nduví taahan sehe ra José cua ñihí ra naha tsa vaha jaha Nyoo. Tan nyaá naa ñi ra yutun tsa tsindahá ra tan jacahnu ra tsi Nyoo tyin tsa tsahnu xaan ra. ²²Juvín ñi tsa cuenda tsa tsinu iñi ra José tsi Nyoo, catyí ra tsa tsu cuñí cíu ra tyin cua quita nyiví ra, ñi Israel, ñuhu Egípto. Tan tsahá cuenda tucu ra tsi nyiví tyin quíví quita ñi na quihin ñi yiquí ra cuhun tsihin ñi.

²³Tsa cuenda tsa tsinu iñi jutu ra Moisés tan sihí ra tsi Nyoo, tyihí xeehe ñi tsi ra uñi yoo tyin nyehe ñi tyin sii xaan caá ra. Ña nayuhví ñi tsa cahan ra rey tyin cuñí tsi cíu tandihí sehe yíi nyiví [tsa cuenda tyin tsító ñi tyin cua jacacu Nyoo tsi ra]. ²⁴Tsinu tucu iñi ra Moisés tsi Nyoo. Yacan cuenda quíví tsahnu ra, ña cuñí ca ra cuví se he ñaha cuví sehe ra rey ñuhu Egípto. ²⁵Tan nacoq ra ñuhu Egípto can tyin ña cuñí ra cusíi iñi ra tsihin tsa javaha ra tsa caquíñ. Tan nacatsí ra tsa cua nyehe ra tundoho tsihin nyiví Nyoo tan ñavin ca tsa cusíi iñi ra tsihin tsa tsindihí ñi maa. ²⁶Tsa cuenda ra Moisés, vaha ca tsa cuca ra Cristo tan ñavin ca tandihí tsa cuca tsa iyó Egípto. Yacan cuenda sii cuñí ra nyehe ra ticanuu tsa cuenda ra Cristo tyin tsító ra tyin cua ñihí ra tsa cua cuhva Nyoo tsi ra. ²⁷Juvín ñi tsa cuenda tsa tsinu iñi ra Moisés tsi Nyoo, ña nayuhví ra quitá ra ñuhu Egípto, vasu ndi maa cuxaan ra rey tsi ra. Tan cunyee xaan iñi ra tyin tumaa tsatinyen nyehe ra tsi Nyoo tsa ña nyehé yo.

²⁸Juvín ñi tsa cuenda tsa tsinu iñi ra tava tyíñu ra na jacahnu tandihí nyiví Israel vico tan cahñi ñi iin mbee ticatyí luuhlu. Tan tava tyíñu tucu ra na cahyí ñi niñi mbee can quisiyu yuvehe ñi, tyin tacan tan tsa cua yahá ángel Nyoo cahñi ra sehe nuu nyiví Egípto, ña cahñi ra ndi intuhun sehe nuu maa ñi. ²⁹Tsa cuenda tsa tsinu iñi ñi Israel tsi Nyoo tan yahá sava ñi nu Ndutyá Ñuhu Cuaaha tumaa nu ñuhu ityi. Ra Egípto naha ra cuñí ndihí tucu ra naha yaha ra naha,

maa tyin ña cuví yaha ra naha tyin nacasi Nyoo ndutyá ñuhu can siquí ra naha tan tsihí ra naha jahá ndutyá can.

³⁰Juvín ñi tsa cuenda tsa tsinu iñi ñi tsico nduví ñi utsa tsaha tsata ñuu Jericó, tan tandihí cuii maa nu sama tsaha ñuu can taní. ³¹Juvín ñi tsa cuenda tsa tsinu iñi ña Rahab, ñaha sii iñi tsica nuu tsa tsicoq Jericó, tan ña tsihí ña quíví tsihí tandihí nyiví ñuu ña. Ña tsihí ña tyin jatyinyee ña tsi ra Israel ra tsa tsahán naha ra tsinyehe ñuu ña. Tandihí ca ñi tsihí ñi tsa cuenda tsa ña tyaa yahvi ñi tsi Nyoo.

³²¿Náa ca cua cahan yu vityin? Tyin ña cuyatyí yu cahan yu tuhun tandihí ra naha, tumaa ra Gedeón, ra Barac, ra Sansón, ra Jefté, ra David, tan ra Samuel, tan ra cuví ndusu yuhu Nyoo naha ra tahán tsanaha.

³³Tsa cuenda tsa tsinu iñi ra naha tsi Nyoo, tan yihí ra naha jahá canaa ra naha tsi inga ñuu nahnu. Tan yihí ra naha vaha xaan tsindacá ñaha ra naha nyiví cuenda Nyoo. Yihí ra naha ñihí ra naha tsa catyí Nyoo tyin cuhva ra tsi ra naha. Yihí ra naha jatyinyee Nyoo tsi ra naha quíví nducu cahñi ndicaha tsi ra naha. ³⁴Yihí ra naha ña cayu ra naha jahá ñuhu tsitsi ono nu tyihí nyiví tsi ra naha. Yihí ra naha cacu ra naha tan ña tsahñi nyiví tsi ra naha tsihin mityi. Yihí ra naha tsahá Nyoo tunyee iñi tsi ra naha quíví nduve tunyee iñi tsicoq tsi ra naha, tan cuví cañí tahan ra naha tsihin nyiví xaan iñi tsi ra naha tan jahá canaa ra naha tsi ñi. ³⁵Tsicoq juhva ñiñaha, tsa nandoto nyiví.

Juhva nyiví tsinuhñi ñi tan ndoho ñi jahá nyivi, maa tyin vasu ndi maa tacan tahan ñi, cunyeé xaan iñi ñi tan ña cuñí ñi ndoo nuña ñi. Nyiví can catyí ñi tyin tun nacoq ñi tsi Nyoo ña cua nyehe ca ñi tundoho, maa tyin ñi ican ña cuñí ñi tyin tsító ñi tyin vasu ndi maa cíu ñi, cua nandoto ñi inga tsaha tan cua coo ñi iin ñayiví vaha ca.

³⁶Inga ñi nyehe ñi tundoho jahá nyiví tyin caahán nyaá nyiví can tsi ñi tan cañí ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. ³⁷Yihí ñi tsahñi nyiví tsi ñi tsihin yuu. Yihí ñi tsahñá sava nyiví tsi ñi tsihin cierra. Yihí ñi nducu cuhva nyiví tsi ñi. Yihí ñi tsahñi nyiví tsi ñi tsihin mityi. Yihí ñi tsinditsi ñi ñiñ mbee

ticaty i tan ñii mbee; nduve jahma vaha ñii tsicoq tan ndi nduve vehe ñii. Ndaahví xaan tsicoq ñii, tan tsicoq xaan ñi tucuihya iñi, tan nyehé ñii tundoho jahá nyíví tsa ña tsitó tsi Nyoo.³⁸ Tan nyíví ndaahví can vaha ca ñii nuu Nyoo tan ñavín ca inga ca nyíví. Tsica nuu ndaahví ñii nu tsiquí tan nu iyó yucu. Tsicoq ñii tsitsi cava tan tsitsi ñuhu.³⁹ Tandihi maa nyíví ndaahví can vasu ndi maa vaha cahan Nyoo tuhun ñi tsa cuenda tsa tsinu iñi ñi tsi ra, maa tyin ña ñihí ñi tsa catyí ra tyin cuhva ra.⁴⁰ Tyin cuní ra tsa ñihí ndihi ñi tsa vaha ca tsa tyaá ra cuhva tyin cuhva ra tsi yoo tyin tacan tan nduvaha ñii nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihi nyíví can quita vaha ñi nuu Nyoo tyin tsinu iñi ñi tsi ra. Tan vityin jandu íñi ñi iñi yo tsihin can, tan ndatú ñi nyehe ñi tatuń quita vaha yo. Yacan cuenda cuñítsi nacoo yo tandihi tsa jatyáñú tsi yo, tan tandihi cuatyí tsa tuhvá jandavi ñaha tsi yo. Tan na cunyee iñi yo cuhun yo ityí nuu ca tsihin Nyoo tsihin tsa taxin iyó añaíma yo.² Na nyehe yo tsi intuhun ñi maa ra Jesús tyin juvin ra jatyinyéé tsi yo tsa tsinu iñi yo tsi ra, tan tsahá tucu ra tandihi cuhva taahán tsi tsinu iñi yo. Ra Jesús cunyee xaan iñi ra nyehe ra tundoho tan ña tyaá yahvi ra ticanuu tsa cua tahan ra tsa cíú ra nu cruu tumaa tsihí iin nyíví iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumańi ca cíú ra, tan tsa tsitó maa ra tyin sií xaan cua cuñí ra tsa yaha cíú ra.

³Jaha ndo cuenda cuhva tsicoq ra Jesús, tyin ra Jesús nyehe xaan ra tundoho jahá nyíví iyó cuatyí, maa tyin cunyee iñi ra. Tacan tucu nyoho, ña cundihi iñi ndo tan ña ndu uvi iñi ndo tsa nyicún ndo tsi ra.⁴ Tyin nyoho ñaha ca nyehe ndo tundoho tumaa nyehe ra Cristo tundoho tsa cañí tahan ra tsihin tsa caquiñi tan tsihí ra. Tyin ñaha ca cíú ndo jaha tsa cañí tahan ndo tsihin tsa caquiñi.⁵ A tsa naa iñi ndo nácaa jaquihín ityi Nyoo tsi yo tsa cuví yo sehe ra? Catyí ra nu tutu ra tyehen:

Sehe luhlu yu, ña cuxaan un tatuń tsahá cuenda yu tsi un nácaa taahán tsi jahava un.

Tan ña nducuihya iñi un tatuń cuxaán yu tsi un.

“Tyin yuhu jaquihín ityi yu tsi nyíví cuñí yu, tan tatsí tuñi yu tsi nyíví cuví sehe yu, catyí Nyoo.

⁷Janyee ndo iñi ndo tan nducu ndo culva cutuhva ndo tun jaquihin ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa jahava tandihi nyíví iyó sehe, jaquihín ityi ñi tsi sehe ñi.⁸ Tyin tatuń ña jaquihín ityi Nyoo tsi yo, ñavín sehe vaha ra cuví yo. Maa tyin tatuń jaquihín ityi ra tsi yo, juvin sehe vaha ra cuví yo.⁹ Tan inga tucu tuhun, tsa ndi nyihí yo, jutu yo nu ñuhu ñayíví ihyá jaquihín ityi ra naha tsi yo, tan jahá yo tsa ñayíví tsi ra naha. Tan vihi ca cuñí tsi tyaá yahvi yo tsi Jutu yo Nyoo, tyin tacan tan cuvi coo cuií yo.¹⁰ Jutu yo tsa iyó nu ñuhu ñayíví ihyá, jaquihín ityi ra naha tsi yo tsa cuenda juhva ñi quíví, tan jahavaá ra naha can cuhva cuñí maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra.¹¹ Nditsa tyin tsa ndi cuxaán Nyoo tsi yo nyehé yo tundoho. Maa tyin tun cutuhva yo jahava yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaá yahvi yo tsa caahán Nyoo tsihin yo

¹² Yacan cuenda ñia ndu uvi iñi ndo tsa jahava ndo tsa cuñí Nyoo jahava ndo, tan ña nducuihya iñi ndo.¹³ Ndycu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuuihya ca cua cuñí ndo.

¹⁴ Jañiñi ndo tsi ndo tan coo vaha ndo tsihin tandihi nyíví. Nacoo ndo tandihi tsa ña vaha. Tyin nyíví tsa ña nacoo tsa ña vaha ña cuvi nyehe ñi tsi Nyoo Jutu yo.¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihi ndo tan cua ñihí ndo tunyee iñi tsa tsahá Nyoo, tan ña cua ndoo tsa xaan tsitsi añaíma ndo tan ña cua tiví ndo nuu Nyoo, tyin jahá cuenda vaha ndo tsi ndo.¹⁶ Nyoho rayíi ndi intuhun ndo tan ña caca nuu ndo tsihin ñaha. Tacan tucu nyoho ñaha, ña caca nuu ndo tsihin rayíi. Tan ña caca iñi ndo tyin nduve yahvi nyaá tuhun Nyoo, tumaa tsica iñi ra Esaú, tyin ra Esaú xico ra tsa cuví ra ra tsitsa tsacatyí tsa catsi ra.¹⁷ Tsitó ndo tyin

tsa yaha yacan tan cuñí ra Esaú tsa nasoco jutú ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasama ra tsa tsa yaha javahá ra.

¹⁸ Nyoho ña taahán tsi javaha ndo tacan tyin tsaa ndo nuu Nyoo, maa tyin ñavin tu-maa tsaa nyíví Israel nuu Nyoo quíví tsahan ñi yucu Sinaí tsa cuví nyehe yo. Nyehé ñi cayú ñuhu, tan ñihí xaan yihi tatyí xaan, tan naa xaan cuví. ¹⁹ Tan tsiní ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi ²⁰ tsa cuenda tyin ña cunyee iñi ñi tsa tsahá cuenda ra tsi ñi Tyin catyí ra tyehen: “Nyíví natuhva tan cuaní tsaha yucu ihya cahñi ndo tsi ñi tsihin yuu o tsihin lanza, tahan ñi nyíví tan quití”, catyí Nyoo tsihin ñi. ²¹ Nayuhví xaan ñi tsa nyehe ñi yacan, nda cuanda ra Moisés tan catyí ra: “Ñihí xaan nihi yu jahá tsa yuuhví yu”, catyí ra.

²² Maa tyin nyoho ña nyehe ndo tsa yuuhví can tyin tsaa ndo yucu nañí Sión tsa cuví ñuu Nyoo nyito. Tuhun ihya cuñí tsi catyí ñuu Jerusalén tsa canyí nda gloria, nu iyó cuenda mil ángel. ²³ Ndu iín ndo ican tsihin tandíhi sehe Nyoo tsa iyó sivi nu libru nda gloria tan jacobino ndo tsi ra. Natuhvá ndo nuu Nyoo, ra cuví juee [tsa jandaa cuatyí] tandíhi nyíví, tan natuhvá ndo nuu tandíhi añima nyíví vaha tsa janduvahá Nyoo. ²⁴ Natuhvá tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoo Nyoo tuhun tsaa tsihin yo. Tan niñí ra Jesús tsa tsatí tsahá tsa vaha ca tsi yo tan ñavin ca niñí ra Abel. [Tyin niñí ra Abel tsicán tsi cuatyí tsaha ra yañí ra. Maa tyin niñí ra Jesús, jahá tucahnu iñi cuatyí yo.]

²⁵ Yacan cuenda cuñí tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyíví Israel tsa ña tyaa yahvi tsa cahan Nyoo quíví cahan ra yucu Sinaí nu ñuhu ñayíví ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuvi maa cacu yo. ²⁶ Tahan tsanaha jacanda Nyoo ñuhu ñayíví tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayíví, maa tyin ñavin ñuhu ñayíví ñi, tyin cua jacanda ndihí yu nda cuanda

andivi.” ²⁷ Tsa caahán ra tyin cua jacanda ra inga tsaha, cuví cutuñi iñi yo tyin cua cat-siyo tandíhi tsa javahá ra tsa cuví nacanda. Tan cua ndoo tsa ña cuví nacanda. ²⁸ Nu ndacá ñaha Nyoo nu tsahá ra cunyecu yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan naa jacahnu yo tsi ra tsihin tsa niñ iñi añima yo, tan tyaa yahvi yo tsi ra, tyin yacan cuví tsa taahán iñi ra. ²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandíhi maa tsa ña vaha.

13

Na coo yo cuhva taahán iñi Nyoo

¹ Ña jandíhi ndo tsa cuñí ndo tsi tandíhi nyíví yihi cuenda Nyoo tyin cuví ñi tumaa nyíví ndo. ² Ña naa iñi ndo tyaa nuu vaha ndo tsi nyíví tsaá vehe ndo, tyin tun javaha yo tacan nda cuanda cua cuhva yo nu coo ángel Nyoo, vasu ndi maa ña tsitó yo tun ángel cuví ra naha tumaa javahá juhva nyíví.

³ Ña naa iñi ndo tsi nyíví yucú vehe caa tumaa tsatayin yucú ndihí ndo tsihin ñi. Ndycuhun iñi ndo tsi nyíví nyehe tundoho jahá nyíví. Cundaahvi iñi ndo tsi ñi tan jatyinyee ndo tsi ñi. Tyin tsitó ndo nácaa cuñí yo tun nyehe yo tundoho.

⁴ Nyoho nyíví tsa tsa tindahá, jahá tahan ndo tsa ñayíví tsi iin ndo tan tsi inga ndo. Tan coo vaha ndo tyin Nyoo cua tatsi tuñi ra tsi rayíi tsicá nuu tsihin naha tan rayíi iyó ñasihíi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayíi tan ñaha tsa iyó yíi tun coo ra tsihin inga rayíi.

⁵ Ña caca iñi ndo nácaa javahá ndo tan cuvi coo cuahá ca xuhun tsi ndo. Ndoo ndo vaha tsihin tsa iyó tsi ndo, tyin catyí Nyoo tyehen: “Tandíhi ñi tsaha nyaá yu tsihin un, tan ña cua nacoo ihñi maa yu tsi un”, catyí ra. ⁶ Tsa cuenda yacan cuví caahán yo tyehen tsihin tsa niñ iñi añima yo:
Jutu Mañí yu juvin un jatyinyéé tsi yu,
Yacan cuenda ña yuuhví yu tun javahá nyíví náa javahá ñi tsi yu.

⁷ Ndycuhun iñi ndo tsi ra cuví itiy nuu vehe ñuhu, ra tsa caahán tuhun Nyoo tsihin ndo. Nyehé ndo tyin vaha iyó ra naha nuu Nyoo, tan cuanyicun ndo cuhva vaha tsinú iñi ra naha tsi Nyoo.

⁸ Ra Jesucristo ña nasamá ra. Juvirin ra iyó nda tsanaha, tan juvirin ra iyó vityin. Tan juvirin ra cua coo yoso cuahán quivi. ⁹ Ña cuhvá ndo jandavi ñaha nyivi tsi ndo tsihin tsa siñ siñ tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavín ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsí yo. Tan ña jatyinyee can ndi tsi maa ñi.

¹⁰ Tsati niñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. ¹¹ Ra jutu tsahnu cuví ityi nuu cuenda nyivi Israel tsindacá ra naha niñi quiti tsitsi Vehe Ii Xaan tsa cuenda cuatyi nyivi, maa tyin cuñu ti tuhvá can cayú ityi tsata ñuu. ¹² Tacan tucu ra Jesús, tava tyiñu Nyoo tsi ra tsa nyehe ra tundoho tan cíu ra ity tsa ñuu Jerusalén, tyin tacan tan janduvahra ra tsi yo tsihin niñi ra. ¹³ Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo. ¹⁴ Tyin tsa cuenda yoo nduve ñuu tsa ña cua cundihi maa nu ñuhu ñayivi ihyá. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihyá. ¹⁵ Yacan cuenda vityin tsa iyó ra Cristo añima yo, taahán tsi jañiñi yo tsi yo tan jacobhu yo tsi Nyoo tsihin tsa cata yo yaa ra, tan tsihin tsa caahán yo. ¹⁶ Ña naa iñi ndo javahra ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cuhvá ndo tsi ndo cundaca ñaha ra naha tyiñ juvirin ra naha Jahá cuenda añima ndo. Tan coo quivi cua cuhvá cuenda ra naha tyiñ jahá ra naha tsi Nyoo. Ndycu ndo cuhvá javahra ndo tsa vaha, tyin tacan tan siñ cua cuñi ra naha cuhvá cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhvá cuenda ra naha tsi ndo tsi Nyoo tsihin tucuihyá iñi, tan ña cua quita vaha ndo nuu ra.

¹⁸ Ndacan tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javahra ndi. ¹⁹ Tan tsicán yu tsa ndacan tahvi tucu ndo tsa cuenda yu na cuhvá Nyoo quitsi yu inga tsaha tsa numi ñi nu yucú ndo tan cunyii yu tsihin ndo.

Nu ndihí cahán ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo añima yo, juvirin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndog Nyoo tuhun tsaa tsa ña cua cundihi maa tsihin yo. ²¹ Tandihi tsa cuñi Nyoo javahá ra tsihin tandihí yo, maa ra Jesucristo javahá can jahá ra. Tan na javahra ra tsihin yo tsa cuñi ra javahra ra. ¡Na jacabhu yo tsi ra Cristo yoso cuahán quivi! ¡Na cuví tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javahra ndo tsa tsahá cuenda yu tsi ndo tsihin tsa taxin iyó añima ndo, tyin ña cuaha xaan tuhun tyaa yu tsa cuenda ndo. ²³ Cuñi yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsaa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyí yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuví tsi tacan ñi.

Carta Tsa Jacuhún Ra Santiago Tsi Nyívi Israel Tsa Yihí Cuenda Ra Cristo

Nu tsahá ra Santiago nacumi tsi nyiví

¹Yuhu ra Santiago cuví yu iin ra jahá tyiñu tysiñu Nyoo tan Jutu Mañi yo Jesucristo. Jaquitsí yu nacumi tsi tandihí nyoho tsa cuví ndo tata tsa utsi uvi ra sehe ra Israel tan iyó ndo ñuu nyiví tsa ñavin tata ra Israel cuví.

Tsa tsíni tuñi tsa tsahá Nyoo tsi yo

²Yañi, cysíi iñi ndo tun cuaha tundoho nyehé ndo. ³Tyin tsító ndo tyin tsihin tsa nyehé ndo tundoho tan cua cuahnu ca ndo tsihin tsa tsinú iñi ndo. Tan cua cunyee iñi ndo nyehé ndo náá ndihí ca tundoho vatsí siquí ndo. ⁴Jaña ndo na quitsi maa tundoho can siquí ndo, tyin tun tsa cunyee iñi ndo yahá ndo tundoho can, cua cuví ndo nyiví tsitsa tsihin tuhan Nyoo, tan nduve ca náá cua cumañi tsi ndo tan cua cunyee ndo yahá ndo tandihí maa tundoho tsa cua quitsi siquí ndo.

⁵Ndáa nyoho cumañi tsa tsíni tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyiví tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náá tsicán ñi tsi ra. ⁶Maa tyin cuñí tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihí yo tsa tsicán yo, cuví yo tumaa ndutya ñuhu tsa tandahá tatyí ityi ihyá tan ityi can. ⁷Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸Tyin uvi xaán tsicá iñi ra. Ña tyáa iñi ra tsa tsicán ra, tyin ña iin cuñí ra. Vityin cuñí ra tsa cuñí ra, tan inga tsa cuñí tucu ra tyaan. ⁹Tatun iyó iin ra yañi yo, ndaahví ra, na cusíi iñi ra tyin cahnu cuví ra jahá Nyoo. ¹⁰Tatun iin ra yañi yo, tan cuca ra, tun cua ndundaahví ra nu ñuhu ñayiví ihyá, taahán tsi cusíi iñi ra tsihin Nyoo tyin tsító ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucoyó can. ¹¹Tyin ihñi xaán cuví tsitsi cuhu jahá ñicanyii. Tacan tan na ityi ita can. Tan canacavá can tan ndihí tsa sii caá can. Tan tacan cuví ra cuca, tyin cua

quitsi tuhun tsihí tsi ra tan cua cundihí tsa cuca ra.

Nacaa cunyeé iñi yo nyehé yo tundoho

¹²Síi xaán cuví tsi ra tsa cua cunyee iñi nyehé tundoho tyin tsa yaha nyehé ra tundoho cua ñihí ra ñayiví nyito tsa catyi Nyoo tyin cuhva ra tsi ñi tsa cuñí tsi ra. ¹³Tatun ndáa nyoho tsicá iñi ndo tsa javaha ndo tsa ña vaha, ña cuñí ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴Maa tyin nyoho tsa javahá tsa ña vaha, javahá ndo can tyin cuñí ndo javaha ndo can. Tan yacan cuenda tsicoo cuatyí ndo. ¹⁵Tatun cua cuhva yo tsa caca iñi yo tuhun ña vaha, coo quíví cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cùu yo.

¹⁶Yañi, cuñí xaán yu tsi ndo. Ña jandavi ñaha ndo tsi ndo. ¹⁷Tandihí tsa vaha tan tsa vii tsa ñihí yo, quéé tsi ityi siquí tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. ¹⁸Tan tsahá ra ñayiví tsaa tsa iyó yo tsa cuenda tsa nditsa tsa caahán ra. Tyin jihna ca yo jandutsáa ra tsa nuu tandihí ca tsa javahá ra, tyin tacan cuñí maa ra.

Ityi nditsa tsa taahán tsi cuhun yo

¹⁹Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyí xaán nacahan yo tan ndi ña yatyí xaán cuxaan yo. ²⁰Tyin nyiví tsa cuxaán, ña javahá ñi tsa taahán iñi Nyoo. ²¹Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayiví ihyá. Ndaahví jáha ndo tsi ndo tan tñi cuenda vaha ndo tuhun Nyoo tsa tatsí ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. ²²Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juvin ñi tsi maa ndo jandaví ñaha ndo. ²³Tyin nyiví tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyiví nyehé nuu ñi nu inu. ²⁴Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. ²⁵Maa tyin nyiví tsa iin nyita ñi tyaá

soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cu a cuvi tsi ñi ican tan cua quita vaha tandíhi tsa javahá ñi.
²⁶Tan nyiví tsa catyí tyin tuhun Nyoo yihí ñi, maa tyin yatyí xaan yuhu ñi cahan ñi tsa caquiñi, nduve nacatyí tsicá ñi tuhun Nyoo tyin juvin ñi tsi maa ñi jandaví ñaha ñi.
²⁷Tyin tsa cuenda Nyoo, nyiví tsa nditsa tsinú iñi tsi ra juvin ñi cuví ñi tsa javahá tyehen: Jatyinyéé ñi tsi nyiví ndaahvi tsa tsihí yii, tan jahá cuenda ñi tsi tsa nyivi tsa nduve ca sihí tan jutu, tan jahá cuenda ndihí tucu ñi tsi maa ñi tsa ñia javaha ñi tsa ña vaha.

2

Na induc u ñi cuñi yo tsi nyiví tyin ña siín caá intuhun ñi tan inga ñi

¹Yañi, nyoho tsinú iñi ndo tsi Jutu Mañi yo Jesucristo, ra tsa cahnu xaan cuví, yacan cuenda ñia taahán tsi cahnu jaha ndo tsi iin nyiví tan ñavin ca inga ñi.
²⁻³Tatun cua quihví iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsí ra jahma xiñu, ¿nácaa cua cahan ndo tsihin ra? ¿A ña cua catyi ndo, “Cunyaña nu tyayu vaha ihya”? Tan juvin ñi cuhva can tan quihví tucu iin ra ndaahvi nditsí ra jahma tyahnyá, tan catyi ndo tsihin ra, “cunyaña nyityi juvin o cunyaña nu ñuhu ihya”. ⁴Ña vaha tsa javahá ndo tacan, tyin ña induc jahá ndo tsa ñayivi tsi ra nahá, tan tsicá iñi ndo tsa ña vaha.

⁵Yañi tsa cuñi xaan yu, tyaa soho ndo tuhun ihya: Nyoo nacatsí ra tsi nyiví ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihí ñi tsa vaha nu ndacá ñaha ra tyin yacan cuví tsa catyi ra tyin cuhva ra tsi nyiví tsa cuñi tsi ra.
⁶Maa tyin nyoho tsahá ndo ticanuu tsi nyiví ndaahvi. ¿A ña tsító ndo tyin juvin nyiví cuca tsahñí ndaahvi tsi ndo, tan tsindacá ñi tsi ndo nuu ra cumí tyiñu?
⁷Tan ¿a ña tsító ndo tyin nyiví can caahán ñi ndavaha ñi sivi ii ra Cristo, ra yihí ndaha tsi ndo?

⁸Ley Nyoo tsa ñiñi ca catyi tsi: “Cuñi ndo tsi nyiví tumaa tsa cuñi ndo tsi maa ndo.” Tatun javahá ndo tsa catyi ley can, vaha javahá ndo.
⁹Maa tyin tun intuhun ñi nyiví cuñi ndo, tan ña cuñi ndo tsi inga ñi,

tsicoó cuatyí ndo tyin catyí ley Nyoo tyin iyó cuatyí nyiví javahá tacan.
¹⁰Tyin tatum iin nyiví tsa tyáa yahvi tandíhi ley, tan ña tyáa yahvi ñi intuhun tsi, cuví tsi tumaa tsa ña tyáa yahvi ñi tandíhi ley.
¹¹Tyin Nyoo catyí ra tyin ña coo inga ñaha tsi rayíi, tun iyó ñasíhi ra. Tacan tucu ñiñaha, tsa iyó yii, ña cuví coo inga rayíi tsi ñi. Tan juvin ñi catyí tucu ra tyin ña cahñi yo nyivi. Yacan cuenda tatum iin ra nduve inga ñaha tsi ra, maa tyin tsahñí ra iin nyiví, juvin ñi ña tyáa yahvi ra tsa catyí ley.
¹²Maa tyin ley ra Cristo tsa jacacú tsi yo cua catyi tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo.
¹³Tyin nyiví tsa ña cundaahví iñi tsi tahan ñi, Nyoo cua tatsi tuñi ra tsi ñi, tan ña cua cundaahví iñi ra tsi ñi. Maa tyin ñi tsa cundaahví iñi tsi inga ñi, cua quita vaha ñi quívi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo?
¹⁵Na jaha yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un,
¹⁶Maa tyin yooho ña tsahá un jahma ra tan ndi tsa catsi ra tan catyí un tsihin ra: “Cuaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahán un tacan tyin ña tsahá un tsa tsinú ñuhu tsi ra.
¹⁷Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatyinyee yo tsi nyiví, nduve yahvi nyaya catyí yo tyin tsinú iñi yo.

¹⁸Yihí ndo cua catyi ndo: “Yooho tsinú iñi un tsi Nyoo tan yuhu javahá yu tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yu tyin juvin ñi cahnu cuví tucu tsa javahá yu tsa vaha. Tyin yooho ña cuví janaha un tsa tsinú iñi un tsi Nyoo tsi yu tun ña javaha un tsa vaha. Maa tyin yuhu cuví janahá yu tsa tsinú iñi yu tsi Nyoo tsi un tsihin tsa javahá yu tsa vaha.
¹⁹Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuuhví nahnu tyin ña cua

cacu nahnu. ²⁰Na soho xaan caca iñi un. Cutuñi iñi tyin tun tsinú iñi yo tan ña jayahá yo tsa vaha, nduve yahvi nyaá tsa tsinú iñi yo. ²¹Ra Abraham, tsii tsaañhu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra. ²²Ihya nyehé yo tyin tsa cuenda tsa tsinú iñi ra Abraham tsi Nyoo jayahá ra tsa catyí ra tsihin ra tyin jayahá ra. Tan tsa jayahá ra yakan, quituví vaha tsa tsinú iñi ra tsi Nyoo. ²³Tacan tan cundaq tsa catyí nu tutu Nyoo tyehen: “Ra Abraham tsinú iñi ra tsi Nyoo, yakan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴Tan ihya cuví nu cutuñi iñi yo tyin vaha yo nuu Nyoo tatuñi tsinú iñi yo tsi ra tan jayahá yo tsa vaha tan ñavin tsihin tsa tsinú iñi ni yo tsi ra. ²⁵Tan tacan tucu ña Rahab tsa tsicá nuu tsihin rayii. Yaha tsa jayahá ña cuatyí, jayahá ña tsa vaha quivi tsahá ña nu tsiyucu xeehe ra tsa jacuhun ra Josué. Tan jatinyee ña tsi ra naha tsa cuhun ra naha inga ityi. Tan tsa cuenda yakan, catyí Nyoo tyin vaha ña. ²⁶Tan tacan tucu cuví cuñu ñuhu nyíví. Tatuñi nduve ca tsa nyitó ni iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatuñi ña jayahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyoho yañi, ña yatyí xaan cuñi ndo cuvi ndo ra cahan tuhun Nyoo. Tyin tsító ndo tyin nyuhu tsa caahán ndi tuhun Nyoo, tatuñi ña vaha cahan ndi, ñihí ca cua tatsi tuñi Nyoo tsi ndi tan ñavin ca nyíví tsa ña caahán tuhun Nyoo. ²Tyin tandíhi maa yo tan tsicoo cuatyí yo, maa tyin ra tsa ña jayahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanii cahnu cuñu ñuhu ra. ³Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu tsi. ⁴Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacuhun ra jacacá itsi ndáa ityi cuñi maa ra, vasu ñihí xaan yihi tatyí. ⁵Tan tacan tucu yaa yo, luhlu xaan tsi. Maa tyin cuahua tsa caquíñi cuvi cahan yo tsihin tsi. Tumaa nu natüñi iin ñuhu luhlu iin cuhu

cahnu tan cayu tandíhi maa yutun. ⁶Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jativí tsi nanií cahnu cuñu ñuhu yo tan tandíhi cuhva iyó yo ñayiví ihya, tyin juvin ni maa nu ña vaha natuhu itsi. ⁷Nyíví cuví jandumasu ni tandíhi maa nuu quiti tsa iyó: saa, coo, tan quiti tsa iyó tsitsi ndutya ñuhu. ⁸Maa tyin yoñi cuví jandumasu yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí ti venenu tsi nyivi, tan tsihí ñi. Tacan cuví yaa yo. ⁹Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siquí nyíví tsa jayahá Nyoo tumaa caá maa ra. ¹⁰Juvín ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquíñi. Maa tyin yañi, ña taahán tsi tsa jayahá ndo tacan. ¹¹Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. ¹²Yañi, ¿a cuví cuhva tumangu iin paya, o cuví cuhva tupaya iin mangú? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiní tuñi tsa vaha ca

¹³Tatuñi yihi ndo tsító ndo tan iyó tsa tsiní tuñi tsi ndo, janaha ndo can tsihin tsa catisi iyó ndo. Tan ña nduyaa ndo jayahá ndo tsa vaha tyin jayahá ndo can tsihin tsa tsiní tuñi Nyoo tsa iyó tsi ndo. ¹⁴Maa tyin tatuñi nyiyo iñi ndo tsitsi añima ndo tan cuñi xaan ndo nduvaha ndo nu nyivi, ña cahnu jaña ndo tsi ndo tan catyí ndo tyin iyó tsa tsiní tuñi tsi ndo. Tyin tun cahnu jaña ndo tsi ndo, tyihí xeehe ndo tsa nditsa, cuví can. ¹⁵Tyin tun tacan tsicá iñi ndo, ñavin tsa tsiní tuñi Nyoo cuví can, tyin cuhva tsicá iñi nyivi ña tsító tsi Nyoo tan cuhva tsicá iñi nu ña vaha cuví can. ¹⁶Tyin tatuñi nyiyó iñi ndo tan cuñi ndo nduvaha ndo nuu nyivi, ticaña xaan tsicá iñi ndo. Tan iyó tucu tandíhi inga nuu tsa ña vaha nu yucu ndo. ¹⁷Maa tyin tatuñi iyó tsa tsiní tuñi Nyoo tsi ndo, cuiti iyó ndo, catsi iyó ndo. Tan nducú ndo cuhva coo vaha ndo tsihin nyíví tsihin tsa vita iñi ndo, tan vaha nyíví cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa nii iñi ndo. ¹⁸Tatuñi iyó

vaha yo tsihin nyiví, tan iyó taxin yo tsihin ñi, cua coo yo ñayivi cuítí.

4

Ña taahán tsi jahaha yo cuhva cuñí cuñu ñuhu yo

¹ ¿Nacuenda iyó tisihi nu yucú ndo? ¿Nacuenda iyó cuatyí? Tsa cuenda tyin tsitsi añaima ndo tsicá iñi ndo maa ñi maa tsá ña vaha. ²Iyó tsaha nda cuanda tsahní ndo nyiví tyin cuñí ndo tsa cuñí ndo tan ña ñihíndo can. Tatan nyehé ndo náa cuví can nyehé ndo, nyiyó iñi ndo can tan tsá ña ñihíndo can quitsaha cañí tahan ndo. Ña ñihíndo tsa cuñí ndo tyin ña tsicán ndo can tsi Nyoo. ³Tatan tsicán ndo tsa tsicán ndo tsi ra tan ña ñihíndo can, ña tsahára can tsi ndo tyin tsítíra tyin cua jatívi ndo can tsihin tsa taahán iñi ndo. ⁴¿Nacuenda jahaha ndo cuhva cuñí nyiví, nyoooho tsa ña tsinú vaha iñi tsi Nyoo? ¿A ña tsító ndo tyin tun jahaha yo cuhva cuñí nyiví, ñi xaan iñi tsi Nyoo cuví yo? ⁵Tan yacan iyó cuenda catyí nu tutu Nyoo tyin Tatyi li tsa tsahára coo añaima yo, cuñí xaan tsi tsi yo tan cuiñixaan tsi tsi yo tyin cuñí tsi tsa jacahnu yotsi intuhun ñi maa ra. ⁶Tan jatinyeeéxaan Nyoo tsi yo tsa nacuhváyo tsi yo tsi ra. Tyin catyíra tyin jatinyeeéca ra tsi nyivíndaahvi tsa tsító tyin tsiní ñuhu ra tsi ñi. Tan ña cuñíra nyehe ra tsi ra tsa cahnu jahátsi. ⁷Yacan nacuhvavaha ndo tsi ndo tsi Nyoo. Ña tyaa yahvíndo nu caahán nu ña vaha tyin tun ña jahándo cuenda nu caahán nu, tacan tan cua cunu nu nyehe nu tsi ndo. ⁸Nducu ndo cuhva cunyanaa vaha ca ndo tsi Nyoo tyin tacan tan natuhvra tsi ndo. Nyoooho, nyiví iyó cuatyí, jandundíndo tsi ndo. Tan nyoooho tsa tsicá iñi tyin cuví jahaha ndo tsa iyó nu ñuhu ñayiví ihya tan juvin ñi cuhvacan tan jacahnu tucu ndo tsi Nyoo, jandu iin ndo iñi ndo tan cuhva ndo añaima ndo jacutu Nyoo tsa vaha, tyin tacan tan ndundíndo nuu ra. ⁹Cuiihya cuñíndo. Vacu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sii cuñí ndo, vacu ndo tsihin tsa cuiihya cuñí ndo. Tan tsa sii cuñí ndo na nanduvi tsi tucuihya iñi. ¹⁰Ndaahvi jaha ndo tsi ndo nuu Jutu Mañi yo, tyin tacan tan janducahnu ra tsi ndo.

Ña cahán nyaa ndo tsi nyiví

¹¹Yañi, ña cahán ndo ndavaha ñi siquí iñi yañi yo. Tyin nyiví caahán ndavaha ñi siquí nyiví, o caahán nyaa ñi nyiví, siquí ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jaháyo tsi yo tsa nuu tsa tyaáyahvíyo tsa caahán ley can. ¹²Tyin intuhun ñi ratasháley can. Tan juvin ñi ra cuví Juez. Tan juvin ra cuvíra jacacútsi yo, o jacunaátsi yo. Tan ñyoooho yóro ra cuví un tyin cahán nyaa un tsi inga nyiví, tan tatsi tuñiun tsi ñi tan jaha un tsi un tumaa juez?

Ña tsító yo náa cua cuví tsi yo tyaan, yacan cuenda ña taahán tsi cahnu jaháyo tsi yo

¹³Yihíndo catyíndo: “Vityin o tyaan cuhun yo ñuu can, o inga ñuu can. Tan ndoo yo ican iin cuiya tan jaha tyiñu yotan jaha canaa yo xuhun”, catyíndo. Maa tyin tyaa soho ndo tsa cua cahán yu ihya: ¹⁴Ñayiví tsa iyóyo cuvítsi tumaa vico nuhu tsa tuhváyihítan iin yaha ñi naa ihñi nyico. Ndi ña tsítóndo tsa cua cuvítyaan tan catyíndo tyin cuhunndo. ¹⁵Vaha ca cahán ndo tyehen: “Coo yo juhva ca quívitan jahaha yotsehe o yacan, tun Jutu Mañi yotan cuñíra.” ¹⁶Maa tyin nyoooho ña caahán ndo tacan, tan cahnu xaan jahándo tsi ndo. Tan Nyoo ña taahán iñi ra nyehera tsi nyivíjahaha tacan. ¹⁷Tyin yoo tsa tsítójahaha tsa vaha tan ñajaháyo can, tsicócuatyioyo.

5

Nu tsahácuenda ra Santiago náa cua tahan nyiví cuca

¹¡Tyaa soho ndo tuhun caahán yu ihya, nyoooho nyiví cuca! Vacu ndo tsihin tsa cuiihya cuñíndo, caña tsaa ndo tsa cuenda tundohotsa cua nyehe ndo. ²Tyin tsa cuca tsa jacayándo, tsa ndihí can tyaahyú. Tan jahma vaha ndo, tsa ndihí maa can tsatsítiquixin. ³Xuhun cuuan tan xuhuncuitsín ndo tsa ndihí can cuxí. Tan cuxí can tsahácuenda can tyin ña vaha jahándo tsihin xuhunndo. Tan juvin can cuvítumaa ñuhu tsa cua cahmi tsi ndo. ⁴¿Nacuenda jacayándo tsa cuca nu cua ndihí quívihya? ⁵Tan ñayahvíndo yahvíntsahatasa taahán tsi tsi nyivíndaahvitasa jahátyiñu tyiñu ndo. Tan vityintsicán ñi cuatyítsaha ndo nuu Jutu Mañi yo, ra ndacáñaha tandihi ángel tsa cuvíandaracuenda ra. Tan maa Jutu Mañi yotsiñiratuhuncaahán ñi ndaahvi can.

⁵Iyó vaha xaan ndo nu ñuhu ñayíví ihyá tyin cuca ndo. Tan javahá ndo cuhva cuní maa ndo. Tumaa tuhvá nyíví janduxaahán quíní tyin cuu tí, tacan javahá ndo tsihin ndo. Tan vityin tsa tsaq quíví tsa cua cuu ndo. ⁶Tyin tyaa ndo cuatyí tsaha nyíví vaha tan tsahñí ndo tsi ñi. Tan ndi ña cahaní ñi cuatyí siqui ndo.

Na cunyee iñi yo cuatu yo tsi ra Cristo

⁷Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihí cuun nyico tsi, tan naquihin ra tsa tatsí ra. ⁸Tan tacan taahán tsi cunyee iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

⁹Yañi, ña tyaa ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñí quitsi ra. ¹⁰Yañi, quihin cuenda ndo cuhva tsicog ra cuví ndusu yuhu Nyoo tahan tsanaha. Tyin ra ican naha ra cunyee xaan iñi ra naha nyehe ra naha tundoho quíví tsahá cuenda ra naha tuhun Jutu Mañi yo. ¹¹Tsitó yo tyin sii xaan cuñí ra tsa cunyee iñi nyehé tandihí nuu tundoho, tumaa tsa cunyee xaan iñi ra Job nyehé ra tundoho. Tan nu ndihí ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehé ra tsi yo. ¹²Maa tyin yañi, ña cahaní ndo: “Naha Nyoo maa”. Tan ña cahaní ndo: “Tsitó vaha maa ra nyaá gloria”, tan ndi ña cahaní ndo: “Tsitó vaha maa ra javahá ñuhu ñayíví”, tan ndi ña cahaní ndo inga ca tuhun tahan can. Tatun nditsa tuhun caahán ndo, “nditsa” çatyí ndo. Maa tyin tatun tsitó ndo tyin ña nditsa, çatyí ndo tyin “ña nditsa”, coto tatsi tuñi Nyoo tsi ndo.

¹³Tun ndáa nyoho nyehé tundoho, nda-can tahvi ndo tsi Nyoo. Tan nyoho tsa sii cuñí, çata ndo yaa Nyoo. ¹⁴Tan nyoho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha acetye tsi ndo tsihin sivi ra Cristo. ¹⁵Tan tatun tsinú iñi ra naha tsi Nyoo cuhva tsa tsicán tahví ra naha, nyíví cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicog ñi cuatyí, Nyoo cua jaha ra tucahnu iñi tsi ñi. ¹⁶Yacan cuenda nahma

ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyíví na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷Tumaa ra Elías ra cuví ndusu yuhu Nyoo tahan tsanaha. Cuví ra iin rayíi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahñu tsiti tsa tatsí nyivi.

¹⁹Yañi, tatun iin nyíví tahan ndo nacoq ñi tuhun nditsa Jutu Mañi yo, tan cuanuhu ñi ñayíví inga tsaha, tan jatyinyéé ndo tsi ñi tsa nanducu nyico ñi ityi Nyoo, ²⁰coto ndo tyin tsa javahá ndo tacan tsihin ñi, jacacu ndo añima ñi tan ña cua cuhun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyiví

Yihí Cuenda Nyoo

*Nu quitsahá tyaá ra Pedro carta tsa cuenda
nyivi yihí cuenda Nyoo*

¹ Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihyá tsa cuenda nyoho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví.

² Tyin nda tsanaha tan nacatsí vaha maa Nyoo Jutu yo tsi nyoho tyin cuví ndo nyivi ra. Tan tsa cuenda tsa nacatsí ra tsi ndo, jatyinyee Tatyi Ii ra tsi ndo tan nacuhvá ndo tsi ndo tsi ra, tan tyaá yahvi ndo tsi ra Jesucristo vityin, tan ndundíi ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

*Cuita iñi ndo tyin cua ñihí yo ñayivi tsaa
coo yo*

³ Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsaa yo inga tsaha tyin janandoto ra tsi ra Jesucristo. Yacan cuenda cuita iñi yo tyin cua ñihí yo ñayivi tsaa tsa ña cua naa maa. ⁴ Tan tsa cuenda tsa nacacu tsaa yo, Nyoo cua cuhva ra tandihí tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. ⁵ Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihí cacu yo. Tan cua janaha ra tsi yo náa cuñi tsi catyi tsa cacú yo nu cua ndihí tyembu tyin tsa ndatutu vaha can tsi yo.

⁶ Yacan cuenda sií cuñi ndo, vasu ndi maa nyehé ndo tandihí nuu tundoho juhva quivi vityin. ⁷ Tyin tandihí maa tundoho can tan taahán tsi nyehe yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan

tsindihí ñi maa can. Maa tyin tun ña jandihi yo tsa tsinú iñi yo tsi Nyoo, cua quituvi yo nuu ra tan cua jacobnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸ Nyoho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan siíi xaan sii xaan cuñi ndo nda cuanda ña cuví ñihí ndo cuhva catyí ndo najava cuhva tsa sii cuñi ndo, ⁹tyin nu ndihí cua cacu ndo tan yacan cuví tsa cua ñihí ndo jahá tsa tsinú iñi ndo tsi Nyoo.

¹⁰ Ra ndusu yuhu Nyoo tsa tsicoo tahan tsanaha nducu tuhun ra naha nácaa cua cacu yo. Tan nducu ra naha cuhva coto ra naha náa cuví tsi. Tyaq ra naha nu tutu cuenda tsa vaha tsa cua cuhva Nyoo tsi yo.

¹¹ Tan Tatyi Ii ra Cristo tsa iyó tsihin ra naha jacotó tsi tsi ra naha náa ndihí tundoho cua nyehé ra Cristo, tan nácaa cua jacobnu Nyoo tsi ra. Tan nducu xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyi Ii tsihin ra naha. ¹² Maa tyin jacotó Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihí tsa cahán ra naha juvin tsi cuví tuhun tsa jacacú ra Jesucristo tsi yo tsa tsa yaha tsiñi ndo. Tan ra tsa cahán tuhun ihyá naha ra, maa Tatyi Ii Nyoo jacahan tsi ra naha. Tan ra ángel naha ra cuñi xaan ra naha coto ra naha tuhun ihyá.

Nyoo caná ra tsi yo tyin coo yo ñayivi cuiti

¹³ Yacan cuenda jáha vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. ¹⁴ Coo ndo tumaa iyó tsa nyihí tsa tyaá yahvi tsi jutu. Ña coo ndo tumaa tsicoo ndo quivi tsa ndi cumañi ca nacoto ndo tsi Nyoo tyin tsanaha tsindacá ñaha tsa ña vaha tsa cuñi cuñu ñuhu ndo tsi ndo. ¹⁵ Maa tyin vityin coo ndo ñayivi cuiti tyin maa Nyoo, ra tsa caná tsi ndo, cuiti iyó ra. ¹⁶ Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

¹⁷ Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jáha cuenda ndo tsi ndo tan jáha ndo tsa ñayivi tsi ra tsitsi tsa iyó ndo nu ñuhu ñayivi

ihya. Tyin Nyoo jahá ra cuenda cuhva iyó tsa intuhun intuhun yo, an cuvi yo nyívi cuca, an nyívi ndaaahvi.¹⁸ Nyoo nasamā ra cuhva tsa ña vaha tsicoo ndo, cuhva tsa janahá tsii tsaaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahví ra tan cacu yo,¹⁹ tyin tyahví ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyi luhlu tsa ña pehe [tsa tuhvá nyivi Israel jamañí nuu Nyoo], tan tsihí ra vasu ndi maa nduve cuatyi ra.²⁰ Tsa ndi cumañi ca tsinu ñihu ñayívi tsinyaā culva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndihí quíví, cuví tandihí can tsa cuenda tsa vaha tsi maa yo.²¹ Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yaha tsihí ra tan jacahnu ra tsi ra. Tan yacan cuenda tsinú iñi ndo tsi Nyoo tan nyítá iñi ndo tyin cua naquihin ra tsi ndo.

²² Tsihin tunyee iñi Tatyi lin Nyoo tyáa yahvi ndo tuhun nditsa. Tan tsa ndundiñi ndo jahá Nyoo tsa cuenda tsa tyáa yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa iñi iñi ndo, tan tsihin tandihí tunyee iñi tsa iyó tsi ndo.²³ Tyin tsa nacacu tsaa ndo, maa tyin ñavin tumaa cacú nyívi nu ñihu ñayívi ihya, tyin jutu ndo cacu ra naha jaha sihi ra naha tan tsihí ra naha. Tan nyoho vityin nacacu tsaa ndo tsihin Nyoo tsa ña cua cundiñi maa, tyin tacan ñi cua coo maa tsi.²⁴ Tyin catyí tuhun Nyoo tyehen:

Tandihi nyívi tsa iyó nu ñihu ñayívi ihya cuví ñi tumaa cuhu.

Tan tsa cahnu tsa jayahá ñi cuví tsi tumaa ita.

Tyin cuhu can na ityí can, tan cucoyó ita can. [Tacan cuví nyívi, tyin iin yaha ñi tsiihí ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda nacoo ndo tandihí nuu tsa caquiñi. Ña jandavi ñaha ndo tsi nyívi, ña jaha ndo tyin vaha ndo tan ña nditsa, ña nyiyo iñi ndo nyehe ndo tsa iyó tsi inga

nyívi, ña cahán ca ndo cuendu.² Javahá ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyoho tuhun Nyoo tyin juvin tsi cua jacuahnu tsi ndo tan nacoto vaha ca ndo tsi Nyoo nda cuanda ndihí cacu ndo,³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunyaa naa ndo tsi Jutu Mañi yo. Tyin juvin ra cuví yuu nyito tsa ña cuñi nyívi cuatyinu ñi. Maa tyin Nyoo nacatsi ra tsi Jutu Mañi yo tyin juvin ra cuví yuu sii caá tsa yahvi nyáa tsa cuenda ra.⁵ Tatun nyaa naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra jayahá vehe. Culva ndo tsa jandu iin Nyoo tsi ndo tsihin ra Cristo tyin tun tsa nyaa naa vaha ndo tsi ra, cua cuví ndo tumaa ra jutu tsa jayahá maa ñi tyiñu Nyoo. Cua jacahnu ndo tsi ra tan sii xaan cua cuñi ra.⁶ Tyin catyí tucu nu tutu ra tyehen:

Yuhu nacatsi yu iin yuu tsa tsiní ñihu ca tan sii ca caá, tan tsaquin yu yuu can nu cua jahava yu vehe yu nda Sión. Tan nyívi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiní ñihu xaan ra tsi yo. Tan tsa cuenda nyívi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen: Yuu tsa ña cuñi ra jayahá vehe cuatyinu ra, yacan cuví yuu tsa tsiní ñihu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyívi cua nañi tsaha tan nduve ñi. Cuví ra iin cava tsa janduvá tsi ñi, catyí tsi nu tutu Nyoo. Nduva nyívi can tyin tsiní ñi tuhun Nyoo, tan ña tyáa yahvi ñi itsi tyin tacan nyaá tyin cua jahava ñi.

Nyívi yihí cuenda Nyoo

⁹ Maa tyin nyoho cuví ndo nyívi nacatsi maa Nyoo. Tan cuví ndo tumaa jutu tyin jayahá ndo tyiñu nuu ra tyin juvin ra ndacá ñaha tsi yo. Tan cuví ndo nyívi ii ityí nuu ra tan cuví ndo nyívi maa ra, tacan tan cahan ndo tuhun vaha tsa jayahá ra. Tyin juvin ra tavá tsi yo nu naa tan tyihí ra tsi yo nu

nditsin tan nu sií caá. ¹⁰Tsa ndi cumañi ca cuví ndo nyíví Nyoo, nduve yahvi nyaá ndo. Maa tyin vityin nyíví Nyoo cuví ndo. Quiví can yoñi cundaahví iñi tsi ndo, maa tyin vityin Nyoo cundaahví iñi ra tsi ndo.

Nu catyí ra Pedro tyin coo yo, tan javaha yo tysiñu nuu Nyoo

¹¹Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayíví cuví ndo, tyín nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo. ¹²Jaha cuenda ndo tsi ndo nu iyó ndo tyañu nyíví tsa ña tsító tsi Nyoo. Tyin vasu caahán ñi ndavaha ñi siquí ndo, tan catyí ñi tyin ña vaha ndo, maa tyin quiví quitsi nyehé Nyoo tysiñu javahá yo cua nyehé ñi tyin vaha tsa javahá ndo tan cua jacañu ñi tsi Nyoo.

¹³Tyaa yahvi ndo tsi ra cumí tysiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tysiñu, a cuví ra rey cahnu ca, ¹⁴a iin ra jaquitsi ra rey tyin tatsi tuñi ra tsi ra iyó cuatyí nahá ra tan naquihin ndaahvi ra tsi yoo tsa javahá tsa vaha. ¹⁵Tyin Nyoo cuñi ra tsa javaha yo maa ñi maa tsa vaha tyin tacan tan ña ñihi ca nyíví soho tan nyíví ña tsító náa cahan ñi siquí yo.

¹⁶Coo ndo tumaa iyó nyíví tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tysiñu nuu Nyoo tyin cuví ndo musu ra. ¹⁷Jaha ndo tsa ñayíví tsi tandíhi ñi nyíví. Cuñi ndo tsi ñi yiñí cuenda Nyoo. Jaha ndo tsa ñayíví tsi ra ndacá ñaha, tyin Nyoo nyehé ra tandíhi tsa javahá yo.

Uvi taahan cuhva nyehé yo tundoho

¹⁸Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra nahá, vasu xaan ra nahá a vasu vaha iñi ra nahá. ¹⁹Tyin tatum cunyeeé iñi yo nyehé yo tundoho tsa janyehé nyíví tsi yo tsa cuenda tsa javahá yo tsa vaha nu Nyoo, cua tsaa can nuu ra. ²⁰Maa tyin tatum tatsí tuñi nyíví tsi ndo tsa cuenda tsa javahá ndo tsa ña vaha tan cunyee iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo.

²¹Tumaa tsa nyehé maa ra Cristo tundoho

tsa cuenda yo, tacan taahán tsi cunyee iñi yo nyehé yo tundoho tyin tsa cuenda yacan cana Nyoo tsi yo. ²²Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyíví. ²³Quiví tsa janyehé ñi tundoho tsi ra ña jayuhví ra tsi ñi. Tyin intuhun ñi maa Nyoo cuví ra tuhvá jacutuñi tsi nyíví tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. ²⁴Tyin cuhva tsa ticaá ra Cristo nu cruu can, tsicoso tandíhi cuii maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayíví ciuti. Tyin tsihin tsa ñicueehe ra, tan nduvahá yo. ²⁵Tyin quiví can tsicaá nuu yo cuvi yo tumaa mbee tsa ndoo ihñi, tsa nduve tsitoho. Maa tyin vityin nacuhva cuenda yo tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

3

Nacaa taahán tsi coo nyíví tindaha

¹Tacan tucu nyoho, ñiñaha tsa iyó yii. Tyaa yahvi ndo tsi yii ndo tyin tatum ña tsinú iñi ra tsi ra Cristo, cua tsinu ndíhi iñi ra tsi ra Cristo tsihin cuhva javahá ñi ndo tyin nyehé ra tyin vaha tsahá ndo tsa quihi ndaha ra tsi ndo. Tan ña cuñi tsi cuaha xaan cahan ndo tsihin ra, ²tyin nyehé ra tyin catsi iyó ndo tan jahá ndo tsa ñayíví tsi ra. ³Ña caca xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñi ndo tsa cuví xuhun cuaan tan cunditsi ndo jahma xiñu xaan. Ña nducu ndo tandíhi yacan. ⁴Maa tyin jandutyaquí ndo tsi ndo tsihin tsa quítá añima ndo tyin tun ciuti iyó yo tan vita iñi yo, tan taxin iyó yo, yacan cuví tsa sií ca caá nuu Nyoo. Tan ña cua tivi maa can. ⁵Tyin tsihin tsehe ndutyaquí ñiñaha tsa nacotó tsi Nyoo, ñi tsa tsicoq tahen tsanaha. Nyitá iñi ñi tsi Nyoo tan tyaa yahvi ñi tsi yii ñi. ⁶Tumaa ña Sara, tyaa yahvi ña tsi ra Abraham yii ña. Tan catyí ña: “Tata”, tsihin ra. Tatum nyooho tan javahá ndo tsa vaha tan ndi luxu maa tan ña nayuhví ndo, cua cuvi ndo tumaa maa ña.

⁷Tan tacan tucu nyoho, ra iyó ñasííhi naha ra, cutuñi iñi ndo cuhva coo ndo tsihin ñasííhi ndo. Jaha ndo tsa ñayíví tsi

ñi tsa cuenda tsa vita ca cuñu ñuhu ñi tan ñavin ca cuñu ñuhu nyoho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayiví iyó ndo. Javaha ndo tyehen tyin tacan tan tiñ cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihí tuhun, iin ñi cuhva *caca* iñi tandihí ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñi ndo tsi yañi ndo tsa *cacu* tsihin ndo. Vita cahán ndo tsihin tahan ndo, tan ña cahnu *jaha* ndo tsi ndo; cuví ndo nyiví vaha. ⁹ Ña jahaha ndo tsa ña vaha tsihin nyiví tsa jahaha tsa ña vaha tsihin ndo. Ña cahán ndo tsi ñi tatan caahán ñi tsi ndo, tyin Nyoo *caca* ra tsi ndo tyin jahaha ndo tsa vaha tsihin ñi tyin tacan tan cua nasoco ra tsi ndo. ¹⁰ Tyin tuhun Nyoo catyí tsi tyehen: Nyiví tsa cuñi coo ñayivi tsihin tsa sii, cuñi tsi jaha ñi cuenda yaa ñi, tan ña cahán ñi tsa ndavaha ñi, tan ndi ña cahán ñi cuendu.

¹¹ *Jandihí* ndo tsa jahaha ndo tsa ña vaha, tan jahaha ndo tsa vaha.

Ndrucu ndo cuhva coo taxin ndo, tan *coo* ndo tacan.

¹² Tyin Jutu Mañi yo *jahá* cuenda ra tsi nyiví vaha.

Tatun caahán ñi tsihin ra, tyaá soho ra tsa caahán ñi.

Maa tyin nyiví jahaha tsa ña vaha, ña cuñi ra nyehé ra tsi ñi.

¹³ Ndi intuhun maa nyivi tan ña cuvi jahaha ñi tsa ña vaha tsihin ndo tatan nyoho tan maa ñi tsa vaha nanducú ndo.

¹⁴ *Cusíi* iñi ndo vasu ndi maa nyehé ndo tundoho tsa cuenda tsa jahaha ndo tsa vaha. Tan ña nayuhvi ndo tun jayuhvi nyivi tsi ndo.

¹⁵ *Jacahnu* ndo tsi ra Cristo tsitsi añima ndo. *Cuhva* ndo tsa cundaca ñaha ra tsi ndo. *Caca* iñi ndo tuhun Nyoo tyin tatan ndaca tuhun nyivi tsi ndo naucienda tsinú iñi ndo tsi ra, cuvi cuhva cuenda ndo tsi ñi.

Tan *jahaha* ndo can tsihin tsa ña cahnu *jaha* ndo tsi ndo tan *jaha* ndo tsa ñayiví tsi ñi.

¹⁶ *Catsi* coo ndo tyin tun catsi iyó ndo ña cua nducahan nuu ndo nuu Nyoo. Tan tatan caahán nyivi ndavaha ñi siquí ndo tsa cuenda tyin vaha cuahán ndo tsihin ra Cristo, juvin ñi maa ñi tam cua nducahan nuu ñi tsa cuenda tsa cahán ñi siquí ndo.

¹⁷ Vaha ca nyehé yo tundoho tsa cuenda tsa jahaha yo tsa vaha tatan Nyoo cuñi, tan ñavin ca tsa nyehé yo tundoho cuenda tsa ña vaha. ¹⁸ Tyin ra Cristo nyehé ra tundoho tan tsihí ra iin tsaha ñi tsa cuenda cuatyin tandihí yo. Ra vaha cuví ra maa tyin nyehé ra tundoho tan tsihí ra tsa cuenda yo tsa cuví yo nyiví *caquiñi*, tyin tacan tan cuvi tsaa yo nu nyaá Nyoo. Tsihí cuñu ñuhu ra, maa tyin nandotó nyico ra tsihin Tatyí li ra. ¹⁹ Tacan tan tsihin Tatyí li ra tsahán ra tsicahán ra tsihin añima nyiví tsa yucú anyaya. ²⁰ Tan ñi icán cuví ñi tsa ña tyaá yahví tsi Nyoo quíví *tsicoq* ra Noé tahan tsanaha, tyin nii tsinú yutun ndoo tacan tsa ndatu Nyoo tsa ndu uvi iñi ñi cuatyí ñi. Maa tyin ña cuaha ñi *cacu* quíví cuun savi cahnu tsa tsahñi ndutyá ñuhu tsi ñi. Una taahan ñi ñi *cacu* tsitsi yutun ndoo tyin nandaa yutun ndoo can nu ndutyá ñuhu. ²¹ Tan tacan tucu maa yo tumaa tsa *cacu* ñi icán, tacan *cacu* yo quíví *tsicoondutyá* yo. Maa tyin ñavin nyahyu yo nacatyá ndutyá can tsa *tsicoondutyá* yo. Yacan cuñi tsi catyí tsa tsicán tahvi yo tsi Nyoo na nacatyá ra añima yo tan *cacu* yo *jaha* tsa nandoto ra Jesucristo. ²² Tan nandaa ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihí tatyí ña vaha tsa ndacá ñaha tsi nyiví.

4

Jaha *tiyu* ndo nuu nyivi yihí tuhun Nyoo tsihin ndo nácaa tsahá maa Nyoo tsi ndo.

¹ Yacan cuenda janyee ndo iñi ndo nyehé ndo tundoho tumaa nyehé ra Cristo tundoho tsihin cuñu ñuhu ra. Tyin nyiví tsa nyehé tundoho tsihin cuñu ñuhu ñi, ña jahaha ca ñi tsa *caquiñi* tsa cuñi cuñu ñuhu ñi. ² Tyin tacan tan tandihí quíví coo ñi cua jahaha ñi cuhva cuñi Nyoo, tan ñavin cuhva cuñi cuñu ñuhu ñi.

³ Vityin tsindihí tsa jahaha ndo tsa *caquiñi* tsa taahán iñi nyivi tsa ña tsitó tsi Nyoo. *Tsicoq* ndo cuhva cuñi ndo, cuaha tsa *caquiñi* jahaha ndo, tan jahaha ndo tsa *caquiñi* tsa cuñi cuñu ñuhu ndo. Jahaha ndo víco tan tsiñi ndo. Tan *jacahnu* ndo tsitoho tsa ña taahán tsi *jacahnu* ndo.

⁴ Tan vityin tsa ña cutahán ca ndo tsihin ñi tan ña jahaha ca ndo tsa *caquiñi* tsa jahaha ñi, iyo cuñi ñi. Tan caahán ñi ndavaha ñi siquí ndo. ⁵ Maa tyin tandihí tsa caahán

ñi tan tsa jayahá ñi cua nacuhva cuenda ñi can tsi ra cua jacutuñi tsi nyiví nyitó tan nyiví tsihi. ⁶ Yacan cuenda jacoto ra Cristo tuhun vaha tsi ndiyí. Tyin tacan tan cuvi coo añima ñi tumaa iyó Nyoo, vasu ndi maa tsihi ñi nu ñuhu ñayiví ihyá tumaa tsihí tandihí ca nyiví.

⁷ Tsa yatiny cuui cundihí tandihí maa tsa iyó nu ñuhu ñayiví ihyá. Yacan cuenda catsi coo ndo tan ña jandihí ndo tsa ndacan tahvi ndo tsi Nyoo. ⁸ Tsa jihna ñi taahán tsi tsa cuñi tahan ndo tsi ndo, tyin tatan cuñi tahan yo tsi yo, cuaha tsaha cua jaha yo tucahnu iñi tsi ñi. ⁹ Tatun tsáa iñi nyiví vehe ndo, vaha tyanuu ndo tsi ñi tan ña caca iñi ndo tyin jatyañu ñi tsi ndo. ¹⁰ Tan cuñi tsi tsa jaha týiñu intuhun intuhun ndo nuu nyiví tahan ndo nácaa tsahá maa Nyoo tsi ndo. Tyin siñi siñi tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo. ¹¹ Tatun tsaha Nyoo tuhun cahan un tsihin nyiví, cahan, maa tyin maa ñi tuhun tsa tsaha ra tsi un. Tatun tsaha ra tyin javaha un tyiñu nuu nyiví, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnu nyiví tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnu yo. Tan na cundaca ñaha ra tsihin tunyee iñi ra tacan ñi maa. Tan na cuvi tsi tacan.

Sii cuñi ndo tun nyehé ndo tundoho tsa cuenda ra Cristo

¹² Yañi tsa cuñi xaan yu, ña iyo xaan cuñi ndo tatan vatsí tundoho ñihi siquí ndo. Ña cuñi ndo tyin ña taahán tsi nyehé ndo tundoho. ¹³ Cú sii iñi ndo tyin cuvi nyehé ndo tundoho tumaa nyehé ra Cristo tundoho. Tyin tacan tan quíví quitsi nyico ra Cristo inga tsaha, sii cua cuñi ndo nyehé ndo tsa cahnu cuví ra. ¹⁴ Tatun cahán nyiví ndavaha ñi siquí ndo tyin nyicún ndo tsi ra Cristo, sii cuñi ndo, tyin nyaá Tatyí li Nyoo tsihin ndo. Maa ñi caahán ñi ndavaha ñi siquí ra Cristo, maa tyin nyoooh jacahnú ndo tsi ra. ¹⁵ Tatun nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhu ndo, o javaha ndo tsa ña vaha, o tsa tyihí ndo tsi ndo nu ña taahán tsi. ¹⁶ Maa tyin tun nyehé ndo tundoho tsa cuenda tsa yihí ndo cuenda ra Cristo, ña nducuhan

nuu ndo. Jacahnu ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

¹⁷ Tyin tsa tsaa quíví tsa quitsaha jacutuñi Nyoo tsi tandihí nyiví. Tan jihna ca yoo tsa yihí cuenda ra cua cutuñi. Tatun tyehen tatsí tuñi Nyoo luxu ñi tsi yoo, ¿nácaa cuatatsí tuñi ra tsi nyiví tsa ña tyáyahvi tuhun caahán ra? ¹⁸ Tatun yií cacú añima nyiví vaha, ¿nácaa cuatatuñi cuñi Nyoo, cuñi tsi tsa jañihi ca ndo javaha ndo tsa vaha. Tan tyáa cuenda ndo añima ndo ndaha ra tyin maa ra javaha tsi yo, tan cua javaha ra tumaa caahán ra.

5

Nu tsahá cuenda ra Pedro tsi yo nácaa coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehé yu tandihí tundoho tsa tahan ra Cristo. Tan cua cutahan yu tsihin tandihí ca ra naha quíví quitsi ra Cristo inga tsaha tsihin tsa cahnu cuví ra. ²Jahá cuenda ndo tsi nyiví yihí tuhun Nyoo tsa yihí ndaha ndo, tumaa jahá cuenda vaha iñi ra mbee jana ra. Javaha ndo can tsihin tsa nii iñi añima ndo tan ñavin tsihin tsa ñiñi, maa tyin cuhva cuñi Nyoo. Ña javaha ndo can tsa cuenda tsa cuñi ndo xuhun. Tandihí tyiñu javahá ndo, javaha ndo can tsihin tsa cacu iñi ndo. ³Tyin tun vaha iyó ndo nyehé ñi, tacan cua coo ndihí ñi tyin nyehé ñi tyin ña ndacá ñaha ñihi ndo tsi ñi. ⁴Tacan tan quíví cua quitsi ra cuví ityí nuu tsihin nyoooh tsa jahá cuenda mbee jana Nyoo, cua cuhva ra tsa sii caá tsa ña cua tivi maa tsi ndo.

⁵ Tacan tucu nyoooh, ra cuatyí tan ñi cuatyí, tyaa yahvi ndo tsi ra tsahnu naha ra. Tan tandihí ndo ndaahvi jahá ndo tsi ndo tan tyáyahvi tahan ndo tsi ndo. Tyin catyí nu tutu Nyoo tyehen:

Nyoo ña cuñi ra nyehé ra tsi nyiví tsa yaa xaan,

Maa tyin jatinyeé ra tsi ñi tsa ña yaa.

⁶ Yacan cuenda ndaahvi jahá ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee iñi tsa iyó tsi ra, tyin tacan tan cuvi jacahnu ra tsi ndo quíví cua tahan

tsi. ⁷Tyaa cuenda ndo tandíhi tsa tsicá xaan iñi ndo ndaha Nyoo tyin maa ra jahá cuenda tsi ndo.

⁸Catsi cuhun iñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan iñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú tì tsa catsi ti. ⁹Nihi cunyecu ndo tsihin tsa tsinú iñi ndo tsi Nyoo tyin tacan tan cuvi jaha ndo tsi nu ña vaha. Tyin juvin ñi tundoho tsa nyehé nyoho tan nyehé tucu tandíhi ca nyiví yihí cuenda ra Cristo tanii cahnu nu ñuhu ñayiví. ¹⁰Maa tyin Nyoo jatyinyééra tsi yo, tan tsa yaha nyehe ndo tundoho juhva quíví, Nyoo cua jacutsa ca ra tsi ndo, ñihi cunyecu ndo tsihin tsa tsinú iñi ndo, tan cua cuhva ca ra tunyee iñi tsa iyó tsi ra tsi ndo. Tan juvin Nyoo cuví ra tsahá tandíhi tsa vaha tsi yo, tan maa ra cana tsi yo tyin ndu iin yo tsihin ra Cristo tyin coo yo nu sií caá tsihin ra tacan ñi maa. ¹¹Na jacobahnu yo tsi ra tan na cundaca ñaha maa ra tacan ñi maa. Tan na cuvi tsi tacan.

Nu tsahá ra Pedro nacumi tsi nyiví nu ndihí ña

¹²Jaquitsí yu carta ihya tsi ndo tsihin ra Silvano, yañi yo. Tyin tsitó yu tyin niñ xaan iñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin nditsa tsa cuñi xaan Nyoo tsi yo. Yacan cuenda ña nacoo ndo itsi.

¹³Nyiví yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyoocho, jaquitsí ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquitsí ndihí ra nacumi tsi ndo.

¹⁴Cuñi tahan ndo tsi ndo tan cuhva tahan ndo nacumi tsi ndo.

Na coo ca tsa taxin añima tandíhi nyoho tsa iin ñi cuví tsihin ra Jesucristo.

Tan na cuvi tsi tacan ñi.

Carta Tsinu Uvi Tsa Jacuhún Ra Pedro Tsi Nyívì Yihí Cuenda Nyoo

*Nu tyaá ra Pedro inga carta tsa cuenda
nyívì yihí cuenda Nyoo*

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiňu ra tyin caca yu tyiňu ra. Tyaá yu carta ihyá tsa cuenda nyooho tsa natsinu vaha iñi tsi Nyoo tumaa tsa tsinú iñi nyuhu. Inducu ni tsinú iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvin ra cuví ra jacacú tsi yo. ²Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan nihí ndo tsa cuenda tsa nacotó ndo tsi ra tan tsi Jutu Mañi yo Jesús.

*Nacaa taahán tsi coo nyívì yihí cuenda
Nyoo*

³ Nyoo, tsihin tunyee iñi tsa iyó tsi ra, tsahá ra tandihí tsa tsiní ñuhu tsi yo tyin tacan tan coo yo ñayívì tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. ⁴Tan tsihin tandihí tsa vaha can, tsahá tucu ra tsa catyí ra tyin cuhva ra tsi yo. Maa tyin cahnu xaan tan yahví xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoq yo tandihí tsa caquińi tsa javahá yo, tan ña cua tiví yo tumaa tiví nyívì nyicún tsa ña vaha tsa iyó nu ñuhu ñayívì ihyá. ⁵Yacan cuenda cuní tsi tsinú ca iñi yo tsi Nyoo tan ñavin yacan ñi tyin cuní tucu tsi nducu yo cuhva coo cuiti yo. Tan cuní tucu tsi nducu yo cuhva cutuńi vaha iñi yo cuhva cuní Nyoo tsihin yo. ⁶Yaha can tan nducu yo cuhva cundaca ñaha yo cuño ñuhu yo tan cuhva tsicá iñi yo. Yaha can tan nducu yo cuhva tsa ña yatyi xaan cundińi iñi yo. Yaha can tan nducu yo cuhva coo yo ñayívì iyó Nyoo. ⁷Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyívì tumaa tsa cuñi maa Nyoo tsi tandihí yo.

⁸Tatun tacan iyó ndo tan tacan nducu ndo cuhva tsa coo tandihí tsehe tsi ndo, cua

cutyiňu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹Maa tyin nyívì tsa nduve yacan iyó tsi, cuví ñi tumaa iin ra cuua. Ña cutuńi iñi ñi tsa taahán tsi coto ñi. Tan tsa naq iñi ñi tyin ndatsi Nyoo cuatyí ñi tahán tsanaha. ¹⁰Nyoo caná tsi ndo tan nacatsi ra tsi ndo. Yacan cuenda yañi, tun javahá ndo tandihí tsa caahán yu tuhun ihyá, ña cua nduva ihñi ndo. ¹¹Tacan tan ña yii cua quíhvì ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuii ndo tsihin ra.

¹²Yacan cuenda ña jandihí yu tsa janduhún iñi yu tuhun ihyá tsi ndo, vasu tsa tsitó maa ndo itsi, tan vasu nii cuní ndo javahá ndo tuhun nditsa tsa cutuhvá ndo.

¹³Tan cuñi yu tyin vaha tsa janducuhún iñi yu tuhun ihyá tsi ndo tsitsi tsa ndi iyó ca yu.

¹⁴Tyin tsa jacoto Jutu Mañi yo Jesucristo tsi yu tyin ña naha ca tan cua nacoq yo ñuhu ñayívì ihyá. ¹⁵Tan cua jañińi yu tsi yu tsa janducuhún iñi yu tuhun ihyá tsi ndo tyin tacan tan quívì cíu yu ña naa iñi ndo itsi.

*Nu nacatyí tuhun ra Pedro nácaa nyéhe ra
naha tsa cahnu cuví ra Cristo*

¹⁶Ñavin tsa nandacu iñi ñi maa ndi tan cahan ndi tsihin ndo quívì jacoto ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyéhe ndi tsa cahnu cuví ra. Tan jacoto ndi tsi ndo tyin iyó xaan tunyee iñi tsi ra tan cua quitsi ra inga tsaha. ¹⁷Tyin nyéhe ndi nu jacahnu Nyoo Jutu yo tsi ra tan nyéhe ndi nu janduxińu ra cuhva caá ra. Tan sií xaan cuví nu cahan Nyoo tan catyí ra: “Ra ihyá cuví Sehe yu, tan cuñi xaan yu tsi ra. Tan sií xaan cuñi yu tsihin ra”, catyí Nyoo tuhun ra Jesús quívì can. ¹⁸Juvín nyuhu tsiní ndusu Nyoo tsa quitsi ityi andiví quívì tsiyucu ndi yucu ii tsihin Jutu Mañi yo.

¹⁹Tuhun ihyá janahá tyin nditsa tsa tyaa ra cuví ndusu yuhu Nyoo nu tutu tahán tsanaha. Tatun tyaa yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tińuu cahnu tsa caná tsa cua tuví tyin jandunditsín ra tsitsi añima yo. ²⁰Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyí tsa tyaa ra ndusu yuhu Nyoo. ²¹Tyin

ra cuví ndusu yuhu Nyoo tahan tsanaha ña cahán ra naha cuhva cuñí maa ra naha. Maa tyin cahán ra naha cuhva cuñí Nyoo tyin maa Tatyí Ii Nyoo jaquihín ityi tsi ra naha.

2

Rajacuahá tsa ña nditsa
(Judas 4-13)

¹ Maa tyin tsicoo tucu ra cahán cuendu naha ra nu tsicoo nyivi Israel tahan tsanaha. Catyí ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuahá ra naha tsa ña nditsa tsa cuví jativi tsi ndo. Tan cua catyí ra naha tyin ña nditsa tuhun Jutu Mañi yo tan juvin ra jatá tsi ra naha. Yacan cuenda numi ñi cua cunaa ra can naha ra. ²Tan cuaha xaan nyivi cua cunyicun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo. ³Tan tsa cuenda tsa cuñí ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuahá ra naha maa ñi tsa ña nditsa. Maa tyin ndatú Jutu Mañi yo tatsi turí ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahá Nyoo tucanhnu iñi tsi ángel tsa tsicoo cuatyí tahan tsanaha. Jacuhún ra tsi nahnu anyaya. Tsahñi ra tsi nahnu tsihin cadena, tan nacoq ra tsi nahnu nu naa nda cuanda tahan tsi jacutuñi ra tsi nahnu. ⁵Tan ndi ña jahá ra tucanhnu iñi tsi nyivi ña vaha tsa tsicoq tsanaha. Jacuñi ra savi xaan tsahñi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahan ra tsihin nyivi na nducu ñi cuhva coo vaha ñi tsihin Nyoo. ⁶Tacan javahá tucu ra tsihin ñuu Sodoma tan ñuu Gomorra, janaa ra itsi. Tsahmi ra ñuu can tan nanduvi tsi nyaas, tyin coto nyivi caquiñi tsa iyó vityin tan nyivi tsa cua coo naá cua tahan ñi. ⁷Maa tyin jacacu ra tsi ra Lot tyin vaha iyó ra nuu ra. Cuiihya cuñí ra Lot nyehé ra cuhva iyó nyivi caquiñi can. ⁸Tandihi quíví tsa tsicoq ra Lot ñuu can, cuiihya cuñí añima ra tsa cuenda tsa tsíñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi. ⁹Tacan jacacu Nyoo tsi yo tatuñ vaha iyó yo nuu ra. Maa tyin naquihín vaha ra tsi nyivi

caquiñi nda cuanda tahan tsi quíví cutuñi ñi.

¹⁰Yaha ca cua tatsi tuñi Nyoo tsi nyivi tsa javahá tsa ña vaha tsa cuñí cuñu ñuhu ñi, ñi tsa ña cuñí cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñí maa ra naha. Tan ña yuuhví ra naha caahán ra naha ndavaha ñi siqui ra iyó ca tunyee iñi tsi tumaa Nyoo a ángel, a tatyí ña vaha. ¹¹Tan ángel, vasu ndi maa iyó ca tunyee iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quiti tsa ña cutuñi iñi tan javahá ti naha ti tsa cuñí maa ti naha ti. Tyin quiti, ñná cuenda iyó ti? Iyó ti tyin tiñi yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cíu ra naha tumaa tsiihí quiti can naha ti.

¹³Cua nyehé ra naha tundoho tsa cuenda tsa janyehé ra naha tundoho tsi inga nyivi. Sií xaan cuñi ra naha tsihin tsa caquiñi javahá ra naha nu tuvi. Tsahá ra naha ticanuu nu yucú ndo nu iyó vico tatuñ cutahán ra naha tsihin ndo. Nyaá xaan ra naha tusí iñi. Maa tyin juvin ñi tsi maa ra naha jandaví ñaha ra naha.

¹⁴Tandihi ñaha tsa nyehé ra naha, cuñí ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandaví ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. ¹⁵Nacoq ra can naha ra ityi vaha tan naquihín ra naha ityi tsa cuahán nu cua cunaa ra naha tyin javahá ra naha tumaa javahá ra Balaam, sehe ra Beor. Tyin ra Balaam cuñí ra jaha canaa ra xuhun tsihin tsa ña vaha tsa javahá ra. ¹⁶Tacan tan nacahan burru jana ra tsihin ra, tumaa caahán nyivi, tan tsa nacahan ti ña tsahá ti cuhun ra javahá ra tsa ña vaha tsicá iñi ra.

¹⁷Tan tacan tucu maa ra can naha ra. Cuví ra naha tumaa iin soco ityi nu nduve ndutya yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuii ra naha. ¹⁸Yaa xaan caahán ra naha. Maa tyin tandihí tsa caahán ra naha

nduve yahvi nyaá can. Tan tsihin tandíhi tsa ña vaha tsa javahá ra tan tsihin tsa ña vaha tsa cuñí cuñu ñuhu ra naha jandaví ñaha ra naha tsi nyiví tsa tsa yahá quita mahñu nyiví tsa javahá tsa caquiñi.¹⁹ Catyí ra naha tsihin ñi tyin cua coo nuña ñi. Maa tyin juvin ñi maa ra naha tsahá tsa cundaca ñaha tsa caquiñi tsi ra naha. Tyin tatum tsahá yo tsa cundaca ñaha tsa cundaca ñaha tsi yo, musu can cuví yo.²⁰ Tyin nyiví tsa nacoto tsi Jutu Mañi yo Jesucristo, ra jacacú tsi yo, tsa yahá nacoo ñi tsa caquiñi tsa iyó nu ñuhu ñayiví ihyá maa tyin tatum javahá nyico ñi tsa caquiñi, cahnu ca cuatyí ñi cua coo nu Nyoo.²¹ Vaha ca tun tsatayin ña nacoto ñi ityi vaha, tan ñavin ca tsa nacoo ihñi ñi tsa tsahá Nyoo tsi ñi tsa tsa yahá nacoto ñi tsi ra.²² Maa tyin cundaa tsa tuhvá nyiví caahán: “Ina tsatsí nyico ti tsa ndutsan tì. Tan quiní tucu, tun tsa yaha tsityí ti, quihví nyico ti nu xahan nyahyu.” Tacan cuví ñi can tyin javahá nyico ñi tsa javahá ñi nda jihna.

3

Quiví cua quitsi nyico Jutu Mañi yo

¹ Yañi, cuñí xaan yu tsi ndo. Carta ihyá cuví carta tsinu uvi tsa jaquitsí yu tsi ndo. Tan nu nduvu taahan carta ihyá tsahá cuenda yu tsi ndo na caca vaha iñi ndo tan ña naa iñi ndo tsa cutuhvá ndo.² Ndycuhun iñi ndo tsa cahán ra cuví ndusu yuhu Nyoo tahan tsanaha. Tan ndycuhun tucu iñi ndo tsa jacuahá ndi tsi ndo. Tyin cuví ndi ra tava tyiñu Jutu Mañi yo Jesucristo, ra jacacú tsi yo.

³ Coto jihna ndo tyin nu cua ndihi quivi cua quitsi nyiví cua vacu nducu tuhun Jutu Mañi yo. Tan cua coo ñi cuhva ña vaha cuñí cuñu ñuhu ñi. ⁴Tan cua catyí ñi: “¿Náa ra Jesucristo tsa catyí tyin cua quitsi ra inga tsaha? ¿Numaa nyíí ra?” Tyin nda quivi tsa tsihí tsii tsaañu yo tan nda cuanda tsa tsinu ñuhu ñayiví tan nda vityin caá ñi maa tahan ñi caá”, cua catyí ñi.⁵ Tyin maa ñi ña cuñí ñi coto ñi tyin nda tyembu tsahnu cahán Nyoo tan javahá ra andivi tan ñuhu ñayiví. Quita ñuhu ñayiví tsitsi ndutya, tan tsihin ndutya tsinu tsi.⁶ Tsa yahá javahá Nyoo ñuhu ñayiví juvin ñi maa tsihin ndutya naa ñuhu ñayiví quivi cuun savi xaan.⁷ Maa tyin andivi tan ñuhu ñayiví

tsa iyó vityin ndatú tsi tsa cayu tsi tumaa catyí maa Nyoo. Cua cayu andivi tan ñuhu ñayiví tsihin ñuhu quivi cua cutuñi nyiví tan cua naa nyiví caquiñi.

⁸ Maa tyin nyooho yañi yu tsa cuñí xaan yu, ña naa iñi ndo tyin tsa cuenda Jutu Mañi yo tsa iin quivi cuví tsi tumaa mil cuiya, tan tsa mil cuiya cuví tsi tumaa tsa iin quivi tsa cuenda ra.⁹ Vasiqú yihí ndo tsicá iñi ndo tyin maa Jutu Mañi yo ña cuñí naha quitsi. ñaha ca quitsi ra tyin ndatú jihna ra nda ndu uvi iñi tandíhi nyiví tan nasama ñi cuhva iyó ñi tyin ña cuñí ra tsa cunaa ndi intuhun yo.

¹⁰ Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yu tsi ra. Cua quitsi ra tumaa iin ñasuhu. Tan ñihí cunahma tan cua naa andivi. Tan cua janaa ñuhu tandíhi tsa iyó ityi siqui. Tan ñuhu ñayiví cua cayu tsi tsihin ñuhu tsihin tandíhi tsa iyó nuu tsi.

¹¹ Tacan cua naa tandíhi tsa iyó. Yacan cuenda cuñí tsi cuiti coo yo tumaa iyó maa Nyoo.¹² Cuatu ndo quivi quitsi Nyoo. Ndycu ndo cuhva quitsi ñi ra tyin quivi tsa cua quitsi ra cua naa andivi jaha ñuhu. Tan tandíhi tsa iyó cua naa tsi tsihin tsa ihñi ñuhu can.¹³ Maa tyin yoo ndatú yu andivi tsaa tan ñuhu ñayiví tsaa tsa catyí Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yu tsi Jutu Mañi yo, ndycu ndo cuhva coo vaha ndo tsihin Nyoo, tyin tacan tan quivi quitsi ra, sií cua cuñí yo tan cua coo taxin añima yo tyin nduve ca cuatyí yo iyó.¹⁵ Coto ndo tyin Jutu Mañi yo ña cundihí iñi ra ndatú ra tsi yo tyin cuñí ra tsa cacu cuaha nyiví. Juvin ñi tyeñen caahán tucu ra Pablo yañi yo nu carta tsa jaquitsi ra tsi ndo. Tyaq ra itsi tsihin tsa tsiní tuñi tsa tsaha Nyoo tsi ra.¹⁶ Tandíhi ñi nu carta ra tan caahán ra tuhun ihyá. Vasu yihí tsa yíí xaan cutuñi iñi yo. Tan nyiví tsa ña cutuñi iñi, ñi tsa ña ñihí nyaá tsihin Nyoo, siín cuhva cutuñi iñi ñi itsi. Juvin ñi tacan javahá ñi tsihin tuhun Nyoo tsa tyaa inga ca ra naha. Tan tsa tacan javahá ñi, juvin ñi tsi maa ñi jacunaá ñi.

¹⁷ Yacan cuenda yañi, vityin tsa tsító ndo tuhun ihyá tsa ndi cumañi ca cuvi tsi, jaha ndo cuenda tsi ndo tan cuñí yu tsa coto ndihi ndo cuhva jandaví ñaha ra caquiñi

can naha ra, tyin tacan tan ña nacoo ndo
cuhva vaha tsa cuahán ndo.¹⁸ Maa tyin cuñí
tucu tsi nacoto vaha ca ndo tsi Jutu Mañi yo
ra Jesucristo, ra jacacú tsi yo. Tan cuahnu
ca ndo tsihin tsa vaha ra tsa tsahá ra tsi yo.
Na jacobino yo tsi ra vityin tan tacan ñi maa.
Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayiví nyito

¹ Ihya tyáa ndi tuhun ra tsa iyó nda ndi cumañi coo tandíhi tsa iyó. Tsíñi ndi tsa cahan ra quíví tsicá ndi tsihin ra. Nyehé ndi tsi ra tsihin tinuu ndi tan cutuñi iñi ndi yóo ra cuví ra. Tan tijin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsahá ra ñayiví nyito iyó yo. ² Tan quíví tsaa ra nyehé ndi ñayiví nyito can tan cuví ndi tsandaa tsa cuenda can. Tan jacotó ndi tsi ndi náa cuví ñayivi tsa ñia cua naa tyin iyó tsi tsihin Jutu yo Nyoo, tan tsaa tsi nu iyó yo. ³ Nacatyí tuhun ndi tsihin ndo tsa nyehé ndi tan tsa tsíñi ndi. Tyin tacan tan cuvi ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴ Tan tyáa ndi tuhun ihya tsa cuenda ndo tyin tacan tan coto ndo tandíhi tsa tsahá Nyoo tsi ndo tan sii xaan cuvi tsi ndo.

Nyoo, ñuhu cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyi ra tsihin ndi tyin Nyoo ñuhu cuví ra. Tan nduve tsa naa tsi ra, [nduve tsa ñia vaha tsicá iñi ra cuví can]. ⁶ Tun catyi yo tyin iin ñi cuví yo tsihin ra, tan ndi iyó ca maa yo nu naa, jandaví ñiahá yo tan ñia javahá yo tsa nditsa. ⁷ Maa tyin tatuñi iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyiví yihí tuhun Nyoo tsihin yo, tan nacatyá ra Jesucristo Sehe Nyoo tandíhi cuatyí yo tsihin niñi ra.

⁸ Tatuñi catyi yo tyin nduve cuatyí yo, juvin ñi maa yo jandaví ñiahá yo, tan nduve tsa nditsa iyó añima yo. ⁹ Maa tyin tatuñi naahmá yo cuatyí yo nuu Nyoo, cuví cuita iñi yo tsi ra tyin cua jaha ra tucahnú iñi tsi yo tsa cuenda cuatyí yo tan cua nacatyá ra tandíhi cuatyí yo tyin maa ra vaha ra tan javahá ra cuhva catyi ra tyin ñia vatya ra. ¹⁰ [Nyoo catyi ra tyin iyó cuatyí yo], tan tatuñi catyi yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandíhi tuhun ihya tsihin ndo, tyin tacan tan ñia javahá ca ndo tsa ñia vaha. Maa tyin tatuñi iin ndo tan javahá ndo tsa ñia vaha, ñia nayuhvi ndo tsa ñia cuví ca nduvaha ndo nuu Nyoo, tyin iyó iin ra caahán ndaahvi tsaha yo nuu Nyoo. Tan ra icán cuví ra Jesucristo, ra cuítí iyó. ² Juvín ra jahá tucahnú iñi tsi yo tyin tsihí ra nu cruu tsa cuenda cuatyí yo. Tan ñavin tsa cuenda maa ñi maa yo tsihí ra, tyin tsihí ra tsa cuenda tandíhi cuui nyiví iyó nu ñuhu ñayiví.

³ Tatuñi tyáa yahvi yo tsa caahán Nyoo, nacotó yo tsi ra. ⁴ Maa tyin tatuñi iin ra tsaa catyi tyehen: "Yuhu tsitó yu tsi Nyoo", tan ñia tyáa yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra. ⁵ Nyiví javahá tsa caahán Nyoo, ñi icán cuví ñi cuñi tsi ra tsihin tsa ñii iñi añima ñi. Tan tsihin yacan tsitó yo tyin iin ñi cuví ñi tsihin ra. ⁶ Nyiví catyi tyin iin caa ñi iyó ñi tsihin Nyoo, taahán tsi coo ñi tumaa tsicoq maa ra Jesucristo quíví quitsí ra nu ñuhu ñayiví ihya.

Taahán tsi tsa cuñi tahan yo tsi yo

⁷ Yañi, ñavin tuhun tsaa jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsí ca tsi. Tan juvin tsi cuví tsa tsa yahá tsíñi ndo. ⁸ Maa tyin ñia tsindihí tsa tsaa tsi tyin tyáa yahvi yo itsi tan tsa tyáa yahvi yo itsi, cuñi tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihí ca jandunditsín ñuhu tsa nditsa.

⁹ Nyoooho tsa catyi tyin iyó ndo nu nditsin, tan ndasi cuñi ndo nyehé ndo tsi nyiví yihí tuhun Nyoo tsihin ndo, ndi iyó ndo nu naa.

¹⁰ Maa tyin nyiví tsa cuñi tsi nyiví yihí tuhun Nyoo tsihin ñi, iyó ñi nu nditsin. Tan nduve maa cuatyí cuvi janduva tsi ñi. ¹¹ Maa tyin nyiví ndasi cuñi nyehé tsi nyiví yihí tuhun Nyoo tsihin ñi, iyó ñi nu naa. Tan ñia tsitó ñi numaa cuahán ñi tyin ñia nditsin nyehé ñi tyin tumaa tsa cuaq ñi jahá tsa naa can.

¹² Jaquitsí yu tandíhi tuhun ihya tsi nyoooho tsa ndi nacuhvá cuenda tsi ndo tsi Nyoo. Tyin tsa yahá jaha Nyoo tucahnú iñi cuatyí ndo tsa cuenda tsa tsihí ra Jesucristo cuenda yo. ¹³ Nyoooho tsa tsa tsahnu tsihin

tuhun Nyoo, tyáa yu carta ihyá tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyáa tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyáa tucu yu itsi tsa cuenda nyooho, tsa ndi nacuhva cuenda tsi ndo tsi Nyoo, tyin nacotó ndo tsi Nyoo Jutu yo.¹⁴ Jaquitsí yu carta ihyá tsi nyooho tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayivi. Tan jaquitsí yu carta ihyá tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndi jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayivi ihyá. Tyin nyiví cuñi tandihi yacan, ña cuñi ñi tsi Nyoo Jutu yo.¹⁶ Tyin tandihi tsa ña vaha tsa iyó nu ñuhu ñayivi ihyá, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tsihin tsa iyó tsi yo, tandihi yacan tsahá ñuhu ñayivi ihyá tsi yo, tan ñavin Nyoo Jutu yo tsahá can.¹⁷ Ñuhu ñayivi ihyá cua cundihi can, tan cua cundihi ndihi tucu tandihi tsa caquiñi tsa cuñi nyiví javaha ñi. Maa tyin nyiví tsa javahá cuhva cuñi Nyoo, cua coo cuui ñi tsihin ra.

Nu tsa ndasi cuñi nyehe tsi ra Cristo

¹⁸ Nyooho, tsa cuví ndo tumaa sehe yu, coto ndo tyin tsa cua ndihi quivi. Tan nyooho tsinj ndo tyin vatsí nyiví tsa ña cuñi nyehe tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tsihiñ yacan nacotó yo tyin tsa tahen tsi cundihi quivi.¹⁹ Nyiví can ña yihí ca ñi tuhun Nyoo tsihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyiví yihí tuhun Nyoo tsihin yo cuví ñi.

²⁰ Maa tyin nyooho tsa tsitó ndo tsa caahán Nyoo tyin tsahá ra Cristo Tatyi li Nyoo iyó añima ndo tan jacotó tsi tandihi tsi ndo.²¹ Jaquitsí yu carta ihyá tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo

tyin ña cuvi quita tuhun vatya tsihin tuhun nditsa.

²² ¿Yóo cuví nyiví vatya? Nyiví vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehé tsi ra Cristo. Tyin ña tsinú iñi ñi tsi Jutu yo Nyoo, tan tsi ra Jesucristo Sehe ra.

²³ Tan tandihi nyiví tsa ña tsinú iñi tsi Sehe Nyoo, nduve Nyoo Jutu yo iyó tsihin ñi. Maa tyin nyiví tsa caahán tsihin tsa iñi iñi añima ñi tsihin nyiví tyin ra Jesucristo cuví Sehe Nyoo, iyó Nyoo Jutu yo tsihin ñi.

²⁴ Yacan cuenda naquihin vaha ndo tsitsi añima ndo tandihi tsa tsinj ndo nda quivi jihna ñi. Tyin tun naquihin vaha ndo itsi tsitsi añima ndo, cua coo ndo iin cua ñi tsihin Nyoo Jutu yo tan tsihin Sehe ra.²⁵ Tan ñayivi nyito can cuví tsa catyí ra Jesucristo tyin cuhva ra tsi yo.

²⁶ Tyáa yu tuhun ihyá tyin cahvi ndo itsi tsa cuenda tyin tsa iyó cuaha nyiví cuñi jan-daví ñaha tsi ndo.²⁷ Maa tyin ra Jesucristo tsahá ra Tatyi li Nyoo iyó añima ndo, yacan cuenda ña tsinj ñuhu ca tsa jacuaha nyiví tsi ndo. Tyin juvin ñi maa Tatyi li Nyoo jacuahá tandihi maa tyinu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihí ndo cunyanaa vaha ndo tsi ra Cristo tumaa janahá maa Tatyi li Nyoo tsi ndo.

²⁸ Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quivi quitsi ra, iin cuñi yo tsihin ra. Tan iin cuñi tucu maa ra tsihin yo. Tan inga tucu tuhun ña cua tahan yo ticanuu nuu ra quivi tsaa ra.²⁹ Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyiví javahá tsa vaha, sehe Nyoo tsi ñi.

3

Nyiví cuví sehe Nyoo

¹ Nyehé ndo, Nyoo Jutu yo cuñi xaan ra tsi yo, tyin jacunañí ra sehe Nyoo tsi yo. Tan cuví yo sehe ra. Tan tsa cuenda yacan, nyiví taahán iñi tsa iyó nu ñuhu ñayivi ihyá ña cutuñi iñi ñi cuhva tsicá iñi yo tyin ña nacoto ñi tsi maa ra.² Nyooho yañi, tsa cuví yo sehe ra vityin, maa tyin ñaha ca coto yo náa cua cuvi yo. Maa tyin tsitó yo tyin quivi quitsi ra Jesucristo, cua cuvi yo tumaa cuví maa ra, tyin cua nyehe vaha yo tsi ra tan cua nyehe tucu yo nácaa caá ra.

³Tandíhi yoo tsa ndatú tsa cua cuvi tacan, nducú yo cuhva janduvaha yo tsi yo, tan cuvi yo tumaa maa Jutu Mañi yo Jesucristo, tyin maa ra cuiti iyó ra.

⁴Tandíhi nyiví tsa tsicoó cuatyí, ñi ican cuvi ñi tsa ña tyaá yahvi ley Nyoo. Tyin tun javahá yo tsa ña vaha, cuñí tsi catyi tyin ña tyaá yahvi yo ley Nyoo. ⁵Nyooho tsa tsitó tyin ra Cristo quitsí ra nu ñuhu ñayiví ihyá tyin quinyaa ra cuatyí yo, tan tsitó tucu ndo tyin maa ra nduve cuatyí ra. ⁶Tandíhi yoo tsa iyó iin caa ñi tsihin ra, ña jañihí ca yo javahá ca yo tsa ña vaha. Maa tyin nyiví javahá tsa ña vaha, ñaha ca nyehe ñi tsi ra, tan ñaha ca coto ñi tsi ra. ⁷Nyooho, tsa cuví tumaa sehe yu, coto jandavi ñaha nyiví tsi ndo. Tyin nyiví javahá tsa vaha, cuví ñi nyiví vaha, tumaa vaha maa ra Cristo. ⁸Tyin nyiví javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quivi jihna ñi. Yacan cuenda quitsí ra Jesucristo, Sehe Nyoo, tyin janaa ra tandíhi tsa javahá nu.

⁹Tandíhi yoo tsa tsa yahá nacacu tsaa jahá Nyoo, ña taahán ca iñi yo javahá yo tsa ña vaha, tyin iyó yo ñayiví tsahá Nyoo tsi yo. Yacan cuenda ña javahá ca yo tsa ña vaha, tyin tsa yahá nacacu tsaa yo tan vityin cuví yo sehe Nyoo. ¹⁰Cuví nacotó yo ndáa nyiví cuví sehe Nyoo, tan ndáa nyiví cuví sehe nu ña vaha, tyin tandíhi nyiví tsa ña javahá tsa vaha tan ña cuñí tsi nyiví yihí cuenda Nyoo, ñavin sehe Nyoo tsi ñi.

Na cuñí tahan yo tsi yo

¹¹Tyin tsa tsiní ndo nda quivi jihna ñi cuví: Tsa cuñí tahan yo tsi yo. ¹²Ña taahán tsi jahava yo tumaa javahá ra Caín, tyin ra Caín cuví ra iin ra cuenda nu ña vaha. Tan tsahñí ra tsi yañi ra. ¿Náa cuenda tsahñí ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³Nyooho yañi, ña iyo cuñí ndo tun ndasí cuñí nyiví ña yihí tuhun Nyoo nyehé ñi tsi ndo. ¹⁴Yoo tsa cuñí tsi nyiví yihí tuhun Nyoo tsitó yo tyin iyó yo ñayiví nyito, tyin juvin tsi janahá tsi yo tyin ña cuví ca yo nyiví tsihi. Maa tyin nyiví ña cuñí tsi nyiví yihí tuhun Nyoo, cuví ñi tumaa nyiví tsihi,

¹⁵Nyiví ndasi cuñí nyehé tsi nyiví, cuví ñi tumaa nyiví tsahñí nyiví. Tan tsitó ndo

tyin ndi intuhun ñi tsahñí nyiví, tan ña cua cuhva Nyoo ñayiví nyito coo ñi. ¹⁶Tsitó yo náa cuví tsa cuñí tahan yo tsi yo tyin tsa yahá janahá ra Jesucristo tsi yo nácaa taahán tsi cuñí tahan yo tsi yo. Tyin maa ra nda cuanda tsahá ra ñayiví ra tsa cuenda yo tsa catyi tsa cuñí ra tsi yo. Tacan taahán tsi jahava tucu maa yo. Cuñí tsi cuhva yo nda cuanda ñayiví iyó yo tsa cuenda nyiví yihí tuhun Nyoo. ¹⁷Tatun yihí yo tan iyó luxu tsa iyó tsi yo, tan nyehé yo tyin cumañí tsa cumañí tsi inga nyiví, tan jahá yo tumaa tsa ña nyehé ñi yo, ja cuñí yo tsi Nyoo tsa tacan javahá yo? Ña cuñí yo tsi ra. ¹⁸Nyooho tsa cuví ndo tumaa sehe yu, na ña cuñí yo tsi nyiví tsihin tuhun caahán ñi yo, na cuñí tahan yo tsi yo tsihin tsa quitá tsitsi añima yo tan javahá yo tumañi iñi tsihin tsa ñiñ iñi yo.

Nacaa jahava yo tan coo vaha yo tsihin Nyoo

¹⁹Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. ²⁰Tatun tuví iñi tsitsi añima yo tyin iyó cuatyí yo, na ña cuita iñi yo yacan. Na cuita iñi yo tsi Nyoo tyin juvin ra tsitó tandíhi tsa iyó añima yo tan cahnu ca cuví ra tan ñavin ca añima yo. ²¹Yañi, tatun tuví iñi yo tyin nduve cuatyí yo, na ña nayuhví yo nyehe yo tsi Nyoo. ²²Tan tandíhi tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán iñi ra. ²³Tyin tysiñu tsa tsahá ra tsi yo yacan cuví tsa tsinú iñi yo tyin ra Jesucristo cuví Sehe ra, tan tsa cuñí tahan yo tsi yo, tumaa tava tysiñu ra tsi yo. ²⁴Nyiví tyaá yahvi tysiñu tsahá ra tsi ñi, iyó ñi tsihin ra, tan iyó tucu maa ra tsitsi añima ñi. Tan tsitó yo tyin iyó ra tsihin yo tsa cuenda Tatyi li ra tsa tsahá ra tsi yo.

4

Tatyi li Nyoo tan tatyi nu ña vaha

¹Nyooho yañi tsa cuñí xaan yu, ña tsinú iñi ndo tsa caahán nyiví catyí tyin tuhun Nyoo caahán ñi. Nyehé jihna ndo tatuñ nacatsí tahan tsa caahán ñi tsihin tuhun Nyoo. Tyin vityin cuaha xaan nyiví jandaví ñaha iyó. Catyí ñi tyin Nyoo caahán tsa caahán ñi tan ña nditsa ñi. ²Cuví nacoto ndo tsi nyiví tun juvin Tatyi li Nyoo jacahán tsi ñi o ñavin. Ñi tsa iyó Tatyi li Nyoo tsihin,

catyí ñi tyin quee ra Jesucristo nda gloria tan quitsi ra nu ñuhu ñayivi ihyá, tan cuví ra iin rayii tumaa maa yo. ³Maa tyin tandihí nyivi tsa catyí tyin ñavín tacan cuví, ñavín Nyoo jacobán tsi ñi. Tatyi ña vaha, tsa ndasi cuñi nyehé tsi ra Cristo, jacobán tsi ñi. Tsa tsitó ndo tyin nyaá tsa cua quitsi nu jandaví ñaha can. Tan vityin tsa iyó nu nu ñuhu ñayivi ihyá tan jandaví ñaha nu tsi nyivi.

⁴Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra añima ndo tan cahnu ca cuví ra tan ñavin ca nu ña vaha, tsa iyó añima nyivi tsa taahán iñi tsa iyó nu ñuhu ñayivi ihyá. ⁵Ñi ican, cuenda nu ñuhu ñayivi ihyá cuví ñi. Yacan cuenda caahán ñi cuenda tsa iyó nu ñuhu ñayivi ihyá. Tan inga nyivi cuenda nu ñuhu ñayivi ihyá tyaá soho ñi tsa caahán ñi ican. ⁶Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndáa nyivi iyó Tatyi li Nyoo tsihin, tan caahán ñi tsa nditsa tan ndáa nyivi yihi tatyi ña vaha tan jandaví ñaha ni.

Nyoo cuñi xaan ra tsi tandihí nyivi

⁷Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihí yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. ⁸Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihí nyivi. ⁹Nyoo janahá ra tsi yo tsa cuñi ra tsi yo tsihin tsa tsahá ra Sehe mañi ra quitsi nu ñuhu ñayivi ihyá, tyin cuhva ra ñayivi nyito coo yo. ¹⁰Nyehé ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquitsi ra Sehe ra tyin tacan tan cíu ra tsa cuenda yo tan quinyaa ra cuatyi yo.

¹¹Nyooho yañi, tatan tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. ¹²Ndi intuhun maa nyivi, tan ñaha ca maa nyehe ñi tsi Nyoo, maa tyin tatan cuñi tahan yo tsi yo, iyó Nyoo añima yo. Tan niñi vaha iñi yo cuñi yo tsi ra tan tsi nyivi. ¹³Tan tsitó yo tyin iyó vaha yo tsihin ra tan maa ra iyó ra añima yo, tyin tsahá ra Tatyi li ra iyó

añima yo. ¹⁴Nyuhu nyehe vaha ndi tan cuví ndi tsandaas tyin jaquitsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihyá. ¹⁵Tandihí nyivi tsa tsinú iñi tan caahán tyin ra Jesús cuví Sehe Nyoo, iyó Nyoo añima ñi. Tan iyó ñi iin caa ñi tsihin ra.

¹⁶Yoo tsitó yo tan tsinú iñi yo tyin Nyoo cuñi ra tsi yo, tan cuñi ra tsi tandihí nyivi. Tan tandihí yoo tsa cuñi tahan yo tsi yo, iyó yo iin caa ñi tsihin Nyoo; tan Nyoo iyó ra tsitsi añima yo. ¹⁷Tyin tatum cuñi yo tsi Nyoo tsihin tsa niñ iñi añima yo, ña cua nayuhvi yo nyehe yo tsi ra na tahan tsi quiví cutuñi tandihí nyivi nuu ra. Tyin tumaa iyó ra Jesucristo, tacan iyó yo nu ñuhu ñayivi ihyá. ¹⁸Nyoo cuñi ra tsi yo, tan tatum cuñi yo tsi ra, nduve tsa nayuhvi yo. Tatum niñ iñi yo cuñi yo tsi Nyoo ña nuña ca nu quihví tuhun yuuuhví can añima yo, tyin Nyoo jatsiyo ra tandihí maa yacan. Tyin tatum yuuuhví yo, yihi can tyin tuví iñi yo tyin iyó cuatyi yo. Tan yuuuhví yo tsa cua tatsi tuñi Nyoo tsi yo. Tyin tatum yuuuhví cuñi yo, yuuuhví yo tyin ñaha ca cuñi yo tsi Nyoo tumaa taahán maa tsi cuñi yo tsi ra.

¹⁹Yoo cuñi yo tsi Nyoo tyin jihna ca maa ra cuñi tsi yo. ²⁰Tatum iñi nyivi tan catyí ñi: “Yuhu cuñi yu tsi Nyoo”, tan ndasi cuñi ñi nyehé ñi tsi nyivi tahan ñi, nyivi vatyá cuví ñi. Tyin tatum ndasi cuñi yo nyehé yo tsi nyivi tahan yo tsa tuhvá yo nyehé, ¿nácaa cua cuñi yo tsi Nyoo tsa ña cuví nyehe yo? Ña cua cuvi. ²¹Tava tyiñu Nyoo tsi yo tyin tun cuñi yo tsi ra, tacan cuñi tsi tsa cuñi tahan yo tsi yo.

5

Tatum niñ iñi yo tsinú iñi yo tsi Nyoo cuví jaha canaa yo tsi tsa ña vaha

¹Tandihí nyivi tsa tsinú iñi tyin ra Jesús cuví ra Cristo ra quee nda gloria jahá Nyoo, juvin ñi cuví sehe Nyoo. Tyin tatum cuñi yo tsi iñi ra iyó sehe, cuñi ndihí yo tsi sehe ra.

²Tatum cuñi yo tsi Nyoo tan javahá yo tsa caahán ra, cua cuñi ndihí yo tsi nyivi cuví sehe ra. ³Tyin tsa cuñi yo tsi Nyoo yacan cuví tsa tyaá yahvi yo tsa tsahá cuenda ra tsi yo. Tan tandihí tsa tsahá cuenda ra tsi yo, ña yihi javaha yo can. ⁴Tyin tandihí yoo tsa cuví sehe Nyoo, jahá canaa yo tsi tsa ña vaha tsa iyó nu ñuhu ñayivi ñayivi ihyá.

Cuví jaha canaa yo can tyin tsinú iñi yo tsi Nyoo. ⁵ Maa ñi maa nyiví tsa tsinú iñi tyin ra Jesús cuví Sehe Nyoo, ñi ican cuví ñi cuví jahá canaa tsa ña vaha tsa iyó nu ñuhu ñayiví ihya.

Tatyi Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quitsí ra nu ñuhu ñayiví ihya. Tan tsa tsicoondutýa ra tsihin ndutyá tan tsa tsatí niñi ra janahá tyin Sehe Nyoo cuví tsi ra. Ñavin tsa tsicoondutýa ñi ra. tyin nda cuanda tsa tsatí niñi ra. Tan juvin ñi maa Tatyi li Nyoo cuví tsandaa tyin tacan cuví. Tan Tatyi Ii Nyoo ña jandaví ñaha tsi. ⁷ Nda andíví iyó uñi taahan tsa cuví tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyi Ii Nyoo. Tsa nduñi taahan ra naha, iin ñi cuví ra naha. ⁸ Tan nu ñuhu ñayiví ihya iyó tucu uñi tsandaa: Tatyi li Nyoo tsa iyó añima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutýa ra Jesús, nu catyí Nyoo tyin juvin ra Jesús cuví Sehe ra. Tan tsa tsinu uñi cuví nu tsatí niñi ra Jesús. Tan tsa nduñi taahan yacan nacatsí tahan caahán can. ⁹ Yoo naquihín yo tsa caahán ra cuví tsandaa nu ñuhu ñayiví ihya. Tan Nyoo cahnu ca cuví ra tan ñavin ca ra ñuu ñayiví ihya. Yacan cuenda taahán tsi naquihin yo tsa caahán ra, tan juvin ñi maa ra catyí tyin Sehe ra cuví tsi ra Jesús. ¹⁰ Nyiví tsa tsinú iñi tyin Sehe Nyoo cuví tsi ra Jesús, tsitó ñi tsitsi añima ñi tyin nditsa. Nyiví tsa ña tsinú iñi tsi ra, jahá ñi tyin vatya Nyoo, tyin ña cuñí ñi tsinú iñi ñi tsa caahán Nyoo tsandaa cuenda Sehe ra. ¹¹ Tan tyehen caahán Nyoo tsihin yo: Catyí ra tyin tsaha ra ñayiví nyito coo yo tan ñihi yo itsi tatum tsinú iñi yo tyin ra Jesucristo cuví Sehe ra. ¹² Nyiví iyó Sehe Nyoo añima, iyó ñi ñayiví nyito. Tan nyiví nduve Sehe Nyoo iyó añima, ña iyó ñi ñayiví nyito.

Nu ndihí cahan ra Juan tan nu tsahá ra tyiñu tsi nyiví

¹³ Tyaá yu tuhun ihya tsa cuenda nyoho tsa tsinú iñi tsi ra Jesús Sehe Nyoo, tyin tacan tan coto ndo tyin tsa iyó ndo ñayiví nyito tsa ña cua naa maa.

¹⁴ Ndita iñi yo tsi Nyoo tyin tatum tsicán yo tsa tsicán yo tsi ra tan culvha cuñí maa ra tsicán yo, tsitó yo tyin maa ra tsifí ra tsa caahán yo. ¹⁵ Tan tsa tsitó yo tyin tsifí ra tsa

tsicán yo, tsitó tucu yo tyin tsa ñihí yo tsa tsicán yo tsi ra.

¹⁶ Tatun iin nyiví tan nyehe yo tyin javahá ñi cuatyí tsa ña taahán tsi cíu ñi, taahán tsi cahan ndaahvi yo tsihin Nyoo tsa cuenda ñi na jaha ra tucahuñi iñi tsi ñi tsa cuenda cuatyí can. Maa tyin tatum javahá ñi cuatyí tsa taahán tsi cíu ñi, ña ndacan tahvi yo tsa cuenda ñi. ¹⁷ Tandihí tsa caquiñi tsa javahá nyiví, cuatyí cuví can. Tan iyó tucu cuatyí tsa ña jaha Nyoo tucahuñi iñi.

¹⁸ Tsitó yo tyin nyiví tsa nacacu tsaa jaha Nyoo, ña jañihí ca ñi jahava ñi cuatyí. Tyin jahá cuenda Sehe Nyoo tsi ñi tan ña tsahá ra tsa tiñi nu ña vaha tsi ñi.

¹⁹ Yoo tsa tsitó yo tyin cuenda Nyoo yihí yo. Tan tandihí nyiví tsa taahán iñi tsa iyó nu ñuhu ñayiví ihya, nu ña vaha ndacá ñaha tsi ñi.

²⁰ Tan tsitó tucu yo tyin quitsí Sehe Nyoo, tan tsahá ra tsa cutuñi iñi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ñi tsihin ra. Tan juvin maa ra cuví Nyoo tsa nditsa. Tan iyó ra ñayiví nyito tsa ña cua naa maa. ²¹ Nyoho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyiví, tyin ñavin Nyoo cuví can.

Tan na cuvi tsi tacan ñi.

Carta Tsinu Uvi Tsa Tyaá Ra Juan

Nu caahán ra Juan tyin cuñí xaan ra tsi nyiví yihi cuenda Nyoo

¹ Yuhu ra tsahnú cuenda vehe ñuhu, jaquitsí yu carta ihyá tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa nií iñi añima yu. Tan cuñí ndíhi tucu tandíhi nyiví tsa tsító tsa nditsa tsi ndo, yacan ñavin yuhu ñi cuñí tsi ndo. ²Cuñí ndi tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. ³Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi iñi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

⁴Síi xaan cuñí yu tyin tsító yu tyin juhva sehe un vaha xaan nyicún ñi tsa nditsa, tumaa tava tyiñu maa Nyoo Jutu yo tsi yo.

⁵Hermana, caahán ndaahvi yu tsihin un vityin, na cuñí tahan yo tsi yo. Tyiñu ihyá cuñí yu cahan yu tsihin un, yacan cuenda jaquitsí yu carta ihyá tsi un. Ñavin tuhun tsa ndi tsahá Nyoo tsi yo cuví tsi. Tyin tsa iyó maa tsi nda nu quitsaha. ⁶Tsa cuñí yo tsi Nyoo, yacan cuví tsa javahá yo tandíhi tsa tava tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsíñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyiví.

Nu tsahá cuenda ra Juan nácaa jaha cuenda yo tsi yo tsihin nyiví jandaví ñaha

⁷Caahán yu tyehen tsihin un tyin cuahá xaan nyiví jandaví ñaha iyó naníi cahnu nu ñuhu ñayivi. Catyí ñi tyin ña nditsa tsa quitsí ra Jesucristo cacú ra tsihin cuñú ñuhu tan cuví ra ra ñayivi. Nyiví tsa caahán tacan, ñi jandaví ñaha cuví ñi. Tan ñi ndasí cuñí nyehé tsi ra Cristo cuví ñi. ⁸Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihi ca ndo tandíhi tsa cua cuhva Nyoo tsi ndo.

⁹Tandíhi nyiví tsa ña naquihín vaha tuhun tsa jacuahá ra Cristo tsi yo, tan

jacuahá ñi inga ca tuhun, nduve Nyoo iyó tsihin ñi. Maa tyin nyiví naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi. ¹⁰Tatun tsaá nyiví yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndi ña cuhva ndo nacumi tsi ñi. ¹¹Tyin tun cuhva yo nacumi tsi ñi, cuñí tsi catyi tyin javahá ndíhi yo tsa ña vaha tsa javahá ñi.

Nu ndíhi cahán ra Juan

¹²Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsí yu nu yucú ndo. Tyin tacan tan natuhun vaha ca maa yo, tan cusíi ca iñi yo.

¹³Ihya vatsí nacumi tsi un jahá sehe ña tahan un tsa nacatsí ndíhi maa Nyoo.

Tan na cuvi tsi tacan ñi.

Carta Tsinu Uñi Tsa Tyaá Ra Juan

Nu caahán ra Juan tyin vaha cuahán ra Gayo tsihin Nyoo

¹Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihyá tsí un, tyin cuví un iin ra vaha iñi tsi yu tan tsa tsító maa un tyin cuñí xaan yu tsi un tyin iin caa ñi nyicún yo tsa nditsa.

²Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. ³Yuhu sii xaan cuñí yu quiví quitsi juhva ra yañi yo naha ra nu nyí yu. Tan nacatyí tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. ⁴Nduve inga ca tsa sii cuñí yu tumaa tsa sii cuñí yu tsa tsító yu tyin sehe yu cuenda Nyoo nyicún ñi tsa nditsa.

⁵Yañi, cuñí xaan yu tsi un. Vaha xaan jayahá un, tyin jatyinyee un tsi ra yañi yo naha ra. Tsa vaha ca jayahá un cuví tsa jatyinyee un tsi ra yañi yo tsa quee inga ñuu. naha ra. ⁶Tandihi ra naha, tan nacatyí tuhun ra naha nuu tandihi nyiví tsicá vehe ñuhu tyin cuñí xaan un tsi ra naha. Jaha tumañi iñi, jatyinyee ca tsi ra yañi yo naha ra, cuhva tsa tsíñi ñuhu tsi ra naha tumaa taahán iñi maa Nyoo. Tyin tacan tan janíhi ca ra naha cuhun ra naha cahan ra naha tuhun Nyoo. ⁷Tyin tyíñu ra Jesucristo tsicá ra naha. Tan ña cuñí ra naha tsa jatyinyee nyivi tsa ña tsító tsi Nyoo tsi ra naha. ⁸Yacan cuenda maa yo taahán tsi jatyinyee tsi ra naha tsihin tsa tsíñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha jayahá ra Diótrefes

⁹Yuhu jacuhyn yu iin carta tsi nyivi tsicá vehe ñuhu, maa tyin ra Diótrefes ña cuñí ra tyaa soho ra tsa caahán yu tyin cuñí xaan maa ra cuvi ra ityi nuu tsihin nyivi.

¹⁰Yacan cuenda tatushun quitsi yu nu yucú ndo cua jandaa yu tyíñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña

naquihín vaha ra tsi ra hermano tatushun tsiaá ra naha. Tan tatushun cuñí nyivi tsicá vehe ñuhu naquihín vaha ñi tsi ra hermano can naha ra, tyasí ra Diótrefes tsi ñi, tan tavá ra tsi ñi vehe ñuhu.

¹¹Yooho yañi yu tsa cuñí xaan yu ña jayahá un tsa ña vaha tumaa jayahá ra can, maa tyin jayahá tsa vaha. Tyin ra jayahá tsa vaha, cuenda Nyoo cuví ra, tan ra jayahá tsa ña vaha, ña tsító ra tsi Nyoo.

Nu caahán ra Juan tyin vaha xaan tsinú iñi ra Demetrio tsi Nyoo

¹²Tandihi nyivi tan vaha caahán ñi tuhun ra Demetrio. Tan vaha xaan tyáyahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsító ndo tyin tsa nditsa caahán ndi.

Nu ndihí cahán ra Juan

¹³Cuaha xaan tuhun cuñí yu jacoto yu tsi un, maa tyin ña cuñí yu jacoto yu can tsi un tsihin carta. ¹⁴Tyin tyíñi yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. ¹⁵Na coo tsa taxin añima un. Ra vaha iñi tsi yo tsa iyó ityi ihyá jaquitsí xaan ra naha nacumi tsi un. Tan cuñí yu jaha un tumañi iñi cuhva un nacumi tsi tsá intuhun intuhun ra vaha iñi tsi yo.

Carta Tsa Jacuhun Ra Judas Tsi Nyívi Yíhí Cuenda Nyoo

Nu tyáá ra Judas carta tsa cuenda nyíví caná Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyáá yu carta ihyá tsa cuenda nyoocho tsa caná Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. ² Na nyelhe ndaahví Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

Nu caahán ra Judas tuhun nyíví tsa jacuahá tsa ña nditsa

(2 Pedro 2,1-17)

³ Tyíhi yu cuhva tyaa yu iin carta tsa cuenda ndo yañi, tyin cuñí yu cahan yu tsihin ndo nácaa jacacú Nyoo tsi yo. Maa tyin vityin tyáá yu nu carta ihyá tan jañíñi yu tsi ndo na ña cuhva ndo tsa sama cuhva tsinú iñi ndo tsa vaha tsa tsahá Nyoo tsi yo tsa cuví yo nyíví yíhí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi. ⁴ Yacan cuenda jaha cuenda vaha ndo tsi ndo tyin quíhví xeehe juhva ra jandaví ñaha naha ra. Catyí ra naha tyin tsa yahá jahá Nyoo tucanhnu iñi tsi yo, tan yacan cuenda cuví ñi javahá maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahan tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahan tsanaha, maa tyin cuñí yu janducuhun iñi yu tsi ndo tyin Jutu Mañi yo tavára tsi nyíví Israel ñuhu Egípto, jacacu ra tsi ñi ndaha nyíví Egípto can. Maa tyin tsa yahá can janaqá ra tsi tandíhi maa ñi tsa ña tsinu iñi tsi ra. ⁶ Tan juvin ñi tacan javahá tucu Nyoo tsihin ángel tsa ña tyaa yahvi tsi ra. Tsahá ra tyíñu tsi nahnu, maa tyin nacoq nahnu can. Tan yacan cuenda tsahñi ra tsi nahnu tsihin cadena nu naa tan jahá cuenda ra tsi nahnu nda tahan tsi quíví cutuñi nyíví. ⁷ Tacan tucu nyíví ñuu Sodoma tan ñuu Gomorra, tan nyíví ñuu

nyihi tsa tsicoq nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayii can naha ra tsicoq ra naha tsihin ñaha. Tan ñiñaha tsicoq ñi tsihin iin rayii tan inga ra. Tan cuaha ca tsa caquiñi javahá ñi tyin rayii tsicoq ra naha tsihin ra ndusíhi. Tan tsa cuenda yacan, nyehé ñi tutundo no cayu ñi quíví tsahmí Nyoo ñuu ñi. Tan yacan janahá tsi yo tyin nyíví javahá tsa caquiñi, cua cayu ñi tsihin ñuhu tsa ña ña cuña ndahva maa.

⁸ Vasu ndi maa tacan cuvi, vityin ndi iyó ra jandaví ñaha naha ra. Cuñí ra naha tyin vaha javahá ra naha. Maa tyin jativí ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi siquí ra iyó ca tunyee iñi tsi tan ñiavin ca maa ra naha. ⁹ Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quíví cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahan ra ndavaha ñi siquí nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha. ¹⁰ Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quíti, tyin quíti ña cutuñi iñi tì. Icá ñi maa tì naha tì tsa cuñí cuñu ñuhu tì naha tì. Tan tacan tucu ra can naha ra. Tsihin tsa caquiñi tsa javahá ra naha jativí ra naha juvin ñi tsi maa ra naha.

¹¹ ¡Ndahvi ra ndaahví can naha ra! tyin javahá ra naha tumaa javahá ra Caín. Tan tsa cuenda tsa cuñí ra naha jaha canaa ra naha xuhun, nacoq ra naha ityi Nyoo tumaa javahá ra Balaam. Tan cua cunaa ra naha tumaa cunaa ra Coré, tyin tsihí ra can tsa cuenda tsa ña tyaa yahvi ra tsa cahan ra cuví ityi nuu tsihin ra. ¹² Ra tsa jatyañú tsi ndo naha ra tsahá ra naha ticanuu tsi ndo nu ndu iñi ndo. Tyin tsatsí ra naha tan tsihí ra naha tsihin tsa sií cuñí ra naha, tan ña cahán nuu ra naha tsa ña jahá ra naha tsa ñayíví tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yíhí ityi siquí tun tsa cua cuun savi tan caahán tsi tsihin tatyí tan ña cuun savi. Cuví ra naha tumaa yutun tsa

ñña tsahá tsiti. Tyin yutun tsa ñña tsahá tsiti cuví tun tumaa yutun tsa tsa tsihí vasu ndi nyító tun. Tan tumaa tsa uvi tsaha cua cúu tun tyin cua tyahnya cuii yoho tun.¹³ Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyítí tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaña. Tsa nyaá maa tsa cua ndoo cuii ra naha nu naa. Tacan ñi maa tsa cua tahan ra naha.

¹⁴ Tuhun ra can naha ra cahán ra Enoc tahan tsanaha. Ra Enoc tsa tsinu utsa tsa cuví tata ra Adán. Cahán ra tuhun tsa tsahá maa Nyoo tsi ra, tan catyí ra: "Nyehe yu nu vatsí Jutu Mañi yo tan cuenda mil ángel ra vatsí tsihin ra¹⁵ tyin vatsí ra vatsí tatsí tuñi ra tsi nyíví caquiñi tsa cuenda tandíhi tsa ñña vaha tsa javahá ñi, tan nyíví caahán ndavaha ñi siquí ra", catyí ra Enoc tahan tsanaha.¹⁶ Ra tsa jatyañú tsi ndo naha ra, ñña ndooó ra naha vaha tsihin tsa tsahá Nyoo tsi ra naha. Caahán ra naha tan catyí ra naha: "Yii xaan, cahnu xaan tundoho nyehé yo." Javahá ra naha tsa cuñí cuñú ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyíví, javahá ra naha can tyin cuñí ra naha tsa cahan nyíví tyin vaha xaan iñi ra naha.

Nu tsahá cuenda ra Judas tsi nyíví yiñí cuenda Nyoo

¹⁷ Yañi, ñña tyaa yahvi ndo tsi ra can naha ra. Maa tyin nducuhun iñi ndo tuhun tsa cahán ra tsa tavá tyiñu Jutu Mañi yo Jesucristo,¹⁸ tyin catyí ra naha tyehen: "Nu cua ndihí quíví cua coo ra vacu nducu tuhun Nyoo. Cua coo ra naha tsihin tsa ñña vaha tsa tsicá iñi ra naha." ¹⁹ Ra tsa cahán ra naha tuhun cuví ra cuñí jasiñ tsi yo. Tyin tyaa yahvi ra naha cuhva cuñí cuñú ñuhu ra naha tan nduve Tatyi li Nyoo iyó tsihin ra naha.

²⁰ Maa tyin nyoooho yañi, jandu iin ndo iñi ndo tsihin tsa tsinú iñi ndo tsi ra Cristo. Ndácan tahvi ndo tsi ra tsihin tunyee iñi Tatyi li maa ra.²¹ Ndycu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñí xaan ra tsi yo. Tan cuatu ndo quíví cuhun yo coo cuii yo tsihin ra. Tyin yacan cuví tsa cua cuhva Jutu Mañi yo Jesucristo tsi yo tsa cuenda tsa cundaahví iñi ra tsi yo.

²² Cahan yuhu ndo tsihin nyíví tsa ñña tsinú iñi, na tsinu iñi ñi. ²³ Ndycu ndo cuhva

cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ñña cua javaha ndo tsa caquiñi tsa javahá ñi, tyin nda cuando jahma nditsí ñi tan ñña vaha can.

Nu ndihí cahán ra Judas tan jacobnu ra tsi Nyoo

²⁴⁻²⁵ Intuhun ñi Nyoo iyó, tan iyó xaan tsa tsiní tuñi tsi ra. Ra ican cuví ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ñña coo ca cuatyí yo quíví cua cuhun yo tsihin ra nu cahnu cuví nu nyaá ra. Tan sii xaan cua cuñí yo.

Na coto yo tsa cahnu xaan cuví ra. Na jacobnu yo tsi intuhun ñi maa ra tyin cahnu xaan cuví ra. Tan iyó xaan tunyee iñi tsi ra. Na cundaca ñaha intuhun ñi maa ra tandíhi. Tyin nda nu quitsí tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

Tsa Janahā Ra Jesucristo Tsi Ra Juan

Tsa nyehē ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuij javaha ra tsa cua javaha ra. Tan jaquitsí ra Jesucristo iin ángel ra tan tsahā cuenda ra tandihí tsa cua cuvi tsi yuhu, ra Juan, ra cuví musu ra. ² Tan caahán yu tandihí tsa nyehe yu. Tan cuví yu tsandaa tsa cuenda tuhun Nyoo tsa jacoto ra Jesucristo tsi yu.

³ Sii xaan cuví tsi nyivi tsa cua cahví tuhun Nyoo tsa nyaá nu tutu ihyá tan cuñi ñi tuhun caahán tsi tan tyaa yahvi ñi itsi, tyin tandihí tuhun tsa nyaá nuu tutu ihyá, tsa yatin cuij cundaa tsi.

Nu jacuhun ra Juan tutu tsi nyivi tsa utsa taahan vehe ñuhu

⁴ Yuhu ra Juan jaquitsí yu tutu ihyá tsi nyoho, nyivi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuví Nyoo nda tsanaha, tan vityin, tan juvin ra cua quitsí. ⁵ Tan naquihin tucu ndo tsa vaha jahá ra Jesucristo. Tyin ra ican cuví ra tsandaa tan tsa nditsa. Juvin ra cuví ra tsa nandotó tsa jihna ñi. Tan ndacá ñaha ra tsi ra cuví rey tsa iyó nu ñuhu ñayivi ihyá naha ra. Tan cuñi xaan ra tsi yo, tan nacatya ra tsi yo tsihin niñi ra. ⁶ Tan tsahā ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andiví! Tandihí nyivi cua nyehe ñi tsi ra nda cuanda nyivi tsa jañicueehé tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuví. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihí quívi, tumaa letra A tan Z —catyí Jutu Mañi yo, ra iyó tandihí tunyee ñi tsi. Tacan ñi iyó maa ra: Juvin ra

cuví Nyoo nda tsanaha, tan vityin, tan juvin ra cua quitsí.

Nu nyehē ra Juan tsa iyo caá ra Cristo

⁹ Yuhu ra Juan cuví yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunyee xaan iñi yo náa cuví tsi yo tyin jatyinyéé ra Jesucristo tsi yo. Nyíi yu vehe caa ñuhu Patmos tsa canyíi mahñu ndutya ñuhu. Nyíi yu vehe caa tsa cuenda tsa caahán yu tuhun Nyoo tsa jacuha ra Jesucristo. ¹⁰ Tan iin tumingu quívi jacahnú yo tsi Jutu Mañi yo, tuví ñiñi yu tsa nyaá Tatyi li Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta.

¹¹ Tan catyí tsi tsihin yu tyehen:

—Yooho, Juan. Yuhu cuví ra jihna ñi, tan yuhu cua coo nu cua ndihí quívi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgeamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan.

¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayii ñuhu ñayivi ihyá. Nditsí ra jahma cañi nda nu tsaha ra. Tan yiñi in cinturón xuhun cuaan yíquí nyica ra. ¹⁴ Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyi. Tan tinuu ra caá tsi tumaa caá nu cayú ñuhu. ¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. ¹⁶ Tan ndaha cuaha ra nyecú utsa taahan tiñuu andivi. Tan tuhun quitá yuhu ra caá tsi tumaa caá mityi tsa xaan nduvi tsyo yuhu. Tan nuu ra caá tsi tumaa caá tun ñihi xaan nyehé ñicanyii.

¹⁷ Cuhva tsa nyehe yu tsi ra, nduva yu tsaha ra tumaa tsa tsihí yu. Maa tyin tyiso ra ndaha cuaha ra siquí yu, tan catyí ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihí quívi. ¹⁸ Yuhu

nyito yu vasu tsihí yu, maa tyin vityin ña cua cundíhi maa tsa iyó yu. Tan iyó ndatu tsi yu tsa catyi yu ama taahán tsi cíu nyivi, tan tatum cuhun ñi anyaya o ña cuhun ñi.

¹⁹Tyaa nu libru tandíhi tsa nyehé un, tan tsa iyó vityin, tan tsa cua coo nu cuahán ca tsi.

²⁰Tuhun ihyá cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñí tsi catyi tsa utsa vehe ñuhu.

2

Nu quitsaq tsahá cuenda ra Cristo tsi nyivi tsicá tsa utsa vehe ñuhu: Tsa tsahá cuenda ra tsi nyivi tsicá vehe ñuhu ñuu Éfeso

¹Jacuhun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: “Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ²Yuhu tsitó yu tandíhi tsa jahándo. Tan nyehé yu tyin ñihi xaan jahátiñu ndo tan cunyeé xaan iñi ndo. Tan tsitó yu tyin ña cuñí ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³Cunyeé xaan iñi ndo. Tan nyehé xaan ndo tundoho tan jahátiñu xaan ndo tsa cuenda yu tsihin tsa ña ndu uvi iñi ndo. ⁴Maa tyin iyó iin tsa ña vaha jahándo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi.

⁵Yacan cuenda nducuhun iñi ndo numaa nda nduvá ndo. Tan nasama ndo cuhva iyó ndo, tan jahava nyico ndo tumaa jahava ndo quivi naquihín cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatum ndu uvi iñi ndo cuatyí ndo, ña cua quitsi yu quinyaa yu itsi. ⁶Cuaha tsa ña vaha jahándo, maa tyin iyó tucu tsa vaha jahándo, tyin ña cuñí ndo nyehé ndo tsa caquiñi tsa jahá nyivi yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷Nyooho tsa iyó soho, tyaa soho ndo tsa caahán Tatyi li Nyoo tsihin nyivi tsicá vehe ñuhu.

Catyí ra tyehen: Tatum cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añaima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

Tsa tsahá cuenda ra Jesucristo tsi nyivi tsicá vehe ñuhu ñuu Esmirna

⁸Jacuhun ndihí tutu tsi ra caahán tuhun yu tsihin nyivi tsicá vehe ñuhu ñuu Esmirna, tan catyi tsihin ra tyehen: “Tyehen catyi ra cuví tsajihna ñi, ra cua coo nu cua ndihí quivi, ra tsa tsihí tan nandoto:

⁹Yuhu nyehé yu tandíhi tsa jahándo. Tan tsitó yu tyin nyehé xaan ndo tundoho. Tan tsitó yu tsa ndaaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyivi Israel ndavahá ñi siquí ndo. Tan ndi ñavin ñi Israel cuví ñi tsitsi añaima ñi tyin cuenda nu ña vaha, nu nañí Satanás, cuví ñi. ¹⁰Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatum cua jaña ndo tsi Nyoo. Tan utsi quivi cua nyehé ndo tundoho. Maa tyin cuanyicun vaha ndo tsi Nyoo nda cuanda cíu ndo. Tan yuhu cua cuhva yu ñayivi coo ndo tsihin Nyoo.

¹¹Nyooho tsa iyó soho, tyaa soho ndo tsa caahán Tatyi li Nyoo tsihin nyivi tsicá vehe ñuhu. Catyi ra tyehen: Tatun cuvi jaha canaa ndo tsi nu ña vaha, ña cua cuhun ndo anyaya, quivi cíu nyivi tsa tsinu uvi tsaha.”

Tsa tsahá cuenda ra Jesucristo tsi nyivi tsicá vehe ñuhu ñuu Pérgamo

¹²Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Pérgamo. Tan catyi tsihin ra tyehen: “Tyehen catyi ra tsa ndahá mityi tsa xaan nduvi tsiyu yuhu: ¹³Yuhu nyehé yu tandíhi tsa jahándo. Tan tsitó yu tyin vaha jahándo tyin ña jandihí ndo tsa tsinu iñi ndo tsi yu. Tan tacan ñi tsinu maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyivi tsi ra Antipas, ra tsa cuvi tsandaa cuenda yu. ¹⁴Maa tyin quituví juhva tsa jahándo nuu yu: Tyin ñuu Pérgamo nu yucú ndo ihyá, yihí ra tsa ña cuñí jandihí cuhva tsa jahára Balaam, ra tsicoog tsanaha. Tyin ra Balaam natyuhu

ra tsi ra Balac, na jacatsi ra cuñu quiti tsa jamañi nyivi nu tsitoho tsi nyivi Israel. Tan natyuhu ra tsi ra na catyi ra tsihin ñi tyin ñavin cuatyi cuví tun iin ñaha tan iyó ña tsihin iin rayii vasu ña tindahá ñi, tan tacan tucu ñi rayii.¹⁵ Tan juvin ñi iyó tucu juhva nyivi tsa ña cuñi nacoo tsa jacuahá ra yihí cuenda ra Nicolás. Tan yuhu ndasí cuñi yu nyehe yu tsa jacuahá ra can naha ra.¹⁶ Yacan cuenda janumi ndo násama ndo cuhva iyó ndo. Tyin tatus ña nasama ndo cuhva iyó ndo, cua quitsi yu nu yucú ndo tsa numi ñi tan cua cañi tahan yu tsihin nyivi tsa javahá tacan tsihin mityi [tsa cuví tuhun] quitá yuhu yu.¹⁷ Nyoooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu: Tatus cuvi jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyií xeehe. Tan cua cuhva yu iin yuu cuitsin tsi ndo. Tan nu yuu can nyaá iin siví tsaa tsa yoñi tsitó; intuhun ñi nyivi tsa cua naquihin yuu can cua coto siví can.”

Tsa tsahq cuenda ra Jesucristo tsi nyivi tsicá vehe ñuhu ñuu Tiatira

¹⁸ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Tiatira. Tan catyi tsihin ra tyehen: “Tyehen catyi Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan.¹⁹ Yuhu nyehé yu tandihí tsa javahá ndo. Tan tsitó yu tsa cuñi xaan ndo tsi nyivi. Tan tsitó yu tyin tsinú xaan iñi ndo tsi yu, tan jatyinyé ndo tsi nyivi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsi tsi.²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicog tahan tsanaha]. Ña ican jacuaha tsi ndo, catyi ña tyin Nyoo tsahá tuhun caahán ña, maa tyin jandaví ñaha ña tsi nyivi tsa jahá tyiñu tysiñu yu tsihin tuhun jacuahá ña. Tyin catyi ña tyin ñavin cuatyi cuví tsa coo iin rayii tsihin ñaha o iin ñaha tsihin rayii tun ña tindahá ñi. Tan jacuahá ña tyin cuví catsi ñi nyayu tsa jamañi nyivi tsi tsitoho.²¹ Yuhu tsa ndatu xaan yu tsa nasama ña cuhva iyó ña, maa tyin ña cuñi ña javahá ña can. Ña cuñi ña jandihí ña tsa tsicá nuu ña tsihin rayii.²² Tan vityin cua quihin cuehe

tsi ña tan ña cua cuvi nduvita ña. Tan nyivi javahá tsa caquiñi tsihin ña, cua cuhva yu tundoho nyehe ñi tatus ña ndu uvi iñi ñi tsa javahá ñi.²³ Tan cua cahñi yu sehe ña. Tacan tan cua coto tandihí nyivi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyoooho cua cuhva yu tsa taahán tsi tsi ndo tsa cuenda tsa javaha ndo.²⁴ Maa tyin tandihí ca nyoooho tsa iyó ñuu Tiatira, nyoooho tsa ña naquihin cuenda cuhva jacuahá ña, ndi ña javahá ndo tsa catyi nyivi tyin cuví tuhun xeehe cuenda nu ña vaha, ña tyaa yu inga tsa yií siqui ndo.²⁵ Maa tyin jañihi ndo javaha ndo tsa vaha nda cuanda quitsi nyico yu.²⁶ Tan nyoooho tsa jaha canaa tsi nu ña vaha, tan javahá ndo cuhva cuñi yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyivi iyó nu ñuhu ñayivi ihyá.²⁷ Tumaa tsaha Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatus tsa cuvícaa cua tatsi tuñi ndo tsi nyivi. Tan cua tahvi cuatyi ndo tsi ñi tumaa tsa tahví cuatyi yo quisí.²⁸ Tan cua cuhva yu tiñuu cañhu tsa caná tsa naa ca coo tsihin ndo.²⁹ Nyoooho tsa iyó soho, tyaa soho ndo tsa caahán Tatyí li Nyoo tsihin nyivi tsicá vehe ñuhu.”

3

Tsa tsahq cuenda ra Jesucristo tsi nyivi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Sardis. Tan catyi tsihin ra tyehen: “Tyehen catyi ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyi nyivi tyin nyito ndo, maa tyin tsa cuenda yuhu, tsa tsihí ndo.² Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo.³ Ndycuhun iñi ndo tsa vaha tsa cutuhvá ndo. Cuanyicun ndo can, tan násama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu.⁴ Maa tyin iyó juhva nyoooho, nyivi Sardis, tsa ña janyahyú jahma; ña javahá ndo tsa caquiñi cuví can. Tan juvin nyoooho cua cunditsi jahma cuitsin

tsihin yu, tan cua caca ndo tsihin yu, tyin tacan taahán tsi tsi ndo. ⁵ Tan nyoho tsa cuá cuvi jaha canaa tsi nu ña vaha, cuá cunditsi ndo jahma cuitsin tsihin yu. Tan ña cuá janaa yu sivi ndo nu libru nu nyecú sivi tandíhi nyivi cua coo nyito tsihin Nyoo. Tan cuá catyi yu tsihin Jutu yu, tan ángel ra tyin nacotó yu tsi ndo. ⁶ Nyoho tsa iyó soho, tyaa soho ndo tsa caahán Tatyi li Nyoo tsihin nyivi tsicá vehe ñuhu.”

Tsa tsahq cuenda ra Jesucristo tsi nyivi tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Filadelfia. Tan catyi tsihin ra tyehen: “Tyehen catyi ra ii, ra nditsa, ra yihi ndaha ndaha tucu ra rey David, ra tsa nuñá yuvehe tan ndi intuhun nyivi tan ña cuvi nacasi. Tan tatum nacasi ra, ndi intuhun ñi tan ña cuvi nuña ñi. Tyehen catyi ra: ⁸ Yuhu nyehé yu tandíhi tsa javahá ndo. Tan nuñá yu iin yuvehe tsa cuenda ndo tan yoñi cuví nacasi itsi, [tyin tsaha yu tsa cahan ndo tuhun Nyoo tsihin nyivi, tan yoñi cuví casí tsi ndo]. Tan iyó luxu tunyee iñi tsi ndo, tan tyaa yahvi ndo tsa caahán yu, tan ña catyi ndo tyin ña nacotó ndo tsi yu. ⁹ Tan nyivi yihi cuenda nu ña vaha, ñi vatya, ñi catyi tyin nyivi Israel cuví ñi, maa tyin ñavin nyivi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñi yu tsi ndo. ¹⁰ Tyin cunyee xaan iñi ndo tumaa catyi yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quiví cua jaquitsi yu tundoho cahnu siquí tandíhi nyivi, tyin cua nducan cuhva yu tsi tandíhi ñi iyó nu ñuhu ñayivi. ¹¹ Tatyi cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyivi tsa vaha tsa cua ñihí ndo. ¹² Nyoho tsa cua cuvi jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsaa tsa cua quee nda andivi, tan juvin ñi cua tyaa tucu yu sivi tsaa yu tsi ndo. ¹³ Nyoho tsa iyó soho, tyaa soho ndo tsa caahán Tatyi li Nyoo tsihin nyivi tsicá vehe ñuhu.”

Tsa tsahq cuenda ra Jesucristo tsi nyivi tsicá vehe ñuhu ñuu Laodicea

¹⁴ Jacuhun tucu tutu tsi ra caahán tuhun yu tsihin nyivi tsicá vehe ñuhu ñuu Laodicea. Tan catyi tsihin ra tyehen: “Tyehen catyi ra tsa nditsa, ra jandaá tsa caahán ra tyin javaha ra, tan tsihin ra javaha Nyoo tandíhi maa tsa iyó: ¹⁵ Yuhu nyehé yu tandíhi tsa javahá ndo. Tan cuví ndo tumaa ndutya tsa ñia vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandíhi tucu ndo tsa tsinú iñi ndo tsi yu. Vaha ca tsa tsinú vaha iñi ndo tuhun caahán yu, o jandíhi cuii ndo tsa tsinú iñi ndo tsi yu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo.

¹⁷ Tyin nyoho catyi ndo tyehen: “Yuhu cuca xaan yu, vaha xaan iyó yu. Nduve náa cumañi tsi yu,” catyi ndo. ¿A ña jahá ndo cuenda tyin cuiihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandíi ndo tsitsi añima ndo?

¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naq tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandíi ndo. Tan jata ndo numeri quihví tinuu ndo tyin tacan tan cuví nyehé ndo. ¹⁹ Yuhu tsahá cuenda yu tan tatsí tuñi yu tsi tandíhi nyivi tsa cuñi xaan yu. Yacan cuenda catyi yu tsihin ndo: Jandu iin ndo iñi ndo tsihin tsa nii iñi añima ndo tan javaha ndo tsa vaha.

²⁰ ¡Nyehé jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuñá ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu. ²¹ Cua cuhva yu tsa cunyecu ndo tsihin yu nu ndacá ñaha yu tatus cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. ²² Nyoho tsa iyó soho, tyaa soho ndo tsa caahán Tatyi li Nyoo tsihin nyivi tsicá vehe ñuhu” —catyi ra Jesucristo.

caahán jihna tsihin yu, ndusu tumaa ndusu
trompeta, tan catyí tsi tsihin yu:

—Ndáa nyehe tan janaha yu tsi un tsa
cua cuvi nu cuahán ca tsi —catyí ndusu can
tsihin yu.

²Tan juvin ñi cuhva can tan tuví iñi yu tsa
nyaá Tatyi Ií Nyoo tsihin yu. Tan nyehe yu
nyaá iin tyayu nda gloria. Tan nu tyayu can
nyaá iin ra nyaá. ³Tan nuu ra tsa nyaá nu
tyayu can, xiñu tsi tumaa xiñu yuu vaha tsa
nañí jaspe tan tumaa xiñu yuu cornalina.
Tan taníi cahnu yuhu tyayu can tsinú nduvi
coo cuiya, tan xiñu tì tumaa xiñu yuu vaha
tsa nañí esmeralda. ⁴Tan nyehe yu nyecú
oco cumi ca tyayu nu nyecú oco cumi ra
tsahnu naha ra, tsinú nduvi tyayu can nu
nyaá tyayu tsa nyaá mahñu can. Nditsi ra
naha jahma cuitsin. Tan yiñí corona xuhun
cuaan jíñi intuhun intuhun ra naha. ⁵Tan
nu nyaá tyayu tsa nyaá mahñu can, quitá
tatsa tan ñíhi cuvaa tan ñíhi caahán savi.
Tan cayú utsa ñuhu ityi nuu tyayu can, tan
tsa utsa ñuhu can cuví tsa utsa tatyi ii Nyoo.
⁶Tan ityi nuu tyayu can iyó tucu iin tsa caá
tumaa caá ndutya ñuhu, tan xiñu xaan can
tumaa xiñu yutyi.

Níi canduvi yuhu tyayu can tan mahñu
tyayu can, nyecú cumi tsa nyito. Tan cuaha
xaan tinuu tsa nyito can iyó, ityi nuu can
tan ityi tsata can. ⁷Iin tsa nyito can caá can
tumaa caá ndicaha. Tan tsa tsinu uvi tumaa
caá indíqu lee. Tan tsa tsinu uñi, tumaa caá
nuu rayíi caá nuu can. Tan tsa tsinu cumi
tumaa caá tasu tsa cuahán ndavá. ⁸Tan iyó
iñi nditsi tsa intuhun intuhun tsa nyito
can. Tan taníi cahnu tsi nyecú tinuu tsi,
tahan ñi ityi tsata tan ityi tsitsi tsi. Tan ña
jandihí tsi tsa caahán tsi tyehen nduvi tan
ñiñu:

Ra ii cuví un; ra ii cuví un; ra ii cuví un.

Jutu Mañí yu, Nyoo, iyó tandihí tunyee iñi
tsi un.

Tacan ñi iyó maa un, juvin un cuví Nyoo nda
tsanaha tan vityin, tan juvin un cua
quitsi.

⁹Tan jacahnú tsa cumi tsa nyito can tsi
Nyoo, tan nacuhvá tsi naha tsi tyahvi nyoo
tsi ra nyaá nu tyayu can, ra tsa iyó tandihí
tyembu. Tan tahan ñi tsaha tsa javahá tsi
naha tsi tacan, ¹⁰tsa oco cumi ra tsahnu can
naha ra tsicuñí tsitsi ra naha tan jacahnú ra
naha tsi ra iyó tandihí tyembu. Tan tsaquín

ra naha corona ra naha nu nyaá tyayu can.
Tan catyí ra naha:

¹¹Jutu Mañí ndi, Nyoo ndi cuví un.
Yooho taahán tsi jacahnú ndi.
Tan taahán tsi tsi un tsa cundaca ñaha un.
Tyin maa un javahá tandihí tsa iyó.
Tan tsa cuenda tsa iyó iñi maa un, tan tsicoo
tandihí tsa iyó, catyí ra naha.

5

*Nu nyehe ra Juan iin tutu tan Mbee Ticatyí
Luhlu tsa cuví ra Jesucristo*

¹Tacan tan nyehe yu tyin ra tsa nyaá nu
tyayu can ndahá ra iin tutu tsihin ndaha
cuaha ra. Tan yiñí tuvi tutu can tan nyaá
letra ityi nuu tan ityi tsata can. Ndasí tsi
tsihin utsa sellu. ²Tan nyehe yu iin ángel
tsa nyee xaan. Tan caná tsaa ra tan catyí ra:

—¿Yóo taahán tsi nacaní tutu ihyá tan
jocon sellu ihyá? —catyí ra.

³Maa tyin ndi intuhun tsa iyó andivi tan
nu ñuhu ñayivi, tan tsitsi ñuhu, tan cuví
nacaní tutu can. Ndive maa náa cuví nyehe
nuu tsi. ⁴Tan tsacú xaan yu, tsa tsito yu
tyin yoñí maa cuví nacaní tutu can tan cuví
cahvi, tan cuví nyehe nuu tsi. ⁵Tacan tan
catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha
[o cuñí tsi catyi, ra ndacá ñaha], ra cuví
tata ra Judá, tan tata ra rey David, ra ican
jahá canaa tan juvin ra cua nacaní tutu can
tan jocon tsa utsa sellu tsa ndasí tutu can
—catyí ra.

⁶Tacan tan mahñu tyayu can tan mahñu
tsa cumi tsa nyito can, tan mahñu ra tsahnu
can naha ra, nyehe yu nyaá nyityi iin Mbee
Ticatyí Luhlu. Tan caá tì tumaa caá iin
mbee tsa tsahñí nyiví tan jamañí ñi. Tacan
caá tì. Tan iyó utsa ndíqui tì tan nyecú
utsa tinuu tì. Tan tinuu can cuví tsa utsa
tatyi ii tsa jacuhun Nyoo taníi cahnu nu
ñuhu ñayivi. ⁷Tan ra Mbee Ticatyí Luhlu
can tsahan ra nu nyaá ra nyaá nu tyayu
can tan quihín ra tutu tsa ndahá ra can
nu ndaha cuaha ra. ⁸Cuhva tsa quihín ra
tutu can, tandihí tsa cumi tsa nyito can tan
tandihí tsa oco cumi ra tsahnu can tsicuiñí
tsitsi ra naha nuu ra. Tan tsa intuhun in-
tuuhun ra tsahnu can naha ra ndahá ra naha
arpa tsa iyó cuerda tumaa iyó cuerda nuu
guitarra. Tan tsityu cutu tsitsi copa xuhun
cuaan ndahá ra naha. Tan cutu can cuví
tandihí tsa tsicán tahvi nyiví yiñí cuenda

Nyoo. ⁹Tan tsitá ra na ha iin yaa tsaa, tan catyí ra na ha:

Yooho cuví ra taahán tsi quihin tutu ihyá tan jocon un tsa utsa sellu tsa ndasí itsi.

Tyin tsahñi nyivi tsi un. Tan tsihin nií un jata un tsi ndi tyin coo vaha ndi tsihin Nyoo.

Tan cuví ndi nyíví ñuu nyihi tan ñuu nahnu tsa iyó taníi cahnu nu ñuhu ñayíví, nyíví caahán siín siín yuhu, tan nyíví siín tata.

¹⁰Tsaha un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyíví iyó nu ñuhu ñayíví, catyí ra na ha, tsitá ra na ha.

¹¹Yahá can tan tsíñi yu ndusu tan nyehe yu nyecú cuenda millón ángel taníi canduvi nu nyecú ra tsahnu can na ha ra, nu nyecú tsa cumi tsa nyito, tan xiin tyayu can. ¹²Tan ñihi caahán ángel can na ha ra, tan catyí ra na ha:

Ra Mbee Ticatyi Luhlu tsa tsahñi nyíví, juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsíñi tuñi tan tandíhi tunyee iñi.

Na jacobnu yo tsi ra tan na jacobnu tandíhi nyíví tan tandíhi tsa iyó tsi ra, tyin cahnu xaan cuví ra, catyí ángel can na ha ra.

¹³Tan tsíñi tucu yu tsa caahán tandíhi tsa jahava Nyoo; tandíhi tsa iyó andivi, tan nu ñuhu ñayíví, tan tsitsi ñuhu, tan tsitsi ndutya ñuhu; tan catyí tsi na ha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyi Luhlu.

Tan tunyee iñi tsa iyó tsi ra na ha ña cua cundíhi maa tsa iyó tsi.

Tan taahán tsi tsa jacobnu yo tan tyaa yahvi yo tsi ra na ha tacan ñi maa —catyí tandíhi tsa jahava Nyoo.

¹⁴Tan catyí tsa cumi tsa nyito can:

—¡Na cuvi tsi tacan! —catyí tsi na ha tsi.

Tan tsicuiñi tsiti tsa oco cumi ra tsahnu can na ha ra tan jacobnu ra na ha tsi ra tsa ña cua cundíhi maa.

¹Tacan tan nyehe yu nu jocon ra Mbee Ticatyi Luhlu can sellu tsa jihna ñi tsitsi tsa utsa sellu can. Tan tsíñi yu ndusu iin tsa nyito can tan ndusu tsi cuví tumaa na caahán savi, tan catyí tsi:

—¡Naha, tan nyehe un! —catyí tsi tsihin yu.

²Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihi ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

³Tan tsa jocon ra Mbee Ticatyi Luhlu can tsa tsinu uvi sellu can, tsíñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

⁴Tan quítä iin cuayu cuaaha. Tan ra tsa yosó tsi ti ñihi ra ndatu tsa quinyyaa ra tsa taxin iyó nu ñuhu ñayíví, tyin tacan tan cahñi tahan nyíví tsi ñi. Tan ñihi ndihí ra iin mityi cahnu cundahá ra.

⁵Tan tsa jocon ra Mbee Ticatyi Luhlu can tsa tsinu uñi sellu can, tsíñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatyá.

⁶Tan tsíñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyíví tsi iin musu tsa iin quíví, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jativí ndo acetye tan vinu —catyí ndusu can.

⁷Tan tsa jocon ra Mbee Ticatyi Luhlu can tsa tsinu cumi sellu can, tsíñi yu tsa caahán intuhun ca tsa nyito can, tan catyí tsi:

—¡Naha, tan nyehe un! —catyí tsi tsihin yu.

⁸Tan nanyehe yu, tan nyehe yu iin cuayu cuaan. Tan ra yosó tsi ti nañí ra Tuhun Tsiihí. Tan tsata ra can vatsí inga ra tsa nañí Nu Yucú Añima Ndiyi. Tan ñihi ra na ha tunyee iñi tsa cahñi ra na ha tsa cuaha nyíví iyó nu ñuhu ñayíví. Tyin tsitsi tsa sava nyíví iyó nu ñuhu ñayíví, cua cahñi ra na ha sava ñi. Tan cua cahñi ra na ha tsi ñi tsihin tsa jacoo ra na ha cuatyí, tan tsihin tama, tan tsihin cuehe, tan tsihin quítia xaan iyó nu ñuhu ñayíví.

⁹ Tan tsa jocon ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihí tsa cuenda tsa jacoto ñi tuhun Nyoo. ¹⁰Tan caná tsaa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyivi tsa tsahní tsi ndi tsa cuenda un? —catyí ñi.

¹¹ Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihín ñi na quitatu ñi tan cuatu ñi juhva ca quivi, nda cuanda cahñi nyivi tsi tandihí ca ñi tsa jahá tyifú tyifú ra Cristo, ñi tsa taahán tsi cíu tumaa tsihí tucu maa ñi.

¹²Tan tsa jocon ra Mbee Ticatyi Luhlu can tsa tsinu ñiñi sellu can, nyehe yu tyin ñiñi xaan taán. Tan ndutuñ ñicanyii tumaa tuuh jahma nyivi iyó tucuihya iñi. Tan yoo nducuaaha tsi tumaa cuaaha niñi. ¹³Tan tiñuu cucoyo tsi nu ñuhu ñayivi tumaa cucoyó tsiti yutya yutun tatum ñihi yahá tatiyi. ¹⁴Tan andiví tsiquíhi tuvi tsi tumaa tyihí tuví yo iin ndaha tutu. Tan tandihí yucu tan ñuhu nyihi tsa cayucú mahñu ndutya ñuhu nasama nu cayucú tsi. ¹⁵Tan tandihí rey tsa iyó nu ñuhu ñayivi tsihín ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyivi tsa cuví musu, tan ñi tsa ñavín musu cuví, quihví xeehe ñi tsitsi yavi yuu tan tyañu cava tsa iyó yucu nahnu. ¹⁶Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyi Luhlu can tsi ndi.

¹⁷Tyin tsa tsaa quívi cahnu tsa cua tatsi tuñi ra tsi ndi, tan yoñi cunyee iñi can —catyí ñi.

7

Nu ñihí nyivi Israel tuñi cunyaa nutyaan ñi

¹Tsa yaha can tan nyehe yu nyecú cumi ángel tsa ndihí tsa cumi tutun ñuhu ñayivi ityi nu tuhvá tatyí queé tyin tacan tan ña yaha tatyí nu ñuhu ñayivi tan nu ndutya ñuhu tan nu yutun. ²Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan caná tsaa ra tsi tsa cumi ángel tsa ñihí ndatu tsa jatívi nu

ñuhu ñayivi tan nu ndutya ñuhu. Tan catyí ra tsihín ra naha:

³—Ña jatívi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴Tan catyí ra tsiní yu tyin ciente uvi xico cumi mil cuví nyivi Israel tsa tsinyaa tuñi can. ⁵Utsi uvi mil nyivi tata ra Judá tsinyaa tuñi, tan utsi uvi mil nyivi tata ra Rubén, tan utsi uvi mil nyivi tata ra Gad, ⁶tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés, ⁷tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

Nu nyehe ra Juan tsi nyivi nditsí jahma cuitsin

⁹Tsa yahá can tan nyehe yu yucú cuaha nyivi. Tan yoñi maa cuví nachaví tsi ñi, tyin cuaha xaan ñi. Yucú nyivi queé tandihí ñuu nyihi tan ñuu nahnu tsa iyó tanií cahnu nu ñuhu ñayivi. Tan yucú nyivi caahán siñ siñ yuhu. Tan yucú nyivi siñ siñ tata. Tan nyecú ñi nuu ra nyaá nu tyayu, tan nuu ra Mbee Ticatyi Luhlu. Nditsí ñi jahma cuitsin. Tan ndahá ñi ndaha ndicaha. ¹⁰Tan tandihí ñi caná tsaa ñi tan catyí ñi: Nyoo Jutu yo, ra nyaá nu tyayu, tan ra Mbee

Ticatyi Luhlu, juvin ra naha jacacy tsi yo —catyí ñi caná tsaa ñi.

¹¹Tan tandihí ángel naha ra nyecú ra naha tanií canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsicuiñi tsiti ra naha tan tsaqiñi ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹²Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiní tuñi tsi un: Nacuhvá xaan ndi tyahvi nyoo tsi un. Tan jacahnú ndi tsi un tyin iyó xaan tunyee iñi tsi un, Nyoo Jutu ndi. Tan na cuvi tsi tacan tandihí tyembu, catyí ra naha.

¹³Tacan tan tsicá tuhun iin ra tsahnu can tsiyu tan catyí ra:

—¿Yóo nyíví cuví ñi nditsí jahma cuitisin ihya? ¿Tan ndáa ityi quee ñi? —catyí ra.

¹⁴Tan catyí yu tsihin ra:

—Maa un tsító, tata.

Tan catyí ra tsihin yu:

—Nyíví ihya cuví ñi nyehé tundoho cahnu. Maa týin nacatyá ñi jahma ñi tsihin niñi ra Mbee Ticatyi Luhlu tan nducuitsín tsi. ¹⁵Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduví tan ñiñu tsitsi vehe ñuhu ra. Tan rata tsya nyaá nu tyayu can jahá cuenda ra tsi ñi tsihin tsya nyaá ra tsihin ñi. ¹⁶Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsya ihni. ¹⁷Týin ra Mbee Ticatyi Luhlu tsya nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutuya tsya tsahá tsya coo cuii ñi. Tan Nyoo cua nacuhva ra tandihíndutuya nuu ñi —catyí ra tsihin yu.

8

Nu jocon ra Jesucristo tsa tsinu utsa sellu tan nu quita iin ángel tsihin iin cuu xuhun cuaan

¹Tan tsa jocon ra Mbee Ticatyi Luhlu tsya tsinu utsa sellu tsya ndasí tutu can, ndutaxín nda andiví tumaa sava hora.

²Yahá can tan nyehé yu nyecú utsa ángel ityi nuu Nyoo. Tan intuhun intuhun ra naha quihín cuenda ra naha iin trompeta.

³Yahá can tan tsaaq inga ángel tsya ndahá iin cuu xuhun cuaan. Tan tsinyaq nyityi ra ityi nuu altar can. Tan quihín cuenda ra cuaha xaan cutu, týin cuhva cuenda ra itsi iin caa ñi tsihin tsya tsicán tahvi nyíví tsya Nyoo nuu altar xuhun cuaan tsya nyaá ityi nuu tyayu Nyoo. ⁴Tan quitá yuhma cutu tan yuhma tsya tsicán tahvi nyíví tsya Nyoo ndaha ra, tan cuahán yuhma can nu nyaá Nyoo. ⁵Tacan tan ángel can quihín ra cuu can tan jacutu ra can tsihin tuun ñuhu tsya quita nu altar can. Tan tyoso ra can nu ñuhu ñayivi. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tíví ángel naha ra trompeta

⁶Tacan tan tsa utsa ángel tsya ndahá trompeta can, ndatú ra naha tsya tíví ra naha can.

⁷Tsa tíví iin ángel can trompeta tsya ndahára, quitsahá cuún savi tan cucoyó yuu savi, ñihi cayú ñuhu tan sacá nuu niñi tsihin can. Tan tsya yatyin cayu sava ñuhu ñayivi, tan tsya yatyin tucu sava cuhva nyaá cuhu tsitsa tan tandihí cuhva nyaá cuhu cuii.

⁸Tan tsya tíví tsya tsinu uvi ángel can trompeta tsya ndahára, nyehé yu cayú tumaa iin yucu cahnu. Tan nacavá can mahñu ndutuya ñuhu. Tan tsya yatyin sava ndutuya ñuhu can nanduví tsi niñi. ⁹Tan tsya tandihí quiti iyó tsitsi ndutuya ñuhu can tsihí tsya yatyin sava ti naha tí. Tan tahví cuatyí tucu tsya yatyin sava yutun ndoo cuaha tsya iyó tsitsi ndutuya ñuhu can.

¹⁰Tan tsya tíví tsya tsinu uvi ángel can trompeta tsya ndahára, nacavá iin tiñuu cahnu. Cayú tsi tumaa cayú yíti. Tan nacavá tsi siquí tsya yatyin ña sava yutya nahnu tan tsya yatyin ña sava nu ndohyo.

¹¹Tan sivi tiñuu cahnu can cuví Ajenjo. Tan tsya yatyin ña sava ndutuya tsya iyó, ndu uva tsi tumaa tsya uva xaan ajenjo can. Tan cuaa xaan nyíví tsihí týin tsihí ñi ndutuya tsya ndu uva can.

¹²Tan tsya tíví tsya tsinu cumi ángel can trompeta tsya ndahára, ndu naq tsya yatyin ña sava ñicanyii, tan tsya yatyin ña sava yoo, tan tsya yatyin ña sava tiñuu ndunaq tsya naha tsi. Tan tsya cuenda tsya ndunaq juhva ñicanyii, ndunaq nu ñuhu ñayivi cumi hora tsya iin iin nduvi. Tan tsya cuenda tsya tíví juhva yoo tan tiñuu, ña ndunditsín maa nu ñuhu ñayivi cumi hora tsya iin iin tsacuaa.

¹³Yahá can tan nyehé yu iin ángel ndavára mahñu andiví tan tsihí yu tsya caahán ra. Tsihin tsya ñihi indusu ra catyí ra:

—¡Ndahví nyíví iyó nu ñuhu ñayivi tsya cuá tsi tsya uvi ca ra ángel naha ra trompeta tsya ndaha ra naha! —catyí ángel can.

9

¹Tacan tan tsya tíví tsya tsinu uhun ángel can trompeta tsya ndahára, nyehé yu quee iin tiñuu ityi andiví. Tan nacavá can nu ñuhu ñayivi. Tan quihín cuenda can ndaha tucu tsya cuenda yavi cunu tsya nduve maa nuu tsindihí. ²Tacan tan nuñá can yuhma yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasi

yuhma can nuu ñicanyii tan nasaca nuu can tsihin taty. Tan ndunaq nu ñuhu ñayivi.

³Tan tsitsi yuhma can quitá tica xama. Tan ndava tì naha tì nu ñuhu ñayivi. Tan ñihì tì naha tì ndatu tsa tyaa tì naha tì tsi nyivì tumaa tyaa tujuhma tsa iyó nu ñuhu ñayivi.
⁴Quihì tì naha tì tuhun tyin na ña jatívi tì naha tì cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa tì naha tì tsi nyivì tsa nduve tuñi Nyoo nyaá nutyaan.
⁵Ña ñihì ndatu tì naha tì tsa cahñì tì naha tì tsi nyivì, tyin tyaa ñi maa tì naha tì tsi ñi. Tan quihì xico tì tsi ñi uhun yoo. Tan xico uhvi can uhvi tsi tumaa uhví nyivì tsa tyaa tujuhma.
⁶Quivì can nyivì cua nanduci ñi tuhun tsihí. Maa tyin ña cua ñañhi ñi can. Tan vasu ndi maa cuñi ñi cùu ñi, tuhun tsihí cua cunu tsi nuu ñi tyin ña cua cùu ñi.

⁷Tica xama can caá tì tumaa caá cuayu tsa tsicá cuaty. Tan jiñi tì naha tì yihì tsa caá tumaa caá corona xuhun cuaan. Tan nuu tì naha tì caá tumaa caá nuu nyivì.
⁸Tan ixi jiñi tì naha tì caá tumaa caá ixi jiñi ñaha. Tan nuhu tì naha tì caá can tumaa caá nuhu ndicaha.
⁹Tan soo tì naha tì caá tumaa caá caa. Tan ñihì xaan cundatsán nditsin tì naha tì, tumaa cundatsán carreta cuayu cuaha tsa tsinú nu iyó cuaty.
¹⁰Tan juhuma tì naha tì caá tumaa caá juhuma tujuhma, tyin yihì iñi can. Tan tsihin can cua tyaa tì naha tì tsi nyivì tsitsi tsa uhun yoo.
¹¹Tan iyó iñi nu cuví ity nuu tsihin tica xama can naha ti. Tan nu ican cuví taty tsa ndacá ñaha yavi cahnu tan cunu tsa nduve maa nu tsindihì. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñi tsi catyi: Nu Janaá.

¹²Tsa yahà iñi tundoho, tan cumañi uvi taahan ca.

¹³Tan tsa tivì tsa tsinu iñu ángel can trompeta tsa ndahá ra, tsiní yu iñi ndusu tsa quita tsitsi tsa cumi ndiqui tsa nyecú tutun altar xuhun cuaan tsa nyaá ity nuu Nyoo.
¹⁴Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndätsi tsi tsa cumi ángel tsa nuuhní yatin yuhu yutya cahnu Eufrates —catyí ndusu can.

¹⁵Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivì can, yoo can, cuiya can, tyin cahñì ra

naha tsi tsa yatin sava nyivì iyó nu ñuhu ñayivi.
¹⁶Tan tsiní yu tyin uvi centu millón andaru tsa yosó cuayu.

¹⁷Tacan nyehe yu cuayu jahà Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu tì naha tì quita ñuhu tan yuhma tan azufre.
¹⁸Tan tsa yatin sava nyivì iyó nu ñuhu ñayivi tsiní tsihin tsa uní tsa quita yuhu cuayu can naha tì: ñuhu tan yuhma tan azufre.
¹⁹Tyin iyó tunyee iñi tsi tì naha tì tsitsi yuhu tì naha tì tan nu juhuma tì naha tì. Tyin juhuma tì naha tì caá tumaa caá coo tan nuu juhuma tì naha tì caá tumaa caá jiñi coo. Tan tsihin yacan jañicueehé tì naha tì tsi nyivì.

²⁰Maa tyin tandihì ca nyivì tsa ndoo, ñi tsa ña tsiní tsihin tundoho can, ña jandihì ñi tsa jayahá ñi tsa ña vaha. Ndi tsa jacahnú ñi taty ña vaha tan ndi tsi tsitoho tsa tsinú tsihin xuhun cuaan, xuhun cuitsin, bronze, yuu, tan yutun: tsitoho tsa ña cuví nyehe, ndi ña tsiní, ndi ña cuví caca.
²¹Ndi ña jandihì ñi tsa tsahñì ñi nyivì, tan jayahá ñi tsa tasi. Tan ñiñaha ña jandihì ñi tsa tsicá nuu ñi tsihin rayii, tan rayii ña jandihì ra naha tsa tsicá nuu ra naha tsihin ñaha vasu ndi maa ña tindahà ñi. Tan ña jandihì ñi tsa suhú ñi.

10

Ángel tsa ndahá libru luhlu

¹Tacan tan nyehe yu inga ángel tsa iyó xaani tunyee iñi. Quee ra ity andivi tan vatsí nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyity ñuhu tsa cayú.
²Tan ndahá ra iñi libru luhlu nuñá nuu tsi. Tan tsiní tsaha cuaha ra nu ndutya ñuhu tan tsaha satyin ra nu ñuhu ñayivi.
³Tacan tan cañá tsaa ra, tumaa taná ndicaha tsa cuxaán tì. Tan cuhva tsa cañá tsaa ra, tsiní yu utsa ndusu tumaa cuví nu caahán saví, tan intuhun intuhun tsi caahán tsihin ndusu maa tsi.
⁴Tsa yahà tsa tsiní yu tsa utsa ndusu can, tan cua tyaa yu can nu tutu. Maa tyin tsiní yu caahán iñi ndusu nda andivi, tan catyí tsi tsihin yu:

—Naquihin xeehe tuhun tsa cahán tsa utsa ndusu can. Tan ña tyaa un can nu tutu —catyí ndusu can.

⁵Tacan tan ángel tsa nyehē yu tsa tsaní nu ndutya ñuhu tan nu ñuhu ñayivi, jandaa ra ndaha cuaha ra ityi andivi. ⁶Tan ángel can catyí ra:

—Na nyehe maa Nyoo ra ña cua cundihi maa, ra tsa javahä andivi tan ñuhu ñayivi tan ndutya ñuhu tan tandihí tsa iyó nuu tsi tyin nduve ca tsa cucuee. ⁷Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cunda tuhun xeehe tsa catyí Nyoo tyin javaha ra, tumaa cahan̄ ra tsihin ra jaha tyiñu tysiñu ra, ra cuví ndusu yuhu ra —catyí ángel can.

⁸Tan ndusu tsa quita andivi, tsa cahān jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsaní nu ndutya ñuhu tan nu ñuhu ñayivi —catyí tsi.

⁹Tacan tan tsahan̄ yu nu nyaá ángel can tan tsicān yu libru luhlu can tsi ra, tan catyí ra tsihin yu:

—Juhun, catsi itsi. Vixi xaan tsi cua cuvi tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

¹⁰Tacan tan quihiñ yu libru luhlu tsa ndahá ra, tsatsi yu. Tsa ndi nyí tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa cocó yu itsi, ndu uva tsi tsitsi yu. ¹¹Tacan tan catyí ra naha tsihin yu:

—Cuñi tsi tsa cahan nyico un inga tsaha tuhun tsa caahán Nyoo siquí nyivi tsa iyó ñuu nyihi tan ñuu nahnu, tan nyivi caahán siñ siñ yuhu, tan siquí ra cuví rey naha ra —catyí ra tsihin yu.

11

Nduvi ra tsa cuví tsandaa naha ra

¹Tacan tan tsaha ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Nduyita tan tyihí cuhva un vehe ñuhu Nyoo tan altar ra, tan cahvi najava taahan nyivi jacahnú tsi ra tsitsi vehe can. ²Maa tyin ña tyihí cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu iis tsitsi tsa uñi cuiya sasava. ³Tan yuhu cua jacuhun yu ui ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. ⁵Tan nyivi tsa cua cuñi jañicueehe tsi ra cuví tsandaa can naha ra, cua naa cuui nuu ñi. Tyin cua quita ñuhu yuhu ra naha, tan tsihin can cua cahmi ra naha tsi tandihí nyivi xaan iñi tsi ra naha. ⁶Tan iyó ndatu tsi ra naha tsa casí ra naha nu cuun savi tandihí quiñ tsa cua cuhva cuenda ra naha tuhun caahán Nyoo tsihin ra naha tsi nyivi. Tan iyó tucu ndatu tsi ra naha tsa jananduvi ra naha niñi ndutya. Tan iyó tucu ndatu tsi ra naha tsa janyehe ra naha tundoho tsi nyivi iyó nu ñuhu ñayivi tsihin tandihí nuu cuehe. Tan cuví javaha ra naha yacan najava tsaha cuñi maa ra naha. ⁷Maa tyin tsa cua ndihí cuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan tì tsihin tsa nduvi taahan ra cuvi tsandaa can. Tan cua jaha canaa tì tsi ra naha. Tan cua cañi tì tsi ra naha. ⁸Tan cua cava cuñi ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. ⁹Tan tsitsi tsa uñi quiñ sasava, cua nyehe tandihí nyivi cuñu ñuhu ra naha; nyivi iyó tandihí ñuu nyihi, nyivi tandihí ñi tata, tan ñi caahán siñ siñ yuhu, tan ñi iyó ñuu nahmu, cua nyehe ñi cuñu ñuhu ra naha. Tan ña cua cuhva ñi tsa quihi xeehe cuñu ñuhu ra naha tsitsi ñuhu. ¹⁰Tan sií xaan cua cuñi ñi tsa cuenda tsa cua cíu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sií cuñi ñi tsa cua cíu nduvi taahan rayii tsa cahan tuhun Nyoo tsihin ñi. Tyin cuñi maa ñi tyin tsaha xaan ra naha tundoho tsi ñi. ¹¹Maa tyin tsa cua yaha tsa uñi quiñ sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihí nyivi tsa cua nyehe tyin cua nandoto ra naha, cua nayuhvi xaan ñi. ¹²Tan tsa yaha tsa tsihin ra naha tan nyehe yu nandoto ra naha, tan catyí iin ndusu ityi andivi tsihin ra naha:

—Naha ndo nyehe

Tacan tan nandaæ ra naha ityi andivi tsitsi vico. Tan nyehe nyivi xaan iñi tsi ra naha nu nandaæ ra naha. ¹³Tan ñihi xaan taan cuhva can. Tan tsitsi ñuu can taní cuaha xaan vehe. Tsitsi tsa utsi utsi vehe,

taní intuhun intuhun tsi. Tan tsihí utsa mil nyíví jahá tsa taqan can. Tan nyíví tsa ña tsihí, jacobahú ñi tsi Nyoo, ra nyaá andívi, tsa cuenda tsa yuuhví ñi.

¹⁴ Yacan cuví tundoho tsa tsinu uvi tsa nyehe nyíví, maa tyin tsa watsí tsa tsinu uñi.

Nu tíví tsa tsinu utsa ángel trompeta tsa ndahá ra

¹⁵ Tan tsa tíví tsa tsinu utsa ángel can trompeta tsa ndahá ra, tsíñi yu ndusu ñihí xaan ityi andívi, tan catyí tsi:

Tandihi nu ndacá ñaha rey nu ñuhu ñayivi, tsa yahá nanduví tsi tsa tsii Nyoo Jutu yo tan ra Cristo.

Tan ña cua ndihí maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnu tsa nyecú nu nyaá Nyoo, tsicuiñi tsiti ra naha tan tsaquin ra naha nuu ra naha nda nu ñuhu. Tan jacobahú ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandíhi tunyee iñi tsi.

Tacan ñi iyó maa un. Juvín un cuví Nyoo nda tsanaha tan vityin, tan juvin un cua quitsi.

Tsahá xaan ndi tyahví nyoo tsi un, Tyin tsa naquihín cuenda un tunyee iñi un. Tan tsa quitsáha ndacá ñaha un.

¹⁸ Tan vasu ndi maa cuxaán nyíví iyó tandíhi ñuu nahnu.

Maa tyin tsa tsaa quívi tatsi tuñi un tsi ñi. Tan tsa tsaa quívi tsa jacutuñi un tsi ndiyí. Tan cuhva un tsa vaha tsa taahán tsi tsi nyíví jahá tyiñu tyiñu un, ñi tsaha cuenda tuhun caahán un, ñi tsa nacuhvá cuenda añima ñi tsi un, tan jacobahú ñi siví un.

Vasu ndi maa cahnu cuví ñi o ndaaahvi ñi. Tan tsa tsaa cuhva tsa janaa un tsi nyíví jativí tsi nyíví iyó nu ñuhu ñayivi, catyí ra naha.

¹⁹ Tacan tan nuñá yuvehe ñuhu Nyoo tsa iyó gloria, tan tsitsi vehe ñuhu can quituvi tsatun cuenda tsa ndoo ra tyiñu tsihin yo. Tan quihví tatsa. Tan ñihí cuvaá tan caahán savi. Tan taqan. Tan ñihí xaan cucoyó yuu savi.

12

Nu nducú coo xaan tsa iyó ndaha tsi ñaha

¹ Tacan tan quituvi tsa iyo cahnu ityi andívi. Quita iin ñaha tan nditsí ña ñicanyii

tumaa nditsí yo jahma. Tan tsaní ña nu yoo. Tan yihí iin corona tsa utsi uvi tiñuu jiñi ña. ² Tan ñaha ihyá ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho. ³ Tacan tan quita inga tsa iyo ityi andívi. Tan nyehe yu iin coo xaan tsa iyó ndaha. Cuaaha tì tan cahnu tì. Tan iyó utsa jiñi tì, tan utsi ndiquí tì. Tan yihí corona intuhun intuhun jiñi tì. ⁴ Tan tsihin juhma tì jacoyo tì tsa yatyin sava tiñuu tsa iyó andívi nu ñuhu ñayivi. Tan coo can tsicuiñi tì nuu ñaha tsa cua cacu sehe, tyin cuñi tì catsi tì sehe ña náa cuhva cacu ñi maa tsi. ⁵ Tan ñaha can jacacy ña iin rayii. Tan juvin ra cua cundaca ñaha tandíhi nyíví iyó nu ñuhu ñayivi. Ñihí xaan cua cundaca ñaha ra tumaa tsa tsihin iin tatuñ tsa cuvícaa. Tan tsa yahá cacu ra, naquihín Nyoo tsi ra cuahán ra nu nyaá ra nu tyayu ra. ⁶ Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin icán cua cuhva ra tsa catsi ña tsitsi tsa mil uvi ciente uñi xico quívi.

⁷ Yaha can tan tsicoog cuatyí nda andívi, cañi tahan ángel Miguel tan tandíhi ángel tsa cutahán tsihin ra tsihin coo xaan can. Tan coo can tsihin tandíhi tatyí ña vaha tsa cutahán tsihin tì, cañi tahan tì tsihin ángel Miguel. ⁸ Maa tyin ña cuví jahá canaa tì tsa cañi tahan tì. Tan ña ñihí ca tì nu ndoo tì nda andívi tsihin tatyí ña vaha tsa cutahán tsihin tì. ⁹ Tacan tan tavá Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandíhi nyíví iyó nu ñuhu ñayivi. Maa nu tan tatyí ña vaha tsa cutahán tsihin nu cucoyó nahnu nda nu ñuhu ñayivi.

¹⁰ Tacan tan tsíñi yu iin ndusu ñihí xaan ityi andívi, tan catyí tsi:

—Vityin tsa tsaa quívi tsa jacacú Nyoo tsi nyíví. Tsa jahá canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavá ra naha tsi nu tsa tyáxaan cuatyí siquí ñi nuu ra naha nduvu tan ñiñu.

¹¹ Tan jahá canaa ñi tsi nu tsihin ñiñi ra cuví Mbee Ticatí Luhlu, tan tsihin tuhun Nyoo tsa cahán ñi tsihin nyíví. Ña nayuhví ñi cíú ñi tan tsahá cuenda ñi ñayivi ñi. ¹² Yacan cuenda cusíi iñi nyoho tsa iyó andívi. Maa tyin jndahví nyíví tsa iyó nu ñuhu ñayivi tan nu ndutyá ñuhu! Tyin nu ña vaha

nacava nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quívi tan cundíhi tsa jandaví ñaha nu tsi ñi.

¹³ Tan tsa nyehé nu coo xaan tsa iyó ndaha can tyin nacava nu nu ñuhu ñayivi, quitsáha nyaá ndaha nu tsi ñaha tsa tsicoog sehe yií can. ¹⁴ Maa tyin tsicoog uvi nditsin nahnu ñaha can tan caá can tumaa caá nditsin tasu. Tsicoog can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava. ¹⁵ Tan nu coo can tava nu ndutya tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayivi jatyinnee tsi tsi ña, tyin ndata tsi tan nanyee yutya tsa javahá nu coo tsihin ndutya tsa quita yuhu nu. ¹⁷ Tan tsa ña cuví jaha canaa nu tsi ña, quitsáha cañí tahan nu tsihin nyivi cuví tata ña, ñi tsa tyá yahvi tuhan caahán Nyoo, tan nyicún ñi tsihin tsa ñii iñi afíima ñi tsa nditsa tsa caahán ra Jesucristo.

13

Nu nyehé ra Juan uví quiti caquiñi

¹ Tan tsinyaa nyityi yu nu nyiti yuhu ndutya ñuhu, nyehé yu quita iin quiti caquiñi nu ndutya ñuhu can. Tan iyó utsa jiñi tì, tan utsi ndiqui tì. Tan iin tan iin ndiqui tì yihí iin corona. Tan intuhun intuhun jiñi tì nyaá iin sivi tsa caahán ndavaha ñi tsi Nyoo. ² Quiti caquiñi can caá tì tumaa caá cuñi. Tsaha tì caá tumaa caá tsaha oso. Tan yuhu tì caá tumaa caá yuhu ndicaha. Tan nu coo xaan tsa iyó ndaha can tsaha nu ndatu tsi quiti caquiñi can tsa cunyaa tì nu tyayu nu. Tan tsaha nu ndatu tsi tì tsa cundaca ñaha tì. ³ Tan nyaá iin nu caahví tsa cua cahñi tsi tì jiñi tì, maa tyin ndahá nu caahví can. Tan tsa nyehé nyivi iyó nu ñuhu ñayivi ihyá can, iyo xaan cuñi ñi. Tan quitsáha nyicún ñi tsi tì. ⁴ Tan jacahnú ñi tsi nu coo xaan can, tyin tsaha nu ndatu tsi quiti can. Tan jacahnú tucu ñi tsi quiti can, tan catyí ñi:

—¿Yoñi maa cuví tumaa cuví quiti ihyá? ¿Tan yoñi cuví cañí tahan tsihin tì? —catyí ñi.

⁵ Tan ñihí tucu quiti can ndatu tsa cahan ndasi tì tan cahan tì ndavaha ñi siqui Nyoo. Tan cua cundaca ñaha tì uvi xico uvi yoo.

⁶ Tacan javahá tì: Cahán tì tsi Nyoo. Cahán tì ndavaha ñi nu iyó ra, tan sivi ra, tan tsa iyó andívi. ⁷ Tan tsicoog tucu ndatu tsi tì tsa cañí tahan tì tsihin nyivi yihí cuenda Nyoo nda cuanda cuvi jaha canaa tì tsi ñi. Tan ñihí ndatu tucu tì tsa quihí ndaha tì tsi nyivi ndihí ñi tata, nyivi caahán siin siin yuhu, nyivi iyó tandíhi ñi ñuu nyihí, tan ñuu nahnu. ⁸ Tan nyivi tsa ña cua coo ñayivi tsaa tsihin ra cuví Mbée Ticatyi Luhlu, ra tsa tsihí, ña cua coo ñi ñayivi tsaa can tsa cuenda tyin ña tsinyaaq sivi ñi nu libru ra tsa ndi cumañi ca tsinu ñuhu ñayivi. Tandíhi maa ñi can cua jacahnú ñi tsi quiti caquiñi can.

⁹ Tatun yihí ndo iyó soho ndo, tyaa soho ndo tuhan ihyá: ¹⁰ Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tsihin tsa xaan, juvin ñi maa tsihin can cua cíu ñi. Yacan cuenda nyoooho tsa yihí cuenda Nyoo cuñi tsi cunyee iñi ndo tan tsinu iñi ndo tsi ra.

¹¹ Yaha can tan nyehé yu quita inga quiti caquiñi tsitsi ñuhu. Tan iyó uvi ndiqui tì, caá can tumaa caá ndiqui mbee ticatyi luhlu. Maa tyin caahán tì tumaa caahán coo xaan tsa iyó ndaha can. ¹² Tan ndacá ñaha tì tumaa ndacá ñaha inga quiti caquiñi can. Tan nyehé inga quiti can tsa ndacá ñaha tì. Tan natyuhú tì tsi ñuhu ñayivi tan nyivi iyó nu tsi na jacahnú ñi tsi inga quiti caquiñi tsa cuñi cíu jahá tsa caahví tsa tsinyaaq tsi tì. ¹³ Tan cuaha xaan tsa iyo javahá tì nda cuanda quita ñuhu andívi tan janacava tì can nu ñuhu ñayivi tyin nyehé nyivi. ¹⁴ Tan jandaví ñaha tì tsi nyivi iyó nu ñuhu ñayivi tsihin tsa iyo tsa cuví javahá tì nuu quiti caquiñi tsa jihna ñi. Tava tiyuñi tì na javaha ñi iin tsitoho quiti caquiñi tsa tyahnya caahví tsihin mityi, tan ña tsihí tì. ¹⁵ Tan quiti caquiñi tsa tsinu uvi can tsicoog ndatu tsi tì tsa cuhva tì tsa coo nyito tsitoho quiti caquiñi tsa jihna can tyin tacan tan cuvi cahan tsi tan cahñi tsi tsi tandíhi nyivi tsa ña cua jacahnú itsi. ¹⁶ Tan siin tyin catyí tsi tyin cunyaa tuñi tsi tandíhi nyivi; nyivi nyihí, nyivi tsahnu, nyivi cuca, nyivi ndaahví, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yoñi maa cuví jata tan xico tatan nduve tuñi can nyaá tsi ñi, o tatan nduve sivi tì, o número

siví tí nyaá tsi ñi. ¹⁸ Tuhun ihya cuñí xaan tsi tsa tsíni tuñi. Nyívi cutuñi iñi, na jaha cuenda ñi número quítí caquiñi can. Tyin número rayíi cuví can. Tan número can cuví iñu centu uñi xico iñu.

14

Nu tsítá centu uvi xico cumi mil nyivi iin yaa tan jacobhú ñi tsi Nyoo

¹ Yaha can tan nyehe yu tsi ra cuví Mbee Ticatyi Luhlu, nyaá nyityi ra jiñi yucu Sión. Tan yucú centu uvi xico cumi mil rayíi tsihin ra. Ra ihya naha ra cuví ra tsa nyaá siví ra tan siví Jutu ra nutyaan. ² Tacan tan tsíni yu cucayú ityi andívi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsítá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandíhi ra tsahnú naha ra. Tan yoñi maa cuví cutuhva yaa can, maa ñi maa tsa centu uvi xico cumi mil rayíi tsa cacy nu ñuhu ñayívi cuví tsítá can. ⁴ Ra ihya naha ra cuví ra tsa ña tsíca nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyi Luhlu tandíhi ñi ityi cauhán ra. Cacu ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyi Luhlu tsa jihna ñi. ⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyi ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andívi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyívi iyó nu ñuhu ñayívi; nyívi iyó tandíhi ñi ñuu nahnu, tan ñuu nyihi, nyívi tandíhi ñi tata, tan nyívi caahán siñ siñ yuhu. ⁷ Tan ñihi xaan cahan ra tan catyí ra:

—Nayuhvi ndo tsi Nyoo, tan jacobhú ndo tsi ra. Tyin tsa tahán tsi cuhva tsa cua cutuñi nyívi. Jacobhú ndo tsi ra javahá andívi tan ñuhu ñayívi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduva ñuu Babilonia tsa cuví ñuu cahnu, tsa tanj tsi. Tyin nyívi iyó ñuu can jacuahá ñi tsa caquiñi tsa javahá ñi tsi inga nyívi iyó nu ñuhu ñayívi. Tumaa tsa tsíni ñi

tsihin vinu ña vaha, jaha ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahan ra tan catyí ra:

—Tatun ndáa nyívi jacobhú tsi quítí caquiñi can tan tsitoho tsi, o cuhva ñi tsa cunyaa tuñi tì nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacobhú ra vinu xaan tsi ñi nuu ángel tan nuu ra cuví Mbee Ticatyi Luhlu cuvi can.

¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan fiñiu. Ñi ihya cuví ñi tsa jacobhú tsi quítí caquiñi can tan tsi tsitoho tsi, tan tsahá ñi tsi ñi cunyaa tuñi siví tì.

¹² Yacan cuenda nyívi yihí cuenda Nyoo, tan tyáa yahvi ñi tuhun caahán ra, tan tsinú ñi ñi tsi ra Jesús, cuñi tsi tsa cunyee iñi ñi —catyí ángel tsa tsinu uñi can.

¹³ Tacan tan tsíni yu iin ndusu tsa quee nda andívi, tan catyí tsi tsihin yu:

—Tyaa tuhun ihya: “Vityin tan ityi nuu, siñ xaan cua cuvi tsi nyívi cua cíu tun tsinú ñi ñi tsi Jutu Mañi yo.”

Tan catyí Tatyi Ii Nyoo:

Nditsa, siñ xaan cua cuvi tsi ñi tyin cua quitatu ñi tan ña cua jaha tyiñi ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyívi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quita inga ángel tsitsi vehe ñuhu tan ñihi xaan cana tsaa ra tsi ra nyaá nu vico can. Tan catyí ra:

—Vityin jaha tyiñi tsihin mityi un, ja-taca cosecha un tsa iyó nu ñuhu ñayívi. Tyin tsa tsaa cuhva, tan tsa iyó nu ñuhu ñayivi tsa tsityí tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayívi, tan naquihín ra tsa iyó nuu tsi.

¹⁷ Tacan tan quita inga ángel tsitsi vehe ñuhu tsa iyó andívi. Tan juvin ñi ndahá tucu ra iin mityi yacua tsa xaan. ¹⁸ Tan quita inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan cana tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jahá tyiñu tsihin mityi xaan tsa ndahá un juvin, tan cahnya cuenda ndoco yucu vixi tsa nañí uvas tsa iyó nu ñuhu ñayivi, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnya ra uvas can. Tan tyiñi ra itsi iin nu tyiñi ra tyin cua cuñhi ra itsi tan quita ndutya tsi. Tan yacan cuñi tsi catyi tsa cua tatsi tuñi Nyoo tsi nyivi. ²⁰ Tan nacuhñi ra uvas can ityi tsata ñuu, tan cuñi tsi catyi tyin cuaha xaan nyivi tsihí, tan nu cuví can, cuaha xaan cuaha xaan niñi ñi tsatí. Tan tsaa tsi nda nu sucun nu yihí frenu yuhu cuayu, tan tsinú tsi tumaa uñi ciente kilómetro.

15

Nu quitá ndihi utsa taahan ña tundoho tsa cua nyehe nyivi

¹ Nyehé yu inga tsa iyo cahnu andívi tan nayuhví xaan yu, nyehé yu utsa ángel tsa vatsí ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehé ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasaca ñuhu tsihin tsi. Tan nyivi tsa cunyee jahá canaa tsi quiti caquiñi can tan tsi tsitoho tí, tan ña tsinyaa número sivi tí tsi ñi, tandíhi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. ³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyí Luhlu. Tan catyí yaa can tyehen:

Cahnu tan iyo xaan caá tandíhi maa tsa javahá un,
Nyoo, Jutu ndi, iyó tandíhi tunyee iñi tsi un.
Ndoo xaan tan nditsa xaan ityi un,
Yooho Rey cuenda tandíhi nyivi iyó nu ñuhu ñayivi.

⁴ ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacobnu tsi un?
Tan intuhun ñi maa un cuví ra ii.
Tan cua quitsi nyivi quee tandíhi maa ñuu,
tan cua jacobnu ñi tsi un,
tyin nyehe ñi tsa vaha tsa javahá un, catyí yaa tsitá ñi.

⁵ Tacan tan nyehe yu nuña yuvehe ñuhu tsa nyaá nda andívi nu yucú vaha nduvi tabla tsa nyaá ley Nyoo nuu. ⁶ Tan quita

utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra nahá jahma vaha, cuitsin tan xiñu. Tan yihí cinturón xuhun cuaan yíquí nyica tsa intuhun intuhun ra naha. ⁷ Tacan tan iin tsa nyito can, tsaha can intuhun intuhun coho xuhun cuaan tsi tsa intuhun intuhun tsa utsa ángel can. Tan tsitú maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyó ra. ⁸ Tan tsitú maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quíhvi tsitsi vehe ñuhu can tsitsi tsa ndi cumañi ndihi tsa utsa tundoho tsa vatsí ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹ Tacan tan tsití yu iin ndusu ñihi xaan tsa quitá tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juvin siquí nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndus can.

² Tacan tan tsahán iin ángel can tsicoyo ra tsa yihí tsitsi coho ra siquí nyivi tsa nyaá tuñi quiti caquiñi can tan jacobnu ñi tsitoho tí. Tan quita nu caahví xaan tan uhvi xaan tsi ñi.

³ Tacan tan coyo tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyí, tan tandíhi tsa nyito tsa iyó tsitsi nduhu can tsihí tsi.

⁴ Tacan tan coyo tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi. ⁵ Tacan tan tsití yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsí tuñi un tsi nyivi tyehen. Jutu Mañi yu, Nyoo ii cuví un tyin nda nu quitsahá tandíhi tan nda cuenda vityin tacan ñi iyó maa un. ⁶ Tatsí tuñi un tsi ñi tyin maa ñi tsatí ñi niñi nyivi yihí cuenda un tan niñi ra cuví ndus yuhu un. Tan vityin yooho tumaa tsa jacobó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsiní tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandíhi tunyee iñi tsi, vityin tsa tatsí tuñi un tsi nyíví tsihin tsa nditsa tan tsihin tsandaa —catyí ndusu can.

⁸ Tan coyo tsa tsinu cumi ángel can tsa yihí tsitsi coho ra nu ñicanyii. Tacañ tan tsicoq ndatu tsi ñicanyii can tsa cahmi tsi tsi nyíví tsihin ñuhu tsi. ⁹ Tan tandíhi nyíví ndasí xaan cayú ñi jahá ñicanyii can. Maa tyin vasu ndi maa tacan tahán ñi, ña nasama ñi cuhva tsicoq ñi, tan ndi ña jacahnu ñi tsi Nyoo. Tan cahan ñi ndavaha ñi siquí Nyoo, ra tsa jaquitsi tundoho can siquí ñi.

¹⁰ Tan coyo tsa tsinu uhun ángel can tsa yihí tsitsi coho ra siquí tyayu quítä caquiñi can. Tan ndunaq nu ndacá ñaha tì. Tan nyíví cuenda tì, nda cuenda tsatsí yihí ñi yaa ñi tsa cuenda tsa nyehé xaan ñi tsa uhvi. ¹¹ Maa tyin vasu ndi maa tacan cuvi, ña jandíhi ñi tsa javahá ñi tsa ña vaha. Tan cahan ñi ndavaha ñi siquí Nyoo, ra nyaá andivi, tsa cuenda tsa uhvi nu caahvi ñi.

¹² Tan coyo tsa tsinu iñu ángel can tsa yihí tsitsi coho ra nu yutya Eufrates cahnu. Tan ndocq ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³ Tacañ tan nyehé yu quítä tatyi ña vaha tsa caá tumaa caá sahva yuhu tsa intuhun intuhun quítä. In can quítä yuhu quítä caquiñi, inga can quita yuhu coo xaan tsa iyó ndaha inga can quita yuhu tsa cuví ndusu yuhu vatya. ¹⁴ Tatyi ña vaha can cuví tatyi nu ña vaha, tan nahnu tsa nyityi javahá nahnu. Quítä nahnu, jandu iñi nahnu tandíhi rey tsa iyó nu ñuhu ñayivi, tyin cañi tahanra naha quíví tsaa quíví janaha Nyoo tyin iyó tandíhi tunyee iñi tsi ra. ¹⁵ Tan catyí ra Cristo:

—Nyhe ndo tyin tsa vatsí yu tumaa vatsí iñi ñasuhu tyin iñi ñasuhu sana iñi ndo tan quihví ra tsitsi vehe ndo tacan yuhu. Sií xaan cua cuvi tsi nyíví ndatú quíví quitsi yu tan tsa iyó vaha jahma ñi tyin quíví cua tsaa yu ña cua nducahan nuu ñi tyin ña tandíi ñi —catyí ra Cristo.

¹⁶ Tan cua ndu iñi ra cuví rey naha ra nu nañí Armagedón tsihin yuhu hebreo.

¹⁷ Tan coyo tsa tsinu utsa ángel can tsa yihí tsitsi coho ra nu tatyi, tacan tan quita

iñi ndusu nu nyaá tyayu Nyoo tsitsi vehe ñuhu tsa nyaá nda andivi. Cañ qtsaa tsi tan catyí tsi:

—Tsa iyó vaha vityin.

¹⁸ Tacañ tan vaa ña maa cuví tan caahán savi tan cañi tatsa. Tan ñihí xaan taañ nu ñuhu ñayivi. Tan ña tuhvá maa taán tacan tsa ndi quitsahá iyó nyíví nu ñuhu ñayivi. ¹⁹ Tan uñi nu ndata ñuu cahnu Babilonia can, jahá tsa taañ. Tan tandíhi ca ñuu tsa cayucu nu ñuhu ñayivi taní tsi. Nyoo ña naq maa iñi ra tsa javahá nyíví Babilonia. Yacan cuenda janyehe xaan ra tundoho tsi ñi. ²⁰ Tandíhi maa ñuhu tsa iyó tsitsi ndutya ñuhu tan tandíhi yucu, tandíhi maa tsi tsinaq. ²¹ Tan cucoyó cuaha yuu savi nahnu xaan tsa quee andivi siquí nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyíví cahan ñi ndavaha ñi siquí Nyoo tsa cuenda tundoho yuu savi can, tyin cuví tsi iñi tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacañ tan quita iñi ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tsihin rayíi, ña tsa nyaá nu ndutya cuaha. ² Tyin ra cuví rey nu ñuhu ñayivi tsicoq ra naha tsihin ña, tan tsa cuenda ña tiví tandíhi nyíví iyó nu ñuhu ñayivi —catyí ra tsihin yu.

³ Tacañ tan nyehé yu iñi tsa janahá Tatyi Ii Nyoo tsi yu, tan tsindacá ángel can tsi yu nu tsiquí nu nduve maa nyíví iyó, tan juvin ñi ican nyehé yu iñi ñaha yosó iñi quítä cuaha caquiñi. Nyecú sivi tsa caahán ndavaha ñi tsi Nyoo tsi tì. Iyó utsa jiñi tì tan utsi ndiquí tì. ⁴ Tan ñaha can nditsí ña jahma tijinda tan cuaha. Tan cuaha xaan xuhun cuaan iñi tsi ña, tan yuu vaha, tan perla. Tan ndahá ña iñi taza xuhun cuaan tsitú tsihin tsa ña vaha tan tsa caquiñi tsa javahá ña. ⁵ Tan nyaá iñi sivi tsa cuví iñi tuhun xeehe tsa ña cutuñi iñi nyíví nutyaan ña. Tan catyí can tyehen: “Naha ihyá cuví ñuu Babilonia cahnu, sihi tandíhi ñiñaha tsa tsicá nuu tsihin rayíi tan sihi tandíhi tsa ña vaha tsa iyó nu ñuhu ñayivi.” ⁶ Tacañ tan nyehé yu tyin tsiní ñaha can jahá tsa tsihin

ñá niñí nyíví yihí cuenda Nyoo, ñí tsa tsihí tsa cuenda tsa cahán ñí tuhun ra Jesús. Tsa nyehe yu tsi ñá, iyo xaan cuñí yu. ⁷Tacan tan catyí ángel can tsihin yu:

—¿Nacuenda iyo xaan cuñí un? Cua jacoto yu tsi un náa cuñí tsi catyí tuhun xeehe ñaha ihya tan quítí caquiñí tsa yosó ñá, quítí tsa iyó utsa jiñi tan utsi ndiquí. ⁸Quítí caquiñí tsa nyehe un can, juvin tí cuví quítí tsa tsicoo tan vityin nduve ca tí iyó. Maa tyin cua quita tì tsitsi yavi cunu tsa nduve nu tsindihí. Ican nyíf tì tsa ndi cumañí ca cuhun tì nu cua cundihí cuií tì. Nyíví iyó nu ñuhu ñayíví, ñí tsa nduve siví nyaá nu libru Nyoo nda quivi tsinu ñuhu ñayíví, iyo xaan cua cuñí ñí nyehe ñí tsi quítí can. Libru can catyí yóo nyíví cua coo cuií.

⁹Tuhun ihya cuní tsi tsa cutuñi iñi yo itsi: Tsa utsa jiñi quítí can cuñí tsi catyi tsa utsa yucu tsa nyaá ñaha can nuu. ¹⁰Tan juvin ñí cuñí tucu tsi catyi can utsa rey. Uhun ra naha tsa yahá tsindacá ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañí cundaca ñaha ra. Quíví quitsi ra, ñá naha cua cundaca ñaha ra. ¹¹Tan quítí caquiñí tsa tsicoo tan vityin nduve ca tí iyó, juvin tí cuví iñin rey tsitsi tsa utsa taahan rey can, tan cua cuvi tucu tì rey tsa tsinu una. Tsa yaha cundaca ñaha nyico tì, tacan tan cua cuhun tì nu cua cundihí cuií tì.

¹²Tan tsa utsi ndiquí tsa nyehe un can, cuñí tsi catyi utsi rey tsa ndi cumañí cundaca ñaha. Cua coo ndatu tsi ra naha tsa cundaca ñaha ra naha iñi ora, iñi caa ñí tsihin quítí caquiñí can. ¹³Tsa utsi rey can inducú ñí cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quítí caquiñí can. Tan tandihí ndatu tsa iyó tsi ra naha cua nacuhva ra naha tsi tì. ¹⁴Tan cua cañí tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihí ra ndacá ñaha. Tan yihí ndaha tucu ra tsi tandihí ra cuví rey naha ra. Tan nyíví yihí cuenda ra, maa Nyoo cana tsi ñí tan nacatsi ra tsi ñí. Tan ñíf xaan cuñí ñí nyicún ñí tsi ra.

¹⁵Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuví nyíví iyó tandihí ñuu nyihi tan ñuu nahnu, ñí

caahán siñ siñ yuhu. ¹⁶Rey tsa cuví tsa utsi ndiquí quítí caquiñí tsa nyehe un can, ndasí cua cuñí ra naha nyehe ra naha tsi ñaha tsicá nuu can. Cua naçoo ihñí ra naha tsi ñá. Tan cua jatandihí ra naha tsi ñá; tan cua catsi ra naha cuñu ñuhu ñá. Tan cua cahmí ra naha tsi ñá. ¹⁷Tyin Nyoo tsaha ra tsa caca iñí rey can naha ra tyin javaha ra naha cuhva cuñí maa Nyoo. Tyin iñi ñí cuhva cua caca iñí ra naha, tan cua cuhva ra naha ndatu tsi quítí caquiñí can tsa cundaca ñaha tì tumaa rey nda cuando cundaa tuhun caahán maa Nyoo. ¹⁸Ñaha tsa nyehe un can, juvin ñá cuví ñuu cahnu tsa ndacá ñaha tsi tandihí ra cuví rey nu ñuhu ñayíví.

18

Nu naá ñuu Babilonia

¹Tsa yaha yacan tan nyehe yu queq inga ángel itiy andívi tan iyó xaan tunyee iñi tsi ra. Tan ndunditsín ñuhu ñayíví jahá tsa nditsin ra. ²Tan cana tsa ra tsihin tsa ñíhi ndusu ra, tan catyí ra:

—Tsa tsindihí nuu ñuu Babilonia cahnu. Nanduví tsi nu iyó tatyí ñá vaha, vehe tandihí nuu tatyí ñá vaha, tan taca saa ñá vaha tsa ña taahán iñi nyivi. ³Tyin tandihí nyivi tiví ñí tsa cuenda cuatyí javahá ñuu Babilonia can. Ra cuví rey nu ñuhu ñayíví naha ra tumaa tsa tsicoo ra naha tsihin ñaha tsa cuví ñuu Babilonia can. Javaha ra naha cuatyí tsihin ñá. Tan nyíví ñuhu ñayíví nducuca ñí tsihin tsa cuaha xaan tsa yahvi tsa jata nyíví ñuu can.

⁴Tacan tan tsiní yu ndusu Nyoo itiy andívi, tan catyí tsi:

—Quítá ndo ñuu ihya, nyoho tsa cuví nyivi yu, ñá cutahan ndo tsihin nyíví ihya tan ñá javaha ndo cuatyí tumaa javahá ñí cuatyí, tyin tacan tan ñá nyehe ndo tundohó tumaa nyehé maa ñí. ⁵Tyin tsa canyí tucuití cuatyí nyivi iyó ñuu can, nda cuando tsaa can nu nyaá yu. Tan ñuhú iñi yu tsa ñá vaha javahá ñí. ⁶Cuhva ndo juvin ñí maa tsa tsaha ñí tsi inga nyíví tsi ñí; cuhva ndo uvi ca tsaha siquí tsa javahá ñí. Tacan janyehe ndo tundohó tsi ñí. ⁷Cuhva ndo tundohó nyehe ñí tsa ñíhi uvi ca tsaha tan ñavín ca tsa tsahá maa ñí tsi inga nyíví. ⁸Yacan cuenda cuhva ndo tsa iyo xaan tahan ñí tsihin tundohó nyehe ñí jaha ndo. Tahan ñí cuhva tsa jacobahnu xaan ñí tsi ñí tan cusíí xaan iñí ñí juvin cuhva can janyehe ndo

tundoho tsi ñi. Tyin tsicá iñi tsitsi añima ñi: "Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho", cuñí ñi, tsicá iñi ñi. ⁸ Yacan cuenda iin quívi ñi cua quitsi tundoho siquí ñuu can, cua quitsi tuhun tsiihí, tucuihya iñi, tama, tan cua cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyiyí ñuu can —catyi Nyoo.

⁹ Ra cuví rey nu ñuhu ñayiví ihyá tumaa tsa tsicoq̄ ra naha tsihin ñaha tsa cuví ñuu can, cua vacu xaan ra naha, tan cuiihya cua cuñí ra naha na nyehe ra naha yuhma tsa cayu ñuu can. ¹⁰ Tan tsa cuenda tsa yuuuhví ra naha tundoho can, nda sava ñí cua cunyecu ra naha. Tan cua catyi ra naha:

—¡Ndahvi yooho, ñuu cahnu Babilonia, ñuu tsa tsicoq̄ cuahá tunyee iñi tsi! Tyin iin yaha ñi tsaa tundoho nyehé un —cua catyi ra naha.

¹¹ Tan ra tsa xicó ndaha tysiñu naha ra, juvin ñi cua vacu xaan ra naha tan cuiihya cua cuñí ra naha tsa cuenda ñuu can. Tyin yoñi ca cua jata tsa xico ra naha. ¹² Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandíhi nuu vitu tamí tan náa ndíhi tsa tsiny tsihin yíqui nuu landa, tan vitu sii caá, tan caa tsa cuví bronce, tan caa tsa cuví hierro, tan yuu tsa cuví mármol.

¹³ Tan xicó tucu ra naha canela, náa ndíhi ca yucu tsa quíhví tsihin tsa tsatsí yo, tan tsa tamí tumaa cutu, tumaa mirra, tan tumaa ndutyta tamí. Tan xicó tucu ra naha vinu, acetye, yutyi paan vaha, tan trigu. Tan juvin ñi xicó tucu ra naha quíti cuenda carga, tan mbee, cuayu, carreta, tan nda cuanda nyivi tsa cuví musu tan xicó ra naha. ¹⁴ Tan catyi ra naha tsihin nyivi ñuu can tyehen:

—Nduve ca tsa sii caá tsa tsicoo tsi un, tsa taahán xaan iñi un. Tan tsa tsindíhi tandíhi tsa cua un. Tan ña cua ñihí ca maa un tandíhi yacan —catyi ra naha.

¹⁵ Ra tsa xicó tandíhi can, nducuca ra naha tsa cuenda tsa jata nyivi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuuhví ra naha tsa cua nyehe nyivi can tundoho. Tan cua vacu xaan ra naha tan cuiihya cua cuñí ra naha.

¹⁶ Tan cua catyi ra naha:

—¡Ndahvi ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cicutú ña tsihin xuhun cuaan, tan yuu sii caá tan perla. ¹⁷ ¡Tan iin yaha ñi ndihí tsa cuca xaan can! —cua catyi ra xicó can naha ra.

Tan tandíhi ra cuví capitán tsa jacacá yutun ndoo nu ndutya, tsihin nyivi yucú tsitsi can tan tandíhi ra jahá tysiñu nu ndutya ñuhu naha ra, nda sava cua ndoo ñi. ¹⁸ Tan tsa cua nyehe ñi yuhma tsa cayú ñuu can, cua cana tsaa ñi, tan cua catyi ñi:

—¿Náa inga ñuu tsicoq̄ tumaa ñuu cahnu ihyá? Nduve —cua catyi ñi.

¹⁹ Tan cua coso ñi nyaca jiñi ñi, tan cua vacu xaan ñi. Tan cuiihya cua cuñí ñi, cua cana tsaa ñi, tan cua catyi ñi:

—¡Ndahvi ñuu cahnu can! Tyin tsihin tsa cuca tsi tan nducuca tandíhi yoo tsa tsicá nuu nu ndutya ñuhu tsihin yutun ndoo. ²⁰ Tan vityin iin yaha ñi naqá tsi! —cua catyi ñi.

²⁰ Maa tyin nyoocho cusíi iñi ndo nyehe ndo tsa taahán ñuu can, nyoocho tsa iyó andivi, tan nyoocho ra tsicá tysiñu ra Cristo tan nyoocho ra cuví ndusu yuhu Nyoo, tan tandíhi ca nyoocho tsa yihí cuenda Nyoo. Cusíi iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

²¹ Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhún ra can tsitsi ndutya ñuhu, tan catyí ra:

—Tyehen cua cundihi nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. ²² Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tivi tiyoo, tan ndi caa. Tan ndi ña cua coo ca ra jahá tysiñu náa ndíhi ca tysiñu. Tan ndi ña cua cucayu ca molino.

²³ Tan ndi ñuhu tyuma, tan ña cua cayu ca tsitsi ñuu can. Ndi ña cua cuñí ca yo ndusu nyivi nu iyó vico tindaha. Tacan cua cuvi vasu ndi maa ra xicó tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyivi iyó ñuu can tsi tandíhi nyivi iyó nu ñuhu ñayiví tsihin tuhun tasi.

²⁴ Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyivi yihí cuenda Nyoo, tan niñi tandíhi

nyiví tsa tsahñí nyiví naníi cahnu nu ñuhu
ñayivi.

19

¹Tsa yaha yacan, tan tsíñi yu ndusu nyiví
cuaha ityi andív. Tan catyí ñí:
¡Cahnu xaan cuví Nyoo! Jutu Mañi yo, Nyoo
cuví ra ra jacacú tsi yo. Tan tsi maa
ra taahán tsi jacobnu yo, tyin iyó
xaan tunyee iñí tsi ra.

²Tyin tsihin tsa vaha tan tsandaa tan tsa
nditsa jacutuñí ra.

Tatsí tuñí ra tsi ñaha tsicá nuu tsa cuví ñuu
Babilonia
tsa jatíñi xaan tsi nyiví iyó nu ñuhu ñayivi
tsihin tsa caquiñi tsa javahá ña tsíñi
hin ñí.

Tan tatsí tuñí ra tsi ña tsa cuenda tsa tsahñí
ña tsi nyiví jahá tysiñu tysiñu ra.

³Tan catyí ñí inga tsaha:

—¡Cahnu xaan cuví Nyoo! Yuhma tsa
cayú ña, ña cua cundihí maa tsa ndaa tsi ityi
siquí —catyí ñí.

⁴Tan tsa oco cumi ra tsahnu tan tsa cumi
tsa nyito tsa nyecú nu nyaá tyayu Nyoo,
tsicuiñi tsíti ra naha nda nu ñuhu. Tan
jacobnu ra naha tsi Nyoo nu nyaá ra nu
tyayu ra. Tan catyí ra naha:

—¡Cahnu xaan cuví Nyoo! ¡Na cuvi tsi
tacan! —catyí ra naha.

⁵Tan nu nyaá tyayu Nyoo, nacahan iin
ndusu, tan catyí tsi:

Jacobnu ndo tsi Nyoo Jutu yo
tandíhi nyoho tsa jahá tysiñu tysiñu ra,
tan tyáa yahvi ndo tsi ra, nyoho nyiví
nyihi tan nyiví tsahnu.

Nu iyó vico tindaha ra Mbee Ticatyi Luhlu
tan nyiví tsinú ñí tsi ra

⁶Tan tsíñi tucu yu ndusu tumaa cuví nu
cuaha xaan nyiví yucú, o tumaa ndusu nu
cuaha xaan yutya o tsa ñihi xaan caahán
savi. Tan catyí tsi:

¡Cahnu xaan cuví Nyoo Jutu yo, ra iyó
tandíhi tunyee iñí tsi! Tyin tsa
quitsaha ndacá ñaha ra.

⁷Na cusií iñí yo tan na cutu yo tsihin tsa sii.
Na jacobnu yo tsi ra,

Tyin tsa tsaa cuhva tsa coo yo vico tindaha
ra Mbee Ticatyi Luhlu.

Tan yoo cua cuvi yo tumaa ñasíhi ra, tan
ndatú yo quivi tindaha yo tsihin ra.

⁸Tyin tsa ñihí ndatu yo tsa cunditsi yo
jahma cuitsin tsa ña nyahyu ca tsa
cuví jahma linu.

Tyin jahma linu can cuñí tsi catyi tsa vaha
tsa jayahá nyiví yihí cuenda ra.

⁹Tacan tan quitsaha catyí ángel can tsí-
hin yu:

—Tyaa tyehen nu tutu: “¡Sií xaan cuvi
tsi nyiví tsa cua cuhun nu tindaha ra Mbee
Ticatyi Luhlu!”

Tan catyí tucu ra tyehen:

—Tuhun ihyá cuví tuhun nditsa Nyoo
—catyí ra tsihin yu.

¹⁰Tacan tan tsicuiñi tsíti yu nuu ángel
Nyoo can tsa cua jacobnu yu tsi ra. Maa tyin
catyí ra tsihin yu:

—Ña jacobnu un tsi yuhu, tyin yuhu
musu Nyoo ñí cuví tucu yu tumaa yooho,
tan tumaa tandíhi ra yañi un tsa tsinú iñí
tuhun nditsa tsa cahan ra Jesucristo. Tsi
Nyoo taahán tsi jacobnu yo —catyí ra tsihin
yu.

Tyin tsa cahan ra Jesús, yacan cuví tsa
jandu iín iñí tsi ra cuví ndusu yuhu ra, ra
tsahá cuenda tuhun caahán Nyoo tsihin yo.

*Nu nyehé ra Juan tsi ra tsa yosó cuayu
cuitsin*

¹¹Tacan tan nyehé yu ticohó andív. Tan
can quituvi iin cuayu cuitsin. Tan
ra yosó tsi tì nañí ra Ra Nditsa Tsa Nií Iñí
Jahá Tysiñu Tysiñu Nyoo. Tyin tsihin tsa
ndaa jacutuñí ra tsi nyiví, tan ndaa javahá
ra tsa cañí tahan ra. ¹²Tan tumaa caá nu
cayú ñuhu, tacan caá tinuu ra. Tan cuaha
xaan corona yiñí jiñí ra. Tan intuhun ñí
maa ra tsító iin siví tsa nyaá tsi ra. ¹³Tan
nditsí ra jahma cahyí tsihin niñí. Tan nañí
ra Tuhun Nyoo. ¹⁴Tan nyicún andaru andív
tsi ra, nditsí ra naha jahma vaha tsa cuví
linu, cuitsin tsi tan ñia nyahyu tsi. Tan
yosó ra naha cuayu cuitsin. ¹⁵Tan quitá
iin mitiy xaan yuhu ra, yacan cuví Tuhun
Nyoo; tsihin yacan cua jañicueehe ra tsi
nyiví iyó nu ñuhu ñayivi. Tan ñihi cua
cundaca ñaha ra tsi ñí tsihin tatum tsa cuví
caa. Cua tatsi tuñí ra tsi ñí tumaa javahá
ra tavá ndutya yucu vixi tsa cuví uva tsihin
tsaha ra. Tan cua jacohe ra vinu tsa tsinú
tsihin uva tsi ñí, tsehe cuñí tsi catyi tyin
cuxaán Nyoo tsihin ñí tan cua tatsi tuñí ra
tsi ñí tyin tsahá xaan ñi tisihi tsi Nyoo, ra
iyó tandíhi tunyee iñí tsi. ¹⁶Nu jahma ra tan

nu sīhīn ra can nyaá letra tsa catyí tyehen:
“Ra ihyā cuví ityi nuu tsihin tandihi rey.
Tan juvin ñi ra cuví ityi nuu tsihin tandihi
ra ndacá ñaha naha ra.”

¹⁷ Tacan tan nyehe yu nyaá nyityi inga
ángel nu ñicanyii. Tan ñihi xaan cana tsa
ra tsi tandihi saa tsa ndavá ityi andivi, tan
catyí ra tsihin tì naha ti:

—Nuu ndo tan ndu iin ndo tan cuxiñi
ndo tsa tsahä Nyoo catsi ndo. ¹⁸Cua catsi
ndo cuñu ra cuví rey naha ra tan ra cuví
ityi nuu tsihin andaru naha ra tsihin tucu
ra xaan naha ra. Tan catsi ndo cuñu cuayu
tan cuñu ra tsicosq tsi tì naha ra. Catsi
ndo cuñu tandihi ra naha, ra iyó tsitoho tan
ra nduve tsitoho, tahan ñi nyiví nyihi
ra nyiví tsahnu —catyí ra tsihin saa can naha
ti.

¹⁹ Tacan tan nyehe yu quiti caquiñi can
tsihin ra cuví rey tsa iyó nu ñuhu ñayiví
tsihin andaru cuenda ra naha. Ndu iin ra
naha tsa cua cañi tahan ra naha tsihin ra
yosó cuayu cuitsin can tan andaru cuenda
ra. ²⁰Tiñ ra yosó cuayu cuitsin can tsi quiti
caquiñi can iin caa ñi tsihin ra cuví ndusu
yuhu vatyá can, tyin nuu quiti caquiñi can
javahá ra vatyá can tsa nyityi, tan tsihin
yacan jandavi ñaha ra tsi nyiví tsa tsahá
cunyaa tuñi quiti caquiñi can, tan tsi ñi
jacahnú tsitoho tì. Tan jacuhun nyito ra
tsi nduvi taahan ra naha nu ñuhu tsa cayú
tsihin azufre. ²¹Tan tandihi ca ñi tsihí ñi
tsihin mityi xaan tsa quitá yuhu ra yosó
cuayu cuitsin can. Tan tandihi maa saa,
tsatsi xaan tì naha ti cuñu ñi.

20

Nu nyehe ra Juan tsa cuenda tsa mil cuiya

¹Tsa yahá can tan nyehe yu quee iin ángel
ityi andivi, ndahá ra ndaha tucu yuvehe
yavi cunu tsa nduve maa nu tsindihí. Tan
ndahá tucu ra iin cadena cahnu. ²Tiñ ángel
can tsi nu coo xaan tsa iyó ndaha, tsa cuví
Coo Tsahnu can, tan cuví tucu nu ña vaha,
tan nañi nu Satanás. Tsahñi ra tsi nu tsihin
cadena iin mil cuiya. ³Tan jacuhun ra tsi nu
tsitsi yavi cunu xaan can. Nacasi ra yuhu
yavi can, tan tyaq ra iin sellu yuhu can tyin
tacan tan ña jandavi ñaha ca nu tsi nyiví
iyó nu ñuhu ñayiví, nda yaha mil cuiya.
Tsa yaha mil cuiya can, cua ndatsi nyico nu
juhva ca quivi.

⁴ Yaha can tan nyehe yu nyecú cuaha
tyayu. Tan nuu can nyecú nyiví tsa ñihí
ndatu tyin tatsi tuñi ñi tsi nyivi. Tan nyehe
tucu yu añima nyiví tsahnya nyiví jiñi tsa
cuenda tsa cahán ñi tuhun Nyoo tsa tsahä
cuenda ra Jesús tsi ñi. Nyiví ihyá ña jacahnú
ñi tsi quiti caquiñi can, ndi tsi tsitoho tì, tan
ndi ña tsahä ñi cunyaa tuñi tì nutyaañi,
tan ndaha ñi. Nyehé yu nandoto ñi can tan
tsindaca ñaha ñi tsihin ra Cristo tsitsi tsa
mil cuiya can. ⁵ Ñi ihyá cuví ñi tsa nandoto
tsa jihna ñi. Maa tyin inga ndiyí ña nandoto
ñi tyin cua nandoto ñi nda yaha mil cuiya
can. ⁶¡Shi xaan cuví tsi ñi tsa nandoto jihna
tyin nacatsi Nyoo tsi ñi! Tan ña cua cuhun
ñi anyaya nu tatsi tuñi Nyoo añima ña vaha
tsa cua cíu nyiví tsinu uvi tsaha. Tyin
cua jaha tyiñi ñi cuenda Nyoo tan cuenda
ra Cristo. Cua cuvi ñi tumaa jutu tan cua
cundaca ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Sa-
tanás nu nyiví nu nuuhñi nu. ⁸Cua quita nu,
jandavi ñaha nu tsi nyiví Gog tan Magog,
ñi xaan iñi tsi Nyoo tsa iyó naní cahnu nu
ñuhu ñayiví. Cua jandu iin nu tsi andaru ñi
can tyin cuhun ra naha cuatyí. Cuaha xaan
ra naha, tumaa cuaha nyití yuhu ndutya
ñuhu. ⁹Tacan tan nyehe yu quee ra naha
naní cahnu nu ñuhu ñayiví. Tan tyasi
nduvi ra naha nu iyó nyiví yiñi cuenda
Nyoo ñuu Jerusalén tsa cuñi xaan Nyoo.
Maa tyin Nyoo januu ra ñuhu tsa quee
andivi tan tsahmi tsi tsi tandihi ra naha.
¹⁰Tan nu ña vaha tsa jandavi ñaha tsi ñi,
jacuhun Nyoo tsi nu anyaya nu cayú ñuhu
tsihin azufre, nu jacuhun ra tsi quiti caquiñi
can tan ndusu yuhu vatyá can. Ican cua
nyehé nahnu tundoho tacan ñi maa, nduvi
tan ñiñu.

*Nu cutuñi nyiví ityi nu nyaá tyayu
cuitsin nu nyaá Nyoo*

¹¹ Tacan tan nyehe yu iin tyayu cuitsin
cahu. Tan nyehe yu tsi ra nyaá nuu can.
Tan nyehe ra nu naq ñuhu ñayiví tan andivi.
Tan ña ñihí tsi numaa cava tsi. ¹²Tan nyehe
yu tandihi añima nyiví tsihí, tahan ñi nyiví
tsahnu tan nyiví nyihi, nyecú nyityi ñi ityi
nuu Nyoo. Tacan tan nuña libru tsa nyaá
tandihi tsa javahá ñi quivi tsicoq ñi. Tan
nuña tucu inga libru nu nyecú sivi nyiví tsa
cua coo nyito tsihin Nyoo. Ndiyí can cua
cutuñi ñi tsa cuenda náa ndihí ca tsa javahá

ñi tsa nyaá nu libru can.¹³ Tan ndutya ñuhu nacuhvá cuenda tsi añima nyívi tsa tsihí tsa cumí tsi. Tan nu yucú añima nyívi tsihí tan Tuhun Tsiihí, nacuhvá cuenda nahnu añima nyívi tsa yihi ndaha nahnu. Tan tandíhi ñi cua tahan ñi nácaa javahá maa ñi.¹⁴ Tacan tan Tuhun Tsiihí can tan nu yucú añima nyívi tsihí can cua jacuhun ndihí Nyoo nduví taahan can anyaya cahnu nu cayú ñuhu. Tan tsehe cuví tuhun tsiihí tsa tsinu uvi.¹⁵ Juvín ñi ican jacuhyn ra tsi nyívi tsa nduve sivi nyaá nu libru nu nyecú sivi nyívi cua coo nyito tsihin Nyoo tacan ñi maa.

21

Nu nyehé ra Juan andívì tsaa tan ñuhu ñayiví tsaa

¹ Yaha can tan nyehé yu iin andívì tsaa tan iin ñuhu ñayiví tsaa, tyin andívì tan ñuhu ñayiví tsa tsico jihna naq tsi. Tan tacan tucu ndutya ñuhu naa tsi. ² Yuhu ra Juan nyehé yu ñuu ii tsa cuví Jerusalén tsaa tsa quee nda nu nyaá Nyoo andívì, nyehé yu ñuu tsi. Tan sii xaan caá cucutú tsi tumaa cucutú iin ñaha cua tindaha. ³ Tan tsíñi yu iin ndusu ñihí tsa quítá nda andívì, tan catyí tsi:

—¡Nyehé jihna! Iyó Nyoo mahñu nyivi. Cua coo ra tsihin ñi. Maa ñi cua cuví ñi nyívi ra. Tan cua cunyaa ra tsihin ñi, tan cua cuví ra Nyoo cuenda ñi. ⁴ Juvín ñi maa ra cua nacuhva ndutya nuu ñi. Ña cua coo ca tuhun tsiihí tan ndi tucuihya iñi. Ña cua vacu ca nyívi tyin ña cua nyehe ca ñi tundoho. Tan ña cua nyehe ca ñi tsa uhvi. Tyin tandíhi tsa tsico, tsa tsindíhi tsi —catyí ndusu can.

⁵ Tacan tan ra nyaá nu tyayu cahnu can, catyí ra:

—Nyehé jihna. Jandutsaa yu tandíhi maa tsa tsico.

Tan catyí tucu ra:

—Tyaa tuhun caahán yu ihya, tyin tuhun nditsa cuví tsi. Cuita iñi tuhun ihya tyin cua cundaas tsi —catyí ra tsihin yu.

⁶ Tsa yaha cahán ra yacan tan catyí tucu ra:

—Tsa iyó vaha tandíhi vityin. Yuhu cuví ra jihna ñi, tan yuhu cuví ra cua coo nu cua ndihí quivi; tumaa letra A cuví tsi letra jihna ñi tan tumaa letra Z cuví tsi letra nu ndihí ña. Nyívi tsa na ityi iñi cua cuhva yu

ndutya coho ñi; tuhun ihya cuñí tsi catyí: Ñi cuñí tyaa soho tuhun yu, cua cuhva yu ñayivi tsa ña cua naa maa coo ñi, tan nduve yahvi tsi cua coo. ⁷ Nyívi jahá canaa tsi nu ña vaha, cua ñihí ñi tandíhi tsa caahán yu tuhun ihya, tan cua ndoo ñi tsihin can. Tan yuhu cua cuví yu Nyoo ñi tan maa ñi cua cuví ñi sehe yu. ⁸ Maa tyin nyívi yuuuhví xaan, ñi ña tsinu ñiñi, ñi quiñi iyó, ñi tsahñí, ñiñaha tsicá nuu tsihin rayí, tan rayí tsicá nuu tsihin ñaha, ñi tasi, ñi jacaahnú tsitoho, ñi vatyá; tandíhi maa nyívi ihya taahán tsi cuhun ñi anyaya cahnu nu cayú ñuhu tsihin azufre, nu cuví tsa tsinu uvi tuhun tsiihí, nu tatsí tuñi Nyoo añima ña vaha.

Nu nyehé ra Juan nácaa cua cuví ñuu Jerusalén tsaa

⁹ Tacan tan tsitsi tsa utsa ángel tsa ndahá coho tsití tsihin tundoho, quítá iin ra tan natuhvá ra nu nyaá yu tan catyí ra:

—Cohon tsihin yu tan janaha yu nyivi yihí cuenda ra Cristo tsi un, ñi tsa cuví tumaa ñasíhi ra Mbee Ticatyi Luhlu —catyí ra tsihin yu.

¹⁰ Tan janaha Tatyí Ii Nyoo tsi yu tyin tsindacá ángel can tsi yu iin yucu sucun tan cahnu. Tan janaha ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa quee tsi andívì nu nyaá Nyoo.

¹¹ Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi. ¹² Niñi canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsii tsaa hnu yo naha ra. ¹³ Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tysió ñicanyii. ¹⁴ Utsi uvi yuu yihi nu cacu tsaha tsi. Tan nuu yuu can nyecú sivi tsa utsi uvi ra tsa tavá tyiñu ra Mbee Ticatyi Luhlu.

¹⁵ Tan ángel tsa cahan tsihin yu, ndahá ra iin metru tsa tsinu tsihin xuhun cuaan, tsihin yacan tyihí cuhva ra ñuu can, tan yuhu cora can tan naníi canduvi cora ñuu can. ¹⁶ Iyó cumi taahan tutun ñuu can. Tan inducu ñi tsa quilihin tan tsa cañi tsi. Tan tyihí cuhva ángel can ñuu can tsihin metru

xuhun cuaan can. Tan quitá uvi mil uvi centu kilómetro. Iin ñí cuhva tsa cañí tan tsa sucun tan tsa quiihin.¹⁷ Tacan tan tyihí cuhva ra cora ñuu can. Tan quitá uñí xico cumi metru tsa quiihin, tyihí cuhva ra tumaa tyihí cuhva nyiví.

¹⁸ Tsihin yuu jaspe sama cora ñuu can. Tan maa ñí maa xuhun cuaan cuví ñuu can. Tan caá tsi tumaa caá yutyi tun ndoó vaha tsi. ¹⁹ Tan tsaha cora can sama tsi tsihin tandihí ñí nuu yuu sii caá: yuu tsa jihna ñí cuví jaspe; tsa tsinu uvi cuví zafiro; tsa tsinu uñí cuví ágata; tsa tsinu cumi cuví esmeralda; ²⁰ tan tsa tsinu uhun cuví ónica; tsa tsinu iñu cuví cornalina; tsa tsinu utsa cuví crísolito; tsa tsinu una cuví berilo; tsa tsinu iñin cuví topacio; tsa tsinu utsi cuví crisoprasa; tsa tsinu utsi iñin cuví jacinto; tan yuu nu ndihí ñí cuví amatista. ²¹ Tsa utsi uvi yuhu cora can tsinú tsi tsihin utsi uvi perla. Intuhun ñí perla cuví tsa intuhun intuhun tsi. Tan nu cuví ityi cahnu ñuu can, maa ñí maa xuhun cuaan cuví tsi, tumaa in yutyi. Tyin iñin yutyi cuví nyehe yo tsa nyaá inga tsiyo tsi tsihin tsi, tacan caá tsi.

²² Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyi Luhlu cuví vehe ñuhu ñuu can. ²³ Ña tsiñí ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñí maa tsa nditsin Nyoo tan tsa nditsin ra Mbee Ticatyi Luhlu jandunditsín tsitsi ñuu can. ²⁴ Tandihí nyiví tsa cacu añima, cua caca nuu ñí nu nditsin can. Tan ra cuví rey nu ñuhu ñayiví naha ra cua cundaca ra naha tsa cuca ra naha tan tandihí tsa cahnu cuví ra naha ñuu can. ²⁵ Ña cua cundasi yuhu cora tsa tsinu cahñí, tan ña cua coo tsacuaa ñuu can. ²⁶ Tan tandihí tsa cuca, tan tsa cahnu, tsa iyó nu ñuhu ñayiví cua tsaa tsi ñuu can. ²⁷ Maa tyin ña cua cuvi quihví tsa caquiñi, ndi intuhun nyiví javahá tsa caquiñi, tan ndi ñí vatya. Intuhun ñí maa nyiví iyó sivi nu libru ra Mbee Ticatyi Luhlu cua cuvi quihví, tan cua coo nyito tsihin ra tacan ñí maa.

22

¹Tacan tan janahá ángel can iñin yutya cuii xaan tsi yu. Ndutya tsa tsahá tsa coo nyito yo cuví. Cuii xaan tsi tumaa cuii iñin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyi Luhlu.

²Mahñu tsitsi ityi cahnu ñuu can tan nduvi tsioxi xiñi yutya can, nyecú yutun tsa tsahá tsa coo nyito yo. Tsahá tun naha tun tsiti tan iñin tan iñin yoo. Tan tsa iñin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyiví iyó nu ñuhu ñayiví. ³Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyi Luhlu. Tan cua jacahnu nyiví yihí cuenda ra tsi ra. ⁴Tan cua nyehe tsihin nuu ñí tsi ra. Tan cua cunyaa sivi ra nutyaan ñí. ⁵Ña cua coo ca tsacuaa ican. Tan nyiví tsa cua coo ican ña tsiñí ñuhu ñuhu candili tsi ñí, ndi ñuhu ñicanyii, tyin Nyoo Jutu yo cua jandunditsin nu cua coo ñí. Tan maa ñí cua cundaca ñaha ñí tsihin ra tacan ñí maa.

Nu janahá tsi tyin tsa cuyatayin quitsi ra Cristo

⁶Tacan tan catyí ángel can tsihin yu:

—Tuhun ihyá cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahñan tsihin ra cuví ndusu yuhu ra tahán tsanaha, juvin ra jacuhun ángel ra, tyin janahá ra tsi nyiví jahá tyiñu tyiñu ra náa cua cuvi tsa numi ñí —catyí ra.

Tan catyí Jutu Mañi yo:

⁷—Tsa cuyatayin quitsi yu! —catyí ra.

⁸Sii xaan cuví tsi nyiví tsa javahá cuhva caahán tuhun Nyoo tsa nyaá nu libru ihyá!

⁹Yuhu ra Juan, tsiñí yu tan nyehe yu tandihí tuhun ihyá. Tsa yahá nyehe yu tan tsiñí yu itsi, tsicuiñi tsiti yu tsaha ángel tsa janahá itsi tsi yu, tyin jacahnu yu tsi ra.

¹⁰Maa tyin catyí ra tsihin yu:

—Ña jacahnu un tsi yuhu, tyin yuhu, musu Nyoo ñí cuví yu, tumaa yooho tan tandihí ca ra yañi un tsa cuví ndusu yuhu Nyoo, tan tumaa tandihí ca nyiví tyaá yahví tuhun nyaá nu libru ihyá. Intuhun ñí Nyoo taahán tsi jacahnu yo —catyí ra tsihin yu.

¹¹Tan catyí tucu ra tsihin yu:

—Ña tyihi xeehe un tuhun Nyoo tsa nyaá nu libru ihyá, tyin tsa yatayin cuii cundaa tsi.

¹²Maa tyin jañá ndaha tsi nyiví caquiñi, na javaha maa ñí cuhva cuñí maa ñí. Tan nyiví iyó cuatyí, na coo ca cuatyí ñí. Maa tyin nyiví javahá tsa vaha, na jañíhi ca ñí javaha ñí tsa vaha. Tan nyiví tsa jandu iñi Nyoo, na cunyicun vaha ca ñí tsi ra —catyí ra tsihin yu.

¹²Tan Jutu Mañi yo catyí ra:

—Nyehé ndo. Tsa cuyatayin quitsi yu. Tan tyahvi yu tsí intuhun intuhun nyíví tsa cuenda tsa javahá ñí, a javahá ñí tsa vaha o tsa ña vaha. ¹³Yuhu cuví ra jihna ñí, tan yuhu cuví ra cua coo nu cua ndíhi quívi, tsa iyó maa yu nda nu quitsahá tandíhi tan tacan ñí maa cua coo yu nu cua ndíhi tumaa letra A cuví tsi letra jihna ñí tan letra Z cuví tsi letra nu ndíhi ña —catyí Jutu Mañi yo.

¹⁴Sii xaan cuvi tsi nyíví tsa nacatyá jahma, [ñíi janduvahá añima], tyin cua ñíhi ñíndatu catsí ñí tsiti yutun tsa tsahá tsa coo nyito añima yo. Tan cuví quíhví ñí yuhu cora ñuu can. ¹⁵Maa tyin nyíví javahá tsa caquiñi, tumaa ñí tasi, rayii tsa tsicá nuu tsilin ñaha tan ñiñaha tsa tsicá nuu tsilin rayii, tan ñí tsahñí, tan ñí jacahnú tsitoho, tan tandíhi ñí vatya, tan ñí jandaví ñaha; tandíhi maa ñí can, ña cua quíhví ñí tsitsi ñuu can.

¹⁶Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandíhi tuhun ihyá tsi nyíví tsicá vehe ñuhu. Yuhu cuví nyíví tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

¹⁷Tatyí Ii Nyoo tan nyíví yiñí cuenda ra, ñí tsa cuví tumaa ñasíñhi ra Mbee Ticatayí

Luhlu, catyí ñí tyehen:

—Naha ñí, Jutu Mañi yu —catyí ñí.

Tan nyíví tsa tsíñi tuhun ihyá, na catyí ndíhi ñí:

—Naha.

Tan nyíví na ityi iñí tan tandíhi nyíví cuñí quitsi, na quitsi ñí tan coho ñí ndutyá tsa tsahá tsa coo nyito añima yo, tan nduve náa cua tyahvi ñí.

¹⁸Tan tandíhi nyooho tsa tsíñi tuhun Nyoo tsa nyaá nu libru ihyá, cuñí yu catyí yu tsehe tsihin ndo: Nyíví tsa cua janducuaha ca tuhun ihyá, Nyoo cua janducuaha ca ra tundoho tsa nyaá nu libru ihyá siquí ñí. ¹⁹Tan nyíví tsa cua quinyaa juhva tuhun Nyoo tsa nyaá nu libru ihyá, Nyoo cua quinyaa ra tsa taahán tsi tsi ñí tsa nyaá nu libru tsa caahán yóo nyíví cua coo nyito, tan ña cua cuhva ca ra coo ñí ñuu ii. Tan ña cua ñíhi ñí tsa vaha tsa caahán libru ihyá tuhun. ²⁰Tan Jutu Mañi yo, ra tsa tsahá cuenda tuhun ihyá catyí ra tyehen:

—Tsa nditsa tyin tsa cuyatayin quitsi yu —catyí ra.

Tan yuhu catyí yu:

—Na cuvi tsi tacan. Naha ñí, Jutu Mañi yu, Jesús —catyí yu.

²¹Na naquihin tandíhi ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñí.